

# Waitare Wenati Aho

Parecís New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

Mateus .....	4
Marcos.....	41
Lucas .....	65
João.....	104
Atos.....	134
Romanos.....	169
1 Coríntios.....	185
2 Coríntios.....	201
Gálatas .....	211
Efésios .....	217
Filipenses .....	222
Colossenses.....	226
1 Tessalonicenses .....	230
2 Tessalonicenses .....	233
1 Timóteo.....	235
2 Timóteo.....	240
Tito.....	243
Filemom .....	245
Hebreus.....	246
Tiago.....	257
1 Pedro.....	261
2 Pedro.....	266
1 João.....	269
2 João.....	273
3 João.....	274
Judas.....	275
Apocalipse .....	277

# Mateus

## Jesus Nahetakomaniyereharenai

(Lucas 3.23-38)

- 1** Exe baberakoa kaxairatyaka Jesus Cristo nahetakomaniyerenai nexare. Jesus Cristo atyo Davi jikolahare, Davi atyo Abraão jikolahare.
- 2** Abraão atyo Isaque kaisani, Isaque atyo Jacó kaisani, Jacó atyo Judá kaisani, iximarenenai enaxenanenai xoaha kaisani.
- 3** Judá atyo Peres, Zera xoaha kaisani, Tamar atyo inityoha. Peres atyo Esrom kaisani, Esrom atyo Arão kaisani.
- 4** Arão atyo Aminadabe kaisani, Aminadabe atyo Nasom kaisani, Nasom atyo Salmom kaisani.
- 5** Salmom atyo Boaz kaisani, inityo atyo Raabe. Boaz atyo Obede kaisani, inityo atyo Rute. Obede atyo Jessé kaisani.
- 6** Jessé atyo Davi kaisani hoka Davi atyo xekohaseti kalorexexa tyaona. Hatyaoseta Davi atyo Salomão kaisani, inityo atyo Urias ene exanityo.
- 7** Salomão atyo Roboão kaisani, Roboão atyo Abias kaisani, Abias atyo Asa kaisani.
- 8** Asa atyo Josafá kaisani, Josafá atyo Jorão kaisani, Jorão atyo Uzias kaisani.
- 9** Uzias atyo Jotão kaisani, Jotão atyo Acáz kaisani, Acáz atyo Ezequias kaisani.
- 10** Ezequias atyo Manassés kaisani, Manassés atyo Amom kaisani, Amom atyo Josias kaisani.
- 11** Josias atyo Jeconias kaisani, iximarenenai xoaha kaisani Israel yerenai kaxolatyakaha hoka kakolatyakehenahere Babilônia xeta xowakiya.
- 12** Hatyo Babilônia xeta kakolatyakehenahere najikinita Jeconias atyo Salatiel kaisani, Salatiel atyo Zorobabel kaisani.
- 13** Zorobabel atyo Abiúde kaisani, Abiúde atyo Eliaquim kaisani, Eliaquim atyo Azor kaisani.
- 14** Azor atyo Sadoque kaisani, Sadoque atyo Aquim kaisani, Aquim atyo Eliúde kaisani.
- 15** Eliúde atyo Eleazar kaisani,

Eleazar atyo Matã kaisani, Matã atyo Jacó kaisani.

**16** Jacó atyo José kaisani hoka José atyo Maria exanene. Hatyo atyo Jesus nityo, Kalorexexa Enore Aohenere nityo atyo Maria.

**17** Nikare enahetakomaniyerenai hoka Abraão ta exakerexexa kaxihatyakaha Davi tyaohenere kijiya hoka 14-hareha. Nikare Davi ta kaxihatyakehenahitiyaha, Babilônia xeta kakolatyakehenahere kijiya hoka 14-hareha tehitiya. Hatyo kakolatyakehenahere najikinita kaxihatyakehenahitiyaha, Cristo tyaohenere kijiya hoka 14-hareha tehitiya.

## Jesus Cristo Nawenane Tahí

(Lucas 2.1-7)

**18** Jesus tyaohenere atyo exakerexexa: inityo Maria tyaohenere José kakoa nahitita tifalo, Enore nisekohare nikare mokene. **19** Tifalo hoka hatyaoseta José maisa tyaona ekakoa aokowihitita. Hoka José atyo waiyexehare hoka maisa Maria kairaehalotyaka aokita hoka hatyo hiyeta memereta emaisaheta hawenakakoaneha aokowita hoka maisa kasemakita maheta.

**20** Hatyohare tahi ahekoita ene hoka Enore xaxikala anjo kaotyaka enomana inijihinako hoka nexa ihiye: — José, Davi jikolahare, awa atyo hamaikohare hawenane Maria kakoa tahi, Enore nisekohare atyo atifalokisene. **21** Awenakisaite haisani enamokose. Tyaonaita hoka maika hakaixaretene Jesus. Hatyo atyoite iyehetehena haliti haomanerenai iniyalahare enómaneha nonitata — nexa.

**22** Tyotyta nikare tyaona, iraiti xakaisasehare xakaitere akereheta kawenatyakeheta maheta. **23** Exakere iniraine xairatyoare tyaonita iraiti waiyexexa nanekoa: Ohiro mawatyalisakahaloite tifalo hoka awenakisaite enamokose hoka enxare ite Emanuel.

Wiyako maniya atyo, “Enore tyaonita winekoni”, nita.

**24** Hatyaoseta José kaose hoka Enore xaxikala anjo iraitere ekakoa akereheta hatyaonero Maria kakoa tyaona. **25** Xakore hoka maisa atyo watyaliyene hekoti tyaohenere ityani kijiya. Tyaona ityani hoka José atyo Jesus nexareheta kaixaretya xoima.

## Ewaiyasenai Tyoaha Kamai Nihikoane Maniyata

**2** Jesus tyaona wenakalati Belém nali, Judéia koa nali, Herodes xekohaseti tyaonitere xowakiya. Hatyo xowakiya Jesus tyaona najikini haiyanai halitinai tyoaha kamai nihikoane maniyata Jerusalém nali xeta.

Waiyoreta xoresenai kakoa hatyo kaokiterenai hoka<sup>2</sup> kaokaha hoka nexaha, — Aliyako tyaona xoima jude-unai xekohase maheta? Wiyaiya exoresera kamai nihikoane maniyata hoka wisoa wawaiyetene wimaxalo ekakoa maheta — nexaha axahene.

<sup>3</sup> Hatyo tahi sema xekohaseti Herodes hoka amaikohare, tyotya hatyo Jerusalém tyaoniterenai tehitiya amaikohareha.

<sup>4</sup> Hatyaoseta Herodes ahohisakoatya sacerdotenai xekohasenai, Moisés xaotyakira kakoa waiyoreterenai xoaha hoka axahene: — Aliyekoa Cristo nawenane xaokita? nexa axahene.

<sup>5</sup> Hoka nexaha ihiye: — Wenakalati Belém nali Judéia koa. Nikarexe iraiti xakaisasehare xairatya etahi akiti. Exakere xairatyoare tyaonita:

<sup>6</sup> Hiso, wenakalati Belém Judéia koa nali, maisa hikirane xini haiyanai wenakalatinai Judéia koa nali nonitata.

Hihiyetaite kaotyakehena xekohaseti kalorexe hoka kaxaikohena nokaxaikoniharenai Israel hotyalinai.

<sup>7</sup> Hatyaoseta Herodes kawisa kamai nihikoane maniyata tyoiterenai, hawawaha heko irai ekakoaha maheta. — Xoana xowaka kaisere xorese kaotyaka xomana? Xiyakai rota nohiye — nexa axahene.

<sup>8</sup> Irai ekakoaha hoka hatyo najikinita axikatyahene Belém xeta. — Xiyane xatawa waiyekehalaka hatyo xoima xahita. Maika xikaokene hoka xisoa xakaixakaheta natyo hoka natyo tehitiya noxani nowaiyene hoka nawaiyetene, nomaxalo ekakoa — nexa ihiyeha hoka axikatyahene.

<sup>9</sup> Nexa ihiyeha hoka hatyo tyoiterenai jiya xanehenahitiyaha. Ahoti waiyehenahitiyaha xorese waiyahitereta kamai nihikoane maniya nali. Hatyo xorese enahetaha maniya xane, xane amematyoa hatyo xoima tyaonitere hao akiti. <sup>10</sup> Waiyaha xorese hoka masakare ihalahareha. <sup>11</sup> Xane kaokaha, xane isoaha hatyako hoka waiyaha xoima inityo Maria kakoa. Meholoakoaha hakaolise kakoa enomana, awaiyetyahene, maxaloha ekakoa. Hatyo najikinita majiholatyaha haitinihareha hoka isaha enomana maxaimanehareta ouro, incenso, mirra xoaha. (Incenso atyo kakeratyaka hoka airaxekoa mokita, mirra atyo airaxero akerehare airaxe).

<sup>12</sup> Hatyaoseta Enore kaixakatya hatyo tyoiterenai inijihinakoha hoka maisa haikoahenahitaha Herodes tyaonitere nali maheta. Hiyeta hoka haikoahenahititaha hawaikoheraha xeta haho ahoti.

### José Tekoa Haiyanityo, Haisani Kakoa Egito Xeta

<sup>13</sup> Hatyo tyoiterenai xaneheta najikini hatya anjo Enore nalitare kaotyaka José ana inijihinako, nexa ihiye: — Hisekoahena Egito xeta xoima kakoa, exahe inityo xoaha kakoa. Maika xisaona heko nali, ekakoitaite nakaixakaheta xiso. Kalikini Herodes tawita xoima aisene maheta — nexa anjo José hiye.

<sup>14</sup> Nexa hoka José kaose hoka tekoa xoima exahe inityo xoaha kakoa makiyita Egito xeta. <sup>15</sup> Hatyo nali tyaonaha Herodes kamane kijiya. Nikare tyaonaha

Enore iraiti xakaisasehare hiye iraetere akereta kawenatyakeheta maheta. Exakere xairatyoare tyaonita: Nakawiheta nityani hoka Egito nalita tyoheta.

### Herodes Xoimanai Xaisaka Aoka

<sup>16</sup> Hatyaoseta Herodes kamai nihikoane maniyata tyohenerenai xahita atyahahena xakore, makaokeneha enomana hoka ehare. — Kaxiyani, maoseratyaha natyo — nexa hoka ehare, kahenehare tyaona. Hoka axikatyah sorarenai aisaha maheta enamokosenai hinama wanone katyahakoretaterenai Belém naliyerenai, exahe ehaliyita wenakalatisenai koarenai hoka. Nikare ahokotyah, xorese kaotyakehenerere xakaihenahere ihiye hiyeta.

<sup>17</sup> Nikarexe tyaonaha iraiti xakaisasehare Jeremias iraehehene akereta kawenatyakeheta maheta.

<sup>18</sup> Rama yerenai sema osexati, hokotyanka Raquel tiyita haisani mokosenai kawa. Tiya hoka maisa aliyakere kaxemaxalotyakita, tyotya ityaninai wainiha hoka.

### José Haikoaheta Egitota Haiyanityo, Haisani Kakoa

<sup>19</sup> Hatyaoseta Herodes waini hoka ekamane najikini maniya hatya anjo Enore nalitare kaotyaka José ana inijihinako Egito nali hoka nexa ihiye: <sup>20</sup> — Nikahena hoka xoima exahe inityo xoaha kakoa hahaihoaheta Israel waikoherakoa. Aisa xoima aokowiterenai koxaka waini — nexa.

<sup>21</sup> Hatyaoseta José haikoaheta xoima exahe inityo xoaha kakoa Israel waikoherakoa xeta. <sup>22</sup> Hoka semehena atyo José, Herodes ityani Arquelau atyo xekohaseti tyaonita Judéia koa hanexe wenekoare. Semene José hoka maira haxanene kakoa hatyo maniya. Hatyaoseta Enore aotyakihitiyene inijihinako hoka xane Galiléia koa. <sup>23</sup> Xane tyaona wenakalati Nazaré nali. Nikare tyaona iraiti xakaisaseharenai niraene akereheta kawenatyakeheta maheta. Exakere xairatyoare tyaonita:

Nazaré yere nexahaite exaokaka.

### João Batista Batixatya Halitinai

(Marcos 1.2-8; Lucas 3.1-18; João 1.19-28)

**3** Hatyo xowakiya João Batista xane maharexakiti Judéia koa nali hoka xakaihakahena iraiti naliyerenai hiye. <sup>2</sup> Hoka nehena: — Xahalakihena iniyalahare xománe, Xekohaseti Kalorexe Enore nalitare okoi kaotyakehena — nita ihiyeha.

<sup>3</sup> João tahi iraiti xakaisasehare Isaias toahiya xairatya exakere:

Hatya haliti kawijita maharexakiti nali: “Memere ahoti xamohena Xekohaseti naheta, maika totaho xamohena enaheta maniya”.

<sup>4</sup> João ijoita kamelo niyali nomakere, ijiterone atyo militihi. Nijita iri, exahe maha hoka hiyokita.

<sup>5</sup> Tyotya Jerusalém nali tyaoniterenai, Judéia koa tyaoniterenai, exahe one Jordão maniya tyaoniterenai hoka tyoaha enomana, semaha maheta iniraine. <sup>6</sup> —

Alitere iniyalahare kahare wisoma, xakore hoka wahalakisa iniyalahare wawenane waokowita — nexaha ihiye hoka João batixatyahene one Jordão xaiya.

<sup>7</sup> Hoka João atyo waiyehena, fariseunai exahe saduceunai atyo tyoahitaha João batixatyahene maheta. Hoka nehena: — Xiso atyo owi akereta xiyalijinihare. Xala irae xihye hoka motyaite maisa iniyalahare xikaxomokaka xaokita, Enore kaheneharexe iniyalahare axikahenere xowaka? nexa ihiyeha. <sup>8</sup> — Maika xoalini hare waiyexe xisomehena hoka xahotikisa iniyalahare xawenane xihalakira maheta. <sup>9</sup> Hoka awa atyo exakere xahekotya: “Abraão atyo wahetahare hoka maisaiya Enore ehareta wihye”, xehena. Hiyaiya, aliterexe nomi-ta xihye, exe sehali kakoita hiyetaiya Enore aikawatya Abraão jikolahare maheta — nexa.

<sup>10</sup> — Hiyaiya, xawatise atyo memere tyaonita, irikotya maheta atyakatenai ityahare kakoita. Tyotya atyakatenai mawaiyerihare kalitereharenai atyoite kaxityokaka hoka kaxawatya irikatyaose — nexa.

<sup>11</sup> — Natyo atyo nabatixatya xiso one kakoa iniyalahare xománe xihalakira xahotikisa maheta. Hoka tyoaita hatya najikini maniya, noxaehare atyo. Hakijitini kolatyakaiya aoka nohiye hoka nihalahareya nakolatene enomana, noxaehare hoka. Hatyo atyoite batixatya xiso Isekoahali waiyexe kakoa, exahe irikati kakoa xoaha — nexa.

<sup>12</sup> — Abali koxaka ekahekoa, hatyo kakoaita haware moka trigo ekate nonitata hoka trigo ite moka exomokakala ako, hoka keratyaite ekate irikati mawakenehare tyaonitere koni — nexa João ihiyeha. (Halitinai xaokaka nikare João iraeta).

### Jesus Kabatixatyaka

(Marcos 1.9-11; Lucas 3.21, 22; João 1.32-34)

<sup>13</sup> Hatyo xowakiya Jesus tyoa hikoa Galiléia koa nali-ta, tyoa one Jordão nali, João batixatene maheta.

<sup>14</sup> Xakore hoka kaokohena Jesus hoka João nehena irahena ekakoa: — Natyoiya kahane habatixatya, hiso tyatyo noxaehare. Aliyakereyatya nabatixatya hiso? nexa.

<sup>15</sup> Hoka Jesus nehena ihiye: — Kala naokitere akere wisaona. Nikare ite hoka tyotya wisoma Enore aokitere akereta — nexa Jesus.

Nexa Jesus hoka João tyakeko iniraine hoka batixatene.

<sup>16</sup> Batixatene najikinita, Jesus kenekoahetehena onexata hoka enokoa totakore tyaona hoka waiyehena atyo Jesus, Enore Nisekohare exoahena enomana, motya watyaha hoka tyoa tyoka ihiye.

<sup>17</sup> Enokoata iraiti nehena: — Exe atyo nityani, noxiyakawali, nihalahare mokita — nexa.

### Tihanare Hasakaharehena Jesus

(Marcos 1.12-13; Lucas 4.1-13)

**4** Hatyaoseta Enore Nisekohare axanekisa Jesus maharexakiti Tihanare hasakaharetene maheta. <sup>2</sup> Jesus tyaona 40-ki ferakene, 40-ki makene. Maisa kanakairare hoka hatyaoseta nakehena. <sup>3</sup> Hatyaoseta

ehasakaharetyase tyoa kaoka enomana hoka nehena ihiye: — Enore ityaniya atyo hiso hoka exe sehalinai haikawatya nakairati hoka hikanakaira — nexa ihiye.

<sup>4</sup> Hoka Jesus nexa ihiye: — Exakerexe Iraiti Waiyexe xairatyoare tyaonita:

Maisa nakairati xema taita xini haliti nawenane tyaonita. Enore iraihenere tyotya xema tehitiya wenati tyaonita.

<sup>5</sup> Hatyaoseta Tihanare noloka Jesus Jerusalém nali xeta waiyexe wenakalati nali hoka xane ekakoa Iraexatyalakati Hana maiyeho hoka irahena ekakoa. <sup>6</sup> — Enore ityaniya hiso hoka hahalaisoaheta exaoseta.

Hiyaiya, exakerexe Iraiti Waiyexe xairatyoare tyaonita:

Enore ite axikatya anjonai hoka kaxaiko hiso. Otokahaite hiso hakaheha kakoa hoka maisa hikijinai hekoti kawe hamokita sehalinai hiye.

<sup>7</sup> Hoka Jesus nexa ihiye: — Iraiti tehitiya exakerexe xairatyoare tyaonita:

Awa atyo hahasakaharetya Hiyekohase Enore.

<sup>8</sup> Hatyo najikinita Tihanare noloka Jesus hatya tyairi heno enoakiya hoka hotikisa enomana hakakoare waikohekoa, waiyexe wenati, xiyehaliti xoalini hare kahare hotikisa enomana hoka nehena: <sup>9</sup> — Hameholokoaiya nahalakoi, hawayityaiya natyo hoka exeharenai tyotya nisa homana — nexa Tihanare Jesus hiye.

<sup>10</sup> Hoka Jesus nexa ihiye: — Hiyanehetehena, Ahalakoahali! Iraiti Waiyexe exakere nexa:

Hawayehena hiyekohase Enore, exahe ekoamaniya taita hisaohena.

<sup>11</sup> Nexa Jesus hoka hatyaoseta Tihanare halakisene hoka anjonai tyoa kaokaha enomana hoka kahi-naetene.

### Jesus Hahena Galiléia Nali

(Marcos 1.14-15; Lucas 4.14-15)

<sup>12</sup> Hatyaoseta Jesus sema João xolatya hoka haikoaheta Galiléia koa xeta. <sup>13</sup> Xakore hoka maisa Nazaré nali tyaonita hoka xane wenakalati Cafarnaum nali tyaona. One Galiléia xa haliya, Zebulom, Naftali xoaha waikohera koa. <sup>14</sup> Nikare tyaona iraiti xakaisahare Isaiás iraitere akereta kawenatyaka maheta:

<sup>15</sup> Zebulom, Naftali xoaha waikohera one kaloxere maniya, Jordão xa halakoiya maniya, Galiléia koa xoaha nali, majudeuneharenai tyaonitere nali.

<sup>16</sup> Hatyonai atyo makaliroti koni tyaonahitaha hoka xaokanatyakalati kalorexite ite kaotyaka enomanaha. Hoka xaokanatyakalati aokanahena makaliroti koni wainihenerenai ana.

<sup>17</sup> Hatyo najikinita Jesus xakaihena hairaine ihiyeha. Nehena: — Xahalakihena iniyalahare xománe, Xeko-haseti enokoatere okoi kalorexite tyaohena — nexa.

### Jesus 4-hare Mairatyatienai Aoka Haomana

(Marcos 1.16-20; Lucas 5.1-11; João 1.35-42)

<sup>18</sup> Hatyaoseta Jesus tona kilihijita ene one Galiléia xa hoka waiya hinamahare haximarene kakoarenai,

Simão Pedro, André xoaha. Maka kakoa mairatyahitaha, mairatyatienai hoka.

<sup>19</sup> Hoka Jesus nexa ihiyeha: — Xisohena noximi hoka naotyakisa xiso hoka halitinai nolokasehare xisaona — nexa ihiyeha.

<sup>20</sup> Nexa ihiyeha hoka halakisaha rotita maka kohase hiyakakala hoka xaneha Jesus xema.

<sup>21</sup> Hatyaoseta Jesus jiyihitiya, maisekoneseta waiyihitiya hinamahare haximarene kakoarenai, Tiago, João xoaha, Zebedeu ityaninai. Tyaonahitaha kanowa ako hanexeha kakoa, tyomaharehenahititaha hahiyakakalaha. <sup>22</sup> Jesus kawisahene hoka halakisaha rotita hanexeha exahe hakanowaneha xoaha hoka xaneha Jesus xema.

### Jesus Aotyakijita Exahe Aiyatelikihitita Halitinai (Lucas 6.17-19)

<sup>23</sup> Hatyaoseta Jesus xane hakakoare Galiléia koa tonakoatya. Kaokehena wenakalati hoka aotyakisahitene xahohisakoatyakalati hanako. Iraitu waiyexe xakaita ihiyeha Xekohaseti Kalorexe Enore nalitare kaotyakene tahi. Haiyaharenai hokakiterenai aiyatelikihitita ekahehareha nonitata.

<sup>24</sup> Ekakoita etahi akiti semaha hakakoare Síria koa maniya. Hatyo hiyeta halitinai kolatya hokakiterenai Jesus ana, kahare hawareharexe kahehaliti kakoarenai, tihanare kamilakoretiterenai, hatyahalitinai, wainitaterahrenai exahe maetonaneharenae xoaha hoka tyotya aiyatelikihenahititene.

<sup>25</sup> Hoka kahare halitinai xaneta exema Galiléia koa yerenai, Decápolis nalitarenai, Jerusalém nalitarenai, Judéia koa nalitarenai, one Jordãoxa halakoiya tarenae xoaha.

### Ihalahaliti Exahe Xamaikohaliti Xoaha (Lucas 6.20-26)

**5** Haxowakiya Jesus hisoaka halitinai waiya hoka kakoha tyairi henose hoka xane tyoka. Hoka exaotyakiraharenae tyoa kaokaha ehaliya <sup>2</sup> hoka aotyakihenahene, nehena ihiyeha:

<sup>3</sup> — Waiye kaiserehare atyo maxaokowiharetyoanehare tyaonitereharenai. Hiyaiya, Xekohaseti enokoatare waikohera atyo enomanereha.

<sup>4</sup> — Waiye kaiserehare atyo tiyitereharenai. Hiyaiya, Enore atyoite emaxalokihenahitene.

<sup>5</sup> — Waiye kaiserehare atyo waiyexeharexenai. Hiyaiya, kaxekaka atyoite enomanaha Enore aokitereharenai.

<sup>6</sup> — Waiye kaiserehare atyo Enore aokitere akereta tyaona aokowitereharenai. Hiyaiya, hatyo aokahitere akereta atyoite mokahene.

<sup>7</sup> — Waiye kaiserehare atyo airakoanetitereharenai haiyaharenai. Hiyaiya, Enore atyoite airakoaneharetyahene tehitiya.

<sup>8</sup> — Waiye kaiserehare atyo iniyalahare maomanehare ahekoiterenai. Hiyaiya, waiyaha atyoite Enore.

<sup>9</sup> — Waiye kaiserehare atyo waiyexe wenati atyahitereharenai. Hiyaiya, Enore atyoite haisani akereeta mokahene.

<sup>10</sup> — Waiye kaiserehare atyo kairaeharetyakitereharenai Enore aokitere akereta tyaonahitere hiyeta. Hiyaiya, Xekohaseti enokoatare waikohera atyo enomanereha.

<sup>11</sup> — Waiye kaiserehare atyo xikairawaiyakehena, xikairaeharetyakehena exahe kahare iniyalahare kairaityakehena xitahi, nokoamaniye xisaonitere hiyeta hoka. <sup>12</sup> Maika xihalaharehena, nikare mohenaha xiso hoka. Hiyaiya, kalorexe xibakatyakala atyo ityakaisakahare tyaonita xomana enokoa nali. Hiyaiya, nikare atyo kairaeharetyaka iracti xakaisaseharenai xahetakomaniyereharenai.

### Salo, Xaokanatyakalati Xoaha Tahu (Marcos 9.50; Lucas 14.34-35)

<sup>13</sup> — Xiso atyo salo akere xisaonita halitinai koni. Xakore hoka salo atyo makexenehena hoka maisa atyo saloheta xini. Maisa atyo xoare hare niyahareheta xini. Hoka kaxawatyakita atyo hoka jiyitereharenai tya-hakitene — nexa Jesus.

<sup>14</sup> — Xiso atyo xaokanatyakalati akere xisaonita tyotya halitinai koni. Hiyaiya, maisaiya aliyakere hateroakijita wenakalati tyairi heno kaomakehenere.

<sup>15</sup> Nikare maisa xala hare aotakatya xaokanatyakalati hoka koho katyahe mokare. Hoka kaxaotakatyakehena hoka exomokakaose terota kaxomokakita hoka tyotya hatyako tyaoniterenai ana aokanaita. <sup>16</sup> Nikareta tehitiya xiyaokanala aokanahena, haiyanai waiyaha maheta xalini hare waiyexe xománe hoka ihalahareha Xexe enokoa tyaonitere kakoa maheta — nexa.

### Xaotyakiyaho Xaotyakisaka Tahu

<sup>17</sup> — Awa atyo motya notyoo nemaisaheta maheta Moisés exahe iraiti xakaisaseharenai xaotyakira xao-hena. Maisa atyo notyoo nemaisahetene maheta xini. Notyoo atyo exaotyakiraha akereta kaomakeheta maheta. <sup>18</sup> Aliterexe nomita xihiyee: hekotataite waikohe, enokoa xoaha tyaonitata hoka maisaiya xoare hare kaxemaiyaretyakihitita xaotyakiye ahotare, maisaiya hase hekoti kaxemaiyaretyakihitita. Nikare taite kawenatyaka tyotya xalini hare miyane kijiya. <sup>19</sup> Hatyo hiyeta xala xamani atyoite matyakekotya kiranexe xaotyakisati hoka hatya aotyakisa hoka nikareta tyaona hoka hatyo atyoite haiyaharenai katyahakoreta tyaona, Enore nalitare Kalorexe tyaohehene xowaka. Xakore hoka xala xamani atyoite tyakeko xaotyakiyaho hoka hatya aotyakisa hoka nikare tyaona hoka kalorexe atyoite tyaona Enore nalitare Kalorexe tyaohehene xowaka. <sup>20</sup> Hiyeta hoka nomita xihiyee: maisaiya fariseunai exahe xaotyakiyaho kakoa waiyoreterenai xahe nawaiye xisaonita hoka maisaiya aliyakere Xekohaseti enokoatare waikohera xiyaneta.

**Irawaniti Tahī**

(Efésios 4.26; Tiago 1.19-20; 1 João 2.11)

<sup>21</sup> — Koxaka xasema xahetakomaniyereharenai hiye niraityaka:

Awa atyo xaisa. Xala xamani atyoite aisa haliti hoka kakolatyakaite kalorexe ana.

<sup>22</sup> — Hoka natyo atyo nomita xihye: xala xamaniya ehare taita hahinaehare hiye hoka kakolatyaka atyoite kalorexe ana. Xala xamaniya nexa hahinaehare hiye: “Maisa xoare nyahare hiso”, nexaiya ihiye hoka kakolatyakaia kalorexe ana. Xala xamaniya hahinaehare hatyaharene aoka hoka irikati koni haxanene atyo aheteretita.

<sup>23</sup> — Hatyo hiyeta maika hafetatya haokowihena kirakahare Enore ana hoka hotehetehena hihinaehare xéharene hihye hoka <sup>24</sup> hahalakisa hatyo kirakahare ekeratyakaose haliya hoka hiyane wenati waiyexe hao-heta hihinaehare ana. Hatyaosetaite hahaikoaheta hoka hafetatene Enore ana.

<sup>25</sup> — Hoka maika hatya kahalakoaharehena hikakoa hoka kolatya hiso kalorexe ana aokowihena hoka maika ahotita hirae ekakoa. Waiya aliya hoka kalorexe ana kaoka hikakoa hoka isaiya hiso kalorexe ana hoka hatyo kalorexeya isa hiso sorare ana hoka berexo akoiya moka hiso. <sup>26</sup> Aliterexe nomita, maisaiya habakaita tyotya hoka maisaiya hahikoahitita berexo akota — nexa Jesus ihiyeha.

**Maiyaseti, Halakisatiheta Xoaha Tahī**

(Mateus 18.8-9; Marcos 9.43-49)

<sup>27</sup> — Koxaka xasema xahetakomaniyereharenai hiye niraityaka:

Awa atyo hatya nohiroxa xiwatyali.

<sup>28</sup> Hoka natyo atyo nomita: xala xamaniya atyo wahakotya hatya ohiro ana, kasaniya watyalini aokowita hoka hatyoia koxaka iniyalahare tyoma haxahékola kakoa.

<sup>29</sup> — Hiyeta hoka hifihini maniyere hiyoseya iniyalahare axomokanikijita hiso hoka holokotya hiyene hoka haxawatene. Ehekoretaiya meta hatyo ini akiti hiháre hiyetare. Hoka maisaiya atyo ehekoreta xini hiháre mainikere kakoareta hikaxawatyaka irikati koni hoka.

<sup>30</sup> Nikare hifihini maniyereya hikahiya iniyalahare axomokanikijita hiso hoka hirikotene hoka haxawatene. Ehekoretaiya meta hatyo ini akiti hiháre hiyetare. Hoka maisaiya atyo ehekoreta xini, hiháre mainikere kakoareta hikaxawatyaka irikati koni hoka — nexa Jesus.

**Halakisakakoati Tahī**

(Mateus 19.9; Marcos 10.11-12; Lucas 16.18)

<sup>31</sup> — Exakere tehitiya kairaityaka koxakereharenai hiye:

Xala xamani haiyanityo halakiheta aokowita hoka maika isa enomana babera halakisati baberanexa hoka axikahetene.

<sup>32</sup> Hoka natyo atyo nomita: hatyaiya haiyanityo halakiheta, maisa xakoreya hatya ena watyaliyene hoka hatyoia atyo maisa waiyeta. Waiya aliya hoka hatya kakoa tyaothetehitiya hoka iniyalahareya tyoma. Exahe hatyo ena tyaothenerere ekakoaiya iniyalahare tehitiya tyoma — nexa Jesus.

**Hisomehena Hiraetere Akereta**

(Tiago 5.12)

<sup>33</sup> — Koxaka xasema xahetakomaniyereharenai hiye kairaityakehenerere: “Awa atyo xahalakisa xisoma xaokowiterehare, xakore hoka maika xisomehena xisoma xaokowiterehare Xekohaseti hiye xiraehenerere”.

<sup>34</sup> Hoka natyo atyo nomita: awa atyo exaliti harenai xakaixaretya xikatyakekotyaka maheta. Awa atyo enokoa xakaixaretya, hiyaiya, Enore nokahakala atyo.

<sup>35</sup> Exahe waikohe tahi hoka xakaixaretya, hiyaiya, hatyo heno atyo mokita hakiji. Exahe Jerusalém xakaixaretya, hiyaiya, hatyo atyo Xekohaseti Kalorexe nawenakala. <sup>36</sup> Awa atyo xiserinai xakaixaretya. Hiyaiya, maisaiya xisonai hakaseti sekatisa xaiyomakasetita xamani, exahe xakiyakasetita xamani.

<sup>37</sup> Maika xehena taita: “Há”, xehena xamani, “Mahaiya”, xehena taita. Hiyaiya, xoare xexa xamani atyoite hatyo xahexe hoka hatyohare atyo Tihanare nalita tyoita — nexa ihiyeha.

**Waiye Hamohena Hahalakoaharenai**

(Lucas 6.29-30)

<sup>38</sup> — Koxaka xasema exakere kairaityakehenerere:

Hatyaiya wataka hiyose hoka hatyo nahalakoa hawataka exose, hatyaiya taika haikoli hoka hatyo nahalakoa enaikoli hataika, nexa.

<sup>39</sup> Hoka natyo atyo nomita xihye: awa atyo hatya iniyalahare mohena xiso hoka hatyo nahalakoa iniyalahare xamokene. Hoka maika hatya mokohena hiso hitanakoli hiye hoka hamaniya tanakoli tehitiya hehaika enomana hoka mokohitiya. <sup>40</sup> Hoka maika hatya aiyateretyoa hihye, kolatya maheta hima hoka hisene enomana, exahe himanase tehitiya hisa enomana.

<sup>41</sup> Hoka maika sorare aiyateretyoa hihye hakolatya maheta kolare hakilometrone enomana hoka maika hinama kilometrone hakolatene enomana. <sup>42</sup> Hoka maika hatya axehena hiso xalini hare hoka hisene enomana. Exahe hatya axehena hiso xalini hare hoka isehetene homana maheta hoka hisene enomana — nexa Jesus.

**Waiye Xamoka Xahalakoaharenae**

(Lucas 6.27-28, 32-36; Lucas 23.34; Atos 7.60; Romanos 12.14, 17-21)

<sup>43</sup> — Koxaka xasema kairaityakehenerere:

Hawaiyehena hihinaeharenai hoka hikirawanehena hahalakoaharenai.

<sup>44</sup> Hoka natyo atyo nomita xihye: maika xawaiyehena xahalakoahenerenai, xiraexahena kirawaneterenai xiso ana. <sup>45</sup> Nikareya xisaona hoka Xexe enokoa tyaoitere ityaninaiya xisaona. Hiyaiya, waiyexeharenai, mawaiyexeharenai xoaha ana atyo kamai



axaokanatyakijita, exahe hoka aonekijita atyo waiyexe tyomiterenai, iniyalahare tyomiterenai xoaha ana.  
<sup>46</sup> Hiyaiya, awaiyetiterenai xiso taitaiya xawaiyetita hoka xoanere hoka xoalini hare Enore xekane xahita xatyahita? Hiyaiya, nikare atyo kalorexexehare noloxa rese-betyaseharenai haxawaiyetyaseharenai awaiyetyahita-ha.  
<sup>47</sup> Hoka xihinaehare hiye taitaiya xikatyawaxita hoka hatyohare atyo maisa xoanereta xini. Hiyaiya, matyakekoneharenai kakoita atyo nikare tyaonita.  
<sup>48</sup> Hiyeta waiye maniyaira xisaona Xexe enokoa waiye tyaonitere akereta — nexa Jesus haxaotyakiraharenai hiye.

### Maoloxaharenai Kahinaetyaka Tah

**6** — Hiriharíra! Hoka awa atyo hawenanaho waiyexe xema hisaonitere hiyeta, hatyoharenai hisoma halitinai haotita, waiyaha hiso maheta taita. Nikareya hisaona hoka maisaiya xoare hare Hexe enokoa tyaonitere ijita homana.  
<sup>2</sup> Hoka maika xoalini hare hisehena maxiyeharehare ana hoka awa atyo hatyoharenai hiyakaikoatya, teraharetyoarenae akere-ta. Nikare atyo tyaonahitaha, halitinai ihalahareha ekakoaha maheta taita. Hoka exeharíra xotyaxematya: koxaka atyo kaxekaka enomanaha xoalinihare.  
<sup>3</sup> Maika hakahinaehena hatya maxiyeharehare, himeteneta nikare hisoma hoka maisa hihinaehare hekoti hikahinaera waiyita.  
<sup>4</sup> Hoka hatyoharenai atyoite metereta tyaohe. Hoka Hexe atyoite waiya hatyoharenai himeteneta hisomehenerehare hoka isaite homana xoalini hare waiyexe hatyo nahalakoa — nexa Jesus.

### Jesus Aotyakisa Iraexatyati Kakoa

(Lucas 11.2-4)

<sup>5</sup> — Maika xiraexahena hoka awa atyo teraharetyoarenae iraexaitere akereta xisaona. Hatyonai atyo tityoaha xahohisakoatyakalati hanako exahe ahotiaho hare hoka iraexatyahitaha, kasani halitinai waiyahene aokahitaha hoka. Hoka exeharíra xotyaxematya: koxaka atyo kaxekaka enomanaha xoalinihare.  
<sup>6</sup> Hiyeta xiraexatya xaokowihena hoka xiyane xihanako hoka xajihotyao hoka xiwawaharenai xiraexatya Xexe Enore hiye hoka maisa xikawaiyakita. Xexe Enore atyoite waiyehena xisomitere ximeteneta hoka isehena xomana xoalinihare waiyexe hatyo nahalakoa.

<sup>7</sup> — Xiraexahena hoka awa atyo Enore maniya mawenaneharenai akereta xiraexatya. Hatyonai atyo iraexahena hoka hatyaoseta iraexaheta xoahita, motya iraexatyaha kahareki hoka Enore semene aokahitaha.  
<sup>8</sup> Awa atyo hatyonai akereta xiraexatya. Xexe Enore atyo koxaka otita xoalini hare xaokitere xiyaxane nahitita.

<sup>9</sup> — Hiyeta hoka exakere xiraexatya:

Wexe Enore, hiso atyo enokoa hisaonita. Kasani tyotyaha aiminisaha hiso waokita.

<sup>10</sup> Hisohena ali Xekohaseti hisaona maheta. Kasani ali waikohekoa haokitere akereta tyaona waokita, enokoa nali kaomakitere akereta.

<sup>11</sup> Kasani nakairati hisa womana tyotyaki ferakene waokita.

<sup>12</sup> Himaotyanehetehena iniyalahare wisomiterehare-nai, haiyaharenai iniyalahare mohenerere wiso wimaotyanehititere akereta.

<sup>13</sup> Hoka awa atyo hahalakihena wiso hoka wika-hasakaharetyakehena. Xakore hoka maika iniyalahare nonitata hiyehetehena wiso. Hiyaiya, homanere atyo waikohe. Iyateliti exahe kaihalaharetyaketa mene hikakoa waokita, xoaha taita.

<sup>14</sup> — Ximaotyanehetaiya haiyanai iniyalahare mohenerere xiso hoka Xexe enokoa tyaonitere tehitiyaiya maotyaneheta iniyalahare xománe.  
<sup>15</sup> Hoka maisaiya atyo ximaotyanehitita haiyanai iniyalahare mohenerere xiso hoka Xexe enokoa tyaonitere tehitiyaiya atyo maisa maotyaneheta iniyalahare xománe — nexa Jesus ihiyeha.

### Jesus Aotyakisa Manakairiti Enore Hiyeta Tah

<sup>16</sup> — Maika ximanakairehena Enore hiyeta hoka awa atyo xamaikohare tiho xisaohena, teraharetyoarenae akere-ta. Hatyonai atyo nikare tyaonahitaha, kasani haiyanai ana emanakaireneha waiyekehalaka aokahitaha hoka. Hoka xotyaxematyaira exeharenai: koxaka atyo xoalinihare kaxekaka enomanaha.  
<sup>17</sup> Hoka maika himanakairehena Enore hiyeta hoka hatihatihotyao hoka hatilikoa hoka  
<sup>18</sup> maisa haiyanai otita himanakairene maheta. Hoka Xexe Enore mawaiyakahare takita atyoite waiya tyotyaha himeteneta hisomiterehare hoka isa homana xoalini hare waiyexe hatyo nahalakoa — nexa Jesus ihiyeha.

### Jesus Aotyakisa Xiyehaliti Matyotenehare Tah

(Lucas 12.33-34; 2 Timóteo 4.8; Hebreus 10.34-39; 2 Pedro 1.4-5)

<sup>19</sup> — Awa atyo xixiyeharenae kahare xamoka xaokowi ali waikohekoa. Hatyoharenai atyo kirakahare sesekita, exahe kaijikali tyaonita hoka mawenekoareta, exahe kaiwarexenai hoka isoaha hatyako hoka kaiwitene.

<sup>20</sup> Maika enokoa nali xixiyehare xamoka xaheta maniya. Hatyo nali atyoite maisa kirakahare aiyalaharetitene, exahe kaijikali tyaonita, exahe hoka maisaiya kaiwarexenai isoaha hoka kaiwitene.  
<sup>21</sup> Aliye xamaniya xixiyehare xamokita hoka hatyo nali tehitiya atyoite xiyahékola tyaonita — nexa.

### Xaokanatyakalati Tah

(Lucas 11.33-36)

<sup>22</sup> — Xiyosenai atyo xaokanatyakalati akereta tyaonita xiháre hiye. Xiyosenaiya waiyese hoka waiyeya xiyaiyakatya.  
<sup>23</sup> Hoka xiyosenaiya atyo maisa waiyese hoka makaliroti koni atyo xisaonita. Nikareya xiyahékola iniyalahare maniya tyaonita hoka makaliroti koni atyo xisaonita. Hatyo makaliroti atyo kahenehare — nexa Jesus.

**Hinama Xekohaseti Tahī**

(Lucas 16.13; Lucas 12.22-31)

<sup>24</sup> — Hatitaiya wakahare hoka maisaiya aliyakere hinamahare kaxekohaseta. Nikareya hoka hatya awaiyetita, hatya maisa awaiyetyare xoahaiya. Tyakekota hatya, hatya maisa tyakekore xoahaiya. Nikare tehitiyaiya maisa aliyakere Enore maniya hahekoita, olo xiyehaliti harenai maniya hahekoita xoaha haxowakita — nexa Jesus.

<sup>25</sup> — Hiyeta hoka nomita xihiyē: awa atyo xamaikoharehena nakairati, erati harenai xaokiterenai xawenane niyahare kakoa, exahe imiti xaokitereharenai xiyisoane niyahare kakoa hoka. Xoana wenati kore atyo maisa nakairati xahehare xini? Xoana xihāre kore atyo maisa imiti xahehare xini? <sup>26</sup> Xiyaiyehena kotehalasena ainakoitereharenai. Maisa atyo fityareha hanakaira, maisa imexareha, maisa mokareha hanakairaha hahanakoha. Xakore hoka Wexe enokoa tyaonitere atyo ijita enakaira enomanaha. Hoka xoana maisa korala exe kotehalanai xahexehare xini xiso? nexa.

<sup>27</sup> — Awa atyo xamaikohare mene xawenane kakoa. Hityokahokoseya hoka hiwahahare hisaoheta haokowita hoka hamaikohareta hoka hiyamaikoharene atyo maisa xoarehare tyomare.

<sup>28</sup> — Xoana hoka xamaikohareta ximaimene kakoa? Xiyaiyehena, iyitinai waiyehare kekoarehitaha. Maisa hakareha exahe maisa tyomare haimaha. <sup>29</sup> Xakore hoka nomita xihiyē: Salomāo xekohaseti tyaonitere xowakiya kalorexe xakore hoka maisa imiti exe iyitinai nawaiyehare akere ako isoare. <sup>30</sup> Enore xaokalita atyo atyamokose ime harenae waiyehare tyaonita. Kalini waiyehare tyaonitaha hoka makani wainihenahitaha hoka kakeratyakahitaha irikatyaose. Hatyo hiyeta aliterexe ite kaimatya tehitiya xiso. Hoka xityakekone atyo kirane.

<sup>31</sup> — Hiyeta hoka awa atyo exakere xexa xamaikohare: “Aliyakotaite wikaokhehena winakaira werane exahe wima hoka?” <sup>32</sup> Hiyaiya, hahotyaliharenai atyo nikare taweta menahitaha tyotya hatyoharenai. Hoka Xexe enokoa tyaonitere atyo waiyoreta tyotya xaokitereharenai kakoa hoka hatyoharenai atyoite isa xomana. <sup>33</sup> Hiyeta hoka Enore maniya hotohare xawenane xamoka, exahe Enore aokitere akereta xisaona hoka hatyo atyoite isehena xomana tyotya xoalini harenai. <sup>34</sup> Hiyeta hoka awa atyo xamaikohare makaniye ferakene kakoa. Hiyaiya, hatyo kamaetaliye ferakene atyo maisa waiyehalakehena xomana. Maika xahekohena xisaonitere ferakene kakoa taita — nexa Jesus haxaotyakiraharenai hiye.

**Awa Atyo Hiraeharetya Haiyanai**

(Lucas 6.37-38, 41-42; Romanos 2.1-2; 14.1; 1 Coríntios 4.5)

**7** — Awa atyo xiraeharetya haiyaharenai, waiya aliya hoka xikairaharetyaka tehitiya. <sup>2</sup> Hiyaiya, xahekoitere haiyaharenai kakoa akeretaite Enore moka xiso, exahe haiyanai xamokitere akeretaite moka xiso.

<sup>3</sup> — Xoana hoka holoxotise xihinaehare xose ako tyaonitere atyo xiyaiyita hoka maisa atyo atya taose xiyose ako tyaonitere xiyaiyare? <sup>4</sup> Aliyakereya xihinaehare hiye xehena: “Nikahena hoka niyeheta holoxotise hiyose akota”, owene xakore tyaonita atya taose xiyose ako hoka? <sup>5</sup> Xasemehena, teraharetyoarenai, xiyehetehena hotohare atya taose xiyose akota hoka hatyaosetaite waiye xiyaiyakaheta hoka xiyeheta holoxotise xihinaehare xose akota — nexa Jesus ihiyeha.

<sup>6</sup> — Awa atyo xisa kajolonai ana Enore anerenai, waiye aliya hoka kahalakoahareha xikakoa hoka tyalokaha xiso. Exahe awa atyo xaxawatya sehalse kaxaimanexe bolokonai ana. Waiya aliya hoka tyahakahene — nexa.

**Xaxehena Enore**

(Lucas 11.9-13)

<sup>7</sup> — Xaxehena hoka xikaoxekaka. Xataweniya hoka xikaokene. Xamokotyaiya hati jihola hiye hoka majiholateniya xomana. <sup>8</sup> Hiyaiya, tyotya axiterenai ana atyo kaxekaka, tawiterenenai atyo kaokitene, jihore atyo majiholatyoita mokotitereharenai ana.

<sup>9</sup> — Xoana, hatya xinekonitare ityaniya axehena hanexe nakairati hoka isaiya sehali enomana?

<sup>10</sup> Xoana, isaiya enomana owi, kohase axehena hoka?

<sup>11</sup> Xiyaiya, maisa xakore xawaiyexe hoka xawaiyore atyo xijita xoalini hare waiyexe xityaninai ana. Nikare tehitiyaite Xexe enokoa tyaonitere isehena xoalini hare waiyexe axiterenai ana.

<sup>12</sup> — Aliyakere xamani halitinai moka xiso xaokita hoka nikareta tehitiya xamohena halitinai. Exe atyo Moisés, iraiti xakaisaseharenai xoaha xaotyakira — nexa Jesus ihiyeha.

**Hinamaho Ahotyahanai**

(Lucas 13.24; Filipenses 3.19-20)

<sup>13</sup> — Xisoahenaira xisoakalati kiranahore. Hiyaiya, hatya xisoakalati kaloahore, exahe waiye netonatyaka atyo, xakore hoka mawenekoaretyati aho atyo. Hoka kahare haliti tonita enaho. <sup>14</sup> Xisoakalati kiranexe aho atyo howitihare netonatyaka, xakore hoka wenati waiyexe xetare atyo hoka haiyanai taita atyo tonita enaho — nexa Jesus.

**Xiriharíra Iraitī Xakaisaseharenai Metalahare Kakoa**

(Lucas 6.43-44; João 15.4; Tiago 3.11-12)

<sup>15</sup> — Xiriharira iraiti xakaisaseharenai metalaharenai kakoa. Kaokahaite xomana hoka kalanero maxalijiniharehahere akeretaite tyaonaha, xakore hoka exahokolaha atyo kahenehare. Ahoxa xalijiniharexe akere-ta atyoite. <sup>16</sup> Maika waiyehalakehena xomana enawenanehiya. Katohere katenai kalihena hoka maisa atyo uvali kaliye. Exahe atya kaewero katenai kalihena hoka maisa halohalose kaliye. <sup>17</sup> Nikareta atya kanakairoare kate kalihena hoka waiyexe atyali kalita. Nikare tehitiya atya ewaxirahare kate kalihena hoka maisa waiyexe atyali xini kalita. <sup>18</sup> Nikareta

kanakairoare kate ite kalihena hoka maisaiya manakairatyakahaliri kalita, maisaiya atya manakairatyakahare kate hoka atyali kanakairoare kalita. <sup>19</sup> Tyoty atyatenai manakairatyakahaliri kaliterenai atyo kaxityokaka hoka kaxawatyakahitaha irikati aose. <sup>20</sup> Nikare ite waiyekehalakaharehena xomana iraiti xakaisahare metalaharenai enómaneha hiyeta — nexa Jesus.

#### Maisa Atyoite Tyotyaha Xini Enokoa Xaneha

(Lucas 13.25-27; 2 Corintios 11.13-15; 2 Pedro 2.1; 1 João 2.3-6; 5.12)

<sup>21</sup> — Kahare haiyaharenai nexahitaha: “Xekohaseti, Xekohaseti”, nitaha nohiye. Xakore hoka maisaite tyoty hatyoharenai Xekohaseti enokoatare waikoherakoa xaneta. Hoka Baba enokoa tyaonitere aokitere akereta tyaoniterenai taita atyoite nali xane. <sup>22</sup> Hatyo xowakehenaite hoka kahare ite nehenaha nohiye: “Xekohaseti, xekohaseti, hexare kakoa wiyakai iraiti Enore tahi, hexare kakoa kahare tihanarenai waxanikiheta halitinai nonitata, kahare maomakahare waiyexe wisoma”, nexahaite nohiye. <sup>23</sup> Xakore hoka nomi-henaite ihiyeha: “Maisa nowaiyanihare xini xiso. Xakisoahetehena noniti, xiso atyo iniyalahare taita nomaseharenai”, nomihenaite ihiyeha — nexa Jesus.

#### Hinama Hatinae Tahi

(Lucas 6.46-49)

<sup>24</sup> — Xala xamani atyo sema exe niraeni hoka tyaona exema hoka haliti hatya waiyorexe tyomehenere hahana sehali heno akerexeta atyo. <sup>25</sup> Tyoma hahana mematenene hoka one kaloxehena hoka kahekoakoa moka exahita, exahe kintatyawiniti hoholatya hatyo hati xahita. Xakore hoka maisa exoakijitene, waiye nomakere sehali heno hoka. <sup>26</sup> Hoka xala xamani atyo sema exe niraeni hoka maisa tyaonita exema hoka haliti mairiharehena tyomehenere hahana kaiholokoa akereta atyo. <sup>27</sup> Tyoma hahana mematenene hoka one kaloxehena hoka kahekoakoa moka exahita, exahe kintatyawiniti hoholatya hatyo hati xahiyita hoka exoakikoatene. Exoakikoatene hoka mawenekoaretiterene akereta atyo — nexa Jesus xakai ihiyeha.

#### Jesus Atyo Xekohaseti

(Marcos 1.22)

<sup>28</sup> Jesus halakisa hairaine hoka halitinai hakaharetyoa exaotyakira kakoa. <sup>29</sup> Maisa atyo xaotyakiyaho kakoa waiyoreterenai akerexeta xini aotyakijita hoka. Iraeta atyo iyateliti kakoare hoka.

#### Jesus Awaiyehiheta Jijikoahitere

(Marcos 1.40-45; Lucas 5.12-16)

<sup>8</sup> Hatyaoseta Jesus exoaheta tyairi henoseta. Hoka hisoaka haliti xane exema. <sup>2</sup> Hatyaoseta jijikoahiti kahehare aijitere tyoa kaoka ehaliya hoka hakaoliri kakoa meholokoa enomana hoka nehena:

— Xekohaseti, hawaiyehihetaiya natyo haokowi hoka hawaiyehihetaiya natyo — nexa.

<sup>3</sup> Nexa hoka Jesus hakahe ekaokakisa ihiye hoka nehena: — Há, naokaite. Hawaiyehiheta atyo — nexa.

Nexa taita ihiye hoka waiyehiheta rotita jijikoahitere nonitata.

<sup>4</sup> Hatyaoseta Jesus nexa ihiye: — Hasemehena, awa atyo exehare hiyakaihena hatya hiye. Hiyanehena sacerdote nali hoka waiyahareheta hiso. Hatyaosetaite haisa kirakahare hoka fetatene Enore ana, Moisés aotyakihenere akereta. Hoka tyotyaha waiyoreha hikinaterehenere kakoa — nexa Jesus ihiye.

#### Jesus Aiyatelikiheta Roma Yere Wakanehare

(Lucas 7.1-10)

<sup>5</sup> Hatyaoseta Jesus xane kaoka wenakalati Cafarnaum nali. Kaokehena hoka hatya sorarenai xekohasehare tyoa ahalakoatene, irai maheta ekakoa, kasani Jesus aiyatelikiheta ewakanehare enomana aokita hoka.

<sup>6</sup> Hoka nexa: — Xekohaseti, nowakanihare kalore hokakita nohanyakota. Maisa moxomoxore, masakare waolitita — nexa.

<sup>7</sup> — Notyoaite hoka naiyatelikihetene homana — nexa Jesus.

<sup>8</sup> Hoka sorare xekohasehare nehena ihiye: — Maisaiya hijoita nohanyako, Xekohaseti. Hiyaiya, natyo atyo hikatyahakohare. Kala hiraihena taita hoka nowakanihare kinatereheta nomani — nexa. <sup>9</sup> — Natyo tehitiya atyo haiyanai xekohasetinai katyahakoreta notyaonita hoka wakatyahitaha natyo. Nosorarexinai atyo nowakani xema tyaonahitaha. Niraihena hatya hiye: “Hiyane”, nomihena ihiye hoka xaneta. Hatya hiye, “Hisohena”, nomihena hoka tyoita. Exahe nowakanihare hiye, “Hisoma nikare”, nomihena hoka tyomita — nexa sorare xekohasehare Jesus hiye.

<sup>10</sup> Hatyaoseta Jesus hakaharetyoa sema hatyo iniraine hoka nexa haxema tyoiterenai hiye: — Kaxiyani, aliterexe niraeta xihiyeha, maisa xoana xowaka exakere kalore tyakekotyati nowaiyare Israel hotyalinai koni — nexa. <sup>11</sup> — Xotyaxematyaira exeharenai: kahare halitinaite tyohena, kamai nihikoane maniyata, exahe kamai xisoane maniyata hoka tyokehena mexa haliya Abraão, Isaque, Jacó harenai kakoa, Xekohaseti enokoatare kalorexe tyoahenere xowaka. <sup>12</sup> Hoka hatyo nali tyoka mahetarenai ene ite kaxawatyaka makaliroti koni. Hoka hatyo nalite tiyaha exahe haikolinai, “karai, karai”, nexa mokaha — nexa Jesus.

<sup>13</sup> Hatyaoseta Jesus nehena sorare xekohasehare hiye: — Hiyanehetehena hihana xeta. Hityakekone akereta koxaka kaomaka — nexa ihiye. Hatyo xowakita ewakanehare kinatereheta.

#### Jesus Aiyatelikihitita Kahare Halitinai

(Marcos 1.29-34; Lucas 4.38-41)

<sup>14</sup> Hatyaoseta Jesus xane Pedro hanako, waiyehena atyo, owene atyo Pedro nimasero kamakoa ehokotyoi-ta, watyahiseta hoka. <sup>15</sup> Hoka Jesus otokene ekahe hiye hoka ewatyahisene tyoteheta enonita. Hoka ainakoheta, xane enakaira tyoma enomana.

<sup>16</sup> Makakoahena hoka halitinai Jesus ana kahare tihanare kamilakoreraharenai kolatyaha hoka haserore

irae hoka tihanare axanikihitita. Exahe haiyanai hoka hokakiterenai tyotyaha aiyatelikihitita.

<sup>17</sup> Jesus nikare tyoma iraiti xakaisasehare Isaías xakaitere akere kawenatyakeheta maheta: “Hatyo atyo kolatya wikahehare, exahe wihokakene hoka kolatya”, nexa atyo.

### Haiyaharenai Xaneha Aokowiha Jesus Xema

(Lucas 9.57-62)

<sup>18</sup> Hatyaoseta Jesus waiya haliti hisoakene hahoko haliya, hoka irae haxaotyakiraharenai hiye, xaneha maheta Galiléia xa halakoia maniya.

<sup>19</sup> Hatyaoseta hatya xaotyakiyaho kakoa waiyoretere tyoa kaoka hoka nexa ihiye: — Xaotyakisatiye, no-tyoaite hiyema, aliyo xamani hiyanehena hoka — nexa.

<sup>20</sup> Hoka Jesus nexa: — Wakarenai atyo kahanere waikoako, exahe kotehalanai hoka kaihexe — nexa Jesus ihiye. — Xakore hoka Haliti Ityani atyo maisa xoare ako kawiniye — nexa. (Haxaokakita “Haliti Ityani”, Jesus nexa.)

<sup>21</sup> Hatyaoseta hatya Jesus xaotyakirahare nehena: — Xekohaseti, awisa hoka noxani nahaikoaheta hoka baba waini hoka nafetene hotohare hoka hatyaosetaite notyoa hiyema — nexa.

<sup>22</sup> Hoka Jesus nexa ihiye: — Hisohena noximi, kotare kaminai fityaha hakamane hatyanai — nexa.

### Jesus Amemakiyaheta Kinatyawiniti

(Marcos 4.35-41; Lucas 8.22-25)

<sup>23</sup> Hatyaoseta Jesus isoa kanowa ako hoka exaotyakiraharenai tehitiya xaneha exema. <sup>24</sup> Xanahitaha onexa hoka kinatyawiniti kaoka enomanaha, one ainakiyatya hoka jiyahaotita kanowa. Jesus hatyo xowaka nemakita. <sup>25</sup> Hatyaoseta exaotyakiraharenai kaosetene hoka nexaha ihiye: — Xekohaseti, hakahinaehena wiso, wiwainihenaore — nexaha.

<sup>26</sup> Hoka Jesus nexa: — Xoana hoka ximairita? Xoana hoka inira xityakekone tyaonita? nexa ihiyeha. Nexa ihiyeha hoka tityoaheta hoka watyali hoholati, one xoaha hoka tyotyaha, memakeheta.

<sup>27</sup> Hatyaoseta exaotyakiraharenai hakaharetyoaha hoka nexaha: — Xoare halitini ala exe hoka one, hoholati xoaha hiye irae hoka aokitere akereta tyaonaha? nexaha.

### Jesus Axanikiheta Isekohalitinai Halitinai Nonitata

(Marcos 5.1-20; Lucas 8.26-39)

<sup>28</sup> Hatyaoseta Jesus xane Galiléiaxa halakoia maniya, Gadara koa nali xane kaoka. Kaoka taita hatyo nali hoka hinamahare tihanarenai kamilakororanai tyoa ahalakoatene. Xawatyakalatinai koni tyaonahitaha hoka hatyo nalita tyoahita. Kinatereha, xalijinihahaha hoka maisa xala hare hatyo ahoti aho jiya aokowiye.

<sup>29</sup> Tyoa ahalakoatyaha Jesus hoka nexaha: — Xoare haoka wihyie, Enore Ityani? Xoana, hisoa hoka iniyala-

hare hamoka wiso maheta imiyanaose ferakene nahitita? nexaha kawiyatyaha kinatyaha.

<sup>30</sup> Hatyo xowaka bolokonai hatyo haliyita nisakoatita.

<sup>31</sup> Hoka tihanarenai nehena Jesus hiye: — Haihikoa-heta haokowita wiso halitinai milakota hoka haxikatya wiso bolokonai milako — nexaha tihityoaha ihiye.

<sup>32</sup> — Xiyanehena atyo — nexa Jesus.

Hatyaoseta tihanarenai hikoaheta halitinai milakota hoka xane isoaha bolokonai milako. Hatyaoseta bolokonai tema exoahenahitaha tyairi henota hoka xane exoaha hokoxa, monaha hoka tyotyaha wainiha.

<sup>33</sup> Hatyaoseta boloko kaxaikotyasenai tekoahenahitaha hoka xanehenahitaha wenakalati xeta hoka xakaihaha hatyo tahi naliyerenai hiye, hatyo hinamahare halitinai kakamilakotyakiterenai tahi. <sup>34</sup> Hatyaoseta hatyo wenakalati tyaoniterenai tyotyaha tyoaha waiyaha Jesus maheta. Tyoa waiyahene hoka kasani Jesus xaneneheta hatyo ewaikoheraha koata aokaha.

### Jesus Aetonakiheta Maetonanehare

(Marcos 2.1-12; Lucas 5.17-26)

<sup>9</sup> Hatyaoseta Jesus xane tyokeheta kanowa ako hoka haikoaheta halakoia maniya, xane kaokeheta hawenakala. <sup>2</sup> Hatyaoseta kaokeheta hoka kolatyaha hatya maetonanehare exetolisoakala kakoita enomana. Jesus waiya ityakekoneha hoka nexa maetonanehare hiye: — Nohinaehare, hihalaharehena, koxaka kaxemaisatyakeheta iniyalahare hománe — nexa.

<sup>3</sup> Nexa hoka haiyaharenai xaotyakiyaho kakoa waiyoreterenai ahokohenaha hatyakoiyaharenaiha: — Exe haliti maisa aiminisare Enore — nexahitaha.

<sup>4</sup> Hoka Jesus otya exahekolaha hoka nehena: — Xoana hoka hatyohare iniyalahare xahekotita? <sup>5</sup> Xoarehare ala haxerore niraetyaka: “Iniyalahare hománenai atyo kaxemaisatyakeheta”, nerekatihenaite, xoana, “Hatityoahetehena hoka hatohetehena”, nerekatihena koríte? nexa. <sup>6</sup> Hiyaiya, nahotikisaite xomana. Hatyo Haliti Ityani atyo iyateliti kakoare notyaonita ali waikoheko halitinai nómane iniyalahare emaisatyaheta maheta — nexa. Hatyaoseta ehaikoa hoka nexa maetonanehare hiye: — Hatityoahetehena hoka hiyehetehena hiyetolisoakala hoka hiyanehetehena hihana xeta — nexa. <sup>7</sup> Nexa hoka maetonanehare tityoaheta hoka xaneheta hahana xeta.

<sup>8</sup> Kahare haliti wahakoita hoka waiyaha hatyohare hoka mairaha. Hatyo hiyeta ihalahareha Enore kakoa, iyateliti isehenahere halitinai ana hiyeta.

### Jesus Hikoa Mateus Ana

(Marcos 2.13-17; Lucas 5.27-32)

<sup>9</sup> Hatyaoseta Jesus xanehitita ene nalita hoka waiya hatya haliti, Mateus nexarexe, tyokita olo re-sebityakaose nali hoka: — Hisohena noximi — nexa Jesus ihiye. Hoka Mateus tityoaheta hoka xane exema.

<sup>10</sup> Hatyaoseta Jesus xane Mateus hanako hoka kanakaira. Kanakairita hoka kahare haiyaharenai olo resebityaseharenai, haiyanai iniyalahare nomaseharenai xoaha kaokaha hoka tyokaha mexa haliya hoka

kanakairaha Jesus exahe exaotyakiraharenai xoaha kakoa.

<sup>11</sup> Hoka haiyaharenai fariseunai waiyaha Jesus enekonyaha hoka axaha exaotyakiraharenai: — Xoana hoka Xiyaotyakisase kanakairita exe olo resebityaharenai exahe iniyalahare tyomiterenai xoaha kakoa? nexaha axahene.

<sup>12</sup> Hoka Jesus sema hatyo exaxanahene hoka nehena: — Mahokakeneharenai atyo maisa wairatyare aokare haomana, hoka hokakiterenai wairatyare aokita haomana. <sup>13</sup> Maika xahekohena exe iraiti kaxairatyakehenere iraiti waiyexe nanekoa hoka waiyekehalaka xomana. Hiyaiya, nexa atyo:

Kasani maisa kirakahare kafetatyaka nomani naokare. Kasani haliti waiye moka hahinaehare naokita exahe airakoaneharetene naokita.

Hiyaiya, notyoo atyo naotyakisa maheta iniyalahare nomaseharenai, maisa atyo waiyexeharexenai naotyakisa maheta xini — nexa Jesus iniraineha nahalakoa.

#### Jesus Xaotyakiraharenai Maisa Manakairereha Hekoti (Marcos 2.18-22; Lucas 5.33-39)

<sup>14</sup> Hatyaoseta João xaotyakiraharenai tyoo kaokaha Jesus ana hoka axahene: — Wiso, exahe fariseunai kahiliki wimanakairita Enore hiyeta. Hoka hiyaotyakiraharenai atyo maisa manakairere Enore hiyeta. Xoana hoka? nexaha.

<sup>15</sup> Hoka Jesus nexa ihiyeha: — Wenakakoati ana kakaexakatyakehenerenai atyo maisa amaikoharexe, kaiyanityohenere enaliha tyaonita hoka. Hoka haxowakaite kaiyanityohenere kaiyakeheta enekonitaha, hoka hatyo xowaka atyoite manakairehenaha — nexa.

<sup>16</sup> — Exe tehitiya: maisa xala hare tinolaharehena imiti xololo hoka imiti waitare kakoa tinolaharetyare. Waiya aliya hoka waitare taose emolisoa hoka halalahitiya imiti xololo hoka exahehariya ehalalakoane moka.

<sup>17</sup> — Exe tehitiya: maisa atyo vinho waitarexa kaxomokakere toahiyere militirise nomaka ako. Nikareya kaxomokaka hoka halalakoaiya militirise hoka vinhoxaiya iratyoo tyoty, exaheya militirise hoka mawenekoare. Hatyo hiyeta vinho waitarexa militirise waitare ako taita kaxomokakita. Nikare hoka waiye — nexa Jesus ihiyeha.

#### Jesus Aiyatolokiheta Hatya Ohiro, Xoima Xoaha (Marcos 5.21-43; Lucas 8.40-56)

<sup>18</sup> Jesus iratata halitinai hiye hoka hatya xekohaseti judeu tyoo kaoka enomana, meholokoa hakaolise kakoa enahalakoa hoka nehena: — Nityani owa waini. Hisohena hoka hikahe hekaokakisa ihiyeha hoka kaseheta nomani — nexa.

<sup>19</sup> Nexa hoka Jesus xane exema. Exaotyakiraharenai tehitiya xane. <sup>20</sup> Ahotita xanahitaha hoka hatya ohiro kaoka Jesus haliya, ihiniri maniya. 12-terehokoanehena hokakita, timalati hikoata minita ihiyeta. Hatyo

tyoo ihinirako maniyata hoka ekaokakisa hakahe inima kilihhi hiye.

<sup>21</sup> Exakere ahekohalotyoita: — Nekaokakisa taitaiya nokahe inima kilihhi hiye hoka nawaiyehaloheta — nita.

<sup>22</sup> Hatyaoseta Jesus terehokoa waiyahokotyoo hoka waiya hatyo ohiro hoka nehena ihiyeha: — Ehekore nikare hisaonita! Hawaiiyehaloheta atyo hityakekone hiyeta — nexa. Exowakita hatyo ohiro waiyehaloheta rotita.

<sup>23</sup> Hatyo najikinita Jesus jiyihitiya xekohaseti hana xeta. Xane kaokahena hoka sema exaimahalikiraha xerati xafityati niyahare. Kahare sema werahaliti, os-exati hare hoka <sup>24</sup> nexa ihiyeha: — Xahikoahetehena xityoty alita. Exe xoimahaloti maisa waini xini, nemakitata — nexa.

Nexa hoka koexahalisahene, ehatyaharene aokaha.

<sup>25</sup> Hatyaoseta hikoahetaha hoka Jesus isoa hatyo kamati tyaonitere ako, otokene ekahe hiye hoka kaseheta hoka tityoaheta. <sup>26</sup> Hatyo tahi tyoty hakakoare hatyokoarenai sema.

#### Jesus Awaiyeheta Maxoseharenai Exahe Matanakoakohare

<sup>27</sup> Hatyo nalita Jesus jiyihitiya hoka ahoti, hinamahare maxosehare kawihisexematene: — Hairakoaneharenahena wiso, Davi jikolahare — nexaha kawiyatyaha.

<sup>28</sup> Hatyaoseta Jesus xane isoa hatyako hoka maxoseharenai xane kaokaha ehaliya hoka Jesus nexa axahene: — Xoana xityakekota nowairatyani xiso kakoa? nexa.

— Há, wityakekota atyo — nexaha.

<sup>29</sup> Hatyaoseta Jesus ekaokakisa hakahe exosenaiha hiye hoka nexa: — Maika kaomaka xityakekone akere-ta — nexa ihiyeha.

<sup>30</sup> Hatyaoseta exosenaiha waiyeheta hoka waiyakatyarehetaha.

Hatyaoseta Jesus nexa ihiyeha: — Xasemehena, awa atyo xiyakaihenene hatya hiye. Xasemaira niraeni — nexa.

<sup>31</sup> Nexa xakore ihiyeha hoka xanehenahitaha hoka xakaikoatyaha hatyo tahi tyoty hatyo koarenai hiye.

<sup>32</sup> Hatyo hinamaharenai xanehetaha Jesus nonita hoka haiyaharenai kolatyaha mairainehare enomana. Tihanare kamilakoretitene hoka mairainititene.

<sup>33</sup> Hatyaoseta Jesus axanekiheta tihanare hoka irae-heta.

Hatyaoseta tyotyaha hakaharetyoaha hoka nexaha: — Maisa xoana xowaka exakere wiyaiyare ali Israel waikoherakoa — nexaha.

<sup>34</sup> Hoka fariseunai nehena: — Kala tihanarenai xekohasehare tyaonita ekakoa hoka aiyatelikisene hoka axanekihitita tihanarenae halitinai nonitata — nexaha.

#### Jesus Xane Wenakalatinaikoa Waiyakaty

<sup>35</sup> Hatyaoseta Jesus xaneta wenakalatinai nihatyaka, aotyakisahitene xahohisakoatyakalati hanako. Iraitu waiyexe kalorexe enokoatare tahi xakaita ihiyeha. Ho-

ka aiyatelikihitita halitinai, ekahehareha exahe ehokakeneha nonitata.

<sup>36</sup> Jesus waiya haliti hisoakere hoka airakoane-haretyahene. Hatyo halitinai kirakoane tyaonahitaha, exahe makahinaetyakahareha hoka. Motya kalanero makaxaikotyakahare tyaonitere akereta tyaonahitaha hoka.

<sup>37</sup> Hatyaoseta Jesus nexa haxaotyakiraharenai hiye: — Nakairati xirikotyaka atyo kahare. Xakore atyo hoka hatenitiyenai atyo maisa kaharexe. <sup>38</sup> Xaxehena masene xekohasehare hoka axikahitiya hatenitiye hoka irikotyahene — nexa Jesus. (Halitinai xaokaka nikare irieta).

### Jesus Xaotyakiraharenai 12-harenae

(Marcos 3.13-19; Lucas 6.12-16)

**10** Hatyaoseta Jesus kawisa 12-hare haxaotyakiraharenai hoka isa enomanaha iyateliti axanekihenahitaha isekohaliti metalaharenai, tyotya kakaheharexenai exahe hokakiterenai hoka aiyatelikihenahitaha maheta.

<sup>2</sup> Exe atyo 12-hare exaotyakiraharenai nexare: hetatiye atyo Simão, Pedro tehitiya atyo enexarexe, haximarene André kakoa. Tiago haximarene João kakoita, Zebedeu ityaninai atyo. <sup>3</sup> Filipe, Bartolomeu, Tomé, Mateus xoaha. Mateus atyo kalorexe noloxa resebitiyasehare. Alfeu ityani Tiago, Tadeu, <sup>4</sup> Simão Canaã yere, Judas Iscariotes xoaha. Hatyo Judas atyo Jesus matawatyasehare.

### Jesus Xaotyakiraharenae Hatene

(Marcos 6.7-13; Lucas 9.1-6)

<sup>5</sup> Hatyaoseta Jesus axikatya hatyo 12-hare halitinai koni. Xanehenaha hoka nexa ihiyeha:

— Awaira atyo majudeuneharenai tyaonitere nali xiyanehena, exahe awa atyo xiyane xikaokehena Samaria yerenai nawenakalanai nali. <sup>6</sup> Xiyanira xatawehena Israel hotyalinai xahita hotohare. Hatyonai atyo kalaneronai hehanitere akereta tyaonahitaha. <sup>7</sup> Xiyane hoka xiyakai iraiti ihiyeha. “Okoi Xekohaseti enokoatare kalorexe tyaohena”, xexa ihiyeha.

<sup>8</sup> Xawaiyehiheta jijikoahiterenai, hokakiti harenai xaiyatelikiheta. Xekasekiheta kamatinai enomanaha, xaxanikiheta tihanarenai enonyahitaha xoaha. Maxaimaneharetata atyo kaxekakita xomana hoka hatyo hiyeta xisehena maxaimaneharetata. <sup>9</sup> Awa atyo xakolahena xibosane ako ouro, prata exahe cobre hoko harenai. <sup>10</sup> Xiyanehena hoka awa atyo xisakolane, ximanase hinamate, xiberekatane, xatyakasera harenai xakolatya. Hiyaiya, hakiterenaiya atyo maisa aliyakere makahinaetyakahare tyaonita.

<sup>11</sup> — Xiyane xikaokehena wenakalati exahe kiranexe wenakalatikoa hoka xatawa haliti waiyexe xahita, hoka waiye moka xiso hoka xisaona ehaliya xiyaneheta kijiya. <sup>12</sup> Maika xisoahena hatyako hoka xexa: “Wenati waiyexe waoka xomana”, xexa. <sup>13</sup> Hatyoako tyaoniterenai waiye mokaha xiso hoka maika mehaxikohaliti xaoka enomanaha. Hoka maika maisa waiyexeharexe-

ha hoka xemaisaheta enonyahitaha xiraehenere.

<sup>14</sup> Aliyako xamani hatyako exahe wenakalati tyaoniterenai maisa waiye mokahitaha xiso, exahe maisa semaxematyaha aokowiyahitaha xiraine hoka maika nalita xiyanehitiya hoka xiberekatane xamokotyahatya xexoakiheta maheta waikohese naliyerenai waiyane maheta. <sup>15</sup> Aliterexe nomita xihye: imiyanaose Enore axalihenere halitinai xowakiyaite, iniyalahare moka hatyo wenakalati tyaoniterenai Sodoma exahe Gomorra xahexe ite mokahene — nexa Jesus ihiyeha.

### Howitiharexenai

(Marcos 13.9-13; Lucas 21.12-17; 1 Pedro 4.12-16)

<sup>16</sup> — Xasemehena: naxikaita atyo xiso halitinai koni kalaneronai xanetere ahoxanai koni akereta. Hiyeta hoka xiriharira xisaona owi akereta, watyaha maxalijiniharehare tyaonitere akeretaira xisaona enekonyaha. <sup>17</sup> Xiriharira xisaona. Hiyaiya, olatyahaite xiso hoka nolokahaite xiso kalorexena ana, mokonasyahaite xiso xahohisakoatyakalati hanako. <sup>18</sup> Nohiyetaite xikakolatya xekohaseti exahe kalorexena ana, axaliha maheta xiso. Hatyo xowakiyaite xiyakai iraiti waiyexe enomanaha, exahe majudeuneharenai ana hoka. <sup>19</sup> Awa atyo kolahenaha xiso axahenaha xiso maheta hoka ximawaiyeharehena xiraene kakoa. Hatyo xowakehena atyoite hoka Enore isehena xomana iraiti xirai maheta. <sup>20</sup> Hiyaiya, xiraehenere atyoite maisa xiraene xini, xakore hoka Xexe Nisekohare atyoite irahena xikoamaniyata — nexa Jesus.

<sup>21</sup> — Haiyaharenaite haximarene kaiserehare isehena hoka kaxaisakehena. Nikaretaite enexenaiha haisanaeha mohena. Hoka ityaninaehaite kahalakoahareha hanexenaeha hanityonaeha kakoa hoka axaisakisahene. <sup>22</sup> Tyotyahaite kirawaneha xiso nohiyiti. Hoka xala xamani atyoite tyaona noximi miyanitiye ferakene kijiya hoka hatyo atyoite kaiyakeheta iniyalahare nonitata — nexa.

<sup>23</sup> — Maika hakoa wenakalati tyaoniterenai iniyalahare mohenehena xiso hoka xisekoa hakoa xeta. Aliterexe nomita xihye: maisaite komita ene xiyaneta Israel hotyalinai nawenakala nihatyaka hekoti Haliti Ityani tyoaneneheta nahitita.

<sup>24</sup> — Maisa exaotyakirahare haxaotyakisase xahexe tyaonare, exahe wakahare hoka haxekohase xahexe tyaonare. <sup>25</sup> Exaotyakirahare atyoite haxaotyakisase akereta tyaohena, exahe wakahare hoka haxekohase akereta. “Belzebu, tihanare xekohasehare”, nexahaiya exekohaseha xaokaka hoka ewakaneharenai tehitaiya atyoite exaehare nexare niyalahare kakaexaretyaka.

### Enore Atyoite Kamairakehena

(Lucas 12.4-7)

<sup>26</sup> — Xakore atyo hoka awa atyo ximaira halitinai. Hiyaiya, tyotya koalini hare kaxateroakisakiterenaite maxateroakisakeheta, metahare tyaoniterenaite kawaiyakeheta. <sup>27</sup> Maika exe makaliroti koni wiwawaharenai niraetere xihye xiyakai halitinai hiye, exahe

nawaiyeta niraetere xihiyi kintatyaxa xiyakaiheta hati maiyeho nalita.

<sup>28</sup> — Awa atyo ximairehena, aisehena hoka xiháre taita aijitere hoka xiyawa maxaisanetere. Hoka maika ximairehena Enore. Hatyoia atyo mawenekoaretya xiso xiháre, xiyawa harenai kakoita irikati koni.

<sup>29</sup> — Haiya xowaka hinamali kotehalase kabetityakita olo hokosenai xaimanexe. Xakore atyo hoka hatyonaiya atyo maisa ixoita waikoa Enore maxaokareneta.

<sup>30</sup> Hoka xiso atyo xisekasenai kakoita tyotyia ixihatyakahare tyaonita. <sup>31</sup> Hatyo hiyeta awa atyo ximawaiyehare. Hiyaiya, hisoakere kotehalasenai xahehare atyo xiso.

<sup>32</sup> — Hoka tyotyia iraihenere nomaniye aokowihenerenai haotikatita tahite natyoisa niraie Baba enokoa tyaonitere haotita. <sup>33</sup> Xala xamani atyo maisa nokoamaniye nawenatyasehare aokowita halitinai haoti hoka natyo tehitaiya atyo Baba haoti, “Maisa atyo exe nokoamaniye nawenatyasehare xini”, nomi.

### Jesus Hiyeta Atyo Kairawaiyatyakakoita

(Lucas 12.8-9; 2 Timóteo 1.8)

<sup>34</sup> — Awa atyo motya notyoya waiyexe wenati nakolatya maheta halitinai ana xaohena. Notyoya naxalijinihalikisa maheta halitinai. <sup>35</sup> Notyoya atyo naxalijinihalikisa haliti hoka kahalakoahareha hanexenai kakoa maheta, exahe haloti hoka kahalakoahalo maheta hanityo kakoa. Haiyahalonai haimaseronaeha kakoa kahalakoahaloha maheta. <sup>36</sup> Nikare ite hoka haliti nahalakoahare kaheneharexe atyoite ehanako tyaoniterenai terota.

<sup>37</sup> — Xala xamani atyoite awaiyetita hanityo exahe hanexe noxahexe hoka maisaiya atyo aliyakere noximi tyaonita. Xala xamaniya awaiyetita haisaninai noxahexe hoka maisaiya atyo aliyakere noximi tyaonita.

<sup>38</sup> Xala taita xamaniya atyo kolatya atyalihose xaimaholatyaka hakamanetyakala niyahare hoka tyoa noximi hoka hatyoia atyo noximi tyaona. <sup>39</sup> Xala xamani atyoite wenati waiyexe tawita hoka meta atyoite enonita. Hoka xala xamani atyoite nokoamaniye tyaonita hoka nohiyiti waini hoka hatyo atyoite kaoka wenati waiyexe.

### Waiyexe Xekaka

(Mateus 25.34-40; Marcos 9.41; Hebreus 13.1-3; 3 João 5-8)

<sup>40</sup> — Xala xamani atyo waiye mokita xiso hoka waiye atyo mokita natyo. Nikare waiye mokita natyo hoka waiye atyo mokita noxaxikatyasehare Enore. <sup>41</sup> Xala xamani atyoite waiye moka iraiti xakaisasehare, Enore niraie kakoare aokene hoka kaxekakaite enomana xalini hare waiyexe hatyo nahalakoa. Xala xamani atyoite waiye mokita waiye maniya tyaonitere, waiye maniya tyaonitere hiyeta hoka, hatyo nahalakoaite kaxekaka enomana xalini hare waiyexe.

<sup>42</sup> — Xotyaxematya exeharenai: xala xamani atyoite hakobone one wehexere taita isa noxaotyakirihare ana, noxaotyakirihare aohenere hiyeta hoka hatyo na-

halakoa atyoite kaxekaka enomana xalini hare waiyexe — nexa Jesus.

### João Batista Wakaneharenai Kaokaha Jesus Ana

(Lucas 7.18-35)

**11** Hatyaoseta Jesus miyatya hairaine 12-hare haxaotyakiraharenai hiye hoka xanehitiya hatyo nalita, xane aotyakihitiya, xakaihitiya iraiti waiyexe hatyo haliyasete wenakalati tyaoniterenai koa.

<sup>2</sup> Hatyo xowaka João koxaka berexo ako tyaonita hoka sema Cristo nómanenai tahi hoka haxaotyakiraharenai axikatya Jesus axaha maheta. <sup>3</sup> — Xoana hiso etake kaokehenere, xoana hatya korite watyahahitiya?

<sup>4</sup> — Xahaikoahetehena hoka xiyakai João hiye xase-mehenere, xiyaiyehenere tahi — nexa Jesus. <sup>5</sup> — Maxoseharenai waiyakahitita, mawaiye netonaneharenai waiye netonanehitita, jijikoahiti tawaneharenai waiyehihitita, masemakalaharenai semakahitita, kamatinai kasehitita. Exahe Iraiti Waiyexe atyo kaxakaisakita maoloxaharenae hiye. <sup>6</sup> Waiye kaiserehare atyo tyakekoterenai natyo hoka maisa amaikoharexe nokakoi — nexa Jesus João xaotyakiraharenai hiye.

<sup>7</sup> João xaotyakiraharenai xaneheta hoka Jesus iraihena João tahi halitinai hiye: — Xiyanehenere maharexakahare xahalakoahenere João xowaka, xoarehare xatyahita xiyaiyane maheta? Xoana kána kase hoholati hoholaitere? <sup>8</sup> Hoka xoare xiyaiya maheta xiyane? Xoana hatya haliti imiti waiyehare akore xiyaiya xaokowi? Imiti waiyeharexe ako ijoiterenai atyo tyaonita hati wahaharexe ako. <sup>9</sup> Hoka xiyakaihena nohiye: xoare xatyahita xiyaiya maheta? Xoana iraiti xakaisasehare aliterexe? Aliterexe atyo nomita xihiyi: xiyaiyehenere atyo iraiti xakaisasehare xahehare. <sup>10</sup> Exakere xairatyoare tyaonita Iraiti Waiyexe nanekoa João tahi:

Hasemehena, naxikatyaita haliti haheta maniya niraini kakoare hoka memere moka ahoti haheta maniya.

<sup>11</sup> — Aliterexe nomita xihiyi: João Batista atyo tyotyia halitinai xahehare. Xakore hoka xala xamani atyo ekatyahakohareta tyaonita enokoa nali hoka hatyo atyo João xahehare tyaona. <sup>12</sup> João Batista xakaihakaitere xowakiyata kalikini kijiya enokoatatare tahi iniyalahare kairaetyakita. Xalijiniharexenai iraeta etahi, kasani jiyahaotyahene aokowiyahitaha hoka.

<sup>13</sup> Hiyaiya, Moisés exahe iraiti xakaisaseharenai xoaha xakaiha Enore xaotyakira João kaotyakehenere kijiya.

<sup>14</sup> Xityakeko atyo iniraenaha xaokowi hoka xityakeko: João atyo Elias, hatyo haikoahaneheta atyo aokaha.

<sup>15</sup> Xala xamani atyo katanakoakore semakatya maheta hoka maika semehena niraini — nexa Jesus.

<sup>16</sup> — Hoka xoare kakoaita naimenekohena kalikiniyerenai? Kalikiniyerenai atyo motya xoimanai tyokitere wetekokoa akereta tyaonahitaha, hahotyali kawiyatitere hahotyali ana akereta.

<sup>17</sup> “Waemahalikisa wenakakoati anere xerati xakore hoka maisa xaholikoita.

Wiyera xafityati anere xerati xakore hoka maisa xitiyita”.

<sup>18</sup> — Hiyaiya, João atyo manakairita, maeraneta vin-hoxa hoka tyoty nexahitaha: “Tihanare atyo tyaonita ekakoa!” <sup>19</sup> Hoka Haliti Ityani kanakairihena, terehena, hoka nexahitaha: “Xiyaiyehena, exe haliti atyo kanakairatetyoita, teratetyoita, etake kalorexe noloxa resebetyaseharenai exahe iniyalahare nomaseharenai xoaha hinaihare!” Xakore atyoite hoka ekakoitaite Enore nawaiyorene katyakekotyakehena — nexa Jesus ihiyeha.

#### Haiyanai Wenakalatiyerenai Maisa Tyakekoahitaha (Lucas 10.13-15)

<sup>20</sup> Hatyaoseta Jesus amaikohare wenakalatinai koa tyaoniterenai hiyeta. Kahare xoalini hare maomakahare waiyexe tyoma ehaotiha hoka maisa halakisahitaha iniyalahare háomaneha hoka hatyo hiyeta Jesus amaikohare. Hoka nexa: <sup>21</sup> — Kirakoane ite hisaohena, wenakalati Corazim! Kirakoane ite hisaohena, wenakalati Betsaida! Hiyaiya, waiyexenai mawaiyakaharenai kaomakehenere hatyo hinaliyeya atyo kaomakere wenakalatikoanai Tiro, Sidom xoaha nali hoka hatyo naliyerenaiya atyo koxaka toahiyita halakihenahitaha háomaneha iniyalahare. Hotikisahaiya atyo aokowiha iniyalahare hahalakiraha hoka tyokahaiya atyo tataolate nimere exahe mokahaiya irikati niyehe haserihahiye. <sup>22</sup> Natyo atyo nomita: Xaxalisati Ferakene ite Enore ite airakoaneharetya Tiro, Sidom xoahanae koa tyaoniterenai xiso Corazim, Betsaida xoahanae koa tyaoniterenai nonitata.

<sup>23</sup> — Exahe xiso wenakalati Cafarnaum nali tyaoniterenai: xoana xiyahékola hiye motyaite enokoa xikaoka xaokita? Xikaxawatyaka atyoite kaminai tyaonitere nali. Ekoiya atyo maomakahare waiyexe kaomakere wenakalati Sodoma nali, xinali kaomakehenere akere-ta hoka kalikiniya atyo hekotata tyaonita. <sup>24</sup> Xasemehena, xaxalisati ferakenehena xowakiyaite Enore ite airakoaneharetya Sodoma yerenai xiso Cafarnaum nali tyaoniterenai nonitata — nexa Jesus.

<sup>25</sup> Hatyo xowakiya Jesus nexa: — Abá, hiso atyo enokoa, waikoa xoaha Xekohasehare. Nihalahare hikakoa, hawaiyekehalakehenere hitahi akiti xoimanai exahe mawaiyoreharenai ana hiyeta. Hoka waiyorexe, semarexe tyoahenerenai ana atyo metahare hamoka hitahi akiti. <sup>26</sup> Aliterexe, Abá, hatyoharenai atyo kaomaka hiyaokala exahe haokitere akere-ta. <sup>27</sup> Baba atyo halakisa nomani tyoty xoalini hare. Maisa atyo xala hare waiyorexe Ityani kakoa. Enexe taita atyo waiyoreta ekakoa. Maisa atyo xala hare waiyorexe Enexe kakoa. Ityani taita atyo waiyoreta ekakoa, exahe haiyaharenai ana awaiyekehalakatene hoka hatyonai tehitiya atyo waiyoreta ekakoa — nexa Jesus.

#### Xisohena Nonali Hoka Xikawini (Lucas 10.21-22)

<sup>28</sup> — Xisohena nomani, xityoty xiso xikiraharetere-nai xikolalanai timinitere xihiyehoka nekawinikisa xiso. <sup>29</sup> Nokoamaniye nawenatyaseharenai xisaohena hoka xawaiyore noxaotyakiraha kakoa. Natyo atyo

nawaiyexehare, maisa atyo noxalijiniharexe, xisaonaiya noximi hoka xikaokaiya xikawinini niyahare.

<sup>30</sup> Xoalini hare xisoma naokitereharenai atyo maisa howitiharexe xini, kolare namokitere xiheno atyo amala — nexa Jesus ihiyeha.

#### Jesus Atyo Sábado Xekohasehare

(Marcos 2.23-28; Lucas 6.1-5)

**12** Hatyo najikinita, sábado xowaka Jesus jiyehena trigo xafityaka koni. Hoka exaotyakiraharenai nakita hoka trigo xawase taikaha hoka esé kanakairaha. <sup>2</sup> Hatyaoseta fariseunai waiyahene hoka nexaha Jesus hiye: — Hiyaiyehena, hiyaotyakiraharenai sábado xowaka wiyaotyakisakaho mahokoanetiterehare tyomahitaha — nexaha.

<sup>3</sup> Hoka Jesus nehena: — Xoana maisa xasemare Davi, ihinaeharenai xoaha nakita hoka tyomehenere? <sup>4</sup> Davi atyo isoa Enore hanako hoka nakairati Enore anere fetatyaka kanakaira hahinaeharenai kakoa. Nikare xakore xaotyakisatyaho mahokoanetita hoka. Sacerdotenai taita xakore nikare kanakairita hatyo nakairati hoka.

<sup>5</sup> — Xoana maisa xakaixaritita babera Moisés xaotyakira xairatyoare tyoahenere nanekoa? Sábado xowaka atyo sacerdotenai Iraexatyakalati Hanako hakahitaha xakore hoka maisa atyo xaotyakiyaho aokitere akere-ta tyaonareha. Xakore hoka maisa atyo kairaityakere etahiha.

<sup>6</sup> — Aliterexe nomita xihiyeha: ali hatya hatyo hati xaehare tyaonita. <sup>7</sup> Xawaiyoretaiya exakerexe xairatyoare tyoahenere iraiti waiyexe nanekoa nehenerere: “Kasani maisa kirakahare kafetatyaka nomani naokare. Kasani haliti waiye moka hahinaehare naokita exahe airakoaneharetene naokita”, nitere kakoa hoka maisaiya iniyalahare xamokita haliti waiyexeharexe.

<sup>8</sup> Hiyaiya, Haliti Ityani tehitiya atyo sábado Xekohasehare — nexa Jesus ihiyeha.

#### Jesus Awaiyehiheta Nirakahexe Kahe

(Marcos 3.1-6; Lucas 6.6-11)

<sup>9</sup> Hatyaoseta Jesus, hatyo nalita xaneheta hoka xane xahohisakoatyakalati hana xeta. <sup>10</sup> Xane isoa hatyoako hoka hatyo nali hatya haliti hamaniya nirakahexe tyaonita. Hatyaoseta haiyaharenai Jesus iraharetyaha aokowiterenai emaxaiminirene xaotyakisatyaho hiyeta axehenahene: — Xoana wiyaotyakisakahohiyetaiyo waiyehena wawairatya sábado xowaka? nexaha.

<sup>11</sup> Hoka Jesus nehena: — Xikakalanerexereya hoka exoaiya tolokoako sábado xowaka hoka maisaiya xiye-hititene? <sup>12</sup> Haliti atyo kalanero xahexe. Hiyeta hoka sábado xowaka haiyanai wakahinaetya aokita wiyaotyakisakaho — nexa.

<sup>13</sup> Hatyaoseta Jesus nexa hatyo haliti nirakahexe hiye: — Haimahena hikahe — nexa. Aimatya hakahe hoka waiyeheta, hakakoa hamaniya kahe kakoa tyaoneheta.

<sup>14</sup> Hatyaoseta fariseunai hikoaheta hatyoakota. Ehareha Jesus hiye hoka aisahene aokowihenaha hoka irakakoahenaha, ahekohenaha haxaisanahene tahi akiti.



<sup>15</sup> Jesus hatyo tahi sema hoka hatyo nalita xaneheta. Hoka kahare haliti xane exema hoka hokakiterenai tyoty aiyatelikheta. <sup>16</sup> Hatyaoseta halitinai hiye hatahi akiti maxakaisakene aoka.

<sup>17</sup> Nikarexe tyaona iraiti xakaisasehare Isaías iratere akereta kawenatyakeheta maheta. Exakerexe atyo xairatya:

<sup>18</sup> Owene atyo nowakanihare naohenere, nawaiyititere, nihalahare mokita. Nisekohare ite nisa enomana hoka waiye ahekotya tyoty halitinai kakoa.

<sup>19</sup> Maisaite ehareta halitinai hiye, maisaite kintyaxa iraeta halitinai kakoa. Maisaite xala hare semita iniraine wenakalati naho.

<sup>20</sup> Maisaite katyahita atya kano taikoane, maisaite ewakatita xaokanatyakalati ikalira aokanaitere. Hekoite aiyateretyoa wenati waiyexe maniya hoka ekakoita moka halitinai hatyoaho.

<sup>21</sup> Waikohekoa nihatyaka tyaoniterenaite atyahaha exahita tyaonaha exema maheta.

### Jesus Atyo Motya Tihanare Kahinaetita Aokaha (Marcos 3.20-30; Lucas 11.14-23)

<sup>22</sup> Hatyaoseta kolatyaha Jesus ana hatya haliti maxosehare, mairainehare. Tihanare nikare mokitene. Hatyaoseta Jesus awaiyehetene hoka waiyakaheta, iraiheta xoaha.

<sup>23</sup> Halitinai waiyene hoka hakaharetyoaha. — Xoana exe haliti ala Davi jikolahare? nexa axakakoaha.

<sup>24</sup> Hoka fariseunai semaha hatyo tahi hoka nehenaha: — Maisata Davi jikolahare xinika. Belzebu tihanarenai xekohaseharetisa isayateliti enomana hoka axanikihitita tihanarenai halitinai nonitata — nexaha.

<sup>25</sup> Hatyaoseta Jesus otya exahekolaha hoka nehenaha: — Hakoa waikohekoa tyaoniterenaiya kirawanekakoaha hoka maisaiya kinatere tyaonehenahititaha, exaoretakakoahaiya. Nikareya wenakalati tyaoniterenai exahe halyako tyaoniterenai kirawanekakoaha hoka xaorehaiya. <sup>26</sup> Nikareya Ahalakoahaliti wakaneharenai hatyokakoaha kirawanekakoaha hoka aliyakereya kinatere tyaohenahititaha? Xaorehaiya hoka maisaiya kinaterehenahititaha hoka kamawenekoaretyakaha rotitaiya. <sup>27</sup> Hoka xiso atyo Belzebu isa haiyaterere nomani hoka hatyo kakoa naxanikihitita tihanarenai xaokita. Nikareya hoka xala isa iyateliti xiyaotyakiraharenai ana hoka axanekihitita tihanarenai halitinai nonitata? Nikare xaokita hoka maisaiya tyakekoto xiso xiyaotyakiraharenai. <sup>28</sup> Aliterexe atyo Enore nisekohare niyaterere hiyeta naxanikihitita isekohalitinai hoka hatyoharenai atyo hotikijita Enore koamaniya nawenatyaka koxaka kaokoherehare xomana — nexa.

<sup>29</sup> — Maisaiya xala hare ijoita haliti kinaterexe hanako hoka kaiwaharetitene maxolatyakahareta. Olatene hotohariya atyo hoka hatyaosetaiya kolaharetene ehanakota.

<sup>30</sup> — Xala xamani atyo maisa kahinaetyare natyo hoka kahalakoahareta atyo nokakoi, xala xamani atyo maisa ahohisakoatyare nohakakoani hoka exaoretita atyo.

<sup>31</sup> — Hiyeta hoka nomita: tyoty halitinai iniyalahare tyomitereharenai atyoite kamaotyanyakeheta, exahe Enore kairaharetyakiterehare tehitiya atyoite kamaotyanyakeheta. Hoka xala xamaniya atyo Iseko-haliti Waiyexe iraharetya hoka maisaiya atyo aliyakere kaxemaisatyakehitita. <sup>32</sup> Xala xamaniya iraharetya Haliti Ityani hoka enajikini maniya emaotyanyakaha aoheta hoka kamaotyanyakehetaiya atyo. Hoka xala xamaniya atyo iraharetya Iseko-haliti Waiyexe hoka maisaiya atyo aliyakere kaxemaisatyakehitita, kaliniye waikohekoa exahe etare tyohitiyere waikohekoa xowaka hoka kamaotyanyakehitita.

### Atya, Atyali Xoaha (Lucas 6.43-45)

<sup>33</sup> — Atyali waiyexe xahiyoka xaokowita hoka atya kate waiyexe xafitya. Atya kate waiyexe atyo maisa ewaxirali kaliye, atya kate ewaxirahare atyo maisa waiyeri kaliye. Tyoty atyanai atyo irinai hiyeta waiyekehalakaharetaha.

<sup>34</sup> — Xisonae atyo xikahenehare owi akereta. Maisa xawaiyexe hoka aliyakeriya waiyexe xiraihena? Aliyakere xamani xiyahakola hoka xiyahakola akereta xahikoaita xikanasakota. <sup>35</sup> Haliti waiyexe atyo kahare xalini hare waiye ahekoita hoka hatyo akiti iraeta. Hoka haliti mawaiyexeharexe atyo kahare xalini hare ewaxirahare ahekoita hoka hatyohare iniyalahare tahi atyo iraeta.

<sup>36</sup> — Xasemehena niraini: miyanitiye xowaka Enore axalihenere halitinai xowakaite hatya xakini irahetehena iniyalahare irahenere tahi Enore hiye. <sup>37</sup> Hatyo xirainenai hiyeta atyoite xawaiyekehalakaharehena, xoana aliterexe xamani iniyalahare xisoma, xoana maisa xamani hoka — nexa Jesus.

### Fariseunai Waiyaha Aokowiyahitaha Waiyexe Nomaka (Marcos 8.11-12; Lucas 11.29-32)

<sup>38</sup> Hatyaoseta haiyanai xaotyakiyaho kakoa waiyoreterenai, fariseunai xoaha nehenaha Jesus hiye: — Kasani wiyaiya xalini hare homane waokowita, wityakeko maheta hiso, Xaotyakisatiye — nexaha.

<sup>39</sup> — Kalikiniyerenai atyo maisa waiyexe, maisa tyakekoreha. Axahitaha xalini hare nomaka tyakekoha maheta. Xakore hoka maisaiya xoare hare kaomakita ewaiyanaha maheta. Iraitu xakaisasehare Jonas tyo-henere akere taitaite kahotikisaka enomanaha tyakekoha maheta. <sup>40</sup> Jonas atyo hanamaki ferakene, hanamaki makene xoaha tyaona onexere najako. Nikare tehitiyaite Haliti Ityani hanamaki ferakene, hanamaki makene xoaha tyaona waikoako.

<sup>41</sup> — Xaxalisati ferakenite Nínive nali tyaoniterenai tityoaha hoka iraharehena xiso. Hiyaiya, halakisaha atyo iniyalahare háomanaha, semaha Jonas niraene hoka. Hoka natyo atyo nomita: kalikini ali tyaonitere atyo Jonas xaehare. <sup>42</sup> Xaxalisati ferakenite xekohasetiro Sabá yolo ite tityoa hoka iraharehena xiso. Hiyaiya, sekota atyo tyoa sema maheta Salomão

nawaiyore xaotyakiranai. Hoka natyo atyo nomita: kalikini ali tyaonitere atyo Salomão xahehare — nexa.

**Isekohaliti Iniyalahare Haikoahaneheta Haliti Ana Tahī**  
(Lucas 11.24-26)

<sup>43</sup> — Xasemehena, isekohaliti iniyalahare hikoahete-hena haliti milakota hoka xane tonakoaita maonex-akoahare akiti, tawita hakawininaose. Maisaiya kaokita hoka <sup>44</sup> nita: “Nahaikoahetaite nohani nali xeta, notyohenere nalita”, nita. Hatyaoseta haikoaheta hoka hati aokitere firakore, iyomakore, waiye xomokakotyakere ana kaokihitita. <sup>45</sup> Hatyaoseta haikoaheta hoka xane nolokita hahotyali 7-harenai isekohalitinai exahehare niyalaharenai, hoka tyotyaha xane tyaonahitaha nali. Hatyo hiyeta hatyohare haliti nawenane hetatiye xahehare howitiharene tyaonita. Hoka nikarite kalikiniyerenai iniyalahare tyomiterenai tyaonaha — nexa Jesus.

**Jesus Nityo, Iximarenenai Xoaha Irae Aokowita Ekakoa**  
(Marcos 3.31-35; Lucas 8.19-21; Hebreus 2.11-13)

<sup>46</sup> Hatyaoseta Jesus irateta halitinai kakoa hoka inityo, iximarenenai kaokaha. Menanakita tyaonaha, kasani iraeha ekakoa aokowiyahitaha hoka kawisahene. <sup>47</sup> Hatyaoseta hatya xane nexa Jesus hiye: — Hasemehena, hityo, hiximarenenai owene menanaka, iraeha aokowiyahitaha hikakoa — nexa ihiye.

<sup>48</sup> Hoka Jesus nehena: — Xalatya mama? Xalatya noximalininae? nexa. <sup>49</sup> Hatyaoseta hotikisa haxaotyakiraharenai ana hoka nehena: — Xiyaiyehena, owene atyo mama, noximalininai. <sup>50</sup> Xala xamani atyo tyaonita Babama enokoa tyaonitere aokitere akereta hoka hatyonai atyo noximalini, noximaloni, mama naokita — nexa.

**Xafityatiye Tahī**  
(Marcos 4.1-9; Lucas 8.4-10)

**13** Hatyo ferakeneta Jesus hikoaheta hatyakota, xane Galilēia xa haliya, xane tyoka one haliya hoka aotyakihena halitinai. <sup>2</sup> Ekakoita kaharehena halitinai hohisakoita enomana hoka xane kakoha kanowa ako hoka tyoka. Hoka halitinai atyo kaiholokoa tityoaha. <sup>3</sup> Xakaihakahena ihiyeha kahare xalini hare tahi hoka metahare hairaine moka enomanaha hoka nehena: — Hatya haliti xane fitya maheta hahananeharese. <sup>4</sup> Fitita ene hanakatise hoka haiyasenae exoa ahoti kilihi hoka kotehalanai kanakairehetene tyotyā. <sup>5</sup> Haiyasenai ehananese exoa kahare sehali tyaonitere akiti, inira waikohe akiti. Hatyo hanakatisenae haxerore hikoa, komita ene maisa waikohe aka hoka. <sup>6</sup> Hatyaoseta kamai hikoahena hoka watere aisehetene, maisa hateko katyahareta hoka. <sup>7</sup> Haiyasenae exoa katohere tyaonitere akiti hoka katoherenae kinatere exahita hoka jiyahaotyahene, maisa aliyakere tyaona xaka. <sup>8</sup> Haiyasenae atyo exoa waiyexe waikohe akiti, tyaonaha atyo waiyehare. Haiyanai 100-se kasēta, haiyanai 60-se kase, haiyanai 30-se xoaha atyo kaseha — nexa.

<sup>9</sup> — Xala xamani atyo katanakoakore semakatya maheta hoka maika semehena niraini — nexa Jesus ihiyeha.

<sup>10</sup> Hatyaoseta Jesus xaotyakiraharenae irahenaha ekakoa: — Xoana hoka metahare hiraine hamoka hoka haotyakisahitene? nexaha.

<sup>11</sup> Hoka Jesus nehena: — Xomana atyo Enore hotikijita ekoa maniya nawenatyaka metahareterehare hoka enomanaha atyo maisa hotikisarene. <sup>12</sup> Xala xamani atyoite xalini hare kakoare hoka kaxekakihitiyaite enomana hoka exahexe tyaona enomana. Hoka xala xamani atyoite maisa xoare hare enali aka hoka exahe inira kakoare hoka kaiyakeheta atyoite enonitata.

<sup>13</sup> Hiyeta hoka metahare namokita niraini enomanaha. Hatyo halitinai atyo wahakotyahitaha xakore hoka maisa waiyakatyareha, semahitene xakore hoka maisa waiyekehalakere enomanaha. <sup>14</sup> Nikare tyaonahitaha iraiti xakaisasehare Isaías iratere akereta tyaonaha maheta. Exakere Isaías xairatya:

Xasemitene xakore hoka maisaite waiyekehalakita xomana, xawahakotyate xakore hoka maisaite xoare xiyaita.

<sup>15</sup> Exe halitinai xahekola atyo maisa waiyexe, jihotyaha hatanakoakoha exahe haxosenaiha hoka.

Ikoiya awa nikare tyaonahitaha hoka exosenahaiya waiyakaita, etanakoakonahaiya semita, waiyeya exahekolaha tyaonita hoka tyaonehenahitahaiya nokoamaniye hoka waiyeya namohenahitene, nexa Enore.

<sup>16</sup> Hoka Jesus nehitiya: — Waiye kaiserehare xiyosenai waiyakaita, exahe xitanakoakonai hoka semakaita.

<sup>17</sup> Aliterexe nomita xihiye: toahiya kahare iraiti xakaisaseharenai, halitinai Enore anere hotyalinai harenai semaha aokowiha exe xasemitere, waiyaha aokowiha ene exe xiyaitere. Xakore hoka maisa aliyakere.

**Jesus Awaiyekehalakatya Xafityatiye Tahī**  
(Marcos 4.10-20; Lucas 8.11-15)

<sup>18</sup> — Xasemehena hoka nawaiyekehalakatya xomana xafityatiye tahi kakoa, naimenekotyā hoka metahare niraehenere. <sup>19</sup> Haiyanai xakore atyo semaha iraiti, Xekohaseti enokoatare maniya nawenatyaka tahi akiti hoka maisa atyo waiyekehalakere enomanaha hoka hatyonai atyo hanakatise exoahenere ahoti kilihi akereeta tyaonahitaha. Hoka Tihanare tyoa hoka iyehitita enonyahitaha kairaityakehenere ihiyeha hoka maotyanehenahititene. <sup>20</sup> Hanakatise exoahenere kaharexe sehalse akiti atyo semehena iraiti waiyexe hoka haihalaharenaha kakoa aokahiterene haomanaha akereta. <sup>21</sup> Xakore atyo hoka maisa atyo waha tyaonare exema, maisa katyaharexe hoka. Kirawanehenahene Iraitī Waiyexe hiyeta hoka haxerore halakihititere iraiti xema hawenane. <sup>22</sup> Haiyanai atyo hanakatise exoahenere katohere koni akereta. Semaha xakore iraiti hoka ahekotyahitaha hawenaneha akiti exahe wisekoliti hare kakoa, exahe hawenaneha keharere akiti kakoa hoka maotyanehenahititaha iraiti hoka maisa tyaonareha exema. <sup>23</sup> Hoka haiyanai atyo hanakatise

kaxafityakitere waikohekoa waiyexe akereta. Hatyonai atyo semaha iraeti hoka tyaonaha exema, exahe waiyekehalakita enomanaha hoka haiyaharenai 100-se, haiyanai 60-se, exahe haiyanai hoka 30-se xa-hexe kaseta.

### Joio Xafityaka Tahī

<sup>24</sup> Hatyaoseta Jesus aimenekohitiya enomanaha há-tahi. Hoka nehena: — Xekohaseti enokoatare koa-maniya nawenatyaka atyo hatya haliti hanakatise waiyexe fititere hamasenekoa akereta atyo. <sup>25</sup> Haxowa-ka xatini tyotyaha nemakahitaha hoka tyoa enaha-lakoahareha hoka fitya manakairatyakahare joio aokahitere trigo koni hoka xaneheta. <sup>26</sup> Hatyaoseta hananehalitinae hikoa hoka kekoareha, kaenaseha. Hoka hatyaoseta manakairatyakahare tehitiya kaotyaka. <sup>27</sup> Hatyaoseta ewakaneharenai tyoa irahena hatyo masene waikatehare hiye: “Xekohaseti, waiyexe hanakatise takita atyo hafitya himasenekoa. Hoka aliyakere ala hoka manakairatyakahare tehitiya tyaona?” nexaha. <sup>28</sup> “Kala hatya wahalakoahare nikare moka wiso”, nexa ihiyeha. Hoka nexa axahene: “Xoana, wamalaheta manakairatyakahare haokita?” nexaha. <sup>29</sup> “Maisaiya”, nexa. “Waiya aliya hoka hatyo xamalahetehena hoka xamalaka tehitiyaiya trigo. <sup>30</sup> Kotare trigo exahe manakairatyakahare xoaha kekoareha haxawalita ixirikotyakaha kijiya. Hoka hatyo xowakehenaite hoka nomite ixirikotyaseharenai hiye: ‘Xamalahetaira manakairatyakahare hotohare hoka xolahisetyahene hoka xakeratyahene. Jikiniti maniyaira xirikotyaka trigo hoka xamokahene nakairati nitini ako’”, nexa ihiyeha.

### Mostardase Tahī

(Marcos 4.30-32; Lucas 13.18-19)

<sup>31</sup> Hatyaoseta Jesus aimenekohitiya enomanaha hatsa tahi. Hoka nehena ihiyeha: — Xekohaseti enokoatare koamaniya nawenatyaka atyo mostardase akereta. Hiyaiya, hatyo atyo kiranexe haiyanai hanakatise nonitata. Hoka hatya haliti atyo hatyo hanakatise fehena <sup>32</sup> hoka kekoarehena atyo hoka haiyanai xaehare kate atyo tyaonita. Hatyo hiyeta atyakate atyo tyaonita hoka kotehalasena waiyehene hoka haiheha tyomitaha ekanohinai koni — nexa.

### Kaorehetyakalati Tahī

(Lucas 13.20-21)

<sup>33</sup> Hatyaoseta Jesus aimenekohitiya enomanaha há-tahi. Hoka nehena: — Xekohaseti enokoatare koa-maniya nawenatyaka atyo hatya ohiro iya kaorehetyakalati hoka trigohe kakoa kaketatitere akereta. Hoka hatyaoseta wahasehena hoka tamomotere akereta atyo — nexa Jesus ihiyeha.

<sup>34</sup> Jesus iraihena halitinai kakoa hoka haxaimenekola kakoa taita iraeta ihiyeha. Maisa xoare nexa iraexe ihiyeha hamaxaimenekolahareneta. <sup>35</sup> Iraiti xakaisase-

hare xairala akereta kawenatyakeheta maheta nikare Jesus iraeta. Exakere iraiti xakaisasehare xairala:

Nirahenaite hoka noxaimenikoli kakoa taitaite nirae ekakoaha. Masemakahare tyaoniterehare hetati waikohe kaomakehenere xowakiyere tahi akitite noxakai ihiyeha.

### Jesus Awaiyekehalakatyā Xaimenekotyati Tahī

<sup>36</sup> Hatyaoseta Jesus xaneheta halitinai nonita hoka xane isoa hatyako hoka exaotyakiraharenai xane ehaliya hoka axehenahene: — Hawaiyekehalakatyā womana manakairatyakahare tahi akiti — nexaha.

<sup>37</sup> Hoka Jesus nexa: — Haliti Ityani xaokaka atyo, “Hanakatise waiyexe xafityasehare”, nomita. <sup>38</sup> Tyotyā halitinai xaokaka atyo, “Masenekoa”, nomita. Enore maniya tyaoniterenai xaokaka atyo, “Waiyexe hanakatise”, nomita. Ahalakoahaliti maniya tyaoniterenai xaokaka atyo, “Manakairatyakahare”, nomita. <sup>39</sup> Tihanare xaokaka atyo, “Enahalakoahare”, “Manakairatyakahare xafityasehare”, nomita. Miyanitiye ferakene xaokaka atyo, “Ixirikotyakaosehena”, nomita. Anjonai xaokaka atyo, “Hatenitiyenai”, nomita. <sup>40</sup> Hatyo manakairatyakahare kamalakaka hoka kaxawatyakehenere irikati koni akereta tehitiya atyoite miyanitiye xowakehena hoka <sup>41</sup> Haliti Ityanite axikatya anjonai ahohisakoatya maheta iniyalahare nomaseharenai exahe iniyalahare axomokanekihenerenai <sup>42</sup> hoka xawatyahene ite irikati kalorexe kiritere koni. Hatyo nalite tiyahenaha masakare exahe, “karai, karai”, nexaite mohenaha haikolinaiha. <sup>43</sup> Hatyaosetaite Enore maniya tyaoniterenaite waiye tyaonaha hanexeha Enore nawenakala. Nalite weroka tyaonaha kamae akereta — nexa. — Xala xamani atyo katanakoakore semakatyā maheta hoka maika semehena niraini — nexa Jesus haxaotyakiraharenai hiye.

### Jesus Hanama Tahī Kakoa Aimenekohitiya

<sup>44</sup> — Xekohaseti koamaniya nawenatyaka atyo xoalini hare kaloxaimanexe metahare tyaonitere hakoa waikohekoa akereta hoka hatya haliti kaokehenene hoka ateroakihitayerene akereta. Hoka ihalahare hoka xane betetya tyotyā haxiyeharenai hoka haikoaheta hoka hatyo waikohe iyitere akereta atyo.

<sup>45</sup> — Xekohaseti koamaniya nawenatyaka tehitiya atyo hatya haliti pérolanai niyasehare akereta. <sup>46</sup> Hoka kaoka hatya pérola kaloxaimanexe hoka tyotyā betetya haxiyeharenae, haikoaheta hoka hatyo sehahise pérola iyitere akereta atyo.

<sup>47</sup> — Xekohaseti koamaniya nawenatyaka atyo maka kaxawatyakitere one xaiya hoka hiyitere kahare kohase hawareharexe xakini akereta. <sup>48</sup> Kahare kohase isoa enako hoka mairatyatienai noloka ahikoatya-hene kaiholokoa hoka tyokaha hoka imexakonisahene maheta. Waiyexe kohasenai haitinihareha ako mokahita hoka ewaxirahare kohasenai atyo xawatyahitaha.

<sup>49</sup> Miyanitiye xowaka tehitiyaite nikareta tyaona. Anjonaitaite xane haware moka mawaiyexeharenai

waiyexeharexenai nonitata. <sup>50</sup> Hoka xawatyahaite mawaiyexehareharenai irikati kalorexe kiritere koni. Hatyo nalite tiyahrenaha hoka haikolinaiha, “karai, karai”, nexa mokaha — nexa Jesus.

<sup>51</sup> Hatyaoseta Jesus axa haxaotyakiraharenai: — Xoana, tyotyaxe noxakaitere xihye akiti waiyekehala-ka xomana? nexa ihiyeha.

— Há, waiyekehalaka womana — nexaha ihye.

<sup>52</sup> Hoka Jesus nexa: — Hatya haliti kaxaotyakisakitere Enore nawenanaho kakoa atyo kaisaniye hotyali akereeta hoka xoalini hare hatyakaira hiyeta waitare exahe toahiyere, waiyexe makere iyihititere hoka ijitere haiyanityo haisaninai ana akereeta — nexa.

### Jesus Haikoaheta Nazaré Xeta

(Marcos 6.1-6; Lucas 4.16-30)

<sup>53</sup> Hatyaoseta Jesus halakisa hairaene metaharexe hoka hikoaheta hatyo nalita <sup>54</sup> hoka xaneheta hawenakala xeta. Hoka hatyo nali aotyakijita zahohisakoatyakalati hanako hoka iniraene semehenerenai hakaharetyoaha hoka axakakoahenaha: — Aliyotala enawaiyore tyoita enomana? Exahe iyateliti hoka maomakahare waiyexe tyomita? <sup>55</sup> Xoana maisa hoka etake hati nomasehare ityani xini? xoana maisa hoka Maria ityani xini? Xoana maisa hoka Tiago, José, Simão, Judas xoaha naxenane xini? <sup>56</sup> Xoana maisa hoka iximalonenai xini ali tyaonita? Hoka aliyotala exehare iniyatere tyaonita enomana? nexaha, <sup>57</sup> maisa awaiyetyareha Jesus hoka.

Hoka Jesus nehena: — Iraeti xakaisasehare atyo kaxaiminisakita hakakoare. Xakore atyo hoka ewaikohera, enawenakala, ehana nali atyo maisa kaxaiminisakere — nexa.

<sup>58</sup> Maisa tyakekoreha hoka hatyo hiyeta Jesus maisa kahare tyomita maomakahare waiyexe hatyo nali.

### João Batista Kamane Tahī

(Marcos 6.14-29; Lucas 9.7-9)

**14** Hatyo xowakiya Herodes Galiléia koa xekohaseti tyaonita hoka sema Jesus tahi. <sup>2</sup> Semene hoka nexa hawakaneharenai hiye: — Kala maisa hoka João Batista kaseheta. Hiyeta hoka kahare maomakahare waiyexe tyomita — nexa.

<sup>3</sup> Koxaka Herodes niraene xema João otokaha hoka olatyahene hoka berexotyakalati ako mokahene Herodias xemere. Hatyo nahitita Herodes tyaonita ene hatyo ohiro kakoa, iximarene Filipe exanityo xakore hoka.

<sup>4</sup> João Batista koxaka hatyo nahitita nexa Herodes hiye: — Xaotyakiyaho atyo mahokoanetita hiximarene exanityo kakoa hawenane.

<sup>5</sup> Herodes aisene aokowi, xakore hoka mairita judeunai João iraiti xakaisasehare aokahitere hiyeta.

<sup>6</sup> Hatyaoseta Herodes nawenanaose ferakene xane hiko hoka hisehaliti tyomaha kalore hoka Herodias ityani xoimahaloti holikoahena tyotyaha enahalakoa hoka awaiyetya exoholikoane Herodes <sup>7</sup> hoka nexa xoimahaloti hiye: — Xoarenai xamaniya nisa homana

haoka hoka haxa natyo hoka niseniya homana, alitere naokita. Maisa namaoseraita xini — nexa.

<sup>8</sup> Hanityo xaotyakira ximita nehena: — Xama hisa nomani kalikinita João Batista seri balatoahekoa — nexa xoimahaloti Herodes hiye.

<sup>9</sup> Herodes semene hoka amaikohare. Xakore hoka hatyo iraihenere tyotyaxa hakaixakalaharenai haotita hiyetaiya atyo maisa aliyakere maxekaneta xoimahaloti ana. <sup>10</sup> Hoka hatyaoseta axikatya sorarenai irikotyaha maheta João Batista seri berexo akota. <sup>11</sup> Kolatyaha eseri balatoahekoa hoka isahene xoimahaloti ana hoka kolatene hanityo ana. <sup>12</sup> Hatyo najikinita João xaotyakiraharenai semene hoka tyoaha kolahenahitaha ehare hoka fityahene. Fityahene hoka xane xakaihene Jesus hiye.

### Jesus Tyaisa Kahare Halitinai

(Marcos 6.30-44; Lucas 9.10-17; João 6.1-14)

<sup>13</sup> Hatyaoseta Jesus sema João kamane tahi hoka kanowako xaneheta hatyo nalita. Hoka hawawaharenai xane maharexakiti xeta. Hoka halitinai ana waiyekehalakita xanehenere akiti hoka xaneha exema tonareha hawenakalataha. <sup>14</sup> Hatyaoseta Jesus exoahena kanowa akota hoka waiya kahare halitinai hoka airakoaneharetyahene, aiyatelikheta tyotyaxokakiterenai.

<sup>15</sup> Hatyaoseta makehena hoka exaotyakiraharenai tyoa iraeaha Jesus kakoa hoka nexaha ihye: — Hiyaiyehena, makehena wihye. Ali maharexakiti maisa xoare hare aka. Haxikahetehena exe halitinai hoka xaneheta hoka xaneha wenakalatinai hoka iyaha nakairati hoka kanakairaha — nexaha.

<sup>16</sup> Hoka Jesus nexa: — Maisaiya xoare maheta exe halitinai xanehitita. Xisota xisehena nakairati enomanaha — nexa ihiyeha.

<sup>17</sup> — Winali atyo 5-tohase nakairati, hinama kohase xoaha taita — nexaha.

<sup>18</sup> — Xamehenene ali — nexa Jesus.

<sup>19</sup> Isahene enomana hoka hatyaoseta irai halitinai kakoa tyokaha maheta ime koa. Hatyo najikinita iya 5-tohase nakairati, hinama kohase xoaha hoka wahakotyaxenoxeta hoka iraexatya Enore hiye. Hoka taikasetya nakairati hoka isene haxaotyakiraharenai ana hoka exaotyakiraharenai irakene halitinai ana. <sup>20</sup> Hatyaoseta tyotyaxa kanakairaha hoka fakatehaha. Hatyaoseta exaotyakiraharenai imexakoaheta emawaneha hoka 12-te koho kaise makere mokaha nakairati mawane kakoare. <sup>21</sup> Hatyo kanakairehenenai atyo 5.000-hare ena taita. Ohironai, xoimanai tehi-tya kahare kanakairaha, hoka maisa atyo ohironai, xoimanai harenai kaxihatyakita.

### Jesus Tonita One Heno

(Marcos 6.45-52; João 6.15-21)

<sup>22</sup> Hatyo najikinita Jesus haxaotyakiraharenai kakoa irai hoka kakohahenahitaha kanowako hoka xanehenahitaha enaheta maheta halakoiya. Hoka hatyo nase Jesus jinaheta halitinai. <sup>23</sup> Jinaheta halitinai na-

jikinita Jesus xane kakoha tyairi henose hawawaharenai iraexatya maheta. Makehena ihiyeha hoka hatyo nali hawawaharenai tyaonita. <sup>24</sup> Hatyo xowaka kanowa koxaka nekesexehetehena xanehitita exaotyakiraharenae kakoare. One takoiyaxala mokotyoiita kinatyaxa kanowa hiye hoka hoholati hoholasekoatyahitene, xanehenahititere maniyata hoholatita hoka.

<sup>25</sup> Hatyaoseta okoi ferakoahena hoka Jesus xane hikoaheta enomanaha, tonita one heno. <sup>26</sup> Hatyaoseta exaotyakiraharenai waiyaha Jesus netonane one heno hoka mairaha hoka nehenaha: — Kala maisa hoka isekohaliti! nexaha hoka hamairaneha kawiyatyaha.

<sup>27</sup> Hoka Jesus nexa: — Awa atyo ximaira, natyo ta. Awa atyo ximaira natyo — nexa ihiyeha.

<sup>28</sup> Hoka Pedro nehena: — Xekohaseti, hisota atyo hoka hakawisa natyo hoka natona one heno hatyo hisaonitere kijiya — nexa.

<sup>29</sup> — Ahá, hisohena — nexa Jesus.

Nexa ihije hoka Pedro exoa kanowa akota hoka tohena one heno Jesus maniya. <sup>30</sup> Hatyaoseta hoholati hoholala kehexa. Mairehena hoka isoahena onexa. Hoka kawiyatya Jesus ana: — Xekohaseti, hotohetehena natyo — nexa.

<sup>31</sup> Haxerore Jesus aimatya hakahe enomana, otoheta Pedro hoka nehena: — Xoana hoka inira hityakekota! Xoanere hoka maisa hityakekore? nexa.

<sup>32</sup> Hatyaoseta hatyo hinamanai kakohaheta kanowa ako hoka haxerore hoholati memakeheta.

<sup>33</sup> Exaotyakiraharenai meholokoa awaietyaha Jesus hoka nexaha: — Aliterexe kore Enore Ityani hiso — nexaha.

### Jesus Xane Genesaré Nali

(Marcos 6.53-56)

<sup>34</sup> Hatyaoseta imahotyoha hoka xane kaokaha Genesaré koa nali. <sup>35</sup> Hatyo nali halitinai ana Jesus waiyekehalakahare hoka xane kaexakatyaha tyotyta hatyokoa tyaoniterenai. Semaha Jesus kaokene hoka kahare kolatyaha hokakitina enomana. <sup>36</sup> Hoka axahitene, kasani inima kilihi hiye hekoti ekaokakisaha hakaheha aokowiyahitaha. Hoka tyotyta hakaheha ekaokakihenerenai inima kilihi hiye kinaterehitita.

### Jesus, Judeunai Xoaha Nawenanaho Tah

(Marcos 7.1-13)

**15** Hatyaoseta haiyaharenai fariseunai, haiyanai judeunai xaotyakiraho kakoa waiyoreterenai xoaha tyoaha Jerusalém nalita, Jesus kakoa iraeah maheta, hoka axehenahene: <sup>2</sup> — Xoana hoka maisa hiyaotyakiraharenae tyaonareha wahetakomaniyeharenai xaotyakira xema? Hiyaiya, maisa tihahisoareha hanakairaha nahitita — nexaha.

<sup>3</sup> Jesus nehena ihiyeha: — Hoka xoana atyo hoka xiso maisa xisaonare Enore xaotyakira xema hoka xahetakomaniyeharenai xaotyakiraho xema taita xisaonita? <sup>4</sup> Hiyaiya Enore atyo nexa:

Waiyira xaiminihena xexe, xityo hoka.

Nexa tehitiya:

Xala xamaniya atyo hanexe, hanityo iraeaharetya hoka waiye xaisaka, nexa.

<sup>5</sup> — Hoka xiso atyo exakerexe xaotyakijita: hatyaiya kaoloxere kahinaetya maheta ene hanexe, hanityo xakore hoka nexaiya ihiyeha, “Enore ana nisene”, nexaiya hoka maisa kahinaetita hanexe exahe hanityo hoka xomana atyo hatyohare ehekoreta. <sup>6</sup> Nikare maisaiya hanexe exahe hanityo waiye aiminijita hoka xomana atyo hatyohare ehekoreta. Hatyo hiyeta nikare atyo xaotyakijita hoka xahalakijita atyo Enore xaotyakira hoka xisaonita atyo xiyaotyakisakaho xema taita.

<sup>7</sup> — Xiso atyo teraharetyoarenai! Isaiás nika aliterexe exakere xairatya xitahi:

<sup>8</sup> Exe halitinai waiye iraeata notahi, nexa Enore, xakore hoka exahekolaha atyo seko tyaonita noniti.

<sup>9</sup> Maisa atyo awaietyahitaha natyo kaisere xini. Hiyaiya, halitinai xaotyakira kakoa atyo aotyakisahitaha hoka Enore xaotyakiraho aokahitaha.

### Jesus Xakai Aiyalaharetiterekare Wawenane

(Marcos 7.14-23)

<sup>10</sup> Hatyaoseta Jesus ahohisakoatya halitinai hoka nehena ihiyeha: — Waiye xasema hoka waiyekehalaka xomana: <sup>11</sup> Maisa atyo hatya kanasako ijoitere xini aiyalaharetita enawenane. Hoka ekanasakota hikoahititerekare atyo aiyalaharetita enawenane — nexa Jesus.

<sup>12</sup> Hatyaoseta exaotyakiraharenai xane kaokaha ehaliya hoka nehenaha: — Hasemehena, hiraetere maisa waiyeta fariseunai hiye. Xoana hatyo akiti hasemita? nexaha ihije.

<sup>13</sup> Hoka Jesus nexa ihiyeha: — Tyotyta hananehaliti Baba enokoa tyaonitere maxaferaharene atyoite kamalakakeheta. <sup>14</sup> Awa atyo ximawaiyehare ekakoaha. Hatyonai atyo maxoseharenai hoka maxoseharenai xotokahisase tyaoniterenai akereta. Maxosehare atyoite hatya maxosehare otokahijita hoka hatyo hinamanaite xane tolokoako exoaha — nexa Jesus.

<sup>15</sup> Hatyaoseta Pedro axene: — Hawaiiyekehalakatya womana hatyo metaharexe hiyakaitere tahi — nexa.

<sup>16</sup> — Xoana, haiyanai akerejeta xiso, maisa waiyekehalakere hekoti xomana? nexa Jesus. <sup>17</sup> — Hiyaiya, xoare xamani atyo hatya kanasako ijoita hoka enajako atyo xaneta. Hatyaoseta atyo hikoahitita ehare hiyeta.

<sup>18</sup> Hoka xoare xamani atyo ekanasakota, exahekola emahiyase hiyeta hikoita hoka hatyohare atyo aiyalaharetita enawenane. <sup>19</sup> Hiyaiya, mahiyaseti hiyeta atyo iniyalahare xahekotyati tyoita, xaisati, ohiro watyalisaka, xoalini hare iniyalahare. Hiyaiya, hatyo iniyalahare xahekotyati hiyeta tehitiya haiya xowaka haliti kaiwita, maoseraita, iraeaharetita. <sup>20</sup> Hatyoharenai atyo aiyalaharetita enawenane. Hoka himatihahisoaneharetaiya atyo hikanakaira hoka hatyohare atyo maisa aiyalaharetyare hawenane — nexa Jesus.

**Jesus Aiyatolokiheta Cananéia Yolo Ityani**

(Marcos 7.24-30)

<sup>21</sup> Hatyaoseta Jesus xaneheta hatyo nalita, xane Tiro, Sidom xoaha nali. <sup>22</sup> Xane kaoka hatyo nali hoka hatya ohiro Canaã yolo hikoa enomana hoka kawiyatya enomana: — Hairakoanehalohena natyo, Xekohaseti Davi jikolahare! Nityani xoimahaloti tihanare kamilakoretita hoka maisa waiye tyaonare — nexa.

<sup>23</sup> Nexa hoka Jesus mema tyaona. Hatyaoseta exaotyakiraharenai xane kaokaha ehaliya hoka nehena: — Haxikahetehena exe ohiro. Hiyaiya, tyoita wiyema hoka kirasaka kawiyatya minita — nexaha.

<sup>24</sup> Hatyaoseta Jesus nexa: — Nokaxaxikatyaiki atyo Israel hotyalinai ana taita. Hatyonai atyo kalaneronai hehaniterenai akereta tyaonahitaha — nexa.

<sup>25</sup> Nexa hoka ohiro tyoa meholokoa ikiji haliya hoka nehena: — Hakahinaehena natyo, Xekohaseti! nexa.

<sup>26</sup> — Maisa atyo ehokoreta xini xoimanai nonitata kaiyakeheta nakairati hoka kaxawatyakita kajolonai ana — nexa Jesus.

<sup>27</sup> Hoka ohiro nexa: — Alitere haokita, Xekohaseti. Xakore atyo hoka kajolonai tehitiya atyo kanakairita nakairati holoxo exoahena exekohasenaiha mexane katyahe hoka — nexa ihiye.

<sup>28</sup> — Ohiro, kalore atyo hityakekota! nexa Jesus. — Haokitere akeretaite kaomaka — nexa. Nexa taita ihiye hoka hatyo ohiro ityani exowakita kinatoloheta.

**Jesus Aiyatelikiheta Kahare Halitinai**

<sup>29</sup> Hatyaoseta Jesus hatyo nalita haikoaheta hoka xane Galiléia xa haliya. Hatyaoseta xane kakoha tyairi henose, hoka tyoka. <sup>30</sup> Hatyaoseta hatyo Jesus tyaonitere nali kahare halitinai xaneta hoka kolatyahitaha mawaiye netonaneharenai, maxoseharenai, mairaeneharenai, mawaiyehalitinai exahe haiyanai hokakiterenai xoaha hoka mokahitene ikiji haliya hoka tyotya aiyatelikihenahitene. <sup>31</sup> Halitinai hakaharetyoaha, waiyaha mairaeneharenai niraeneheta, mawaiyehalitinai niyatereheta, mawaiye netonaneharenai nawaiye netonaneheta exahe maxoseharenai waiyakareheta hoka. Hoka ihalahareha Israel yerenai nEnorexa kakoa.

**Jesus Tyaisa 4.000-hare Halitinai**

(Marcos 8.1-10)

<sup>32</sup> Hatyaoseta Jesus kawisa haxaotyakiraharenai hoka nehena: — Nakanakaharetita exe halitinai. Hanamaki-hena tyaonahitaha nohaliye hoka ali maisa xoare nakairati aka. Maisa naxikahenahitene matyaisakaharahitaha naokowiye, waiye aliya hoka exoaha hana-ka hiyeta ahotyaho — nexa.

<sup>33</sup> Hoka exaotyakiraharenai axehenahene: — Hoka aliyakereya ali maharexakiti wikaokehena nakairati exe halitinai ana? Hisoakaha atyo — nexaha.

<sup>34</sup> — Xoanama tohase nakairati xinali? nexa Jesus axahene.

— Sete tohase nakairati, haiyanai kohase xoaha — nexaha.

<sup>35</sup> Hatyaoseta Jesus irae halitinai hiye hoka waikoa tyokaha. <sup>36</sup> Tyokaha hoka hatyaoseta isaha Jesus ana sete tohase nakairati exahe kohasenai xoaha hoka: — Ehokore nakairati hisa womana, Abá — nexa iraxatya Enore hiye. Hatyaoseta taikasetene hoka isene haxaotyakiraharenai ana, hoka hatyonai irakene halitinai ana. <sup>37</sup> Tyotyaha kanakairaha hoka fakatehareha. Exaotyakiraharenai kaisehenahitaha kohokijinai ako hoka 7-te kaisero emawaneha imexehenahitaha.

<sup>38</sup> Hatyo kanakairehenerenai atyo 4.000-hare enanai taita. Ohironai, xoimanai tehitiya kahare kanakairaha, hoka maisa atyo ohironai, xoimanai harenai kaxihatyakita.

<sup>39</sup> Hatyaoseta Jesus axikaheta halitinai. Hatyo najikinita kakohaheta kanowako hoka xane Magadã koa nali.

**Jesus Axaha Tyoma Maheta Waiyexe Maomakahare**

(Mateus 12.39; Marcos 8.11-13; Lucas 12.54-56)

**16** Hatyaoseta haiyaharenai fariseunai, saduceunai xoaha xaneha Jesus kakoa iraha maheta, kasani hasakaharetyahene aokowiyahitaha hoka xoalini hare nomaka aokaha ihiye hoka waiyaha maheta, xoana aliterexe xamani Enore nalita tyoita iniyatere, maisa xamani.

<sup>2</sup> Hoka Jesus nehena: — Makehena atyo xihiyehoka xita: “Waiye akaite wihiye, hiyaiya, enokoa xotyakoa”, xita. <sup>3</sup> Nikare weta hoka xita: “One ite wihiye, hiyaiya, xotya aka exahe makaliko xoaha”, xita. Xawahakohena atyo enokoa hoka waiyekehalakita atyo xomana hatyoharenae. Xakore hoka maisa atyo waiyekehalakere xomana kalikini kaotyakitereharenai. <sup>4</sup> Kalikiniyerenai atyo maisa waiyexe, maisa tyakekohatiyeha! Xoalini hare nomaka atyo aokaha nohiye tyakekoha maheta. Xakore hoka Jonas tyaoenere akere taitaite kaomaka enomanaha tyakekoha maheta — nexa ihiyeha. Hatyaoseta kikisoaheta enonyahita hoka xaneheta.

**Fariseunai, Saduceunai Xoaha Xaotyakiraho**

(Marcos 8.14-21)

<sup>5</sup> Xanehenaha halakoiya maniya hoka exaotyakiraharenai maotyaneha nakairati hakolalaha.

<sup>6</sup> Hoka Jesus nehena: — Xasemehena, xirihalira fariseunai, saduceunai xoaha kaorehityakala kakoa — nexa.

<sup>7</sup> — Kala nakairati wimakolarehenere hiyeta nikareta — nexa exaotyakiraharenai hatyo kakoaha iraikakohahena.

<sup>8</sup> Jesus sema iniraikakoaneha hoka nehena: — Xoana hoka xiraiakokita nakairati ximakolarehenere hiyeta? Xoana hoka inira xityakekone tyaonita? <sup>9</sup> Xoana maisa waiyekehalakere xomana? Xoana maisa xotyare 5-tohase nakairati nirahenere 5.000-hare halitinai ana? Exowaka, xoanamate kohokiji xekaiseheta? <sup>10</sup> Xoana maisa xotyare sete tohase nakairati nirahenere

4.000-hare halitinai ana? Exowaka, xoanamate kohokiji xekaiseheta?

<sup>11</sup> — “Maika xirihare fariseunai, saduceunai xoaha kaorehityakala kakoa”, nomi xakore hoka maisa atyo nakairati tahi xini niraeta. Xoana maisa waiyekehalakere xomana? nexa.

<sup>12</sup> Hoka hatyaoseta exaotyakiraharenai ana iniraene waiyekehalaka. Maisa nakairati kaorehityakala kakoa kaxaikoawiha maheta xini hoka fariseunai, exahe saduceunai xaotyakira kakoa irihareha maheta.

### Pedro Irae Jesus Hiye

(Marcos 8.27-30; Lucas 9.18-21)

<sup>13</sup> Hatyaoseta Jesus xane wenakalati Cesaréia de Filipe maniya. Hatyo nali axehena haxaotyakiraharenai: — Xala halitinai aokita natyo Haliti Ityani? nexa.

<sup>14</sup> — Haiyanai atyo João Batista aokahitaha hiso. Haiyanai tehitiya atyo Elias aokahitaha hiso. Nikare haiyanai Jeremias aokahitaha hiso. Haiyanai tehitiya iraiti xakaisahare aokahitaha hiso — nexaha ihiye.

<sup>15</sup> — Hoka xiso atyo xala xaokita natyo? nexa Jesus ihiyeha.

<sup>16</sup> Simão Pedro nehena ihiye: — Hiso atyo Enore Kalorexe Aohenere. Hiso atyo Enore Ityani — nexa.

<sup>17</sup> — Waiye kaiserehare nikare hiraeta, Simão, João ityani — nexa Jesus. — Maisa haliti xini awaiyekehalakatene homana. Baba enokoa tyaonitere atyo awaiyekehalakatene homana — nexa Jesus Pedro hiye.

<sup>18</sup> — Hiyeta hoka nomita hihyie: hiso atyo Pedro hoka exe sehali henoite notyoma nohani. (Tyoty ekoa maniya tyaoniterenai xaokaka, “Nohani”, nita). Maisaiya efaharenai kinatere tyaonita exahitaha. <sup>19</sup> Nisaite homana enokoa majiholatyakala. Hoka xoare xamani atyoite hamahokoanetya ali waikohekoa hoka enokoa nali atyoite kamahokoanetyaka tehitiya. Hoka xoare xamani atyoite haoka ali waikohekoa hoka kaxaokaka tehitiya atyoite enokoa nali — nexa.

<sup>20</sup> Hatyaoseta Jesus haxaotyakiraharenai hiye hatyohare maxakaisakene haiyanai hiye aoka.

### Jesus Irae Hakamane, Hakaseneheta Tahi

(Marcos 8.31-9.2; Lucas 9.22-27)

<sup>21</sup> Hatyaoseta Jesus irahena mametaharehare haxaotyakiraharenai hiye: — Jerusalém terota noxani hoka hatyo nalite judeunai nityohalitiranai, saduceunai xekohaseharenai, xaotyakiyaho kakoa waiyoreterenai harenaite iniyalahare axomokakihena natyo kalore. Nokaxaisakite hoka hanamaki ferakene najikinitaite nokaseheta — nexa.

<sup>22</sup> Hatyaoseta Pedro nolokene haware hoka nehena ihiye: — Maisaiya nikareta xini. Maisaiya nikare hikaxomokakita, Xekohaseti — nexa.

<sup>23</sup> Hoka Jesus ehaikoahareheta hoka nexa Pedro hiye: — Hakikisoahetehena nahitita, Ahalakoahaliti! Hiso atyo sehali kajiyakoatyakitere akereta nahotiri hisaonita. Hiyaiya, haliti xahekola akereta atyo hahekoita, maisa atyo Enore ahekoitere akereta xini — nexa.

<sup>24</sup> Hatyaoseta Jesus nexa haxaotyakiraharenai hiye: — Xala xamani atyo tyaona nokoamaniye aokowihena hoka maika hatyota maotyanoawi hoka maika kolatya haberekotyaka niyahare atyalihose xaimaholatyaka hoka tyaona noximi. <sup>25</sup> Hiyaiya, xala xamani atyoite wenati waiyexe tawita hoka meta atyoite enonita. Xakore hoka xala xamani atyoite nohiyiti kaxaisaka hoka kaiyakeheta atyoite hoka wenati waiyexe nali hikoa. <sup>26</sup> Hoka xoare mahetaiya hatya haliti hakakoare waikohekoa ziyehaliti harenai kakoa tyaona hoka hatyaoseta waini? Maisaiya xoare hare bakatya hoka ekasekihitene. <sup>27</sup> Hiyaiya, Haliti Ityanite tyoheta Hanexe werokene kakoa, anjo haomanerenai kakoa hoka sema halitinai tahi hoka enómanenaiha akereta mohenehene.

<sup>28</sup> — Exeharíra xotyaxematya: ali haiyaharenai tyaonitereharenaite maisa wainahitaha hamawaiyaneneharahita Haliti Ityani tyohetehenere xowaka nahitita — nexa.

### Jesus Ana Kaotyaka Moisés, Elias Xoaha

(Marcos 9.2-13; Lucas 9.28-36)

**17** Hatyaoseta 6-ki ferakene najikinita Jesus noloka Pedro, haximarene kakoarenai Tiago, João xoaha hoka hatyonai kakoa taita xane tyairi wahaharexe heno. <sup>2</sup> Hoka nali hawareharexe tyaona ehaotyahitaha. Itiho weroka tyaona, motya kamai. Exahe inimanai hoka iyomate tyaona, motya xaokanatyakalati.

<sup>3</sup> Hatyaoseta Moisés, Elias kaotyaka hoka hatyo hanamahare Jesus xaotyakiraharenai waiyaha ini-raeneha Jesus kakoa.

<sup>4</sup> Hatyaoseta Pedro nehena: — Ehekoreta ali wisoa, Xekohaseti. Haokaiya atyo hoka notyoma hanama hatirise exaose. Hatya homanere, hatya Moisés anere, hatya Elias anere xoaha — nexa.

<sup>5</sup> Maisa halakihenere hekoti hairaine Pedro hoka kaiminiti werokali kaotyaka ehaoha hoka hatyo konita semaha iraiti: — Exe atyo Nityani, Noxiyakawali. Kalore aihalahalini kijita natyo. Xasemaxematyaira iniraine — nexa ihiyeha.

<sup>6</sup> Exaotyakiraharenai semaha hatyo iraiti hoka kalore mairaha hoka exoaha hatiho kakoa waikoa.

<sup>7</sup> Hatyaoseta Jesus tyoa totohenahitene hoka nehena: — Xainakoahetehena, awa atyo ximaira — nexa.

<sup>8</sup> Hatyaoseta waiyahokotyohenehitehenaha xakore, Jesus takitehena waiyehenahitaha.

<sup>9</sup> Exoahenehitehenaha tyairi henota hoka Jesus aotyakisahene hoka waiyehenahere maisa xala hare hiye xakaiha aokita Haliti Ityani kasehetehenere kijiya.

<sup>10</sup> Hatyaoseta exaotyakiraharenai axene: — Xoanere hoka xaotyakiyaho kakoa waiyoreterenai Elias hotohare ite tyoheta aokahitaha? nexa.

<sup>11</sup> Hoka nexa: — Aliterexe atyoite Elias hotohare tyoa hoka tyoty xoalini hare memere mohena. <sup>12</sup> Hoka natyo atyo nomita xihyie: Elias atyo koxaka tyoa. Xakore hoka maisa waiyekehalakita enomanaha hoka iniyalahare mokahene haxahekolaha akereta. Nikareta tehitiyaite Haliti Ityani iniyalahare mokaha — nexa Jesus ihiyeha.

<sup>13</sup> Hatyaoseta exaotyakiraharenai ana waiyekehalaka Jesus niraene. João Batista xaokaka nikare iraeta.

**Jesus Awaiyeheta Hatya Xoimahaliti**  
(Marcos 9.14-29; Lucas 9.37-43)

<sup>14</sup> Hatyaoseta xanehenahitaha haliti hisoakere koni xeta hoka hatya haliti tyoa Jesus haliya hoka meholokoa hakaolise kakoa hoka nexa: <sup>15</sup> — Xeko-haseti, hairakoaneharehena nityani! Wainitata exahe kalore kaweta ihiye. Hatyahareta hoka haiya xowaka ixoita irikatyaose exahe onexaiya hoka. <sup>16</sup> Notyoo ekakoa hiyaotyakiraharenai ana hoka maisa xoana mokahitene — nexa.

<sup>17</sup> Hoka Jesus nehena: — Haliti matyakekoneharenai, mawaiyexehareharenai! Otene kijiyaita notyaohena xi-haliya? Otene kijiyaita naiyasetyoa xikakoa? Xisohena xoimahaliti kakoa ali.

<sup>18</sup> Hatyaoseta Jesus watyali tihanare hoka kikisoaheta hoka xoimahaliti waiyeheta rotita.

<sup>19</sup> Hatyaoseta hawawaha heko axehenaha Jesus exaotyakiraharenai: — Xoanala hoka maisa aliyakere etake tihanare waxanikihitita? nexaha.

<sup>20</sup> — Komita maisa xityakekore hoka — nexa Jesus. — Aliterexe nomita xihye: xityakekotaiya, exahe mostardase akerehare inira hekoti xityakekotaiya hoka xexaiya exe tyairi hiye: “Hakikisoahena alita, hiyane exe maniya”, xexaiya ihiye, xityakekota hoka kikisoaiya. Nikareya xisaona hoka iyatelitiya tyaona xomana hoka tyotya xoalinihariya xisoma — nexa. <sup>21</sup> — Hoka hatyohare isekohaliti atyo iraexatyati, manakairiti xoaha xema taita kaxaxanikisakihitita — nexa.

**Jesus Iraehitiya Hakamane, Hakaseneheta Xoaha Tahī**  
(Marcos 9.30-32; Lucas 9.43-45)

<sup>22</sup> Exaotyakiraharenai hohisakoa Galiléia nali hoka Jesus nexa: — Haliti Ityanite kaxekakehena halitinai ana <sup>23</sup> hoka aisahenite. Xakore hoka hanamaki najikinitaita hoka kaseheta — nexa. Nexa hoka exaotyakiraharenai amaikohareha kalore.

**Iraexatyakalati Hanako Xekaka Olo Tahī**

<sup>24</sup> Hatyaoseta Jesus haxaotyakiraharenai kakoa kaokaha wenakalati Cafarnaum nali. Kaokaha hoka kalorexe noloxa resebityaseharenai tyoa axaha Pedro: — Xoana xiyaotyakisasehare maisa isare olo Iraexatyakalati Hana niyahare? nexaha.

<sup>25</sup> — Há, ijita — nexa Pedro ihiyeha.

Hatyaoseta Pedro xane isoahetehena hatyako hoka Jesus hotohare irae ekakoa: — Simão, xoanere atyo hiyahekola? Xala ala ijita olo xoalinihare xaimane aliyere xekohaseti ana: ali tyaoniterenai xamani, hakoatarenai kore? nexa.

<sup>26</sup> — Hakoatarenae — nexa Pedro.

— Ehekore — nexa Jesus. — Nikare atyo ala hoka ali tyaoniterenai maisa xoare maheta olo isahitaha — nexa. <sup>27</sup> — Xakore hoka maisaiya atyo wexamaikohalikisahitene. Hatyo hiyeta hiyane haxawahihena rotita

mairatise. Maika hanoloka haihikoatya hetatiye kohase hanolohenere hoka ekanasakoite olo hokose hiyaiya hoka hatyoite noxekani, hiyekane hakakoanexe. Hatyaosetaite hiyane hisa noxekani, hiyekane niyahare enomanaha — nexa.

**Xala Xamanite Masakare Kalorexe Tyaohena**  
(Marcos 9.33-37; Lucas 9.46-48; Filipenses 2.3-5; 1 Pedro 3.4; 5.5)

**18** Hatyo xowaka exaotyakiraharenae tyoaha Jesus haliya hoka axehenahene: — Xekohaseti enokoa nalitare kalorexe tyaohena hoka xala atyo masakare kalorexe hatyo nali? nexaha.

<sup>2</sup> Nexaha hoka Jesus kawisa hatya xoima hoka enahetaha mokene <sup>3</sup> hoka nehena: — Aliterexe nomita xihye: maisaiya xehawareharetita xawenane exahe xoima akereta xisaohitita hoka maisaiya hatyo nali xiyaneta. <sup>4</sup> Hoka xala xamaniya maxahenerehare exe xoima tyaonitere akereta tyaona hoka hatyo atyoite kalorexe tyaona enokoa nali. <sup>5</sup> Xala xamani atyoite waiye moka xoima exakerehare hoka natyo atyo waiye mokita.

**Iniyalahare Henehare**  
(Marcos 9.42-48; Lucas 17.1-2)

<sup>6</sup> — Hoka exehare xoima mokosenai tyakekotereharenai natyoiya atyo hatya iniyalahare aomanekisa hoka halakihenahitaha hawenaneha nokoamaniye hoka ehokoretaiya atyo kaxawatyaka one kaloxere xaiya sehali kaloliro mehetyakalati kaxolatyaka ihino hiye hoka maisa ahowitikisa xoimanai nawenane maheta.

<sup>7</sup> — Kaxiyani, halitinai iniyalahare aomanekijita haiyaharenae hoka hatyo hiyeta haiyanai halakisahitaha hawenaneha waiyexe maniyata! Nikare terota atyoite kawenatyakehena. Xakore hoka kirakoane atyoite kaxomokaka nikare axomokaniki akahenere — nexa.

<sup>8</sup> — Hiyeta hoka hikahe exahe hikiji harenai iniyalahare aomanekijita hiso hoka hirikotene hoka haxawatene. Ehekoretaiya himakahehare, himakijihare hiyane wenati waiyexe nali. Hoka maisaiya atyo ehokoreta xini hikahe, hikijinai kakoita mainikere hikaxawatyaka irikati mawakenehare nali hoka. <sup>9</sup> Maika hiyose iniyalahare aomanekijita hiso hoka holokoty hiyene hoka haxawatene. Ehekoretaiya hamaniya xoserore kakoa hiyane wenati waiyexe nali hoka maisaiya atyo ehokoreta xini manene hiyosenai kakoita hikaxawatyaka irikati mawakenehare nali hoka.

**Kalanero Metene Tahī**  
(Lucas 15.3-7)

<sup>10</sup> — Xiriharira hoka maisa ximaxaiminirita hatya hekoti exehare xoimairanai. Aliterexe niraehena xihye, ekahinaetyaseharenaiha anjonai atyo tyaotaha minita Baba enokoa tyaonitere haliya.

<sup>11</sup> — Hiyaiya, Haliti Ityani atyo tyoa taweheta, iyeheta maheta mititereharenae — nexa.

<sup>12</sup> — Xoanere atyo xiyahekola? Hatya halitiya 100-ri kakalanerore hoka haliya meta hoka xoanaiya tyaohena? Halakisaite 99-ri tyairi heno nisakoatyahitere



nalita hoka xane ite taweheta kalanero metehenere.  
<sup>13</sup> Aliterexe nomita xihye, kaokeheteniya hoka ihalahareya ekakoa, hatyo 99-ri mameteneharenai tyaoniterenai xahexe. <sup>14</sup> Nikareta tehitiya Xexe enokoa tyaonitere. Kasani maisa hatya hekoti exehare xoimanai meta aokare.

### Hihinaehareya Iniyalahare Tyomehena Hoka

(Lucas 17.3-4; Gálatas 6.1; Tiago 5.16-20)

<sup>15</sup> — Hihinaehareya iniyalahare tyoma hikakoa hoka hiyane hahotikisa iniyalahare enómane enomana. Maika hatyoharenai metahare hisoma, xiso hinamanai taita. Semaiya atyo hiraene hoka hihinaehare atyo waiye maniya hamoheta. <sup>16</sup> Maisa semaxemaita hiraine hoka hiyanehitiya hatya exahe hinamahare kakoa enomana hoka hiraehitiya ekakoa ehaotyahita hoka xoalinihare kairaetyakehena hoka semaha. <sup>17</sup> Hoka maisaiya exahe semita hatyonai niraene hoka maika tyakekohatienai hotyali hiye hiyakaini. Hoka maika maisa sema aokowita hatyonai niraene hoka majudeunehare akereta, kalorexexa noloxa resebityasehare akereta hamokene.

### Xaokati, Mahokoanetyati Xoaha

(Mateus 16.19; João 20.23)

<sup>18</sup> — Aliterexe nomita xihye: xoare xamaniya atyoite xamahokoanetya ali waikohekoa hoka enokoa nali tehitiyaiya atyoite kamahokoanetyaka. Nikare ite xoare xamani xaoka ali waikohekoa hoka enokoa nali tehitiya atyoite kaxaokaka.

<sup>19</sup> — Xasemehena: ali waikohekoa atyoite hinamahare xinekonitarenai iraexahenaha hoka axehenaha hatyohare makere hoka hatyohare atyoite Baba enokoa tyaonitere tyoma enomanaha. <sup>20</sup> Hiyaiya, aliyako xamaniya atyoite hinamahare, hanamahare hohisakoita nokoamaniye tyaonahitaha hoka natyo tehitiya atyoite enekoniha notyaonita — nexa Jesus ihiyeha.

### Wakahare Mahakaiserexe

(Mateus 6.14-15; Lucas 17.3-4; Efésios 4.32; Colossenses 3.13)

<sup>21</sup> Hatyaoseta Pedro xane Jesus haliya hoka axehenene: — Xekohaseti, nohinaehareya fera iniyalahare mohena natyo hoka xoanamakiya nomaotyaniheta iniyalahare exomokala natyo? Xoana, 7-kiya hoka ehokore? nexa.

<sup>22</sup> — Maisaiya. Maisaiya atyo 7-ki taita himaotyanehitita. Maika kahareki himaotyanehitita — nexa Jesus.  
<sup>23</sup> — Hiyaiya, wenati Xekohaseti enokoatare koa maniya atyo motya hatya kalorexexa ewakaneharenai kakotanetere hoka habakatyaka aokitere ihiyeha akereeta. <sup>24</sup> Habakatyaka aokita hoka hetatiye kaoka enomana, hatyo atyo kalore kakotanetene. <sup>25</sup> Xakore hoka ewakanehare maisa kaoloxere hoka maisa xoare kakoa bakatita hakotane. Hoka exekohase ebetetyaka aoka wakaharenai akereta, exanityo, ityaninai, tyotya ixiyehare harenai hoka habakatyaka aoka. <sup>26</sup> Hoka ewakanehare hakaolise kakoa meholokoa haxekohase nahalakoa hoka axene: “Awa atyo hikaholawaka

nokakoi, nabakatyaita hiso!” nexa. <sup>27</sup> Nexa hoka exekohase airakoaneharetene hoka emaiyareheta ekotane hoka halakisene hoka xaneheta.

<sup>28</sup> — Hikoaheta enonita hoka ahalakoatya hahinaehare hakitere kakoa hoka hatyo kakotanetene 100-hokose olo hoka otoka hatyo hahinaehare ekoloako hoka xalawasekoatene hoka nehena ihiyeha: “Hikakotanetere natyo habakahena!” nexa. <sup>29</sup> Nexa hoka ihinaehare hakaolise kakoa meholokoa enahalakoa hoka axehenene: “Awa atyo hikaholawaka nokakoi, nabakatyaita hiso”, nexa. <sup>30</sup> Nexa xakore hoka maisa tyakekota iniraene, hoka xane berexoako mokene ebakala hakotane kijiya. <sup>31</sup> Hatyaoseta haiyaharenai wakaharenai waiyaha nikare tyoahenere hoka maisa waiyeta ihiyeha hoka xane xakaihahene haxekohaseha hiye. <sup>32</sup> Hatyaoseta exekoseha kawiheta hatyo wakahare hoka nehena: “Kaxiyani, himaisakaisere. Tyotya hikakotanetere natyo atyo nemaiyareheta, hiraeno hiye hoka. <sup>33</sup> Xoana hoka maisa hairakoaneharitita hihinaehare nairakoaneharenere hiso akereta?” nexa ihiyeha. <sup>34</sup> Exekohase ehare ihiyeha hoka axikatene berexoako xeta, iniyalahare mokahene maheta, tyotya hakotane bakahetehenere kijiya.

<sup>35</sup> Hatyaoseta Jesus halakihena hairaine hoka nexa: — Nikare ite Baba enokoa tyaonitere moka xiso, maisa ximaotyanehitita kaiserehare xihinaehare iniyalahare mohenerexa hoka — nexa.

### Jesus Irae Halakisakakoatiheta Tahia

(Mateus 5.31-32; Marcos 10.1-12; Lucas 16.18; 1 Coríntios 7.10-11)

**19** Jesus hatyohare tahia irae najikinita, xaneheta Galiléia koa nalita hoka xane Judéia koa maniya Jordãoxa halakoiya. <sup>2</sup> Kahare haliti xane exema. Hoka hatyo nali kaokaha hoka hokakiterenai aiyatelikiheta.

<sup>3</sup> Hatyaoseta haiyanai fariseunai tyoaha ehaliya hoka hasakaharetyahene maheta axehenahene: — Xoana waiyatyakisakaho hiyetaiya hatya haliti waiyehena xoalini hare xemere halakiheta haiyanityo?

<sup>4</sup> Hoka Jesus nehena: — Xoana maisala xakaixaret-yare iraeiti kaxairatyakehenere nehenerexa: “Hetati xowaka Enore tyoma ena, ohiro”, nehenerexa? <sup>5</sup> Hatyo xowaka nexa Enore:

Hiyeta hatya halitite halakisa hanexexa, hanityo hoka tyaona haiyanityo kakoa hoka hatyo hinamanaite haterore tyaonaha, nexa.

<sup>6</sup> — Hatyo hiyeta maisa atyo hinamaha xini, xakore hoka hateroreha atyo. Hatyo hiyeta halitiya maisa exaorehitita Enore hahotyalita mohenerexa — nexa Jesus.

<sup>7</sup> Hatyaoseta fariseunai axehitiyene: — Hoka xoana atyo hoka Moisés atyo hatya halitiya halakiheta aokowihena haiyanityo hoka halakisati baberanexa isa enomana hoka axikahetene aoka? nexaha ihiyeha.

<sup>8</sup> Hatyaoseta Jesus nehena: — Maisa xawaiye xahokolere hoka Moisés nikare irae. Xakore hoka maisa atyo hetati kaomakehenere xowakiya nikarexexa enexa. <sup>9</sup> Hiyeta hoka nomita: hatya halitiya halakiheta haiyanityo, maisa xakore hatya watyaliyene hoka

xaneyā hatya ohiro kakoa tyaohitiya hoka iniyala-hareya atyo tyoma. Hatyaiya xane ehalakirahalo kakoa tyaohitiya hoka iniyalahareya atyo tyoma — nexa.

<sup>10</sup> Hatyaoseta Jesus xaotyakiraharenai nehenaha: — Nikarexeya hatyo haliti nawenane haiyanityo kakoa hoka ehokoretaiya atyo maisa xoare maheta kakaiyanityotyakita — nexaha.

<sup>11</sup> Hoka Jesus nehena: — Exe xaotyakisati atyo maisa tyotya anere xini. Enore nikare tyaona aohenerenai anere taita atyo. <sup>12</sup> Hiyaiya, kahare xoalini hare hiyeta atyo haiyaharenai maiyanityota. Haiyaharenai atyo maiyanityohare terota maheta tyaona. Haiyaharenai atyo kaxaikoharetyakaha hoka maisa aliyakere kaiyanityohitaha. Haiyanai atyo maisa kaiyanityoreha Enore koamaniya hawenaneha hiyeta. Hoka xala xamani atyo exe xaotyakiye xema tyaona aokowita hoka tyaona — nexa Jesus.

### Jesus, Xoimanai Xoaha (Marcos 10.13-16; Lucas 18.15-17)

<sup>13</sup> Hatyo najikinita haiyaharenai kolatyaha xoimamokosenai Jesus ana, ekaokakisa hakahe ihiyeha hoka iraexatya etahiha maheta. Hoka exaotyakiraharenae mahokoanetya etyoaneneha enomana.

<sup>14</sup> Hoka Jesus nehena: — Kotare xoimanai tyoa no-mani, awa atyo xamahokoanitya etyoaneneha no-mani. Hiyaiya, Xekohaseti enokoatare waikoherakoa atyo exe xoimairanai tyaonitere akereharenai anere — nexa.

<sup>15</sup> Hatyaoseta ekaokakisa hakahe xoimanai hiye hoka iraexatya enomanaha. Hatyo najikinita xaneheta hatyo nalita.

### Xoimahaliti Kaoloxerexe Kaxiyeharexe Tahī (Mateus 13.22; Marcos 10.17-31; Lucas 18.18-30; 1 Timóteo 6.6-10; Tiago 5.1-3)

<sup>16</sup> Hatyaoseta haxowaka xoimahaliti kaoka Jesus ana hoka axehenene: — Waiyexe Xaotyakisatiye, xoareya notyoma waiyexe hoka wenati waiyexe matyotenehare nali noxani? nexa.

<sup>17</sup> — Xoanere hoka xekohaseti waiyexe haokita natyo? Waiyexe atyo haterore, Enore takita atyo waiyexe — nexa Jesus. — Wenati waiyexe matyotenehare koamaniya hisaona haokowita hoka Xaotyakiyenai xema hisaona — nexa.

<sup>18</sup> — Xoarenai hatyo xaotyakiyenai? nexa axene. Hoka Jesus nexa: — Awa atyo haisa, awa atyo iniyalahare hisoma ohiro kakoa, awa atyo hikaiwa, awa atyo hamaoseratya. <sup>19</sup> Haiminisa hexe, hityo xoaha, hawaiyehena haiyanai hiso hawaiyetyoawitere akereta — nexa.

<sup>20</sup> — Haokitere akereta noxoiminita notyaonita tyotya hatyo xaotyakiyenai xema — nexa. — Xoareya notyomihitiya? nehitiya hatyo xoimahaliti.

<sup>21</sup> Hoka Jesus nexa: — Waiyexe maniya kaiserehare hisaoheta haokowita hoka hiyane tyotya hixiyeharenai habetetya hoka hisa olo maoloxahrenai ana. Nikare ite hisaona hoka hikaoloxere hikaxiyeharexe hisaona

enokoa nali. Hatyaosetataite hisoheta hoka hisoa noximi — nexa.

<sup>22</sup> Hatyohare xoimahaliti sema hoka amaikohare hoka xaneheta, kahare kaxiyeharexe hoka.

<sup>23</sup> Xaneheta hoka Jesus nehena haxaotyakiraharenai hiye: — Aliterexe nomita xihiyehare: howitihare atyo kaoloxere nawenane Xekohaseti enokoatare koamaniya — nexa. <sup>24</sup> — Hoka nirahitiyaite: howitihare atyo kaoloxere nawenane Xekohaseti enokoatare koamaniya. Kamelo howitihare kaxajiyakisakitere awiyahi nakoako xaehare howitini atyo — nexa.

<sup>25</sup> Exaotyakiraharenai sema hatyohare hoka haka-haretyoaha hoka axahene: — Nikarite hoka xalaite kaiyakehetehena? nexaha.

<sup>26</sup> Hatyaoseta Jesus wahakotyā enomanaha hoka nehena: — Halitinai ana atyo hatyohare howitihare. Xakore hoka Enore ana atyo maisa xoare hare howitiharexe — nexa.

<sup>27</sup> — Hiyaiya, tyotya atyo wahalakiharetyoa hoka wisoa hiyema. Hoka xoanere ite kaxekakehena womana — nexa Pedro axene.

<sup>28</sup> Hoka Jesus nexa: — Aliterexe nomita xihiyehare: tyotya xoalinihare Enore ewaitarehetehenere hoka Haliti Ityani tyokehenere haokahakala waiyeharexe heno xowakaite, xiso nokoamaniye xisaohenerenai tehitiaite xisoka 12-okahakalati heno hoka 12-hotyali Israel hotyalinai xekohasenai xisaona. <sup>29</sup> Hoka tyotya haiyaharenai nohiyiti halakihenere hahana, haximarenenai, haximalonenai, hanexe, hanityo, haisaninai, hawaikohera harenai hoka kahaliki atyoite hatyoharenai kaxekakeheta enomanaha, wenati waiyexe matyotenehare tehitiaite kaxekaka enomanaha. <sup>30</sup> Hoka kalikini atyo kahare kalorexe tyaoniterenai atyoite wakahare tyaoheta, hoka kahare wakahare tyaoniterenai atyoite kalorexe tyaoheta — nexa.

### Uva Katenai Xafityaseharenai

**20** Jesus nehena: — Enore koamaniya nawenatyaka atyo uva katenai xekohasehare weta xane hoka hatenitiyenai hiye irae hoka hakaha enomana emasenekoa aokitere akereta. <sup>2</sup> Hawenanaho akereta irae ekakoaha, hahoko olo kakoa haki ferakene bakatyahene aokowi hoka axikatyahene hakaha maheta ehananehare koni. <sup>3</sup> Eno kamaihena hoka xanehitiya wenakalati nekesekoa hoka waiya haiyaharenai, maisa xoare tyomareha. <sup>4</sup> Hoka nexa ihiyeha: “Xiyane xisonai tehitia xahaka nomasenikoi. Nabakatyaité xiso enaosexeta”, nexa ihiyeha hoka xaneha. <sup>5</sup> Nikare totahikoa, makakoahena hoka nikareta iraihitiya haiyanai hatenitiye hiye. <sup>6</sup> Komita waikoitehena kamai hoka xanehitiya hoka waiyehitiya haiyaharenai. Hekotata maisa xoare tyomareha hoka nehena ihiyeha: “Xoana hoka waha aka ali xisaonita, maisa xoare hare xisomare?” nexa ihiyeha. <sup>7</sup> “Maisa xala hare iraexe wikakoa hoka maisa wahakare”, nexaha ihiyeha. Hoka nexa ihiyeha: “Xiso tehitia xiyane xahaka nohananihare koni”, nexa.

<sup>8</sup> — Maka hoka masene waikatehare nexa kaxaikotyatiye hiye: “Hiyane hakiterenai hakawihetehena hoka habakahenahene. Maika miyanitiye kawakatyakehenere hotohare habakaty. Nikare makere, hoka hetati kawakatyakehenere ite miyanitiye habakaty”, nexa ihiye. <sup>9</sup> Hatyo makehena hahenerenai ana hahoko xakini olo hoko isa. <sup>10</sup> Hatyaoseta motyalaite hetati hahenerenai xahekolaha hiye hoka exahereha kabakatyaka aokahitaha. Xakore hoka nikareta tehitiya hahoko xakini olo hoko isa enomanaha. <sup>11</sup> Bakatyahene hoka maisa waiyeta ihiyeha hoka ehareha masene waikatehare hiye. <sup>12</sup> Hoka nehenaha: “Exe miyanitiye kaxahakakisakehenerenai atyo inirita haka hoka hoka wiso atyo wahaka watere nase, waha aka. Xakore hoka wiso akereta atyo habakatyahene”, nexaha. <sup>13</sup> Hatyaoseta exekohaseha nehenahatya hiye: “Hasemehena, nohinaehare, maisa atyo namaoseraita hiso. Xoana maisa niraehenerere hikakoa xowaka hahoko olo kakoa haki ferakene nabakaty hiso hoka hahaka nomani naoka hoka haohenere hotyare?” nexa ihiye. <sup>14</sup> “Hoka hotohena holoxa hoka hiyanehetehena hihana xeta. Hiyaiya, kasani exe haliti miyanitiye naxikahenerere ana nisehenerere homana akereta nisa naokowita”, nexa. <sup>15</sup> “Xoana maisaiya kore naokitere akereta noloxi kakoa notyomita? Xoana hokoawahareta kore ihiye, waiye namokiterehiyeta?” nexa.

<sup>16</sup> Jesus halakihena hairaine hoka nexa: — Nikare ite kalikini hetatiye tyaoniterenai miyanitiye tyaoheta hoka kalikini miyanitiye tyaoniterenai atyoite hetatiye tyaoheta — nexa.

### Jesus Iraehitiya Hakamane, Hakaseneheta Tah

(Marcos 10.32-34; Lucas 8.31-34)

<sup>17</sup> Hatyaoseta Jesus xanehena Jerusalém xeta hoka haxaotyakiraharenai kakoa irae hawawaha heko tonahitaha hoka nehenahene: <sup>18</sup> — Xasemehena, wiyaneta Jerusalém xeta. Hatyo nalite Haliti Ityani kamatawatyakehena sacerdotenai xekohasenai ana, xaotyakiyaho kakoa waiyoreterenai ana. Hatyonaite exaisaka aokaha hoka <sup>19</sup> majudeuneharenai anaite halakihenahene. Hoka hatyonaite koexahalisene, mokonasetene, berekotyahene ite atyalihose xaimaholatyaka hiye. Xakore hoka hanamaki ferakene najikinitaite kaseheta — nexa Jesus.

### Hatya Ohiro Axa Jesus

(Marcos 10.35-45)

<sup>20</sup> Hatyaoseta Zebedeu exaniftyo kaoka haisaninai kakoa Jesus ana, meholokoa enomana axene maheta.

<sup>21</sup> — Xoare haoka? nexa Jesus.

Hoka nehenahene: — Kalorexe hisaohenere xowakaite kasani nityaninai tyokaha hihaliya naokita, hatya hifihini maniya, hatya hiwatone maniya xoaha — nexa axa Jesus.

<sup>22</sup> Nexa hoka Jesus nehenahene ityaninai hiye: — Maisa atyo xawaiyorexe xaxitereharenai kakoa. Xoana xisonaiya xisera erakakalati akore noterehenerere? nexa. (Hakamane xaokaka nikareta Jesus.)

— Há, wisereniya — nexaha.

<sup>23</sup> Hoka Jesus nexa: — Aliterexe atyoite xisera nerakakali akorexa. Hoka maisaiya atyo natyonai xala nokane xamani nofihini maniya, nowatoni maniya xoaha naokita. Hatyo okahakalatinai atyo Baba aohenere-nai anere taita, hoka hatyo ana isene — nexa.

<sup>24</sup> Hatyaoseta 10-hare exaotyakiraharenai semaha hatyohare tahi hoka ehareha hatyo haximarene kakoarenai hiye.

<sup>25</sup> Hatyaoseta Jesus kawisahene tyotyaha hahaliya hoka nehenahene: — Xekohasetinai atyo wakatita halitinai, exahe kalorexenai atyo wakatyahitene. Hatyohare atyo waiyekehalakita xomana. <sup>26</sup> Hoka xisonaiya atyo maisa nikare xisaonita. Xala xamani atyoite xinekonitare kalorexe tyaona aokowita hoka maika hahena hahinaeharenai ana. <sup>27</sup> Exahe xala xamani xinekonitare kalorexe tyaona aokowita hoka maika xiwakanehare tyaona. <sup>28</sup> Hiyaiya, Haliti Ityani kakoita tyoa maisa kahakaka enomana maheta xini, xakore hoka tyoa haka maheta, exahe waini hoka iyeheta maheta kahare haliti — nexa.

### Jesus Kaxoseheta Hinamahare Maxoseharenai

(Marcos 10.46-52; Lucas 18.35-43)

<sup>29</sup> Hatyaoseta jiyehenahitiyaha wenakalati Jericó nalita hoka kahare haliti xane Jesus xema. <sup>30</sup> Hatyaoseta hinamahare maxoseharenai ahoti kilihiti tyokiterenai semaha Jesus jiyane hoka kawiyahena: — Xekohaseti, Davi jikolahare, hairakoaneharenahene wiso! nexaha.

<sup>31</sup> Hatyaoseta kahare haliti xaneterenai mahokoanetya ekawiraha, exahe mema tyaonaha aokahitaha. Xakore hoka exaehere kintyaxa kawiyatyaha: — Xekohaseti, Davi jikolahare, hairakoaneharenahene wiso! nexahitaha.

<sup>32</sup> Hatyaoseta Jesus tityoa hoka kawisa maxoseharenai hoka axahene: — Xoana namoka xiso xaokita? nexa.

<sup>33</sup> — Kasani hakaxoseheta wiso waokita — nexaha ihiye.

<sup>34</sup> Jesus airakoaneharetia maxoseharenai hoka ekaokakisa hakahe exosenaihiya hiye. Hatyaoseta waiyakatyarehenahitehena rotita. Hatyaoseta xaneha Jesus xema.

### Jesus Kaoka Jerusalém Nali

(Marcos 11.1-11; Lucas 19.28-40; João 12.12-19)

**21** Xane exaolitiki henaha Jerusalém hoka kaokaha wenakalati Betfagé nali, Oliveiras tyairiya haliya. Hatyo nalita, Jesus axikatya hinamahare haxaotyakiraharenai maheta maniya exakerexe iraiti kakoa:

<sup>2</sup> — Xiyane exe wenakalati waheta maniya tyaonitere nali. Hoka nalite xiyaiya boriko exolatyakahare haisanirise kakoa. Hoka maika xaolika hatyo hinamanai hoka xisoa ekakoaha ali. <sup>3</sup> Maika xala xamani xoare nehenahene xihiyeha hoka xexa: “Xekohaseti aokahitene haomana”, xexa. Nikare ite xirae hoka halakisahene rotita xomana.

<sup>4</sup> Nikare tyaona iraiti xakaisasehare xairahenere akereeta tyaona maheta:

<sup>5</sup> “Maika xexa Jerusalém yerenai hiye: kalikini atyo xiyekohase kaokehena. Hatyo atyo waiyexehare hoka tyokita boriko ityani heno”, nehenere akereeta.

<sup>6</sup> Hatyaoseta exaotyakiraharenai xaneha enaheta maniya hoka Jesus aokitere akereeta tyomaha. <sup>7</sup> Kaokaha boriko exahe ityanirise xoaha kakoa hoka haimanaeha mokaha ehenoha hoka Jesus tyoka eheno. <sup>8</sup> Jiyehenahitiyaha hoka kahare halitinai xanetere exema mokahitaha haimanasenaiha waikoa enaheta maniya. Haiyaharenai xane iyaliti irikotyaha hoka mokahitaha ahotyaho. <sup>9</sup> Hatyaoseta enaheta xaneterenai, enajikinita tyoiterenai xoaha kawiyahenaha:

— Wihalahareta, Davi jikolahare kakoa!  
Xekohaseti Enore, waiyira hamohena hexare kakoa tyoiterehare!

Wihalahareta hikakoa, Enore!  
nexaha ihalaharahitaha.

<sup>10</sup> Hatyaoseta Jesus kaoka Jerusalém nali hoka tyotyaliyerenai wahakohenaha enomana hoka axakakoa-henaha: — Xala hatyo kaokehena womana? nexaha.

<sup>11</sup> Hoka halitinai nexa ekoaxatyaha: — Exe atyo iraiti xakaisasehare Jesus, wenakalati Nazaré nalitare, Galiléia koatare — nexa exemata tyoiterenai ihiyeha.

#### **Jesus Xane Iraexatyakalati Hanako** (Marcos 11.15-19; Lucas 19.45-48; João 2.13-22)

<sup>12</sup> Hatyaoseta Jesus xane isoa Iraexatyakalati Hanako hoka aihikoaheta tyotyali hatyoako iyakaiterenai, betetiterenai xoaha. Olo ehaikoakihititere mexanenai herawatya, watyaha betetiterenai nokahakalanai harenai exoakikoatya <sup>13</sup> hoka nehena: — Exakere xairatyoare tyonita Enore niraene babera waiyexe nanekoa:

“Nohani atyoite Iraexatyakalati Hana kaxaokaka”, nexa.

Xakore hoka xiso atyo kaiwarexenai xalijiniharexe xateroakisakala niyahare xamokene — nexa Jesus ihiyeha.

<sup>14</sup> Hatyaoseta maxoseharenai, maetonaneharenai xaneha Jesus ana Iraexatyakalati Hanako hoka tyotyaha aiyatelikihenahitene. <sup>15</sup> Xakore hoka sacerdotenai xekohasenai, iraiti kakoa waiyoreterenai harenai ehareha ihiyeha, hokakiterenai aiyatelikihititere hiyeta, exahe Iraexatyakalati Hanako xoimanai kawiyakotitere harenai semaha: — Davi jikolahare kakoa wihalahareta! nexahitere harenai hoka.

<sup>16</sup> Ehareha hoka nehenaha Jesus hiye:  
— Xoana, hasemita iniraeneha?

— Há, nasemitene. Xoana, maisa xiyaiyare Iraiti Waiyexe nanekoa exakerexe kaxairatyakehenere:  
“Enore aotyakisa xoima kiranexe, xoima aokokitaterenai harenai waiyexe taita iraha maheta”, nehenere? nexa ihiyeha.

<sup>17</sup> Hatyaoseta Jesus halakisahene hoka hatyo wenakalatita xaneheta hoka xane wenakalati Betânia nali hoka nali nemaka.

#### **Jesus Ainiratya Halohalo Kate** (Marcos 11.12-14, 20-24)

<sup>18</sup> Kamaetali haikoahitita Jerusalém xeta hoka naka. <sup>19</sup> Hoka waiya halohalo kate, ahoti kilihita tyonita hoka xane waiyakatetene iri xahita. Xakore hoka maisa kaliye, ehana taita. Hoka nehena halohalo kate hiye: — Maisaiya exehekota hikalihitita — nexa ihiyeha. Nexa hoka halohalo kate nirihena rotita.

<sup>20</sup> Exaotyakiraharenai waiya hatyohare hoka hakaharetyoaha hoka nexaha: — Xoana haxerore níra — nexaha.

<sup>21</sup> Hoka Jesus nehena: — Aliterexe nomita xihiyeha: xityakekotaiya hoka maisa ximatyakekoneta hoka exe namokitere halohalo kate akereetaiyo xisoma. Maisaiya exakere taita xini. Exaheya xexa exe tyairi hiye: “Hakikisoahena hatyaoseta hoka hiyane hexoahena onexa”, xexaiya ihiyeha hoka nikareya tyaona. <sup>22</sup> Xityakekotaiya hoka xiraexahena hoka xalini hare xaxehena hoka xokitere akereetaiyo atyo tyaona xomana — nexa.

#### **Jesus Atyo Iraiti Kakoare** (Marcos 11.27-33; Lucas 20.1-8)

<sup>23</sup> Hatyaoseta Jesus haikoaheta Iraexatyakalati Hana xeta. Hatyaoseta aotyakijita halitinai hoka sacerdotenai xekohasenai, judeunai nityohalitiranai xoaha tyoa kaokaha ehaliyita hoka axehenahene: — Xala niraene kakoare hiso hoka nikare hisaonita? Xala xaokala xema nikare hisaonita? nexaha.

<sup>24</sup> Hoka Jesus nehena: — Natyo tehitiyaite naxa xiso. Xekoaxatyaita nomani hoka noxakaite xihiyeha noxaxikatyasehare tahi. <sup>25</sup> Xala niraene xema João batixatya haliti? Xoana Enore niraene xema, halitinai niraene xema kore? nexa ihiyeha.

Nexa hoka iraikakoahenaha: — “Enore niraene xema”, wexaiya hoka nexaiya axa wiso: “Enore niraene xema hoka xoana hoka maisa xityakekota João?” nexaiya wihiyeha. <sup>26</sup> “Halitinai niraene xema”, wexaiya hoka maisaiya waiyeta halitinai hiye hoka xoana xamaniya mokaha wiso. João atyo iraiti xakaisasehare aokahitaha — nexa iraikakoaha.

<sup>27</sup> Hatyo hiyeta nexaha Jesus hiye: — Maisa wawaiyorexe João akiti kakoa — nexaha.

Nexaha ihiyeha hoka Jesus nehena: — Natyo tehitiyaite maisa noxakaita xala niraene xema exeharenai notyomita — nexa ihiyeha.

#### **Hinamahare Xoimahaliti Tahi**

<sup>28</sup> Jesus nihitiya: — Xasemehena, xoanere atyo xiyahekola? Hatya haliti hinamahare kaisaniye. Hoka nexa haisani hetatiyehare hiye: “Hiyane hahaka wimasenekoa, haré”, nexa. <sup>29</sup> Nexa xakore hoka “Maisa noxani nahaka naokowiye, abá”, nexa hanexe hiye. Nexa ihiyeha hoka enajikini maniya kehexaharetyoaheta

hoka xane haka hanexe aokitere akereta.<sup>30</sup> Enexeha nikareta tehitiya iraihitiya haisani xoimere kakoa hoka, “Há, noxanite nahaka, abá”, nexa hanexe hiye xakore hoka maisa xaneta.

<sup>31</sup> — Xala hare hanexe aokitere akereta tyaona? nexa Jesus axahene.

— Ityani hetatijehare — nexaha.

Hoka Jesus nehena: — Kalorexe noloxa resebityaseharenai, enatyalolonai xoaha atyo iniyalahare tyomahitaha, xakore hoka hatyonai hotohare atyo tyaonahitaha Enore koamaniya xahitita.<sup>32</sup> Hiyaiya, João Batista atyo tyoa hotikisa maheta xomana aliterexe ahotyaho, xakore hoka maisa xityakekotene. Hoka olo resebityaseharenai, enatyalolonai xoaha atyo tyakekone. Hoka xiso atyo hatyoharenai xiyaiya xakore hoka maisa xahalakijita iniyalahare xománe xityakekotene maheta.

### Masene Nomaseharenai Maisakaiserexenai Tah

(Marcos 12.1-12; Lucas 20.9-18)

<sup>33</sup> Jesus nexa: — Xasemehena exe xaimenekotyati: hatya haliti fitya uva katenai hamasenekoa hoka talahokotyama hamasenekoa. Tyoma uva kakatyakala vin-hoxa tyoma maheta, enoakiya kahainatya hakakoare waiyakoatya hamasene maheta. Hatyaoseta haiyanai halitinai ana halakisene, kaxaikoahene hoka xonehena hoka irakakakoahenahitene maheta. Hatyaoseta xane hakiti seko akiya.<sup>34</sup> Hatyaoseta inimexaka xowakehena hoka masene xekohasehare axikatya hawakaneharenai masene kaxaikotyaseharenae ana holini iseheta enomana maheta.<sup>35</sup> Xane kaokaha hoka masene kaxaikotyaseharenai otokaha ewakaneharenai hoka hatya mokotyaha, hatya aisaha, hatya sehali kakoa mokohenaha xoaha.<sup>36</sup> Hatyo najikinita exekohase axikahitiya hawakaneharenai hetati axikahenere xahe. Xakore hoka masene kaxaikotyaseharenai nikareta mohenahtiyene.<sup>37</sup> Hatyo najikinita axikatya haisani kaiserehare, ahekotyama hoka: “Nityani atyoite naxikatya hoka aiminisahene”, nexa.<sup>38</sup> Xakore hoka masene kaxaikotyaseharenai waiyaha ityani hoka nexaha: “Exe atyo masene xekohasehare ityani. Nika waisene hoka masene ite womanere tyaona!” nexaha.<sup>39</sup> Hatyaoseta otokaha ityani hoka sekose xaneha ekakoa masene nonitata hoka aisahene.

<sup>40</sup> Hatyaoseta Jesus axehenahene: — Hoka hatyo masene xekohasehare ite kaokehetehehena hoka xoanaite mohena hatyo masene kaxaikotyaseharenai? nexa.

<sup>41</sup> Hoka nexaha: — Aisaite hatyo masene kaxaikotyaseharenai xalijiniharexenai hoka hahotyalinai anisaite halakihitiyene. Hoka hatyonai atyoite iseheta enomana holini, inimexaka ferakenehena hoka — nexa.

<sup>42</sup> Hoka Jesus nehena: — Xoana koxaka xakaixaretya Iraeti waiyexe nanekoa exakere nehenere:

“Sehali hati nomaseharenai maxaokarehenere atyo hati tononako kaxomokaka. Xekohaseti xekane atyo. Hoka hatyo atyo waiye kaiserehare”, nehenere?

<sup>43</sup> Hoka Jesus nihitiya: — Hatyo hiyeta nomita xihiyehere: Enore waikoherakoa atyo xomanere xakore atyo hoka kaxemaisatyaka xonita hoka kahalakisaka atyoite hahotyaliharenai Enore aokitere akereta tyaoniterenai ana.

<sup>44</sup> — Xala xamani atyoite exoa hatyo sehali heno hoka taikoehekoa atyoite. Hoka hatyo sehaliya atyo hatya heno exoa hoka miyoheteniya atyo — nexa.

<sup>45</sup> Sacerdotenai xekohasenai, fariseunai xoaha semaha hatyo Jesus xakaini metaharexe hoka otyahene, exaokakaha terota atyo nikare iraeta.<sup>46</sup> Hatyo hiyeta otokahene aokowiha, xakore hoka mairahitaha halitinai, halitinai Jesus iraiti xakaisasehare aokahitere hiyeta.

### Wenakakoati Hisehare

(Lucas 14.15-24)

**22** Hatyaoseta Jesus haxaimenekola kakoa xakaihitiya ihiyeha hoka nehena:<sup>2</sup> — Xekohaseti enokoa tyaonitere koamaniya nawenatyaka atyo hatya xekohaseti ityani kaiyanityohena hoka tyoma hisehaliti haisani nawenakakoane niyahare akereta.<sup>3</sup> Hoka axikatya hawakaneharenai kaixakatyaaha maheta kaexakahenerenai. Xakore hoka maisa tyoa aokowiyahitaha.<sup>4</sup> Hatyaoseta axikahitiya haiyaharenai hawakaneharenai hoka nexa ihiyeha: “Maika xiyakai xikaexakalaharenai hiye. Koxaka tyotyama memere hisehaliti. ‘Koxaka naisa bowi mokosenai, bowi koloterenai hoka koxaka tyotyama memere. Kasani tyoaha hisehaliti ana naokita!’ ” nexa.

<sup>5</sup> — Xakore hoka ekaixakalaharenai maisa hatyoharenae aokahitaha hoka xane tyomaha aokowiterehare ana xaneha. Hatya xane hamasenekoa nali, hatya xanehena haxiyehere nitini xomokakala nali xoaha.

<sup>6</sup> Haiyaharenai otokaha ewakaneharenai hoka mokohekoatyahene hoka aisahene.<sup>7</sup> Hatyo hiyeta xekohaseti ehare hoka axikatya hasorarexanai aisaha maheta hatyo katawanakahenerenai, exahe enawenakalaha hoka kerahaotyama maheta.<sup>8</sup> Hatyo najikinita kawisa hawakaneharenai hoka nexa: “Wenakakoati niyahare hisehaliti notyomehenere mema, xakore hoka wikaexakalaharenai atyo maisa tyoahitaha, maisa waiyexeha hoka.<sup>9</sup> Hoka xiyanehena kalikini ahotyahonai hoka xakaexakatya tyotyama xahalakoahenerenai”.

<sup>10</sup> — Hatyaoseta ewakaneharenai xaneha ahotyaho hoka ahohisakoatyaha tyotyama ahalakoahenerenai, waiyexeharexenai, mawaiyexeharexenai xoaha. Hoka hisehaliti tyoahenere ako kaise haliti moka.

<sup>11</sup> Hatyaoseta xekohaseti isoa waiya maheta kakaexakatyaakehenerenai hoka waiya hatya haliti maisa hisehaliti anere imiti ako xini ijoita.<sup>12</sup> Hoka axene: “Nohinaehere, aliyakere ali hisoa, maisa xakore hisehaliti anere imiti akore xini hiso hoka?” nexa. Nexa hoka maisa xoare nita.<sup>13</sup> Hatyaoseta xekohaseti nexa hawakaneharenai hiye: “Xolatya exe haliti kijinai, exahe ewaotyalinai xoaha hiye hoka xaxawahetene menanaka makaliroti koni. Hatyo nalite tiya, exahe karai, karai, nexaite haikolinai moka”, nexa.

<sup>14</sup> Jesus halakihena hairaine hoka nehena: — Hiyaiya, kahare atyo kakaexakatyakita, xakore hoka haiyanai taita atyo kaxaokakita — nexa.

### Olo Xekaka Tahī Axaha Jesus

(Marcos 12.13-17; Lucas 20.20-26)

<sup>15</sup> Hatyaoseta fariseunai hikoahenahitaha hoka ahokotyaha hasakaharetyaha Jesus maheta, kasani ehaikoare irae hoka iniraine kakoita iraharetyahene aokowita.

<sup>16</sup> Hatyaoseta axikatyaha haxaotyakiraharenai, Herodes koamaniya tyaoniterenai xoaha nexaha Jesus hiye maheta: — Xekohaseti, hawaiyexeharene atyo waiyekehalakita womana, aliterexe atyo haotyakijita Enore aokitere akereta. Maisa atyo haiyanai xahekola hityakokore, hakakoa atyo halitinai hiyaiyita. <sup>17</sup> Hoka xoanere atyo hiyahakola: xoana wiyaothyakisakaho hiyetaiya hoka wisehenaite olo kalorexe Roma yere ana, maisaiya kore? nexaha.

<sup>18</sup> Nexaha hoka Jesus otya inirawaneneha hoka nehena: — Teraharetyoarenae, xoana hoka xahasakaharetya xaokowita natyo? <sup>19</sup> Xamehena olo hokose xijitere hoka nowaiya! nexa. Nexa hoka isaha olo hokose enomana.

<sup>20</sup> Hoka Jesus axehenahene: — Xala nexare exahe niyakotini tiho exe olo hokose hiye? nexa.

<sup>21</sup> Hoka nexaha: — Kalorexe Roma yere — nexaha.

— Xoare xamani atyo kalorexe Roma yere anere hoka kalorexe ana xisene. Hoka Enore anere hoka Enore ana xisene — nexa Jesus.

<sup>22</sup> Semaha nikare iniraine hoka hakaharetyoaha. Hoka halakisaha Jesus hoka xanehenahitaha enonita.

### Kamati Kaseneheta Tahī Axaha Jesus

(Marcos 12.18-27; Lucas 20.27-40)

<sup>23</sup> Hatyo ferakeneta haiyaharenai saduceunai tyoaha Jesus ana. Enomanaha haliti wainihena hoka maisa kasehetere. Tyoaha Jesus haliya hoka nexaha: <sup>24</sup> — Xekohaseti, Moisés atyo exakerexe aotyakisa: “Hatya haliti wainihena hoka haiyanityo maisanihalota halakisa hoka iximarene atyoite tyaoahena hatyo wainiyanenehenolo kakoa hoka kaisanihenaha hoka enaxenane wainihenere ityani atyoite kaxaokaka”, nexa.

<sup>25</sup> — Hasemehena, winekoni ene 7-hare haximarene kakoarenai tyaonita hoka enaxenaneha kaiyanityo hoka waini maisanihareta. Hoka iximarene ihiyetare tyaohtiya ekakoa. <sup>26</sup> Xakore hoka nikareta maisanihareta wainihitiya, exahe ihiyetareha hoka tyaohtiya ekakoa hoka wainihitiya. Nikare makere hatyo 7-harenai waini tyotyta. <sup>27</sup> Waini tyotehenahere najikinita waini ohiro.

<sup>28</sup> — Nikarite hoka xala exanityo kaisere ite hatyo ohiro tyaohetehena, kamatinai kasehetehenere xowakiya? Hiyaiya, tyotyaha atyo tyaonaha ekakoa! nexaha Jesus hiye.

<sup>29</sup> Hoka Jesus nexa ihiyeha: — Xiso atyo ehaikoare xahekotita. Maisa atyo xawaiyorexe Iraiti Waiyexe

xairatyoare tyaonitere kakoa, exahe Enore niyatere kakoa hoka — nexa. <sup>30</sup> — Hiyaiya, kamatinai atyoite kasehetehena hoka anjonai enokoa nali tyaonitere akereata atyoite tyaonaha, maisaiya atyo tyaonakakoa-henahititaha — nexa.

<sup>31</sup> — Hoka xoana maisa kamatinai kasehetehenere tahi xasemare Enore niraene?

Exakere atyo nexa:

<sup>32</sup> “Natyo atyo Abraão, Isaque, Jacó xoaha Nenorexa”, nehene.

Hoka exeharenai atyo hotikijita: Enore atyo kasexenai Nenorexa hoka maisa atyo kamatinai Nenorexa xini — nexa.

<sup>33</sup> Hatyoharenai halitinai semaha hoka hakaharetyoaha exaotyakira kakoa.

### Xaotyakiyaho Masákare Waiyexe

(Marcos 12.28-34; Lucas 10.25-28; 1 João 5.3)

<sup>34</sup> Hatyaoseta fariseunai ahohisakoatyakakoaha, semaha saduceunai maxekoaxarene Jesus ana hoka.

<sup>35</sup> Enekoniha hatya xaotyakiyaho kakoa waiyoretere kasani hasakaharetya aokowita Jesus hoka axene: <sup>36</sup> — Xaotyakisatiye, xoare masakare waiyexe tyotyta xaotyakiyahonai konitare? nexa.

<sup>37</sup> Hoka Jesus nehena:

— Hawaiiyhena kaiserehare hiyekohase Enore, hisaonehena exema maniya takita, hahekohena ekoamaniya takita.

<sup>38</sup> — Exe iraiti atyo masakarexe waiyexe tyotyta xaotyakiyahonai konitare. <sup>39</sup> Hatya ihiyetare tehitiya komitaene hetatiye akereta:

Hawaiiyhena haiyaharenai hawaiyityoawitere akereata.

<sup>40</sup> — Tyotyta Moisés xaotyakiraho, iraeti xakaisaseharenai xaotyakira harenai atyo exe hinamanai xaotyakiyenai nali kaxakaisakehena — nexa.

### Enore Kalorexe Aohenere Tahī Axaha Jesus

(Marcos 12.35-37; Lucas 20.41-44)

<sup>41</sup> Hatyaoseta fariseunai hohisakoahitataha hoka Jesus axehenahene: <sup>42</sup> — Xoare atyo xiso xahekotita Enore Kalorexe Aohenere Cristo tahi akiti? Xala jikolahare xaokitene? nexa.

— Cristo atyo Davi jikolahare — nexaha ihie.

<sup>43</sup> Hoka Jesus axehenahitiyene: — Hoka xoanere hoka Davi Isekohaliti Waiyexe kaxaihakohenere xowaka Haxekohase aokene? Hiyaiya, exakere atyo Davi irai:

<sup>44</sup> Nexa Xekohaseti Noxekohase hiye: “Hisokehena nofihini maniya, hahalakoaharenai hikijina katyahe namohenere kijiya”, nexa. (Enahalakoaharenai mehotyaka xaokaka nikareta iraeta.)

<sup>45</sup> Hatyo hiyeta Davi atyo Haxekohase aokene hoka aliyakereya Enore Kalorexe Aohenere Davi jikolahare tyaoahena xaokita? nexa ihiyeha.

<sup>46</sup> Nexa Jesus ihiyeha hoka maisa xala harenai ekoaxahenahitita enomana. Hatyo najikinita maisa xala harenai kinatyta tyako axehititene.

**Jesus Irae Xaotyakisatiyenai, Fariseunai Kakoa**

(Marcos 12.38-40; Lucas 11.43-46; 20.45-46)

**23** Hatyaoseta Jesus iraihena haxaotyakiraharenai, halitinai xoaha kakoa hoka nehena:

<sup>2</sup> — Iraitu kakoa waiyoreterenai, exahe fariseunai xoaha atyo waiyore awaiyekehalakatyahitaha Moisés xaotyakiraho. <sup>3</sup> Hatyo hiyeta maika xasemaxematya iniraineha, exahe aokahitere akereta xisaona. Hoka awa atyo tyaonahitere akereta xisaohena. Hiyaiya, maisa atyo aotyakisahitere akereta xini tyaonahitaha.

<sup>4</sup> — Timenere kolare atyo mokahitaha halitinai heno hoka maisa atyo kahinaetyarahene, maisa hakahihikase kakoa hekoti kahinaetyahene hoka hatyo kolare kolatyareha. <sup>5</sup> Xoalini hare atyo tyomahitaha kawaiyakaha maheta. Xiyaiyehena, kalose xairatyahitaha Iraitu Waiyexe nanekoatare hoka olatyahitaha hatyaolinaeha, hakanoha hiye. Xiyaiyehena inimanaeha kanotini nerore. <sup>6</sup> Hisehaliti xowakehena hoka waiyexe okahakalati aose tyokaha aokowiyahitaha, exahe xahohisakoatyakalati hanako hoka okahakalati waiyexe koa taita tyokaha aokowitaha, kaxaiminisaka maheta. <sup>7</sup> Nikare wetekokoa jiyehenaha hoka kasani xaiminisati kakoa kakatyawaxatyaka ihiyeha aokahitaha, exahe “Xaotyakisatiye”, kakaixaretyakaha.

<sup>8</sup> — Hoka xisoiya atyo maisa nikareta, “Xaotyakisatiye”, xikakaexaretyakita. Hiyaiya, xityotyta atyo hahinaehare kakoarenai taita hoka haterore atyo Xiyaotyakisase. <sup>9</sup> Hoka ali waikohekoa atyo awa hatyaterere xexe xaoka. Hiyaiya, haterore atyo Xexe enokoa nali tyaonitere. <sup>10</sup> Maisaiya “Xekohaseti”, xikaxaokakita. Hiyaiya, haterore atyo Xiyekohase, Cristo. <sup>11</sup> Xinekoni xekohaseti tyaonitere atyo etakehare hakiterehare.

<sup>12</sup> Hiyaiya, xala xamani atyoite kalorexe aokowita hoka wakahare atyoite kaxomokaka, hoka xala xamani atyoite maisa haiyanae xaehare aokowita hoka kalorexe atyoite kaxomokaka — nexa Jesus ihiyeha.

**Jesus Irae Teraharetyoati Tahu**

(Marcos 12.40; Lucas 11.39-44, 52; 20.47)

<sup>13</sup> — Kaxiyani, xiso iraitu kakoa waiyoreterenai, exahe xiso fariseunai, teraharetyoarenae makere! Maikaite iniyalahare xikaxomokaka. Xiso atyo xamahokoanitita haiyanai nawenane Enore koamaniya. Maisa xakore Enore koamaniya xisaonare hoka xamahokoanitita haiyanai nawenane ekoamaniya.

<sup>14</sup> — Kaxiyani, xiso iraitu kakoa waiyoreterenai, xiso fariseunai, teraharetyoarenae makere! Maikaite iniyalahare xikaxomokaka. Xiso atyo wainiyaneneronai xiyehalo xametakijita, xikaiwita hoka waha xiraexaita xateraharetyoa maheta. Hatyo hiyetaite masakare iniyalahare xikaxomokaka.

<sup>15</sup> — Kaxiyani, xiso iraitu kakoa waiyoreterenai, exahe xiso fariseunai, teraharetyoarenae makere! Maikaite iniyalahare xikaxomokaka. Xiso atyo ximahotyao one kaloxere hoka xiyaneta hakakoare waikohekoa xatawa maheta haliti hoka xiyaotyakiraho tyaona maheta. Ho-

ka hatya atyo xikaokehena hoka xiyaherehare irikati mawakenehare xetare terota xamokitene.

<sup>16</sup> — Maikaite iniyalahare xikaxomokaka. Xiso atyo maxoseharenai xotokahisaseharenae xaokowita xakore hoka xiso tehitiya atyo ximaxosehare. Xiso atyo exakere xaotyakijita: “Xala xamaniya atyo kaexaretya Iraexatyakalati Hana iniraene katyakekotyaka maheta hoka maisa nikare tyaonita hoka ehokoreya. Hoka xala xamaniya atyo kaexaretya ouro werokere Iraexatyakalati Hanako tyaonitere iniraene katyakekotyaka maheta hoka nikare atyoite tyaohena”, xita.

<sup>17</sup> Maotikonexenai, maxoseharenai! Xoare hare masakare waiye: Ouro werokere, xoana, Iraexatyakalati Hana hotikijitere ouro kore? <sup>18</sup> Exakere tehitiya xaotyakijita: “Hatyaia kaexaretya kirakahare fetatyakalaose iniraene katyakekotyaka maheta hoka maisa nikare tyaonita hoka ehokoreya. Hoka kaexaretya fetatyakalatyaose nali kirakahare tyaonitere kakoa hoka nikare atyoite tyaohena”, xita.

<sup>19</sup> Maxoseharenai! Xoare hare masakare waiye: kirakahare, xoana, fetatyakalati hotikijitere kirakahare kore?

<sup>20</sup> Hiyeta hoka xala xamani atyo kaexaretita fetatyakalati tahi hoka kirakaharenai eheno tyaoniternai tehitiya kaexaretita. <sup>21</sup> Exahe xala xamaniya kaexaretya Iraexatyakalati Hana iniraene katyakekotyaka maheta hoka Iraexatyakalati Hana, exahe Enore nali tyaonitere tehitiya kaexaretita. <sup>22</sup> Xala xamani atyo kaexarehena enokoa tahi hoka kaexaritita atyo Enore nokahakala, exahe Enore tyokitere eheno tehitiya kaexaretita.

<sup>23</sup> — Kaxiyani, xiso iraitu kakoa waiyoreterenai, xiso fariseunai, teraharetyoarenae makere! Maikaite iniyalahare xikaxomokaka. Xiso atyo xijita xinakaira hiyeta Enore ana holini: hortelã, erva-doce, cominho, atya hana kanakoairoarenae xoaha hiyeta, xakore hoka maisa atyo xityakekore xaotyakiyaho masakare waiyexe: wenati waiyexe, waiyexehaliti, Enore tyakekotyaka harenai. Exeharenai xema tehititaiya xisaonita hoka ehokoreya. <sup>24</sup> Xiso atyo maxoseharenai xotokahisaseharenae xaokowita xakore hoka xiso tehitiya atyo ximaxosehare. Xakowatita atyo nisarese, xakore hoka xatyokita atyo kamelo.

<sup>25</sup> — Kaxiyani, xiso iraitu kakoa waiyoreterenai, xiso fariseunai, teraharetyoarenae makere! Maikaite iniyalahare xikaxomokaka. Xatihita atyo kobo, balatoahe harenai ihiniri maniya xakore hoka enakoha atyo kaise tyaonita xiyalijiniharene exahe xokoawaharene kakoare. <sup>26</sup> Fariseu maxosehare! Hatihehetehehena kobo nakoako hoka ehenekoa maniya tehitiyaite iyomeheta tyaona.

<sup>27</sup> — Kaxiyani, xiso iraitu kakoa waiyoreterenai, xiso fariseunai, teraharetyoarenae makere! Maikaite iniyalahare xikaxomokaka. Xiso atyo motya xawatyakalati nitini iyomere kakoa kaxonatyakitere akereta xisaonita. Henekoa maniya atyo waiyehareha hoka enakoakoha atyo kamati nahe, xetako harenai.

<sup>28</sup> Nikareta atyo xisaonita. Henekoa maniya atyo motya

haliti waiyexenai ene xiso, xakore hoka xityako atyo kaise tyaonita ximaoseralā, iniyalahare xománe.

**Maoseratyarenai Xomokaka Iniyalahare Tahī**  
(Lucas 11.47-51)

<sup>29</sup> — Kaxiyani, xiso iraiti kakoa waiyoreterenai, exahe xiso fariseunai, teraharetyoarenāe makere! Maikaite iniyalahare xikaxomokaka. Xiso atyo waiyehare xawatyakalati xisomita iraiti xakaisaseharenai ana, exahe xawaiyeharehitita toahiya xowaka waiye maniya tyaohenerenai xawatyakalanai. <sup>30</sup> Hoka xita: “Wisoiya atyo wahetakomaniyereharenai tyaonitere xowakiya wisaonita hoka maisaiya atyo tyaonahitere akereeta wisaonita, maisaiya atyo wajita iraiti xakaisaseharenai”, xita. <sup>31</sup> Nikare atyo xiraehena hoka iraiti xakaisaseharenai aisehenerenai jikolaharenai terota atyo xaokowita. <sup>32</sup> Hatyo hiyeta hekota atyo xisomita, xamematita xahetereharenai tyomitereharenai!

<sup>33</sup> — Owi aisarexenai, owi ityaninai! Xoana hoka xatyahaharetyoita ximaxawatyakene irikati koni? <sup>34</sup> Hiyeta hoka nomita xihye: naxikatyaite iraiti xakaisaseharenai, waiyorexenai, xaotyakisatiyenai xoha xomana. Hoka haiyanaite xaisa, haiyanaite xaberekotyā atyalihose xaimaholatyaka hiye, haiyanai tehitiyaite xamokonasetya xahohisakoatyakalati hanako, exahe wenakalatinai nihatyakaite xehokatetyahene. <sup>35</sup> Hatyo hiyeta iniyalahare maomaneharenai iniyalahare mohenerē, exahe aisehenerē xahetakomaniyereharenai atyoite xiheno kaxomokaka, iniyalahare maomanehare Abel kaxaisakehenereta, Baraquias ityani Zacarias xaisehenerē Iraexatyakalati Hana, fetatyakalati xoaha nenekesene xaisehenerē kijiya. <sup>36</sup> Aliterexē nomita xihye: tyotyā hatyoharenaite kalikiniyerenai heno tehitiyaite kaxomokaka — nexa.

**Jesus Xawaiyera Jerusalém Tahī**  
(Lucas 13.34-35)

<sup>37</sup> Jesus halakihena hairaine hoka nexa: — Jerusalém, Jerusalém! Hiso atyo haijita iraiti xakaisaseharenai, sehali kakoa hamokotita Enore xaxikalahrenai! Kahaliki xakore naxakoloharetyā naokowita hihotyaliharenai takoirā haisani mokosenai hatane katyahe mokitere akereeta, xakore hoka maisa atyo haoka. <sup>38</sup> Hoka kalikini atyoite hihana kahalakisakehena kaiserehare.

<sup>39</sup> Aliterexē nomita: Maisa atyoite hiyaiyehitita natyo exakere hiraehenerē kijiya: “Xekohaseti Enore, waiye kaiserehare atyo hatyo hexare kakoa tyoiterehare”, hehenerē kijiya — nexa Jesus ihiyeha.

**Jesus Irae Iraexatyakalati Hana Mawenekoaretyaka Tahī**

(Marcos 13.1-2; Lucas 21.5-6)

**24** Hatyaoseta Jesus hikoaheta Iraexatyakalati Hanakota hoka xanehetehena ene hoka exaotyakirahrenai xaneha ehaliya hoka hotikisaha enomana Iraexatyakalati Hana, hatinasenai.

<sup>2</sup> Hoka Jesus nexa: — Xoana tyotyā hatyoharenai xiyaita? Haxowaka ferakenite tyotyā exe xiyaiyitere-

harenai kamawenekoaretyakeheta. Hoka maisaiya hatya sehali hatya sehali heno tyaohitita — nexa.

**Howitiharexe Wenati, Irawaniti Tahī**

(Marcos 13.3-13; Lucas 21.7-19; 1 Pedro 1.6-7; 2.19; 3.14; 4.12-16)

<sup>3</sup> Hatyaoseta Jesus tyokita Oliveiras tyairiya heno hoka exaotyakirahrenai xaneha ehaliya hoka axehenahene hawawaharenai heko: — Xoana xowakaite hatyoharenai kaotyakehena? Xoare hare hotohare ite kaotyakehena hoka hotikihena hisoaneneheta ferakene exahe tyotyā xoyalini hare miyanaose hoka? nexaha.

<sup>4</sup> Hoka Jesus nehena: — Xirihalira xisaona hoka maisa xala hare maoseraita xiso. <sup>5</sup> Hiyaiya, kaharetyaite kaotyakehena nexare kakoa hoka nenehaha: “Natyo atyo Enore Kalorexe Aohenerē”, nenehaha. Hoka kahare halitite maoserahenaha.

<sup>6</sup> — Awa atyo ximairehena xasemehena xaisakakoati nemahare, exahe xaisakakoati tahī hoka. Tyotyā hatyoharenaite kaotyaka, xakore hoka maisa atyoite imiyanaosehenerē. <sup>7</sup> Hahotyalihare ite xane hahotyalihare kakoa aisakakoahena, hakoatare ite xane hakoatare kakoa aisakakoahena. Haiyanae koaite waikohe tatakohena, nakitite tyaohena. <sup>8</sup> Hatyo harenai atyoite hetati xoima kawetere akereeta — nexa.

<sup>9</sup> — Hatyo najikinitaite berexotyahaite xiso iniyalahare xikaxomokaka maheta. Hoka xikaxaisakaite. Tyotyahaite kirawaneha xiso nohiyiti. <sup>10</sup> Hatyo xowakiyaite kahare haliti halakisa hatyakekone hoka iraeaherehena, kirawanehena hahinaeharenai. <sup>11</sup> Kahare ite iraeiti xakaisaseharenai metalahrenai kaotyaka hoka kahare halitinai maoserahenaha. <sup>12</sup> Hoka iniyalahare ite exaoretyoa hoka haiyaharenai xawaiyeraite awehetya. <sup>13</sup> Xakore hoka xala xamani atyoite heko kinatere tyaona nokoamaniye imiyanaose kijiya hoka hatyo atyoite kaiyakeheta. <sup>14</sup> Iraeti Waiyexe enokoatare Xekohaseti tyoaneneheta tahī atyoite kaxakaisaka hakakoare wenakalatikoanai, tyotyā haliti hotyalinai semene maheta. Hatyaoseta atyoite miyani-tye ferakene kaotyakehena.

**Kalore Howitihare Wenati Tyaohenerē Tahī**

(Marcos 13.14-23; Lucas 21.20-24)

<sup>15</sup> Jesus nihitiya: — Maika xiyaiyehena “Kaheneharexe, exahe wenati xaiyalaharetyasehare” waiyexe aose nali hoka maika xala xamani Judéia nali tyaonita hoka <sup>16</sup> tekoahenaira tyairinai koni xeta. (Iraiti xakaisasehare Daniel xakai hatyo tahī. Maika hatyo “Kaheneharexe, exahe wenati xaiyalaharetyasehare” aokitere ekaixarityasehare ana waiyekehalaka).

<sup>17</sup> — Maika xala xamani hahana heno tyaonita hoka tekoahena rotitaira hoka awa atyo isoahetehena hoka xoyalini hare iyehetehena. <sup>18</sup> Maika xala xamani mase tyaonita hoka awa atyo haikoahetehena hahana xeta haima kolaheta maheta. <sup>19</sup> Kaxiyani, hatyo xowakiya atyoite howitihare tyaohena tifalonai exahe xoimaisanironai ana hoka! <sup>20</sup> Maika xiraexatya Enore



hiye hoka maisa hatyo harenai tihere xowaka kaotyakita, exahe sábadó xowaka hoka. <sup>21</sup> Hiyaiya, hatyo xowakehena atyoite hoka wenati atyoite howitihare tyaohena. Maisa xoana xowaka nikare tyaonare Enore tyomehenere waikohekoa xowakiyata. Maisaiya atyoite nikare tyaohitita haxowakiya. <sup>22</sup> Xakore hoka Xekohaseti atyo aikiranetya hatyo wenati howitiharexe ferakenenae. Maisaiya nikarexe hoka maisaiya xala hare makamanehare tyaonita. Xakore hoka Enore iyeheta aokowihenerenai hiyeta atyo hatyo ferakenenae kaxakiranityakeheta — nexa.

<sup>23</sup> — Maika hatya nehena xihye: “Xiyaiyehena, Kalorexe Enore Aohenere ali tyaonita”, nehena xamani, “Owene tyaonita”, nehena hoka awa atyo xityakekone. <sup>24</sup> Hiyaiya, kaotyakaite iraeti xakaisaseharenai exahe Enore Kalorexe Aohenere metalaharenai hoka tyomahaite kahare xolani hare maomakahare katyakekotyakaha maheta hoka maoserahenaha haliti. Aiyateretyoahaite maoseratyaha maheta Enore haomanerehare aohenerenai.

<sup>25</sup> — Waiyira xasema: exe harenaetya noxakaita xihye kaotyakehenere nahitita — nexa.

<sup>26</sup> — Maika nehena: “Xiyaiyehena, owene Enore Kalorexe Aohenere tyaonita maharexakiti”, nehena hoka awa atyo xiyane nali. Exahe xoana nehena xamani: “Xiyaiyehena, owene teroita”, nehena hoka awa atyo xityakeko. <sup>27</sup> Hiyaiya, kahihye hoka enokoa nali hamaniyata xane hamaniya werokakoa mokita. Nikareta atyoite tyaona Haliti Ityani tyoaneneheta xowaka.

<sup>28</sup> — Aliyako xamani atyoite kamati tyaonita hoka hatyo nalite olohonai hohisakoahena — nexa.

#### Haliti Ityani Tyoaneneheta Tahí

(Marcos 13.24-27; Lucas 21.25-28; 2 Tessalonicenses 1.7; 2 Pedro 3.10; Apocalipse 1.7)

<sup>29</sup> Hatyaoseta Jesus nexa: — Hatyo howitihare tyoohenere ferakenenai najikinitaite kamae ite makaliro tyaona, kaimare ite hoka maisa aokanahitita. Xorese-naite exoa enokoata, exahe enokoa kinatere tyoaniterenaite komita maiyaterehare tyaonahitaha.

<sup>30</sup> — Hatyaosetaite kaotyakeheta Haliti Ityani enokoa. Hoka tyotya halitinai waikohekoa tyoaniterenaite waiyahaite Haliti Ityani xexoaneheta kaiminiti konita, haiyaterere exahe hawerokene kakoa hoka tiyahenaha hamairane. <sup>31</sup> Hatyaosetaite koneta kaamahare kinatyaxa hoka axikatyaite hawakaneharenae anjonai waikohekoa nihatyaka maniya. Hoka anjonaite ahohisakoatya Enore haomana aohenerenai tyotya hakakoareta — nexa Jesus ihiyeha.

#### Jesus Aimenekotya Halohalo Kate Hiye

(Marcos 13.28-31; Lucas 21.29-33)

<sup>32</sup> Hoka Jesus nihitiya: — Waiyexira xasemehena halohalo kate tahi. Hiyaiya, ekanohinai atyo tihorehetehehena, exahe ehanahinai atyo hikoahetehehena hoka waiyekehalakita atyo xomana enonenehetehehena.

<sup>33</sup> Nikareta tehitiyaite exeharenai kaotyakehena hoka

waiyekehalakaira xomana Haliti Ityani okoi haikoa-hetehehenehare. <sup>34</sup> Xotyaxematya exehare: exeharenai tyaite kaotyaka exe kasetatereharenai makamaneharene nahitita. <sup>35</sup> Enokoa exahe waikohe harenai tyaite maiyareheta, xakore hoka niraini tyatyoite tyoata mene — nexa.

#### Ekaokeneheta Ferakene Xowaka Tahí

(Marcos 13.32-37; Lucas 12.35-40; 17.26-30, 34-36; 1 Tessalonicenses 5.2-3; 2 Pedro 3.1-15)

<sup>36</sup> Jesus nihitiya: — Eferakene exahe exowakehena atyoite hoka maisa xala hare ana waiyekehalakere, maisa atyo anjonai enokoa tyoaniterenai ana waiyekehalakere, maisa atyo Enore Ityani ana hekoti waiyekehalakere, xakore hoka Enexe Enore ana taita atyo waiyekehalakita.

<sup>37</sup> — Haliti Ityani tyoaneneheta atyoite Noé xowakiya kawenatyakehenere akereta. <sup>38</sup> Hiyaiya, one morehenere nahitita halitinai kanakairitaha, terahitaha, exahe enanai ohironai harenai hoka tyaonakakoahitaha harenai, Noé isoahenere kanowa kalorexe kijiya.

<sup>39</sup> Nikare tyaonahitaha exowaka hoka maisa one morehenere akiti waiyekehalakere enomanaha hoka one more exahitaha hoka aisa miyatyahene.

— Nikareta tehitiya atyoite Haliti Ityani tyoaneneheta. <sup>40</sup> Hatyo xowakaite hinamahare halitinaite hakita masenekoa. Hoka hatyaite kakolatyaka, hatya atyoite kahalakisaka enaoseta. <sup>41</sup> Hinamahalo ohironaite mehetyakalati hiye mehetyahitaha trigo, hoka hahaloite kakolatyaka hoka hahaloite enaoseta kahalakisaka xoaha.

<sup>42</sup> — Maika xikaxaikoawihena. Hiyaiya, maisa atyo waiyekehalakere xomana Xiyekohase kaokeneheta ferakene. <sup>43</sup> Exeharenai xotyaxematya: hati waikatehareya atyo waiyoreta kaiwarexe kaokene kakoa hoka atyahiteniya hoka maisaiya ehanakota kaiwaharetitene. <sup>44</sup> Hatyohiyeta xiso tehitiya ximemere xisoahena. Hiyaiya, Haliti Ityani atyoite tyoheta ximaxatyahaneneharene xowaka — nexa.

#### Wakahare Tyakekohatiye, Matyakekonehare Tahí

(Lucas 12.41-48)

<sup>45</sup> Hoka Jesus nihitiya: — Xoanere haretia wakahare tyakekohatiye exahe iriharexe? Hatyohare atyo etakehare exekohase hawenekoare halakisene hoka kaxaikoterehare ehana exahe ijiterehare nakairati wakaharenai ana enaose kamaehena hoka. <sup>46</sup> Waiye kaiserehare atyo wakahare nikare tyomiterehare, exekohase kaoketehena hoka waiyiterehare.

<sup>47</sup> Aliterexe nomita xihye: exekohase ite hatyo wakahare ana tyotya haxiyeharenai halakisa kaxaikone maheta. <sup>48</sup> Hoka maisaiya atyo waiyexe wakahare hoka exakeriya ahekotya: “Noxekohase atyo howitihareta hatyoaneneheta kakoa”, nexaiya, hoka <sup>49</sup> hatyaosetaiya mokonasehenaiya haiyaharenai wakaharenai exahe wakahalonai, hoka kanakairehenaiya, terehenaiya hekatikarenai kakoa. <sup>50</sup> Hoka exekohase ite tyoheta, ewakanehare maxatyahareharetia, mawaiyekeha-

lakitere enomana xowaka. <sup>51</sup> Hoka iniyalahare ite hawakanehare moka, exahe matyakekoneharenai xomokaka akeretaite kaxomokaka aoka. Hoka nalite tiyahena exahe karai, karai, nexa mohena haikoli.

### 10-halonai Xoimalahotinau Tahu

**25** Hoka Jesus nexa: — Hatyo xowaka atyoite Enore koamaniya nawenatyaka atyoite 10-halo xoimalahotinau kolatyaha haxaokanatyakalaha hoka xane ahalakoatyahitere <sup>2</sup> kaiyanityohenere akereta. 5-halonai atyo maisa irihalolo hoka 5-halo atyo irihalo. <sup>3</sup> Hatyo 5-halo mairihalonehalonai atyo kolatyaha haxaokanatyakalaha hoka maisa atyo kolatyahitaha exá haxaokanatyakalaha niyahare. <sup>4</sup> Hoka irihalolonai atyo kolatyaha haitimaxaha haxaokanatyakalaha niyahare.

<sup>5</sup> — Kaiyanityohenere wahenhena makaokeneta hoka nemahenaha, enemakaha kawehena hoka. <sup>6</sup> Hoka wahaxatihena hoka semaha kawawi: “Kaiyanityohenere kaokehena! Xisohena hoka xahalakoatene!” nexa.

<sup>7</sup> — Hatyaoseta hatyo 10-halo xoimalahotinau kaosetehata hoka aotakahenahitaha haxaokanatyakalanai. <sup>8</sup> Hoka hatyo mairihalonehalonai nehenaha hahinaehalonaihi hiye: “Xama inira xisa womana xitimaxa hiyeta. Wiyaoanatyakala wakehena wonita”, nexaha.

<sup>9</sup> — “Maisaiya aliyakere”, nexaha hatyo ihinaehalonai irihalolonai ihiyeha. “Witimaxaiya maisa xihakakoaneta, exahe wihakakoaneta. Xaokita atyo hoka xiyane xiya!” nexaha.

<sup>10</sup> — Hatyaoseta xoimalahoti mairihalonehalonai xaneha iyaha maheta haitimaxaha hoka emakanetaha kaiyanityohenere kaoka. Hoka 5-halo xoimalahotinau memere tyaoniterenai isoaha exema enawenakakoane hisehare ana hoka jihore jihatyoa.

<sup>11</sup> — Hatyo najikinita haiyahalonai kaokeheta hoka kawihenaha: “Xekohaseti, xekohaseti! hamajiholatya hoka wisoa”, nexaha.

<sup>12</sup> — Hoka kaiyanityohenere nehenaha: “Maisa nowaiyanihalo xini xiso! Maisaiya namajiholaita xomana!” nexa.

<sup>13</sup> Hoka Jesus halakihenahairaene hoka nehenaha: — Hiyeta maika xikaxaikoawihena. Hiyaiya, maisa atyo xawaiyorexe Haliti Ityani tyaoneneheta ferakene kakoa — nexa.

### Hanamaharenai Wakaharenai Tahu

(Lucas 19.11-27)

<sup>14</sup> Hoka Jesus nehitiya: — Enore koamaniya nawenatyaka tehitiya atyoite hatya haliti xanehena maheta hoka kawisa hawakaneharenai hoka halakijitere haxiyehare enomanaha hoka kaxaikoahitere enomana maheta akereta atyoite. <sup>15</sup> Hoka olo isa enomanaha, enawaiyoreha hakakoane akereta. Hatya ana 5.000 hokose olo isa, hatya ana tehitiya 2.000 hokose, hatya ana tehitiya 1.000 hokose isa. Hatyaoseta xane. <sup>16</sup> Hoka wakahare 5.000 hokose olo resebehenere xane haka hatyo haoloxa kakoa hoka 5.000 akekoarehitiyene. <sup>17</sup> Nikare tehitiya 2.000 resebehenere haka haoloxa

kakoa hoka 2.000 akekoarehitiyene. <sup>18</sup> Hoka 1.000 resebehenere atyo xane seka toloko hoka waikoako tolokotya haxekohase noloxa, ateroakisene maheta.

<sup>19</sup> — Hatyaoseta wahakiyehena najikinita exekohaseha haikoaheta hoka axehenahitehenene haoloxa tahi.

<sup>20</sup> Hoka wakahare 5.000 hokose olo resebehenere xane hoka iseheta enoloxa enomana 5.000 kajiyanehenere kakoita hoka nehenaha: “Xekohaseti, hisa atyo nomani 5.000 hokose olo. Hoka hiyaiyehena, owene 5.000 nakajiyanehenerene”, nexa.

<sup>21</sup> — “Waiye kaiserehare, wakahare waiyexe, tyakekohatiye atyo hiso”, nexa exekohase. “Hiso atyo hirihare hikaxaiko inirere olo. Hatyo hiyeta exaheharite nisa homana hoka hikaxaiko. Hisohena hoka wimaxalohare!” nexa.

<sup>22</sup> — Hatyaoseta wakahare 2.000 hokose resebehenere xane hoka nehenaha: “Xekohaseti, hisa atyo nomani 2.000 hokose olo. Hoka hiyaiyehena, owene 2.000 nakajiyanehenerene”, nexa. <sup>23</sup> “Waiye kaiserehare, wakahare waiyexe, tyakekohatiye”, nexa exekohase. “Hiso atyo hirihare hikaxaikota inirere olo. Hatyo hiyeta exahehare ite nisa homana hoka hikaxaiko. Hisohena hoka wimaxalohare!” nexa.

<sup>24</sup> — Hatyaoseta wakahare 1.000 resebehenere xane hoka nehenaha: “Xekohaseti, waiyekehalakita atyo nomani hiyalijiniharene. Himixita atyo himaxaferene akitita, nahotyalikijita atyo himaxawakoarene akitita.

<sup>25</sup> Nomaira hoka hatyo hiyeta nateroakisa holoxa waikoako. Hiyaiyehena, owene holoxa”, nexa.

<sup>26</sup> — “Wakahare mahakaiserexe, maxaharehatiye!” nexa. “Waiyekehalakita atyo homana noximexani nomaxafirinihare akitita, nahotyalikihititere nomaxawakoalinihare akitita. <sup>27</sup> Hoka ekoiya noloxi olo xomokakala hanako hamokare hoka nahaikoahetehenaiya hoka exahexeya naresebehetene”, nexa.

— Hatyaoseta ehaikoahareheta hoka nehenaha hawakaneharenai hiye: <sup>28</sup> “Xiyeheta enoloxa enonita hoka xisene 10.000 hokose kaoloxehenere ana.

<sup>29</sup> Hiyaiya, xala xamani atyoite kalore kakoare hoka kaxekakihitiyaite enomana hoka exahehare ite tyaona enomana. Hoka xala xamani atyoite maisa xoare kakoare, exahe inirere kakoare ene hoka kaiyaketa atyoite enonitata. <sup>30</sup> Hoka xaxawatene menanaka makaliroti koni wakahare maisakaiserexe. Hoka nalite tiya exahe haikoli hoka karai, karai, nexa moka” — nexa.

### Xaxalisati Miyanitiye Tahu

(Apocalipse 20.11-15)

<sup>31</sup> — Haliti Ityani kalorexe tyaohetehenerere hoka tyohetehenerere tyotya anjonai kakoa xowakaite tyoka haokahakala waiyexe heno. <sup>32</sup> Hatyaosetaite tyotya halitinau waikohekoa tyaoniterenaite hohisakoaha enahalakoa hoka haware xakinite mokahene, kalanero nonitata haware kabala mokitere ekaxaikotyasehare akeretaite. <sup>33</sup> Kalaneronai aokitere ite hafihini maniya moka, hoka kabalanau aokiterite hawatone maniya.

<sup>34</sup> Hatyaosetaite kalorexe nehenaha hafihini maniya mo-

henerenai hiye: “Xasemehena, xiso baba awaiyehenerenai! Xisohena hoka xisaona wenakalati Baba hetati waikohe, enokoa xoaha tyomehenerere xowakiyita tyomehenerere nali. <sup>35</sup> Hiyaiya, nonakita ene hoka xatyaisa natyo. Noinita ene hoka xerakisa natyo. Hahotyalihare xakore natyo hoka xihanako xaisoakisa natyo. <sup>36</sup> No-maimahiro ene hoka xakaimatya natyo. Nohokakita ene hoka xikaxaiko natyo. Berexo ako notyaonita hoka xisoo xiyaiya natyo”, nexa.

<sup>37</sup> — Hoka waiyexeharexenaite axehena: “Xekohaseti, xoana xowaka hinakita ene hoka watyaisa hiso, exahe hoinita ene hoka werakisa hiso? <sup>38</sup> Xoana xowaka hahotyalihare xakore wiyaiya hiso hoka waiye wamoka hiso wihanako, exahe himaimahiro ene hoka wakaimatya hiso? <sup>39</sup> Xoana xowaka hihokakita ene, exahe berexo ako hisaonita hoka wisoo wiyaiya hiso?” nexahaite. <sup>40</sup> Hatyaosetaite Kalorexe nehena: “Aliterexe nomita xihye: nikare atyo xamoka nohinaeharenai kirakoane tyaoniterenai hoka natyo atyo nikare xamokita”, nexa.

<sup>41</sup> — Hatyaosetaite nehena hawatone maniya mohenerenai hiye: “Xakikisoahetehena noniti, xiso Enore nirawanakorenai! Xiyanehena irikati matyotenehare koni memere kaxomokakehenerere Tihanare, ewakaneharenai anjonai anere nali. <sup>42</sup> Hiyaiya, nonakitere xowaka maisa xatyajita natyo, noinitere xowaka maisa xerakijita natyo. <sup>43</sup> Hahotyalihare xakore natyo hoka maisa xihanako xaisoakijita natyo, nomaimahiro xakore hoka maisa xakaimaita natyo. Nohokakita, exahe berexo ako xoaha xakore notyaonita hoka maisa xisoo xiyaita natyo”, nexa.

<sup>44</sup> — Hatyaosetaite axehenahene: “Xekohaseti, xoana xowaka hinakita, hoinita, hahotyalihare, himaimahiro, hihokakita, berexo ako hisaonita hoka wiyaiya hiso hoka maisa wakahinaetita hiso?” nexahaite. <sup>45</sup> Hatyaosetaite kalorexe nehena: “Aliterexe nomita xihye: tyotyaki ximakahinaerehenerere nohinaeharenai kirakoane tyaoniterenai xowaka atyo natyo atyo ximakahinairita”, nexaite.

<sup>46</sup> Hatyaoseta Jesus halakihena hairaene hoka nexa: — Hatyonai atyoite xaneha irikati matyotenehare tyaonitere nali hoka waiyexenai atyoite xaneha wenakalati waiyexe nali hoka waiye tyaonaha mene matyotenehare — nexa Jesus ihiyeha.

### Jesus Tahī Ahekotyaha Aisahene Maheta

(Marcos 14.1-2; Lucas 22.1-2; João 11.45-53)

**26** Hatyaoseta Jesus miyatya hatyoharenai tahi haxaotyakira hoka nexa haxaotyakiraharenai hiye:

<sup>2</sup> — Waiyekehalakita atyo xomana: Hinamaki ferakene taitehena atyo hoka hisehaliti Páscoa tyaohena. Hoka Haliti Ityanite kamatawatyakehena atyalihose xaimaholatyaka hiye kaberekotyaka maheta.

<sup>3</sup> Hatyaoseta sacerdotenai xekohasenai, judeu nityohalitiranaiha harenai ahohisakoatyakakoaha xekohaseti Caifás hanako. <sup>4</sup> Hoka ahekotyaha: hametenetaha otokaha Jesus hoka aisahene aokowiha.

<sup>5</sup> Xakore hoka nehenaha: — Maisaiya nikare wisaonita hisehaliti xowaka, waiya aliya hoka halitinai xalijinihare tyaona — nexaha.

### Jesus Tyaonita Wenakalati Betânia Nali

(Marcos 14.3-9; João 12.1-8)

<sup>6</sup> Hoka Jesus wenakalati Betânia nali tyaonita jiji-ohahi tawanehare Simão hanako hoka <sup>7</sup> hatya ohiro kaoka enomana airaxero karore kahekoalo. Hoka Jesus kanakairita ene hoka eseri heno airaxero owika.

<sup>8</sup> Hoka exaotyakiraharenai waiyaha hatyoharenai hoka ehareha hoka nexaha: — Xoanere hoka nikare tyaonita? Hiyaiya, airaxero meta. <sup>9</sup> Ikoiya atyo airaxero kabetetyaka kalo xaimane hoka hatyo oloiya kaxekaka maoloxaharenai ana! nexaha.

<sup>10</sup> Hoka Jesus ana waiyekehalakita iniraineha hoka nehena: — Xoana hoka xexamaikohalonikijita exe ohiro? Hiyaiya, waiyexe atyo tyoma nomani. <sup>11</sup> Hiyaiya, maoloxaharenai atyoite tyaota mene xinekoni hoka natyoiya atyo maisa notyaoneta minita xinekoni.

<sup>12</sup> Nokamani nahitita atyo tyoa airaxeharetya noháre, noxafityaki niyahare. <sup>13</sup> Aliterexe nomita xihye: tyotyaki hakakoare Iraitī Waiyexe kaxakaisakehena nali atyoite kaxakaisaka exe tyomehenerere nomani hoka otyaxemahenahitahaite exe ohiro.

### Judas Matawahena Jesus

(Marcos 14.10-11; Lucas 22.3-6)

<sup>14</sup> Hatyaoseta 12-hare exaotyakiraharenai konitare, Judas Iscariotes nexarexe, xane irahena sacerdotenai xekohasenai kakoa <sup>15</sup> hoka nehena: — Xoanereya xabakatya natyo hoka namatawatya Jesus xomana? nexa.

Hatyaoseta ihatyaha 30 hokose olo prata nomaka hoka isaha enomana. <sup>16</sup> Hatyo najikinita Judas aheko-hena Jesus hamatawala tahi akiti kakoa.

### Jesus Otyaxematya Páscoa Ferakene

(Marcos 14.12-21; Lucas 22.7-23; João 13.21-30)

<sup>17</sup> Hatyaoseta hetatiye ferakene hisehaliti nakairati makaorehetyakahare kakanakairatyaka aokahitere xowaka xane hiko. Hoka exaotyakiraharenai xaneha Jesus haliya hoka axahene: — Aliye nali wisoma nakairati hisehaliti Páscoa niyahare haokita? nexaha.

<sup>18</sup> Hoka nexa ihiyeha: — Xiyanehena wenakalati xeta hoka xatawa hatya haliti hoka xexa ihye: “Xekohaseti nexa: ‘Noferakini xane hiko. Noxaotyakiriharenai, natyo harenaite wotyaxemahena Páscoa ferakene hihanako’”, xexa.

<sup>19</sup> Hatyaoseta exaotyakiraharenai Jesus aokitere akere-ta tyaonaha hoka tyomaha nakairati Páscoa niyahare.

<sup>20</sup> Maka hoka Jesus 12-hare haxaotyakiraharenai kakoa tyoka kanakairaha maheta.

<sup>21</sup> Kanakairahita hoka Jesus nehena: — Aliterexe nomita xihye: hatya xinekoni-tare ite matawahena natyo — nexa.

<sup>22</sup> Nexa hoka kalore amaikohareha hoka hatya xakini axehenaha Jesus: — Xoana maisa natyo xini haokita? nexaha.

<sup>23</sup> Hoka Jesus nehena: — Hatya nohakakoani balatoa-hekoa maikitere nakairatite matawahena natyo. <sup>24</sup> Haliti Ityanite wainihena Iraitu Waiyexe iraetere akereta, xakore hoka kirakoane atyoite tyaohena Haliti Ityani matawahenere! Waiye kaiserehareya atyo mawenanehareta tyaonare! nexa.

<sup>25</sup> Hatyaoseta Judas, ematawatyasehare, axehenene: — Xaotyakisatiye, xoana maisa natyo xini haokita? nexa.

— Hoka hisota atyo nikare hiraeta — nexa Jesus ihie.

### Jesus Aimenekotyia Nakairati, Erati Kakoa Hakamane

(Marcos 14.22-26; Lucas 22.15-20; 1 Corintios 11.23-26)

<sup>26</sup> Kanakairahitaha hoka Jesus iya nakairati hoka iraexatya Enore hiye. Hatyaoseta taikasetene hoka isene haxaotyakiraharenai ana hoka nehena: — Xotohena hoka xikanakaira. Exe atyo noháre — nexa.

<sup>27</sup> Hatyaoseta iyehitiya erakakalati hoka iraexahitiya Enore hiye. Hatyaoseta isene haxaotyakiraharenai ana hoka nehena: — Xiserehena xityotyia inira xakini.

<sup>28</sup> Hiyaiya, exe atyo notimalaxi, kaxiratyaakehenere kahare haliti wanahiya, kaxemaisatyakeheta maheta iniyalahare enómaneha. Exe timalati hiyeta atyo waitare wenati tyaoheta halitinai ana Enore kakoa.

<sup>29</sup> Aliterexe nomita xihie: exaoseta atyoite maisa noterehitita exehare vinhoxa xikakoa. Xakore hoka noterehitiya atyoite waitarexa vinhoxa xikakoa Baba nawenakala nali — nexa.

<sup>30</sup> Hatyaoseta xeraha haxaka xerati hoka xaneha Oliveiras tyairiya nali.

### Jesus Irae Pedro Kakoa

(Marcos 14.27-31; Lucas 22.31-34; João 13.36-38)

<sup>31</sup> Hoka hatyo nali Jesus nexa: — Exe xatinite xisekohena, xahalakihena natyo. Hiyaiya, iraitu waiyexe kaxairatyakehenere atyo nexa:

“Naisaite kaxaikotyatiye hoka tyotyate ekaxaikoneharenai xaore”.

<sup>32</sup> Xakore hoka nokasehetehenere najikinitaite noxani xaheta maniya Galiléia xeta — nexa ihieya.

<sup>33</sup> Hatyaoseta Pedro nehena Jesus hiye: — Maisaiya atyo natyo nahalakijita hiso, exahe haiyanai nikare tyaona hoka — nexa.

<sup>34</sup> Hoka Jesus nexa Pedro hiye: — Aliterexe nomita hihie: awisa xatinite, takaira makawiraharenetaite, hanamaki hateraharetyoa, himawaiyaneneharene ite haoka natyo — nexa.

<sup>35</sup> Hoka Pedro nexa: — Maisaiya xoana hekota nomawaiyanihare naokita hiso, exahite kotare nowaini hihakakoane — nexa. Tyotyia exaotyakiraharenai nikare makere iraha.

### Jesus Tyaonita Imekoa Getsêmani Nali

(Marcos 14.32-42; Lucas 22.39-46)

<sup>36</sup> Hatyaoseta Jesus xane haxaotyakiraharenai kakoa Getsêmani aokahitere nali hoka nexa: — Alita xisokohena hoka noxani exe waheta maniya hoka niraexatya — nexa.

<sup>37</sup> Hatyaoseta noloka Pedro, hinamahare Zebedeu ityaninai xoaha hoka hatyo nali Jesus haxamaikoharene kehena, exahe hamawaiyeharene, <sup>38</sup> hoka nehena: — Kalore noxamaikohalini nokihixita nohiye, motya aijita ene natyo. Alitehena xiso hoka xikaose hoka xiyaiyahokotyia nohakakoani — nexa ihieya.

<sup>39</sup> Nexa hoka xanehitiya sekose aka hoka meholokoa hatiho kakoa waikoa hoka iraexatya: — Abá, haokitaiya atyo hoka hemaisaheta noniti exe erakakalati noxemakawatikisase. Xakore hoka maisaiya atyo naokitere akereta xini kaomaka hoka maika atyo haokitere akereta kaomaka — nexa.

<sup>40</sup> Hatyaoseta haikoaheta hoka waiyehena atyo, hanamahare exaotyakiraharenai atyo nemakita hoka nehena Pedro hiye: — Xoana maisaiya ini hekoti xikaose hoka xiyaiyahokotyia nohakakoani? nexa.

<sup>41</sup> Xikaose hoka xiraexatya, maisa xikahasakaharetyakita maheta. Xiyahékola atyo waiye maniya tyaonita, xakore hoka xiháre atyo maisa kinaterexe — nexa.

<sup>42</sup> Hatyaoseta xane iraexahitiya ihinamakinihena hiye hoka nehena: — Abá, exe erakakalati noxemakawatikisaseya maisa kaxemaisatyakehitita nomaeraninihareta hoka maika haokitere akeretaite kaomaka — nexa.

<sup>43</sup> Hatyaoseta haikoaheta haxaotyakiraharenai ana hoka nemakahitataha waiyahene. Enemakaha kalore kaweta hoka maisa aliyakere kaosexeha.

<sup>44</sup> Hatyaoseta Jesus xanehitiya enonyahitaha hoka ehanamakinihena hiye iraexahene akereta iraexahitiya. <sup>45</sup> Hatyaoseta haikoaheta haxaotyakiraharenai ana hoka nehena: — Xoana xisemakitata, xikawinitata? Xasemehena, enaose xane hikoa hoka Haliti Ityani atyo kamatawatyakehena iniyalahare nomaseharenai ana. <sup>46</sup> Xatityoahetehena hoka wiyaneheta. Xiyaiya, owene haliti nomatawatyasehare kaokehena — nexa.

### Jesus Kabereotyaka

(Marcos 14.43-50; Lucas 22.47-53; João 18.3-12)

<sup>47</sup> Jesus iraetata ene hoka Judas kaoka, hatyo 12-hare exaotyakiraharenai konitare. Kahare haliti tyoa exema, kesekase, atyalihose harenai kakoare. Sacerdotenai xekohasenai, exahe judeunai nityohalitanai xoaha xaxikala xema tyoahitaha.

<sup>48</sup> Ematawatyasehare koxaka irae ekakoaha hoka aimenekohena hoka nehena: — Nasohitanakolihenerira xotoka, hatyo terota atyo — nexa.

<sup>49</sup> Hatyaoseta Judas kaoka hoka xane Jesus haliya hoka nehena: — Xoana waiye hisaonita, Xaotyakisatiye? nexa hoka sohitanakolisene.

<sup>50</sup> Hoka Jesus nehena ihie: — Nohinaehare, xoare xamani atyo hisoma haokowita hoka hisomehenene rotita! nexa.

Hatyaoseta kaokaha hoka otokaha Jesus hoka olatyahene.

<sup>51</sup> Hatyaoseta hatya Jesus haliya tyaonitere iya kesekase hoka mokotya sacerdote xekohasehare wakanehare hoka aikotya itinihe.

<sup>52</sup> Hoka Jesus nehena: — Hamohetehena hikerakase. Hiyaiya, xala xamaniya atyo kesekase kakoa aisa hoka hatyohare kakoitaiya atyo kaxaisaka.

<sup>53</sup> Xoana hiyahekola hiye ala, Baba naxa kahinaetya natyo maheta hoka motyaiyala maisa 12-hotyali anjonai axikaita nomani haokita? <sup>54</sup> Xakore hoka nikareya notyaona hoka aliyakereya Iraiti Waiyexe nali xakaihenere akereta kawenatyakehena? nexa.

<sup>55</sup> Hatyaoseta Jesus nehena halitinai hiye: — Xoana hoka xisoa xotohena natyo maheta hoka kesekase, atyalihose harenai kakoa xisoa nomani hoka haliti xalijiniharexe akereta xamoka natyo? Hiyaiya, ferakiti ni-hatyaka notyaonita xikakoa Iraexatyakalati Hanako, xakore hoka maisa atyo xotokare natyo. <sup>56</sup> Exakere xakore atyo xamokita natyo hoka iraei xakaisasehare-nai xairahenere Iraeti Waiyexe nanekoa akereta atyo kawenatyaka maheta — nexa.

Hatyaoseta exaotyakiraharenai halakisa Jesus hoka tekoaha.

#### Jesus Kakolatyaka Kalorexenai Nahalakoa

(Marcos 14.53-65; Lucas 22.54-55, 63-71; João 18.12-14, 19-24)

<sup>57</sup> Hatyaoseta Jesus xotokasenai kolatene sacerdotenai xekohase, Caifás nexarexe hana nali. Hatyo nali koxaka hohisakoaha xaotyakiyaho kakoa waiyoreterenai, judeunai nityohalitiranai xoaha. <sup>58</sup> Hoka Pedro xane Jesus xema sekoseta sacerdotenai xekohasehare hana talala hoko kijiya. Isoa hoka tyoka sorarenai haliya waiya maheta, aliyakere xamani mohena Jesus hoka.

<sup>59</sup> Hatyaoseta sacerdotenai xekohaseharenai, tyotyaka kalorexenai xoaha semaha aokowiha xalinihare maoserare Jesus tahi hoka aisahene aokowihenaha.

<sup>60</sup> Xakore hoka maisa xoarehare semahitaha etahi. Kahareha xakore tityoaha hoka iraei hamaoseralahi etahi hoka. Hatyaoseta hinamahare haliti maoseratyalienai tityo hoka nehena:

<sup>61</sup> — Exe haliti atyo exakere irai: “Nahatahetaiya Enore anere Iraexatyakalati Hana hoka notyomeheteniya hanamaki ferakene kakoita”, nexa.

<sup>62</sup> Hatyaoseta sacerdotenai xekohasehare tityo hoka axehena Jesus: — Xoana, maisaite xoare hiraeta exe hiraeharetyaka nahalakoa? nexa.

<sup>63</sup> Nexa xakore hoka Jesus mema tyaona.

Hatyaoseta sacerdotenai xekohasehare axehitiyene: — Kasani hekoaxatya nomani naoka. Hiyaiya, Enore haotita niraeta hikakoa. Xoana hiso Enore Kalorexe Aohenere, Enore Ityani? nexa.

<sup>64</sup> Hoka Jesus nexa: — Hiso atyo nikare hiraeta. Xakore hoka aliterexe atyo niraeta xihye: exaoseta atyoite xiyaiyehena Haliti Ityani nokane Enore kinaterexe fihini maniya, exahe exexoaneheta enokoata kaiminiti konita — nexa.

<sup>65</sup> Hatyaoseta sacerdotenai xekohasehare halalaka haima (hotikisa maheta haxamaikoharene) hoka nehena: — Iniyalahare atyo irae! Maisaiya atyo xoare maheta etahi akiti hatya xakai wihye waohitita! Hiyaiya, xasema atyo iniyalahare iniraene Enore tahi! <sup>66</sup> Hoka xoanaite wamohenene? nexa.

Hoka nehena: — Nikare iniyalahare atyo irae hoka waiye xaisaka.

<sup>67</sup> Hatyaoseta xatahotihotyahene, exahe itihokoa mokohenahene hoka <sup>68</sup> nexahitaha: — Hotehena “Enore Kalorexe Aohenere”: xalatya mokotya hiso? nexaha.

#### Pedro Hamawaiyanenehare Aoka Jesus

(Marcos 14.66-72; Lucas 22.56-62; João 18.15-18, 25-27)

<sup>69</sup> Hatyo xowaka Pedro tyokita menanaka wetekokoa hoka sacerdotenai xekohasehare wakanehalo hikoa enomana hoka nehena: — Hiso tehitiya ene Jesus Galiléia yere xema hisaonita — nexa. <sup>70</sup> Hoka Pedro teraharetyoahena hoka tyotyaha ehaotitaha nehena: — Maisa atyo waiyekehalakere nomani hatyo hiraetere — nexa. <sup>71</sup> Hatyaoseta xane hatyo wetekokoa xisoakala nali hoka hatya wakahalo waiyehitiyene hoka nehena nali tyaoniterenai hiye: — Exe haliti atyo Jesus Nazaré yere xema ene tyaonita — nexa. <sup>72</sup> Nexa hoka Pedro teraharetyoahitiya: — Aliterexe naokita, maisa atyo nowaiyanihare xini hatyo haliti! nexa.

<sup>73</sup> Hatyo najikinita nali tyaoniterenai xane kaokaha Pedro haliya hoka nehena ihiye: — Hiraene hiyeta atyo hawaiyekehalakahare. Hiso tehitiya atyo aliterexe enekonitareha — nexaha.

<sup>74</sup> Hatyaoseta Pedro nehena: — Aliterexe niraeta, maisa hatyo haliti nowaiyanihare xini! Ikoia namaoseraita hoka ehokoretaiya Enore hatyohare hiyeta iniyalahare moka natyo — nexa.

Hatyo xowaka takoira kawihena <sup>75</sup> hoka Pedro oteheta Jesus niraene: “Takoira makawiraharenetaite hanamaki hateraharetyo hoka himawaiyanenehare ite haoka natyo”, nehene. Hatyaoseta Pedro kikisoaheta hatyo nalita hoka tiya, kalore amaikohare hoka.

#### Jesus Kakolatyaka Pilatos Ana

(Marcos 15.1; Lucas 23.1-2; João 18.28-32)

**27** Kamaetali witita sacerdotenai xekohasenai, judeunai nityohalitiranaiha xoaha ahekohenaha Jesus haxaisaneha tahi. <sup>2</sup> Hatyaoseta olatyaha Jesus hoka xaneha ekakoa kalorexe Pilatos nali, isahene enomana hoka aisene maheta.

#### Judas Kamane Tahī

(Atos 1.16-19)

<sup>3</sup> Hatyaoseta Judas ematawatyasehare waiya Jesus xaisakehena hoka kehexaharetyoaheta hoka xane iseheta 30-hokose olo sacerdotenai xekohasenai exahe judeunai nityohalitiranaiha ana hoka <sup>4</sup> nehena ihiyeha: — Iniyalahare notyoma namatawahenere haliti iniyalahare maomanehare hiyeta — nexa ihiyeha.

Hoka nexaha: — Xoana, wisoiyatya hoka? Hiso kahane — nexaha.

<sup>5</sup> Hatyaoseta Judas xawatya olohokosenai Iraexatyakalati Hanako hoka hikoaheta. Hatyo najikinita xane erahokoa hahino hiye hoka aisoawi.

<sup>6</sup> Hatyaoseta sacerdote xekohasenai iyehetaha hatyo olo hokosenai hoka nehenaha: — Exe olo atyo timalati xaimane hoka wiyaotyakisakaho hiyetaiya atyo maisa exe olo wamokita Iraexatyakalati Hana anere kaxomokitere olo kajalise ako — nexaha.

<sup>7</sup> Hatyaoseta iraikakoahenahere najikinita hatyo olo kakoa xane iyaha “Barohe Hiye Hakatyasehare Waikohera”, aokahitere, sekotarenai xawatyakala niyahare maheta. <sup>8</sup> Hatyo hiyeta hatyo waikohe xaokaka kalikini kijiyehehena “Timalati Waikoherakoa”, nerekatita.

<sup>9</sup> Nikare tyaona iraiti xakaisahere Jeremias iratere akereta:

Iyehenahitaha 30-hokose olo Israel yerenai tyakekohenahere ebakatyaka xaimane hoka

<sup>10</sup> hatyo kakoa iyaha barohe hiye hakatyasehare waikohera, Xekohaseti notyoma aohenere akereta.

### Jesus Tyaonita Pilatos Nahalakoa

(Marcos 15.2-5; Lucas 23.3-5; João 18.33-38)

<sup>11</sup> Hatyaoseta Jesus tityoita kalorexe Pilatos nahalakoa hoka Pilatos axehenene hoka nehenaha: — Xoana, judeunai xekohase kalorexe hiso? nexa.

— Hiso atyo nikare hiraeta — nexa Jesus. <sup>12</sup> Xakore hoka maisa xoare ekoaxatyare sacerdotenai xekohasenai, judeunai nityohalitiranai niraene nahalakoa.

<sup>13</sup> Hatyaoseta Pilatos nehenaha: — Xoana maisa hase-mare iniraehareraha hiso? nexa.

<sup>14</sup> Xakore hoka Jesus mema tyaohitiya, hoka kalorexe hakaharetyoa.

### Jesus Kahalakisaka Kaxaisaka Maheta

(Marcos 15.6-15; Lucas 23.13-25; João 18.39-19.16)

<sup>15</sup> Hisehaliti Páscoa xowakehena nihatyaka Pilatos aihikoahitita hatya berexo ako tyaonitere halitinai xaxane ximita. <sup>16</sup> Hatyo xowakiya hatya ewaiyanehareha kaiserehare berexo ako tyaonita, Barrabás nexarexe.

<sup>17</sup> Hatyaoseta halitinai hohisakoaha hoka Pilatos axehenahene: — Xalaite naihikoaheta xomana xaohena: xoana Barrabás, xoana Jesus etake Enore Kalorexe Aohenere aokahitere kore? nexa. <sup>18</sup> Waiyekehalakita atyo enomana sacerdotenai xekohaseharenai nokoawaharene Jesus hiye. Hatyohare hiyeta tyoaha ekakoa enali hoka isahene enomana.

<sup>19</sup> Hatyaoseta Pilatos tyokitata ene kalorexe nokahakalaose nali hoka exanityo axikaxatya hairaine enomana: — Hahalakihena hatyo haliti iniyalahare maomanehare. Hiyaiya, exe xatini nojihini ako maisa waiye notyaonare ihiyeta, kalore namaikohalo ihiyeta — nexa.

<sup>20</sup> Xakore hoka sacerdotenai xekohaseharenai, judeunai nityohalitiranai xoaha aiyateretyoahitaha halitinai xahita, axaha Pilatos hoka aihikoaheta Barrabás hoka Jesus xaisaka aokaha ihiyeta maheta.

<sup>21</sup> Hatyaoseta kalorexe axehenahene: — Exe hinamaharenai konita, xala hare kaisere naihikoaheta xaokita? nexa.

— Barrabás — nexaha.

<sup>22</sup> Hoka Pilatos axahene: — Hoka xoana atyoite namohena Jesus, etake Enore Kalorexe Aohenere aokahitere? nexa.

— Haberekohenene atyalihose xaimaholatyaka hiye! nexaha.

<sup>23</sup> Hoka Pilatos axehenahitiyene: — Hoka xoaretya iniyalahare tyoma? nexa.

Hatyaoseta aiyateretyoaha kawiyatyaha: — Haberekohenene atyalihose xaimaholatyaka hiye! nexaha.

<sup>24</sup> Hatyaoseta Pilatos xakore waiya hoka maisa terota jiyahaotyarahene, exahe halitinaiya enajikini maniya ehareha ihiyeta aokita hoka axa one hoka tihahisoaheta halitinai nahalakoita hoka nehenaha: — Maisa atyo natyo hare xini exe haliti xaisaka naoka, xakore hoka xiso atyo — nexa.

<sup>25</sup> Hoka tyotyaha halitinai nexaha: — Maika exe wainihene hiyeta iniyalahare wikaxomokaka, exahe wijkolaharenai hoka — nexa.

<sup>26</sup> Hatyaoseta Pilatos aihikoaheta Barrabás enomanaha. Hatyaoseta wakatya sorarenai hoka mokonasyaha Jesus militihi aohenere najikinita halakisene enomanaha berekotyahene atyalihose xaimaholatyaka hiye maheta.

### Sorarenai Koexahalisahitaha Jesus

(Marcos 15.16-20; João 19.2-3)

<sup>27</sup> Hatyaoseta Pilatos sorarexanai kolatyaha Jesus kalorexe hanako nali hoka ahohisakoatyaha tyotyaha sorarenai hoka exahiatyahene. <sup>28</sup> Hatyaoseta inima aitoakisaha hoka aisoakisahene imiti nase xotere ako.

<sup>29</sup> Tyomaha xolataolisoakalati katohere kakoare hoka mokahene eseri hiye, atyakasese mokaha ekahekoa

ifihini maniya. Hatyaoseta meholokoaha hakaolise kakoa enahalakoa hoka hirahenahene hoka nehenaha: — Hawaiyeta womana, judeunai xekohase! nexaha. <sup>30</sup> Hatyaoseta xataholisahene, exahe iyaha atyakase ekahekoata hoka mokotyahitene eseri hiye.

<sup>31</sup> Koexahaliherene najikinita aitoakihenahitaha imiti xotere nase hoka aisoakihenahitene inimako. Hatyaoseta xaneha ekakoa berekotyahene maheta atyalihose xaimaholatyaka hiye.

### Jesus Berekotyaka Atyalihose Xaimaholatyaka Hiye Tah

(Marcos 15.21-32; Lucas 23.26-43; João 19.17-27)

<sup>32</sup> Xanahitaha ene hoka ahotyaho ahalakoatyaha hatya haliti, Simão nexarexe, wenakalati Cirene yere, hoka otokaha Simão hoka Jesus berekotyakala niyahare atyalihose xaimaholatyaka kolatyaka aokaha ihiyeta.

<sup>33</sup> Hatyaoseta xane kaokaha Gólgota nexarexe nali. (Gólgota atyo “Seriti nahe akerehare aose”, nita.)

<sup>34</sup> Kaokaha nali hoka isaha vinho kaketaxatyaka

nikanati kakoare Jesus ana terene maheta. Hoka hasakene hoka maisa terene aokowita. <sup>35</sup> Hatyaoseta berekotyahene atyalihose xaimaholatyaka hiye hoka hatyo najikinita hasakaharetyakakoaha hoka Jesus ni-ma irakakakoaha hatyokakoaha. <sup>36</sup> Hatyo najikinita tyokaha hoka wahakohenaha Jesus ana. <sup>37</sup> Eseri hao-maniya mokaha taba taose xairatise kakoare, hax-awaiyekehalakalaha kakoare:

#### EXE ATYO JESUS JUDEUNAI XEKOHASE

<sup>38</sup> Hinamahare kaiwarexe tehitiya berekotyaha atyalihose xaimaholatyakanai hiye ehakakoane, hahare ifihini maniya, hahare ewatone maniya xoaha.

<sup>39</sup> Hoka hatyo nali jiyiterenai koexahalisahene. Matyakekotyahitene exahe xalawalisaha hakaiyeheha hoka nexahitaha: <sup>40</sup> — Hisoiya atyo hamawenekoaretya Iraexatyakalati Hana hoka hana-maki ferakene kakoitaiya hisomehetene haoka. Aliterexe atyo Enore Ityani hiso hoka hexoahetehena hiberekotyaka aoseta hoka hisota hiyoawihetehena! nexaha.

<sup>41</sup> Hoka sacerdotenai xekohasenai, iraiti kakoa waiyoreterenai, judeunai nityohalitiranai harenae tehitiya koexahalihenahene hoka nehenaha: <sup>42</sup> — Haiyanai atyo iyeheta iniyalahare nonitata hoka maisaiya atyo hatyota iyoawihitita! Xoana, maisa Israel yerenai xekohase xini? Hoka kalikinitaiya atyo iyoawiheta haberekotyakaoseta hoka wityakekoneya atyo.

<sup>43</sup> Enore atyo tyakekota, exahe Enore Ityani aokowi. Hatyo hiyeta wawahakohena atyoite, xoana Enore xamani ala iyehetene aokowita kalikini! nexaha.

<sup>44</sup> Kaiwarexenai ehaliya kaberekotyakehenerenai kakoita tehitiya kirawanahene hoka aiyalatyaha eno-mana.

#### Jesus Kamane Tahī

(Marcos 15.33-41; Lucas 23.44-49; João 19.28-30)

<sup>45</sup> Hatyaoseta totahikoahena hoka makalirohena hakakoare waikohekoa. Hoka makaliro tyaona makakoahena kijiya. <sup>46</sup> Makakoahena hoka Jesus kinyatya kawiyatya: — Eli, Eli, lemá sabactani — nexa. Exe iraeti atyo exakerexe nita: — Nenorexi, Nenorexi, xoana hoka hahalakisa natyo? nita.

<sup>47</sup> Haiyaharenai nali tyaoniterenai, semaha hatyohare hoka nexaha: — Elias atyo kawihena — nexaha.

<sup>48</sup> Hatyaoseta hatya tema xane vinho xaiya mitoloka tihaharetyoakalati hoka atyakase keteho mokene hoka aimatene Jesus ana, terene maheta. <sup>49</sup> Hoka haiyaharenai atyo nehenaha: — Awijira hoka wiyaiya, xoana xamanite hoka Elias tyoa iyehetene! nexaha.

<sup>50</sup> Hatyaoseta Jesus kinyatya kawiyahitiya hoka waini.

<sup>51</sup> Hatyo xowaka Iraexatyakalati Hanako imiti taose sololoitere halakoa nekese hoka hinama taose tyaona. Eno maniyata halalakoa waikoa maniya exoaheta. Waikohe tatakoo, exahe sehali kalolironai hoka ehokoo. <sup>52</sup> Xawatyakalatinai majiholatyoaheta hoka kahare Enore koamaniya tyaoniterenai koxaka wainihenerenai kasehetaha <sup>53</sup> hoka hikoahenahitaha

xawatyakalatinai akota. Hoka Jesus kasehetehenere najikinita xanehenahitaha Wenakalati Waiyexe nali hoka hatyo nali kahare halitina waiyehenahitene.

<sup>54</sup> Hatyaoseta sorare xekohasehare, esorarexanai harenai, Jesus ana wahakoiterenai, waiyaha waikohe tatakooane exahe xoalinihare hoka mairaha hoka nexaha: — Aliterexe atyo Enore Ityani ene! nexaha.

<sup>55</sup> Hoka hatyo nali haiyahalonai ohironai tyaonita hoka sekota wahakotyahitaha. Tyoaha atyo Jesus xema Galiléia ta, exahe kahinaetyahitene ene. <sup>56</sup> Enekonihā Maria Madalena, Maria, Tiago, José xoaha nityo, Zebedeu ityaninai nityo xoaha.

#### Jesus Xafityaka Tahī

(Marcos 15.42-47; Lucas 23.50-56; João 19.38-42)

<sup>57</sup> Okoi makehena hoka kaoka hatya haliti kaoloxere, José nexarexe, wenakalati Arimatéia nalitare. Hatyo tehitiya atyo Jesus nawenatyasehare. <sup>58</sup> Hoka José xane Pilatos axeheta Jesus háre. Hoka Pilatos exekakeheta enomana aoka. <sup>59</sup> Hatyaoseta José iyeheta eháre hoka olahisetene imiti kese taosero waitare taose kakoo.

<sup>60</sup> Hoka xane mokene haomanere xawatyakalati ako. Hatyo sehali sekakohenere atyo maisa wahehena xini tyaonita. Hatyaoseta talirika sehali kalorexere taose jihatya maheta hatyo xawatyakalati. Hatyaoseta xaneheta.

<sup>61</sup> Exowaka Maria Madalena, hatya Maria xoaha, tyokahitaha hatyo xawatyakalati haliya.

#### Xawatyakalati Kaxaikotyaka

<sup>62</sup> Kamaetali, hatyo memere mohenahere sábadō ferakene nahetere nahitita sacerdotenai xekohasenai, fariseunai xoaha hohisakoaha Pilatos kakoo <sup>63</sup> hoka nehenaha: — Kalorexere, waiye atyo wotita. Kasetatere xowaka etake maoseratyaliye nexa: “Hanamaki ferakene najikinitaite hoka nokaseheta”, nitere. <sup>64</sup> Hatyo hiyeta haxikatya sorarenai hoka waiye exawatyakala kaxaikoha hanamaki ferakene. Hoka maisa exaotyakiraharenai iyehenahitaha eháre hoka nexahita halitina hiye: “Kaseheta”, nexahitaha. Hiyaiya, hatyo miyanitiye maoserahenahereya atyo hetatiye xaheharehena niyahare — nexaha.

<sup>65</sup> Hatyaoseta Pilatos nehena ihiyeha: — Owene sorarenai. Xiyane waiye xikaxaiko exawatyakala — nexa ihiyeha.

<sup>66</sup> Nexa hoka xaneha xawatyakalati jihola hiye moka-ha baberane maisa xala hare watyalini maheta, exahe halakisaha sorarenai hatyo nali kaxaikoaha maheta xawatyakalati.

#### Jesus Kaseneheta Tahī

(Marcos 16.1-10; Lucas 24.1-12; João 20.1-10)

**28** Sábado najikinita, domingo xowaka witita, Maria Madalena, hatya Maria xoaha xaneha waiyaha maheta xawatyakalati. <sup>2</sup> Hatyaoseta waikohekoa kalore tatakoo. Hoka Enore nalitare hatya anjo tyoa enokoata hoka iyeheta sehali xawatyakalati jihola

hoka tyoka eheno. <sup>3</sup> Motya kahihiye. Inimanai hoka iyomate kaiserehare. <sup>4</sup> Hatyaoseta ihiyeta sorarenai kalore mairaha hoka tatakoaha hoka exoaha waikoa, motya ekamane tyaonaha.

<sup>5</sup> Hatyaoseta anjo nehena ohironai hiye: — Awa atyo ximaira! Notita atyo xiso, xatawita atyo Jesus, etake kaberekotyakehenere atyalihose xaimaholatyaka hiye xáhita. <sup>6</sup> Maisa atyo aliheta aka. Koxaka atyo kaseheta hairaine aoseta. Xisohena hoka mohenaherene aose xiyaiya. <sup>7</sup> Hoka xiyanehetehena hoka xexa exaotyakiraharenai hiye: “Koxaka kaseheta hoka xanehenaite xaheta Galiléia nali xeta. Nalite xiyaiyehetene”, xexa ihiyeha. Xotyaxematyaira exe niraitere — nexa anjo ihiyeha.

<sup>8</sup> Hatyaoseta ihalahalo haikoahenahitaha xawatyakalati nalita. Mairahitaha, xakore hoka ihalahalo. Hoka tema xanehenahitaha, xakaiha maheta exaotyakiraharenai hiye.

<sup>9</sup> Hatyaoseta eharehena rotita Jesus ahalakoa-henahitene hoka nehena: — Kasani ximehexaiko xisaona naoka! nexa.

Nexa ihiyeha hoka xane kaokaha ehaliyita hoka meholoko, awaiyityahene.

<sup>10</sup> Hatyaoseta Jesus nehena: — Awa atyo ximaira. Xiyaneheta hoka xirai nohinaeharenai hiye hoka xaneha Galiléia xeta hoka nalite waiyehenahitaha natyo — nexa ihiyeha.

#### Kaxaikotyatiyenai Niraesene Tahī

<sup>11</sup> Ohironai ahotitata xanehenahititaha hoka haiyanai sorarenai xawatyakalati kaxaikoterenai xanehenahitaha wenakalati hoka sacerdotenai xekohasenai hiye hatyo hawayaneha tahi xakaiha.

<sup>12</sup> Hatyaoseta hatyo kalorexeni ahohisakoatyaha judeunai nityohalitiranai hoka irakakoaha. Hatyaoseta kalore olo isaha sorarenai ana, <sup>13</sup> hoka nexaha ihiyeha: — Maika xexa: “Exaotyakiraharenai makiya tyoaha hoka wisemakiterenase ala iyehenahitaha eháre”, xexa. <sup>14</sup> Hoka exahe kalorexe semehenene hoka wijiya-haotenite xiraehenere akereta hoka maisa xoana mokita xiso — nexaha.

<sup>15</sup> Hatyaoseta sorarenai tyaonaha hatyo olo kakoa hoka sacerdotenai xekohasenai aokitere akereta tyaonaha. Hatyo iraiti exaoretyoa hakakoare judeunai koni, heko kalikini kijiye hena hatyo tahi nikare kase-makita.

#### Jesus Kaotyakeheta Haxaotyakiraharenai Ana

(Marcos 16.14-18; Lucas 24.36-49; João 20.19-23; Atos 1.4-8)

<sup>16</sup> Hatyaoseta 11-hare exaotyakiraharenai xane Galiléia xeta. Hoka xaneha tyairi heno Jesus haxahalakoatyaka aohenere nali. <sup>17</sup> Hatyaoseta waiyehenahitaha Jesus hoka meholokoaha awaiyityahitene. Xakore hoka haiyaharenai atyo katyakoiyahare ekakoa.

<sup>18</sup> Hatyaoseta Jesus kaoka ehaliyahitaha hoka nehena: — Enokoa, waikohekoa xoaha Xekohasehare atyo notyaona — nexa. <sup>19</sup> — Hatyo hiyeta xiyane xaotyakihena tyotyá haliti hotyalinai hoka nokoamaniye nawenatyasehare tyaonaha maheta. Hoka maika xabatixahenahene Baba nexare kakoa, Ityani nexare kakoa, Isekohaliti Waiyexe nexare kakoa. <sup>20</sup> Xaotyakihenahene hoka tyotyá naokitere akere tyaonaha. Hoka xasemehena, tyotyaki ferakene ite nokaxaiko xiso miyanitye ferakene kijiya — nexa Jesus haxaotyakiraharenai hiye.



# Marcos

## João Batista Xakaihakala Tahī

(Mateus 3.1-12; Lucas 3.1-17; João 1.19-28)

- 1** Iraitī Waiyexe Enore Ityani Jesus Cristo tahi akiti hetati xowakiya **2** Enore niraine xakaisashare Isaías xairahenere akereta:  
**3** Enore nexa: “Nirainikakoare naxikatya haheta maniya memere moka maheta haheta maniya. Hoka kawijita maharexakahare nali:  
 Memere ahoti xamohena Xekohaseti naheta, maika totaho xamohena enaheta maniya,” nita.  
**4** Hatyo hiyeta João Batista kaotyaka maharexakiti hoka batixaita halitinai, xakaita Iraitī Waiyexe ihiyeha.  
 — Xahalakihena iniyalahare xománe hoka xikabatixatyaka hoka Enore maotyaneheta iniyalahare xománe — nita João ihiyeha.  
**5** Tyotya Judéia koa tyaoniterenai, exahe wenakalati Jerusalém yerenai hoka xaneha João nali hoka iniyalahare háomaneha tahi xakaita ihije, maisa teraharetyoita, hoka tyotya batixatyahene one Jordão xa nali.  
**6** João nima atyo camelo niyali nomakere hoka ijiterone atyo militihi. Iri nijita exahe maha hoka hiyokita.  
**7** — Najikinitaite hatya noxahehare tyohena — nita halitinai hiye. — Hoka maisaiya aliyakere natyonae nameholokoa hoka ikijitini xolahi hekoti namaxolaita. Hiyaiya, natyo atyo ekatyahakohare — nexa.  
**8** — Natyo atyo nabatixaita xiso one kakoa hoka hatyo atyoite batixahena xiso Isekohaliti Waiyexe kakoa — nita.

## Jesus Batixatyaka Tahī

(Mateus 3.13-17; Lucas 3.21-22; João 1.32-34)

- 9** Hatyo xowaka Jesus tyoa wenakalati Nazaré nalita, Galiléia koa nalita hoka João batixatene one Jordão xa nali.  
**10** Hikoaheta onexata taita hoka waiyehena atyo Jesus, enokoa totakore tyaona hoka hatyoakota Isekohaliti Waiyexe exoahena enomana watyaha akerehare.  
**11** Enokoata iraiti kasemaka: — Hiso atyo nityani noxiyakawali, hawayeta nomani, kalore haihala-halinikijita natyo — nexa.

## Jesus Hasakaharetyaka Tahī

(Mateus 4.1-11; Lucas 4.1-13)

- 12** Hatyo najikinita Isekohaliti Waiyexe axikatya Jesus maharexakahare nali. **13** Hatyo nali 40-ki ferakene tyaona. Hatyo nali Ahalakoahaliti hasakaharetene.

Hatyo nali tehitiya kirakahare xalijiniharexenai tyaonita xakore hoka anjonai atyo kaxaikotene.

## Jesus Hahena Galiléia Nali Hotohare

(Mateus 4.12-22; Lucas 4.14-15; 5.1-11)

- 14** Hatyaoseta João kabereotyakehenere najikinita Jesus xane Galiléia koa Iraitī Waiyexe Xekohaseti Enore nalitare tyohenere tahi akiti xakai maheta.  
**15** — Aimenekohenere aosetya xane hikoahena. Okoitya xekohaseti Enore nalitare kaokehena, xahalakihenaira xománe iniyalahare hoka Iraitī Waiyexe xityakekohena — nita ihiyeha.  
**16** Haxowakiya Jesus tonakilihijita one Galiléia hoka waiya hinamahare haximarene kakoarenae Simão Pedro, André xoaha. Maka kakoa mairatyahitaha, mairatyatiyenai hoka.  
**17** — Xisohena noximi hoka naotyakisa xiso hoka haliti nolokasehare xisaona — nexa Jesus ihiyeha.  
**18** Hatyaoseta halakisaha rotita kohase hiyakakala hoka xaneha Jesus xema.  
**19** Jiyehitiya maisekoneta hoka waiya hinamahare haximarene kakoarenai Tiago, João xoaha, Zebedeu ityaninai. Kanowako tinolaharehenahititaha maka kohase hiyakakala. **20** Kawisahene hoka halakisaha rotita hanexeha Zebedeu, ewakaneharenai harenai kanowakota hoka xaneha Jesus xema.

## Hatya Haliti Kakoa Isekohaliti Iniyalahare Tyaonita

(Lucas 4.31-37)

- 21** Hatyaoseta Jesus haxaotyakiraharenae kakoa xane kaoka wenakalati Cafarnaum nali. Sábado ferakene xane xahohisakoatyakalati hanako aotyakisa halitinai maheta. **22** Exaotyakira semaha hoka hakaharetyoaha, iraeta atyo iyateliti kakoare hoka. Maisa judeunai xaotyakiraho kakoa waiyoreterenai akereta xini aotyakijita hoka hatyo hiyeta hakaharetyoaha.  
**23** Aotyakijita ene hoka tihanare kamilakorerehare tyaonita enekonyaha hoka kintyaxa irai Jesus kakoa:  
**24** — Xoare haoka wihiye, Jesus Nazaré yere? Xoana hisoa hamawenekoaretya maheta wiso? Waiye atyo hawayekehahalakahareta nomani. Hiso atyo Enore Xaxikalahare Waiyexe — nexa.  
**25** Hoka Jesus nexa tihanare hiye: — Nikareta hirae hoka hahikoahetehena hatyo haliti nonitata! nexa.  
**26** Hatyaoseta tihanare atatakoakisene, awerahalikikoatene hoka hikoaheta enonita.  
**27** Hatyo hiyeta tyotyaha hakaharetyoaha hoka axakakoahenaha: — Xoanere kaisere? Xoanere, waitare xaotyakiye kakoala aotyakijita? Xiyaiya, iraihena ti-

hanarenai kakoa hoka tyakekota iniraine — nex-akakoaha.

<sup>28</sup> Hatyo hiyeta tyoty Galiléia koa yerena haxerore semaha Jesus tahi akiti.

### Jesus Aiyatolokiheta Pedro Nakero

(Mateus 8.14-15; Lucas 4.38-39)

<sup>29</sup> Hatyaoseta Jesus haxaotyakiraharenai kakoa hikoahenahitaha xahohisakoatyakalati hanakota hoka xaneha rotita Tiago, João xoaha kakoa Simão Pedro, André xoaha hana nali xeta. <sup>30</sup> Exowaka Simão ni-masero hokakita hoka ehokotyota, watyahiseta hoka. Hatyaoseta Jesus kaoka taita hoka xakai etahi akiti ihiye. <sup>31</sup> Hatyaoseta xane ehokotyotere nali hoka otokene ekahe hiye hoka aokanikisene. Aokanikihetene hoka ewatyahisene tyoteheta enonita hoka xane nakairati tyoma enomanaha.

### Jesus Aiyatelekiheta Hokakiterenai

(Mateus 8.16-17; Lucas 4.40-41)

<sup>32</sup> Okoi kamai isoahena hoka kolatyaha tyoty hokakiterenae, exahe tihanare kamilakorerahenae Jesus ana. <sup>33</sup> Tyoty hatyo wenakalati tyoniterenai xane hohisakoaha hati kanase nali. <sup>34</sup> Jesus kahare haliti aiyatelikiheta tyoty kawakiti hawarehare kahehare kakoarenae, exahe kahare axanekiheta tihanarenae enonyahitaha. Hatyo tihanarenae ana atyo waiyekehakalahareta Jesus hoka hatyo hiyeta Jesus mairaityakitene.

### Jesus Galiléia Nali

(Lucas 4.42-44)

<sup>35</sup> Kamaetali makahekoasetata hoka Jesus kaose hoka xane maharexakahare hoka nali iraexatya. <sup>36</sup> Xane hoka hatyaoseta Simão Pedro, hahinaeharenae kakoa tawaha hakakoare Jesus xahita.

<sup>37</sup> Xane kaokehenahitene hoka: — Tyotyahaore tawahitaha hiso — nexaha ihiye.

<sup>38</sup> Hoka Jesus nexa ihiyeha: — Wiyala hakiti wenakalati wihaliyeterenai nali hoka noxakai Irait Waiyexe ihiyeha. Hatyo nyahare notyoha — nexa.

<sup>39</sup> Hatyaoseta Jesus xane tyoty wenakalatinæ Galiléia koa nali hoka Irait Waiyexe xakaita ihiyeha xahohisakoatyakalati hanakonai, exahe tihanarenai hoka axanekihitita.

### Jesus Awaiyehiheta Jijikoahitere

(Mateus 8.1-4; Lucas 5.12-16)

<sup>40</sup> Hatyaoseta jijikoahiti kahehare aijitere kaoka Jesus ana, hakaoliri kakoa meholokoa enomana axene maheta. — Hawaiyehihetaiya natyo haokowi hoka hawaiyehihetaiya natyo — nexa Jesus hiye.

<sup>41</sup> Jesus airakoaneharetene hoka hakahe ekaokakisa ihiye hoka nexa ihiye: — Há, naokaite. Hawaiyehiheta atyo — nexa. <sup>42</sup> Hatyaoseta jijikoahiti kahehare tyoteheta enonita hoka kinatereheta.

<sup>43</sup> Hatyaoseta Jesus kintyaxa irai ekakoa. <sup>44</sup> — Awaira atyo hiyakaikoahena exehare hatya hiye.

Hiyane sacerdote nali hoka hahotikisoa enomana. Hatyaosetaite Moisés aokitere akereta hisa enomana hoka Enore ana fetatene. Hoka tyotyaha waiyoreha hikinaterehenere kakoa — nexa Jesus ihiye.

<sup>45</sup> Xakore hoka xaneheta hoka hakakoare xakaikoatene hoka tyotyaha semaha etahi. Hatyo hiyeta maisaiya Jesus aliyakere wenakalatinai koa xanehitita hoka maharexakahare nali xane tyonita hoka hakakoare wenakalatinæ tyoniterenae tawitene.

### Jesus Aetonalinikiheta Maetonanehare

(Mateus 9.1-8; Lucas 5.17-26)

**2** Akaiki ferakene najikinita Jesus haikoaheta wenakalati Cafarnaum nali xeta. Kaokeheta hanako taita hoka haxerore nali tyoniterenai semaha ekaokeneheta <sup>2</sup> hoka kahare haliti ehana nali xane. Kahare halitinai hohisako hoka hati kaise mokaha. Haiyaharenai menanakita tyonita, maisa aliyakere hati kanase nali hekoti xane kaokareha.

Jesus xakaitere Irait Waiyexe ihiyeha nase <sup>3</sup> haiyaharenai haliti hatya maetonanehare kolaty Jesus ana. <sup>4</sup> Kaokaha xakore hoka maisa aliyakere isoahitaha Jesus ana ekakoa, kahare halitinai hoka. Maisa aliyakere isoareha hoka kakohaha hatiri hoka hati taose iyaha hoka Jesus hototene exoakisahene exehokotyokala kakoita.

<sup>5</sup> Jesus waiya ityakekoneha hoka maetonanehare hiye nexa: — Hasemehena, iniyalahare hománenai atyo kaxemaisatyakeheta — nexa.

<sup>6</sup> Judeunai xaotyakisakaho kakoa waiyoreterenai nali tyokita hoka ahekohenaha: <sup>7</sup> — Xoanala hoka nikare iraeta? Maisa aiminisare Enore. Hiyaiya, Enore taita atyo emaiyarehitita iniyalahare kaomakitereharenai.

<sup>8</sup> Jesus otya rotita exahekolaha hoka nehena: — Xoana hoka nikare xahekotita? nexa. <sup>9</sup> — Xoarehare ala haxerore niraetyaka maetonanehare hiye: “Iniyalahare hománenai atyo kaxemaisatyakeheta”, nerekatihenaite, xoana, “Hatityoahetehena hoka hatohetehena”, nerekatihena koríte? nexa. <sup>10</sup> — Hiyaiya, nahotikisaite xomana. Natyo Haliti Ityani iyateliti kakoare atyo notyaonita ali waikoheko hoka nohiyeta haliti nómane iniyalahare kaxemaisatyakeheta — nexa.

Hatyaoseta nexa maetonanehare hiye: <sup>11</sup> — Hatityoahetehena hiyehetehena hiyetolisoakala hoka hiyanehetehena hihana xeta — nexa.

<sup>12</sup> Nexa taita ihiye hoka tityoaheta ehaotitaha, haxetolisoakala iyeheta hoka hikoaheta hatyo nalita.

Tyotyaha hakaharetyoaha: — Maisa xoana xowaka exakere wiyaiyehenere — nexaha ihalahareha Enore kakoa.

### Jesus Aoka Levi Haomana

(Mateus 9.9-13; Lucas 5.27-32)

<sup>13</sup> Hatyaoseta Jesus xanehitiya one Galiléia haliya. Kahare haliti kaoka enomana hoka aotyakisahitene.

<sup>14</sup> Tonita ene Jesus hoka waiya Alfeu ityani Levi, owene tyokita kalorexe noloxa bakatyakaose.

— Hisohena noximi — nexa Jesus ihiye hoka tityoaheta hoka xane Jesus xema.

<sup>15</sup> Wahasehena hoka Jesus xane Levi hana nali kanakaira haxaotyakiraharenai kakoa. Kahare kalorexeno noloxa resebetyaseharenai, iniyalahare nomaseharenai hare kakoa.

<sup>16</sup> Judeunai xaotyakiraho kakoa waiyoreterenai, fariseunae xoaha waiyahita Jesus nakaira hatyo olo resebetyaseharenai, nikareterenai xoaha kakoa hoka axaha exaotyakiraharenae: — Xoana hoka kanakairita, terita xoaha exe halitinai kakoa? nexaha.

<sup>17</sup> Jesus sema exaxaneha hoka nehena ihiyeha: — Mahokakeneharenai atyo maisa wairatyare aokare haomana, hoka hokakiterenai wairatyare aokita haomana. Notyoo atyo naotyakisa maheta iniyalahare nomaseharenai, maisa atyo waiyexeharexenai naotyakisa maheta xini — nexa Jesus ihiyeha.

### Jesus Irae Manakairiti Enore Hiyeta Tah

(Mateus 9.14-17; Lucas 5.33-39)

<sup>18</sup> Haxowakiya João Batista xaotyakiraharenai, fariseunai xoaha manakairahitaha Enore hiyeta. Hoka haiyaharenai axa Jesus: — João xaotyakiraharenai exahe fariseunai xaotyakiraharenai xoaha maisa kanakairare Enore hiyeta. Xoana atyo hoka hiyaotyakiraharenai maisa nikare tehitiya tyaonare? nexaha.

<sup>19</sup> Jesus nexa: — Xoana, wenakakoati xowakehena hoka ekaixakatyakaharenai manakairahare tyaonita xaowita? Kaiyanityohenereya enekoniha tyaonita hoka maisaiya manakairahare tyaonahitaha. <sup>20</sup> Hoka haxowakaite kaiyanityohenere kaiyakeheta enekonitaha. Hoka hatyo xowaka atyoite manakairehenaha — nexa.

<sup>21</sup> — Maisa atyo katinolaharetyakehetere imiti xololo, imiti waitare taose mawane kakoa. Waitare taose mawaneya ityotyolisoahetehena hoka halalakaiya imiti xololo, aeroakotyaiya ehalalakoane — nexa.

<sup>22</sup> — Maisa atyo vinho waitarexa kaxomokakere toahiyere militirise nomaka ako. Nikareya kaxomokaka hoka halalakoiya militirise hoka vinhoxaiya iratyoo tyoty, exaheya militirise hoka mawenekoare. Hatyo hiyeta vinho waitarexa militirise waitare ako taita kaxomokakita — nexa Jesus.

### Jesus Atyo Sábado Xekohasehare

(Mateus 12.1-8; Lucas 6.1-5)

<sup>23</sup> Sábado ferakene xowaka Jesus haxaotyakiraharenai kakoa tonahitaha hoka jiyakonihenahitaha trigo xafityaka hoka haetonaneta exaotyakiraharenae irikotyaha trigo xawase hoka ese kanakairaha.

<sup>24</sup> Hatyaoseta fariseunae axehena Jesus: — Xoana hoka nikare hiyaotyakiraharenai tyaonita? Wiyaothyakisahako sábado xowaka mahokoanititerehare tyomahitaha — nexaha ihiye.

<sup>25</sup> Hoka Jesus nexa: — Xoana maisa xasemare Davi tahi akiti, manakairahare hoka nakehenere hahinaeharenae kakoa? <sup>26</sup> Isoa Enore hanako. Exowaka Abiatar kaxaikota Enore hana. Isoa hoka kanakaira nakairati Enore ana fetatyakere, isa tehitiya hahinaeharenae

ana hoka kanakairaha. Wiyaothyakisakaho hiyeta atyo maisa hatyaterere kanakairita hatyo nakairati. Sacerdotenae anere taita atyo hatyo nakairati — nexa.

<sup>27</sup> Jesus nehitiya: — Haliti hiyeta atyo Enore tyoma sábado. Maisa atyo sábado hiyeta xini tyoma haliti.

<sup>28</sup> Nikare hoka Haliti Ityani atyo sábado ferakene xekohase — nexa Jesus ihiyeha.

### Jesus Awaiyehiheta Haliti Nira Kahexe

(Mateus 12.9-14; Lucas 6.6-11)

<sup>3</sup> Haxowakiya Jesus isoahitiya xahohisakoatyakalati hanako. Isoa hoka waiya hatya haliti hamaniya nirakahexe. <sup>2</sup> Hatyo nali haiyaharenai halitinai wahakotyahita Jesus ana, sábado xowakiyaiya wairaty hatyo haliti hoka iraharetyahene aokowitaha emaximinirene xaotyakisatyaho hiyeta.

<sup>3</sup> Hatyaoseta Jesus nexa mawaiyekahehare hiye: — Hisohena ali — nexa ihiye.

<sup>4</sup> Hatyaoseta axehena wahakoiterenai: — Xoare nexa sábado ferakene xaokaka wiyaothyakisakaho? Xoareya wisoma hatyo ferakene: waiyexe, iniyalahare kore? Xoana haliti wainihenerite wakahinaehena, wahalakihenene kore ite hoka wainihena? nexa ihiyeha.

Nexa ihiyeha hoka mema tyaonaha.

<sup>5</sup> Mema tyaonaha hoka Jesus wahakoty enomanaha hoka eharehena, amaikoharehena xoaha, maisa semaxematyaha aokowiyeha iniraine hoka.

Hatyaoseta Jesus nexa mawaiyekahehare hiye: — Haimahena hikahe — nexa ihiye.

Nexa hoka aimatya hakahe hoka waiyeheta rotita ekahe.

<sup>6</sup> Hatyaoseta fariseunai hikoahenahitaha hatyoakota hoka Herodes hiyetarenai kakoa irakakoaha. Jesus tahi ahekotyaha aisahene maheta.

### Jesus Aiyatelikiheta Haiyanai Hokakiterenai

<sup>7</sup> Hatyaoseta Jesus haxaotyakiraharenai kakoa xanehitiya Galiléia xa nali. Xanehitiya hoka kahare halitinai xaneha exema Galiléia koa yerenai, Judéia koa yerenai, <sup>8</sup> Jerusalém yerenai, Iduméia koa yerenai, Jordão xa halakoiya maniya tarenai, wenakalati Sidom, Tiro xoaha maniya tarenai xoaha, kahare halitinai xaneha Jesus xema waiyahene maheta, semahitaha enómane tahi akiti hoka.

<sup>9</sup> Hatyaoseta Jesus axikatya haxaotyakiraharenai tawaha kanowa enomana maheta, kasani maisa halitinai ehotyasekoatyahene aokita hoka. <sup>10</sup> Koxaka kahare haliti aiyatelekiheta hoka hatyo hiyeta tyoty hokakiterenai kasani Jesus hiye hakahe hekoti ekaokakisa aokowiyahitaha hoka herawasetyakakohitaha. <sup>11</sup> Tihanare kamilakoreraharenai waiya Jesus hoka exoaha ikiji haliya hoka kinatyaxa kawiyatyahitaha: — Hiso atyo Enore Ityani — nexahita ihiye.

<sup>12</sup> Nexahitaha hoka Jesus mahokoanitya nikare iniraineha.

**Jesus Aoka 12-harenai Haxaotyakiraharenai Maheta**  
(Mateus 10.1-4; Lucas 6.12-16)

<sup>13</sup> Hatyo najikinita Jesus kakoha tyairi heno hoka kawihena aohenerenai haomana hoka tyoaha enomana. 12-hare <sup>14</sup> haliti aoka haomana ehaliya tyaonaha maheta, exahe hoka axikatyahene xakaihaha Iraitu Waiyexe maheta. Hatyo 12-hare iraitu kakoarenae aoka. <sup>15</sup> Isatehitiya iyateliti enomanaha hokakiterenai aiyatelikiheta maheta, exahe tihanare kamilakoreraharenai nonita tihanarenai axanekihenahitaha maheta.

<sup>16</sup> Hatyo 12-harenai atyo exenai: Simão nexarexe hoka Pedro nexare kaixarehenahitiyene. <sup>17</sup> Tiago, João xoaha Zebedeu ityaninai hoka Boanerges nexare kaixarehenahitiyene, wiyako maniya atyo, "Onetalolo ityaninai". <sup>18</sup> André, Filipe, Bartolomeu, Mateus, Tomé, Alfeu ityani Tiago, Tadeu, Simão Cananeu, <sup>19</sup> Judas Iscariotes xoaha. Hatyo Judas atyo Jesus matawatyasehare.

**Jesus Atyo Tihanare Aokaha**  
(Mateus 12.22-32; Lucas 11.14-23; 12.10)

<sup>20</sup> Hatyaoseta Jesus xaneheta hahana nali hoka kahare haliti hohisakoahitiya ehana nali hoka maisa aliyakere Jesus, exaotyakiraharenai kanakairareha.

<sup>21</sup> Hatyaoseta Jesus hinaeharenai semaha etahi hoka xaneha enomana nolokahene maheta. Haiyaharenai ehatyaharene aokahitereha hiyeta xane nolokahene maheta.

<sup>22</sup> Judeunai nawenatyakaho kakoa waiyoreterenai tyohenere Jerusalém ta nexahitaha exaokaka: — Kala Belzebu tihanarenai xekohase tyaonita ekakoa. Hatyohiyeta tihanarenai xekohasehare iyateliti ijita enomana hoka halitinai nonita tihanare axanekihitita — nexahitaha.

<sup>23</sup> Hoka Jesus kawisahene hoka aotyakihenahene hoka nehena: — Aliyakeriya Ahalakoahaliti hatyota axikatyowihetehena xaokita? <sup>24</sup> Hiyaiya, hakoa waikoherakoa tyaoniterenai hatyo kakoaha makereya kirawanekakoaha hoka mehotyakakoahaiya. <sup>25</sup> Exahiya hatya haliti kaiyanityore, kaisaniye tyaonitere hotyaliya kirawanekakoaha hoka maisaiya kinatere tyaonehenahititaha, exaoretyakakoahaiya.

<sup>26</sup> — Nikareya Ahalakoahaliti hotyalinai: hatyo make kirawanekakoaha hoka maisaiya aliyakere tyaohehahititaha hoka mehohaiya — nexa.

<sup>27</sup> — Hiyaiya, maisaiya xala hare haliti kinaterexe hanako ijoita hoka kaiwaharetitene, ameteniya olatene hotohare hoka kaiwaharetene, xoare xamani kolatya aokowita ehanakota hoka — nexa Jesus.

<sup>28</sup> — Xotyaira exe niraini, tyotyta halitinai iniyalahare tyomitereharenai atyoite kamaotyanyakeheta, exahe Enore kairaharetyakiterehare tehitiya atyoite kamaotyanyakeheta. <sup>29</sup> Hoka xala xamaniya atyo irae-haretya Isekohaliti Waiyexe hoka maisaiya atyo kaxemaisatyakihitita hekoti. Hiyaiya, hatyo iniyalahare atyo maxemaisatyakahare — nexa Jesus. <sup>30</sup> Nikare Jesus

irae haiyaharenai tihanare kamilakoretiterene aokahitere hiyeta.

**Jesus Nityo, Iximarenenai Xoaha Tawitene**  
(Mateus 12.46-50; Lucas 8.19-21; Hebreus 2.11)

<sup>31</sup> Hatyaoseta Jesus nityo iximarenenai harenai kaokaha hoka menanakita tyaonaha hoka ekawisaka aokaha.

<sup>32</sup> Kahare haliti tyokita ehaliya hoka haiyanai xane xakaini ihiye: — Hasemehena, hityo, hiximarenenai xoaha menanakita tyaonahitaha, tawahita hiso — nexaha Jesus hiye.

<sup>33</sup> — Xala mama, xala noximalininai xaokita? nexa Jesus axahene.

<sup>34</sup> Hatyaoseta wahakotahisa hahaliya tyokiterenai ana hoka nehena: — Xasemehena, owene atyo mama noximalininai xoaha. <sup>35</sup> Xalanai xamaniya atyo tyakeko Enore niraine hoka tyaona exema hoka hatyonai atyo mama noximalini noximaloni — nexa Jesus ihiyeha.

**Xafityatiye Tahu**  
(Mateus 13.1-9; Lucas 8.4-8)

**4** Haxowakiya Jesus aotyakihitiya halitinai Galiléia xa haliya. Haliti kahare hohisakoahitiya ehaliya hoka xane tyoka kanowako one kilihi halitinai tyaonitere haliyaseta hoka hekotaha hatyo kaiholo kilihi. <sup>2</sup> Jesus aotyakihenahene kahare xoalini hare kakoa hoka iraitu metaharexe kakoa taita aotyakihenahene hoka nehena:

<sup>3</sup> — Xasemehena: hatya haliti xane hahananeharese fitya maheta. <sup>4</sup> Fitita hanakatise hoka haiyasenai exoa ahoti kilihi, hoka kotehalasenai exoa hoka tyotyta kanakairehenahitene. <sup>5</sup> Haiyasenai tehitiya sehali tyaonitere akiti exoa, inira waikohe tyaonitere akiti hoka haxeroreta hikoa. <sup>6</sup> Hatyaoseta kamai hikoahena hoka watere aisehetene, maisa hateko katyahareta hoka. <sup>7</sup> Haiyasenai xane exoa katohere koni hoka katohere jiyahaotene hoka maisa kalita. <sup>8</sup> Haiyasenai waikohe waiyexe akiti xane exoa. Hikoa, waiyehare tyaona, kahare kali. Haiyakate 30-se, 60-se, 100-se hare kaseha — nexa Jesus xakaihakatya ihiyeha.

<sup>9</sup> — Xala xamani atyo katanakoakore semakatya maheta hoka maika semehena niraini — nexa ihiyeha.

**Jesus Awaiyekehalakatya Xakaihenere Xafityatiye Tahu**  
(Mateus 13.18-23; Lucas 8.9-15)

<sup>10</sup> Hatyaoseta halitinai xaneheta hoka Jesus haliya hekotehenerenai hohisakoaha 12-hare exaotyakiraharenai kakoa hoka axehenahene: — Xoare hexa haokowita hanakatise tahi akiti? nexaha ihiye.

<sup>11</sup> Hoka Jesus nehena: — Xomana atyo Enore metaharexe hakoamaniya nawenatyaka hotikijita. Hoka haiyaharenai ana atyoite metaharexe taita kaxakaihakatyaakehena. <sup>12</sup> Hoka waiyehena hoka maisa waiyekehalakita enomanaha, exahe semehenaha hoka maisa waiyekehalakita enomanaha maheta. Hoka hatyo hiyeta maisa Enore tyakekoahitaha maheta, exa-

he maisa iniyalahare enómaneha kamaotyanyakihiti-ta maheta.

<sup>13</sup> Hatyaoseta Jesus axehenahene: — Xoana maisa waiyekehalakita exe noxakaitere xihye? Hoka aliyakere ite waiyekehalakehena xomana haiyanai noxakaitere? nexa ihiyeha.

<sup>14</sup> Hatyaoseta Jesus awaiyekehalakehena xakai-henere enomanaha: — Hatyo hanakatise xafityase-hare atyo Enore niraene xakaisasehare. <sup>15</sup> Haiyaharenai semehenereharenae Iraitu atyo hanakatise ahoti kilihi exoahenere akereta tyaonahita. Semaha taita iraitu hoka Ahalakoahaliti iyihititene rotita enonyahitaha. <sup>16</sup> Haiyaharenai semehenereharenae Iraitu atyo hanakatise xane sehalise tyaonitere akiti exoahenere akereta tyaonahita. Semehenaha hatyo Iraitu hoka awaiyetyahitene haihalahareneha kakoa. <sup>17</sup> Xakore hoka maisa atyo waha tyaonare Iraitu Waiyexe xema, maisa katyaharexe hoka. Kirawanehenahene Iraitu Waiyexe hiyeta hoka haxerore halakihititene iraitu xema hawenane.

<sup>18</sup> Hoka haiyaharenae atyo hanakatise katohere koni xane exoahenere akereta tyaonahitaha. Semahitaha xakore atyo iraitu <sup>19</sup> hoka háwenaneha akiti kakoa atyo ahekotyahitaha, kehalahaliti tahi, xiyehaliti harenai tahi atyo ahekotyahitaha, kasani xoalini hare tyomaha aokowhitaha hoka. Nikarehena hoka maisa aliyakere Iraitu Waiyexe xema tyaonareha hoka maisa xoare tyomareha. <sup>20</sup> Hoka haiyaharenae atyo waikohe waiyexe akiti exoahenere hanakatise akereta tyaonahita. Semaha Iraitu hoka awaiyetyahene hoka tyaonaha exema, hoka kahare tyomaha Enore ana, haiyakate 30-se, 60-se, 100-se kasetere akereta tyaonahitaha — nexa Jesus ihiyeha.

### Xaokanatyakalati Tahi

(Lucas 8.16-18)

<sup>21</sup> Hatyaoseta Jesus nihitiya ihiyeha: — Xoana, xaokanatyakalati xaotakahena hoka koho katyahe, kama katyahe xamokita? Maiha atyo nikarexe xini. Exomokakaose terota atyo wamokitene, waiye aokanakatya maheta.

<sup>22</sup> — Hiyaiya, tyotya kaxateroakisakitere harenai atyoite kawaiyaka, exahe tyotya masemakahare tyaonitereharenai atyoite kasemaka — nexa.

<sup>23</sup> — Xala xamani atyo katanakoakore semakatya maheta hoka maika semehena niraini — nexa ihiyeha.

<sup>24</sup> Hatyaoseta nehitiya ihiyeha: — Xirihalira xisaona xoalini hare xasemehena hoka. Hiyaiya, aliyakerexe xamani xamoka haiyaharenai hoka hatyo xamohenerene akeretaiya atyo Enore moka xiso. Hoka hatyo xaheharite mohitiyata xiso.

<sup>25</sup> — Xala xamani atyoite xoalini hare kakoare hoka kaxekakehitiyaite enomana hoka xala xamani atyoite maisa xoare kakoare hoka inira tyoahenere enomana atyoite kaiyakeheta enonita — nexa Jesus ihiyeha.

### Jesus Hanakatise Hiye Aimenekotyá

<sup>26</sup> — Enore koamaniya nawenatyakaho atyo exakere: motya atyo hatya haliti hamaseneko fititere-hare hanakatise akereta. <sup>27</sup> Hoka hatyaoseta xane nemaka, kaosehena hoka exafera hiko, kekoare hoka mawaiyekehalakiterehare ekekoarene enomana akereeta atyo. <sup>28</sup> Waikohe atyo hatyota akekoareneki-jitene. Hetati hikoahenere xowaka kirane tyaonita, hatyaoseta kaenaseta, hatyaoseta kaséta. <sup>29</sup> Hatyaoseta nirehena hoka kataikore kakoa irikotitene, ixirikotyakaose xane hiko hoka — nexa Jesus ihiyeha.

### Aimenekohitiya Hanakatise Kiranexe Hiye

(Mateus 13.31-32; Lucas 13.18-19)

<sup>30</sup> Jesus nehitiya: — Xoare kakoa hakakoa Enore koamaniya nawenatyaka akiti? Aliyakereya noxakaini xihye hoka waiyekehalaka xomana?

<sup>31</sup> — Hanakatise kiranexe mostardase akerehare atyo Enore koamaniya nawenatyaka akiti. Tyotya hanakatise katyahakorese atyo hatyo mostarda se. <sup>32</sup> Kiranese xakore hoka hafeteniya hoka hiko kekoareya hoka tyotya hananehaliti xahehareya tyaona. Kahareya kakanohiko hoka kotehalasenaiya haihe tyoma ekate — nexa Jesus xakaita ihiyeha.

<sup>33</sup> Exakere Jesus iraeta halitinai kakoa. Xakaihena hoka aimenekoita taita, xoalini hare kakoa. Kasani nikare xakai ihiyeha hoka waiyekehalaka enomanaha aokita hoka. <sup>34</sup> Nikare xakaihena hoka aimenekoita taita halitinai ana. Hoka hawawaha heko atyo haxaotyakiraharenai ana awaiyekehalakahititene.

### Jesus Watyali Kinatyawiniti

(Mateus 8.23-27; Lucas 8.22-25)

<sup>35</sup> Hatyo ferakene makehena hoka Jesus nexa haxaotyakiraharenai hiye: — Wiyala Galiléia xa halakoiya maniya — nexa.

<sup>36</sup> Hatyaoseta halitinai axikahenahitaha. Hatyaoseta kanowa ako Jesus haxaotyakiraharenai kakoa xane. Koxaka Jesus enahititaha hatyo kanowa ako tyaonita. Hatyaoseta haiyanai kanowa tehitiya xane exemaha.

<sup>37</sup> Nekesexehena xanahitaha hoka hoholati kaoka enomanaha. Hoholasekoatyahene, one ainakiyatya hoka kalorehena kanowa ako ijoita. <sup>38</sup> Jesus nemakita kanowa tyokolyako maniya, haseri kahainatya hoka. Hatyaoseta exaotyakiraharenai kaosetene. — Hikaosehena! Wiwainihenaoreka! Xoana maisa kore hilmawaiyeharexe wikamane kakoa? nexaha kaosetyahene.

<sup>39</sup> Hatyaoseta Jesus kaose hoka tityoaheta hoka watyali hoholati one ainakiyatitene. — Mema xisaona — nexa.

Nexa hoka mahohoreheta, memaxeheta one, mema akeheta.

<sup>40</sup> Hatyaoseta haxaotyakiraharenai hiye nexa: — Xoana hoka ximairita? Xoana hoka maisa xityakekore? nexa ihiyeha.

<sup>41</sup> Hatyaoseta exaotyakiraharenai kalore mairaha hoka iraikakoahenaha: — Xoare halitini ala exe hoka one, hoholati xoaha hiye irae hoka aokitere akereta tyaonaha? nexaha.

### Hatya Haliti Kakoa Tyaonita Isekohaliti Iniyalahare

(Mateus 8.28-34; Lucas 8.26-39)

**5** Hatyaoseta xane kaokaha Gerasa nali, Galiléia xa halakoiya maniya. <sup>2</sup> Exoa taita kanowakota hoka hatya haliti kawaiyaneharexe atihotene.

<sup>3</sup> Xawatyakalatinai nalita tyoita, hatyo nali tyaonita. Maisaiya aliyakere xala harenai olatitene, mahaiya kamatiherahi kakoa hekoti holatitene. <sup>4</sup> Kamatiherahi kakoa olatyahitene kahaliki ekano, ikinoli hare hiye, xakore hoka irikokoaitatene. Maisaiya xala harenai jiyahaowitene. <sup>5</sup> Tyairinai koni exahe xawatyakalatinai koni tyaonita. Wáhaka makiya, ferakoa xoaha tonakoaita, kawikoaita, sehali hiye kawe mokoita xoaha.

<sup>6</sup> Jesus kanowa akota exoa taita hoka sekota waiyene hoka tema xane enomana. Hoka hakaolise kakoa xane meholokoa enahalakoa, Jesus atyo exaehare hoka.

<sup>7</sup> — Jesus, Enore Kalorexe Ityani, xoare haoka nohiye? Enore nexare kakoa nirai hikakoa, awaira atyo iniyalahare hamohena natyo — nexa kinatyaxa irae.

<sup>8</sup> Jesus koxaka hatyo nahitita nexa: — Tihanare, hahikoahetehenaira exe haliti nonitata — nexa. Hoka hatyo hiyeta nikare iraeta Jesus hiye.

<sup>9</sup> Hatyaoseta Jesus axene: — Xoare nexare hiso? nexa axene. — Nexare atyo Hisoakere, wikahare hoka — nexa.

<sup>10</sup> Hatyaoseta Jesus hiye maisa tihanarenai xaxikatyakeheta hatyo nalita hakiti xeta aokita.

<sup>11</sup> Exowaka kahare bolokonai nali tyaonita, kanakairakoatyahita tyairi henose <sup>12</sup> hoka Jesus hiye irae tihanarenai: — Haxikahena wiso hoka wisoa bolokonai milako — nexaha Jesus hiye.

<sup>13</sup> Hatyaoseta tihanarenai axikaheta haliti nonitata hoka xane bolokonai milako isoaha hoka bolokonai tema tyairi henota, xane onexa exoaha hoka monaha hoka wainiha. Hatyo bolokonai komitaene 2.000-li.

<sup>14</sup> Hatyaoseta bolokonai kaxaikotyasenai tekoaheta nalita hoka xane xakaikoatyaha hatyo tahi akiti wenakalati, exahe hatyo wenakalati haliyita tyaoniterenai hiye. Hoka kahareha xaneha hatyo nali waiyaha maheta. <sup>15</sup> Jesus tyaonitere nali xane kaokaha hoka waiyehenaha atyo, owene atyo haliti hatyaharetere tyokita, kaimere tyaonita, waiyeheta atyo exahekola. Waiyehene hoka mairaha.

<sup>16</sup> Hatyaoseta koxaka waiyehenerenenai xakaihakatya ihiyeha haliti, exahe bolokonai xoaha tahi akiti ihiyeha.

<sup>17</sup> Hatyaoseta kasani Jesus xaneheta ewaikoheratata aokaha.

<sup>18</sup> Hatyaoseta Jesus xane kakohahetehena kanowa ako hoka haliti tihanare ehatyahalinihenere awaiyehetehenere irahena ihiye: — Waiyehenaiya notyoha hiyema? nexa axene.

<sup>19</sup> Maisa exema xane aokita Jesus hoka nexa ihiye: — Hiyanehetehena hihana nali hoka hihinaeharenai hiye hiyakaihena Xekohaseti awaiyehetehenere hiso tahi akiti. Exahe airakoaneharehenere hiso tahi akiti — nexa ihiye.

<sup>20</sup> Nexa ihiye hoka xaneheta hoka xakaihakatya Decapolis naliyerenai hiye Jesus tyomehenerehare enomana tahi. Hoka tyotyaha hakaharetyoaha.

### Jairo Axa Jesus

(Mateus 9.18-19; Lucas 8.40-42)

<sup>21</sup> Hatyaoseta Jesus haikoaheta hatyo nalita halakoiya maniya hoka kahare haliti xane ahalakoatene kaihokoloka nali.

<sup>22</sup> Hatyaoseta hatya haliti Jairo nexarexe, xahohisakoatyakalati hana kaxaikotyasehare tyoa Jesus ana kaoka hoka ikiji haliya meholokoa.

<sup>23</sup> — Nityani ohiro mokose wainihena. Hisohena hoka hikahe hekaokakisa ihiye hoka kinatoloheta hoka maisa wainita — nexa axa Jesus tihityoa ihiye. <sup>24</sup> Nexa hoka Jesus xane exema. Kahare haliti tehtiya xane exema hoka ehotyasetyakakoaha xanahitaha.

### Jesus Aiyatolokiheta Ohiro

(Mateus 9.20-22; Lucas 8.43-48)

<sup>25</sup> Hatyaoseta hatya ohiro xane kaoka halitinai koni. 12-terehokoanehena timalati hikoata minita ihiyeta.

<sup>26</sup> Kahaliki wairatyarenai ana xane hoka exaehare ewaalitihalokisahitene. Koxaka haoloxa miyatya wairatyarenai hiye. Xakore hoka maisa waiyehetolo hekoti hoka aerorityoitata ihiye. <sup>27</sup> Sema Jesus tahi hoka xane halitinai koni hoka Jesus hiniri manyata ekaokakisa hakahe inima hiye.

<sup>28</sup> Exakere ahekoita: — Nekaokakisa taitaiya nokahe inima hiye hoka nokinatoloheta — nita hoka <sup>29</sup> hakahe ekaokakisa inima hiye taita hoka waiyeheta. Hoka kehexa hahiyeta timalati tyoteneheta.

<sup>30</sup> Hatyaoseta Jesus kehexa rotita iyateliti hikoahenere ihiyeta hoka terehokoa wahakotyaha halitinai ana hoka nehena: — Xala hakahe ekaokakisa nimi hiye? nexa.

<sup>31</sup> Hoka exaotyakiraharenai nehena: — Hiyaiya, kahare haliti ehotyasekoaita hiso. Hoka xoana hoka nikare haxita? nexaha ihiye.

<sup>32</sup> Hoka Jesus wahakohokotyotata, kasani waiya aokowita inima hiye hakahe ekaokakihenere hoka.

<sup>33</sup> Hatyaoseta hatyo ohiro tyoa Jesus kiji haliya meholokoa, tatakoka hamairane, otya haxaiyatolokisaheta hoka. Hatyaoseta tyotyaha xakai Jesus hiye hahokakene tahi.

<sup>34</sup> Hatyaoseta Jesus nexa: — Hityakeko natyo hoka hikinatoloheta. Awa atyo himawaiyehalo, hikinatoloheta atyo. Hiyanehetehena himehexaikohalone kakoa — nexa ihiye.

**Jesus Ekasekiheta Jairo Ityani**

(Mateus 9.23-26; Lucas 8.49-56)

<sup>35</sup> Iraetata ene hatyo ohiro kakoa hoka xahohisakoatyakalati hana kaxaikotyasehare Jairo wakaneharenai kaokaha hoka nexaha ihiye: — Koxakatyahityani waini. Kotare Xekohaseti matyoanenehare hihana nali, waiya aliya hoka kirahare haetonane hiyeta — nexaha.

<sup>36</sup> Jesus sema hatyo iraiti hoka nexa Jairo hiye: — Awaira atyo himawaiyeharehena. Hityakekohena taitaira natyo — nexa Jairo hiye.

<sup>37</sup> Hatyaoseta xaneha Jairo hana xeta. Pedro, haximarene kakoarenae Tiago, João xoaha xane exema aoka. Maisa hatehitiya aokita. <sup>38</sup> Hatyaoseta xane kaokaha Jairo hana nali hoka isoaha. Waiyehena atyo werahaliti, osexati hare. Kahare tiyahitaha.

<sup>39</sup> Hoka nehena: — Xoana hoka kalore xitiyita, exahe nikare xisaonita? Xoimahalotita maisa waini xinika, nemakitata — nexa Jesus ihiyeha.

<sup>40</sup> Hatyaoseta ehatyaharene aokitaha hoka Jesus ahikoahenahitene. Hatyaoseta enexe, inityo, hanamahare xanehenere exema xoaha taita isoa hatyo xoimahaloti tyaonitere ako.

<sup>41</sup> Isoa hoka otokene ekahe hiye hoka nehena: — Talita cumi! nexa. Exakere atyo iraeta: — Xoimahaloti, hainakoahetehena! nita atyo.

<sup>42</sup> Nexa ihiye hoka ainakoaheta, tohetehena rotita, xoimahaloti 12-wanone henolo hoka. Hatyaoseta tyoty hakaharetyoaha.

<sup>43</sup> Hatyaoseta Jesus hatyohare maxakaikoatyakene aoka ihiyeha. Hatyaoseta xoimahaloti tyaisaka aoka ihiyeha.

**Jesus Haikoaheta Nazaré Xeta**

(Mateus 13.53-58; Lucas 4.16-30)

**6** Hatyaoseta Jesus haikoaheta haxaotyakiraharenai kakoa wenakalati Nazaré xeta, toahiya tyaonitere nali. <sup>2</sup> Hoka sábado ferakenehena hoka xane xahohisakoatyakalati hanako hoka aotyakihena halitinai. Semaha Jesus niraene hoka hakaharetyoa mokahene hoka axakakoaha: — Aliyotala enawayiore tyoita enomana? Aliyotala exe haliti waiyore tyoita exakere? Aliyakere ala tyomita exehare maomakaharenai? <sup>3</sup> Xoana, maisa hoka okahakalati hati hare nomasehare xini? Xoana maisa hoka Maria ityani xini, exahe Tiago, José, Judas, Simão xoaha naxenane xini? Xoana, maisa hoka iximalonene xini ali tyaonita? nexaha, maisa awaiyetyareha Jesus hoka.

<sup>4</sup> Hoka Jesus nexa ihiyeha: — Iraiti xakaisasehare atyo kaxaiminisakita hakoakiti. Xakore atyo hoka kaokehete hena atyo hawaikohera hawenakala, hahinaeharenai koni hoka maisa kaxaiminisakere — nexa ihiyeha.

<sup>5</sup> Hatyo hiyeta maisaiya aliyakere xoare hare meta-harexe nomakere tyomita Nazaré nali. Haiyanai hokakiterenai hiye taita hakahe ekaokakisa hoka aiyatelikihenahitene. <sup>6</sup> Jesus atyo hakaharetyoa

ematyakekoneha hiyeta. Hatyaoseta Jesus xaneta wenakalatinai nihatyaka hoka aotyakisahitene.

**Jesus Xaotyakiraharenai Hatene Tah**

(Mateus 10.5-15; Lucas 9.1-6)

<sup>7</sup> Hatyaoseta 12-hare haxaotyakiraharenai kawisa, hoka hinamahare xakini axikatyahene. Iyateliti isa enomanaha axanikihetaha isekohaliti iniyalahare halitinai nonitata maheta.

<sup>8</sup> Maisa xoare hare kolatyaka aokita ihiyeha ahoti niyahare. Atyakase taita kolatyaka aoka ihiyeha tonohisoaha maheta. Maisa nakairati, boná, olo hare kolatyaka aokita ihiyeha. <sup>9</sup> Berekataiya atyo waiyehena mokaha hoka maisaiya atyo xoare maheta hate hekoti kajijanexe imitinase kolatyahitaha aoka ihiyeha.

<sup>10</sup> Hoka nehitiya: — Maika xikaokehena wenakalati hoka hali hatyakota xisaona xiyanenehitiya hatyo nalita kijiya. <sup>11</sup> Maika wenakalati xikaokehena hoka maisa waiye mokahitaha xiso, exahe naliyerenai maisa semaha aokowiyahita xiraene hoka maika nalita xiyanehitiya hoka xiberekatane xamokotyahatya xexoakiheta maheta waikohese emaxawaiyereneha xiso hiyeta — nexa ihiyeha.

<sup>12</sup> Hatyaoseta exaotyakiraharenai xaneha iraeti xakaha halitinai hiye maheta, halitinai iniyalahare hawenaneha halakisaha maheta. <sup>13</sup> Kahare axanikihenahitaha isekohaliti iniyalahare halitinai nonita, exahe kolotenitiya mohenaha hokakiterenai seri hiye hoka aiyatelikihenahitene.

**João Batista Kamane Tah**

(Mateus 14.1-12; Lucas 9.7-9)

<sup>14</sup> Tyoty hatyoharenai tahi xekohaseti Herodes sema hakakoare halitinai xakaikoatyahitere Jesus tahi hiyeta. Haiyaharenai nita: — Kala João Batista kaseheta. Hatyo hiyeta xoalini hare metaharexe nomakere tyomita — nexahitaha exaokaka.

<sup>15</sup> Haiyanai atyo: — Kala Elias — nita.

Haiyanai tehitiya: — Kala iraiti xakaisasehare terota, toahiyereharenai akerexe — nexahitaha Jesus xaokaka.

<sup>16</sup> Herodes sema hatyoharenai tahi hoka nexa: — Kala João Batista. Iseri xirikotyaka naoka hoka kalikini ala kaseheta — nexa.

<sup>17</sup> João Batista kamane nahitita Herodes niraene xema João otokaha, olatyahene, berexo ako jihotyahene Herodias xemere. Hatyo nahitita Herodes tyaonita hatyo ohiro kakoa, iximarene Filipe exanityo xakore hoka.

<sup>18</sup> Hatyo hiyeta João Batista watyali Herodes: — Awa atyo hiximarene exanityo kakoa hisaona, Xaotyakiyaho atyo mahokoanetita hiximarene exanityo kakoa hawenane.

<sup>19</sup> Hatyo hiyeta Herodias kirawaneta João, kasani aisene aokowita. Xakore hoka maisaiya aliyakere aijitene, <sup>20</sup> enenala Herodes mairitene exahe haliti waiyexe aokitene. Hatyo hiyeta Herodes waiye kaxaikotene. Semehena iniraene hoka waiyeta ihiye, xako-

re hoka maisa aliyakere ahekotya xaka mokene. Xakore hoka irahena hoka awaiyetita iniraene.

<sup>21</sup> Hoka Herodias atyo atyahita terota João kamane ferakene. Hatyaoseta xane hikoa enenala Herodes nawenane ferakene hoka hahisehare tyoma. Kalore nakairati tyoma, oloniti harenai hoka kaixakatya xekohasetinai taita, Galiléia koa tarenai, sorare xekohasenai harenai hoka tyoaha. <sup>22</sup> Hatyaoseta Herodias ityani xoimahaloti isoa hatyo nali hoka holikoahena. Herodes, ekaixakalaharenai xoaha awaiyetyaha exoholikoane hoka hatyo hiyeta xekohaseti Herodes nexa xoimahaloti hiye: — Xoare xamani haoka hiyoholikoane xaimane hoka niseniya homana — nexa. <sup>23</sup> — Exahiya kalore haoka hoka niseniya homana. Alitere naokita, maisa namaoseraita xini — nexa. <sup>24</sup> Nexa ihiye hoka hikoaheta xane hanityo axa maheta, xoare xamani haxoholikoane xaimane axa aohena hoka.

Hoka inityo nexa: — João Batista seri haxene — nexa.

<sup>25</sup> Hatyaoseta kaholawaka haikoaheta Herodes tyaonitere nali hoka axene: — Xama João Batista seri hisehena nomani balatoahetia kalikinita — nexa.

<sup>26</sup> Herodes sema hatyo hoka amaikohare. Xakore hoka koxaka tyoty haliti haoti irae hoka hatyo hiyeta maisa aliyakere matyakekotita xoimahaloti xaxane.

<sup>27</sup> Hoka axikatya rota sorare, João Batista seri kolatya maheta. Hatyaoseta sorare xane berexo ako hoka irikotya João seri. <sup>28</sup> Mokene balatoahetia hoka isene xoimahaloti ana. Hatyaoseta hatyo xoimahaloti xane isene hanityo ana.

<sup>29</sup> Hatyaoseta João Batista xaotyakiraharenai sema etahi hoka tyoa kolahenahitene hoka fityahene.

### Jesus Kahare Halitinai Tyaisa

(Mateus 14.13-21; Lucas 9.10-17; João 6.1-14)

<sup>30</sup> Hatyaoseta Jesus xaotyakiraharenai kaokeheta enomana hoka xakaihakahena Jesus hiye tyoty tyomehenereharenaiha, aotyakihenahereha harenai tahi.

<sup>31</sup> Nali kahare haliti kaokehita, xanehitita xoaha hoka Jesus, exaotyakiraharenai xoaha komita ene maisa aliyakere kanakairareha hekoti.

Hoka Jesus nehena ihiyeha: — Xisohena hoka wiyane wiwawa maharexakahare hoka inira xikawini — nexa haxaotyakiraharenai hiye.

<sup>32</sup> Hatyaoseta xaneha hawawaha kanowa ako maharexakahare. <sup>33</sup> Xakore hoka halitinai wiyaxematyane hoka otyahene hoka tyoty hatyo nalitarenai tema xaneha one kilihi hoka enahityahitaha xane kaokaha. <sup>34</sup> Hatyaoseta Jesus xane kaoka hatyo nali hoka exoahena kanowa akota hoka waiya hatyo halitinai hoka airakoanaharetyahene. Motya kalanero makaxaikotyakahare akere tyaonahitaha hoka kahare xoalini hare aotyakihenahene.

<sup>35</sup> Waikoa kamaitehena hoka Jesus xaotyakiraharenai xane irahena ekakoa. — Okoi makehena, maisa ali xoare aka. <sup>36</sup> Haxikahetehena exe halitinai hoka xanehenahitaha wenakalatinai kaharewaikatexe akiti nali

hoka xoalini hare iyaha hoka kanakairaha — nexaha Jesus hiye.

<sup>37</sup> Xakore hoka Jesus nexa: — Xisota xisehena nakairati enomanaha.

— Xoana wiyane 200-hokose olo kakoa wiyana nakairati enomanaha haokita? nexaha Jesus hiye.

<sup>38</sup> — Xoanama tohase nakairati xinali? xiyane xiyaiya — nexa.

Xane waiyaha hoka: — 5-tohase nakairati, hinama kohase xoaha taita — nexaha.

<sup>39</sup> Hatyaoseta Jesus nehena halitinai hiye: — Xisokehena hahotyali xakini ime koa — nexa.

<sup>40</sup> Hoka hatyaoseta hahotyali xakini xane tyokaha. Haiya hotyalinai 100-hare, haiya hotyalinai 50-hare xakini tyokaha. <sup>41</sup> Hatyaoseta Jesus otoka 5-tohase nakairati, hinama kohase xoaha hoka enokoa xeta wahakotya hoka iraexatya Enore hiye: — Ehekore nakairati hisa womana, Abá — nexa. Hatyaoseta irikoretene hoka isene haxaotyakiraharenai ana, hoka hatyo exaotyakiraharenai irakene halitinai ana. Kohase nikareta iraka tyoty halitinai ana. <sup>42</sup> Tyoty kanakairaha hoka fakatehareha. <sup>43</sup> Hatyaoseta awaiyehotyali-hetaha halitinai nakaira mawane hoka 12-te koho kaisero mohena hitaha nakairati, kohase xoaha mawane. <sup>44</sup> Hatyo nakairati kanakairahenerenai 5.000-hare halitinai.

### Jesus Tona One Heno

(Mateus 14.22-33; João 6.15-21)

<sup>45</sup> Hatyo najikinita Jesus haxaotyakiraharenai kakoa irai hoka kakohahenahitaha kanowako hoka xanehenahitaha enaheta maheta halakoiya Betsaida nali xeta. Hoka hatyo nase Jesus jinaheta halitinai.

<sup>46</sup> Hatyaoseta jinaheta halitinai hoka xane tyairi heno iraexatya maheta.

<sup>47</sup> One nekesexehena exaotyakiraharenai xaneta hoka makehena ihiyeha. Hoka exowaka Jesus hekota waikohekoa hawawaharenai tyaonita. <sup>48</sup> Hatyaoseta waiya haxaotyakiraharenai xaeremola howitiharene hoholati hoholasekoatyahitere hiyeta, xanehenahititere maniyata hoholatita hoka. Hatyaoseta okoi ferakoahena hoka Jesus xane hikoaheta enomanaha, tonita one heno. Okoi jiyahene hoka <sup>49</sup> hatyaoseta Jesus netonane one heno waiyaha hoka motya isekohaliti aokahitene hoka hamairaneha kawiyatyaha. <sup>50</sup> Tyoty waiyahene hoka kalore mairaha.

Hoka Jesus nexa ihiyeha: — Awa atyo ximaira! Natyo ta, awa ximaira natyo — nexa ihiyeha, <sup>51</sup> hoka xane kanowa ako kakohaheta enaliha. Hatyaoseta hoholati amematyoaheta.

Hoka exaotyakiraharenai mairaha, hakaharetyoaha. — Xonere kaisere? nexa mokahitene. <sup>52</sup> Maisa otehenahititaha halitinai tyaihenere nakairati kakoa, maisa waiye ahekohenahititaha hoka.



### Jesus Aiyatelikiheta Hokakiterenai Genesaré Nali

(Mateus 14.34-36)

<sup>53</sup> Hatyaoseta Jesus, exaotyakiraharenai harenai imahotyoha Galiléia xa. Hoka xane takoha kaiholokoa Genesaré waikoherakoa nali hoka katilikaha hakanowane hatyo nali.

<sup>54</sup> Kanowa akota exoaha taita hoka Jesus waiyekehakalahare rotita hatyo naliyerenai ana hoka <sup>55</sup> hatyaoseta tyoty wenakalati xaneha hahinaehare hokakiterenai kolatyaha enomana maheta. Hatyaoseta hokakiterenai exehokotyokalaha kakoita kolatyaha, exahe aliyo xamani Jesus xanehena hoka semehenahene hoka hatyo nali kolatyahitaha hokakiterenai enomana. <sup>56</sup> Exahe wenakalati kiranexe hare koa kaokehena hoka koxaka hokakitina mokahitaha enaheta hoka axahitene, kasani inima kilihi hiye hekoti ekaokakisaha hakaheha aokowiyahitaha. Hoka tyoty hakaheha ekaokakihenerenai inima kilihi hiye kinaterehitita.

### Jesus Irae Judeunai Nawenatyakaho Tah

(Mateus 15.1-9)

**7** Hatyaoseta haiyaharenai fariseunai, haiyanai judeunai xaotyakiraho kakoa waiyoreterenai Jerusalém nalita kaokehenerenai Jesus haliya hohisakoaha. <sup>2</sup> Hoka waiyaha Jesus xaotyakiraharenai haiyaxa kahitita kanakairehenahere. Matihahisoanehareta kanakairaha, maisa fariseunai aokitere akereta xini tyaonahitaha. Hoka maisa waiyeta ihiyeha.

<sup>3</sup> Judeunai exahe fariseunai atyo hahetako maniyereharenai xaotyakiraho xema tyaonahitaha, waiye atyo tihahisoaha hotohare hoka kanakairahitaha. <sup>4</sup> Xiyehaliti hanakota atyo iyehenaha nakairati hoka tihahene hotohare atyo hoka kanakairahitene. Haiyaharenai xaotyakisatyaho xema tehitiya tyaonahitaha hoka tihahitaha kanote, matalo, tinihaliti harenai.

<sup>5</sup> Hatyaoseta fariseunai, judeunai xaotyakiraho kakoa waiyoreterenai axehena Jesus: — Xoana hoka hiyaotyakiraharenai maisa tyaonareha wahetako maniyereharenai xaotyakiraho xema hoka matihahisoanehareta kanakairahitaha? nexaha.

<sup>6</sup> Hoka Jesus ekoaxatya enomanaha: — Maoseratyaliyenai! aliterexe nika Isaías xairatya xitahi akiti exakerexe:

Exe halitinai atyo waiye irateta notahi, nita Enore. Xakore hoka exahekolaha atyo maisa nokoamanyi xini tyaonita.

<sup>7</sup> Hoka maisa atyo tyaonahitaha nokoamanyi kaisere. Hiyaiya, halitinai xaotyakira kakoa atyo aotyakisahitaha hoka Enore xaotyakiraho aokahitaha.

<sup>8</sup> Hoka Jesus nehitiya: — Xiso atyo xahalakijita Enore xaotyakiraho hoka halitinai xaotyakiraho xema xisaonita — nexa.

<sup>9</sup> — Xiso atyo xawaiyore xahalakijita Enore xaotyakiraho. Hoka toahiyere xawenanaho xema taita xisaonita. <sup>10</sup> Hiyaiya, exakere Moisés nexa:

Waiyira xaiminihena xexe, xityo hoka.

Nexa tehitiya:

Xala xamaniya atyo hanexe, hanityo iraharetya hoka waiye xaisaka, nexa.

<sup>11</sup> — Hoka xiso atyo xita, “Xala xamaniya atyo kaoloxere hoka hanityo, hanexe kahinaetya maheta ene hoka Enore anaiya isa hatyo haoloxa hoka hatyo najikinitaiya atyo maisa aliyakere <sup>12</sup> kahinaehitita hanityo, hanexe xoaha hoka ehokoreya”, xita atyo. <sup>13</sup> Nikare atyo xisaonita hoka maisa atyo Enore xaotyakiraho xema xini xisaonita. Hoka toahiyere xawenanaho xema atyo xisaonita hoka xahetakomaniyereharenai tyaonitere akereta xisaonita. Hoka nikarehare kahare xalini hare xisomita.

### Jesus Irae Wenati Aiyalaharetitrehare Tah

(Mateus 15.10-20)

<sup>14</sup> Hatyaoseta Jesus kawihitiya halitinai hoka nehena: — Waiyira xasema xityoty exe niraetereharenai hoka waiyekehalaka xomana. <sup>15</sup> Xoalini hareya hatya haliti hiye isoa hoka hatyoia atyo maisa aiyalaharetita enawenane. Hoka xoalini hare atyo hikoahetehena hatya haliti hiyeta hoka hatyohare atyo aiyalaharetita enawenane — nexa.

<sup>16</sup> — Xala xamani atyo katanakoakore semakatya maheta hoka maika semehena niraini — nexa.

<sup>17</sup> Hatyaoseta Jesus halakisa halitinai hoka isoa hatyako. Hatyaoseta exaotyakiraharenai axene hatyo haxaimenekola kakoa xakaihakahenere tahi.

<sup>18</sup> Hoka nexa: — Xoana haiyaharenai akereta tehitiya maisa waiyekehalakita xomana? Hatyo isoahenere haliti kanasakoiya atyo maisa aiyalaharetita enawenane. <sup>19</sup> Hiyaiya, atyohenene atyo hoka maisa atyo exahekolahiyeha xini xaneta, enajako atyo xaneta. Hatyo najikinita atyo ehare hiyeta hikoahitita — nexa. Nikare Jesus irateta hoka tyoty nakairati kakanakairatyakere aoka.

<sup>20</sup> Hoka nehitiya: — Xoalini hare hikoahititrehare hatya hiyeta atyo aiyalaharetita enawenane. <sup>21</sup> Hiyaiya, mahiyaseti hiyeta atyo iniyalahare xahekotyati tyoita hoka kaomakita kaiwati, xaisati, <sup>22</sup> ohiro watyalisaka, xiyehaliti maiyasetyaka, irawaniti, maoseratyati, otokitaterehare, okoawahaliti, iraharetyati, xahenityati, mawaiye xahekotyati harenai. <sup>23</sup> Tyoty hatyoharenai atyo mahiyaseti hiyeta hikoita hoka aiyalaharetita halitinai nawenane — nexa Jesus ihiyeha.

### Hatya Ohiro Mawaiyakahalo

(Mateus 15.21-28)

<sup>24</sup> Hatyaoseta Jesus xaneheta hatyo nalita, xane wenakalatinai Tiro, Sidom xoaha nali. Xane kaoka hoka isoa hatyako. Kasani maisa xala hare ekaokene sema aokare xakore hoka maisaiya aliyakere masemakita.

<sup>25</sup> Hatya ohiro ityani isekohaliti iniyalahare ehatyahalokijita hoka sema Jesus kaokene tahi hoka tyoa enomana hoka enahalakoa hakaolise kakoa meholokoa. <sup>26</sup> Hatyo ohiro atyo hakoakityolo, sirofenicia yolo atyo. Hoka axene, kasani isekohaliti iniyalahare axikaheta ityani nonitata aoka ihiyeha.

<sup>27</sup> Hoka Jesus nexa ihiye: — Kotare xoimanai hoto-hare kanakaira. Hiyaiya, maisaiya atyo ehokoreta xini xoimanai nonitata kaiyakeheta nakairati hoka haxawatene kajolonai ana hoka — nexa ihiye.

<sup>28</sup> — Alitere haokita, Xekohaseti — nexa hatyo ohiro. — Hoka kajolonai atyo kanakairita xoimanai nakaira holoxo exoahena mexakoata hoka — nexa ihiye.

<sup>29</sup> — Hekoaxahenere nomani hiyeta hiyanehetehena hihana nali. Koxaka hityani nonitata isekohaliti iniyalahare kikisoaheta — nexa Jesus ihiye.

<sup>30</sup> Hatyaoseta hatyo ohiro xane kaokheheta hahana nali hoka waiyehena atyo, ityani atyo ehokotyaita haxehokotyookala koa. Koxaka atyo isekohaliti iniyalahare kikisoaheta enonitata.

### Jesus Airainikiheta Matanakoakohare Mairaenehare

<sup>31</sup> Hatyaoseta Jesus xaneheta wenakalati Tirota hoka jiyeheta Sidom, Decapolis xoaha nali hoka xane kaokheheta Galilía xa nali.

<sup>32</sup> Hatyaoseta haiyaharenai kolatya hatya haliti mase-makalahare exahe komita ene maisa iraxe. Hoka axaha Jesus, ekaokakisa hakahe ihiye maheta.

<sup>33</sup> Hatyaoseta Jesus nolokene haware halitinai nonita. Hoka hakahihi etanakoako moka. Hatyo najikinita xatahotya hoka ininise hiye xolotene. <sup>34</sup> Hatyaoseta wahakotya enokoa, kalore iyawinisoa hoka nehena: — Efatá! nexa. Exakere atyo nita: “Hamajiholatyoahetehena!” nita atyo.

<sup>35</sup> Hatyaoseta hatyo haliti masemakalahare tanakoako waiyeheta. Exahe ininise tehitiya waiyeheta hoka waiye iraheta.

<sup>36</sup> Hatyaoseta Jesus mahokoanetya exakainiha hatyoharenai. Nikare irahena ihiyeha hoka exahehare xane xakaikoatyahitaha hatyoharenai tahi.

<sup>37</sup> Hoka haiyaharenai semehena hatyoharenai tahi hoka hakaharetyoahitaha hoka nexahitaha: — Kaxiyani, waiye kaiserehare tyomita! Hiyaiya, mase-makalaharenai asemakihitita, mairaeneharenai hoka airainikihitita — nexahita.

### Jesus Tyaisa 4.000-hare Halitinai

(Mateus 15.32-39)

**8** Hatyaoseta haxowakiya hohisakoa halitinai Jesus tyaonitere nali. Hatyaoseta maisa xoare kanakaireheta xaka hoka Jesus kawisa haxaotyakiraharenai hoka nexa: <sup>2</sup> — Nairakoanearhitita exe halitinai. Hiyaiya, hanamaki ferakenehena tyaonahitaha nohaliye hoka kalikini maisa xoare kanakairareha.

<sup>3</sup> Naxikahenahiteniya matyaisakaharahitaha enawenakalanaiha xeta hoka exoahaiya ahotyaho hanakaha hiyeta. Hiyaiya, haiyaharenai atyo sekota tyoita — nexa.

<sup>4</sup> Hatyaoseta exaotyakiraharenai axahene: — Hoka aliyakereya exe maharexakahareta wikaokehena nakairati hoka watyaihena exe halitinai haoka? nexaha ihiye.

<sup>5</sup> — Xoanama tohase nakairati xinali? nexa axahene. — 7-tohase — nexaha.

<sup>6</sup> Hatyaoseta Jesus halitinai kakoa irae waikoa tyokaha maheta. Hatyaoseta iya hatyo 7-tohase nakairati hoka iraexatya Enore hiye: — Ehokore nakairati hisa womana, Abá — nexa. Hatyaoseta taikasetene hoka haxaotyakiraharenai ana isene hoka irakene halitinai ana. <sup>7</sup> Haiyaharenai kohase tehitiya enaliha hoka Jesus iraexatya Enore hiye: — Ehokore nakairati hisa womana, Abá — nexa hoka hatyaoseta wakatya haxaotyakiraharenai hoka irakene halitinai ana.

<sup>8</sup> Tyotyaha kanakairaha, fakatehareha. Hatyaoseta kaise exaotyakiraharenai enakairaha mawaneha 7-te kohokiji kaisehenahitaha. <sup>9</sup> Hatyo kanakairehenerenai atyo 4.000-hare haliti. Hatyaoseta Jesus axikaheta hatyo halitinai.

<sup>10</sup> Hatyaoseta kanowa ako xaneheta haxaotyakiraharenai kakoa Dalmanuta koa maniya.

### Fariseunai Axaha Waiyexe Mawaiyakahare Nomaka

(Mateus 12.38-42; 16.1-4)

<sup>11</sup> Xane kaoka taita hatyo nali hoka fariseunai kaoka enomana hoka irahenaha ekakoa, hasakaharetyahene aokowiyahitaha hoka xoalini hare nomaka aokaha ihiye hoka waiyaha maheta, xoana aliterexe xamani Enore nalita tyoita iniyatere, maisa xamani.

<sup>12</sup> Hatyaoseta kalore iyawinisoa hoka nehena: — Xoare mahetala xoalini hare nomaka aokita exe halitinai tyakekoha maheta? Aliterexe nomita xihiyeye, maisaiya xoare hare notyomita exe halitinai ana tyakekoha maheta — nexa.

### Fariseunai, Herodes Xoaha Kaoretyakala

(Mateus 16.5-12)

<sup>13</sup> Hatyaoseta Jesus xaneheta. Kanowa ako kakohaheta hoka haikoaheta one halakoiya maniya.

<sup>14</sup> Xanehenaha hoka exaotyakiraharenai maotyaneha nakairati hakolalaha hoka hatita taita kolatyaha kanowa ako.

<sup>15</sup> Hatyaoseta Jesus irahena ekakoaha hoka nehena: — Xasemehena, xirihalira fariseunai, Herodes xoaha kaoretyakala kakoa — nexa.

<sup>16</sup> Hatyaoseta hatyo kakoaha irae kakoahenaha hoka nehena: — Exakere irae kala maisa nakairati wokolatita hoka — nexaha.

<sup>17</sup> Hoka Jesus sema iniraekakoaneha hoka axehenahene: — Xoana hoka ximakolalaharene nakairati tahi xiraekakoita? Xoana maisa xawaiyorexe, exahe maisa waiyekehalakere niraini xomana? Xoana hoka ximawaiye xahekolere hoka maisa waiyekehalakere exeharenai xomana? <sup>18</sup> Xoana hoka xixaxosexo xakore hoka maisa xiyaiyare? Xikatanakoakore xakore hoka maisa xasemare? <sup>19</sup> Xoana, maisa xotyare 5-tohase nakairati nirahenere 5.000-hare halitinai ana? Xoanamate koho kaisero exowaka emawane ximexeheta? nexa Jesus axahene.

— 12-te kaisero — nexaha.

<sup>20</sup> Hatyaoseta Jesus axehenahitiyene: — Hoka 7-tohase nakairati nirahenere 4.000-hare halitinai ana xowaka, xoanamate koho kaisero ximexeheta?

— 7-te kaisero wimexeheta — nexaha ihiye.

<sup>21</sup> — Xoana, hekota maisa waiyekehalakere niraini xomana? nexa Jesus.

### Jesus Kaxoseheta Betsaida Yere

<sup>22</sup> Hatyaoseta Jesus xane kaoka wenakalati Betsaida nali haxaotyakiraharenai kakoa. Hatyaoseta haiyaharenai kolatyaha hatya maxosehare hoka Jesus axaha, hakahe ekaokakisa ihiye maheta. <sup>23</sup> Hoka Jesus ekahe hiyeta otoka maxosehare hoka xane ekakoa sekose aka wenakalati nonitata. Hatyaoseta haxataho xolotyaxose hiye hoka hakahe ekaokakisa ihiye hoka axene: — Xoana, xalini hare hiyaiyita? nexa.

<sup>24</sup> — Nowaiyita halitinai, xakore hoka motya atya kate tonita ene — nexa.

<sup>25</sup> Hatyaoseta Jesus hakahe ekaokakihitiya exose hiye. Hatyaoseta maxosehare waiye waiyakaheta. Waiyeheta hoka tyotyaxalini hare waiye waiyeheta.

<sup>26</sup> Hatyaoseta Jesus axikaheta hatyo haliti ehana xeta. Hoka halitinai koni emaxaneneheta aoka.

### Pedro Niraene Jesus Kakoa

(Mateus 16.13-20; Lucas 9.18-21)

<sup>27</sup> Hatyaoseta Jesus haxaotyakiraharenai kakoa xane wenakalatinai Cesaría de Filipe koa maniya. Xanahitaha hoka ahotyaho haxaotyakiraharenai axa: — Xala aokita natyo halitinai? nexa.

<sup>28</sup> Hoka exaotyakiraharenai nexa: — Haiyaharenai atyo João Batista aokahitaha hiso, haiyaharenai atyo Elias aokahitaha hiso, haiyaharenai atyo iraeti xakaisasehare aokahitaha hiso — nexaha.

<sup>29</sup> — Hoka xiso atyo xala xaokita natyo? nexa ihiyeha. — Hiso atyo Enore Kalorexe Aohenere — nexa Pedro Jesus hiye.

<sup>30</sup> Hoka Jesus hatyohare maxakaisakene aoka ihiyeha.

### Jesus Irae Hakamane, Hakaseneheta Tah

(Mateus 16.21-28; Lucas 9.22-27)

<sup>31</sup> Hatyaoseta Jesus aotyakihena haxaotyakiraharenai hoka nehena: — Haliti Ityanite kaxemawatikisaka kalore. Maisaite aokahitene haomanaha judeunai xekohaseharenai, sacerdote xekohaseharenai, judeunai xaotyakiraho kakoa waiyoreterenai harenai. Hoka kaxaisakaite hoka hanamaki ferakene najikinitaite kaseheta — nexa ihiyeha. <sup>32</sup> Jesus waiyekehalaka iraeta ekakoaha.

Xakore hoka Pedro nolokene haware hoka matyakekotya iniraene. — Awa atyo nikare hirae — nexa ihiye.

<sup>33</sup> Hatyaoseta Jesus ehaikoaheta hoka wahakotya haxaotyakiraharenai ana hoka Pedro niraene tehitiya matyakekotya hoka nehena: — Hakikisoahetehena nahiti maniyata, Ahalakoahali! Halitinai ahekoitere akereta atyo hahekoita, maisa atyo Enore ahekoitere akereta xini — nexa.

<sup>34</sup> Hatyaoseta Jesus kawisa halitinai exahe haxaotyakiraharenai xoaha hoka iraeheha ekakoaha: — Xala xamani atyo tyaona nokoamaniye aokowihena hoka maika hatyota maotyanoawi hoka maika kolatyahaberekotyaka niyahare atyalihose xaimaholatyaka hoka tyaona noximi. <sup>35</sup> Xala xamani atyoite tawita hawenane waiyexe hoka maisaite kaokitene. Hoka xala xamani atyoite nohiyeti exahe Iraeti Waiyexe hiyeta kaxaisaka hoka hatyo atyoite kaoka wenati waiyexe.

<sup>36</sup> — Xoare mahetaiya hatya haliti hakakoare waikohekoa ziyehaliti harenai kakoa tyaona hoka hatyaoseta waini? <sup>37</sup> Maisaiya xoare hare bakatya hoka ekasekihititene. <sup>38</sup> Hiyaiya, xala xamani atyoite haiharetanaty, niraeni xoaha kakoa kalikini xowaka exematyakekoneharenai, mawaiyexehareharenai haoti hoka haxowakiyaite Haliti Ityani tyohetehena Hanexe werokene kakoa, anjonai waiyexeharexenai kakoa hoka haihare tehitiyaite ekakoa — nexa Jesus ihiyeha.

**9** Hatyaoseta Jesus nehitiya ihiyeha: — Exe harira xotyaxaiyaharenai ali tyaoniterenaite maisa hamawaiyanehareta wainita Enore nalitare kaokenehene haiyatere kakoa nahitita — nexa Jesus.

### Moisés, Elias Xoaha Kaotyaka Jesus Ana

(Mateus 17.1-13; Lucas 9.28-36)

<sup>2</sup> Hatyaoseta 6-ki ferakene najikinita Jesus noloka Pedro, Tiago, João xoaha hoka hatyonai kakoa taita xane tyairi enoakiyere heno xeta. Hoka hatyo nali hawareharexe tyaona ehaotyahitaha. <sup>3</sup> Inima iyomate, werokate tyaona. Maisaiya hatya tihatiro hekoti nikare niyomene tihita. <sup>4</sup> Hatyaoseta Moisés, Elias kaotyaka hoka hatyo hanamahare Jesus xaotyakiraharenai waiyaha iniraeneha Jesus kakoa.

<sup>5</sup> Hatyaoseta Pedro nehena: — Xaotyakisatiye, waiye nawenatyaka ali. Nika wisoma hanamalise hatirisenai: hatya homanere, hatya Moisés anere, hatya Elias anere xoaha — nexa, <sup>6</sup> maisa waiyore iraexe. Exahe tyotyaxaotyakiraharenai mairaha.

<sup>7</sup> Hatyaoseta kaiminiti exoa hoka exahiyatene hoka hatyo konita iraiti semaha hoka nehena: — Exe atyo nityani noxiyakawali, xasemaxematyaira iniraene — nexa.

<sup>8</sup> Hatyaoseta waiyasekoatyaha xakore hoka Jesus taita waiyehenahitaha hahaliyaha.

<sup>9</sup> Hatyo hekota tyairi henota exoahenahitehenaha hoka Jesus hatyohare waiyehenerehareha maxakaisakene aoka ihiyeha Haliti Ityani kasehetehenere kijiya.

<sup>10</sup> Hoka tyakekoha iniraene, xakore hoka hatyo kakoaha iraeakoahitaha kasehetehenere nehenere tahi akiti.

<sup>11</sup> Hatyaoseta axaha Jesus: — Xoana hoka judeunai xaotyakiyaho kakoa waiyoretereharenai Elias hotohare ite tyoheta aokaha? nexaha.

<sup>12</sup> Hoka Jesus nexa: — Aliterexe ite Elias hotohare tyoheta hoka tyotyaxaotyakiraharenai hare. Hoka xoaneretya hoka Iraeti Waiyexe kaxairatyakehenere,

Haliti Ityanite kaxemakawatikisaka, exahe maisa ite kaxaiminisakita, nita? nexa Jesus. <sup>13</sup> — Xakore hoka noxakainite xihye: Elias atyo koxaka tyoheta hoka maisa waiye mokahitene. Aokahitere akereta moka-hene iraiti kaxairatyakehenere etahi akiti akereta — nexa ihiyeha.

### Jesus Mahatyahareheta Xoimalaliti

(Mateus 17.14-21; Lucas 9.37-43)

<sup>14</sup> Hatyaoseta hikoahenahitehenaha haiyaharenai Jesus xaotyakiraharenai ana hoka waiyaha kahare haliti ehokoha haliya. Haiyaharenai xaotyakiyaho kakoa waiyoreterenai kinatyaxa irieta ekakoaha. <sup>15</sup> Hatyaoseta halitinai waiyaha Jesus kaokene eharehena rota hoka tema xaneha enomana, katyawaxaha ihye maheta.

<sup>16</sup> Hatyaoseta Jesus axehena hatyo xaotyakiyaho kakoa waiyoreterenai: — Xoare tahi kinatyaxa xirae kakoita? nexa.

<sup>17</sup> Hatyaoseta hatya haliti halitinai konitare nehena: — Xaotyakisatiye, nakolatya nityani homana hiyaiyene maheta. Isekohaliti iniyalahare kakoare hoka maisa iraexe. <sup>18</sup> Haiya xowaka mawaiye nisekohaliti ehatyahalikihenene hoka exoa waikoa hoka kilinakota ekanase, kinatya tyalokakoaita hoka kinatyakase tyaonita. Koxaka hiyaotyakiraharenai hiye nirae axanikihenahitaha mawaiye nisekohaliti enonitata maheta. Xakore hoka maisa aliyakere axanikihenahititene enonitata — nexa.

<sup>19</sup> Hatyaoseta Jesus nexa: — Haliti matyakekoneharenai! Otene kijiyaita notyaona xinekoni? Otene kijiyaita naiyasetyaoa xikakoa? Xisohena ali xoimalaliti kakoa — nexa.

<sup>20</sup> Hatyaoseta xoimalaliti kolatyaha Jesus ana. Hoka exehatyahalikisase waiya Jesus hoka xoimalaliti etatakoakisa hoka waikoa exoakisene hoka tekehirisokoatya hoka kilinako ekanase tyaona.

<sup>21</sup> Hatyaoseta Jesus axa enexe: — Xoana hekota exakere hityani tyaona?

Hoka enexe nexa: — Haxoimeneta exakere tyaona.

<sup>22</sup> Kahaliki irikatyaose, onexa harenai axexoatyanikijitene aisene maheta. Hoka hawaiyore atyo hoka hakahinaehena wiso. Hairakoaneharehenaira wiso!

<sup>23</sup> — Xityakekotaiya atyo hoka. Xala xamani atyo tyakekota hoka kaomakaiya atyo enomana — nexa Jesus.

<sup>24</sup> — Notyakekota atyo! Hoka hakahinaehena natyo hoka exaehare notyakeko! nexa enexe kawiyatya, tiya xoaha.

<sup>25</sup> Hatyaoseta Jesus atyo waiyehena, kaharehena atyo halitinai ehaliya makere hohisakoita hoka exehatyahalikisase hiye nexa: — Isekohaliti masemakalahare, mairaenehare, hahikoahetehena exe xoimalaliti nonitata hoka waiyehenaira ehokota hehatyahalikihititene — nexa.

<sup>26</sup> Hatyaoseta isekohaliti kawiyatya hoka atekehirisokisa xoimalaliti hoka kikisoaheta enonita hoka motya ekamane mokene. Hatyo hiyeta haiyaharenai motyala waini aokahitaha.

<sup>27</sup> Hoka Jesus otoheta xoimalaliti kahe hiye hoka ati-tyoakihetene hoka tityoaheta.

<sup>28</sup> Hatyaoseta Jesus xane isoaheta hatyako hoka exaotyakiraharenai hawawaharenaiha heko axahene: — Xoanere ala hoka maisa aliyakere waxanikihitita etake isekohaliti? nexaha.

<sup>29</sup> — Hatyohare isekohaliti atyo iraexatyati exahe manakairiti xoaha xema taita kaxaxanikisakihitita — nexa Jesus ihiyeha.

### Jesus Iraehitiya Hakamane, Hakaseneheta Tah

(Mateus 17.22-23; Lucas 9.43-45)

<sup>30</sup> Hatyaoseta Jesus xanehitiya hatyo nalita haxaotyakiraharenai kakoa hoka Galiléia koa nali jiyaha. Jesus kasani maisa xala hare ana waiyekehalaka tyaonitere akiti aokare, hawawahare heko irae aokowita haxaotyakiraharenai kakoa hoka.

<sup>31</sup> Jesus aotyakijita haxaotyakiraharenai hoka nita ihiyeha: — Haliti Ityanite kaxékaka halitinai ana hoka aisahene ite. Xakore hoka hanamaki ferakene najikinitaite kaseheta — nexa.

<sup>32</sup> Nexa ihiyeha hoka maisa waiyekehalakere Jesus niraene enomanaha. Hoka haiharahitene hoka maisa axarahene hekoti.

### Xala Xamani Masakare Kalorexe Hoka

(Mateus 18.1-5; Lucas 9.46-48)

<sup>33</sup> Hatyaoseta Jesus haxaotyakiraharenai kakoa kaoketheta wenakalati Cafarnaum nali. Hoka hatyako isoahenahitaha hoka Jesus axehena haxaotyakiraharenai: — Xoare tahi ahoti kinatyaxa xirae kakoita? nexa, axahene.

<sup>34</sup> Hoka mema tyaonaha enomana, ahotyaho hakalorexeneha tahi irae kakoahitere hiyeta.

<sup>35</sup> Hatyaoseta Jesus tyoka hoka kawisa haxaotyakiraharenai hoka nexa ihiyeha: — Xala xamani atyoite kalorexe tyaona aokowita hoka maika tyotyala halitinai wakanehare, ekahinaetyasehare tyaona — nexa ihiyeha.

<sup>36</sup> Hatyaoseta Jesus iya xoima hoka enenekeseneha mokene. Hoka hakano talako mokene hoka irae hena haxaotyakiraharenai kakoa: <sup>37</sup> — Xala xamani atyoite nohiyeti hatya xoima waiye moka hoka natyo atyo waiye mokita. Hoka xala xamani atyoite waiye mokita natyo hoka maisa atyoite natyo taita xini waiye mokita, noxaxikatyasehare tehitiya atyoite waiye mokita — nexa ihiyeha.

### Xala Xamani Atyo Maisa Ahowitikisare Hoka Kahinaeti-ta Atyo

(Lucas 9.49-50)

<sup>38</sup> Hatyaoseta João nehena: — Xaotyakisatiye, wiyaiya hatya haliti xaxanikireheta isekohaliti iniyalahare halitinai nonitata hexare kakoa hoka wamahokoanetya nikare enómane. Maisa winekonitare xini hoka — nexa.

<sup>39</sup> Hoka Jesus nexa: — Awa atyo xamahokoanetene. Hiyaiya, maisaiya xala hare metaharexe maomakahare

waiyexe tyomita nexare kakoa hoka hatyo najikinita iniyalahare iraehitita notahi. <sup>40</sup> Hiyaiya, xala xamani atyo maisa kahalakoaharexe wikakoa hoka hatyo atyo wikahinaetyasehare — nexa Jesus.

<sup>41</sup> — Xotyaxematyaira exehare: xala xamani atyoite hákobone one isa xomana, Cristo koamaniya xawenane hiyeta hoka hatyo ana atyoite xalini hare waiyexe kaxekaka — nexa.

### Iniyalahare Nomaka Henehare

(Mateus 18.6-9; Lucas 17.1-2)

<sup>42</sup> — Hoka exehare xoima mokosenai tyakekotereharenai natyoiya atyo hatya iniyalahare aomanekisa hoka halakihenahitaha hawenaneha nokoamaniye hoka ehokoretaiya atyo kaxawatyaka one kaloxere xaiya sehali kaloliro kaxolatyaka ihino hiye hoka maisa ahowitzikisa xoimanae nawenane maheta — nexa.

<sup>43</sup> — Maika hikaha iniyalahare axomokanikijita hiso hoka maika hirikotene! Hiyaiya, waiye kaiserehareya atyo hamaniya kahe kakoa taita hiyane wenati matyotenehare nali. Hoka maisaiya atyo waiyeta hinama kahe kakoa hikaxawatyaka irikati mawakenehare nali hoka. <sup>44</sup> Hiyaiya, hatyo nali atyo xeteti, irikati harenai hoka maisa tyotere. <sup>45</sup> Maika hikiji iniyalahare axomokanikijita hiso hoka hirikotene. Hiyaiya, waiye kaiserehareya atyo hamaniya kiji kakoa taita hiyane wenati matyotenehare nali. Hoka maisaiya atyo waiyeta hinama kiji kakoita hikaxawatyaka irikati mawakenehare nali hoka. <sup>46</sup> Hiyaiya, hatyo nali atyo xeteti, irikati harenai hoka maisa tyotere. <sup>47</sup> Maika hiyose iniyalahare aomanekijita hiso hoka maika holokoty hiyene. Hiyaiya, waiye kaiserehareya atyo hamaniya xose kakoa taita hiyane Enore tyaonitere nali. Hoka maisaiya atyo waiyeta hinama xose kakoita hikaxawatyaka irikati mawakenehare nali hoka. <sup>48</sup> Hiyaiya, hatyo nali atyo xeteti, irikati harenai hoka maisa tyotere.

<sup>49</sup> — Hiyaiya, hatya xakini atyoite kasalotyakehena irikati kakoa. <sup>50</sup> Salo atyo waiye. Hoka ekexeniya atyo tyotehena hoka maisa atyo saloheta xini. Maika xiri-hare xisaohena hoka waiyira xamoka kakoahena haiyanai kakoa — nexa ihiyeha.

### Jesus Irae Halakisakakoati Tah

(Mateus 5.31-32; 19.1-12; Lucas 16.18)

**10** Hatyaoseta Jesus xaneheta hatyo nalita hoka xane Judéia koa xeta hoka imahotyua one Jordão xa. Hoka kahare haliti hohisakoahitiya ehaliya hoka aotyakihenahitiyene, aotyakijitere akereta.

<sup>2</sup> Hatyaoseta haiyanai fariseunai hasakaharetene aokowihenaha hoka axahene: — Wiyaoatyakisakaha hiyetaiwa waiyeheniya hatya haliti haiyanityo halakiheta? nexaha.

<sup>3</sup> Hoka Jesus haxaxane kakoa ekoaxatya enomanaha: — Xoare nexa tya Moisés aotyakisa xiso? nexa.

<sup>4</sup> Hoka nexaha: — Hatyaiya atyo halakihetehena haiyanityo hoka halakisakakoati baberaxa iseheta enomana hoka axikahetene, aoka Moisés — nexaha.

<sup>5</sup> Hoka Jesus nexa: — Nikare Moisés aotyakisa xiso, maisa xawaiye xahekolere hoka. <sup>6</sup> Xakore hoka hetati xowaka tyotyua xalini hare kaomakehenere xowaka atyo exakere kaxairatyaka:

Enore tyoma ena, ohiro xoaha.

<sup>7</sup> Hatyo hiyeta hatya ena ite kaiyanityohena hoka halakisa hanexe, hanityo xoaha hoka haiyanityo kakoa haxawalita tyaona.

<sup>8</sup> Hoka hatyo hinamanaite haterore tyaohenahitaha. Nikare ite hoka maisa atyoite hinamehenahitaha xini hoka haterore henahitaha atyoite. <sup>9</sup> Hatyo hiyeta maisaiya hatya haliti hatyonai exaorehitita Enore hatyalita mohenerehare — nexa.

<sup>10</sup> Hatyaoseta xane isoahenahitaha hatyako hoka exaotyakiraharenai axene hatyo wenakakoati tahi.

<sup>11</sup> Hoka Jesus nexa ihiyeha: — Enaiya halakiheta haiyanityo hoka hatya ohiro kakoa tyaohitiya hoka iniyalahare atyo tyomita haiyanityo xahita. <sup>12</sup> Exahe hatya ohiroiya haiyanene halakiheta hoka hatya ena kakoa tyaoheta hoka iniyalahare tehitiya atyo tyomita — nexa ihiyeha.

### Jesus Waiyexe Wenati Aoka Xoimanai Ana

(Mateus 19.13-15; Lucas 18.15-17)

<sup>13</sup> Hatyo najikinita haiyaharenai kolatyaha xoimamokosenai Jesus ana, ekaokakisa hakahe ihiyeha hoka waiyexe wenati aoka enomanaha maheta. Xakore hoka exaotyakiraharenai mahokoanetyahene.

<sup>14</sup> Hoka Jesus waiya nikare enawenaneha hoka maisa waiyeta ihiyeha hoka nexa: — Kotare xoimanai tyoa nomani, awa atyo xamahokoanetyahene. Hiyaiya, Xeko-haseti Enore naliye waikohekoa atyo exe xoimairanai akereta tyaoniterenai anere — nexa. <sup>15</sup> — Aliterexe nomita xihye: xala xamani atyoite maisa exe xoimanai akereta Enore niraene tyakekota hoka maisaiya aliyakere tyaonahitaha exema — nexa.

<sup>16</sup> Hatyaoseta Jesus xakoloharetya xoimanai hoka eseriha hiye hakahe ekaokakisa hoka wenati waiyexe aoka enomanaha.

### Hatya Haliti Kaoloxere Tah

(Mateus 19.16-30; Lucas 18.18-30; 1 Timóteo 6.6-10; Tiago 1.9-11; 2.5-7; 5.1-3)

<sup>17</sup> Hatyaoseta Jesus xanehitiya ene hoka hatya haliti tema tyoa hoka hakaolise kakoa exoa enahalakoa hoka axehenene: — Waiyexe Xaotyakisatiye, xoareya notyoma hoka kaxekaka nomani wenati waiyexe matyotenehare? nexa axene.

<sup>18</sup> Hoka Jesus nexa: — Xoana hoka waiyexe haoka natyo? Enore taita atyo waiyexe, maisa atyo hatehitiya aka — nexa. <sup>19</sup> — Maisa hoka koxaka hiyaiya exe xaotyakiyahonai: “Awa atyo haisa, awa atyo iniyalahare hisoma ohiro kakoa, awa atyo hikaiwa, awa atyo hamaoseratya, haiminisa hexe, hityo xoaha” nitere — nexa ihiyeha.

<sup>20</sup> — Xaotyakisatiye, noxoiminita atyo hatyo xaotyakiyahonai xema notyaonita — nexa hatyo xoimahaliti.

<sup>21</sup> Nexa hoka Jesus wahakotya enomana hoka awaiyetene hoka nexa: — Exe taitehena himaomanehare: hiyane tyotya habetehena hixiyeharenai hoka maoloxaharenai ana olo hisehena. Nikare ite hisaona hoka hikaoloxahare, hikaxiyeharexe hisaona enokoa nali. Hatyaosetaite hisoheta hoka hisoa noximi — nexa Jesus ihiye.

<sup>22</sup> Hatyohare hatyo haliti sema hoka kalore amaikohare hoka xaneheta, kahare kaxiyeharexe hoka.

<sup>23</sup> Hatyaoseta Jesus wahakotya haxaotyakiraharenai ana hoka nehena: — Kaxiyani, howitihare atyo kaxiyeharexenai nawenane Enore koamaniya — nexa.

<sup>24</sup> Exaotyakiraharenai sema iniraene hoka hakaharetyoaha. Xakore hoka Jesus nehitiya ihiyeha: — Nohinaeharenai, howitihare atyo kaoloxerenai nawenane Enore koamaniya. <sup>25</sup> Hiyaiya, howitihare atyo kaoloxere nawenane Enore koamaniya, kamelo howitihare kaxajiyakisakitere awiyahi nakoako sahehare howitini atyo.

<sup>26</sup> Exaotyakiraharenai hakaharetyoaha, semaha hatyoharenai hoka hatyo kakoaha nexa kakoaha: — Nikareya hoka xalaiya kaiyakehetehena? nexaha.

<sup>27</sup> Hatyaoseta Jesus wahakotya enomanaha hoka nexa: — Halitinai ana atyo hatyoharenai howitihare, xakore hoka maisa atyo Enore ana xini howitihareta. Hiyaiya, Enore ana atyo maisa xoare hare howitiharexe — nexa.

<sup>28</sup> Hatyaoseta Pedro nehena Jesus hiye: — Hiyaiyehena, wisotya tyotya wahalakharetyoa hoka hikoamaniya wisaona — nexa.

<sup>29</sup> Hoka Jesus nexa: — Aliterexe nomita xihye, xala xamani atyoite halakisa hahana, haximarenenai, hahalalonai, hanityo, hanexe, haisaninai, hawaikohera harenai, nohiyeti exahe Iraitu Waiyexe xoaha hiyeta hoka <sup>30</sup> kaxekakehitiyaite enomana. Kahalikite kaxekakehitiya enomana, ehananai, iximarenenai, enahahaloni, inityonai, enexenai, ityaninai, ewaikoheranai. Xakore hoka haiyaharenaite kirawanehenahene. Hoka haxowakehena atyoite hoka wenati waiyexe matyotenehare kaxekaka enomana — nexa.

<sup>31</sup> — Kahare kalikini kalorexe tyaoniterenai atyoite hatyo xowakiya wakahare tyaohenahitaha. Nikare ite kalikini kahare wakahare tyaoniterenaite exowakehena hoka kalorexe ite tyaonaha — nexa Jesus ihiye.

### Jesus Iraehitiya Hakamane, Hakaseneheta Tahu

(Mateus 20.17-19; Lucas 18.31-34)

<sup>32</sup> Hatyaoseta Jesus, exaotyakiraharenai harenai xanahitaha Jerusalém xeta. Enahetaha tonita hoka exaoyakiraharenai enajikinita tonahitaha. Hoka hakaharetyoa mokahene, exahe haiyaharenai enajikinita xaneterenai mairahitaha.

Hatyaoseta Jesus haware xane haxaotyakiraharenai kakoa hoka xakai ihiyeha haxaisaka tahi hoka nehena:

<sup>33</sup> — Xasemehena, wiyaneta atyo Jerusalém xeta.

Nalite Haliti Ityani kamatawatyakehena sacerdotenai xekohaseharenai ana, xaotyakisatyaho kakoa waiyoretere harenai ana xoaha. Hoka exaisakaite aokaha hoka hahotyalihare halitinai anaite halakisahene aisa-

hene maheta. <sup>34</sup> Hoka hatyonaite koexahalisene, xataholisene, mokotyahene ite, exahe aisahene ite. Xakore hoka hanamaki ferakene najikinitaite kaseheta — nexa Jesus haxaotyakiraharenai ihiye.

### Tiago, João Xoaha Axaha Jesus

(Mateus 20.20-28)

<sup>35</sup> Hatyo najikinita Zebedeu ityaninai, Tiago, João xoaha, xaneha Jesus haliya hoka nexaha: — Xekohaseti, hasemehena, waxiterehare hisehena womana — nexaha.

<sup>36</sup> — Xoare nisa xomana xaokita? nexa Jesus axahene.

<sup>37</sup> Hoka nexaha: — Kasani kalorexe hisaohenere xowakaite, hiyane hisokehenere hokahakala waiyexeheno xowakaite, wisoka hihaliya waokowita. Hatya hifihini maniya, hatya hiwatone maniya xoaha waokita — nexaha axahene.

<sup>38</sup> Hoka Jesus nexa: — Maisa atyo xawaiyorexe xaxitereharenai kakoa. Xoana waiyehenaiya xisera erakakalati akore noterehenere, exahe waiyehenaiya xikabatixatyaka nokabatixatyakihenere akereta? nexa ihiyeha (hakamane xaokaka nikareta Jesus).

<sup>39</sup> Hoka nexaha: — Há, waiyehenaiya — nexaha.

Hoka Jesus nexa: — Aliterexe nomita xihye: xiseraite erakakalati akore noterehenere hiyeta, exahe xikabatixatyakaite nokabatixatyakihenere akereta — nexa.

<sup>40</sup> — Hoka xisoka xaokowitere nofihini maniya, nowatoni maniya xoaha xaokowitere atyo maisa nomaniyexini. Enore atyo hatyoharenai memere moka, isá aokowiheneraharenai anere — nexa.

<sup>41</sup> Hatyohare 10-hare exaotyakiraharenai semaha hoka ehareha Tiago, João xoaha hiye.

<sup>42</sup> Hatyo hiyeta Jesus tyotya kawisahene hahaliya makere, hoka nehena: — Xiyaiya, xekohasetinai atyo wakatita halitinai, exahe kalorexenai atyo wakatyahitene. Exe harenai atyo waiyekehalakita xomana. <sup>43</sup> Hoka maisaiya atyo nikare xisaonita. Xala xamani atyoite xinekonitare kalorexe tyaona aokowita hoka maika hahena hahinaeharenai ana. <sup>44</sup> Maika xala xamani atyo kalorexe tyaona aokowita hoka hatyo atyoite tyotya halitinai wakanehare tyaona — nexa.

<sup>45</sup> — Hiyaiya, Haliti Ityani kakoita atyo tyoa hoka maisa atyo kahakaka enomana maheta xini. Haka maheta atyo tyoa, exahe waini hoka kahare halitinai iyeheta maheta — nexa ihiyeha.

### Jesus Kaxoseheta Bartimeu

(Mateus 20.29-34; Lucas 18.35-43)

<sup>46</sup> Hatyaoseta Jesus xane kaoka haxaotyakiraharenai kakoa wenakalati Jericó nali. Hatyaoseta xanehitiya hatyo wenakalaita haxaotyakiraharenai kakoa, exahe kahare halitinai xoaha kakoa. Hoka waiya hatya maxosehare Bartimeu nexarexe, Timeu ityani. Hatyo atyo maxosehare. Ahoti kilihitokita hoka olo axita homanana.

<sup>47</sup> Hoka sema Jesus Nazaré yere jiyanehena hoka kawiyatya: — Jesus, Davi jikolahare, hairakoaneharehena natyo! nexa.

<sup>48</sup> Hatyaoseta haiyaharenai mahokoanetya iniraene, mema xoaha tyaona aokaha, xakore hoka exahehare kawiyahitiya: — Davi jikolahare, hairakoaneharehena natyo! nexa.

<sup>49</sup> Hatyaoseta Jesus tityoa hoka nexa: — Xakawihena maxosehare ali — nexa.

Hatyaoseta kawihenahene hoka nexaha: — Hihalaharehenaira! Hatityoahetehena. Hiyaiya, kawijita atyo hiso — nexaha.

<sup>50</sup> Hatyaoseta Bartimeu xawatya haihiri hoka ihalahare tityoaheta hoka xane Jesus haliya.

<sup>51</sup> — Xoare notyoma homana haokita? nexa Jesus axene.

— Xaotyakisatiye! kasani nowaiyakatyareheta naokowita! nexa.

<sup>52</sup> — Hiyanehetehena, kalikini atyo hawaiiyeheheta hityakekone hiyeta — nexa Jesus ihiye.

Nexa hoka hatyaoseta Bartimeu waiyakahetehena rotita hoka Jesus xema xane ahoti aho.

### Jesus Kaokehena Jerusalém Nali

(Mateus 21.1-11; Lucas 19.28-40; João 12.12-19)

**11** Hatyaoseta Jesus haxaotyakiraharenai kakoa xane kaokehenaha Jerusalém nali. Hoka xane Oliveiras tyairiya nali kaokaha, wenakalatinai Betefagé, Betânia xoaha haliyaseta. Hoka axikatya hinamahare haxaotyakiraharenai <sup>2</sup> hoka nehena: — Xiyanehena wenakalati xaheta maniya tyaonitere nali. Xiyane ite nali xikaokhehena hoka xiyaiyaite boriko mokose exolatyakahare tyaonita, maokatyakaharetata eheno. Hoka maika xamaxolatene hoka xisoa ekakoa ali. <sup>3</sup> Maika xala xamani axehena xiso: “Xoare maheta nikare xaolihene?” nehena hoka maika, “Xekohaseti aokitene haomana hoka awisaite isehetene”, xexa ihiyeha.

<sup>4</sup> Hatyaoseta xaneha hoka waiyaha boriko mokose hati kanase jiyakalati haliyita, ekatilikakahare tyaonita.

Hatyaoseta aolihenaha hatyo boriko mokose hoka <sup>5</sup> haiyaharenai axehenahene: — Xoana xamohenene? Xoare maheta boriko mokose xaolihena? nexaha.

<sup>6</sup> Hatyaoseta Jesus irahenere ihiyeha akereta iraeha hoka hatyo halitinai halakisene hoka xaneha boriko mokose kakoa.

<sup>7</sup> Hatyaoseta nolokaha boriko mokose Jesus ana. Hoka haimanaeha mokaha eheno. Hatyaoseta Jesus tyoka eheno. <sup>8</sup> Hatyaoseta haiyaharenai kanahotyaha ahoti haimanaeha kakoa, exahe haiyaharenai hoka irikotyaha atya xawali hatyo nalita hoka hatyohare kakoa kanahotyahitaha ahoti aho.

<sup>9</sup> Enaheta xaneterenai, enajikinita tyoiterenai xoaha kawiyahenaha:

— Wihalahareta hikakoa, Enore! Xekohaseti Enore, waiyira hamohena hexare kakoa tyoitere!

<sup>10</sup> Waiye kaiserehare atyo Davi najikinitare kaokehena womana xekohaseti tyaona maheta Davi akereta! Wihalahareta hikakoa, Enore! nexaha.

<sup>11</sup> Hatyaoseta Jesus kaoka Jerusalém nali hoka isoa Iraexatyakalati Hanako hoka tyotya hakakoare wahaokoakoty. Xakore hoka koxaka makehena hoka xane wenakalati Betânia nali, 12-hare haxaotyakiraharenai kakoa.

### Jesus Irae Halohalo Kate Hiye

(Mateus 21.18-22)

<sup>12</sup> Kamaetali Betânia nalita haikoahenahititaha hoka Jesus naka. <sup>13</sup> Hoka sekota waiya halohalo kate. Kahanahiye kahare hoka xane iri xahita waiyakatetene. Xane hiko ehalia hoka ehana taita waiya, maisa iri xowakehetehene hoka.

<sup>14</sup> Hatyaoseta nexa halohalo kate hiye: — Exe heko-taiya maisa xala hare hirínai hiyohitita — nexa.

Nexa hoka hatyo harenai exaotyakiraharenai sema.

### Jesus Aihikoakaheta Iraexatyakalati Hanakota

(Mateus 21.12-17; Lucas 19.45-48; João 2.13-22)

<sup>15</sup> Hatyaoseta Jesus haxaotyakiraharenai kakoa kaokaha Jerusalém hoka isoa Iraexatyakalati Hanako. Hatyaoseta hatyo nali iyakaiterenai exahe betetitere harenai aihikoaheta. Herawatya exoakisa olo ehaikoakihititere harenai mexane, watyaha betetitere harenai nokahakala hoka. <sup>16</sup> Hoka maisa xala hare xalini hare kolatya Iraexatyakalati Hanako xeta aokare.

<sup>17</sup> Hoka aotyakisahene exakere: — Iraeti Waiyexe nanekoa atyo exakere Enore niraene kaxairatyaka: Nohani atyoite Iraexatyakalati Hana kakaixaretyaka tyotya halitinai anere. Xakore hoka xiso atyo kaiwarexenai xateroakisakala niyahare xamokene! nexa ihiyeha.

<sup>18</sup> Hatyaoseta sacerdotenai xekohaseharenai, xaotyakiyaho kakoa waiyoretereharenai harenai, semaha iniraene hoka aisaha aokowihenaha Jesus. Xakore hoka mairahitene, halitinai awaiyetita exaotyakira hoka. <sup>19</sup> Hatyaoseta makehena hoka Jesus haxaotyakiraharenai kakoa xanehenahitaha wenakalati Jerusalém nalita.

### Halohalo Kate Tah

(Mateus 21.20-22; João 14.13-14; 16.24; Tiago 1.6-8)

<sup>20</sup> Kamaetali weta Jesus haxaotyakiraharenai kakoa jiyehenaha hatyo halohalo kate tyaonitere haliya hoka waiyehenaha atyo, nira atyo ityahare kakoita.

<sup>21</sup> Hatyaoseta Pedro oteheta Jesus niraene hoka nexa ihiye: — Hiyaiyehena, Xaotyakisatiye, etake halohalo kate himaxawaiyerehenerore nira — nexa.

<sup>22</sup> Hoka Jesus nexa: — Exe harira xotya: xityakekoiya Enore hoka <sup>23</sup> xexaiya exe tyairi hiye: “Hakikisoahena hatyaoseta hoka hiyane onexa hexoahena”, xexaiya hoka maisaiya xamatyakekotita xiraene hoka xityakekoiya xiraene hoka hatyo xiraetere akeretaiya kaomaka. <sup>24</sup> Hatyo hiyeta nomita xihye: xiraexa-

henaira hoka xoalini hare xaxehena hoka xityakekoira, motyaira koxaka kaxekakita ene hatyo harenai xomana. Nikare ite hoka hatyo harenai kaxekaka xomana — nexa.

<sup>25</sup> — Maika xiraexahena hoka ximaotyaneheta hatya iniyalahare tyomehenere hare xikakoa. Nikareya xisaona hoka Xexe enokoa tyaonitereya atyo maotyaneheta iniyalahare xománe. <sup>26</sup> Hoka maisaiya ximaotyanehitita hatya iniyalahare tyomehenere hare xikakoa hoka maisaiya Xexe enokoa nali tyaonitere maotyanehitita iniyalahare xománe — nexa.

### Jesus Xaxaka Ekalorexene Tahī

(Mateus 21.23-27; Lucas 20.1-8)

<sup>27</sup> Hatyaoseta haikoahenahitaha Jerusalém nali. Hoka Jesus tonakoita ene Iraexatyakalati Hanako hoka sacerdotenai xekohaseharenai, xaotyakiyaho kakoa waiyoretereharenai, judeunai nityohalitiranai harenai xane kaokaha ehaliya <sup>28</sup> hoka axahene: — Xala niraene kakoare hiso hoka nikare hisaonita? Xala xaokala xema nikare hisaonita? nexaha.

<sup>29</sup> Hoka Jesus nexa: — Natyo tehitiyaite naxa xiso. Hoka xekoaxatyaite nomani hoka noxakaite xihye xala niraene xema exe harenai notyomita hoka — nexa.

<sup>30</sup> — Xiyakaihenaira: xala niraene xema João Batista batixatya halitinai? Xoana Enore niraene xema, halitinai niraene xema kore? nexa.

<sup>31</sup> Nexa ihiyeha hoka hatyokakoaha irae kakoa-henaha: —“Enore niraene xema”, wexaiya hoka nexaiya axa wiso: “Hoka xoaneretya hoka maisa xityakekota João?” nexaiya wihiye. <sup>32</sup> “Halitinai niraene xema”, wexaiya hoka halitinaiya ehareha wihiye — nexaha, mairahitaha halitinai, tyotyaha João Batista iraeiti xakaisasehare terota aokahitere hiyeta.

<sup>33</sup> Hatyo hiyeta nexaha: — Maisa wawaiyorexe hatyo akiti kakoa — nexaha.

Hatyaoseta Jesus nehena: — Natyo tehitiyaite maisa noxakaita xala niraene xema exeharenai notyomita hoka — nexa ihiyeha.

### Masene Nomaseharenai Xalijiniharexenai

(Mateus 21.33-46; Lucas 20.9-18)

**12** Hatyaoseta Jesus haxaimenekola kakoa xakaihakahena ihiyeha. Hoka nexa: — Hatya haliti fitya uva katenai hamasenekoa hoka talahokotya hamasenekoa. Tyoma uva kakatyakala vinhoxa tyoma maheta, exahe enoakiya kahainatya hakakoare waiyakoatya hamasene maheta. Hatyaoseta haiyanai halitinai ana halakisene hoka xonehena hoka irakakakoahenahitene aoka ihiyeha hoka xane hakiti seko akiya xeta.

<sup>2</sup> — Enexona xowakehena hoka exekohase hatya hawakanehare axikatya, holini isehenahitaha enomana maheta. <sup>3</sup> Xakore hoka hatyo masene kaxaikotyaseharenai otokene hoka mokonasetene hoka axikahenahitene. Maisa xoare isahitaha enomana.

<sup>4</sup> Hatyaoseta hatisa hawakanehare axikahitiya enomanaha hoka nikareta tehitiya maisa aiminisahitene

hoka mokotyahene eseri hiye. <sup>5</sup> Hatyaoseta hatisa axikahitiya hatyo nali xeta hoka masene kaxaikotyaseharenai aisene. Nikare haiyaharenai kahare axikahenere mokaha. Haiyaharenai mokohekoatyaha, haiyaharenai aisaha xoaha. <sup>6</sup> Hatyaoseta ityani ixiyakawalahare takitehena hoka axikatya haisani enomanaha. Exakere ahekotya hoka axikatene: “Nityanite naxikatya enomanaha hoka aiminisahene”, nexa.

<sup>7</sup> Xakore hoka masene kaxaikotyaseharenai nexa irae kakoaha: “Exe atyo masene waikatehare ityani. Nika-hena hoka waisene hoka hananehaliti waikohe harenai kakoa wisaona”, nexaha. <sup>8</sup> Hatyaoseta otokaha ityani hoka aisahene hoka xane xawatyahene seko masene nonitata.

<sup>9</sup> Hatyaoseta Jesus axahene: — Xoanaite masene waikatehare tyaohena? Tyoaita aisehena hatyo halitinai hoka hahananehare isehena hahotyalihare masene kaxaikotyaseharenai ana.

<sup>10</sup> — Xoana maisa xótyare Iraitī Waiyexe kaxairatyakehenere:

Sehali hati nomaseharenai maxaokarehenere atyo kaxomokaka hati nekesako.

<sup>11</sup> Hatyo atyo Xekohaseti xekane. Kaxiyani, waiye kaiserehare atyo!

<sup>12</sup> Hoka judeunai nityohalitiranai ana waiyekehalaka. Hatyo haxaimenekola kakoa iraeitere atyo etahiha hoka otokaha aokowihenaha Jesus. Xakore hoka mairahitaha halitinai. Hatyo hiyeta Jesus halakisaha hoka xanehenahitaha.

### Olo Xekaka Kalorexene Ana Tahī Axaha Jesus

(Mateus 22.15-22; Lucas 20.19-26)

<sup>13</sup> Hatyaoseta axikatyaha haiyahare fariseunai, Herodes konitarenai harenai Jesus ana hasakaharetyahene maheta, kasani Jesus komaniyatyoa hairaene kakoa aokahitaha.

<sup>14</sup> Xane kaokaha enomana hoka nexaha: — Xaotyakisatiye, waiyekehalakita atyo womana hawaiyexeharene. Maisa atyo haiyanai niraene xema hisaonare. Hiyaiya, maisa atyo halitinai henekoa maniya xini hiyaita, exahe hoka aliterexe atyo haotyakijita Enore xaotyakiraho. Hoka hiyakaihena wihiye: xoana wiyaoatyakisakaho hiyeta ehokoretaiya olo kalorexene Roma yere aokiterehare wabakatya? Wabakahenaite, maisa kore ite wabakaita? nexaha.

<sup>15</sup> Hoka Jesus otya emaoseralaha hoka nexa ihiyeha: — Xoana hoka xahasakaharetya xaokowita natyo? Xama olo hokose nomani hoka nowaiya — nexa.

<sup>16</sup> Hoka isaha olo hokose enomana hoka axehenahene: — Xala nexare, niyakotini tiho exe olo hokose hiye? nexa.

Hoka nexaha: — Kalorexene Roma yere — nexaha.

<sup>17</sup> Hoka Jesus nexa: — Xoare xamani atyo kalorexene Roma yere anere hoka kalorexene ana xisene. Hoka Enore anere atyo hoka xisene Enore ana — nexa ihiyeha.

Nexa ihiyeha hoka hakaharetyoaha exekoaxala kakoa.



### Kamatinai Kaseneheta Tahī Axaha Jesus

(Mateus 22.25-33; Lucas 20.27-40)

<sup>18</sup> Hatyaoseta haiyaharenai saduceunai tyoaha Jesus ana. Enomanaha haliti wainihena hoka maisa kasehetere. Tyoaha Jesus haliya hoka nexaha: <sup>19</sup> — Xaotyakisatiye, Moisés exakere xairatya wawenane niyahare. “Hatya halitiya waini hoka haiyanityo maisanihalota halakisa hoka iximareniya tyaohtiya ekakoa hoka kaisanihaiya hoka exanene wainihenere ityaniya kaxaokaka”, nexa.

<sup>20</sup> — Hasemehena, 7-hare haximarene kakoarenai tyaonahitaha. Hoka enaxenaneha hetatiyehare kaiyanityo hoka waini maisanihareta. <sup>21</sup> Hatyaoseta iximarene ihietare tyaohtiya hatyo ohiro kakoa hoka maisanihareta wainihitiya. Hatyaoseta nikareta ihietare tyaohtiya, maisanihareta wainihitiya. <sup>22</sup> Nikare makere hatyo 7-hare haximarene kakoarenai tyaonaha hatyo ohiro kakoa hoka maisanihareta wainiha. Hatyaoseta ekamaneha najikinita, hatyo ohiro tehitiya waini. <sup>23</sup> Nikarite hoka xala exanityo kaisere ite hatyo ohiro tyaohtehena, kamatinai kasehete-henere xowakiya? Hiyaiya, tyotyaha atyo tyaonaha ekakoa! nexaha.

<sup>24</sup> Hoka Jesus nexa: — Xiso atyo ehaikoare xahekotita. Maisa atyo iraiti xairatyoare tyaonitere waiyekehakere xomana, exahe Enore niyatere hoka — nexa.

<sup>25</sup> — Hiyaiya, kamatinai atyoite kasehetehena hoka anjonai enokoa nali tyaonitere akereta atyoite tyaonaha, maisaiya atyo tyaonakakoahenahititaha — nexa.

<sup>26</sup> — Xoana maisa xakaixaretita kasehetehenerenai tahi xairatyoare tyaonitere Moisés xairala nanekoa? Etake hananehaliti keritere tahi iratere exakere atyo xairatyoare tyaonita, Enore irahenere Moisés hiye: Natyo atyo Abraão, Isaque, Jacó xoaha Nenorexa.

<sup>27</sup> Hatyoharenai hiyeta Enore atyo kasexenai Nenorexa hoka maisa atyo kamatinai Nenorexa xini. Xiso atyo ehaikoare xahekotita — nexa ihiyeha.

### Xaotyakiyaho Masakare Waiyexe

(Mateus 22.34-40; Lucas 10.25-28; 1 João 5.3)

<sup>28</sup> Hatyaoseta hatya xaotyakiyaho kakoa waiyoretere, nali tyaonita hoka sema iniraekakoanaha. Sema Jesus xekoaxala waiye hoka hatyaoseta xane axa Jesus: — Xoare hare masakare waiyexe xaotyakiyahonai konitare? nexa.

<sup>29</sup> Hoka Jesus nexa: — Exe waiye kaiserehare: “Xasemehena, Israel yerenai! Wiyekohase Enore atyo haterore!

<sup>30</sup> Hawaiiyehehena kaiserehare hiyekohase Enore, hisaonehena exema maniya takita, hahekohena ekoamaniya takita, haiyateretyoahena hawenane kakoa exema maniya”, nexa.

— Hatyo atyo waiye kaisere. <sup>31</sup> Exe ihietare tehitiya atyo masakare waiyexe:

“Hawaiiyehehena haiyaharenae hawaiietyoawitere akere”, nexa.

Maisa atyo hatehitiya xaotyakiye waiyexe aka exe hinamanai akereta — nexa.

<sup>32</sup> Hatyaoseta xaotyakiyaho kakoa waiyoretere nehena Jesus hiye: — Ehekere, Xaotyakisatiye! Aliterexe atyo hiraeta. Enore atyo haterore, maisa atyo hatehitiya aka. <sup>33</sup> Hoka ehokoretaiya wawaiyehena kaiserehare Enore, wisaonehena exema maniya takita, wahekohena exema maniya takita, exahe waiyateretyoa wawenane ekoamaniya kakoa. Ehekere tehitiyaiya wawaiyehena haiyanae wawaietyoawitere akereta. Hiyaiya, waiye tyakekotyaka atyo exe hinama xaotyakiyahonai. Kirakahare kaxaisaka hoka kafetatyakitere exahe xoalini hare kafetatyakitere hare Enore ana xahehare nawaiye atyo — nexa.

<sup>34</sup> Jesus ana waiyekehalaka xaotyakiyaho kakoa waiyoretere xekoaxala hawaiiye kakoa hoka nexa ihiyeha: — Hiso atyo maisa sekohetere hawenane Enore koamaniya nawenatyakaho nonitata — nexa.

Hatyo najikinita maisa xala hare kinatyatyako axehititene.

### Enore Kalorexe Aohenere Tahī Axahene

(Mateus 22.41-46; Lucas 20.41-44)

<sup>35</sup> Hatyaoseta Jesus aotyakijita Iraexatyakalati Hanako hoka axehena: — Aliyakereya xaotyakiyaho kakoa waiyoreterenai Enore Kalorexe Aohenere atyo Davi jikolahare aohenaha? <sup>36</sup> Hiyaiya, Isekohaliti Waiyexe atyo Davi kaxaehakoretaya hoka exakere xairatya:

“Nexa Xekohaseti Noxekohase hiye: Hisokehena nofihini maniya hahalakoaharenai hikiji katyahe namohenere kijija”. (Enahalakoaharenai mehotyaka xaokak nikareta irieta.)

<sup>37</sup> Hiyaiya, Davi atyo Haxekohase tehitiya aokene. Hoka aliyakereya Cristo atyo Davi jikolahare kaxaokakehena? nexa.

### Jesus Irae Xaotyakiyaho Kakoa Waiyoreterenai Tahī

(Mateus 23.1-36; Lucas 20.45-47)

Nikare Jesus irieta hoka halitinai awaiyetya iniraene.

<sup>38</sup> Hoka aotyakihena halitinai hoka nehena: — Xiriharira Xaotyakiyaho kakoa waiyoreterenai kakoa. Hatyonai atyo awaiyetyahitaha haetonaneha imiti waiyeharexe ako, exahe wetekokoa hoka kasani halitinai haxaiminiraha kakoa katyawaxaha ihiyeha aokahitaha. Xanehenaha xahohisakoatyakalati hanako hoka waiyexe okahakalati koa tyokahitaha. <sup>39</sup> Exahe nakairati hekohenaha hoka hatyoha hotohare waiyexe okahakalati koa tyokaha aokowiyahitaha hoka kanakairahitaha. <sup>40</sup> Xakore hoka mehotyahitaha, kaiwahitaha wainyaneneronai xiyehalo. Hoka teraharetyoaha aokowihenaha hoka waha tahi Iraexatyahitaha. Hatyo hiyeta iniyalahare kaxomokakehenahere atyoite exahehare niyalahare — nexa.

### Wainiyanenero Maoloxahalo Xekane Olo Tahī

(Lucas 21.1-4)

<sup>41</sup> Haxowaka Jesus Iraexatyakalati Hanako tyaonita hoka olo xomokakala haliya tyokita hoka wahakoita, alyakere xamani halitinai mokita olo hatyoako hoka. Kahare haiyaharenai kaoloxerenai kalore olo mokahitaha. <sup>42</sup> Hatyaoseta hatya ohiro wainiyanenero maoloxahalo hiko hoka hinama olo hokose kirane xaimanexe moka olo xomokakalako.

<sup>43</sup> Hatyaoseta Jesus kawisa haxaotyakiraharenai hoka nexa: — Aliterexe nomita xihye, exe ohiro wainiyanenero maoloxahalo atyo exahehareha isa. <sup>44</sup> Hiyaiya, haiyanai atyo kamawanetere hiyeta isahitaha. Hoka exe atyo maoloxahalo xakore hoka tyotya haoloxa haxiyehalo niyahare atyo isa — nexa ihiyeha.

### Jesus Irae Iraexatyakalati Hana Mawenekoaretyaka Tahī

(Mateus 24.1-2; Lucas 21.5-6)

**13** Hatyaoseta Jesus hikoahetehena Iraexatyakalati Hanakota hoka hatya exaotyakirahare nehena ihye: — Xaotyakisatiye, hiyaiyehena, kaxiyani waiyehare exe sehalinai exahe exe hatinasenai hoka! nexa.

<sup>2</sup> Hoka Jesus nexa: — Xoana, hiyaita exe hatinasenai? Haxowaka ferakenite tyotya exe hiyaiyitereharenai kamawenekoaretyakeheta. Hoka maisaiya hatya sehali hatya sehali heno tyaohitita — nexa Jesus ihye.

### Howitiharexe Wenati, Irawaniti Xoaha Tahī

(Mateus 24.3-14; Lucas 21.7-19; 1 Pedro 1.6-7; 3.14; 4.12-14)

<sup>3</sup> Hatyaoseta Jesus xane Oliveiras tyairiya heno tyoka hoka wahakoita ene Iraexatyakalati Hana ana hoka Pedro, Tiago, João, André xoaha hawawaharenaiha heko axehenahene: <sup>4</sup> — Xoana xowakaite hatyoharenai kaotyakehena? Xoare hotohare ite kaotyakehena hoka hotikihena hatyoharenai ferakene?

<sup>5</sup> Hatyaoseta Jesus aotyakihenahene: — Xirihalira hoka maisa xala hare maoseraita xiso. <sup>6</sup> Kahare tyaita kaotyakehenaha néxare kakoa hoka nehenaha: “Natyo atyo Enore Kalorexe Aohenere”, nehenahaite. Hoka kahare halitinai maoserahenaha.

<sup>7</sup> — Awatyo ximairehena, xasemehena xaisakakoati nemahare, exahe xaisakakoati tahi hoka. Tyotya hatyoharenaite kaotyaka, xakore hoka maisa atyoite imiyanaosehenere. <sup>8</sup> Hahotyalihare ite xane hahotyalihare kakoa aisakakoahena, exahe hakoatare ite xane hakoatare kakoa aisakakoahena. Haiyanai koaite waikohe tatakoahena, exahe nakitite tyaohe. Hatyoharenai atyoite hetati xoima kawetere akereta — nexa.

<sup>9</sup> — Maika xirihare xisaona. Hiyaiya, xikaberexotyakaite hoka xikakolatyakaite xekohasetinai ana, exahe xikamokonasetyakaite militihi kakoa xahohisakoatyakalatinai hanako. Nohiyitite xikakolatyaka kalorexenai, xekohasetinai nahalako hoka xiyakaite ihiyeha Iraeti Waiyexe. <sup>10</sup> Imiyaniki ferakene nahitita atyoite Iraeti Waiyexe kaxakaisaka tyotya halitinai ana.

<sup>11</sup> Maika berexohenaha, kolahenaha xiso kalorexenai ana hoka awa atyo ximawaiyehare xiraehenerehare tahi kakoa nahitita. Hoka maika xiyane xahikoahena hoka xirae Enore aokiterehare. Hiyaiya, xiraehenere hare atyoite maisa xiraene xini, xakore hoka Isekohaliti Waiyexe nalitare atyoite.

<sup>12</sup> — Kahare haiyaharenaite haximarenenai kaiserehare isehena kaxaisakaha maheta, exahe nikaretaite enexenaiha haisaninai mohena. Hoka ityaninaite kahalakoahare hanexenaiha kakoa hoka axaisakihenenite. <sup>13</sup> Tyotyahaite kirawaneha xiso nohiyiti, xakore hoka xala xamani atyoite heko kinatere tyaona nokoamaniye imiyanaose kijiya hoka hatyo atyoite kaiyakeheta — nexa.

### Kalorexe Wenati Howitiharexe

(Mateus 24.15-28; Lucas 21.20-24; 2 Tessalonicenses 2.3)

<sup>14</sup> Hoka Jesus nehitiya: — Maika xiyaiyehena “kaheneharexe, exahe wenati xaiyalaharetyasehare” emawenanehare akiti nali hoka maika xala xamani Judéia nali tyaonita hoka tekoahenaira tyairinai koni xeta. (Maika hatyo “kaheneharexe, exahe wenati xaiyalaharetyasehare” aokitere ekaixarityasehare ana waiyekehalaka).

<sup>15</sup> Maika xala xamani hahana heno tyaonita hoka tekoahena rotitaira hoka awa atyo isoahetehena hoka xalini hare iyehetehena. <sup>16</sup> Maika xala xamani mase tyaonita hoka awa atyo haikoahetehena hahana xeta haima kolaheta maheta. <sup>17</sup> Kaxiyani, hatyo xowakiya atyoite howitihare tyaohe tifalonai exahe xoimaisanironai ana hoka! <sup>18</sup> Maika xiraexatya Enore hiye hoka maisa hatyoharenai tihere xowaka kaotyakitita. <sup>19</sup> Hiyaiya, hatyo xowakehena atyoite hoka wenati atyo ite howitihare tyaohe. Maisa xoana xowaka nikare tyaonare Enore tyomehenere waikoheko xowakiyata, hoka maisaiya atyo nikare tyaohitita haxowakiya. <sup>20</sup> Xakore hoka Xekohaseti atyo aikiranitya hatyo wenati howitiharexe ferakenenai. Maisaiya nikarexe hoka maisaiya xala hare makamanehare tyaonita. Xakore hoka Enore iyeheta aokowihenerenai hiyeta atyo hatyo ferakenenai kaxaikiranityakeheta — nexa.

<sup>21</sup> — Maika hatya nehena xihye: “Xiyaiyehena, Kalorexe Enore Aohenere ali tyaonita”, nehena xamani, “Owene tyaonita”, nehena hoka awa atyo xityakekone. <sup>22</sup> Hiyaiya, kaotyakaite iraeti xakaisaharenai exahe Enore Kalorexe Aohenere metalaharenai hoka tyomahaite kahare xalini hare maomakahare katyakekotyaka maheta, hoka maoserahenaha haliti. Exahe aiyateretyoahaite maoseratyaha maheta Enore haomanerehare aohenerenai.

<sup>23</sup> — Waiyira xasema: exe harenaitya noxakaita xihye kaotyakehenere nahitita — nexa.

### Haliti Ityani Tyoaneneheta Tahī

(Mateus 24.29-31; Lucas 21.25-28; 2 Tessalonicenses 1.6-7; Apocalipse 1.7)

<sup>24</sup> Hatyaoseta Jesus nexa: — Hatyo howitihare tyaohe ferakenenai najikinitaite kamaite makaliro

tyaona, exahe kaimare ite hoka maisa aokanahitita.  
<sup>25</sup> Xoresenaite exoa enokoata, exahe enokoa kinatere tyaoniterenaenite maiyaterehare tyaona.

<sup>26</sup> — Hatyaosetaite Haliti Ityani kaotyakehetehena kaiminiti koni hoka exoahetehena kalore haiyatere kakoa, hawerokene kakoa hoka. <sup>27</sup> Hoka axikatyaite anjonai hamaniya xakini hoka ahohisakoatyahaite Enore haomana aohenerenai waikohekoa tarenai — nexa.

### Jesus Halohalo Kate Hiye Aimenekotyia

(Mateus 24.32-35; Lucas 21.29-33)

<sup>28</sup> Hoka Jesus nehitiya: — Waiyexira xasemehena halohalo kate tahi. Hiyaiya, ekanonai atyo tihorehete-hena exahe ehanahinai atyo hikoahetehena hoka waiyekehalakita atyo xomana enonenehetehena.

<sup>29</sup> Nikareta tehitiyaite exeharenai kaotyakehena hoka waiyekehalakaira xomana Haliti Ityani okoi haikoa-hetehenerehare.

<sup>30</sup> — Exehalira xotyia: exeharenai tyaite kaotyaka exe kasetatereharenai makamaneharene nahitita.

<sup>31</sup> Enokoa, waikohe harenai tyaite maiyareheta, xakore hoka niraeni tyatyoite tyaota mene — nexa.

### Eferakene, Exowakehena Kakoa Maisa Xala Waiyorexe

(Mateus 24.36-44; 1 Tessalonicenses 5.2-3; 2 Pedro 3.10)

<sup>32</sup> Hoka Jesus halakihena hairaene hoka nehena: — Eferakene, exowakehena harenai tahi atyo maisa xala hare ana waiyekehalakere. Maisa atyo anjonai enokoa tyaoniterenai ana waiyekehalakere, maisa atyo Enore Ityani ana hekoti waiyekehalakere. Xakore hoka enexe Enore ana taita atyo waiyekehalakita. <sup>33</sup> Maika xikaxaikoawi exahe xirihare. Hiyaiya, maisa atyo waiyekehalakere xomana hatyo hare ferakene kaotyakene.

<sup>34</sup> — Hatya haliti hahana halakisa hoka seko akiya xanetere akeretaite. Hoka haxanene nahitita irae hawakaneharenai hiye hoka ehateneha inihatyakaha halakijitere enomanaha hoka xisoakalati kaxaikotyasehare wakatya hoka kaxaikotere akereta atyoite.

<sup>35</sup> Hatyo hiyeta xikaxaikoawihena. Hiyaiya, maisa atyo hati xekohasehare kaokeneheta waiyekehalakere xomana. Xoana makakoahena xamani, xoana wahaxati xamani, xoana ferakoa maniyehena xamani, xoana weta xamani. <sup>36</sup> Hoka eharehena rotita kaokehete-hena hoka maisa xisemakitata waiyita xiso maheta.

<sup>37</sup> — Niraetere xihiyete atyoite niraehena tyotyia enomanaha: maika xikaxaikoawihena — nexa Jesus.

### Ahekotyaha Aisaha Maheta Jesus

(Mateus 26.1-5; Lucas 22.1-2; João 11.45-53)

**14** Hinamaki ferakene taitehena hisehaliti Páscoa naheta, nakairati makaorehetyakahare xoaha naheta hoka sacerdotenai xekohaseharenai, xaotyakiyaho kakoa waiyoreterehare harenai hametenetaha otokaha Jesus hoka aisahene aokowiyahitaha. <sup>2</sup> Hoka nexahitaha: — Maisaiya nikare wisaonita hisehaliti xowaka, halitinai maisa eharahitaha wihiye maheta — nexaha.

### Jesus Tyaonita Betânia Nali

(Mateus 26.6-13; João 12.1-8)

<sup>3</sup> Hoka Jesus wenakalati Betânia nali, Simão jijikoahiti tawanehare hanako tyaonita hoka kanakairita ene hoka hatya ohiro tyoa tinihaliti waikohe iyomehero nomakere akore kaisero airaxero waiyexe exahe károre kakoa. Hoka ehoka hatyo tinihaliti hoka owika airaxero Jesus seri heno.

<sup>4</sup> Hoka haiyaharenai nali tyaoniterenai ehareha hoka nexa kakoaha: — Xoare maheta exakere kalore ametakijitene? <sup>5</sup> Hiyaiya, airaxero atyo waiye betetyaka 300 olo hokose xaimanexe hoka kaxekakaiya maoloxaharenai ana — nexaha.

Hoka kirawaneha ohiro <sup>6</sup> xakore hoka Jesus nexa: — Xahalakihena exe ohiro! Xoanere hoka xexamaikohalonikihenene? Hiyaiya, waiyexe atyo tyoma nomani. <sup>7</sup> Hiyaiya, maoloxaharenai atyoite tyaota mene xikakoa hoka xoana xowaka xamani atyoite xakahinaetyahene xaokowihena hoka xakahinaetyahene. Hoka natyo atyoite maisa notyaota minita xikakoa. <sup>8</sup> Háomane heko atyo tyoma: hiyaiya, nokamani nahitita atyo tyoa airaxeharetya noháre, noxafityaki niyahare. <sup>9</sup> Aliterexe nomita xihiyete: hakakoare waikohekoa atyoite, aliye xamani Iraeti Waiyexe kaxakaihakatyaka hoka kaxakaisakaite exe tyomehenere hoka kaxotyakehetaite exe ohiro — nexa Jesus ihiyeha.

### Judas Matawahena Jesus

(Mateus 26.14-16; Lucas 22.3-6)

<sup>10</sup> Hatyaoseta Judas Iscariotes, 12-hare exaotyakiraharenai konitare irae sacerdotenai xekohaseharenai kakoa, Jesus hamatawala enomanaha tahi akiti.

<sup>11</sup> Hatyohare tahi semaha hoka ihalahareha hoka olo isaha enomanaha aokowiha. Hatyo najikinita Judas ahokohena Jesus hamatawala tahi akiti kakoa.

### Jesus Otyaxematya Páscoa Ferakene

(Mateus 26.17-25; Lucas 22.7-14, 21-23; João 13.21-30)

<sup>12</sup> Hatyaoseta hetati ferakene, nakairati makaorehetyakahare xowaka, judeunai kalanero aisaha hoka Páscoa ferakene otehenahititere ferakene xane hikoa hoka exaotyakiraharenai axaha Jesus: — Aliye nali wisoma nakairati Páscoa niyahare haokita? nexaha.

<sup>13</sup> Hoka Jesus axikatya hinamahare haxaotyakiraharenai, nexa ihiyeha hoka: — Xiyanehena wenakalati nali. Hoka nalite hatya haliti one kolaita hoka ahakaloatya xiso. Hoka hatyo haliti xemaite xiyane. <sup>14</sup> Hoka maika xexa hati xekohasehare hiye, aliyeri ako xamani isoa hoka. "Xekohaseti exakere waxa aokita: 'Aliyako tyaonita hatyo hatyako hoka natyo, noxaotyakiriharenai xoaha kakoa nokanakairi hoka wotyaxemaheta Páscoa ferakene?'" <sup>15</sup> Hatyaosetaite hotikisa xomana kaloakore hatyako ehaore ako, exomokakotyakahare exahe memere. Hoka nalite tyotyia xisoma womana — nexa Jesus ihiyeha.

<sup>16</sup> Nexa hoka hatyo hinamahare exaotyakiraharenai xaneha wenakalati xeta. Hoka Jesus aokitere akereeta waiyaha. Hoka tyomaha nakairati Páscoa niyahare.

<sup>17</sup> Makehena hoka Jesus kaoka 12-hare haxaotyakiraharenai kakoa. <sup>18</sup> Kanakairahitaha mexakoa hoka nehena: — Hatya xinekonitare kanakairitere nokakoite matawahena natyo — nexa.

<sup>19</sup> Nexa hoka amaikohareha hoka hatya xakini axehenahene: — Xoana maisa natyo xini haokita? nexaha ihiye.

<sup>20</sup> Hoka Jesus nexa: — Hatya xinekonitare. Hatya nohakakoani balatoahekoa maikitere nakairatite matawahena natyo. <sup>21</sup> Hiyaiya, Haliti Ityani atyoite wainihena, Iraeti Waiyexe iraetere akereeta. Xakore hoka kaxiyani, kirakoane ite tyahena Haliti Ityani matawahenere! Kaxiyani, waiye kaiserehareya atyo mawenanehareta tyonare hoka! nexa.

### Jesus Nakairati, Erati Kakoa Aimenekoty Hakamane

(Mateus 26.26-30; Lucas 22.15-20; 1 Corintios 11.23-26)

<sup>22</sup> Hatyaoseta kanakairahitaha hoka Jesus iya nakairati hoka iraexatya Enore hiye. Hatyo najikinita taikasetene hoka isene haxaotyakiraharenai ana hoka nehena: — Xotohena, xikanakairahenene, exe atyo nohare — nexa.

<sup>23</sup> Hatyaoseta iyehitiya erakakalati hoka iraexahitiya Enore hiye. Hoka isehitiyene haxaotyakiraharenai ana hoka tyotyaha terahene.

<sup>24</sup> Hatyaoseta Jesus nehena: — Exe atyo notimalaxi, kaxiratyaka kahare haliti hawaonita. Exe timalati hiyeta atyo waitare wenati tyahona halitinai ana Enore kakoa. <sup>25</sup> Aliterexe niraeta xihye, exaoseta atyoite maisa noterehitita exehare vinhoxa. Exaoseta atyoite Enore nali taita noterehitiya waitare vinhoxa — nexa Jesus ihiyeha.

<sup>26</sup> Hatyaoseta xeraha haxaka xerati hoka xaneha Oliveiras tyairiya nali.

### Jesus Irae Pedro Kakoa

(Mateus 26.31-35; Lucas 22.31-34; João 13.36-38)

<sup>27</sup> Xane kaokaha hatyo nali hoka Jesus nexa haxaotyakiraharenai hiye: — Exe xatinite xahalakihena natyo. Hiyaiya, iraiti waiyexe kaxairatyakehenere atyo nexa:

“Naisaite kaxaikotyatiye hoka tyotyaita ekaxaikoneharenai xaore”.

<sup>28</sup> — Hoka hatyo najikinitaite, nokaseheta hoka noxani xaheta maniya Galiléia xeta — nexa ihiyeha.

<sup>29</sup> Nexa ihiyeha hoka Pedro nehena: — Maisaiya atyo nahalakijita hiso, exahe tyotyaha haiyanai halakisa hiso hoka — nexa.

<sup>30</sup> Hatyaoseta Jesus nexa Pedro hiye: — Exehalira hotya: awisa xatinite, takoirira makawiraharene hinamaki nahitaitaite, hanamaki hateraharetyoa. Himawaiyanenehare ite haoka natyo — nexa Jesus.

<sup>31</sup> Xakore hoka Pedro kahaliki nikareta aiyateretyoa irae: — Maisaiya xoana hekota nomawaiyaninihare naokita hiso, exahite kotare nowaini hihakakoane —

nexa. Tyotyaha exaotyakiraharenai nikare makere irae.

### Jesus Tyaonita Ímekoa Getsêmani Nali

(Mateus 26.36-46; Lucas 22.39-46)

<sup>32</sup> Hatyaoseta Jesus xane Getsêmani aokahitere nali haxaotyakiraharenai kakoa. Xane kaokaha hatyo nali hoka Jesus nehena ihiyeha: — Xisokehena ali niraexahenere nase — nexa ihiyeha.

<sup>33</sup> Hatyaoseta noloka Pedro, Tiago, João xoaha. Hatyaoseta Jesus kehexa kalore haxamaikoharene, hamawaiyeharene, <sup>34</sup> hoka nehena: — Kalore noxamaikohalini nokihixita nohiye, motya aijita ene natyo. Alitehena xiso hoka xikaose hoka xiyaiyahokotyoa nohakakoani — nexa.

<sup>35</sup> Hatyaoseta xanehitiya sekose aka hoka totahi waikoa hoka axa Enore, kasani emaisaheta enonita nikare kaxomokakehenere nonitata aokita hoka.

<sup>36</sup> Hoka exakere iraexatya: — Abá! Hisoiya atyo tyotyaha xalini hare hisoma. Hoka maika hemaisahetehena exe erakakalati noxemakawatikisase noniti. Xakore hoka maisaiya atyo naokitere akereeta xini kaomaka hoka maika atyo haokitere akereeta kaomaka — nexa.

<sup>37</sup> Hatyaoseta haikoaheta hoka waiyehena atyo hanamahare exaotyakiraharenai atyo nemakita hoka nehena Pedro hiye: — Xoana hisemakita, Simão?

Xoana maisaiya ini hekoti hikaose hoka hiyaiyahokoty-oita? <sup>38</sup> Maika xikaose xiyaiyahokotyoa exahe xiraexatya maisa xikahasakaharetyakita maheta. Hiyaiya, maisa xakore iniyalahare maniya xisaona xaokowiye hoka xiháre atyo maisa kinaterexe — nexa.

<sup>39</sup> Hatyaoseta xanehitiya hoka iraexahitiya, hetati iraetere akereeta. <sup>40</sup> Hatyaoseta haikoaheta haxaotyakiraharenai ana hoka nemakahitaha waiyehenahitiyene. Enemakaha kalore kaweta hoka maisa kaosexeha. Hoka maisa aliyakere Jesus ana ekoaxatyareha.

<sup>41</sup> Hatyaoseta Jesus haikoaheta ehanamakinihena hiye hoka nexa: — Xoana xisemakitata, xikawinitata? Nikahena, enaosetya xane hikoa. Xiyaiya, Haliti Ityani atyo kamatawatyakehena iniyalahare nomaseharenai ana. <sup>42</sup> Xatityoahetehena hoka wiyaneheta. Xiyaiya, owehena haliti nomatawatyasehare — nexa.

### Jesus Kaberexotyaka

(Mateus 26.47-56; Lucas 22.47-53; João 18.3-12)

<sup>43</sup> Jesus iraetata ene hoka Judas kaoka, 12-hare exaotyakirahare konitare. Kahare haliti tyoa exema, kesekase, atyalihose harenai kakoare. Sacerdotenai xekohaseharenai, judeunai nawenatyakaho kakoa waiyoreterenai, exahe judeunai nityohalitiranai harenai xaxikela xema tyoahitaha.

<sup>44</sup> Ematawatyasehare Judas koxaka irae ekakoaha hoka aimenekohena enomanaha hoka nexa: — Nasohitanakolihenerira xotoka hoka xakolatya — nexa.

<sup>45</sup> Hatyaoseta kaoka hoka xane rota Jesus haliya hoka nehena ihiye: — Xoana waiye hisaonita, Xaotyakisatiye? nexa hoka sohitanakolisene.

<sup>46</sup> Hatyaoseta otokaha Jesus hoka olatyahene.

<sup>47</sup> Hatyaoseta hatya nali tyaonitere iya kesekase hoka

mokotya sacerdotenai xekohasehare wakanehare hoka aikotya itinihe.

<sup>48</sup> Hatyaoseta Jesus nexa ihiyeha: — Xoana hoka xisoo xotohena, xolahena natyo maheta hoka ke-sekase kakoa, atyalihose harenai kakoa xisoo nomani? Hoka xalijiniharexe akereta xamoka natyo. <sup>49</sup> Wáhakiya notyaonita xinekoni hoka naotyakijita haliti Iraex-atyikalati Hanako hoka maisa xotokare natyo. Xakore hoka Iraití Waiyexe xakaihenere akereta atyo kawenatyaka maheta exakere xamoka natyo — nexa.

<sup>50</sup> Hatyaoseta tyotya exaotyakiraharenai halakisaha Jesus hoka tekoaha. <sup>51</sup> Hoka hatya xoimahaliti, imiti taose kakoa olalisoare taita, xaneta Jesus xema hoka haiyanai otokahene aokowi. <sup>52</sup> Xakore hoka halakisa imiti taose ekahekoaha hoka tekoa, maimahiro.

### Jesus Kolatyaha Kalorexenai Nahalakoa

(Mateus 26.57-68; Lucas 22.54-55, 63-71; João 18.13-14, 19-24)

<sup>53</sup> Hatyaoseta xaneha Jesus kakoa sacerdotenai xekohasehare hana nali. Koxaka hatyo nali exekohasenaiha hohisakoahitaha, judeunai nityohalitranaí exahe enawenatyakaho kakoa waiyoreterenai harenai kakoa. <sup>54</sup> Pedro xane Jesus xema sekoseta, xane isoa sacerdotenai xekohasehare hana talalahoko ako. Hoka xane tyoka irikatyaose wakaharenai haliya jijikoa maheta.

<sup>55</sup> Hatyaoseta sacerdotenai xekohaseharenai, tyotya kalorexenai xakore sema aokowiha xolani hare Jesus tahi akiti hoka aisahene aokowiha hoka maisa xoare hare semahitaha. <sup>56</sup> Kahare iraeaha etahi hamaoseralaha. Xakore hoka hawarehare xakini xakaiha.

<sup>57</sup> Hatyaoseta haiyaharenai tityoaha hoka Jesus irae-harehenaha hamaoseralaha hoka nehenaha: <sup>58</sup> — Wasema iniraene exakere: “Namawenekoarehetaite exe Iraexatyakalati Hana halitinaí tyomehenere hoka hanamaki ferakene kakoa taitaite notyomehetene. Hatyo atyoite maisa halitinaí nómane xini”, nita — nexaha.

<sup>59</sup> Nexaha xakore hoka hawarehare xakini xakaiha.

<sup>60</sup> Hatyaoseta sacerdotenai xekohasehare tityoa enekonitaha hoka axehena Jesus: — Xoana maisaite xoare hiraeta exe hiraeharetyaka nahalakoa? nexa.

<sup>61</sup> Xakore hoka Jesus mema tyaona, maisa xoare nexa iraeata.

Hatyaoseta sacerdotenai xekohasehare axehitiyene: — Xoana, Enore Waiyexe Ityani hiso, Enore Kalorexe Aohenere hiso? nexa.

<sup>62</sup> Hoka Jesus nehena: — Há, natyo. Xityotyaité xiyaiyehena Haliti Ityani nokane Enore kinaterexe haliya, ifihini maniya, exahe exexoaneheta kaiminiti konita enokoata hoka — nexa Jesus ihiyeha.

<sup>63</sup> Hatyaoseta hatyo sacerdotenai xekohasehare haima halalaka (hotikisa maheta haxamaikoharene) hoka nehena: — Maisaiya atyo xoare maheta etahi akiti hatya xakai wihiyé waohitita. <sup>64</sup> Xiyaiya, xasema atyo iniraene iniyalahare Enore akiti. Xoanaite wamohenene? nexa.

Tyotyaha kahalakoaharahitaha Jesus kakoa hoka exaisaka aokaha.

<sup>65</sup> Hatyaoseta haiyaharenai xataholisene, talatihotyahene hoka mokotyahene hoka nehenaha: — Hotehena, xalatyá mokotyá hiso? nexaha.

Exahe sorarenai tehitiya otokene hoka mokotene.

### Pedro Hamawaiyanenehare Aoka Jesus

(Mateus 26.69-75; Lucas 22.55-62; João 18.15-18, 25-27)

<sup>66</sup> Pedro ekatyahexe talarehoko ako tyaonita ene hoka hatya sacerdotenai xekohasehare wakanehalo hikoá enomana. <sup>67</sup> Hoka waiya Pedro jijikoaene irikati haliya, hoka waiye wahakotyá enomana hoka nehena: — Hiso tehitiya ene Jesus Nazaré yere haliya hisaonita — nexa.

<sup>68</sup> Xakore hoka teraharetyoa hoka nehena: — Maisa atyo nowaiyanihare xini, exahe maisa waiyekehalakere nomani hatyo hiraetere akiti — nexa.

Nexa hoka hikoaheta hatyo nalita. Hoka xane talarehoko xisoakala maniya. Hatyo xowaka takoira kawihena.

<sup>69</sup> Hatyaoseta hatyo wakahalo waiyehitiya Pedro hoka nehena nali tyaoniterenai hiye: — Exe haliti atyo enekonitareha — nexa.

<sup>70</sup> Xakore hoka Pedro teraharetyoahitiya.

Hatyaoseta mawaheneta hoka nehenahitiya ihije nali tyaoniterenai: — Aliterexe atyo enekonitareha hiso. Hiyaiya, Galiléia koa tare atyo hiso — nexaha.

<sup>71</sup> Hoka Pedro nehena: — Maisa atyo nowaiyanihare xini hatyo haliti xiyakaitere. Alitere naokita. Ikoiya namaoseraita hoka ehokoretaiya Enore hatyohare hiyeta iniyalahare moka natyo — nexa.

<sup>72</sup> Hatyo xowaka takoira kawihitiya, hatyo kakoa hinamakihena kawijita. Hoka Pedro oteheta Jesus niraene: “Takoira hinamaki makawiraharenetaite hanamaki hat-eraharetyoa, himawaiyanenehare ite haoka natyo”, nehenere. Hatyaoseta Pedro kehaharetyoaheta hoka tiyahena.

### Jesus Kolatyaha Pilatos Ana

(Mateus 27.1-2, 11-14; Lucas 23.1-5; João 18.28-38)

**15** Kamaetali witita sacerdotenai xekohaseharenai, ahohisakoatyakakoaha judeunai nityohalitranaí, judeunai nawenatyakaho kakoa waiyoreterenai harenai kakoa hoka iraeakakoaha. Hatyaoseta Jesus kolatyaha hoka xaneha ekakoa kalorexe Pilatos nali. Hoka isahene enomana.

<sup>2</sup> Hoka Pilatos axene: — Xoana, judeunai xekohase kalorexe hiso? nexa.

— Hiso atyo nikare hiraeta — nexa Jesus ihije.

<sup>3</sup> Hatyaoseta sacerdotenai xekohasenai kahare irae-haretene hoka mema tyaona.

<sup>4</sup> Hatyaoseta Pilatos axehitiyene: — Xoana maisaite xoare hita? Hiyaiya, kahare iraeaharetyahitaha hiso — nexa ihije.

<sup>5</sup> Xakore hoka Jesus mema tyaonehitiya. Hoka Pilatos hakaharetyoa moka.

**Jesus Kahalakisaka Kaxaisaka Maheta**

(Mateus 27.15-26; Lucas 23.13-25; João 18.39-19.16)

<sup>6</sup> Hisehaliti Páscoa xowakehena nihatyaka Pilatos aihikoahitita hatya berexo ako tyaoniterenai konitare halitinai xaxane xema. <sup>7</sup> Hatyo xowaka Barrabás nexarexe berexo ako tyaonita, haiyaharenai katawane akahenerenai kakoa. <sup>8</sup> Hatyaoseta halitinai tyoaha hoka hawenanahoha akereta axehenaha Pilatos. Kasani aihikoaheta hatya berexoako tyaonitere enomanaha aokaha.

<sup>9</sup> Hoka Pilatos axahene: — Xoana, judeunai xekohasehare kalorexe naihikoaheta xomana xaokita? nexa.

<sup>10</sup> Waiyekehalakita atyo enomana sacerdotenai xekohaseharenai nokoawaharene Jesus hiye. Hatyohare hiyeta tyoaha ekakoa enali hoka isahene enomana.

<sup>11</sup> Hatyaoseta sacerdotenai xekohaseharenai aiyateretyoaha halitinai xahita. Kasani axaha Pilatos hoka Jesus wenekoare aihikoaheta Barrabás enomanaha aokaha.

<sup>12</sup> Hoka Pilatos axehenahitiyene: — Hoka xoanaite namohena exe haliti, judeunai xekohasehare kalorexe xaokitere? nexa.

<sup>13</sup> — Haberekohenene atyalihose xaimaholatyaka hiye — nexa kawiyatya halitinai.

<sup>14</sup> — Hoka xoaretya tyoma iniyalahare? nexa Pilatos. Hoka tyotyaha exahere kintyaxa kawiyatya: — Haberekohenene atyalihose xaimaholatyaka hiye! Haberekohenene atyalihose xaimaholatyaka hiye! nexaha.

<sup>15</sup> Hatyaoseta Pilatos kasani halitinai emaxalokisa aokowita hoka Barrabás aihikoaheta enomanaha. Hatyo najikinita Jesus mokonasetyaka militihi kakoa aoka sorarenai hiye. Hatyaoseta halakisene enomanaha berekotyahene maheta atyalihose xaimaholatyaka hiye.

**Sorarenai Koexahalisaha Jesus**

(Mateus 27.27-31; João 19.2-3)

<sup>16</sup> Hatyaoseta sorarenai xane Jesus kakoa kalorexe hakatyakala hanako nali hoka tyoty sorarenai aho-hisakoatyaha. <sup>17</sup> Hatyaoseta aisoakisaha Jesus imiti xotere nase ako. Tyomaha xolatyao-lisoakalati katohere kakoare hoka mokahene eseri hiye.

<sup>18</sup> Hatyaoseta koexahaxahenaha ekakoa hoka nehenaha: — Hawaiiyeta womana, judeunai xekohase! nexaha.

<sup>19</sup> Hatyaoseta mokotyahene eseri hiye atyakase kakoa, xataholisahene. Tyokaha hakaoliseha kakoa enahalakoa hoka motya ekoamaniya nawenatyaharenai aokowiha. <sup>20</sup> Hatyaoseta halakisaha hahiralahene hoka aitoakihenahitaha imiti xotere nase ihiyeta hoka inimako aisoakihenahitene. Hatyaoseta xaneha ekakoa berekotyahene atyalihose xaimaholatyaka hiye maheta.

**Jesus Kaberekotyaka Atyalihose Xaimaholatyaka Hiye**

(Mateus 27.32-44; Lucas 23.26-43; João 19.17-27)

<sup>21</sup> Xanahitaha ene hoka ahotyaho ahalakoatyaha hatya haliti, Simão nexarexe, wenakalati Cirene yere, Alexandre Rufo xoaha nexa atyo. Maseta ene tyohitita hoka otokaha Simão hoka Jesus berekotyakala niyahare atyalihose xaimaholatyaka kolatyaka aokaha ihiye.

<sup>22</sup> Hatyaoseta xaneha Jesus kakoa Gólgota aokahitere nali. Gólgota atyo “Seriti Akerehare Aose” nita. <sup>23</sup> Isaha xakore enomana aokowiha vinho xa kaketaxatyaka makehexaharetyoaniti niyahare mirra kakoare hoka maisa teritene.

<sup>24</sup> Hatyaoseta berekotyahene atyalihose xaimaholatyaka hiye. Hatyaoseta iraka kakoaha aokowihenaha inima nase hoka hasakaharetyakakoaha, xala xamani tyaona ekakoa maheta. <sup>25</sup> Eno kamaihana hoka berekotyaha Jesus. <sup>26</sup> Eseri haomaniya mokaha exawaiyekehalakalaha niyahare taba taose xairatise kakoare, exakerexe:

**JUDEUNAI XEKOHASEHARE KALOREXE**

<sup>27</sup> Berekytyaha tehitiya atyalihose xaimaholatyakanai hiye hinamahare kaiwarexenai ehaliya, hatya ifihini maniya, hatya ewatone maniya xoaha. <sup>28</sup> Nikare tyaona Iraeti Waiyexe irahenere akereta:

Haliti xalijiniharexe akereta kaxomokaka. <sup>29</sup> Hatyo nali jiyiterenai koexahaxatyahitaha ekakoa, xalawalisaha haseriha enomana hoka nexahitaha ihiye: — Hisoia atyo hamawenekoaretya Iraex-atyakalati Hana hoka hanamaki ferakene kakoitaiya hisomehetene haoka. <sup>30</sup> Hoka hexoahetehena hiberekotyaka aoseta hoka hisota hiyoawihetehena! nexaha.

<sup>31</sup> Sacerdotenai xekohasenai, judeunai nawenatyakaho kakoa waiyoreterenai harenai koexahaxatyahitaha ekakoa hoka nexahitaha: — Haiyanai xakoane atyo iyehitita iniyalahare nonitata hoka xoana hoka maisa hatyota iyoawihetere. <sup>32</sup> Nikahena Enore Kalorexe Aohenere, Israel yerenai xekohasehare. Hexoahetehena hiberekotyaka aoseta hoka wityakeko hiso — nexahitaha.

Kaiwarexenai kaberekotyakehenerenai Jesus haliya tehitiya kirawanahene hoka aiyalatyaha enomana.

**Jesus Waini**

(Mateus 27.45-56; Lucas 23.44-49; João 19.28-30)

<sup>33</sup> Hatyaoseta totahikoahena hoka makalirohena hakakoare waikohekoa. Heko makaliro tyaona makakoa kijija.

<sup>34</sup> Makakoahena hoka Jesus kintyaxa kawiyatya: — Eloí, eloí, lemá sabactani — nexa. Exe iraeti atyo exakerite nita: “Nenorexi, nenorexi, xoana hoka hahalakisa natyo?” nita.

<sup>35</sup> Haiyaharenai nali tyaoniterenai semaha hatyo iniraene hoka nehenaha: — Xasemehena, kawijitaore Elias — nexaha.

<sup>36</sup> Hatyaoseta hatya tema xane vinho xaiya mitoloka tihaharetyoakalati hoka mokene atyakase keteho hoka aimatene Jesus ana terene maheta hoka nehena: — Awijira hoka wiyaiya, xoana Elias xamanite tyoa iye-hetene atya hiyeta — nexa.

<sup>37</sup> Hatyaoseta Jesus kinyatya kawiyatya hoka waini.

<sup>38</sup> Hatyo xowaka imiti kalotaosero, Iraexatyakalati Hanako sololoitere halalako nekese hoka hinama taose tyaona, eno maniyata halalako, waikoa maniya exoaheta.

<sup>39</sup> Sorare xekohasehare tityoita Jesus kaberekotyakehenere naheta maniya hoka sema ekawira, exahe waiya ekamane hoka nexa: — Aliterexe ene exe haliti Enore Ityani — nexa.

<sup>40</sup> Haiyahalonai ohironai tehitiya, hatyo nali tyaonahitaha hoka sekota wahakotyahitaha. Enekonihia Maria Madalena, Salomé, Maria, Tiago xoimere exahe José xoaha nityo. <sup>41</sup> Hatyo ohironai atyo tyoaha exahe kahinaetyaha Jesus Galiléia nali tyaonitaterere xowakiya. Kahare tehitiya nali haiyahalonai xanehenolonai exema Jerusalém xeta.

### Jesus Kaxafityaka

(Mateus 27.57-61; Lucas 23.50-56; João 19.38-42)

<sup>42</sup> Makehena hoka José kaoka. Wenakalati Arimatéia nalitare atyo. José atyo xekohasetinai konitare. Hatyo tehitiya atyahita Xekohaseti kalorexe tyoanene xahita Enore nalita. <sup>43</sup> Hatyo xowaka memere judeunai moka akatyahitaha, okoi sábadó ferakenehena hoka. Hatyo hiyeta José hamamairanenehare kakoita xane axeheta Pilatos Jesus háre.

<sup>44</sup> Pilatos hakaharetyoa, Jesus kamane sema hoka. Hatyaoseta kawisa sorare xekohasehare axene maheta, otene xamani Jesus waini hoka. <sup>45</sup> Hatyaoseta sorare xekohasehare xakai etahi hoka Pilatos halakisa José ana Jesus háre.

<sup>46</sup> Hatyaoseta José imiti kese taosero iya hoka xane iyeheta Jesus háre atyalihose xaimaholatyaka hiyeta. Hoka olahisetene hatyo imiti taose kakoa. Hatyaoseta xane mokene xawatyakalati ako, sehali kalorexe kakoakotyaka ako. Hatyaoseta talirika sehali kalotaosero jhotya maheta hatyo xawatyakalati.

<sup>47</sup> Maria Madalena, José nityo Maria xoaha wahakotyahitaha hoka waiyaha Jesus háre xomokaka.

### Jesus Kaseheta

(Mateus 28.1-8; Lucas 24.1-12; João 20.1-10)

**16** Sábado ferakene najikinita, Maria Madalena, Salomé, Tiago nityo Maria xoaha, iyaha airaxeronai Jesus háre hiye mokahene maheta. <sup>2</sup> Domingo xowaka, witita, kamai hikoahena hoka xaneha xawatyakalati nali. <sup>3</sup> Ahoti xanahitaha hoka nexakakoahitaha: — Xalaite kikihena womana séhali xawatyakalati jihola?

<sup>4</sup> Nikare irae kakoahitaha, hatyo séhali kaloli hoka. Hoka xane kaokaha hoka waiyehenaha atyo koxaka atyo séhali kakikisakeheta. <sup>5</sup> Hatyaoseta isoaha

xawatyakalati ako hoka waiyaha xoimahaliti, iyomere imiti akore, tyokita ifihini maniya hoka mairaha.

<sup>6</sup> Hatyaoseta hatyo xoimahaliti nehena: — Awa atyo ximaira! Waiyekehalakita nomani, Jesus Nazaré yere xatawita, etake kaberekotyakehenere atyalihose xaimaholatyaka hiye. Maisa atyo ali akeheta, koxaka atyo kaseheta. Xiyaiyaore mohenaherene aose — nexa. <sup>7</sup> — Hoka xiyanehetehena hoka xiyakaihena Pedro hiye, haiyaharenai exaotyakiraharenai xoaha hiye. “Xanehenaite xaheta maniya Galiléia koa xeta. Nalite xiyaiyehetene iraetere xikakoa akereta”, xehena ihiyeha — nexa.

<sup>8</sup> Hatyaoseta hikoahenahitaha hoka tekoahenahitaha xawatyakalati nalita. Mairahitaha, tatakoahitaha hoka maisa xoare xakaitaha haiyanai hiye. Kalore mairaha hoka.

### Jesus Kaotyakeheta Maria Madalena Ana

(Mateus 28.9-10; João 20.11-18)

<sup>9</sup> Jesus atyo weta kaseheta, domingo xowaka hoka Maria Madalena ana hotohare kaotyakeheta. Hatyo nonitata atyo 7-hare isekohaliti iniyalahare axaniki-heta, toahiya. <sup>10</sup> Kaotyakeheta enomana hoka xane xakaini Jesus hinaeharenai hiye, tiyahitaha exahe amaikohare ahitaha hoka.

<sup>11</sup> Semaha ekaseneheta, ekaotyakeneheta enomana hoka maisa tyakekoahitaha.

### Jesus Kaotyakeheta Hinamahare Haxaotyakiraharenai Ana

(Lucas 24.13-35)

<sup>12</sup> Hatyaoseta Jesus hawareharexe kaotyakehetehitiya hinamahare haxaotyakiraharenai ana ahotyaho, hako wenakalati xeta xanahitaha hoka. <sup>13</sup> Hatyaoseta haikoahenahitaha hoka hatyo akiti xakaiha haiyaharenai exaotyakiraharenai hiye. Xakore hoka maisa tyakekoahitaha hatyo hinamaharenai xakaini.

### Jesus Kaotyakeheta 11-hare Haxaotyakiraharenai Ana

(Mateus 28.16-20; Lucas 24.36-49; João 20.19-23; Atos 1.3-8)

<sup>14</sup> Hatyaoseta Jesus kaotyakeheta 11-hare haxaotyakiraharenai ana, kanakairahitaha hoka. Hatyaoseta ahenexatya enomanaha matyakekohenahere exahe masemaxemarehenahere haiyanai ekaseneheta tahi xakaihenahere hoka matyakekohenahere hiyeta.

<sup>15</sup> Hatyaoseta nexa ihiyeha: — Xiyanehena hakakoarekoa waikohekoa hoka xiyakaihena Iraitii Waiyexe tahi tyotyala haliti hotyalinai hiye. <sup>16</sup> Xala xamani atyoite tyakeko hoka kabatixatyaka hoka hatyo atyoite kaiyakeheta. Hoka xala xamani atyoite maisa tyakekota hoka hatyo atyoite kaxawatyaka. <sup>17</sup> Hoka tyakekohenerenai ana atyoite iyateliti kaxekaka hoka exe harenaite waiyexe tyomaha: axanikihenahitahaite isekohaliti iniyalahare nexare kakoa, exahe mase-makahare xako ite irae. <sup>18</sup> Exahiya owi otokaha xamani, teraha xamaniya howexere hoka maisaiya xoana tyaonahitaha. Hakahenaiha ite ekaokakihenaha

hokakiterenai hiye hoka kinaterehenahitaha ite — nexa.

**Jesus Xaneheta Enokoa Xeta**  
(Lucas 24.50-53; Atos 1.9-11)

<sup>19</sup> Iraehenere ekakoaha najikinita Xekohaseti Jesus kakolatyaka enokoa xeta hoka tyoka Enore fihini maniya.

<sup>20</sup> Hatyaoseta exaotyakiraharenai xane tyotya we-nakalatinai hakakoarekoa Iraeti Waiyexe xakaiha maheta. Hoka Xekohaseti kahinaetyahene, xolani hare waiyexe tyomehenaha hoka hatyohare hiyeta halitinai tyakekoha exakainiha maheta.



# Lucas

## Xairahenerene Niraene

**1** Xekohaseti Teófilo: Kahare haiyaharenai atyo aiy-ateretyoaha xairatyaha maheta xoalini hare kaotyakehenereharenai winekoni tahi. <sup>2</sup> Xairatyaha atyo xakaihenaherehare wihiye, hatyoharenai waiyehenereharenai hetati xowakiyata, exahe xakaihenahere iraiti tahi. <sup>3</sup> Hatyo hiyeta, xekohaseti, tyotya nawaiyore, aliyakereta xamani hatyoharenai kaotyakehenerehare hetati xowakiya kakoa, hoka nahekotya hoka kasani tyotya hatyoharenai waiyekehalaka naxairaheta homana naokowi, <sup>4</sup> waiyekehalaka homana maheta, iraiti aliterexe tahi kakoa hikaxaotyakisakenerehare.

## João Batista Nawenane Tahi Kaxakaisaka

<sup>5</sup> Herodes kalorexe tyaonitere judeunai waikoherakoa xowaka Zacarias nexarexe sacerdote tyaonita. Hatyo atyo sacerdotenai Abias hotyalinai konitare. Exanityo atyo Isabel nexalolo, hatyo tehitiya atyo sacerdotenai ityaninai konitalo. <sup>6</sup> Hatyo haiyanityo kakoarenai waiye maniya taita tyaonahitaha Enore haotita, exahe tyakekoahitaha aliterexe Xekohaseti xaotyakiraho exahe niraene. <sup>7</sup> Xakore hoka maisa kaisaniyeha, Isabel maisanityakohalo hoka. Exahe hatyo hinamanai koxaka ohiyeha hoka.

<sup>8</sup> Haxowakiya Zacarias tyomita hahatene sacerdote hatene harero Enore haotita, enómane xowakehena hatyo hateniti ferakiti nihatyaka tyomahitere hoka. <sup>9</sup> Sacerdotenai nawenanaho akereta axikatyahene keratya maheta incenso ekeratyakalaose. Hatyo hiyeta isoa Xekohaseti anere Iraexatyakalati Hanako. <sup>10</sup> Hoka incenso keritere nase halitinai menanakita iraexatyahitaha.

<sup>11</sup> Hatyaoseta hatya anjo Xekohaseti nalitare kaotyaka Zacarias nahalakoa, tityoare keratyakalati aose fihini maniya, incenso keritere nali. <sup>12</sup> Hatyaoseta Zacarias waiyene hoka maira, exahe maisa aliyakere tyaona xaka mokene.

<sup>13</sup> Xakore hoka anjo nexa ihiye: — Awa atyo himaira, Zacarias! Enore sema hiraexala. Hexanityoite hamokose kaisani hoka João nexarexe ite hakaexaretene. <sup>14</sup> Tyaonaite hoka himaxaloite ekakoa, exahe haiyanaite hoka maxalo ekakoa. <sup>15</sup> Hatyo atyoite kalorexe tyaona Enore ana. Maisaiya atyo vinhoxa terita, kawexere harenai. Isekohaliti Waiyexe kakoare atyoite tyaona tyaohenere ferakenitita. <sup>16</sup> Hoka kahare ite Israel hotyalinai Xekohaseti koamaniya axomoka

nikisa, Israel yerenai Nenorexa koamaniya. <sup>17</sup> Enore niraene xakaisasehare akeretaite tyaona, exahe kinatere ite iraiti xakaisasehare Elias akereta. Hatyoite aotyakisa nexekatinai, ityaninai hoka mehexasikohare tyaona, exahe masemaxemalaharenaite axomokanikiheta wenati waiyexe maniya. Hoka memere ite moka Israel hotyalinai Xekohaseti kaokene niyahare.

<sup>18</sup> Hatyaoseta Zacarias axa anjo: — Aliyakeriya hatyoharenai notyakekohena? Nonityohaliti kaiserehare, nexanityo tehitiya hoka.

<sup>19</sup> Hoka anjo nexa: — Natyo atyo Gabriel, Enore wakanehare. Hatyo atyo axikatya natyo noxakai hihiye maheta exe iraiti waiyexe. <sup>20</sup> Maisa atyo hityakekota niraeni, xakore hoka hatyoharenai atyoite enaose xowakehena hoka kaotyaka. Hoka maisa tyare atyo hityakekota hoka himairaenehare ite hisaona, exahe maisaite hiraehitita hityani tyaohenere ferakene kijiya.

<sup>21</sup> Hatyo nase halitinai atyahitaha Zacarias, exahe tyotyaha hakaharetyoahitaha ehowitiharene Iraexatyakalati Hanako kakoa. <sup>22</sup> Hikoaheta hoka Zacarias maisa irahitita. Hatyaoseta waiyekehalaka enomana-ha xoalinihare ewaiyane Iraexatyakalati Hanako. Maisa iraexe hoka aimenekokoatya hakahenai kakoa halitinai ana.

<sup>23</sup> Hatyaoseta Zacarias miyatya hahatene Iraexatyakalati Hanako hoka xaneheta hawenakala xeta. <sup>24</sup> Hatyo najikinita, maisa wahita hoka, exanityo Isabel tifalo hoka 5-mijini maisa hikoare hekoti hahanakota. Hoka nexa: <sup>25</sup> — Kalikini tyare atyo Xekohaseti kahi-naetya natyo hoka maisaiya atyo xalahare kirawanehitita natyo nomaisanihaloni hiyeta — nexa.

## Jesus Nawenane Tahi Kaxakaisaka

<sup>26</sup> Hatyaoseta 6-mijinihena Isabel tifalo tyaonita hoka Enore axikatya anjo Gabriel hatya wenakalati Galiléia koka, Nazaré aokahitere nali. <sup>27</sup> Hoka hatyo anjo atyo kolaita iraiti hatya mawatyalisakahalotatere okoi kaiyanenehenolo hatya haliti José nexarexe kakoa ana. José atyo xekohaseti Davi jikolaharenae konitare. Hatyo mawatyalisakahalotatere atyo Maria nexalolo.

<sup>28</sup> Hatyaoseta anjo tyoa hoka nexa: — Hihalalohena, Maria! Hiso atyo waiye hikaxomokakita. Xekohaseti atyo kaxaikota hiso — nexa.

<sup>29</sup> Hoka Maria sema anjo niraene hoka maisa aliyakere tyaona xaka mokene. Hoka hahakahalotyoane kakoita ahokohena, xoare nexa xamani ala iraeta hoka.

<sup>30</sup> Hatyaoseta anjo nehitiya: — Awa atyo himaira, Maria. Enore atyo ihalahareta hikakoa. <sup>31</sup> Hitifaloite. Hawenakisaite hityani hoka hakaexaretene ite Jesus. <sup>32</sup> Hatyo atyoite kalorexe haliti tyaona hoka Enore Maxaixahityakahare Ityanite kaxaokaka. Xekohaseti Enore atyoite kalorexe mokene, enahetahare Davi akereta. <sup>33</sup> Hatyo atyoite Jacó jikolaharenai xekohase tyaota mene. Kalorexe enawenane atyoite maisa xoana hekota tyotita — nexa.

<sup>34</sup> Hatyaoseta Maria nexa anjo hiye: — Hatyoharenaiya maisa aliyakere. Hiyaiya, nomawatyalisakihalotata atyo — nexa.

<sup>35</sup> Hoka anjo nexa ihiye: — Isekohaliti Waiyexe ite tyoa homana hoka Enore niyaterene ite tyaona hikakoa. Hatyo hiyetaite xoimaite waiyexe, exahe Enore Ityani kaxaokaka. <sup>36</sup> Hotehena hihinaehalo Isabel. Maisaiya atyo kaisanita aokahitaha. Xakore hoka kalikini atyo 6-mijinihena tifalo tyaonita, inityohaloti xakore hoka. <sup>37</sup> Hiyaiya, Enore ana atyo maisa xoare hare maomakahare aka — nexa.

<sup>38</sup> Hoka Maria nexa: — Natyo atyo Enore wakanehalo, maika haokitere akereta nokaxomokaki — nexa. Hatyaoseta anjo xaneheta.

#### Maria Xane Waiya Isabel

<sup>39</sup> Hatyaoseta haiyakinai ferakene najikinita, Maria tyakihalotyua hoka ihalahalo xane wenakalati tyairinai koni tyaonitere, Judéia koa nali. <sup>40</sup> Xane kaoka hoka Zacarias hanako isoa hoka Isabel hiye katyawaxa.

<sup>41</sup> Maria katyawaxehena Isabel hiye hoka ityani moxomoxo ityakota. Hatyaoseta Isekohaliti Waiyexe tyaonita ekakoa hoka <sup>42</sup> Isabel nexa kinatyaxa: — Hiso atyo waiye hikaxomokakita tyoty ohironai koniyata, exahe xoima hikaisanihenere tehitiya atyoite waiye kaxomokaka. <sup>43</sup> Hoka xala ala natyo hoka Noxekohase nityo tyoa waiyita natyo? <sup>44</sup> Hikatyawaxehena nohiye hoka xoima ihalahare hoka moxomoxo nohiye notyakota. <sup>45</sup> Hiso atyo hawaiye. Hiyaiya, hityakekota atyo kaotyakehenerehare, Xekohaseti iraehenererehare hihiye — nexa.

#### Maria Xerane

<sup>46</sup> Hatyaoseta Maria nexa: — Nihalahalota Xekohaseti kakoa.

<sup>47</sup> Nihalahalota Enore hiyeta, nisekohalo Niyaseheta hiyeta.

<sup>48</sup> Hiyaiya, oteheta atyo natyo hawakanehalo, wakahalo taita xakore atyo natyo hoka.

Kalikinita atyoite tyotyaha ohiro waiye xomokakolo aohenaha natyo.

<sup>49</sup> Hiyaiya, Enore kinaterexe atyo kalore waiyexe tyoma nomani.

Enexare atyo waiyexe.

<sup>50</sup> Hotikijita atyo hawaiyexehare tyoty aiminijitereneharenai ana, tyoty ehotaliharenai konitare tyaonitereharenai kakoita ana.

<sup>51</sup> Aimatya atyo hakahe kinaterexe hoka jiyahaotita aokowiharetyoitereharenai exahekolanaiha kakoita.

<sup>52</sup> Kikihitita atyo enokahakalanai henota kalorexenai kinaterexenai, hoka mokita atyo waiyexeharexenae kalorexe tyaonaha maheta.

<sup>53</sup> Kalore atyo ijita nakairati nakitereharenai ana hoka axikahitita atyo kaxiyeharexenai eháreha firereta.

<sup>54</sup> Iraehenerere wahetakomaniyereharenai hiye akereta atyo tyoma hoka kahinaetya hawakaneharenai Israel hotyalinai.

<sup>55</sup> Oteheta hahotikira hawaiyexehare Abraão ana, tyoty ijikolaharenai xoaha ana hoka heko awaiyetyahene aokowihenererehare.

<sup>56</sup> Maria ala xoana xamani hoka hanama mijini hare tyaona Isabel haliya. Hatyo najikinita xaneheta hahana xeta.

#### João Batista Nawenane Tah

<sup>57</sup> Hatyaoseta Isabel ityani nawenanaosehena hoka tyaona enamokose. <sup>58</sup> Ehaliya tyaoniterenai, exahe ehotaliharenai xoahanai semaha kalore Xekohaseti awaiyehenerene hoka ihalahareha Isabel kakoa.

<sup>59</sup> Hoka 8-ki ferakenehena xoima tyaonitere najikinita xane aikonomanere milihehenahene hoka kaixaretyahene aokowihenaha enexe nexareta, Zacarias nexarexe.

<sup>60</sup> Xakore hoka inityo nexa: — Mahaiya. Enexare atyoite João — nexa.

<sup>61</sup> Hatyaoseta nexaha: — Xakore hoka maisa atyo hatyanai hekoti xinekonitarenai hatyo nexarexe aka — nexaha.

<sup>62</sup> Hatyaoseta aimenekokoatyaha enexe ana, axahitene xoare nexare xamaniya kaixaretya xoima aokowita hoka. <sup>63</sup> Hoka Zacarias axa xairatyakalati taba taose hoka xairatya: “Enexare atyo João”, nexa. Hoka tyotyaha hakaharetyoaha.

<sup>64</sup> Hatyaosehena hoka Zacarias iraexehetehitiya hoka ihalaharehena Enore kakoa. <sup>65</sup> Hoka ehaliya tyaoniterenai kalore mairaha. Hoka hatyoharenai tahi exaortyoa hakákoare tyairinai koni tyaoniterenai nali, Judéia koa nali.

<sup>66</sup> Tyoty semitereneharenai ahekotyahitaha hoka hatyohare tahi axahitaha: — Xoanahalanite exe xoima tyaohenaki? nexahitaha.

Hoka aliterexe atyo Xekohaseti niyaterene tyaonita ekakoa hoka.

#### Zacarias Niraene

<sup>67</sup> Hoka Zacarias, Isekohaliti Waiyexe kaxaihakoretya hoka xakaihakahena hoka nexa:

<sup>68</sup> — Nika wihalahare Xekohaseti kakoa, Israel Nenorexa kakoa. Hiyaiya, tyoa atyo kahinaetya hao-manerenae exahe isa maheta wenati waiyexe enomanaha.

<sup>69</sup> Axikatya atyo womana hatya kinaterexe Wiyasehaheta maheta, etake hawakanehare Davi jikolahare.

<sup>70</sup> Toahiyita atyo Enore exeharenai irae, waiyexe iraiti xakaisaseharenai koamaniyata.

<sup>71</sup> Iyeheta atyo wiso aokowi wahalakoaharenai nonitata, tyoty kirawaneterenai wiso nonitata.

<sup>72</sup> Hotikisa atyo aokowi hawayexehare wahetako-manियereharenai ana, exahe otehetata aokowi waiyexe iraehehenehare.

<sup>73</sup> Alitere atyo irae wahetahare Abraão hiye,

<sup>74</sup> iyeheta atyo wiso aokowi wahalakoaharenai nonita, hoka wisaona exema maniya wimamairaneharetata ma-heta aoka.

<sup>75</sup> Nikare tyoma, kasani tyotyaki ferakenenai wikasetatere xowaka enomanere taita wisaona maheta, hoka wisoma maheta aokitereharenai taita.

<sup>76</sup> Hoka hiso, haré, hiso atyoite Enore Kalorexe niraene xakaisasehare hikaxaokaka.

Hiso atyoite hiyanehena Xekohaseti nahitita, memere hamoka ahoti enomanere maheta.

<sup>77</sup> Hiyakaihenaita hihotyaliharenai hiye iniyakehenahitaha kaotyakehenerehare, kamaotyanyetakehete-henere iniyalahare enómaneha hiyeta tahi.

<sup>78</sup> Hiyaiya, wEnorexa atyo airakoaneharetayare, waiyexehare. Hoka aokanalisaite wiso haxaokanatyakala kakoa,

<sup>79</sup> Hoka enokoataite aokanalisa tyoty makaliroti maxakatyahene katawanexe katyahe tyaoniterenai ana, moheta wawenane waiyexe wenati maniya maheta — nexa.

<sup>80</sup> Hatyaoseta João kekoare hoka kinatere tyaona eháre, inisekohare xoaha. Hoka maharexakiti tyaona hotikisoawihenera Israel hotyalinai ana kijiya.

### Jesus Nawenane Tahi

(Mateus 1.18-25)

**2** Hatyo xowakiya xekohaseti Augusto axikatya hairaene tyoty halitinai ekaxaikonekoa tyaoniterenai ana, haexarenaiha isaha maheta hoka kaxihatya-ka halitinai maheta. <sup>2</sup> Hatyo hetati kaxihatya-kehahere xowaka Cirênio kalorexe tyaonita Síria nali.

<sup>3</sup> Hatyaoseta tyotyaha xaneha haexarenaiha isaha hawenakalanaiha nihatyaka.

<sup>4</sup> Hatyo hiyeta José xane Nazaréta, Galiléia nalita, Judéia koa xeta, hatya wenakalati Belém nexarexe nali, kalorexe Davi tyaohenere nali. José nali xane, Davi jikolahare hoka. <sup>5</sup> Xane haexare isa maheta Maria kakoa. Hatyo kakoa atyo tyaona aokowita exowaka. <sup>6</sup> Hoka tifalo exowaka, hoka Belém nali tyaonahitere nase, xoima nawenanaose xane hikoa. <sup>7</sup> Hoka Maria awe-nakisa hetatiye mokose haisani. Hoka aihonolisa xoima imiti taosenai kakoa hoka ehokokisene kirakahare nakaira xomokakala aose, maisa xoare aoseheta aka enomanaha nemakatyakalati hanako hoka.

### Kaxaikotyatiyenai Ana Kaotyaka Anjonai

<sup>8</sup> Hatyo nali kaxaikotyatiyenai tyaonahitaha makiya mase, kaxaikoahitaha hakalanerohanai. <sup>9</sup> Hatyaoseta hatya anjo Xekohaseti nalitare kaotyaka hoka Xeko-

haseti xaokanala werokere aokanalisa kaxaikotyatiyenai.

Hoka kalore mairaha <sup>10</sup> xakore hoka anjo nexa: — Awa atyo ximaira! Ali atyo notyoa Iraitu Waiyexe tahi noxakai xihye maheta. Hatyo atyo kaihalaharetyakere tahi, exahe tyoty halitinai ana tehitiya. <sup>11</sup> Kalikini Davi nawenakala nali tyaona Xiyasehareheta, Enore Kalorexe Aohenere, Xekohaseti! <sup>12</sup> Exakerite hoka xityakeko: xiyaiyaite hatya xoimaira exaihonolisakahare imiti taosenai kakoa, exetolikisakahare kirakahare nakaira xomokakala aose.

<sup>13</sup> Hatyaoseta kaotyaka kahare haiyaharenai anjonai hatyo anjo kakoa, motya sorarenai enokoatarenai. Hoka xerahitaha xerati, ihalahare ahitaha Enore kakoa hoka nexahitaha:

<sup>14</sup> — Maika kaihalaharetyaka Enore kakoa, enokoa xáhehare nenone!

Hoka maika waikohekoa mehaxaikohaliti tyaona halitinai waiye moka aokowitereharenai ana.

<sup>15</sup> Hatyaoseta anjonai xanehenahitaha enokoa xeta hoka kaxaikotyatiyenai nexakaoahenaha: — Wiyá Belém xeta hoka wiyaiya, xoana xamani nali tyaona hoka, exahe wiyaiya Xekohaseti xakaitere wihye — nexaha.

<sup>16</sup> Hoka kaholawakaha xaneha hoka wiyaha Maria, José xoaha hoka wiyaha xoima exetolikisakahare kirakahare nakaira xomokakala aose. <sup>17</sup> Hatyaoseta xakaiha anjonai iraehehene etahi ihiyeha. <sup>18</sup> Tyoty semiterenai kaxaikotyatiyenai xakaitereharenai hakaharetyoaha. <sup>19</sup> Hoka Maria otehetata tyoty hatyoharenai, kalore ahekoty etahiha hoka tyoty hatyoharenai hamahiyasakota moka.

<sup>20</sup> Hatyaoseta kaxaikotyatiyenai haikoahenahitaha mase xeta hoka xeraxahotyaha xerati ihalahalitiya Enore anere, semehenahere, waiyehenahere xoaha hiyeta. Anjo xakaitere akereta terota hoka.

### Xoima Kaexaretyaha

<sup>21</sup> Hasemanane najikinita xoima nomanere milihe xaikotyaka ferakene xane hikoa hoka kaixaretyahene Jesus nexarexe. Hatyo nexare terota atyo anjo kaexaretene, enawenane nahitita.

### Jesus Hotikisaha Iraexatyakalati Hanako

<sup>22</sup> Hatyaoseta xane hikoa Maria, José xoaha nómane Moisés Xaotyakiraho aokitere akereta ferakene. Hatyo hiyeta kolatyaha xoima Jerusalém xeta, hotikisahene maheta Xekohaseti ana. <sup>23</sup> Hiyaiya, exakere atyo xairatyoare tyaonita Xekohaseti Xaotyakiraho: “Tyoty hetatiye xoima atyoite kakikisaka, kaxaokaka Xekohaseti anere”, nexa. <sup>24</sup> Hoka xaneha tehitiya fetatyaha maheta hinamalise watyaha xamani, xoana hinamali kalotese xamani, Xaotyakiyaho akereta.

<sup>25</sup> Hatyo xowaka Jerusalém nali hatya haliti tyaonita, Simeão nexarexe. Waiyexehare, airakoaneharetayare, exahe atyahita Israel hotyalinai niyakeheta. Isekohaliti Waiyexe tyaonita ekakoa, <sup>26</sup> hoka hatyo Isekohaliti,

wainihenere nahitaitaite waiya Enore Kalorexe Aohenere, Xekohaseti xaxikalahare, aoka ihiye. <sup>27</sup> Iseko-haliti kaxaihakoretya Simeão hoka xane Iraex-  
atyakalati Hanako. Hoka enexe inityo kolatyahitaha  
xoima Jesus Iraexatyakalati Hanako xeta, tyomaha ma-  
heta Xaotyakiyaho aokitere akereta, <sup>28</sup> hoka Simeão iya  
xoima, hakanotalako mokene hoka ihalahare Enore  
kakoa.

Hoka nexa:

<sup>29</sup> — Xekohaseti, kalikini atyo hiraetere akereta hiso-  
ma, hoka kalikini atyoite waiye nowainihena.

<sup>30</sup> Hiyaiya, koxaka atyo nowaiya noxosenai kakoita  
halitinae hiyáneheta, exahe

<sup>31</sup> memere hamohenere tyotyta haliti hotyalinai naha-  
lakoa.

<sup>32</sup> Xaokanatyakalati hotikisa maheta hahotira tyotyta  
majudeuneharenai ana, exahe isa maheta wenati  
waiyexe hihotyaliharenai Israel yerenai ana.

<sup>33</sup> Xoima nexa, nityo xoaha hakaharetyoaha Simeão  
iraehenere etahi kakoa.

<sup>34</sup> Simeão wenati waiyexe aoka enomana hoka nexa  
Maria, Jesus nityo hiye: — Exe xoima atyo Enore  
xaxikalahare mawenekoaretya exahe iyeheta maheta  
kahare Israel yerenai. Exe xoima atyoite Enore  
xaimenekola hoka kahare ite haiyanai iraharetene.

<sup>35</sup> Nikare ite hoka exahekolanaiha metaharexenai  
kasemaka. Hoka xamaikohalitite kesekase  
ekawetyakahare akereta aikotyta himahiyase — nexa.

<sup>36</sup> Hoka nali hatya iraiti xakaisasehalo inityohaloti  
tyaonita. Wainiyanenero, enexalo atyo Ana. Fanuel ene  
ityani, Aser hotyalinai konitalo. 7-wanone tyaon-  
akakoahenahere najikinita exanene waini. <sup>37</sup> Hoka  
hatyo xowaka 84-wanonehena tyaonita. Hoka maisa  
kikisoahetolo hekoti Iraexatyakalati Hanakota hoka  
ferakoa, makiya xoaha Enore koamaniya tyaonita. Ka-  
haliki manakairita, iraexaita harenai. <sup>38</sup> Hatyaosehena  
hoka kaoka hoka ihalahalohena Enore kakoa, exahe  
iraehena xoima tahi tyotyaha Jerusalém niyakeheta  
xahita atyahiterenai hiye.

### José, Maria Haikoahetaha Nazaré Xeta

<sup>39</sup> Hoka miyakatyaha háomanaha tyotyta Xekohaseti  
Xaotyakiraho aokitere akereta hoka José, Maria xoaha  
haikoahenahitaha Galiléia xeta, hahanaha xeta, we-  
nakalati Nazaré nali. <sup>40</sup> Hoka xoima kekoareta hoka ki-  
naterere tyaonita. Kalore waiyoliti kakoare, exahe Enore  
waiye mokitene.

### Jesus Hekota Iraexatyakalati Hanako

<sup>41</sup> Tyotyta wanone Jesus nexa, nityo xanahitaha  
Jerusalém xeta hisehaliti Páscoa ana. <sup>42</sup> Hoka Jesus  
12-wanonehena hoka xaneha hisehaliti ana, hawe-  
naneha akereta. <sup>43</sup> Hoka hisehaliti tyotehenere najikini-  
ta haikoahenahitaha hahanaha xeta. Xakore hoka Je-  
sus hekota Jerusalém nali, hoka maisa atyo enexe, ini-  
tyo semitaha hatyohare tahi. <sup>44</sup> Exahekolaha hiye hoka  
motya haikoahititerenai koni tyaonita aokahitaha hoka

hatyo hiyeta haki ferakene tonahitaha taita. Hatyaose-  
ta tawehenahene hahinaeharenai, hawaiyaneharenai  
xoaha koni. <sup>45</sup> Hoka maisa kaokehenahititene hoka  
haikoahenahitaha Jerusalém xeta, tawehenahitene  
maheta. <sup>46</sup> Hanamaki ferakene najikinita kaoke-  
henahitene Iraexatyakalati Hanako, tyokita  
Xaotyakiyaho kakoa waiyoreterenai kakoa. Semita ini-  
raeneha, exahe axahitene xoaha. <sup>47</sup> Tyotyta iniraene  
semiterenai hakaharetyoahitaha iniraene kakoa,  
enawaiyore xekoaxala kakoa.

<sup>48</sup> Enexe, inityo waiyene hoka hakaharetyoaha tehi-  
tiya. Hoka inityo nexa ihiye: — Haré, xoana hoka ex-  
akere hisaona? Hexe, natyo xoaha kalore wimawaiye-  
hare watawita hiso hoka — nexa.

<sup>49</sup> Hoka Jesus nexa: — Xoana hoka xatawita natyo?  
Xoana maisa waiyekehalakere xomana Baba hanako  
notyaonehenere akiti? nexa.

<sup>50</sup> Xakore hoka maisa waiyekehalakita enomanaha  
iniraene.

<sup>51</sup> Hatyaoseta haikoaheta hanityo, hanexe kakoa  
Nazaré xeta. Hanexe, hanityo xoaha niraene semaxe-  
maita. Hoka tyotyta hatyoharenai inityo otyaxemaita.

<sup>52</sup> Hatyaoseta Jesus kekoareta haháre exahe hawaiy-  
ore xoaha kakoa. Enore, halitinai xoaha awaiyetitene.

### João Batista Niraene

(Mateus 3.1-12; Marcos 1.1-8; João 1.19-28)

**3** Koxaka Tibério kalorexe tyaonita Roma nali hoka  
exowaka Pôncio Pilatos kalorexe tyaonita Judéia  
koa nali. Herodes exowaka kalorexe tyaonita Galiléia  
nali, hoka iximarene Filipe exowaka Ituréia, Traconites  
xoahanai koa kalorexe tyaonita. Lisánias exowaka  
kalorexe tyaonita Abilene nali. <sup>2</sup> Anás, Caifás xoaha ex-  
owaka sacerdotenai xekohasena tyaonahitaha.

Hatyo xowakiya Enore isa maharexakiti nali iraiti João  
ana, Zacarias ityani ana. <sup>3</sup> Hoka João tonakoatya tyotyta  
wenakalatina tyaoniterenai one Jordão xa nali hoka  
xakaita exe iraiti:

— Xahalakihena iniyalahare xománenai hoka xika-  
batixatyaka hoka xománe iniyalahare Enore  
maotyaneheta — nita.

<sup>4</sup> Nikare tyaona iraiti xakaisasehare Isaías hababer-  
anexakoa xairahenere akereta:

Hatya haliti kawijita maharexakiti nali: Memere ahoti  
xamohena Xekohaseti naheta, maika totaho xamo-  
hena enaheta maniya.

<sup>5</sup> Tyotyta tyairi hekoakonaite kahexotyakeheta hoka  
tyairinai atyoite kaxehakakoatyakeheta. Ahoti  
katyokoahoterenai atyoite kaxaototahotyakeheta, exa-  
he ahotinai kenekoehero, mitikoehero harenai  
kakoare atyoite kaxehakakoahotyakeheta.

<sup>6</sup> Hoka tyotyta halitinaite waiyehenaha haiyasehare-  
henahita Enore nalitare.

<sup>7</sup> Hoka kahare halitinai xanahitaha João nali kabatix-  
atyakaha maheta. Hoka nita tyotyta ihiyeha:

— Owi xalijiniharexe hotyalinai! Xala irae xihiyeha hoka  
motyaite maisa iniyalahare xikaxomokakita xaokita,  
Enore kaheneharexe iniyalahare axikahenere xowaka?

<sup>8</sup> Maika xoalini hare waiyexe xisomehena hoka xahotikisa iniyalahare xawenane xihalakira maheta. Hoka awa atyo xexakakoahena: “Abraão atyo wahetahare hoka maisaiya Enore ehareta wihye”, xehena. Hiyaiya, aliterexe nomita xihye, exe sehalinai hiyeta kakoitaiya Enore tyoma Abraão jikolahare! <sup>9</sup> Hiyaiya, xawatise atyo memere tyaonita, irikotyā maheta atyakatenai ityahare kakoita. Tyotyā atyakatenai mawaiyerihare kalitereharenai atyoite kaxityokaka hoka kaxawatyaka irikatyaose — nita.

<sup>10</sup> Hoka halitinai axitene: — Hoka xoare ite wisomehena? nexahitaha.

<sup>11</sup> Hoka nita ihiehā: — Xala xamani atyo hinamanase kaimanase hoka maika isehena hanase maimanasehare ana, exahe maika xala xamani kanakairere hoka maika irákakoahene manakairahare kakoa — nexa.

<sup>12</sup> Haiyaharenai kalorexe noloxa resebetyaseharenai tehitiya kaokaha hoka axaha João: — Xaotyakisatiye, xoare ite wisomehena? nexaha.

<sup>13</sup> — Awa atyo kalorexe aokitere xahexe xaxa halitinai — nexa João ihiehā.

<sup>14</sup> Haiyaharenai sorarenai tehitiya axitene: — Hoka wiso, xoare ite wisomehena? nexaha.

Hoka João nita ihiehā: — Awa atyo haiyaharenai noloxa xiya iniyalahare xiyomokarene kakoa, exahe maoserare xiyakaini etahi xoaha kakoa. Hoka maika xihalaharehena xoloxa xaresebetitereharenai kakoa.

<sup>15</sup> Halitinai xatyahane hatyo xowaka aeroretyoa. Exahekolaha hiye hoka João motya Enore Kalorexe Aohenere aokahitaha.

<sup>16</sup> Xakore hoka João nexa tyotyā ihiehā: — Natyo atyo nabatixaita xiso one kakoa. Xakore hoka hatya atyo kaokhehena noxahehare, hoka maisaiya natyonae aliyakere namaxolaita ikijitini nanohi, hatyo atyo noxahehare hoka. Hatyo atyoite batixahena xiso Isekohaliti Waiyexe exahe irikati xoaha kakoa. <sup>17</sup> Abali koxaka ekahekoa. Hatyo kakoaita haware moka trigo ekate nonitata hoka trigo ite moka exomokakala ako, hoka keratyaite ekate irikati mawakenehare tyaonitere koni.

<sup>18</sup> Xakaihena Iraitī Waiyexe hoka João aotyakijita halitinai kahare maniyata. <sup>19</sup> Hatyaoseta João watyali xekohaseti Herodes tyaohenere Herodias haximarene kaiserehare exanityo kakoa hiyeta. Exahe xoalinihare iniyalahare tyomehenere xoaha hiyeta. <sup>20</sup> Hatyaoseta Herodes ehare hoka exahehare niyalahare tyoma: João xomokaka berexoako aoka.

### Jesus Kabatixatyaka

(Mateus 3.13-17; Marcos 1.9-11; João 1.32-34)

<sup>21</sup> Tyotyā halitinai kabatixatyakehenere najikinīta, Jesus tehitiya kabatixatyaka. Hoka iraexaita ene hoka enokoa majiholatyoa <sup>22</sup> hoka Isekohaliti Waiyexe exoa enomana watyaha akerehare. Hoka enokoata tyoa iraiti hoka nexa:

— Hiso atyo Nityani nawaiyetitere, kalore haihala-halinikijita natyo — nexa.

### Jesus Nahetakomaniyereharenai

(Mateus 1.1-17)

<sup>23</sup> Hoka Jesus hetati hahenere xowaka, kala xoana xamani hoka 30-wanonehena. Hoka ahekotyahitere akereata atyo,

José ityani atyo, hatyo atyo Eli ityani,

<sup>24</sup> Eli atyo Matate ityani,

Matate atyo Levi ityani,

Levi atyo Malqui ityani,

Malqui atyo Janai ityani,

Janai atyo José ityani,

<sup>25</sup> José atyo Matatias ityani,

Matatias atyo Amós ityani,

Amós atyo Naum ityani,

Naum atyo Esli ityani,

Esli atyo Nagai ityani,

<sup>26</sup> Nagai atyo Maate ityani,

Maate atyo Matatias ityani,

Matatias atyo Semei ityani,

Semei atyo José ityani,

José atyo Joda ityani,

<sup>27</sup> Joda atyo Joanā ityani,

Joanā atyo Resa ityani,

Resa atyo Zorobabel ityani,

Zorobabel atyo Salatiel ityani,

Salatiel atyo Neri ityani,

<sup>28</sup> Neri atyo Melqui ityani,

Melqui atyo Adi ityani,

Adi atyo Cosā ityani,

Cosā atyo Elmadão ityani,

Elmadão atyo Er ityani,

<sup>29</sup> Er atyo Josué ityani,

Josué atyo Eliézer ityani,

Eliézer atyo Jorim ityani,

Jorim atyo Matate ityani,

Matate atyo Levi ityani,

<sup>30</sup> Levi atyo Simeão ityani,

Simeão atyo Judá ityani,

Judá atyo José ityani,

José atyo Jonā ityani,

Jonā atyo Eliaquim ityani,

<sup>31</sup> Eliaquim atyo Meleá ityani,

Meleá atyo Mena ityani,

Mena atyo Matata ityani,

Matata atyo Natā ityani,

Natā atyo Davi ityani,

<sup>32</sup> Davi atyo Jessé ityani,

Jessé atyo Obede ityani,

Obede atyo Boaz ityani,

Boaz atyo Sala ityani,

Sala atyo Nassom ityani,

<sup>33</sup> Nassom atyo Aminadabe ityani,

Aminadabe atyo Admim ityani,

Admim atyo Arni ityani,

Arni atyo Esrom ityani,

Esrom atyo Peres ityani,

Peres atyo Judá ityani,

<sup>34</sup> Judá atyo Jacó ityani,  
 Jacó atyo Isaque ityani,  
 Isaque atyo Abraão ityani,  
 Abraão atyo Tera ityani,  
 Tera atyo Nacor ityani,  
<sup>35</sup> Nacor atyo Seruque ityani,  
 Seruque atyo Ragau ityani,  
 Ragau atyo Faleque ityani,  
 Faleque atyo Éber ityani,  
 Éber atyo Sala ityani,  
<sup>36</sup> Sala atyo Cainã ityani,  
 Cainã atyo Arfaxade ityani,  
 Arfaxade atyo Sem ityani,  
 Sem atyo Noé ityani,  
 Noé atyo Lameque ityani,  
<sup>37</sup> Lameque atyo Metusalém ityani,  
 Metusalém atyo Enoque ityani,  
 Enoque atyo Jarete ityani,  
 Jarete atyo Maleleel ityani,  
 Maleleel atyo Cainã ityani,  
<sup>38</sup> Cainã atyo Enos ityani,  
 Enos atyo Sete ityani,  
 Sete atyo Adão ityani,  
 Adão atyo Enore nomanehare.

#### Jesus Hasakaharetyaka Tahi

(Mateus 4.1-11; Marcos 1.12-13; Hebreus 2.18; 4.15)

**4** Jesus kakoa Isekohaliti Waiyexe tyaonita hoka haikoaheta one Jordão xa nalita hoka hatyo Isekohalitita axanikisene maharexakiti. <sup>2</sup> Hoka nali Tihanare hasakaharetene 40-ki ferakene. Hatyokinai maisa kanakairare hekoti hoka nakehena.

<sup>3</sup> Hatyaoseta Tihanare nexa ihiye: — Enore Ityaniya atyo hiso hoka exe sehalinai haikawatya nakairati hoka hikanakaira — nexa.

<sup>4</sup> Nexa hoka Jesus nexa: — Exakere Iraitit Waiyexe xairatyoare tyaonita:

Haliti atyo maisa nakairati xema taita xini tyaonita — nexa.

<sup>5</sup> Hatyaoseta Tihanare kolatya Jesus enoakiya hoka haxerore hotikisa enomana tyotya waikohekoa tyaoniterahrenai ixiyeharenae kakoita <sup>6</sup> hoka nexa: — Nisaite homana tyotya exe iyateliti, exahe exe xiyehaliti. Hiyaiya, tyotya exeharenai atyo kaxekaka nomani, hoka xala ana xamaniya atyo nisene naokowi hoka nisene. <sup>7</sup> Tyotya exeharenai atyoite homanere, hameholokoa nahalakoi hoka hawaiyetya natyo hoka — nexa.

<sup>8</sup> Hoka Jesus nexa: — Exakere Iraitit Waiyexe xairatyoare tyaonita:

Hawaiyehena hiyekohase Enore, exahe ekoamaniya taita hisaohena, nexa.

<sup>9</sup> Hatyaoseta Tihanare kolatene Jerusalém nali hoka mokene Iraexatyakalati Hana maiyeho enoakiyere akiti hoka nexa: — Enore Ityaniya atyo hiso hoka hahalaisoahetehena exaoseta waikoa xeta. <sup>10</sup> Hiyaiya, exakere Iraitit Waiyexe xairatyoare tyaonita:

Enore ite axikatya hanjoxanai kaxaiko hiso maheta, nexa.

<sup>11</sup> — Exakere tehitiya xairatyoare tyaonita:

Otokaite hiso hoka maisa hikijinai hekoti kawe hamokita sehalinai hiye, nexa.

<sup>12</sup> Hoka Jesus nexa: — Exakere Iraitit Waiyexe xairatyoare tyaonita:

Awa atyo hahasakaharetya Hiyekohase Enore, nexa.

<sup>13</sup> Hatyaoseta Tihanare miyatya hahasakaharera Jesus kahare maniyata hoka xaneheta haxowaka niyahare.

#### Jesus Hahena Galiléia Nali Hotohare

(Mateus 4.12-17; Marcos 1.14-15)

<sup>14</sup> Jesus haikoaheta Galiléia xeta hoka Isekohaliti Waiyexe niyatere tyaonita ekakoa. Etahiyakahare exaoretyoa hakákoare hatyokoa nali. <sup>15</sup> Hoka aotyakijita xahohisakoatyakalati hanakonai, exahe tyotya aexakeretyahitene.

#### Jesus Xane Nazaré Xeta

(Mateus 13.53-58; Marcos 6.1-6)

<sup>16</sup> Jesus xane wenakalati Nazaré xeta, enaihenere nali. Hoka sábadu xowaka háwenane akereta, xane xahohisakoatyakalati hanako. Nali tityoa kaexaretya maheta Iraitit Waiyexe kaxairatyakehenere, <sup>17</sup> hoka isaha enomana iraiti xakaisasehare Isaías xairala nane. Hoka omereka babera hoka kaoka exakerexe kaxairatyakehenere aose:

<sup>18</sup> Xekohaseti nalitare Isekohaliti atyo tyaonita nokakoi.

Hatyotyo atyo aoka natyo haomana, noxakai maheta Iraitit Waiyexe maoloxaharenae ana, exahe axikatya natyo noxakai maheta mehaxaikohaliti eberexotyakaharenai ana, nakaxoseheta maheta maxoseharenai, niyeheta maheta iniyalahare kaxomokakiterenai,

<sup>19</sup> noxakai maheta Xekohaseti iyehetehenere haomanerenai ferakene kaotyakenehenere maheta.

<sup>20</sup> Hatyaoseta Jesus ityahaheta babera hoka isehetene xahohisakoatyakalati hana kaxaikotyasehare ana hoka tyokeheta. Tyotya halitinai nali tyaoniterenai wahakotyaha Jesus ana mamahirirahareha.

<sup>21</sup> Hatyaoseta irahena hoka nexa: — Kalikini atyo kaotyaka Iraitit Waiyexe kaxairatyakehenere, kalikini xasemehenere tahi — nexa.

<sup>22</sup> Hoka tyotyaha aexakeretyaha Jesus, hakaharetyoahitaha iraiti aihalahalini kisare iratere kakoa hoka nexahitaha: — Xoana maisa José ityani xini? nexahitaha.

<sup>23</sup> Hoka Jesus nexa: — Maisa hoka exakerexe ite xiraehitiya nomani exe iraiti: “Wairatyare, hisota hawairatyoawihena”. Exahe xexa tehitiyaite: “Hisomehena ali hawenakala kaiserehare nali, xakaitahere hománe tahi wihiye Cafarnaum naliye akereta”, xexaite — nexa ihiyeha.

<sup>24</sup> Hoka nehitiya: — Aliterexe niraeta xihye, maisa atyo hatya hekoti iraiti xakaisasehare waiye kaxomokakere ewaikoherakoa kaiserehare nali. <sup>25</sup> Xasemehena: kahare wainyaneneronai tyaonahitaha Israel waikoherakoa nali iraiti xakaisasehare Elias xowaka, hoka maisa onehitita hanama wanone mokotexe hoka nakiti kalorexe tyaona hakákoare hatyo waikohekoa nali. <sup>26</sup> Xakore hoka Enore maisa axikaita Elias halonai wainyaneneronai tyaonitolonai Israel waikohera nali ana. Hoka hahalo wainyanenero tyaonitolo wenakalati Sarepta nali Sidom waikohekoa nali ana taita. <sup>27</sup> Nikare tehitiya kahare jijikoahiyenai tyaonita Israel waikohera nali iraiti xakaisasehare Eliseu xowaka. Xakore hoka maisa hatyanai hekoti enekonitareha kaxaiyatelikisakihitita. Naamã taita, Síria nalitare, hatyo taita atyo kaxaiyatelikisakeheta — nexa.

<sup>28</sup> Hoka hatyoharenai semaha hoka tyotyaxohisakoatyakalati hanako tyaoniterenai kalore ehareha. <sup>29</sup> Hoka tityoahenahitaha, nolokasekoatyaha Jesus haware wenakalati nonitata. Xaneha ekakoa tyairi wáhaharexe nali xawatyahene maheta hatyo henota waikoa maniya. Hatyo heno atyo wenakalati kaomaka. <sup>30</sup> Xakore hoka jiyeheta halitinai konita hoka xaneheta.

#### Hatya Haliti Kakoa Tyaonita Isekohaliti Iniyalahare (Marcos 1.21-28)

<sup>31</sup> Hatyaoseta Jesus xane Cafarnaum xeta, hatya wenakalati Galiléia koa nali. Hoka hatyo nali aotyakijita halitinai sábadó xowaka. <sup>32</sup> Hoka hakaharetyoahitaha exaotyakira kakoa, iraeata atyo iyateliti kakoare hoka.

<sup>33</sup> Hoka hatya haliti tyaonita xahohisakoatyakalati hanako hoka isekohaliti iniyalahare tyaonita ekakoa. Hoka kawiyatya: <sup>34</sup> — Xaxiyani! Xoare haoka wihiye, Jesus Nazaré yere? Xoana ali hisoa hamawenekoaretya maheta wiso? Waiye atyo hawaiyekehalakahareta nomani: hiso atyo Enore Xaxikalahare Waiyexe — nexa.

<sup>35</sup> Hatyaoseta Jesus irae isekohaliti iniyalahare hiye: — Nikareta hirae hoka hahikoahetehena hatyo haliti nonitata! nexa.

Tyotyaxahalakoahitaha isekohaliti iniyalahare exoakisa haliti waikoa hoka hikoaheta enonita makawexomokalahareneta.

<sup>36</sup> Hoka tyotyaha hakaharetyoaha hoka irae kakoaha hatyo tahi: — Xoarehare iraiti ala exe? Exe haliti iyateliti kakoare hoka axikaheta isekohaliti iniyalaharenai hoka xanehenahititaha! nexaha.

<sup>37</sup> Hoka Jesus tahi exaoretyoa hakákoare hatyokoa nali.

#### Jesus Aiyatelikiheta Kahare Halitinai (Mateus 8.14-17; Marcos 1.29-34)

<sup>38</sup> Hoka Jesus hikoaheta xahohisakoatyakalati hanakota hoka xane Simão hana xeta. Hoka Simão nakero hokakita, kalore wátyahiseta, hoka xakaiha hatyoharenai Jesus hiye. <sup>39</sup> Hatyaoseta xane tityoa exehokotyokakala haliya hoka irae watere hiye. Hoka wátere tyoteheta enonitata, hoka tityoaheta rotita hoka enakairaha tyoma.

<sup>40</sup> Hatyaoseta kamai isoahena hoka tyotyaxahinaeharexenai hokakiterenai, kahare hawareharexe kahehaliti kakoarenai, kolatyaha Jesus ana. Hoka hakahe ekaokakisa ihiyeha hoka aiyatelikihenahitene.

<sup>41</sup> Hoka tihanarenai kahare halitinai nonitata xanehenahitaha hakawiyalahaka: — Hiso atyo Enore Ityani! nexahitaha.

Waiyekehalakahareta atyo Jesus enomanaha. Enore Kalorexe Aohenere atyo, hoka hatyo hiyeta watyalyahitene, mairanenityahitene.

#### Jesus Xakaihena Iraitu Waiyexe (Marcos 1.35-39)

<sup>42</sup> Hatyaoseta ferakoa hoka Jesus xaneheta wenakalatita hoka xane maharexakiti. Hoka halitinai tawehenene hoka kaokehenahitene hoka maisa xaneheta enonyahitaha aokareha.

<sup>43</sup> Xakore hoka Jesus nexa: — Noxakaini tehitiya atyo haiyanaikoa wenakalati koanai Iraitu Waiyexe Enore koamaniya nawenatyaka tahi. Hiyaiya, hatyo maheta atyo Enore axikatya natyo — nexa.

<sup>44</sup> Hatyo hiyeta xakaita Iraitu xahohisakoatyakalati hanakonai tyotyaxahalitikoanai.

#### Jesus Kawisa Hetatijeharenai Haxaotyakiraharenai (Mateus 4.18-22; Marcos 1.16-20)

**5** Haxowakiya Jesus tyaonita Galiléia hokoxala kaiholonekoa kilihi, hoka halitinai ehotyasekoaitene semaha maheta Enore niraene. <sup>2</sup> Hoka waiya hinama kanowanai hokoxa xaiya, kaiholokoa haliya. Mairatyatienai exoahenahitaha taita enakotaha hoka tihehenahititaha kohase hiyakakala. <sup>3</sup> Hoka Jesus kakoha Simão kanowane ako, hoka Jesus irae ihiye kikiyatene maheta inira kaiholokoa nonitata. Hatyaoseta Jesus tyoka hoka aotyakihena halitinai.

<sup>4</sup> Hatyaoseta halakisa hairaene hoka nexa Simão hiye: — Hiyanehena kanowa kakoa hakiti hokoxa hatekoxa tyoahenere akiti. Hiso, hihinaeharenai xoaha hoka xawatya maka xahiyaxatya maheta — nexa.

<sup>5</sup> Hoka Simão nexa: — Xekohaseti, makiya wáhaka wahiyaxatya hoka maisa xoare wahiyita. Xakore hoka maka xawatya tyare atyo haokita hoka notyakekoite — nexa.

<sup>6</sup> Hatyaoseta xawatya makanai onexaiya hoka hiyaha kahare kohase hoka komitehena makanai irikotyohitaha. <sup>7</sup> Hatyaoseta kowaisaha hahinaeharenai kanowa halyako tyaoniterenai ana tyoaha kahinaetyahene maheta. Xaneha hoka ekaisetyaha hinama kanowanai kahare kohase kakoa hoka komitaene tabobokoaha.

<sup>8</sup> Hatyaoseta Simão Pedro waiya hatyoharenai hoka hakaolise kakoa meholokoa Jesus nahalako hoka nexa: — Xekohaseti, hakikisoahetehena nonitita. Hiyaiya, iniyalahare nomasehare atyo natyo! nexa.

<sup>9</sup> Simão, haiyaharenai ehaliya tyaoniterenai tehitiya hakaharetyoaha kahare kohasenai hiyehenahere kakoa. <sup>10</sup> Zebedeu ityaninai Tiago João tehitiya kalore hakaharetyoaha. Hatyonae atyo Simão hinaenai.

Hatyaoseta Jesus nexa Simão hiye: — Awa atyo hi-mawaiyehare. Kalikinita atyoite halitinai hiyasehare hisaohena — nexa ihiye.

<sup>11</sup> Hoka nolohehenahitaha kanowanai kaiholokoa nali hoka tyotyaha halaki akatyaha hoka xaneha Jesus xema.

### Jesus Awaiyehiheta Jijikoahitere

(Mateus 8.1-4; Marcos 1.40-45)

<sup>12</sup> Haxowaka Jesus tyaonita hatya wenakalatikoa hoka hatyo nali hatya haliti jijikoare kahehare iraharetita. Hoka waiya Jesus hoka halaisoa exoa waikoa enahalakoa, ekaokakisa hatiho waikoa, hoka axene:

— Xekohaseti, hawaiyehihetaiya natyo haokowi hoka hawaiyehihetaiya natyo — nexa.

<sup>13</sup> Hoka Jesus hakahe ekaokakisa ihiye hoka nexa: — Há, naokaite. Hawaiyehiheta atyo — nexa.

Hatyaosehena hoka jijikoare kahehare maiyareheta.

<sup>14</sup> Hoka Jesus exakere aotyakisene: — Awaira atyo exeharenai hatya hiye hiyakaihena, xakore hoka hiyane hiraehena sacerdote hiye hoka waiyahareheta hiso. Hatyo najikinitaite hiyane hafetatya kirakahare Moisés aotyakihenere akereta. Hoka tyotyaha waiyoreha hikinaterehenere kakoa — nexa Jesus ihiye.

<sup>15</sup> Xakore hoka Jesus tahi kahare exaoretyoa hakákoare, hoka kahare halitinai tyoahitaha semaha maheta iniraene, exahe kaxaiyatelikisakehenahitaha maheta ekáhehareha nonitata. <sup>16</sup> Xakore hoka Jesus xaneta maharexakahare nali hoka iraexaita.

### Jesus Aetonalikiheta Maetonanehare

(Mateus 9.1-8; Marcos 2.1-12)

<sup>17</sup> Haxowaka Jesus aotyakijita hoka haiyaharenai fariseunai, exahe haiyaharenai Xaotyakiyaho kakoa waiyoreterenai xoaha tyokahitaha ehaliya. Tyoaha atyo tyotyaha wenakalatikoanai tyaoniterenai Galiléia nalita, Judéia nalita, Jerusalém nalitare harenai tehitia. Hoka Xekohaseti niyaterere tyaonita Jesus kakoa aiyatelikiheta maheta hokakiterenai. <sup>18</sup> Hoka haiyaharenai halitinai kolatyaha hatya maetonanehare etolisoare haxetolisoakala hoka kasani isoaha hatyako hoka mokahene aokowiyahitaha Jesus nahalakoa.

<sup>19</sup> Xakore hoka kahare halitinai hiyeta maisa aliyakere isoahitaha maetonanehare kakoa. Hatyaoseta kolatyahene hatiri heno. Hoka hati taose aitoakisaha hoka hatyoahota exoakisahene exetolisoakala kakoita halitinai nali tyaoniterenai nenekesene hoka mokahene Jesus nahalakoa.

<sup>20</sup> Hoka Jesus waiya ityakekoneha hoka nexa maetonanehare hiye: — Nohinaehare, iniyalahare hománenai atyo kaxemaisatyakeheta — nexa.

<sup>21</sup> Hoka Xaotyakiyaho kakoa waiyoreterenai, fariseunai xoaha hatyo tahi iraekakoahenaha: — Xala exe haliti hoka exakere maisa aiminisare Enore? Mahaiya atyo xalahare iniyalahare emaisahitita. Enore taita atyo hatyo iyateliti kakoare — nexaha.

<sup>22</sup> Xakore hoka Jesus otita exahekolaha hoka nexa ihiyeha: — Xoanere hoka nikare xahekoita? <sup>23</sup> Xoare-

hare ala haxerore niraetyaka: “Iniyalahare hománenai atyo kaxemaisatyakeheta”, nerekatihenaite, xoana, “Hatityoahetehena hoka hatohetehena”, nerekatihena koríte? nexa. <sup>24</sup> — Nahotikisaite xomana. Natyo Haliti Ityani iyateliti kakoare atyo notyaonita ali waikohekoa nemaisaheta maheta iniyalahare — nexa.

Hatyaoseta nexa maetonanehare hiye: — Hatityoahetehena, hiyehetehena hiyetolisoakala hoka hiyanehetehena hihana xeta — nexa.

<sup>25</sup> Hatyaoseta hatyo haliti tityoaheta tyotyaha enahalakoa, iyeheta haxetolisoakala hoka xaneheta hahana xeta, ihalahare Enore kakoa.

<sup>26</sup> Tyotyaha hakaharetyoaha. Exahe hoka kalore hamairaneha kakoita ihalahareha Enore kakoa hoka nexaha: — Kaxiyani! Waiyexe kalikini xowaka wiyaiya! nexaha.

### Jesus Kawisa Levi

(Mateus 9.9-13; Marcos 2.13-17)

<sup>27</sup> Hatyo najikinita Jesus xanehitiya hoka waiya hatya kalorexe noloxa resebetyasehare, Levi nexarexe, owene tyokita olo resebetyakalaose. Hoka Jesus nexa ihiye: — Hisohena noximi — nexa.

<sup>28</sup> Levi tityoa, halaki akatya tyotyaha hoka xane exema. <sup>29</sup> Hatyaoseta Levi tyoma kalorexe hisehaliti Jesus ana hahanako. Hoka nali kahare kalorexe noloxa resebetyaseharenai tyaonahitaha, exahe haiyaharenai iniyalahare nomaseharenai hoka tyokahitaha ehaliyaha hoka kanakairahitaha.

<sup>30</sup> Fariseunai, Xaotyakiyaho kakoa waiyoreterenai xoaha enekonitareha hoka ehareha Jesus xaotyakiraharenai hiye hoka axahene: — Xoana hoka kikanakairita xiserita kalorexe noloxa resebetyaseharenai, haiyaharenai iniyalahare nomaseharenai xoaha kakoa? nexaha.

<sup>31</sup> Hoka Jesus nexa ihiyeha: — Mahokakeneharenai atyo maisa wairatyare aokare haomana, hoka hokakiterenai atyo wairatyare aokita haomana. <sup>32</sup> Notyoha atyo naotyakisa maheta iniyalahare nomaseharenai waiye maniya tyaohenahitaha maheta, maisa atyo waiyexeharexeni naotyakisa maheta xini — nexa.

### Jesus Irae Manakairiti Enore Hiyeta Tahi

(Mateus 9.14-17; Marcos 2.18-22)

<sup>33</sup> Haiyaharenai nexaha Jesus hiye: — João Batista xema tyaoniterenai manakairahitaha kahaliki, exahe iraexatyahitaha. Exahe fariseunai xema maniya tyaoniterenai tehitiya nikareta tyaonahitaha. Hoka hiyaotyakiraharenai atyo kanakairahitaha, terahitaha xoaha — nexaha.

<sup>34</sup> Hoka Jesus nexa ihiyeha: — Xoana xiyahekola hiye kakaexakatyakehenerenai wenakakoati hisehare ana manakairatyakahare tyaonita kaiyanityohenere ehaliyaha tyaonitata hoka? <sup>35</sup> Hoka haxowakaite kaiyanityohenere kaiyakeheta enekonitaha, hoka hatyo xowaka atyoite manakairehenaha — nexa.

<sup>36</sup> Jesus tehitiya xakai exe xaimenekore: — Maisa atyo xala hare aikotyare ini taose imiti waitarete hiyeta



hoka tinolaharetyare imiti xololo. Nikareya tyoma hoka aiyalaharetyaiya imiti waitarete, exahe hatyo waitare taoseya maisa waiye kaotyakeneta hatyo imiti xololo kakoa.

<sup>37</sup> — Maisa atyo vinho waitarexa kaxomokakere toahiyere militarise nomaka ako. Nikareya kaxomokaka hoka halalakoaiya militarise hoka vinhoxaiya iratyoa tyoty, exaheya militarise hoka mawenekoare. <sup>38</sup> Hatyo hiyeta vinho waitarexa militarise waitare ako taita kaxomokakita.

<sup>39</sup> — Exahe maisa atyo xalahare aokare vinhoxa waitarexa terehenahere vinhoxa toahiyerexa najikinita. Hiyaiya, nexa atyo: “Vinhoxa toahiyerexa atyo waiye”, nexa.

### Jesus Atyo Sábado Xekohasehare

(Mateus 12.1-8; Marcos 2.23-28)

**6** Sábado xowaka Jesus jiyehena trigo xafityaka koni. Hoka exaotyakiraharenai taikaxawatyaha hoka matyatyasetyahene hoka kanakairahitaha trigosenai. <sup>2</sup> Hatyaoseta haiyaharenai fariseunai axahene: — Xoana hoka xisomita Wiyaotyakisakaho sábadu xowaka maomakene aokiterehare? nexaha.

<sup>3</sup> Hoka Jesus nexa: — Xoana maisa xasemare Davi tyomehenerhare, hatyo ihinaenai xoaha nakehenahere xowakere? <sup>4</sup> Isoa atyo Enore hanako, iya nakairati Enore ana kafetatyakehenerenai hoka kanakairene, exahe isa tehitiya hahinaenai ana. Wiyaotyakisakaho hiyeta maisaiya atyo hatya kanakairita hatyo nakairitainai hiyeta. Sacerdotenai taitaiya atyo — nexa.

<sup>5</sup> Hoka Jesus halakihena hairaene hoka nexa: — Haliti Ityani atyo sábadu ferakene xekohase — nexa.

### Jesus Awaiyekaheheta Nira Kahexe

(Mateus 12.9-14; Marcos 3.1-6)

<sup>6</sup> Hoka hatyotare sábadu xowaka Jesus isoa xahohisakoatyakalati hanako hoka aotyakihena. Hoka nali tyaonita hatya haliti fihini maniya nira kahexe. <sup>7</sup> Hoka haiyanai Xaotyakiyaho kakoa waiyoreterenai, haiyaharenai fariseunai xoaha waiye Jesus ana wahakotyahitaha, waiyaha maheta exaiyatelikireheta sábadu xowaka. Kasani iraharetyahene hoka emaximinirene Xaotyakiyaho aokaha maheta. <sup>8</sup> Xakore hoka Jesus otita exahekolaha hoka hatyo hiyeta nexa haliti nira kahexe hiye: — Hainakoahena hoka hatityoa ita nekeke — nexa. Nexa hoka haliti ainakoa hoka tityoa.

<sup>9</sup> Hatyaoseta Jesus nexa: — Naxehenaite xiso: xoare nexa Wiyaotyakisakaho sábadu xaokaka? Xoare hare kaomakere exe ferakene: waiyexe, xoana iniyalahare kore? Haliti hokakita hoka kaxaiyatelikisakehena, xoana kahalakisaka korite hoka wainihena? nexa.

<sup>10</sup> Hatyaoseta Jesus wahakotya tyoty hahoko haliya tyaoniterenai ana hoka nexa mawaiyekahehare hiye: — Haimahena hikahe — nexa.

Hoka hatyo haliti aimatya hakahe, hoka waiyehiheta ekahe.

<sup>11</sup> Hatyaoseta Xaotyakiyaho kakoa waiyoreterenai, fariseunai xoaha ehareha hoka irakakoahenaha xoalini hare háomaneha Jesus kakoa tahi.

### Jesus Aoka Haomana 12-hare Haxaotyakiraharenai Maheta

(Mateus 10.1-4; Marcos 3.13-19)

<sup>12</sup> Hoka hatyo xowaka Jesus kakoha tyairi heno iraexatya maheta hoka hatyo xatini heko iraexatya Enore hiye. <sup>13</sup> Ferakoa hoka kawisa haxaotyakiraharenai hoka 12-harenai enekonitareha aoka haomana. Hoka iraiti kakoarenae kaixaretyahene hoka 12-harenai atyo exenai: <sup>14</sup> Simão, hatyo atyo Pedro nexarexe kaexareheta, exahe iximarene André. Tiago, João, Filipe exahe Bartolomeu. <sup>15</sup> Mateus, Tomé, Alfeu ityani Tiago, exahe Simão Zelote nexarexe. <sup>16</sup> Tiago ityani Judas, Judas Iscariotes eko xoaha. Judas atyo matawatyatiye tyoahena.

### Jesus Aotyakijita, Aiyatelikihitita Xoaha

(Mateus 4.23-25)

<sup>17</sup> Hatyaoseta Jesus exoaheta tyairi henota ekakoaha hoka amematyoha kahare haxaotyakiraharenai kakoa hakakoehekoare. Hoka kahare halitinai nali tyaonihitaha. Judéia koa nalitarenai, Jerusalém nalitarenai, wenaalatikoanai Tiro, Sidom xoaha, one kaloxere haliya tyaonitere nalitarenai harenai. <sup>18</sup> Tyoaha semaha maheta Jesus niraene, exahe kaxaiyatelikisakehenahitaha maheta ekahehareha nonitata. Haiyanai isekohaliti iniyalahare hasakaharetiterenai tehitiya tyoaha hoka waiye maniya kaxomokakehenahitaha.

<sup>19</sup> Tyotyaha kasani ekaokakisa hakahe ihiye aokowiyahitaha. Ihiyeta iyateliti hikoita hoka aiyatelikihitita tyoty halitinai hoka.

### Ihalahaliti, Xamaikohaliti Xoaha

(Mateus 5.1-12)

<sup>20</sup> Hatyaoseta Jesus wahakotya haxaotyakiraharenai ana hoka nexa: — Waiye kaiserehare atyo xiso maoloxaharenai. Hiyaiya, Enore Nawenakala atyo xomanere.

<sup>21</sup> — Waiye kaiserehare atyo xiso kalikini nakitereharenai. Hiyaiya, xikanakairahare ite xisaona.

— Waiye kaiserehare atyo xiso kalikini tiyitereharenai. Hiyaiya, xikoexehetaite.

<sup>22</sup> — Waiye kaiserehare atyo xisaonita xikairawaiyakehena, xikaxaxikaharetyakehena, iniyalahare xikaxomokakehena, exahe xiso atyo maisa xawaiyexe xikaxaokakehena, xisaonitere Haliti Ityani xema maniya hiyeta hoka. <sup>23</sup> Maika xihalaharehena, ximaxalohena, nikare xikaxomokakehena hoka. Hiyaiya, kalorexere xibakatyakala atyo ityakaisakahare tyaonita xomana enokoa nali. Hiyaiya, enahetakomaniyereharenai atyo hatyo akereta mokaha iraiti xakaisaseharenai.

<sup>24</sup> — Xakore hoka kirakoane ite xisaohena, xiso kalikini kaoloxere tyaoniterenai. Hiyaiya, koxaka atyo waiye xisaona!

<sup>25</sup> — Kirakoane ite xisaona, xiso kalikini tyotyā xaokitereharenai kakoare xisaonitereharenai. Hiyaiya, xinakehenaite!

— Kirakoane ite xisaona, xiso kalikini koexitereharenai. Hiyaiya, xitiyahenaite!

<sup>26</sup> — Kirakoane ite xisaona, tyotyāha aexakeretyaha xiso hoka. Hiyaiya, enahetakomaniyereharenai tehitiya atyo aexakeretyaha iraiti xakaisaseharenai metalaharenai — nexa.

#### Ahalakoahalitinai Xawaiyetyaka Tahī

(Mateus 5.38-48; 7.12; Lucas 23.34; Atos 7.60; Romanos 12.17-21)

<sup>27</sup> — Xakore hoka nomita atyo xiso xasemiterenai nira-raini hiye: Xawaiyehena xahalakoaharenai, exahe waiye xamohena kirawanetereharenai xiso. <sup>28</sup> Xaohena waiyexe iraeaharetiterenai xiso ana, exahe xiraexahena iniyalahare mokiterenai xiso ana. <sup>29</sup> Maika hatya mokohena hiso hitanakoli hiye hoka hehaika enomana hamaniya mokotya tehitiya maheta. Maika hatya kolahena himanase hoka maika kotare kolatya ekatyahexete tehitiya. <sup>30</sup> Hatyaterē ana hisehena, xoalinihare axehena hiso hoka. Exahe maika hatya kolahena hixiyehare hoka awa atyo haxehetene. <sup>31</sup> Maika haiyanai waiye xamoka kasani haiyanae moka xiso xaokitere akereta — nexa.

<sup>32</sup> — Hoka xawaiyetaiāya etakehare awaiyeterereharenai xiso taita hoka xoanere hoka xatyahita xoalinihare waiyexe xekaka xomana xahita? Halitinai iniyalahare nomaseharenai kakoita atyo awaiyeta etakehare haxawaiyetyaseharenai. <sup>33</sup> Exahe waiyeya xamokita etakehare waiye mokitereharenai xiso taita hoka xoanere hoka xatyahita xoalinihare waiyexe xekaka xomana xahita? Halitinai iniyalahare nomaseharenai kakoita atyo nikare tyaonahitaha. <sup>34</sup> Exahe xijitaiya etakehare bakahititereharenai xiso ana taita hoka xoanere hoka xatyahita xoalinihare waiyexe xekaka xomana xahita? Halitinai iniyalahare nomaseharenai kakoita atyo haiyaharenai iniyalahare nomaseharenai ana isahitaha, isehenahitaha enomanaha maheta isehenereharetā.

<sup>35</sup> — Maika xawaiyehena xahalakoaharenai, waiye xamohenahene. Xisehena hoka awa atyo xatyaha xisehenehare xekakeheta xomana xahita. Nikare ite hoka kaxekakaite waiyexe xomana, exahe Enore Kalorexe ityaninaite xisaona. Nikare xisaona. Hiyaiya, hatyo tehitiya atyo waiyexeharexe waiyexenai ana, exahe xalijiniharexenai ana xoaha. <sup>36</sup> Maika xawaiyexehare xisaona, Xexe nawaiyexehare akereta — nexa.

#### Irahekoatyati Tahī

(Mateus 7.1-5; Romanos 2.1-3)

<sup>37</sup> — Awa atyo haiyaharenai xiraeharetya hoka maisaite xikairaeharetyakita. Awa atyo haiyaharenai xairawaiyakisa, hoka maisaite xikairawaiyakita. Maika ximaotyaneheta haiyanai xomokala xiso iniyalahare hoka kamaotyanyakehetaite iniyalahare xomāne. <sup>38</sup> Xisehena haiyanai ana hoka Enore ite isa tehitiya xomana. Nikare ite hoka kaxékaka xomana kalore, kalore

kaiserehare. Xikolala hekorexe ite isa xomana. Hoka xisehene haiyanai ana hákakoanetaite Enore iseheta xomana — nexa.

<sup>39</sup> Hatyaoseta Jesus xakai exe xaimenekorenai: — Mahaiya hatya maxosehare aliyakere otokahijita hatya maxosehare. Nikareya tyaona hoka hatyo hinamanaiya exoaha tolokoako. <sup>40</sup> Maiha atyo hatya kaxaotyakisakiterehare haxaotyakisase xahehare xini. Xakore hoka kaxaotyakisakitereya atyo miyahena haxaotyakisaka hoka haxaotyakisase hákakoanehare atyoite tyaona — nexa.

<sup>41</sup> — Xoana hoka hawahakoita holoxoti hihinaehare xosako tyaonitere ana hoka maisa atyo hiyaiyare atya taose hiyosako tyaonitere? <sup>42</sup> Hoka aliyakereya hehena hihinaehare hiye: “Nohinaehare, haiya hoka niyeheta holoxoti hiyosakota haoka”, hehena, hisota maisa hiyaiyare atya taose hiyosako tyaonitere hoka? Maoseratyaliye! Hiyehetehena hotohare atya taose hiyosako tyaonitere hoka hatyaosetaite waiye hiyaiyakaheta hoka hiyeheta holoxoti hihinaehare xosako tyaonitere — nexa.

#### Atyakate, Irínai Xoaha Tahī

(Mateus 7.15-20; 12.33-35)

<sup>43</sup> — Atya kate waiyexe atyo maisa ewaxirali kaliye, exahe atya kate ewaxirahare atyo maisa waiyeri kaliye. <sup>44</sup> Hiyaiya, tyotyā atyanai atyo irinai hiyeta waiyekehakalaharetaha. Mahaiya atyo aliyakere kaximexakita halohalose katohilihina hiyeta, exahe uva hoka katohere kateta kaximexakita. <sup>45</sup> Nikare haliti waiyexeharexe iyita waiyexe haxomokala waiyexenai akota, hatyo atyo emahiyasakotare. Hoka haliti mawaiyexeharexe atyo iyita iniyalahare haxomokala iniyalaharenai akota. Hiyaiya, ekanase atyo irieta emahiyasako kaise tyaonitereharetā — nexa.

#### Hinamakase Hati Hokolikase Tahī

(Mateus 7.24-27)

<sup>46</sup> — Xoana hoka, “Xekohaseti, Xekohaseti”, xita noxaokaki hoka maisa niraetere xihiyē akereta xisaonare? <sup>47</sup> Nahotikisaite xomana, xoare hare kakoa xamani ala hákako, etakehare nokoamaniye tyaoniterehare, semiterehare noxaotyakiri hoka tyakekoterenehare. <sup>48</sup> Hatyohare atyo motya etakehare hatya haliti tyoma hati hoka seka hateko hoka ehokoli niyahare sehali heno ajika. Hoka one kakekoaxa tyaona hoka one xane kaoka hatyo hati hiye, xakore hoka maisa exoita, waiye nomakere hoka. <sup>49</sup> Xakore hoka xala xamani atyo sema niraeni hoka maisa tyakekorene hoka motya atyo etakehare mairiharehare tyomehenehare hati waikoheko, mahokoli kasehare akereta. One tyoa hatyo hati ana hoka exoakisene rotita hoka mawenekoaretene — nexa.

#### Jesus Aiyatelikheta Roma Yere Wakanehare

(Mateus 8.5-13)

7 Hatyaoseta Jesus halakisa hatyoharenai haxakaini halitinai hiye hoka xane wenakalati Cafarnaum

xeta. <sup>2</sup> Hoka hatyo nali hatya sorarenai xekohasehare tyaonita. Kawakaneharexe hoka awaiyetita hawakanehare hoka ewakanehare hokakita, komitehena wainita. <sup>3</sup> Hatyaoseta sorarenai xekohasehare sema Jesus tahi hoka axikatya judeunai nityohalitiranai axahene hoka tyoa aiyatelikiheta maheta ewakanehare.

<sup>4</sup> Hoka xane ahalakoatyaha maheta Jesus hoka tihityoaha ihiye hoka nexaha: — Aliterexe atyo hatyo haliti hihiyeta waiye kahinaetyaka. <sup>5</sup> Hiyaiya, awaiyetita atyo wihinaeharenai, exahe xahohisakoatyakalati hana kakoita tyoma womana — nexaha.

<sup>6</sup> Hatyaoseta Jesus xane exemaha. Xakore hoka hati haliyehena hoka sorarenai xekohasehare axikatya haiyaharenai hahinaeharenai nexaha maheta Jesus hiye: — Xekohaseti, maisa nahakakisa naokowita hiso. Maisa atyo noxoare waikatehare hoka maisaiya hijoita nohanyako. <sup>7</sup> Maisa tehitiya noxoare waikatehare hoka maisaiya natyonaira niraeta hihäre hiyeta. Hiraehena taita, hoka nowakanihare ite waiyeheta. <sup>8</sup> Natyo tehitiya atyo haiyanai xekohasetinai katyahakohareta notyaonita hoka wakatyahitaha natyo. Exahe nosorarexinai atyo nowakani xema tyaonahitaha. Niraihena hatya hiye: “Hiyane”, nomihena ihiye hoka xaneta. Hatya hiye, “Hisohena”, nomihena hoka tyoita. Nowakanihare hiye, “Hisoma nikare”, nomihena hoka tyomita — nexa sorare xekohasehare Jesus hiye.

<sup>9</sup> Jesus kalore hakaharetyoa sema hatyoharenai hoka ehaikoahareheta hoka nexa kahare halitinai xanetere-nai exema hiye: — Aliterexe nomita xihiyeheta: maisa xoana xowaka exakere kalore tyakekotyati nowaiyare Israel hotyalinai koni — nexa.

<sup>10</sup> Hatyaoseta sorarenai xekohasehare hinaeharenai haikoahenahitaha hahanaha xeta hoka waiyehenahitaha wakahare niyatereheta.

### Jesus Ekasekiheta Wainyanenero Ityani

<sup>11</sup> Hatyo najikinita, mawahaneta, Jesus xane wenakalati Naim nali. Exaotyakiraharenae, kahare halitinai xoaha xane exema. <sup>12</sup> Hatyaoseta xane kaokehena wenakalati talalahoko jihola haliya hoka naliyerenae xane fehenaha kamati. Hatyo wainihenero atyo hamokoserore wainyanenero ityani, hoka kahare halitinai wenakalatitarenai xanahitaha exema.

<sup>13</sup> Hatyaoseta Xekohaseti waiya inityo, kalore airakoanehalotene hoka nexa: — Awa atyo hitiya — nexa.

<sup>14</sup> Hatyaoseta xane ehaliyase kaiserehare hoka ekaokakisa hakahe kamati nitini hiye. Hoka kolaiterenenai tityoaha. Hatyaoseta Jesus nexa: — Xoimahaliti, niraehena hikakoa: hatityoahetehena! nexa.

<sup>15</sup> Nexa hoka xoimahaliti tyokeheta hoka iraehtehena, hoka Jesus isehetene inityo ana.

<sup>16</sup> Tyotyaha kalore mairaha hoka ihalahareha Enore kakoa hoka nexaha: — Kaxiyani, kalorexe iraiti xakaisasehare kaotyaka winekoni! Enore atyo tyoa iye-hitita hahotyaliharenai! nexaha.

<sup>17</sup> Hatyoharenai Jesus tahi kahare exaoretyoa hakakoare wenakalati kalokoarenai exahe ehaliyakoita tyaoniterenai xoaha nali.

### João Batista Xaxikalahrenai

(Mateus 11.2-19)

<sup>18</sup> Hatyaoseta João Batista xema tyaoniterenai xakaiha tyotya hatyoharenai haxaotyakisase hiye. Hoka João kawisa hinamahare enekonitareha <sup>19</sup> hoka axikatene axaha maheta Xekohaseti Jesus: “Xoana hiso etake kaokehenero, xoana hatya korite watyahahitiya?” nexaha maheta.

<sup>20</sup> Hatyaoseta xaneha Jesus tyaonitere nali hoka nexaha: — João Batista axikatya wiso waxa maheta exakere: Xoana hiso terota etake kaokehenero, xoana hatya korite watyahahitiya? nexaha.

<sup>21</sup> Hatyaosehena hoka Jesus aiyatelikiheta kahare halitinai hokakiterenai, isekohaliti iniyalahare kaxihakoretiterenai, exahe kahare maxoseharenai tehitiya.

<sup>22</sup> Hatyo najikinita Jesus nexa João xema tyaoniterenai hiye: — Xiyaneheta hoka xiyakaihena João hiye exe xiyaiyeheneroharenai, exahe xasemeheneroharenai atyo: maxoseharenai atyo waiyakahititaha, maetonaneharenai atyo tohenahititaha, jijikoahiti tawaneharenai waiyehihititaha, matanakoakoharenai atyo semakahititaha, kamatinai atyo kasehitita, Iraiti Waiyexe atyo kaxakaisakita maoloxaharenae hiye. <sup>23</sup> Waiye kaiserehare atyo tyakekoterenai natyo hoka maisa amaikoharexe nokakoi — nexa.

<sup>24</sup> Hatyaoseta João xema tyaoniterenai xaneheta hoka Jesus iraehehena halitinai kakoa João tahi: — Xiyanehenero maharexakahare xahalakoahenero João xowaka, xoare hare xatyahita xiyaiyane maheta? Xoana kána kase hoholati hoholaitere? <sup>25</sup> Xoare hare xiyane xiyaiya? Xoana hatya haliti waiye nimerero? Xasemehena, waiye nimerenai, exahe waiye tyaoniterenai atyo hati wahaharexenai ako tyaonita. <sup>26</sup> Xiyakaihena terota, xoare xatyahita xiyaiya maheta? Xoana hatya iraiti xakaisasehare? Aliterexe atyo nomita xihiyeheta: xiyaiyehenero atyo iraiti xakaisasehare xahehare. <sup>27</sup> Hiyaiya, exakere xairatyoare tyaonita, Iraiti Waiyexe nanekoa João tahi:

Hasemehena, naxikatyaite haliti haheta maniya niraini kakoare hoka memere moka ahoti haheta maniya.

<sup>28</sup> Hoka Jesus nehitiya: — Nomita atyo xihiyeheta: João atyo tyotya halitinai xahehare. Xakore hoka xala xamani atyo ekatyahakohareta tyaonita enokoa nali hoka hatyo atyo João xahehare tyaona.

<sup>29</sup> Kalorexe noloxa resebetiyaseharenai exahe tyotya halitinai xoaha semaha hatyoharenai. Hatyonai atyo etake tyakekohenerenai Enore niraine aliterexe hoka João batixahenerenai. <sup>30</sup> Xakore hoka fariseunai, Xaotyakiyaho kakoa waiyoreterenai xoaha atyo maisa habatixatyaka aokahitaha João hiyeta, nikare hoka maxaokalaha atyo Enore ahekohenere etahiha.

<sup>31</sup> — Hatyo hiyeta xoare kakoaite naimenekohena kalikiniyerenai haliti? nehitiya Jesus. — Xoarehare kakoala exehare halitinai hakakoa? <sup>32</sup> Motya atyo

xoimanai wetekokoa tyokiterenai. Háhotyali kawiyaita háhotyali ana:

“emahalikijita atyo wenakakoati anere xerati, xakore hoka maisa xaholikoare!

Wiyerita atyo xafityati anere xerati, xakore hoka maisa xitiyare!”

nitere akereta. <sup>33</sup> João Batista atyo manakairita, maer-aneta vinhoxa hoka xita: “Tihanare atyo tyaonita ekakoa!” xita. <sup>34</sup> Hoka Haliti Ityani atyo kanakairehena, terehena hoka xita: “Xiyaiyehena, exe haliti atyo kanakairatetyoita, teratetyoita. Etake kalorexexa noloxa resebetyaseharenai exahe iniyalahare nomaseharenai xoaha hinaehare!” xita atyo. <sup>35</sup> Xakore atyoite hoka ekakoitaite Enore nawaiyorene katyakekotyakehena — nexa.

### Jesus Xane Fariseu, Simão Nexarexe Hanako

<sup>36</sup> Hatyaoseta hatya fariseu noloka Jesus kanakaira maheta. Hoka Jesus xane isoa ehanako hoka tyoka kanakaira maheta. <sup>37</sup> Hatyo wenakalati nali tyaonita hatya ohiro iniyalahare nomasehalo. Hoka sema Jesus nakaira fariseu hanako. Hatyaoseta iya halise kanotese airaxero kakoare <sup>38</sup> hoka Jesus hiniri maniya amematyoo, ehaliyasete, tiyita hoka aolowaita ikijinai haosexa xatali kakoa. Hatyaoseta tirehetene hasekase kakoita. Hoka sohikijijita Jesus kijinai, exahe owikita airaxero ikijinai heno.

<sup>39</sup> Hoka fariseu waiya hatyoharenai hoka exakere ahokoty: — Aliterexeya atyo exe haliti iraiti xakaisesehare hoka waiyekehalakitaiya atyo enomana exe ohiro otoiterene, exahe enawenane iniyalahare maniya xoaha — nexa.

<sup>40</sup> Hatyaoseta Jesus nexa fariseu hiye: — Simão, hatahi noxakai hihiye naokowita — nexa.

— Hiraehena, Xaotyakisatiye — nexa Simão.

<sup>41</sup> Hoka Jesus nexa: — Hinamahare halitinai kakotanetaha, hatya haliti kakotanetya minitere. Hatya 500-hokose olo prata nomaka, háhare hoka 50-hokose xoaha. <sup>42</sup> Xakore hoka maisaiya háhare hekoti hatyo hinamahare konitare xoare kakoa bakahitita hakotane. Hatyaoseta emaiyareheta hatyo hinamanai kotane. Xala hare kaisere ite masakare awaiyehenene? nexa.

<sup>43</sup> — Noxahekoli hiye hoka kalore masakare kakotaneterene — nexa Simão.

— Ehokore hekoaxatya — nexa Jesus.

<sup>44</sup> Hatyaoseta ehaikoahareheta ohiro ana hoka nexa Simão hiye: — Xoana hiyaiyita exe ohiro? Nisoahenere xowaka maisa hijita one nomani natiha maheta nokiji, xakore hoka tihene atyo haosexa xatali kakoa hoka tirihitene atyo hasekasenai kakoita. <sup>45</sup> Maisa atyo hasohitanakolijita natyo nokaokihenere xowaka, xakore hoka hatyo atyo maisa halakisare hekoti hasohikijira nokiji nisoaheneritita. <sup>46</sup> Maisa atyo airaxeroxa nosekase niyahare hijita, xakore hoka hatyo atyo owika airaxero nokijinai heno. <sup>47</sup> Aliterexe nomita hihiye: kalore haxawaiyera hiyeta tyomehenere atyo hotikijita koxaka kalore iniyalahare tyomehenere kamaotyanyakehetehenere. Xakore hoka etakehare inira hiyeta kax-

awaiyetyakihititerehare atyo inirita tehitiya awaiyehitita — nexa.

<sup>48</sup> Hatyaoseta Jesus nexa ohiro hiye: — Iniyalahare hómanenai atyo kaxemaisatyakeheta — nexa.

<sup>49</sup> Hatyaoseta mexa haliya tyokiterenai axakoa-henaha: — Xala exe hoka iniyalahare kakoita emaisahitita? nexaha.

<sup>50</sup> Xakore hoka Jesus nexa ohiro hiye: — Hityakekone atyo waiye maniya moheta hiso. Hiyanehetehena himehexaikohalone kakoa — nexa.

### Ohironai Xanetolonai Jesus Xema

**8** Hatyo najikinita Jesus xane wenakalatikoanai exahe wenakalatikoasenai xeta, hoka xakaita Iraiti Waiyexe Enore koamaniya nawenatyaka tahi. Hoka 12-harenai exaotyakiraharenai xaneha exema, <sup>2</sup> exahe haiyahalonai ohironai kaxaiyatolokisakehetehenolonai isekohaliti iniyalahare nonitata, ehokakeneha nonitata xoaha. Hatyonai atyo: Maria Magdalena nexalolo, hatyo nonitata atyo 7-harenai isekohaliti iniyalaharenai kaxaxanikisakeheta. <sup>3</sup> Joana, Cuza exanityo: exanene atyo kalorexehare tyaonita xekohaseti Herodes wakanehare. Susana, haiyahalonai ohironai kahinaetitolonai Jesus, exahe exaotyakiraharenai xoaha haxiyehalonaiha kakoita, xoahanai.

### Xafityatiye Tahi

(Mateus 13.1-9; Marcos 4.1-9)

<sup>4</sup> Kahare halitinai tyoaha haiyanaikoa wenakalatita waiyaha maheta Jesus. Tyotyaha hohisakoaha hoka xakaihena ihiyeha exe xaimenekore:

<sup>5</sup> — Hatya haliti xane fitya maheta hahananeharese. Hoka fitita hanakatisenai hoka haiyasenai ahoti kilihii exoa, hoka halitinai tyahakene, exahe kotehalasenai hoka kanakairene. <sup>6</sup> Haiyasenai hanakatisenai exoa kaharexe sehali tyaonitere akitya. Hikoaha hoka niraha, maisa olowehiti aka hoka. <sup>7</sup> Haiyasenai hoka xane exoa katoherehinai koni, hoka hahotyalyta kekoareha hananehaliti kakoa hoka katohere jiyahaotyahene. <sup>8</sup> Xakore hoka haiyasenai atyo exoa waikohe waiyexekoa. Hoka hananehalitinai kekoareha, kaxawaha. Hasese hiyeta 100-se kasé.

Hoka Jesus nehitiya — Xala xamani atyo katanakoakore semakatya maheta hoka maika semehenenai niraini — nexa.

### Jesus Awaiyekehalakatya Xafityatiye Tahi

(Mateus 13.10-23; Marcos 4.13-20)

<sup>9</sup> Hoka Jesus xaotyakiraharenai axahene, xoare nexa xamani ala aokowita hatyo xaimenekore kakoa hoka.

<sup>10</sup> Hoka Jesus nexa: — Xomana atyo Enore hotikijita metaharexe hakoamaniya nawenatyaka. Hoka haiyanai ana atyo xaimenekotyati maniyata kaxaotyakisakita, wahakoty hoka maisa waiyahitaha maheta, semehenaha hoka maisa waiyekehalakita enomanaha maheta.

<sup>11</sup> — Exe xaimenekore iraitere atyo exakerexe: hanakatise atyo Enore niraene. <sup>12</sup> Hanakatisenai exoahenerenai ahoti kilihit atyo etakehare semitereharenai iraiti xakore hoka Tihanare kaoka hoka iyehititerehare iraiti emahiyasakota, maisa tyakekoahitaha kaiyakehenahititaha maheta. <sup>13</sup> Hanakatisenai exoahenerenai kaharexe sehali akiti atyo etakehare semitereharenai iraiti hoka aokitereharene haomana haihalaharene kakoita. Xakore hoka maisa atyo kinaterexeha hoka hatyo hiyeta maisa waha xini tyakekoahitaha. Hoka kahasakaharetyakehenaha hoka tyotyala halakisahitaha. <sup>14</sup> Hanakatisenai exoahenerenai katoherehinai koni atyo etakehare halitinai semitereharenai iraiti xakore hoka emawiyeharene, ixiyehare, ekehalaharene aeroretyoitata hoka jiyahaotita hatyoharenai halitinai. Hatyo hiyeta kasetereharenai maisa xonere hekoti, maisa miyatita hahatene Enore koamaniya. <sup>15</sup> Hoka hanakatisenai exoahenerenai waikohe waiyexekoa atyo etakehare halitinai semaxematya hoka tyakajititereharenai iraiti hamahiyase waiyexe ako, exahe tyakekohatiye hoka kahare tyomaha Enore ana, tyakekohatiha atyo hoka — nexa.

### **Xaokanatyakalati Tah**

(Marcos 4.21-25)

<sup>16</sup> — Maisa atyo xalahare aotakahena xaokanatyakalati hoka hatyo najikinita mokarene koho exahe xoana kama katyahe xamani. Xakore hoka xaokanatyakalati atyo exomokakalaose terota kaxomokakita, hoka tyotyala ijoiterenai waiyaha maheta exaokanala. <sup>17</sup> Hiyaiya, tyotyala kaxateroakisakiterenai atyoite kawaiyakehetaite, exahe tyotyala metaharetereharenai atyoite kawaiyakeheta, kahotikisakeheta — nexa.

<sup>18</sup> — Hatyo hiyeta maika xirihare exahe xiyaiyehena, aliyakere xamani exeharenai xasemita hoka. Hiyaiya, xala xamani atyoite xoolinihare kakoare hoka kaxekakihitiyaite exahexe enomana. Xakore hoka xala xamani atyoite maisa xoare kakoare hoka haxoaliniya aokitere atyoite kaiyakeheta enonitata — nexa.

### **Jesus Nityo, Iximarenenai**

(Mateus 12.46-50; Marcos 3.31-35)

<sup>19</sup> Hatyaoseta Jesus nityo, iximarenenai xoaha tyoaha tyoonitere nali xakore hoka maisa aliyakere kaokahitaha ehaliya, kahare halitinai hoka.

<sup>20</sup> Hatyo hiyeta hatya xakaini Jesus hiye: — Hityo, hiximarenenai xoaha menanaka tyaonahitaha hoka irae-ha hikakoa aokowiyahitaha — nexa.

<sup>21</sup> Xakore hoka Jesus nexa tyotyala ihiyeha: — Mama, noximalininai xoaha atyo etakehare semitereharenai exahe tyaonitereharenai Enore niraene xema — nexa.

### **Jesus Amemakiheta Kinatyawiniti**

(Mateus 8.23-27; Marcos 4.35-41)

<sup>22</sup> Haxowaka ferakene Jesus kakoha haxaotyakiraharenai kakoa kanowa ako hoka nexa: — Wiya hokoxa halakoiya maniya — nexa. Hatyaoseta xaneha.

<sup>23</sup> Hoka imahotyohititaha hokoxa hoka Jesus nema-ka. Hoka hoholati kinatyaxa hoholahena hokoxa hao, hoka kanowako one kaisehena, kaheneharehena tyotyala enomanaha.

<sup>24</sup> Hatyaoseta exaotyakiraharenai kaokaha Jesus haliya hoka kaosetyahene hoka nexaha: — Xekohaseti, Xekohaseti! Wiwainihenaore! nexaha.

Hoka Jesus kaose hoka tityoaheta hoka irae hoholati, one xoaha hiye hoka mahohoreheta, memaxeheta one, mema akeheta.

<sup>25</sup> Hatyaoseta nexa haxaotyakiraharenai hiye: — Aliyo xityakekone tyaonita? nexa.

Xakore hoka hakaharetyoahitaha, exahe mairahitaha xoaha hoka nexahitaha: — Xoare halitini ala exe hoka one, hoholati xoaha hiye irae hoka aokitere akereta tyaonaha? nexaha.

### **Jesus Axikaheta Isekohaliti Iniyalaharenai Haliti Nonitata**

(Mateus 8.28-34; Marcos 5.1-20)

<sup>26</sup> Hatyaoseta kaokaha Gerasakoa, Galilía hokoxala halakoiya maniya. <sup>27</sup> Hoka Jesus exoahena kanowakota hoka hatya haliti, hatyo wenakalatitare xane ahakaoatene. Hatyo haliti kakoa isekohalitinai iniyalaharenai tyaonita. Wahakiyehena maisa isoare imityako, maisa hatyako hekoti tyaonare, xawatyakalatinai koni atyo tyaonita.

<sup>28</sup> Hatyaoseta waiya Jesus hoka hatyo haliti kawiyatya, exo hakaoliri kakoa waikoa enahalakoa hoka nexa kinatyaxa: — Jesus, Enore Kalorexe Ityani! Xoare haoka nohiye? Naxita hiso hoka awa atyo iniyalahare hamohena natyo! nexa. <sup>29</sup> Nikare irae, Jesus koxaka irae isekohaliti iniyalahare hiye hikoaheta maheta haliti nonitata hoka.

Kahaliki isekohaliti otokitene. Haxowaka halitinai olatyahene ikijinai, ewaotyalinai xoaha hiye kamatiherahi kakoa, xakore hoka irikititene, hoka isekohaliti axanikijitene maharexakahare xeta.

<sup>30</sup> Hatyaoseta Jesus axene: — Xoare nexare hiso? nexa.

— Nexare atyo Hisoakere — nexa. Nikare irae kahare isekohalitinai iniyalaharenai tyaonita ekakoa hoka.

<sup>31</sup> Hoka isekohalitinai axahitaha Jesus hoka maisa hatyo toloko hatekoakore axikatyahene aokareha.

<sup>32</sup> Exowaka kahare bolokonai nisakoaita hatyo haliyaseta tyairi heno. Hoka isekohalitinai axa Jesus, kasani halakisahene hoka bolokonai milako tyaonaha maheta hoka halakisahene. <sup>33</sup> Hatyaoseta isekohalitinai hikoahetaha haliti nonitata hoka bolokonai milako tyaonaha, hoka exoahenahitaha tyairi henoseta hokoxa xaiya xeta hoka monaha hoka tyotyaha wainiha.

<sup>34</sup> Hatyaoseta boloko kaxaikotyasenae waiyaha hatyoharenai hoka tekoahenahitaha hoka xakaiha etahiha wenakalatikoanai, exahe hatyo wenakalati haliyita tyaoniterenai hiye. <sup>35</sup> Hatyaoseta kahare halitinai xaneha waiyaha maheta nikare tyoahenerehare. Kaokaha Jesus tyaonitere nali hoka waiyaha haliti. Hatyo nonita-

ta atyo isekohalitinai iniyalaharenai xanehitita hoka Jesus kiji haliya tyokita, kaimere, waiye xahekoreheta xoaha. Waiyahene hoka mairaha. <sup>36</sup> Hatyohare waiyehenereharenai xakaihakatya hatyo haliti waiye maniya xomokakeheta tahi.

<sup>37</sup> Hatyaoseta tyotya Gerasa nalikoa tyaoniterenai kalore mairaha hoka Jesus hiye iraeaha, xaneheta maheta ewaikoharaha koata. Hatyaoseta Jesus kakohaheta kanowako hoka xaneheta.

<sup>38</sup> Hoka hatyo haliti tihanare ehatyahalinihikihenerere hoka xanehetehenerere enonitata awaiyehetehenerere tihityoa Jesus hiye: — Haokareya hoka notyooa hiyema, Xekohaseti — nexa.

Xakore hoka Jesus axikahetehenerere hoka nexa: <sup>39</sup> — Hiyanehetehena hawenakala xeta hoka hiyakaihena Enore tyomehenerehare homana — nexa.

Hatyaoseta hatyo haliti xane tyotya wenakalatikoanai hoka xakaihakatya Jesus tyomehenerehare enomana tahi.

### Jesus Aiyatolokiheta Ohiro, Xoimahaloti Xoaha

(Mateus 9.18-26; Marcos 5.21-43)

<sup>40</sup> Hatyaoseta Jesus haikoaheta hokoxa halakoiya maniya hoka kahare halitinai haihalahareneha kakoa katyawaxehenahitaha ihiye, tyotyaha atyo nali terota atyahahitene hoka.

<sup>41</sup> Hatyaoseta kaoka hatya haliti Jairo nexarexe, hatyo atyo xahohisakoatyakalati hana kaxaikotyasehare tyaonita hawenakala nali. Hoka meholokoa Jesus kiji haliya hoka axene, xane maheta ehana nali, <sup>42</sup> ityani hamokoserore 12-wanonehenolo wainihena hoka.

Hoka Jesus xanetata hoka kahare halitinai ehotyasekoaitene tyotya maniyata. <sup>43</sup> Hatyaoseta hatya ohiro kaoka halitinai koni. Koxaka 12-tere-hokoanehena timalati hikoata minita ihiyeta. Koxaka tyotya haxiyehalonai miyatya wairatyarenai hiye, xakore hoka maisa xala hare aiyatolokihitene. <sup>44</sup> Hoka xane Jesus hiniri maniyata hoka ekaokakisa hakahe inima kilihi hiye hoka irikotyohalohetehena rotita hoka waiyeheta. <sup>45</sup> Hatyaoseta Jesus axehena: — Xala ekaokakisa hakahe nohiye? nexa.

Nexa hoka tyotya teraharetyoaha.

Hatyaoseta Pedro nexa: — Xaotyakisatiye, tyotya halitinai atyo hihoko haliya tyaonahitaha, ehotyasekoatyahitaha hiso — nexa.

<sup>46</sup> Xakore hoka Jesus nexa: — Hatya ekaokakisa hakahe nohiye. Hiyaiya, nokehexa nohiyeti iyateliti hikoane — nexa.

<sup>47</sup> Hatyaoseta ohiro maisa aliyakere teroahetolo hoka tyo hatatakoane kakoita hoka meholokoa Jesus kiji haliya. Hoka tyotya enahalakoahitaha xakai Jesus hiye xoare hiyeta ekaokakisa hakahe ihiye, exahe kinatolohetehenolo rotita xoaha tahi.

<sup>48</sup> Hatyaoseta Jesus nexa: — Hikinatoloheta atyo hityakekone hiyeta. Hiyanehetehena himehexaikalone kakoa — nexa.

<sup>49</sup> Jesus iratata hoka kaoka hatya wakahare Jairo hanakotare hoka nexa: — Xekohaseti Jairo, hityani kox-

aka waini. Kotare Xaotyakisatiye matyoanenehare hihana nali, waiya aliya hoka kirahare haetonane hiyeta — nexa.

<sup>50</sup> Jesus sema hatyoharenai hoka nexa Jairo hiye: — Awa atyo himawaiyehare, maika hityakekohena hoka kinatolohetaite — nexa.

<sup>51</sup> Hatyaoseta Jesus kaoka Jairo hana nali hoka Pedro, João, Tiago xoaha taita isoaha exema aoka, xoimahaloti nexa, nityo xoaha taita, maisa hatehitiya isoa aokita.

<sup>52</sup> Tyotyaha nali tiyahitaha, exahe kirakoane tyaonahitaha xoimahaloti hiyeta. Hoka Jesus nexa: — Awa atyo xitiya, xoimahaloti maisa waini xini. Nemakahalota atyo — nexa.

<sup>53</sup> Hatyaoseta tyotyaha koexahalihenehene, waiyekehalakita atyo enomanaha koxaka ekamane hoka.

<sup>54</sup> Xakore hoka Jesus xane isoa, otokene ekahe hiye hoka nexa kinatyaxa: — Xoimahaloti, hatityoahetehena! nexa.

<sup>55</sup> Hoka kasehetehitiya hoka tityoahetehena rotita. Hatyaoseta Jesus nakairati xekaka aoka xoimahaloti ana.

<sup>56</sup> Hoka enexe, inityo hakaharetyoaha, xakore hoka Jesus irae ihiyeha hoka hatyoharenai maxakaisakene hatya hiye aoka.

### Jesus Xaotyakiraharenai 12-harenai Hatene Tahi

(Mateus 10.5-15; Marcos 6.7-13)

**9** Jesus kawisa 12-harenai haxaotyakiraharenai hoka isa enomanaha iyateliti, waiyoliniti xoaha, axanikihenahitaha maheta isekohalitinai iniyalaharenai, exahe aiyatelikihenahitaha maheta hokakiterenai.

<sup>2</sup> Hatyaoseta axikatyahene xakaiha maheta Enore koamaniya nawenatyaka tahi exahe aiyatelikihenahitaha maheta hokakiterenai hoka <sup>3</sup> nehena: — Awaira atyo xoalinihare xakolahena xiyanene niyahare: mahaiya tonohisoakalati hekoti xatonohisoa maheta, mahaiya sako, mahaiya nakairati, mahaiya olo exahe mahaiya hate hekoti kajianexe imitinase xakolaita. <sup>4</sup> Maika xikaokahena hakoa wenakalati hoka maika waiye mohenerenai xiso hanako xisaona hatyo wenakalatita xiyanehitiyere kijiya. <sup>5</sup> Xakore hoka maika maisa waiye mokahitaha xiso hoka xijiyehitiya rotitaira hatyo wenakalatita. Hoka maika xijiyehitiya hoka xamokotyahatya xiberekatanenai waikohese xahita, xahotikisa maheta hatyo halitinai ana emawaiye xomokareneha xiso — nexa.

<sup>6</sup> Hoka exaotyakiraharenai xaneha hoka jiyaha tyotya wenakalatikoanai hoka xakaitaha Iraitu Waiyexe, exahe aiyatelikihenahitaha hokakiterenai hakakoare.

### Herodes Tyakoiyahare Tahi

(Mateus 14.1-12; Marcos 6.14-29)

<sup>7</sup> Herodes, xekohaseti tyaonitere Galiléia nali, sema tyotya hatyoharenai tahi hoka maisa aliyakere ahokotyaxa mokene, haiyaharenai atyo nita hoka: — João Batista kaseheta! nexahitaha hoka.

<sup>8</sup> Haiyaharenai atyo Elias kaotyakeheta aokahitaha, exahe haiyaharenai atyo hoka motya toahiyerehare iraiti xakaisasehare kaseheta aokahitaha.

<sup>9</sup> Xakore hoka Herodes nexa: — Natyota terota atyo João seri xirikotyaka naoka. Hoka xala halitini tahi ni-raetyakala exeharenai nasemita? nexa.

Hoka Herodes waiya aokowihena Jesus.

### Jesus Tyaisa Kahare Halitina

(Mateus 14.13-21; Marcos 6.30-44; João 6.1-14)

<sup>10</sup> Hoka iniraene kakoarenai kaokehenahitaha hoka Jesus hiye xakaihakatyaha tyotya háomanaha tahi. Hatyoseta nolokahene hoka xaneha hawawaha wenakalati Betsaida nali. <sup>11</sup> Xakore hoka kahare halitina semaha hatyoharenai tahi hoka xaneha exema. Hoka Jesus awaiyetyahene hoka xakai ihiyeha Enore koamaniya nawenatyaka tahi, exahe aiyatelikiheta hawairatyaka aokiterenai.

<sup>12</sup> Hatyaoseta waikoa kamaetehena. Hatyo hiyeta 12-harenai exaotyakiraharenai tyoaha hoka nexaha Jesus hiye: — Haxikahetehena exe halitina hoka xanehenahitaha. Hoka xaneha wenakalatikoanai, wenakalatikoasenai xoaha nali, alita owitene tyaohenere nali, hoka kaokaha nakairati, haemakahaose xoaha. Hiyaiya, ali atyo maisa xoare aka — nexaha.

<sup>13</sup> Xakore hoka Jesus nexa ihiyeha: — Xisehena xisota enomanaha nakairati — nexa.

Hoka nexaha: — Tyotya tyaoniterenai winali atyo 5-tohase nakairati, hinama kohasenai xoaha taita. Xoana haxikaita wiso wiya maheta nakairati tyotya exe halitina ana? nexaha.

<sup>14</sup> Nali tyaonita kala xoana xamani hoka 5.000-harenai halitina. Hoka Jesus irae haxaotyakiraharenai hiye: — Xiraehena halitina hiye hoka tyokaha 50-harenai xakini haware — nexa.

<sup>15</sup> Hoka exaotyakiraharenai sema iniraene hoka irae-ha ihiyeha tyotya tyokaha maheta. <sup>16</sup> Hatyaoseta Jesus iya 5-tohase nakairati, hinama kohase xoaha hoka wahakotya enokoa xeta hoka iraexatya Enore hiye: — Ehekore nakairati hisa womana, Abá — nexa. Hatyaoseta taikasetya nakairati, kohasenai xoaha hoka isene haxaotyakiraharenai ana irakahene halitina ana maheta. <sup>17</sup> Tyotyaha kanakairaha hoka fakatehareha, hoka exaotyakiraharenai kaisehenahitaha 12-te koho kamawanehenere holoxo kakoa.

### Pedro Iraehena Jesus Kakoa

(Mateus 16.13-20; Marcos 8.27-30)

<sup>18</sup> Haxowaka Jesus hawawaharenai tyaonita, iraexaita, hoka exaotyakiraharenai kaokaha ehaliya. Hatyaoseta Jesus axahene: — Xala aokita natyo halitina? nexa.

<sup>19</sup> Hoka nexaha: — Haiyanai atyo João Batista aokahitaha hiso. Haiyaharenai atyo Elias aokahitaha hiso. Haiyaharenai atyo koxakerehare iraiti xakaisasehare kaseheta aokahitaha hiso — nexaha.

<sup>20</sup> — Hoka xiso atyo xala xaokita natyo? nexa Jesus.

— Hiso atyo Enore Kalorexe Aohenere, Enore xaxikalahare waokita hiso — nexa Pedro.

<sup>21</sup> Hatyaoseta Jesus irae ihiyeha hoka hatyoharenai maisa hatya hiye xakaisaka aokita.

### Jesus Irae Hakamane, Hakaseneheta Xoaha Tahi

(Mateus 16.20-28; Marcos 8.30-9.1)

<sup>22</sup> Hoka nehitiya: — Haliti Ityani ite kaxemakawatikisakehena kalore. Judeunai nityohalitiranaiha, sacerdotenai xekohasenai, Xaotyakiyaho kakoa waiyoreterenai harenaite maisa aokahitene haomanaha. Kaxaisakaite, hoka hanamaki ferakene najikinitaite kasehetehitiya — nexa.

<sup>23</sup> Hatyaoseta nexa tyotya ihiyeha: — Xala xamani atyo tyaona nokoamaniye aokowihena hoka maika hatyota maotyanoawi hoka maika kolatya tyotyaki ferakene haberekotyaka niyahare atyalihose xaimaholatyaka hoka tyaona noximi. <sup>24</sup> Hiyaiya, xala xamani atyoite waiyexe maniya moka aokowita hawenane hoka metaite enonita. Xakore hoka xala xamani atyoite kaxaisaka nohiyeti hoka wenati waiyexe atyoite kaoka. <sup>25</sup> Xoare mahetaiya hatya jiyahaotya hakakoare waikohekoarenai, hatyota xamani ametakisoawihena, xoana kamawenekoaretyakehena xamani hoka? <sup>26</sup> Hiyaiya, xala xamani atyoite haiharetatyo exahe noxaotyakiri xoaha hoka Haliti Ityani tehitiyaite haihare ekakoa, tyohetehenere hawerokene, Hanexe werokene, anjonai waiyexeharexenai xoaha kakoa xowaka.

<sup>27</sup> — Exeharenaira xotyaxematya: aliterexetya nomita xihye: haiyaharenai ali tyaonitereharenai tyaite maisa wainahitaha Enore nalitare Kalorexe hamawaiyanenehareha nahitita — nexa.

### Jesus Ana Moisés, Elias Xoaha Kaotyaka

(Mateus 17.1-13; Marcos 9.2-13)

<sup>28</sup> Kala xoana xamani hoka hasemanane najikinita, Jesus noloka Pedro, João, Tiago xoaha hoka kakoha tyairi heno iraexatya maheta. <sup>29</sup> Iraexaita ene hoka itihohawareharexe tyaona, exahe inima hoka iyomate, werokate tyaona. <sup>30</sup> Hatyaosehena hoka hinamahare haliti nali kaotyaka hoka iraeheka ekakoa. Hatyonai atyo Moisés, Elias xoaha <sup>31</sup> exahiyatyoreha werokiti enokoatatare kakoa. Iraetaha Jesus kakoa ekamane exahe exemakawatikasaka Jerusalém nali Enore aohenere akereta tahi. <sup>32</sup> Pedro, ihinaeharenai xoaha waiye nemakahitaha, xakore hoka kaosehenahitaha hoka waiyaha Jesus, hinamahare halitina ehaliya tyaoniterenai xoaha werokahalini.

<sup>33</sup> Hoka hatyo halitina xanehenahitehenaha Jesus nonitata hoka Pedro nexa: — Xaotyakisatiye, waiye nawenatyaka ali. Nika wisoma hanamalise hatirisenai: halise homanere, halise Moisés anere, halise tehitiyaite Elias anere — nexa. Aliterexe Pedro ana maisa waiyekehalakere hekoti iniraeneta enomana.

<sup>34</sup> Iraetata ene hoka kaotyaka kaiminiti hoka exahiya-hokotyahene. Hoka hatyo koni tyaonaha hoka mairaha.

<sup>35</sup> Hoka kaiminiti konita tyoa iraiti hoka nexa: — Exe atyo Nityani, noxiyakawali. Xasemaxematyaira iniraine — nexa.

<sup>36</sup> Hatyaoseta iraiti tyoteheta hoka Jesus waiyehenahitaha hawawita. Hoka exaotyakiraharenai mema tyaonaha hoka hatyo xowaka maisa xala hare hiye xakaitaha hawayaneha tahi.

### Jesus Mahatyahareheta Xoimahaliti

(Mateus 7.14-21; Marcos 9.14-29)

<sup>37</sup> Hatyaoseta kamaetali exoahenahitaha tyairi heno-ta, hoka kahare halitina tyoa ahalakoaty Jesus.

<sup>38</sup> Hatyaoseta hatya haliti tyaonitere halitina neneke-sene kawiyahena: — Xekohaseti, naxehena hiso nityani hiyeta, hamokoserore nityani hoka! <sup>39</sup> Hatya isekohaliti iniyalahare tyaonita ekakoa, hoka ehárehena rotita xoimahaliti kawijita, exahe atatakoakijitene exahe kakatoloxaholijitene ekanasakota. Hoka isekohaliti kawemokitene, maisa halakisarene hekoti.

<sup>40</sup> Koxaka naxa hiyaotyakiraharenai axanikihenahitaha maheta isekohaliti iniyalahare, xakore hoka maisa xoana mokahitene — nexa.

<sup>41</sup> Hoka Jesus nexa: — Haliti matyakekoneharenai, mawaiyexehareharenai! Otene kijiyaita notyaohena xikakoa? Otene kijiyaita naiyasetyoa xikakoa? nexa.

Hatyaoseta nexa haliti hiye: — Hisohena ali hityani kakoa — nexa.

<sup>42</sup> Hatyaoseta xoimahaliti kaokehena hoka kafahare hoka isekohaliti iniyalahare exoakisene waikoa. Hatyaoseta Jesus watyali isekohaliti hoka awaiyeheta xoimahaliti hoka isehetene enexe ana. <sup>43</sup> Hoka tyotyaha hakaharetyoaha Enore niyaterere nerore kakoa.

### Jesus Iraehitiya Hakamane Tahi

(Mateus 17.22-23; Marcos 9.30-32)

Tyotyaha hakaharetyoahitatahane ene Jesus tyomiterehare kakoa hoka nexa haxaotyakiraharenai hiye: <sup>44</sup> — Awaira atyo ximaotyanehena niraehenerehare xihye tahi: Haliti Ityani tyaite kaxekakehena halitina ana hoka aisahene ite — nexa.

<sup>45</sup> Xakore hoka maisa waiyekehalakita enomanaha hatyoharenai. Hatyo irahenerehare tahi akiti meta-hare tyaona enomanaha hoka maisa waiyekehalakita terota enomanaha maheta. Hoka mairahitaha haxaxaneha hatyoharenai tahi.

### Xala Xamani Masakare Kalorexe Hoka

(Mateus 18.1-5; Marcos 9.33-37; Filipenses 2.3-5; 1 Pedro 3.4; 5.5)

<sup>46</sup> Hatyaoseta exaotyakiraharenai irakakoahenaha: xalahare kaisere xamani ala enekonitareha masakare kalorexe hoka. <sup>47</sup> Hoka Jesus ana waiyekehalakita exahekolaha. Hatyaoseta iya hatya xoima hoka mokene hahaliya <sup>48</sup> hoka nexa: — Xala xamaniya atyo nohiyeti hatya xoima waiye mokita hoka waiye atyo mokita natyo. Hoka xala xamani atyo waiye mokita natyo hoka waiye atyo mokita noxaxikatyasehare. Hiyaiya, xala xamani atyoite maisa haiyanae xahehare tyaona

aokowita xinekoni hoka hatyo atyoite haiyaharenae xahehare — nexa.

### Hatya Maisa Ahowitikisare Xiso Hoka Kahinaetita Xiso

(Marcos 9.38-40)

<sup>49</sup> Hoka João nexa: — Xaotyakisatiye, wiyaiya hatya haliti axanikihitita isekohalitinai hexare kakoa, xakore hoka wamahokoanetya nikare enómene, maisa winekonitare xini hoka — nexa.

<sup>50</sup> Hatyaoseta Jesus nexa João, haiyaharenai haxaotyakiraharenai xoaha hiye: — Awa atyo xamahokoanetya. Hiyaiya, xala xamani atyo maisa ahowitikisare xiso hoka kahinaetita atyo xiso — nexa.

### Samaria Yerenai Maisa Jesus Kaokene Awaiyetyahitaha

<sup>51</sup> Hoka hikoahena Jesus xanene aosehena enokoa xeta hoka xane Jerusalém xeta aokowi. <sup>52</sup> Hoka haiyaharenai axikatya haheta maniya. Hoka xaneha hoka kaokaha hatya wenakalatikoase Samaria koa nali, kaokaha hakiti hoka nemakaha maheta. <sup>53</sup> Xakore hoka nali tyaoniterenai maisa Jesus kaokene awaiyetyahitaha, semaha exanenehena Jerusalém xeta hoka.

<sup>54</sup> Hoka exaotyakiraharenai Tiago, João xoaha semaha hatyoharenai hoka nexaha: — Xoana waxa irikati enokoatatare hoka exe halitina mehotyahaokita? nexaha.

<sup>55</sup> Xakore hoka Jesus ehaikoahareheta hoka watyalihene. <sup>56</sup> — Maisa Haliti Ityani tyoa mehotyaha maheta xini halitina. Tyoa iyehenahitene iniyalahare nonitata maheta — nexa. Hatyaoseta xanenehahitiyaha hakoa wenakalatikoase xeta.

### Haiyaharenai Jesus Xema Xaneha Aokowiha

(Mateus 8.18-22)

<sup>57</sup> Hoka Jesus, exaotyakiraharenai xoaha xanahitaha ahotyaho hoka hatya haliti nexa Jesus hiye: — Notyoaita hiyema, aliyo xamani hiyanehena hoka — nexa.

<sup>58</sup> Hatyaoseta Jesus nexa: — Wakarenai atyo kahanere waikoako, kotehalanai atyo kaihexe. Xakore hoka Haliti Ityani atyo maisa xoare ako kawiniye — nexa.

<sup>59</sup> Hatyaoseta hahare hiye nexa: — Hisohena noximi — nexa.

Xakore hoka nexa: — Xekohaseti, nahaikoaheta hoka baba waini hoka nafetene hotohare hoka hatyaosetaite notyoo hiyema — nexa.

<sup>60</sup> — Hahalakisene hoka kotare kamatinai fityaha hakamane hatyanai — nexa Jesus. — Xakore hoka hiso hiyane hiyakaihena Enore koamaniya nawenatyaka tahi — nexa.

<sup>61</sup> Háhare nexa: — Notyoaita hiyema, xakore hoka nahaikoaheta hoka nojinaheta hotohare nohinaeharenai — nexa.

<sup>62</sup> Hoka Jesus nexa: — Xala xamaniya atyo aijoheneha waikohe hoka maisaiya hajikini maniya wahakoita. Nikarexe xala xamaniya Enore xema maniya tyaona



aokowi hoka maisaiya hawenane toahiyere xema tyao-hitita — nexa.

### 70-harenai Hatene Tahī

**10** Hatyo najikinita Xekohaseti aoka haiyaharenai exema xaneterenai konitare 70-harenai hoka axikatyahene hinamahare xakini, xaneha maheta enaheta maniya wenakalatinai exahe xaneheneraoseni nali nihatyaka.

<sup>2</sup> Axikahenaherene nahitita, nexa: — Kahare ximexati niyahare, xakore hoka hatenitiyenai atyo maisa kaharexe. Hatyo hiyeta xaxehena hanakatihaliti xekohasehare hoka axikatyahatenitiyenai hoka imexaha.

<sup>3</sup> Xiyanehena! Naxikaita atyo xiso ahoxanai koni kalaneronai xanetere akereta. <sup>4</sup> Awaira atyo xakolahena xibonane, xoloxa nitini, exahe xiberekatane. Exahe awa atyo xatityoahena ahotyaho hoka xikatyawaxehena hatya hiye. <sup>5</sup> Maika xisoahena hali hatyako hoka xexa hotohare: “Kasani mehaxikohaliti tyaona exe hatyako waoka”, xexaira. <sup>6</sup> Maika hatya haliti mehaxikoharexe nali tyaonita hoka xahalakisaira xityawaxa ekakoa. Xakore hoka maika haliti mamehexaikoharenehare hoka xityawaxaira xemaisaheta enonita. <sup>7</sup> Maika hatyoli hatyakota xisaona hoka xikanakairehena, xiserehena, xoarenai xamani isehenaha xomana hoka. Hiyaiya, hatenitiye atyoite kabakatyaka ehatene nahalakoa. Awa atyo halyakota xiyane halyako xeta menehena — nexa.

<sup>8</sup> — Maika xikaokehena hakoa wenakalati hoka waiye mokaha xiso hoka maika xikanakaira isehenerehareha xomana. <sup>9</sup> Xaiyatelikihetaira hokakiterenai hatyo wenakalatikoarenai hoka xexaira halitinai naliyerenai hiye: “Enore koamaniya nawenatyaka tahi akiti atyo kaoka xomana”, xexaira. <sup>10</sup> Xakore hoka maika xikaokehena hakoa wenakalati hoka maisa waiye mokahitaha xiso hoka xiyanira ahotyahanai hoka xexa: <sup>11</sup> “Waikohese kakoita alalatyohenerere wikijina hiye exe wenakalatita wamokotyahaheta xiyahita! Xakore hoka xotyaxematyaira exehare: Enore koamaniya nawenatyaka tahi akiti atyo kaoka xomana”, xexaira.

<sup>12</sup> Hoka Jesus nehitiya: — Xaxalisati Ferakene ite Enore ite airakoaneharetya Sodoma hatyo wenakalati nonitata — nexa.

### Wenakalatikoanai Matyakekoneharenai

(Mateus 11.20-24)

<sup>13</sup> Hoka Jesus nehitiya: — Kirakoane ite hisaohena, wenakalati Corazim! Kirakoane ite hisaohena, wenakalati Betsaida! Hiyaiya, waiyexenai mawaiyakaharenai kaomakehenerere hatyo hinaliyeya atyo kaomakere wenakalatikoanai Tiro, Sidom xoaha nali hoka hatyo naliyerenaiya atyo halakihenahitaha háomaneha iniyalahare. Exahe hotikisahaiya atyo aokowiha iniyalahare halalakiraha hoka tyokahaiya atyo tataolate nimere, hoka mokahaiya irikati niyehe haseriha heno.

<sup>14</sup> Xaxalisati Ferakene ite Enore ite airakoaneharetya Tiro, Sidom xoahanai xiso, Corazim, Betsaida xoahanai nonitata! <sup>15</sup> Exahe hiso, wenakalati Cafarnaum, xoana

hiyahekola hiye hoka motyaite hakakoha enokoa nali haokita? Hasemehena, hikaxawatyaka atyoite kamatinai tyaonitere nali.

<sup>16</sup> Hatyaoseta nexa haxaotyakiraharenai hiye: — Xala xamaniya atyo sema xiraene hoka semita atyo niraeni. Hoka xala xamaniya atyo maisa awaiyetyare xiso hoka natyo atyo maisa awaiyetyare. Hoka xala xamani atyo maisa awaiyetyare natyo hoka maisa atyo awaiyetyare noxaxikatyasehare — nexa.

### 70-harenai Kaokeneheta Tahī

<sup>17</sup> Hoka 70-harenai kaokehenahitaha kalore haihalahareneha kakoa hoka nexaha Jesus hiye: — Tihanarenai kakoita semaxematya wiraene, hexare kakoa wiraehena hikoahenahitaha maheta halitinai nonitata hoka! nexaha.

<sup>18</sup> Hoka Jesus nexa: — Aliterexe. Hiyaiya, nowaiya Ahalakoahaliti xexoaneheta enokoata, motya kahihyie.

<sup>19</sup> Xasemehena: nisá atyo xomana iyateliti xatyahaka maheta owinai xakolokoanai harenae, exahe xijiya-haotya maheta xahalakoaharenai niyaterere hoka maisa ininai hekoti iniyalahare xikaxomokakita maheta.

<sup>20</sup> Xakore hoka awa atyo xihalahare tihanarenai semehenahere xiraene kakoa taita. Xakore hoka maika xexarenai enokoa nali kaxairatyakehenerere kakoa kaisere xihalaharehena — nexa.

### Jesus Kalore Ihalahare

(Mateus 11.25-27; 13.16-17)

<sup>21</sup> Hatyaosehena hoka Isekohaliti Waiyexe niyaterere hiyeta Jesus kalore ihalahare hoka nexa: — Abá, hiso atyo enokoa, waikoa xoaha Xekohasehare. Nihalahare hikakoa, hawaiiyekehalakahenerere hitahi akiti xoimanai exahe mawaiyoreharenai ana hiyeta. Hoka waiyorexe, semarexe tyaohehenerenai ana atyo metahare hamoka hitahi akiti. Aliterexe, Abá, hatyoharenai atyo kaomaka hiyaokala exahe haokitere akereta — nexa.

<sup>22</sup> — Baba atyo halakisa nomani tyotyaxoalini hare. Maisa atyo xala hare waiyorexe Ityani kakoa. Enexe taita atyo waiyoreta ekakoa. Exahe maisa atyo xala hare waiyorexe Enexe kakoa. Ityani taita atyo waiyoreta ekakoa, exahe haiyaharenai ana awaiyekehalakatene hoka hatyonai tehitiya atyo waiyoreta ekakoa — nexa.

<sup>23</sup> Hatyaoseta Jesus ehaikoahareheta haxaotyakiraharenai ana hoka nexa ihiyeha, hawawahareha heko: — Waiye kaiserehare atyo waiyitereharenai exehare xiyaiyitereharenai! <sup>24</sup> Natyo atyo nomita: kahare iraiti xakaisaseharenai, kalorexeni xoaha waiyaha aokowiha exehare xiyaiyiterehare, xakore hoka maisa waiyahitene. Exahe semaha ene aokowiha exe xasemiterehare xakore hoka maisa semahitene hekoti — nexa.

### Samaria Yere Waiyexe Tyomehenerere Tahī

(Mateus 22.34-40; Marcos 12.28-34)

<sup>25</sup> Hatya Xaotyakiyaho kakoa waiyoretere tityoa, hoka kasani hasakaharetya Jesus aokowita hoka axene:

— Xaotyakisatiye, xoareya notyoma hoka kaxekaka nomani wenati matyotenehare? nexa.

<sup>26</sup> Hoka Jesus nexa: — Xoare nexa atyo Iraitu Waiyexe kaxairatyakehenere hatyoharenai tahi? Hoka aliyakere ere hatyo akiti hasemita? nexa.

<sup>27</sup> Hoka hatyo haliti nexa: — Hawaiiyehena kaiserehare Hiyekohase Enore, hisaonehena exema maniya takita, hahekohena ekoamaniya takita, haiyateretyoahena hawenane kakoa exema maniya. Exahe hawaiiyehena haiyanae hawaiietyoawitere akereta — nexa.

<sup>28</sup> — Hekoaxahenere atyo ehekorexeta — nexa Jesus. — Nikare hisaonehena hoka hisaona mene — nexa.

<sup>29</sup> Xakore hoka Xaotyakiye kakoa waiyoretere kasani waiyexehare aokowita hoka axene: — Hoka xala atyo haiyanae haokitere? nexa.

<sup>30</sup> Hoka Jesus nexa: — Hatya haliti xanehitita Jerusalém nalita Jericó xeta. Hoka ahotyaho haiyaharenai kaiwarexe otokene, aitoakisaha inima, mokotyahene hoka komita ene aisahene hoka halakisahene.

<sup>31</sup> Hoka hatya sacerdote xanehitiya hatyoahota. Hoka waiya hatyo haliti hoka exahiyatene hoka jiya. <sup>32</sup> Hatya levita tehitiya hatyo nali jiya. Wahakotya enomana hoka exahiyatene tehitiya hoka jiyehitiya. <sup>33</sup> Hoka hatya Samaria yere jiyehena hatyo ahotyaho hoka hiko hatyo nali. Hoka waiya hatyo haliti hoka airakoaneharetene. <sup>34</sup> Kaoka ehaliya hoka wairatene kolotentiya, vinhoxa harenai kakoa ekawe xomokakaose. Hatyo najikinita moka hatyo haliti hakirakaharexa kaiserehare heno hoka kolatene hatya nemakatyakalati xeta hoka nali kaxaikone.

<sup>35</sup> — Kamaetali xanehetehena hoka isa hinama hokose olo nemakatyakalati xekohasehare ana hoka nehena: “Maika hikaxaiko exe haliti. Nahaikoahetaite hoka nojiyehetehena ali hoka nabakaheta hiso, xoare xamani exe xahexe holoxa kakoa hiya enomana hoka” — nexa.

<sup>36</sup> Hatyaoseta Jesus axa Xaotyakiyaho kakoa waiyoretere: — Hiyahakola hiye hoka hatyo hanamaharenai konitare, xala hare hatyo haliti kamokohekoatyakehenere hinaehare tyaona? nexa.

<sup>37</sup> — Etake kahinaehenerene — nexa Xaotyakiye kakoa waiyoretere.

— Hoka hiyanehena hoka nikareta hisomehena — nexa Jesus.

### Jesus Xane Waiya Marta, Maria Xoaha

<sup>38</sup> Hatyaoseta Jesus, exaotyakiraharenai xoaha xanehenahitiyaha hoka kaokaha hakoa wenakalatikoase. Hatyo nali hatya ohiro Marta nexalolo hahanako nolokene. <sup>39</sup> Hoka iximalone, Maria nexalolo, tyoka Xekohaseti haliyaseti hoka semaxemaita exaotyakira.

<sup>40</sup> Hoka Marta kahatenehalo tyaonita tyoty hatyako-re hatenitina kakoa. Hatyaoseta xane Jesus haliya hoka nexa: — Xoana maisa xoare hahekotyare hoka exe noximaloni halakijita natyo tyoty exe hatenitina kakoa? Haxikahenene hoka tyoa kahinaetya natyo — nexa.

<sup>41</sup> Hatyaoseta Xekohaseti nexa: — Marta, Marta, hika-hateneta, himawaiyehalota xoaha kahare xoalini hare kakoa. <sup>42</sup> Xakore hoka haterore atyo ehekorexeta. Maria atyo aoka waiyexe, hoka hatyo atyoite maisa xala hare iyehitita enonitata — nexa.

### Jesus Aotyakisa Iraexatyati Kakoa

(Mateus 6.5-15; 7.7-11; Marcos 11.24; Lucas 18.1; 1 Tessalonicenses 5.17)

**11** Haxowakiya Jesus iraexaita hakiti. Hoka halakisa hairaxala hoka hatya exaotyakirahare axene: — Xekohaseti, haotyakihena wiso iraexatyati kakoa, João aotyakihenere haxaotyakiraharenai akereta — nexa.

<sup>2</sup> Hoka Jesus nexa: — Exakere xiraexatyati:

Wexe Enore, Hiso enokoa tyaonitere, kasani tyotyaha aiminisaha Hiso waokita. Hisohena ali Xekohaseti hisaona maheta.

<sup>3</sup> Kasani nakairati hisa womana tyotyaki ferakene waokita.

<sup>4</sup> Himaotyanehetehena iniyalahare wisomiterehare-nai, haiyaharenai iniyalahare mohenerere wiso wimaotyanehititere akereta. Hoka awa atyo hahalakihena wiso hoka wikahasakaharetyakehena, xexa — nexa.

<sup>5</sup> Hatyaoseta Jesus nexa haxaotyakiraharenai hiye: — Xasemehena, hatyaiya xinekonitare xane hatya hahinaehare hana nali wahaxati hoka nexaiya: “Nohinaehare, xama hisa nomani hanamalise nakairati. <sup>6</sup> Hatya nohinaehare kalikini kaoka nomani haetonane hekota, hoka maisaiya xoare kakoa natyaijitene”, nexaiya.

<sup>7</sup> — Hoka xiyahakola hiye tyaite hoka xihinaehare ekoaxahena enomana hahanakota: “Awa atyo hamawaiyenemakatyati natyo! Jihore atyo koxaka jihotyoare, hoka natyo, nityanina xoaha koxaka wehokotyaita. Maisaiya nainakoita hoka nijita homana nakairati”, nexaiya.

<sup>8</sup> — Natyo atyo nomita xihie: maisaiya ainakoita ihinaehare. Xakore hoka ainakoite ekaoserene hiyeta hoka isaite hahinaehare ana tyoty aokitereharenai.

<sup>9</sup> Hatyo hiyeta nomita: xaxehena hoka xikaoxekaka. Xataweniya hoka xikaoxene. Xamokotyaiya hati jihola hiye hoka majiholateniya xomana. <sup>10</sup> Hiyaiya, tyoty axitereharenai ana atyo kaxekakita. Exahe tawiterenai atyo kaokitene. Exahe jihore atyo majiholatyoita mokotitereharenai ana.

<sup>11</sup> — Xoana, hatya xinekonitare ityaniya axehena hanexe kohase hoka isaiya owi enomana? <sup>12</sup> Xoana, axehena xamaniya eseti hoka isaiya xakolokoa enomana? <sup>13</sup> Xisonai atyo maisa xakore xawaiyexe hoka xawaiyore atyo xijita xoaliniharenai waiyexenai xityanina ana. Hoka exahexe atyoite Wexe enokoa tyaonitere isehena Isekohaliti Waiyexe xalanai xamani axehenene hoka! nexa.

### Jesus Atyo Tihanare Kahinaetita Aokaha

(Mateus 12.22-30; Marcos 3.20-30)

<sup>14</sup> Jesus axanikihitita hatya haliti nonitata isekohaliti iniyalahare mairainititerene. Hoka isekohaliti hikoaheta hoka haliti iraexeheta.

Hoka halitinai hakaharetyoaha <sup>15</sup> xakore hoka haiyaharenai nexaha: — Belzebu, isekohalitinai xekohasehare atyo ijita iyateliti exe haliti ana axanikiheta maheta isekohalitinai — nexaha.

<sup>16</sup> Haiyaharenai kasani hasakaharetyahene aokowiyahitaha hoka axahitene tyoma maheta xoalini hare hotikisa maheta haiyaterere Enore nalitare.

<sup>17</sup> Xakore hoka Jesus waiyoreta exahekolaha kakoa hoka nexa: — Hakoa waikohekoa tyaoniterenai kirawanekakoaha hoka maisaiya kinatere tyaonehenahitaha, exaoretyakakoahaiya. Nikareya halyako tyaoniterenai kirawanekakoaha hoka xaorehaiya.

<sup>18</sup> Hoka Ahalakoahaliti hotyalinaiya kahotyaliye hoka hatyokakoaha kirawane kakoahitaha hoka aliyakereya kinatere tyaohenahitayaha? Hiyaiya, xisonai atyo Belzebu ijita iyateliti nomani naxikaheta maheta isekohalitinai xaokita. <sup>19</sup> Belzebu isa haiyaterere nomani hoka hatyo kakoa naxanikihitita tihanarenai xaokita. Nikareya hoka xala isa iyateliti xiyaotyakiraharenai ana hoka axanikihitita tihanarenai halitinai nonitata? Nikare xaokita hoka maisaiya tyakekota xiso xiyaotyakiraharenai.

<sup>20</sup> — Aliterexe atyo Enore niyaterere hiyeta naxanikihitita isekohalitinai hoka hatyoharenai atyo hotikijita Enore koamaniya nawenatyaka koxaka kaokoherehare xomana — nexa.

<sup>21</sup> — Hoka hatya haliti kinaterexe exahe kaxaisakarere atyo kaxaikohena hahanita hoka tyotya ixiyeharenai atyo katalatyakere tyaonita. <sup>22</sup> Xakore hoka hatya haliti exahehare niyaterere jiya enomana hoka jiyahaotene hoka kolatyaiya exaisakalanai, hatyo hatya tyakekotere hoka, irakaiya hahinaeharenai ana tyotya kolahenere enonitata — nexa.

<sup>23</sup> — Xala xamani atyo maisa kahinaetyare natyo hoka kahalakoahareta atyo nokakoi. Exahe xala xamani atyo maisa ahohisakoatyare nohakakoani hoka exaoretita atyo — nexa.

### Isekohaliti Iniyalahare Haikoahititerehare Tah

(Mateus 12.43-45)

<sup>24</sup> Hoka Jesus nehitiya: — Xasemehena, isekohaliti iniyalahare hikoahetehena haliti milakota hoka xane tonakoaite maonexakoahare akiti, tawita hakawinaose. Hoka maisaiya atyo kaokita hakiti hoka nita atyo: “Nahaikoahetaite nohani xeta notyohenere nali xeta”, nita. <sup>25</sup> Hatyaoseta haikoaheta hoka kaokohitita hati ihisakotyakahare, waiye xomokakotyakere ana.

<sup>26</sup> Hatyaoseta haikoaheta hoka xane nolokita hahotyali 7-harenai isekohalitinai exahehare niyalaharenai, hoka tyotyaha xane tyaonahitaha nali. Hatyo hiyeta hatyohare haliti nawenane hetatiye xahehare howitiharene tyaonita — nexa.

### Waiyexe Kaiserehare Tah

<sup>27</sup> Hatyoharenai Jesus iraehenere najikinita hatya ohiro tyaonitolo halitinai nenekesene kawiyatya enomana: — Waiye kaiserehare atyo ohiro awenakihenolo exahe aokokihenolo hiso! nexa.

<sup>28</sup> Xakore hoka Jesus nexa: — Exahehare nawaiye atyo etakeharenai semiterahrenai Enore niraene hoka tyakekotereharenai — nexa.

### Maomakahare Nomaka Xaxaka Tah

(Mateus 12.38-42; Mateus 16.1-4; Marcos 8.11-13)

<sup>29</sup> Hatyaoseta kahare halitinai hohisakoaha Jesus haliya hoka iraehena hoka exakere nexa: — Kaxiyani, kalikiniyerenai maisa waiyexe! Axahitaha xoalini hare nomaka tyakekoha maheta, xoana aliterexe xamani Enore nalitare niyaterere tyoita hoka. Xakore hoka maisaiya hatya hekoti kahotikisakita enomanaha, hoka Jonas tahi akereta taitaite. <sup>30</sup> Hiyaiya, iraiti xakaisasehare Jonas tahi tyare atyo aimenekoita wenakalati Nínive nali tyaoniterenai ana hoka Haliti Ityani tehitiya atyoite aimenekohena kalikiniyerenai ana. <sup>31</sup> Xaxalisati ferakenite xekohasetiro Sabá yolo ite tityoa hoka iraharehena xiso. Hiyaiya, sekota atyo tyoa sema maheta Salomão nawaiyore xaotyakiranai. Hoka natyo atyo nomita: kalikini ali tyaonitere atyo Salomão xahehare. <sup>32</sup> Xaxalisati ferakenite Nínive nali tyaoniterenai tityoaha hoka iraharehena xiso. Hiyaiya, halakisaha atyo iniyalahare háomanaha, semaha Jonas niraene hoka. Hoka natyo atyo nomita: kalikini ali tyaonitere atyo Jonas xahehare — nexa.

### Xaokanatyakalati Hariti Hiyexe

(Mateus 5.13-16; 6.22-23; Marcos 9.50)

<sup>33</sup> Hoka Jesus nehitiya: — Maisa atyo xalahare aotakahena hatya xaokanatyakalati hoka mokarene metaharexe akiti, exahe xoana koho katyahe xamani. Xakore hoka mokita atyo xaokanatyakalati exomokakalaose terota, hoka hatya isoahena hoka waiye waiya maheta. <sup>34</sup> Xosetinai atyo xaokanatyakalati akereita wiháre ana. Hoka hiyosenaiya waiyexenai hoka tyotya hiháre atyo xaokanatyakalati kakoare tyaonita. Xakore hoka hiyosenaiya maisa waiyexenai xini hoka tyotya hiháre atyoite makaliroti koni tyaonita. <sup>35</sup> Hatyo hiyeta maika hirihare hoka xaokanatyakalati tyaonitere hihiye maisa makaliroti tyaohitita. <sup>36</sup> Hiyaiya, tyotya hiháreya atyo xaokanatyakalati kakoare tyaonita hoka maisa atyo hakiti hekoti makaliroti koni tyaonare, hoka werokaite tyaona, motyaite exaokanatyakahare ene hatya xaokanatyakalati kakoa — nexa.

### Jesus Irae Fariseunai, Xaotyakiye Kakoarenai Kakoa

(Mateus 23.1-36; Marcos 12.38-40)

<sup>37</sup> Hatyaoseta Jesus halakisa hairaene hoka hatya fariseu nolokene kanakaira maheta ehanako. Hoka Jesus xane isoa hoka tyoka mexa haliya. <sup>38</sup> Hoka fariseu

hakaharetyoa waiya Jesus matihahisoaneharene hanakaira nahitita hoka.

<sup>39</sup> Hatyaoseta Xekohaseti Jesus nexa: — Xiso fariseunai atyo xatihita kobo, balatoahe xoaha henekoa maniya, hoka xityako atyo tyaonita xiyalijiniharene, exahe ximawaiyenawenanene taita. <sup>40</sup> Maotikonexenai! Xala xamani atyo tyomita henekoa maniya hoka maisa enakoako maniya tyomitereta xini? <sup>41</sup> Hatyo hiyeta xisehena maoloxaharenai ana tyaonitereharenai xikobonenai, xibalatoahenekoarenai. Nikare ite hoka tyotyaite iyomeheta xomana — nexa.

<sup>42</sup> — Kirakoane ite xiso fariseunai xikaxomokaka! Hiyaiya, xijita atyo Enore ana holini hortelã, arruda, tyotyta atya hana kanakoairoarenae xoaha hiyeta. Xakore hoka xahalakijita atyo Enore nawaiyexehare exahe xawaiyera. Nikare ene atyo hatyoharenai xisomehena exeharenai ximalalakirahareneta — nexa.

<sup>43</sup> — Kirakoane ite xiso fariseunai xikaxomokaka! Hiyaiya, xawaiyetita kaiserehare atyo kaxaiminisakitereharenai aosenai xahohisakoatyakalati hanakonai, exahe kakatyawaxatyakiterehare xihiyexaiminisati kakoa halitinai wetekonekoanai — nexa.

<sup>44</sup> — Kirakoane ite xisaona! Hiyaiya, motya atyo xawatyakalatinai mawaiyakaharenai akereta atyo xisaonita, xawatyakalatinai halitinai tyahakitere hamawaiyanenahitaha akereta atyo — nexa.

<sup>45</sup> Hatyaoseta hatya Xaotyakiyaho kakoa waiyoretere nexa Jesus hiye: — Xaotyakisatiye, nikare hiraeta hoka hexamaikohalinikijita tehitiya wiso — nexa.

<sup>46</sup> Hoka Jesus nexa: — Kirakoane tehitiyaite xikaxomokaka, xiso Xaotyakiyaho kakoa waiyoreterenai! Hiyaiya, xamokita atyo kolare timenere haiyanai hiniri, hoka komitaene maisa kolatyahene. Xakore hoka xisonai maisa xikahihikase kakoa hekoti xakahinaetya xakolatyare hatyo kolarenai.

<sup>47</sup> — Kirakoane ite xisaona! Hiyaiya, xisomita xawatyakalatinai waiyehare iraiti xakaisaseharenai ana, xahetakomaniyereharenai aisehenerenai anita.

<sup>48</sup> Hoka hatyo hiyeta xahotikijita atyo xiyafihira xahetakomaniyereharenai tyomehenererehare. Hiyaiya, aisaha atyo iraiti xakaisaseharenai, hoka xiso atyo xisomihitita exawatyakalanaiha.

<sup>49</sup> — Hatyo hiyeta Enore hawaiiyore hiyeta nexa: “Naxikatyaite enomanaha iraiti xakaisaseharenai, exahe iraiti kakoarenai. Hoka aisahaite haiyaharenai, kahalakoaharehaite haiyaharenai kakoa”, nexa. <sup>50</sup> Hatyohare hiyetaite kalikiniyerehaite iniyalahare kaxomokakaha tyotya iraiti xakaisaseharenai kaxaisakehenerenai hiyeta, hetati kaomakehenerere waikohakoa xowakiyata, <sup>51</sup> hetati Abel kaxaisakehenereta Zacarias kaxaisakehenerere kijiya. Hatyo atyo kaxaisaka jihatyakalati, Waiyexe Aose xoaha nenekesene. Aliterexe atyo nomita: kalikiniyerehaite iniyalahare kaxomokakaha tyotya hatyoharenai xaisati hiyeta — nexa.

<sup>52</sup> — Kirakoane ite xiso Xaotyakiyaho kakoa waiyoreterenai xikaxomokaka! Hiyaiya, xatyakajita atyo waiyoliti hana jihola jafini. Nikare hoka maisa xisonai

hekoti xisoare, exahe maisa haiyaharenai hekoti xahalakisa hoka isoareha — nexa. (“Xatyakajita atyo waiyoliti hana jihola jafini”, nitere atyo: fariseunae mahokoanitere haiyaharenae semaxemala Iraiti Waiyexe xaokaka nikareta.)

<sup>53</sup> Hatyaoseta Jesus hikoaheta nalita hoka Xaotyakiyaho kakoa waiyoreterenai, fariseunai xoaha iraharehenene haxehareneha kakoa, exahe axahenenene kahare xolani hare. <sup>54</sup> Kasani Jesus irae xolanihare ehaikoare hoka komaniyatyoa aokahitaha hoka.

### Maoseratyati Tahī

(Mateus 10.26-27)

**12** Kahare halitinai hohisakoaha hoka tyahakehetyakakoahitaha. Hatyaoseta Jesus nexa haxaotyakiraharenai hiye hotohare: — Xiriharira fariseunai kaorehityakala kakoa. Emaoseralaha xaokaka niraeta. <sup>2</sup> Tyotyta kaxaihonorisakiterehare atyoite maxaihonorisakeheta, exahe kaxateroakisakiterehare atyoite maxateroakisakeheta. <sup>3</sup> Nikare ite hoka tyotyta xiraetereharenai makaliroti koni ite kasemakeheta ferakoa xowaka. Exahe tyotyta xiraetereharenai ximeteneta hati jihotyarako atyoite kaxakaisakeheta hatirinai henota — nexa.

### Xala Atyoite Wimairehena

(Mateus 10.28-31)

<sup>4</sup> Jesus nehitiya: — Natyo atyo nomita xihiyere: awa atyo ximaira etakehare aijitereharenai xihare taita, hoka hatyo najikinita maisa xoare hare tyomihititerehare. <sup>5</sup> Noxakaite xihiyere xala xamaniya atyo ximairehena: maika ximairehena Enore. Hiyaiya, aisehenerere najikinitaiya atyo iyateliti kakoare hoka xawatyaiya atyo haliti irikati koni. Aliterexe niraehitiya: maika ximaira Enore! nexa.

<sup>6</sup> — Xoana maisa kabetetyakere 5-lise kotehalasenai haiyahokosenai olo hokosenai xaimanexe? Xakore hoka Enore atyo maisa maotyanehe halisenai hekoti enekonitareha. <sup>7</sup> Xisekasenai kakoita atyo tyotyta ixihatyakahare. Awa atyo ximaira. Hiyaiya, xawenane atyo kaharexe kotehalasenai xahexe! nexa.

### Aokowiterehare, Maxaokowiniterehare Cristo Anere

(Mateus 10.32-33; 12.32; 2 Timóteo 1.8)

<sup>8</sup> Jesus nehitiya: — Natyo atyo nomita xihiyere: hatyaiya atyo irae halitinai haotita hoka nomaniye aokowi, hoka Haliti Ityani tehitiyaite irae Enore anerenai anjonai nahalako hoka hatyo haliti atyoite haomanere aoka. <sup>9</sup> Xakore hoka xala xamani atyoite halitinai haotita maisa nomaniye xini aokowi, hoka Haliti Ityani tehitiya atyoite Enore anerenai anjonai nahalako maisa haomanere xini aokene — nexa.

<sup>10</sup> — Xala xamaniya atyo irae iniyalahare Haliti Ityani tahi hoka kamaotyanehyakeheta atyoite. Xakore hoka xala xamaniya atyo irae iniyalahare Isekolaliti Waiyexe tahi hoka maisaiya atyo kamaotyanehyakehitita — nexa.

<sup>11</sup> — Maika kolahenaha xiso semaha maheta xitahi zahohisakoatyakalati hanakonai, exahe xoana kalorex-enai, waiyorexenai xoaha nahalakoa xamani hoka, awa atyo ximawaiyehare, exahe xahekotya xiyekoaxala, xiraene xoaha kakoa. <sup>12</sup> Hiyaiya, hatyo xowaka atyoite Isekohaliti Waiyexe aotyakihena xiso xiraehenerehare kakoa — nexa.

### Kaoloxere Maxahekolahare Tah

<sup>13</sup> Hoka hatya haliti tyaonitere halitinai nenesene nexa Jesus hiye: — Xaotyakisatiye, hiraehena axexe hiye hoka waiye wirakakakoa xiyehaliti wexe halakihenerehare — nexa.

<sup>14</sup> — Xoana, natyoiyatya hoka? Maisa atyo xala hare wakaita natyo niraka maheta xiyehaliti halitinae ana — nexa.

<sup>15</sup> Hoka nehitiya tyotya ihiyeha: — Waiyira xasemehena: maika xirihare tyotya xoalinihare kaxaokakitereharenai kakoa. Hiyaiya, hatya nawenane aliterexe atyo maisa ixiyehare hiyeta xini tyaonita, exahiya kahare hoka — nexa.

<sup>16</sup> Hatyaoseta Jesus nexa xakai exe xaimenekotyati: — Hatya haliti kaoloxere tyaonita hoka emasenekoarenai exaferanai ihatihena kalore. <sup>17</sup> Hatyaoseta aheko-hena: “Maisaiya atyo xoarako natyakajita tyotya exe inihatihenerenai. Xoare ite notyomehena? <sup>18</sup> Kala exakere ite notyoma: nexoakihetaite noximexaninai nitinai hoka notyomeheta exaheharerinai. Hoka hatyoako ite namoka tyotya noximexaninai hahotyali-ta tyotya haiyanai noxiyeharenai kakoita. <sup>19</sup> Hatyaosetaite nomihena nomanita: ‘Haliti ihalaharexe! Tyotya waiyexe haokitereharenai kakoare atyo hiso waha terehokoane niyahare. Kalikini hikawinihena, hikanakairehena, hiserehena, hihalaharehena!’ nomite”, nexa.

<sup>20</sup> — Xakore hoka Enore nexa ihije: “Maotikoniti! Exe xatinite hiwainihena, hoka xalaite tyaohena tyotya exe hamohenereharenai kakoa?” nexa.

<sup>21</sup> Hoka Jesus kamiyanetene: — Hatyo akereta atyo tyaonita etakeharenai ahohisakoaitereharenai haxiyeharenai haomanahitaha, xakore hoka maisa atyo kaxiyeharexeha Enore nahalakoa — nexa.

### Enore Tyekekotyaka Tah

(Mateus 6.25-34)

<sup>22</sup> Hatyaoseta Jesus nexa haxaotyakiraharenai hiye: — Hatyo hiyeta nomita xihije: awa atyo ximawaiyehare nakairati xaokitereharenai xawenane niyahare kakoa, exahe imiti xaokitereharenai xiyisoane niyahare kakoa. <sup>23</sup> Hiyaiya, wenati atyo nakairati xahexe, exahe wihare atyo imitinai xahexe. <sup>24</sup> Xiyaiyehenaore kololokarenai: maisa fityareha, maisa imexareha, maisa awaiyetolisareha hanakaira, maisa nakairati xomokakala kakoareha hekoti xini, xakore hoka Enore atyo tyaisahitene! Hoka xoana maisala kotehalanai xahexe xini xiso? <sup>25</sup> Xala hareya xinekonitare mawaiyehareta hoka hatyo hiyeta tyaohitiya haiya terehokoanai jiyare? <sup>26</sup> Hatyo hiyeta maisaiya xikaokare nikare-

hare kiranexe hoka xoanere hoka ximawaiyehareta haiyanai kakoa?

<sup>27</sup> — Xiyaiyehenaore iyitinai masekoa tyaoniterenai kekoarene: maisa atyo hakareha, maisa haimaha tyomareha haomanaha. Xakore hoka natyo atyo nomita: maisa Salomão hekoti, kaoloxere xakore hoka maisa imiti exe iyitinae nawaiyehare akere ako isoare.

<sup>28</sup> Enore xaokalita atyo atyamokose ime harenae waiyehare tyaonita. Kalini waiyehare tyaonitaha hoka makani wainihenahitaha hoka kakeratyakahitaha irikatyaose. Hatyo hiyeta aliterexe ite kaimatya tehitiya xiso. Hoka xityakekone atyo kirane. <sup>29</sup> Hatyo hiyeta awa atyo ximawaiyehare hoka xataweta mene xinakaira, exahe xoana xerane niyahare xamani.

<sup>30</sup> Hiyaiya, hahotyaliharenai atyo nikare taweta menahitaha tyotya hatyoharenai. Hoka Xexe enokoa tyaonitere atyo waiyoreta tyotya xaokitereharenai kakoa hoka hatyoharenai atyoite isa xomana. <sup>31</sup> Enore koamaniya nawenatyaka maniya hotohare xamohena xawenane, hoka Enore ite isa xomana tyotya hatyoharenai — nexa.

### Xiyehalitinai Enokoare Tah

(Mateus 6.19-21; 1 Pedro 1.4)

<sup>32</sup> Hoka Jesus nehitiya: — Nokaxaikoneharenai, maisa xikaharexe xakore atyo hoka awa atyo ximaira!

Hiyaiya, Xexe atyo hamaxalone kakoa isehena xomana wenakalati waiyexe. <sup>33</sup> Xabetehena tyotya xixiyeharenai hoka xisehena olo maoloxaharenai ana. Xisomehena xiyehaliti nitini maxololoneharenai hoka xaxakaihena xixiyeharenai enokoa nali. Nalite maisa tyotyahitaha. Hiyaiya, nali atyoite maisa kaiwarexenai kaiwitene, exahe maisaiya atyo mololotinai mawenekoaretitene. <sup>34</sup> Hiyaiya, aliyo xamani atyoite xixiyeharenai tyaonita hoka hatyo nali atyoite xiyahekola tyaonita — nexa.

### Wakaharenai Iriharexenai

<sup>35</sup> Hoka Jesus nehitiya: — Memerira xisaohena tyotya kaotyakehenereharenai niyahare: xima ira kinatya xakirolohena jitero kakoa, exahe xaokanatyakalati takoare xoaha kakoa. <sup>36</sup> Xisaohenaira wakaharenai atyahiterenai haxekohaseha kaokeneheta xahita wenakakoati hisehare hekota akereta. Mokohetehena jihore hiye hoka ewakaneharenai majiholahititere haxerore enomana akereta. <sup>37</sup> Waiye kaiserehare atyo wakaharenai kaokeheteheha exekohaseha hoka kaosetaha exahe memere tyaoniterenai! Hoka aliterexe atyo nomita: exekohaseha ite tyoma tyaisahene maheta, wakatyahenite tyokaha maheta mexa haliya, hoka hatyotaita moka enomanaha. <sup>38</sup> Waiye kaiserehareya atyo exekohaseha kaokeheteheha hoka memere tyaonahitaha, exahe kaokeheteheha wahaxati, xoana ferakoa maniyehena xamani hoka!

<sup>39</sup> — Xotyaxematyaira exeharenai: hati waikatehareya atyo waiyoreta kaiwarexe kaokene kakoa hoka atyahiteniya hoka maisaiya ehanakota kaiwaharetitene. <sup>40</sup> Hatyo hiyeta xiso tehitiya ximemere

xisaohena. Hiyaiya, Haliti Ityani ite kaokeheta xomana ximaxatyahaneterene xowaka — nexa.

**Wakahare Tyakekohatiye, Matyakekonehare Xoaha**  
(Mateus 24.45-51)

<sup>41</sup> Hatyaoseta Pedro axene: — Xekohaseti, hatyo xaimenekore womanere taita, xoana tyotyahanai anere kore? nexa.

<sup>42</sup> Hoka Jesus nexa: — Xoanere haretia wakahare tyakekohatiye exahe iriharexe? Hatyohare atyo etakehare exekohase hawenekoare halakisene hoka kaxaikoterehare ehana exahe ijiterehare nakairati wakaharenai ana enaose kamaehena hoka. <sup>43</sup> Waiye kaiserehare atyoite hatyohare wakahare, nikare tyomita hatyoharenai hoka exekohase kaokehetehehena hoka! <sup>44</sup> Aliterexe nomita xihyie: exekohase ite hatyo wakahare ana tyotyaxihyeharenai halakisa kaxaikone maheta.

<sup>45</sup> — Hoka xahekohenaore: xoana halanite kaxomokakehena hatyo wakahareya exakere ahekotyahoka: “Noxekohase atyo howitihareta hatyoaneneheta kakoa”, nexaiya, hoka hatyaosetaiya mokonasehenaiya haiyaharenai wakaharenai, wakahalonai. Hoka kanakairehenaiya, terehenaiya, hekehenaiya.

<sup>46</sup> Hatyaosetaiya exekohase tyoheta haferakene ewakanehare maxatya haneterene, mawaiyoreterehare ekaokeneheta ferakene kakoa xowaka. Hoka exekohase ite aikotene hataose xakini, exahe iniyalahare ite mokene masemaxemalaharenai xomokakaho akere — nexa.

<sup>47</sup> — Hoka wakahare waiyoreterehare haxekohase aokiterehare hoka maisa memere tyaonare, exahe maisa tyomiterehare aokiterehare atyoite kamokonasetyaka kalore. <sup>48</sup> Hoka wakahare mawaiyorehare haxekohase aokiterehare kakoa hoka tyomiterehare xalinihare hoka akomanityakijoiterehare atyoite kamokonasetyaka ininaita. Nikare ite hoka xala xamani kalore resebitita hoka kalore ite kaxaxaka xala nonitata xamani kalore karesebetita hoka — nexa.

**Jesus Hiyetaite Kaxaoretyakehena**  
(Mateus 10.34-36)

<sup>49</sup> Hoka Jesus nehitiya: — Notyoya atyo naotakatya irikati waikohekoa maheta hoka kasani koxaka ekeratyakahare nowaiyene naokowita! <sup>50</sup> Nokabatixatyakihenaite hoka kaxiyani, kalore namaikohareta hatyoharenai kaotyakehenerehare kijiya! <sup>51</sup> Xoana motya xiyahakola hiye hoka notyoya namehexaikohalikiheta halitinai maheta xaokita? Hoka natyo atyo nomita: hoka maisa atyo notyoya namehexaikohalikiheta maheta xini, xakore hoka nexaoretya maheta atyo. <sup>52</sup> Hiyaiya, exaoseta atyoite hahotyalyta 5-harenai tyaoniterenai exaoretyoahena: hanamaite kahalakoaharehena hinamerore kakoa, exahe hinamerore ite kahalakoaharehena hanama kakoa. <sup>53</sup> Enexenahaite kahalakoaharehena haisaninaiha kakoa, exahe ityaninaihaite hoka kahalakoaharehena hanexenaiha kakoa. Inity-

onahaite kahalakoahalohenaha haisaninaiha kakoa, ityaninaihaite hoka kahalakoahalohenaha hanityonaiha kakoa. Enakeronaihaite kahalakoahalohenaha hatamisonenaiha kakoa, etamisonenaihaite hoka kahalakoahalohenaha hakeronaiha kakoa — nexa.

**Oneterehare, Watiterehare Xoaha Tah**  
(Mateus 16.1-4)

<sup>54</sup> Hoka Jesus nexa tehitiya halitinai hiye: — Xiyaiyehena atyo kaiminiti makiti maniyata hoka xita rotita atyo: “Onehenaite wihyie”, xita. Hoka aliterexe oneta. <sup>55</sup> Exahe xikehexehena atyo hoholati hoholala watere maniyata hoka xita: “Watehenaite”, xita. Hoka watita. <sup>56</sup> Maotikonitinae! Xawaiyore atyo xawaiyehalalokaita waikohekoa, enokoa xoaha tyaonitereharenai. Hoka xoanere hoka maisa xawaiyore xawaiyehalalokatyare kalikini kaotyakitereharenai? nexa.

**Ahalakoahaliti Kakoa Niraetyaka Tah**  
(Mateus 5.25-26)

<sup>57</sup> Hoka Jesus halakihena hairaene hoka nexa: — Xoana hoka maisa xisota xahekotyare, xoarehare maniya xamani waiye nawenatyaka hoka? <sup>58</sup> Maika hatya iraharehena hiso hoka kolahena hiso kalorexe ana hoka maika hatihityoa ihiye hoka hamiyatya hatyoharenai tahi ahotita. Nikare ite hoka maisa kolaita hiso kalorexe nahalakoa, hoka kalorexe ijita hiso sorare ana, hoka sorare berexoako mokita hiso. <sup>59</sup> Natyo atyo nomita: maisaiya hahikoahitita hatyoakota, maisa habakaita tyotyaxokiterehare hoka — nexa.

**Iniyalahare Xahalakihena, Xoana Xiwainihena Xamani**

**13** Hatyaoseta haiyaharenai kaokaha hoka xakihenaha Jesus hiye, Pilatos wakane xema Galilía koa yerenai fetatyahitere Enore ana heko aisehenahere tahi.

<sup>2</sup> Hatyaoseta Jesus nehena: — Xoanala hoka hatyo Galilía koa yerenai nikare kaxaisakaha, xoana xiyahakola hiye hoka motya masakare iniyalahare tyomahitaha, haiyaharenai Galilía koa yerenai xahexe xaokita? <sup>3</sup> Maisa nikarexe xini. Aliterexe nomita xihyie: maisaiya xahalakijita iniyalahare xománenai hoka nikare ite xikaxaisaka. <sup>4</sup> Hoka etake Siloé nali, 18-harenai heno hati wahaharexe hatakoa hoka aisehenerehena? Xoana xiyahakola hiye hoka motya masakare iniyalahare tyomahitaha haiyaharenai Jerusalém nali tyaoniterenai nonitata xaokita? <sup>5</sup> Maisa nikarexe xini. Alitere nomita xihyie: maisaiya xahalakijita iniyalahare xománenai hoka nikare ite xikaxaisaka — nexa.

**Halohalo Kate Malihare**

<sup>6</sup> Hatyaoseta Jesus exakere aimenekoty enomana: — Hatya haliti masenekoa uva katenai koni hakate halohalo tyaonita. Hoka xane iri xahita waiyakatetya hoka maisa kaliye. <sup>7</sup> Hatyo hekota nexa masene kaxaikotyasehare hiye: “Hasemehena, hanama wanonehena notyoya iri nimexa naokowita hoka maisa terota

kaliye. Maika hityoka exe halohalo kate! Xoare maheta hahalakijitene masenekoa, maisa xakore kaliye hoka?" nexa. <sup>8</sup> Hoka ewakanehare nexa: "Xekohaseti, kala kotare hahalakihitiyene exe wanone niyahare. Naijohokotene ite hoka imexati kakoa namokahokotene. <sup>9</sup> Ite etare wanone kali hoka ehokore. Ite maisa kalita hoka ixityokaka haoka", nexa.

### Sábado Xowaka Jesus Aototahaloheta Ohiro

<sup>10</sup> Sábado xowaka Jesus aotyakijita ene xahohisakoatyakalati hanako. <sup>11</sup> Hoka nali kaoka hatya ohiro koxaka 18-wanonehena hokakitolo. Isekohaliti iniyalahare nikare axomokanikijitene. Katyokohexetonita, maisa aliyakere aototahalotyaoare.

<sup>12</sup> Hatyaoseta Jesus waiyene hoka kawisene hoka nexa ihiye: — Hasemehena, koxaka atyo hikinatolohetehena — nexa ihiye.

<sup>13</sup> Hatyaoseta hakahenai ekaokakisa ihiye hoka totahalohetehena rotita. Hatyaoseta ihalahalo Enore kakoa.

<sup>14</sup> Xakore hoka hatyo xahohisakoatyakalati hana kaxaikotyasehare ehare, sábado xowaka aiyatolokihetene hoka. Hatyo hiyeta nexa halitinai hiye: — 6-ki ferakene atyo hateniti niyahare. Maika hatyonai ferakenenai xisoo hoka xikaxaiyatelikisakeheta hoka awa atyo sábado xowaka nikare xisaona — nexa.

<sup>15</sup> Hoka Jesus nexa: — Maoseratyaliyenai! Xoana maisa sábado xowaka xamaxolatyare xibowiya, xikawalone hoka xiyaneke ekakoaha one ana teraha maheta? <sup>16</sup> Hoka kalikini atyo owene tyaonita Abraão jikolahalo, Ahalakoahaliti olahenolo 18-wanone. Hoka xonanereya hoka maisa sábado xowaka kaxaiyatolokisakihitita ehokakene nonitata? nexa.

<sup>17</sup> Hatyaoseta Jesus niraene sema enahalakoaharenai hoka haihareha. Xakore hoka halitinai atyo ihalahare Jesus nómanenai waiyexe kakoa.

### Mostardase Hiye Aimenekotya

(Mateus 13.31-32; Marcos 4.30-32)

<sup>18</sup> Jesus nexa: — Xoare hare kakoala hakakoa Enore koamaniya nawenatyaka? Xoarehare kakoaite naimenekohena? <sup>19</sup> Motya atyo mostardase hatya haliti iya hoka fititere hamasenekoa akereta. Hoka hananehaliti kekoare hoka kalokate tyaona hoka kotehalanai kaihititere ekanohinai koni akereta atyoala — nexa.

### Xetamomotyakalati Hiye Aimenekotya

(Mateus 13.33)

<sup>20</sup> Jesus nehitiya: — Xoare kakoaite naimenekohena Enore koamaniya nawenatyaka? <sup>21</sup> Motya atyo hatya ohiro xetamomotyakalati iya hoka kaorehititere trigoho hoka hatyaoseta trigoho tamomotere akereta atyo — nexa.

### Xisoakalati Kiranahore

(Mateus 7.13-14, 21-23)

<sup>22</sup> Hatyaoseta Jesus jiyehena wenakalati, wenakalatikoasenai hoka aotyakijita, exahe xaneta Jerusalém xeta.

<sup>23</sup> Hatyaoseta hatya axene: — Xekohaseti, xoana haiyanai taitaite kaiyakehetehena? nexa.

<sup>24</sup> Hoka Jesus nexa ihiyeha: — Maika xaiyateretyoa xisoo maheta xisoakalati kiranahore. Aliterexe nomita xihiyeha: kahare ite isoo aokowiha xakore hoka maisa atyoite isoahitaha — nexa. <sup>25</sup> — Hati waikatehare ite xane jihotyaha hahana jihola. Hatyaosetaite menanakita xisaona hoka xamokotyaha ite jihore hiye hoka xehena: "Xekohaseti, hamajiholatya womana hoka wisoo". Xexaite ihiye xakore hoka nexaite: "Maisa atyo nowaiyanihare xini xiso, kala alyakotare xamani xiso", nexaite.

<sup>26</sup> Hoka xehenaite: "Wikanakaira, wisera hikakoa, Xekohaseti. Haotyakisa tehitiya wiso wawenakala nali", xexaite. <sup>27</sup> Xakore hoka nehitiyaite: "Maisa nowaiyanihare xini xiso. Kala alyakotare xamani xiso. Xiyanehetehena noniti, xiso iniyalahare taita tyomiterenai", nexaite.

<sup>28</sup> Hatyaosetaite xiyaiyehena Abraão, Isaque, Jacó, tyotyaha iraiti xakaisaseharenai xoahanai, Enore nawenakala nali hoka xiso atyoite menanakita hoka hatyaosetaite xitiyahena, exahe xaikolinaite karai, karai, nexa xamohena. <sup>29</sup> Kahare halitinai ite tyoaha kamae hikoane maniyata, kamae xisoane maniyata, one hohola maniyata, tihalo hohola maniyata hoka tyokahaite mexa haliya Enore nawenakala nali. <sup>30</sup> Hoka haiyaharenai kalikini wakahare tyaoniterenaite kalorexe tyaoheta. Hoka haiyaharenai kalorexe tyaoniterenaite wakahare tyaoheta — nexa.

### Jesus Xawaiyera Jerusalém Tahí

(Mateus 23.37-39)

<sup>31</sup> Hatyaoseta haiyaharenai fariseunai xaneha Jesus haliya hoka nexaha ihiye: — Maika hiyanehetehena alitah. Hiyaiya, Herodes aisa aokowita hiso — nexaha.

<sup>32</sup> Hoka Jesus nexa ihiyeha: — Xiyaneheta hoka exakere niraini xiyakai hatyo wakare hiye: "Naxanikihitita tihanare, exahe naiyatelikihitita halitinai kalikini, makani xoaha hoka ehanamakini ferakenite namematya nohateni", nexa. <sup>33</sup> Xakore hoka noxanihitia atyo kalikini, makani, kamaetali. Hiyaiya, iraiti xakaisasehare atyo maisa aliyakere kaxaisakita Jerusalém nonitata haware — nexa.

<sup>34</sup> — Jerusalém, Jerusalém! Hiso atyo haijita iraiti xakaisaseharenai, exahe sehali kakoa hamokotita Enore xaxikalalaharenai! Kahaliki xakore naxakoloharetya naokowita hihotyaliyaharenai takaira haisani mokosenai hatane katyahe mokitere akereta, xakore hoka maisa atyo haoka. <sup>35</sup> Hoka kalikini atyoite hihana kahalakisakehena kaiserehare. Aliterexe nomita: Maisa atyoite hiyaiyehitita natyo exakere hiraehenere kijiya: "Xekohaseti Enore, waiye kaiserehare atyo hatyo hexare kakoa tyoiterehare", hehenere kijiya — nexa Jesus ihiyeha.

### Jesus Aiyatelikiheta Hatya Hokakitere

**14** Sábado xowaka Jesus xane isoa hatya xeko-haseti fariseu hanako kanakaira maheta. Hoka wahakotyahitaha Jesus ana. <sup>2</sup> Hoka hatya haliti kasa-henai, kanonai xoaha fakitere tyoa ehaliya.

<sup>3</sup> Hatyaoseta Jesus axehena Xaotyakiyaho kakoa waiyoreterenai, fariseunai xoaha: — Xoana wiyautyak-isakaho hiyetaiya waiyehena wawairatya sábadó xowaka, maiha koré? nexa.

<sup>4</sup> Hoka maisa xoare nexahitaha. Hatyaoseta Jesus otoka hatyo haliti hoka aiyatelikihetene. Hatyo najikinita axikahetene.

<sup>5</sup> Hatyaoseta nehitiya ihiyeha: — Hoka xisonaiya, hamokose xikaisaniye exahe hali xikabowiyere hoka exoa tolokoako hoka maisaiya xiyehititene rotita, exahe sábadó xowaka hoka? nexa Jesus.

<sup>6</sup> Hoka maisa waiyore ekoaxatyahitaha enomana.

### Himaxhenerahare Exahe Waiye Hamoka Haliti Hihanako

<sup>7</sup> Hatyaoseta Jesus wahakoita kakaixakatyakehenerenai kaokene hoka waiyexe mexa haliya enokaneha. Hoka exakere aotyakisa: <sup>8</sup> — Hatya kaixakahena hiso wenakakoati ana hoka awa atyo okahakalatikoa waiyexe koa hisoka. Waiya aliya hoka hatya hiyaehare kakaexakatyaka hoka <sup>9</sup> hatyaosetaiya kaexakahenere hiso, hatya xoahaiya, nexa hihiye: “Hainakoa-heta hoka exe hatyaose tyoka”, nexaiya. Hoka hatyaosetaiya hihaihare, exahe ewaxirahare okahakalatikoaiya hiyane hisokeheta. <sup>10</sup> Hoka maika hikakaixakatyakehena hoka ewaxirahare okahakalatikoa hiyane hisoka. Nikare ite hoka kaexakahenere hiso ite nexa: “Nohinaehare, hisohena hoka exe okahakalati waiyexe koa hisoka”, nexaiya. Nikare ite kalore hikaxaiminisakita tyotyaka kakaexakatyakehenerenai nahalakoa. <sup>11</sup> Hiyaiya, xala xamani atyo ite kalorexe aokowita hoka wakahare atyoite kaxomokakeheta. Hoka xala xamani atyo ite maisa haiyanae xaehare aokowita hoka kalorexe atyoite kaxomokakeheta — nexa Jesus.

<sup>12</sup> Hatyohekota Jesus nexa hakaixakatyasehare hiye: — Maika nakairati kalore hisomehena halitinae ana totahikoa niyahare, exahe makehena niyahare hoka awa hakaixakatya hihinaeharenai, hiximarenenai, hiyaiyaneharenai, hihinaeharenai kaoloxerenai taita hoka. Hiyaiya, hatyoisahaiya kaixakatyaha hiso hoka hatyo kakoaiya bakahenahitaha hiso waiye hamohenaherene. <sup>13</sup> Xakore hoka maika hisehaliti hisomehena hoka hakaexakatya maoloxaharenai, maetonaneharenai, mawaiye netonaneharenai, maxoseharenai harenai, <sup>14</sup> hoka waiye atyoite hikaxomokaka. Hiyaiya, maisaiya atyo aliyakere bakahenahitaha hiso, xakore hoka Enore atyoite bakatya hiso, waiyexe nomaseharenai ekasekiketehenere xowaka — nexa.

### Kalorexe Hisehaliti Tah

(Mateus 22.1-14)

<sup>15</sup> Hatya tyokitere ekakoaha mexa haliya sema ini-raene hoka nexa Jesus hiye: — Waiye kaiserehare atyoite xane mexa haliya tyokehenerenai Enore nawenakala nali — nexa.

<sup>16</sup> Hatyaoseta Jesus nehena: — Hatya haliti kaexakatya kahare haliti, kaolonehena hoka. <sup>17</sup> Memakatya hoka axikatya hawakanehare kakaexakatyakehenerenai hiye: “Xisohena, koxaka tyotyaka memaka”, nexa maheta.

<sup>18</sup> — Xakore hoka hatya xakini awaiyekehalakahena. Hetatiye nexa wakahare hiye: “Niya hakoa waikohe hoka noxanite nowaiyehenene hoka maisaiya aliyakere notyoita. Kasani himaotyanehetene naoka”, nexa.

<sup>19</sup> Hatya atyo nexa: “Niya 10-ri bowi hoka noxanite nowaiyehenene, xoana waiyore xamani ala hakahitaha. Hatyo hiyeta maisaiya aliyakere notyoita. Kasani himaotyanehetene naoka”, nexa. <sup>20</sup> Exahe hatya hoka nexa: “Kalikini nokaiyanityo. Hatyo hiyeta maisaiya aliyakere notyoita”, nexa.

<sup>21</sup> — Hatyaoseta haikoaheta hoka xakaini haxekohase hiye. Hatyaoseta exekohase ehare hoka nexa: “Hihalahare hiyanehena ahotyahonai exahe ahotyahoseranai wenakalati nali hoka hanoloka maoloxaharenai, maetonaneharenai, maxoseharenai, mawaiye netonaneharenai xoaha”, nexa.

<sup>22</sup> — Hatyaoseta waehena hoka ewakanehare nexa: “Xekohaseti, koxaka haokitere akereta notyoma, xakore hoka hekotata maisa hihana kaisexe”, nexa.

<sup>23</sup> — Hoka exekohase nexa: “Nikare atyo hoka hiyanehena ahotyaho kaloahore, ahotisenai aho hoka hahalakoahenerenai hiye hira, tyoaha maheta ali hoka nohani ekaisetyaha. <sup>24</sup> Aliterexe nomita hihiye: hetati kakaixakatyakehenerenai atyoite maisa kanakairahitaha nakairati notyomehenerene”, nexa.

### Exakereya Hisaona Hoka Jesus Xaotyakirahare Hisaona

(Mateus 10.37-38; Lucas 9.23-24)

<sup>25</sup> Hatyaoseta kahare halitinai xanetaha Jesus xema. Terehokoa hoka nehena ihiyeha: <sup>26</sup> — Xala xamaniya atyo tyaona nokoamaniye aokowita hoka maisaiya atyo noxaotyakirihare tyaonita, maisa awaiyetyare natyo hanexe, hanityo, haiyanityo, haisaninai, hiximarenenai, haximalonenai, exahe hatyota awaiyetyoawitere xahexe hoka. <sup>27</sup> Xala xamaniya atyo maisa kolaita haberekotyaka niyahare atyalihose xaimaholatyaka, exahe maisa tyaonita nokoamaniye hoka hatyoiya atyo maisa noxaotyakirihare tyaonita.

<sup>28</sup> — Hiyaiya, hatya xinekonitare ahekoita háomane hati wahaharexe tahi hoka tyoka hotohare exahe aimenekotene hoka exaimane waiya, xoana ehokorexe xamani olo. <sup>29</sup> Maisaiya nikare tyomita hoka tyomehenene rotitaiya hoka maisaiya aliyakere memaititene, hoka tyotyahaiya waiyaha emamemarene hati hoka koexahaxahenahaiya ekakoa hoka nexahaiya: <sup>30</sup> “Exe haliti tyoma hati hoka maisa memaititene!” nexahaiya.



<sup>31</sup> — Nikareya hatya xekohaseti, 10.000 sorarenai kakoa xane aisakakoahena hatya hahalakoahare kakoa hoka tyoka hotohare ite hoka ahokohena, xoana kinatere xamaniya aisakakoa hahalakoahare kakoa. <sup>32</sup> Maisaiya kinaterexe hoka axikatyaia hairaene kakoa hatya xekohaseti ana sekotata hoka axene maheta, xoare xamani aokita hoka halakisaha haxaisakakoaneha maheta.

<sup>33</sup> Hatyaoseta Jesus halakihena hairaene hoka nexa: — Nikare ite maisaiya hatya hekoti xinekonitare noxaotyakirihare tyaonita, maisa halakijita tyotya haxiyeharenai harenai hoka — nexa.

**Salo Makexenehare**  
(Mateus 5.13; Marcos 9.50)

<sup>34</sup> — Xasemehena, salo atyo waiye, xakore hoka makexeniya hoka maisa atyo saloheta xini. <sup>35</sup> Maisa atyo waikohe niyahare, exahe exawaiyetolisaka niyahare ana hekoti waiyihitita. Hoka kaxawatyakita atyo kolaliti koni.

— Xala xamani atyo katanakoakore semakatya maheta hoka maika semehena niraini — nexa Jesus.

**Kalanero Metene Tah**  
(Mateus 18.12-14)

**15** Haxowaka kahare kalorexe noloxa resebetyasharenai, exahe haiyaharenai iniyalahare nomaseharenai xoaha kaokaha Jesus ana, semaha maheta iniraine.

<sup>2</sup> Hoka fariseunai, xaotyakiyaho kakoa waiyoretene nai xoaha irahenaha etahi hoka nexaha: — Exe haliti atyo iniyalahare nomaseharenai koni tyaonita exahe kanakairita ekakoaha.

<sup>3</sup> Hatyaoseta Jesus exakere aemenekotya: <sup>4</sup> — Hatya xinekonitareya 100-ri kakalaneroxere hoka haliya meta hoka xane ite tawehetehene, maiha kore ite? Hatyo hiyeta halakisaite 99-ri maseta hoka xane ite tawehetene kaokeheterene kijiya. <sup>5</sup> Kaokehetereniya hoka ihalaharetaia ekakoa hoka hatyoakolyahoiya kolahtene hoka haikoaheta ekakoa. <sup>6</sup> Kaokehetaia ekakoa hahana nali hoka kawisaiya hahinaeharenai, hawaiyaneharenai hoka nexaiya: “Xihalalaharehena nokakoi. Nokaokiheta nokalaneroxi mititere”, nexaiya.

<sup>7</sup> — Hatyo hiyeta nomita: hatyo akeretaite kalore ite kaihalaharetyaka enokoa nali, hatya haliti iniyalahare nomasehare halakihenerene iniyalahare háomane kakoa, 99-harenai iniyalahare maomaneharenai, koxaka waiyexe wenati xema tyahetehenerenai xahexe — nexa.

**Olo Hokose Metene Tah**

<sup>8</sup> Hatyaoseta Jesus irahitiya: — Hatya ohiroiya kaoloxolo 10-hokose hoka hahokoseya meta enonita hoka taweheteneya, maisaiya kore? Kaokeheta mahetaia olo hokose hoka aotakatyaia xaokanatyakalati, hisakotyaiya hati ako hoka waiyeya taweheta exahita kaokeheterene kijiya. <sup>9</sup> Kaoke-

hetereniya hoka kaixakatyaia hahinaehalonai, hawaiyanehalonai hoka nexaiya: “Xihalalaharehena nokakoi. Nokaokiheta atyo noloxi mititere”, nexaiya.

<sup>10</sup> — Hatyo hiyeta nomita: nikareta tehitiaite Enore wakaneharenae anjonai ihalahareha, hatya iniyalahare nomasehare halakihena iniyalahare háomane hoka — nexa.

**Hatya Haliti Iyani Miyahenerene Haxiyehare Tah**

<sup>11</sup> Hoka Jesus nehitiya:

— Hatya haliti hinamahare kaisaniye. <sup>12</sup> Hoka haxowaka ityani xoimere nexa hanexe hiye: “Abá, xama kalikini hisehena nomani holini hixiyehare, noxiyehare maheta”, nexa. Hoka enexeha iraka haxiyeharenai haisaninai ana.

<sup>13</sup> — Hatyaoseta mawaheneta hoka ityani xoimere xakaiharetyoa hoka xane hakoa wenakalati xeta. Hatyo nali wenati iniyalahare xema taita tyaona, exahe miyatya tyotya haxiyeharenai kaxekakehenerene enomana.

<sup>14</sup> — Miyahenerene tyotya haxiyehare najikinita nakiti tyaona hatyo tyaonitere nali hoka xoimalaliti nakehena. <sup>15</sup> Hatyaoseta tawa hatya nali tyaoniterenai konitare hoka hakahinaetyaka aoka. Hoka hatya axikatya xoimalaliti hawenakala xeta, ebolokoxanai kaxaiko maheta. <sup>16</sup> Hoka hatyo nali nakita hoka kasani bolokonai kanakairiterehare kanakaira aokowita, xakore maisa hatyoharenai hekoti isaha enomana aokowiyeha.

<sup>17</sup> — Hatyaoseta kehexaharetyoaheta hoka ahokohena: “Xoanamahare baba wakaneharenai nakaira ala kalikini kamawaneta hoka natyo atyo ali nowainihena nonaki! <sup>18</sup> Nahaikoahetaite baba hana xeta hoka nomite ihiye: ‘Abá, iniyalahare notyoma Enore ana, exahe hikakoa <sup>19</sup> hoka maisaiya atyo hityani haohitita natyo. Maika hiwakaneharenai akereta hamoka natyo’, nomite”, nexa. <sup>20</sup> Hatyaoseta kikisoaheta hatyo nalita hoka haikoaheta hanexe hana xeta.

— Xanehititata hoka enexe sekota waiyehetene. Hoka airakoaneharetia haisani hoka tema xane ahakaoatene, xakoloharetene, sohitanakolisene xoaha. <sup>21</sup> Hoka xoimalaliti nehena: “Abá, iniyalahare notyoma Enore ana, exahe hikakoa hoka maisaiya atyo xoare maheta hityani haohitita natyo”, nexa.

<sup>22</sup> — Xakore hoka enexe wakatya hawakaneharenai: “Xihalalahare! Xisohena imiti waiyexe kakoa hoka xaisoakihetene. Kahititini xamoheta ihiye, kijititini harenai. <sup>23</sup> Exahe xiyane xaisehena bowi mokose kolotere hoka wimaxalohare. <sup>24</sup> Xiyaiya, exe nityani atyo waini ene hoka kalikini atyo kaseheta. Meta xakore hoka kakaokakeheta”, nexa enexe. Hatyaoseta aokitere akereta tyomaha hoka maxalohareha.

<sup>25</sup> — Hatyo xowaka ityani inityohaliti xaneta mase. Hoka kaokeheterene, owitehetherene mohitita hati hoka sema xerati, xoholikoati nemahare. <sup>26</sup> Hoka kawisa hatya wakahare hoka axene: “Xoana hoka nikare tyaonaha?” nexa. <sup>27</sup> Hoka wakahare nexa ihiye: “Hiximarene kinaseti, exahe kinatereta kaokeheta. Hatyo

hiyeta hexe bowi mokose kolotere xaisaka aoka”, nexa ihiye.

<sup>28</sup> — Hatyaoseta ityani inityohaliti ehare, maisa isoa-heta aokowita hatyako. Hoka enexe hiko menanaka hoka tihityoa ihiye isoaheta maheta. <sup>29</sup> Xakore hoka nexa hanexe hiye: “Hiyaiya, waha terehokoanehena wakahare akereta nahakita homana, exahe maisa namasemakiatyare hiraine. Xakore hoka maisa hali hekoti kabala hisare nomani hoka nomaxaloharexe nohinaeharenai kakoa. <sup>30</sup> Hoka exe hityani hixiyeharenai tyoty miyahenere enatyalolonai hiye kalikini haikoaheta hoka bowi mokose kolotere xaisaka hao-ka”, nexa.

<sup>31</sup> — Hatyaoseta enexe nexa ihiye: “Haré, nohaliyi atyo hisaota minita hoka tyoty noxiyeharenai atyo homanere tehitiya. <sup>32</sup> Hoka exe hisehaliti terota notyoma naokowi, wihalaharene wahotikisa maheta. Hiyaiya, exe hiximarene atyo waini ene hoka kaseheta, meta hoka kakaokakeheta”, nexa haisani hiye.

### Kaxaikoakatyiye Mahakaiserexe

**16** Jesus nexa haxaotyakiraharenai hiye: — Hatya haliti kaoloxere tyaonita hoka hatya kaxaikotene enomana. Hoka haiyanai xakaiha ihiye, ekaxaiko-haretyasehare ametakijita enoloxa aokaha. <sup>2</sup> Hatyo hiyeta kawisene hoka nexa ihiye: “Xoana, aliterexe exakerexe hisaonita aokaha nohiye? Hahotikihena nomani hikaxaiko akahenere xowakiyere. Hiyaiya, maisaiya atyo nokaxaikoharetyase hisaohitita”, nexa.

<sup>3</sup> — Hatyaoseta ewakanehare ahokoty: “Noxekohase axikahetehena natyo. Hoka xoare ite notyomehena? Maisaiya atyo nokinatere nasekehita waikohe, exahe nohaiharetata atyo olo noxaxani kakoa”. <sup>4</sup> Hatyohokota nexa, “Exakerite notyaona. Nikarite notyaona hoka nokaxaxikatyakehetehenere najikinita nokahinaeharexe notyaona hoka waiye mokaha natyo hahanakonaeha nali”, nexa.

<sup>5</sup> — Hatyaoseta kawisa tyoty kakotaneterenai exekohase hoka hetatye hare hiye nexa: “Xoanere hikakotaneta noxekohase?” nexa. <sup>6</sup> “Nokakotanitene 100-litrone kolotenitiya”, nexa ihiye. “Owene hikotane. Hisokehena exaose hoka haxairatya 50-litrone”, nexa hatyo kaxaikoakatyiye.

<sup>7</sup> — Háhare hiye nehitiya: “Hiso atyo, xoanere hikakotaneta?” nexa. “Nokakotanita 1.000 kilone trigohe”, nexa. “Hisokehena hoka haxairatya exaose 800-kilone”, nexa ihiye kaxaikoakatyiye.

<sup>8</sup> — Hatyaoseta exekohase tyakeko hatyo kaxaikoakatyiye mahakaiserexe iniriharene hiyeta.

Hoka Jesus nehitiya: — Halitinai exe waikohekoa tyaoniterenai atyo masakare irihareha xalinihare háomaneha kakoa, halitinai Enore xaokanala xema tyaoniterenai xahe nirihareneha atyo. <sup>9</sup> Hatyo hiyeta nomita xihiyeye: maika xakahinaeharetyoahena exe waikohekoa tyaoniterenai kaoloxerenai kakoa hoka ximaoloxaharehena hoka kahinaetyaha xiso, wenati matyotenehare nali xiyanehenere kijiya.

<sup>10</sup> — Xala xamaniya atyo enaosexeta tyomita xalinihare inirere hoka enaosexeta tehitiya atyoite tyoma xalinihare kalorexe, exahe xala xamaniya atyo maisa waiyexe xalinihare inirere háomane hiye hoka maisa tehitiya atyoite waiyexe xalinihare kalorexe háomane hiye. <sup>11</sup> Xiyaiya, xikawitaiya exe halitinai waikohekoa tyaoniterenai noloxa hoka xalaiya isehena xomana xiyehaliti aliterexe? <sup>12</sup> Exahe xikawitaiya haiyaharenai xiyehare hoka xalaiya isehena xomana xixiyehare kaiserehare? nexa.

<sup>13</sup> — Maisaiya atyo xala hare hinamahare xekohaseti wakanehare tyaonita haxowakita. Nikareya hoka hatya awaiyetita, hatya maisa awaiyetiyare xoahaiya. Tyakekota hatya, hatya maisa tyakekore xoahaiya. Nikare tehitiyaiya maisa aliyakere Enore maniya hahekoita, olo xiyehaliti harenai maniya hahekoita xoaha haxowakita.

### Jesus Niraene Haiyasenai

(Mateus 5.31-32; 11.12-13; Marcos 10.11-12)

<sup>14</sup> Hoka fariseunai sema hatyoharenai hoka Jesus koexahalisaha, olo xiyehaliti harenai awaiyetyahitaha hoka.

<sup>15</sup> Hoka Jesus nexa: — Xiso atyo motya waiyexeharexenai ene xisaonita halitinai nahalakoa hoka Enore atyo waiyita xiyahokolanai. Hiyaiya, halitinai ana masakare waiyeterehare atyo Enore ana maisa waiyexe — nexa.

<sup>16</sup> — Moisés Xaotyakiraho, iraiti xakaisaseharenai xaotyakira xoaha xema halitinai tyaona João Batista kaotyakehenere kijiya. Hatyo najikinita Iraiti Waiyexe Xekohaseti enokoatare tyoanene Enore nalitare tahi kaxakaisaka hoka halitinai aiyateretyoahitaha exema maniya tyaonaha maheta.

<sup>17</sup> — Maisaiya atyo hase xairatise hatyatatare iraiti Xaotyakiyaho hiyetare mitita. Enokoa, waikohekoa harenai maiyareheta hotohariya.

<sup>18</sup> — Hatya halitiya haiyanityo halakiheta hoka hatya ohiro kakoa tyoaheta hoka iniyalahare atyo tyoma. Exahe xala xamaniya ohiro ehalakisakahalo kakoa tyoaheta hoka iniyalahare atyo tyomita tehitiya — nexa Jesus.

### Kaoloxere, Lázaro Xoaha Tah

<sup>19</sup> Jesus nehitiya ihiyeha: — Hatya haliti kaoloxere tyaonita hoka imiti karore ako taita ijoita, exahe fera hisehaliti tyomita. <sup>20</sup> Nali tehitiya hatya haliti maoloxahare tyaonita, exahe kahonotirahiye, Lázaro nexarexe. Kahalakisakita minitaha kaoloxere hana haliya. <sup>21</sup> Hoka Lázaro atyahita kanakaira maheta nakairati holoxo exoiterehare kaoloxere mexanekoata. Kajolonai kakoita tyoa takaxosetita ehonotiraosenai.

<sup>22</sup> — Hatyaoseta hatyo maoloxahare waini hoka anjonai kolatene Abraão tyaonitere nali, wenati waiyexe nali. Hatyaoseta hatyo kaoloxere tehitiya waini hoka kaxafityaka. <sup>23</sup> Hoka kirakoane tyaonita kamatinai tyaonitere nali.

— Hatyaoseta waiyakahena ene hoka Abraão waiya seko akiya, exahe Lázaro Abraão haliya. <sup>24</sup> Hoka kawiy-

atya: “Abá Abraão, hairakoaneharehena natyo! Haxikahena Lázaro hoka hakahehi aolowatya one xaiya hoka tyoa noninise awehetya. Hiyaiya, kirakoane notyaonita exe irikati koni!” nexa. <sup>25</sup> Hoka Abraão nexa ihiye: “Xoana hotita hikasetare xowaka tyotya xoalinihare waiyexe tyaonitere homana? Hoka Lázaro atyo iniyalahare taita kaxomokaka. Hoka kalikini atyo ali waiye tyaonita, hiso kirakoane hisaonitere nase. <sup>26</sup> Exahe toloko kalorexe winenekesene tyaonita. Hatyo hiyeta alita xinali tyoa aokowiterenaiya maisa aliyakere tyoahitaha, exahe hatyo nalitarenai tehityaiya maisa aliyakere ali tyoahitaha”, nexa.

<sup>27</sup> —“Hatyo hiyeta maika Lázaro haxikaheta baba hana xeta naoka, abá Abraão. <sup>28</sup> Hiyaiya, nali 5-harenai nokaximaliniye. Hahalakisene hoka xaneheta hoka xakai ihiyeha. Nikarite hoka maisa tyoahitaha exe kirakoane kawenatyakite xeta”, nexa. <sup>29</sup> Xakore hoka Abraão nehitiya: “Moisés, iraiti xakaisaseharenai xoaha baberane kakoare hiximarenai tyaonita. Maika semaxemahenaha hatyonai xairala”, nexa.

<sup>30</sup> —“Maisaiya atyo nikare hoka xoare tyomita, abá Abraão!” nexa kaoloxere ene. “Alitarefa atyo hatya kaseheta hoka xane irai ekakoaha hoka halakisahaiya atyo háomaneha iniyalahare”, nexa. <sup>31</sup> Hoka Abraão nexa ihiye: “Maisaiya semaxematyahitaha Moisés, iraiti xakaisaseharenai niraene hoka maisaiya tyakekoahitaha, exahe alitare kaseheta hoka xane irae ekakoaha”, nexa.

#### Iniyalahare Exahe Emaotyanyakeheta Xoaha Tahī

(Mateus 18.6-7, 21-22; Marcos 9.42-48)

**17** Hatyaoseta Jesus nexa haxaotyakiraharenai hiye: — Exakerexe ite kawenatyaketa mene: Haiyanaite iniyalahare aomanekisa hahinaeharenae xakore atyoite hoka kirakoane atyoite kaxomokaka nikare axomokanikiyahenere. <sup>2</sup> Ehekoreya atyo kaxawatyaka one kaloxere xaiya sehali kaloliro mehetyakalati kaxolatyaka ihino hiye hoka maisa ahowitikisa exe xoimairanai nawenane.

<sup>3</sup> — Maika xirihare! Maika hihinaehare iniyalahare tyomehena hoka hiwatyalini. Hoka háomane iniyalahare halakisa hoka himaotyanehetene. <sup>4</sup> Maika exahe 7-ki iniyalahare moka hiso haferakoaneta hoka hatyokinai nihatyaka tyoa hoka nehena: “Himaotyanihetene nao-ka”, nehena hoka himaotyanehetene.

#### Tyakekoti Tahī

(Mateus 17.20; Marcos 11.22-23)

<sup>5</sup> Hatyaoseta iniraine kakoarenai axaha Jesus: — Xekohaseti, haeroretya wityakokone — nexaha.

<sup>6</sup> Hoka Jesus nexa ihiyeha: — Ikoiya xityakokone mostardase akerehare hekoti hoka xexaiya exe halo-halo kate hiye: “Hamalakoawihena hityahare kakoita hoka hiyane onexaiya hisaohena!” xexaiya ihiye hoka tyakekoiya xiraene hoka xaokitere akereya tyaona — nexa.

#### Wakahare Hatene Tahī

<sup>7</sup> Jesus nexa: — Maika xiyahékola hiye hoka motya xikawakaneharexe ene xisaonita hoka xane hakita masenekoa xamani, xoana kaxaikota xamani kalaneronai. Hoka kaokehetehehena maseta hoka xoana hexaiya: “Hisohena rotita, hisokehena mexa haliya”? hexaiya. <sup>8</sup> Mahaiya atyo nikare hiraeta! Xakore hoka hexaiya: “Hisomehena nakairati nomani hoka hakanekoatya hoka hamohena nakairati hoka nokanakairi, notera. Hatyo najikinitaite hikanakaira, hisera”, hexaiya. <sup>9</sup> Xoana wakahare kakoaiya hihalahare, hiwakane xema taita tyomita hoka?

<sup>10</sup> — Maika nikarexeta xisaona. Maika xisoma xamemahenere tyotya xisoma kaxaokakehenereharenai najikinita xexa: “Wiso atyo wakaharenai maxoare-waikateharenai. Hiyaiya, wisomita atyo wikawakatyakitereharenai taita”, xexa — nexa ihiyeha.

#### Jesus Awaiyehiheta 10-hare Jijikoahiterenai

<sup>11</sup> Hatyaoseta Jesus xaneta Jerusalém xeta hoka jiya Samaria, Galiléia xoaha koa nenekesene. <sup>12</sup> Xane kaokehena hakoa wenakalati hoka 10-hare jijikoahitina tyoa ahalakoatene. Sekota amematyoaha <sup>13</sup> hoka kawiyatyaha enomana: — Xaotyakisatiye Jesus! Hairakoaneharehena wiso! nexaha.

<sup>14</sup> Jesus waiyahene hoka nexa ihiyeha — Xiyanehete-hena sacerdotenai nali hoka waiyahareheta xiso — nexa. Hatyaoseta xanahitataha ene ahoti hoka waiyeharehenahitaha.

<sup>15</sup> Hatyaoseta hatya enekonitareha Samaria yere, kehexa haiyatereheta hoka haikoaheta aexakeritya maheta Enore. <sup>16</sup> Hatyaoseta Jesus kiji haliya meholokoa hoka ihalahare ekakoa.

<sup>17</sup> Hatyaoseta Jesus nexa: — Halitinai kaxaiyatelikisakehetehehenerenai atyo 10-harenai. Hoka aliyo 9-harenai? <sup>18</sup> Xoana hoka exe hahotyalihare taita haikoaheta aexakeritya maheta Enore? nexa.

<sup>19</sup> Hatyaoseta Jesus nexa ihiye: — Hatityoahetehehena hoka hiyaneheta. Hikinatereheta atyo hityakokone hiyeta — nexa.

#### Xekohaseti Enore Nalitare Tyoanene Tahī

(Mateus 24.23-28, 37-44)

<sup>20</sup> Hatyaoseta haiyaharenai fariseunai axaha Jesus, xoana xowakiya xamaniya kaotyakehena Xekohaseti Enore nalitare tahi akiti.

Hoka nexa ihiyeha: — Hatyo Xekohaseti tyoanene Enore nalitare atyo maisa kawaiyakere xini. <sup>21</sup> Maisaiya atyo xala harenai nita: “Xiyaiyehena, owene tyaonita”, exahe, “Exe nali tyaonita”, nita. Hiyaiya, Xekohaseti Enore nalitare atyo tyaonita xinekoni — nexa.

<sup>22</sup> Hatyaoseta nexa haxaotyakiraharenai hiye: — Haxowakaite kasanite xiyaiya xaokowi Haliti Ityani, xakore hoka maisaiya atyo xiyaiyitene. <sup>23</sup> Hoka haiyaharenaite nehena xihiyeha: “Witya ali xiyaiya”, exahe “Nali xiyane xiyaiya”, nexahaite. Xakore hoka awa atyo xiyane

xatawene. <sup>24</sup> Hiyaiya, kahihye hoka enokoa nali hamaniyata xane hamaniya werokakoa mokita. Nikareta atyoite tyaona Haliti Ityani tyoaneneheta xowaka. <sup>25</sup> Xakore hoka ite kaxemakawatikisaka hotohare, exahe maisa ite kalikiniyerenai aokahitene hao-manaha — nexa.

<sup>26</sup> — Noé xowakiya tyaonahitere akereta atyoite Haliti Ityani tyoaneneheta xowaka. <sup>27</sup> Hatyo xowakiya tyotyaha kanakairahitaha, terahitaha, tyaonakakoahitaha harenai, Noé isoahenere kanowa kalorexe ako kijiya. Hatyaoseta one more exahitaha hoka tyotyaha aisahene. Nikare ite tyaona Haliti Ityani kaokehetehehene xowaka.

<sup>28</sup> — Nikareta tehitiya tyaona Ló xowakiya. Tyotyaha kanakairahitaha, terahitaha, iyahitaha, betetyahitaha, fityahitaha, hati tyomahitaha xoaha. <sup>29</sup> Hoka Ló kikisoahetehehene Sodoma nalita ferakeneta enokoata exoa irikati enxofre xoaha hoka aisahene tyotyaha.

<sup>30</sup> — Nikare ite tyaona Haliti Ityani kaokehetehehene xowaka. <sup>31</sup> Hoka maika xala xamani hatiri tyonita hoka exoaheta hoka tekoahena rotita, awa atyo ahowitiharetyoa xane haxiyeharenai iyehetehehena. Exahe xala xamani mase xaneta hoka awa atyo haikoahetehehena hahana xeta. <sup>32</sup> Xotyaxematyaira Ló exanityo tahi akiti. <sup>33</sup> Xala xamani atyoite wenati waiyexe tawita hoka meta atyoite enonita. Hoka xala xamani atyoite nokoamanyiye tyonita hoka nohiyiti waini hoka hatyo atyoite kaoka wenati waiyexe.

<sup>34</sup> — Hatyo xatinite hinamanaite nemakita haxawalita kamakoa hoka hatitaiya kakolatyaka hoka hatyaite enaoseta kahalakisaka. <sup>35</sup> Hinamahalo ohiroite haxawalita mehititaha trigohe, hoka hahaloite kakolatyaka hoka hahaloite enaoseta kahalakisaka. <sup>36</sup> Nikare tehitiyaite hinamahare haliti ite hakita masenekoa hoka hahare ite kakolatyaka hoka hahare ite kahalakisaka enaoseta — nexa Jesus.

<sup>37</sup> Hatyaoseta exaotyakiraharenai axene: — Xekohaseti, alyako xeta kakolatyakahitaha? nexaha.

— Aliyako xamani atyoite kamati tyonita hoka nalite olohonai hohisakoahena — nexa Jesus.

### Wainyanenero, Watyalisatiye Xoaha Tah

**18** Jesus exakere aimenekohitiya, hotikisa enomanaha hoka iraexatyaha mene hoka maxamaihokoharehare tyonaha maheta: <sup>2</sup> — Hatya wenakalati koa tyonita hatya haliti watyalisatiye. Hoka maisa mairare Enore, exahe maisa xala hare aiminisare. <sup>3</sup> Hatyokoa tehitiya tyonita ohiro wainyanenero. Hatya iniyalahare mokitene hoka tyoa fera kaokita watyalisatiye ana hoka nita: “Hakahinaehena natyo nahalakoihare nonitata!” nita ihiye. <sup>4</sup> Xakore hoka waha maisa kahinaetene aokowita. Xakore hoka wahahena hoka exakere ahokoty: “Aliterexe maisa Enore nomairare, exahe maisa xalahare naiminisare. <sup>5</sup> Xakore hoka exe ohiro nomaxaharehena mokita hoka nakahinaetene ite. Maisaiya nakahinaetitene hoka ekakoitaiya emaxahalikisa kaiserehare natyo”, nexa.

<sup>6</sup> Hatyaoseta Jesus nehitiya: — Hoka waiyira xasemenena exe watyalisatiye mahakaiserexe niraine. <sup>7</sup> Xoana Enore maisaiya kahinaetita hakoamaniya tyoniterenai, kawijiterenai ferakoa, makiya harenai, hakahinaetyaka aohenaha hoka? Xoana howitihareya hakahinaerahene kakoa? <sup>8</sup> Natyo atyo nomita xihye: kahinaetyaite hatyo halitinai, haxerore ite hatyoharenai tyoma! Xakore hoka Haliti Ityani tyohetehehene xowakaite, xoana waikohekoa tyoniterenai kaite tyakekohene? nexa.

### Fariseu, Kalorexe Noloxa Resebetyasehare Xoaha Tah

<sup>9</sup> Haiyahare waiyexeharexenai aokowiha hoka haiyaharenai mawaiyexehareharexe aokaha hoka Jesus exakere aimenekoty enomanaha: <sup>10</sup> — Hinamahare halitinai xaneha Iraexatyakalati Hanako iraexatyaha maheta. Hatya Fariseu, hatya kalorexe noloxa resebityasehare xoaha. <sup>11</sup> Fariseu tityoa hawawahare hoka exakere iraexahena: “Enore, nihalahare hikakoa. Hiyaiya, maisa atyo xiyehaliti xawaiyetyasehare xini natyo, maisa nokaiwarexe, exahe ohiro nowatyaliye haiyaharenai akereta. Nihalahare tehitiya hikakoa. Hiyaiya, maisa atyo exe kalorexe noloxa resebityasehare akereta xini natyo. <sup>12</sup> Hasemanane nihatyaka atyo hinamaki ferakene nomanakairita notyaxematya hiso maheta, exahe nokainotyoni hiyeta atyo holini nijita homana”, nexa.

<sup>13</sup> — Hoka olo resebityasehare atyo sekota iraexahena, maisa kenekakoatyare hekoti eno xeta, hatikolalikoa mokoty (haxamaikoharene hiyeta) hoka nehena: “Enore, hairakoaneharehena natyo. Hiyaiya, iniyalahare nomasehare atyo natyo”, nexa.

<sup>14</sup> — Hoka natyo nomita xihye: hatyo haliti atyo, maisa atyo etake hahare xini, xaneheta hahana xeta hamehexaikoharene Enore kakoa. Hiyaiya, xala xamani atyoite kalorexe aokowita hoka wakahare atyoite kaxomokaka, hoka xala xamani atyoite maisa haiyanae xaehare aokowita hoka kalorexe atyoite kaxomokaka — nexa.

### Jesus Wenati Waiyexe Aoka Xoimanai Ana

(Mateus 19.13-15; Marcos 10.13-16)

<sup>15</sup> Hatyo najikinita haiyaharenai kolatyaha xoimamokosenai Jesus ana, ekaokakisa hakahe ihyeha hoka wenati waiyexe aoka enomanaha maheta. Xakore hoka exaotyakiraharenai waiyahene hoka mahokoanetyahene.

<sup>16</sup> Hoka Jesus kawisa xoimanai hahaliya hoka nexa: — Kotare xoimanai tyoa nomani, awa atyo xamahokoanetyahene. Hiyaiya, Enore waikoherakoa atyo exe xoimanai akereharenai anere. <sup>17</sup> Aliterexe nomita xihye: xala xamani atyoite maisa exe xoimanai akereta Enore niraene tyakekota hoka maisaiya aliyakere tyonahitaha exema — nexa.

**Haliti Kaoloxere Tahī**

(Mateus 19.16-30; Marcos 10.17-31; 1 Timóteo 6.6-10; Tiago 5.1-3)

<sup>18</sup> Hatya xekohaseti judeu axa Jesus: — Waiyexe Xaotyakisatiye, xoareya notyoma hoka kaxekaka nomani wenati waiyexe matyotenehare? nexa.

<sup>19</sup> Hoka Jesus nexa ihiye: — Xoana hoka waiyexe hao-ka natyo? Enore taita atyo waiyexe, maisa atyo hatehitiya aka. <sup>20</sup> Maisa hoka koxaka hasemita Xaotyakiyahonai: “Awa atyo iniyalahare hisoma ohiro kakoa, awa atyo haisa, awa atyo hikaiwa, awa atyo hamaoseratya, haiminisa hexe, hityo xoaha”, nitere — nexa Jesus.

<sup>21</sup> — Noxoiminita atyo tyotya hatyo xaotyakiyahonai xema notyaonita — nexa hatyo haliti.

<sup>22</sup> Jesus sema nikare iniraine hoka nexa: — Hátitehena himaomanehare. Habetehena tyotya hixiyeharenai hoka hisehena olo maxiyehareharenai ana. Nikare ite hisaona hoka hikaxiyeharexe ite hisaona enokoa nali. Hatyaosetaite hisoheta hoka hisoa noximi — nexa.

<sup>23</sup> Hatyohare sema hatyo haliti hoka kalore amaikohare, kahare kaxiyeharexe hoka.

<sup>24</sup> Jesus waiya examaikoharene hoka nexa: — Howitihare atyo kaxiyeharexenai nawenane Enore koa maniya. <sup>25</sup> Howitihare atyo kaxiyeharexenai nawenane Enore koa maniya, kamelo howitihare kaxajiyak-isakitere awiyahi nakoako xahehare howitini atyo — nexa.

<sup>26</sup> Hoka iniraene semehenerenai axene: — Hoka xala ite nikare hoka kaiyakehetehena? nexaha.

<sup>27</sup> — Halitinai ana howitihareterehare atyo Enore ana maisa howitiharexe — nexa Jesus ihiyeha.

<sup>28</sup> Hatyaoseta Pedro nexa: — Hasemahena, wiso atyo wahalakisa tyotya hoka wisoa hiyema — nexa.

<sup>29</sup> — Aliterexe nomita xihye: Xala xamani atyo ite halakisa hahana, haiyanityo, haximarenenai, hahinaeharenai, haisaninai harenai, Enore xema maniya hawenane hiyeta hoka <sup>30</sup> kalikini ali tyaonitaterere xowakaite exahehare kaxekakeheta enomana. Hoka hax-owakiyaite wenati waiyexe matyotenehare kaxekakihi-tiya enomana — nexa.

**Jesus Iraehitiya Hakamane, Hakaseneheta Tahī**

(Mateus 20.17-19; Marcos 10.32-34)

<sup>31</sup> Hatyaoseta Jesus xane haware haxaotyakiraharenai kakoa hoka nehena ihiyeha: — Xasemahena, wiyonetatya Jerusalém xeta. Nalityaite iraiti xakaisaseharenai xairahenahere Haliti Ityani tahi akereta kawenatyakehena. <sup>32</sup> Kahalakisakaite majudeuneharenai ana hoka hatyonaite koexahalisenene, kirawanahenite, xataholisahenite, <sup>33</sup> mokotyahenite hoka hatyo najikinitaite aisahene. Xakore hoka hanamaki ferakene najikinitaite kaseheta — nexa.

<sup>34</sup> Exaotyakiraharenai ana maisa terota waiyekehakita Jesus niraene. Exe irahenere tahi metahare tyaona enomanaha hoka maisa Jesus iraitere waiyekehalakita enomanaha.

**Jesus Kaxoseheta Maxosehare**

(Mateus 20.29-34; Marcos 10.46-52)

<sup>35</sup> Hatyaoseta Jesus okoi xane kaokehena wenakalati Jericó nali. Hoka hatya haliti maxosehare tyokita ahoti kilihi, axita olo. <sup>36</sup> Hoka sema kahare halitinai jiyehenerenai kasako hoka axahene: — Xoare nemahare nasemita? nexa.

<sup>37</sup> Hoka nexaha ihiye: — Jesus Nazaré yere jiyehena — nexaha.

<sup>38</sup> Hatyaoseta maxosehare kawiyahena: — Jesus, Davi jikolahare, hairakoaneharehena natyo! nexa.

<sup>39</sup> Hoka enaheta xaneterenai mahokoanetyaha ekawira, kasani mema tyaona aokahitaha. Xakore hoka exahehare kintyaxa kawiyatya: — Davi jikolahare, hairakoaneharehena natyo! nehitiya.

<sup>40</sup> Hatyaoseta Jesus tityoa hoka enolokaka aoka. Tyoa kaoka ehaliya hoka Jesus axene: <sup>41</sup> — Xoare notyoma homana haokita? nexa.

— Xekohaseti, nowaiyakatyareheta naokowita! nexa ihiye.

<sup>42</sup> Hoka Jesus nexa ihiye: — Hiyaiyahetehena. Kalikini atyo hawaiyeheta hityakekone hiyeta — nexa Jesus.

<sup>43</sup> Hatyaoseta waiyakatyarehetehena rotita hoka xane Jesus xema, ihalahare Enore kakoa. Tyotya halitinai waiyaha hatyoharenai hoka ihalahareha Enore kakoa.

**Jesus, Zaqueu Xoaha Tahī**

**19** Hatyaoseta Jesus xane kaoka Jericó hoka jiyehena wenakalati. <sup>2</sup> Hoka nali hatya haliti kaoloxere tyaonita, Zaqueu nexarexe. Kalorexe noloxa resebetyaseharenai xekohase tyaonita. <sup>3</sup> Hoka kasani waiya aokowita Jesus xakore hoka maisa aliyakere. Kahare halitinai, exahe maisa wahaharexe xoaha hoka. <sup>4</sup> Hatyaoseta tema xane halitinai naheta hoka kakoha halohalo howero kate, waiya maheta Jesus, hatyoaho ijiyanehena hoka.

<sup>5</sup> Hoka Jesus hatyo akitihena hoka kenekakoatya waiya hoka nexa Zaqueu hiye: — Zaqueu, hihalahare hexoahetehena. Awisa hihanako nali notyoa notemaka naokowi — nexa.

<sup>6</sup> Hatyaoseta Zaqueu ihalahare exoaheta, xane ekakoa hahanako xeta haihalaharene kakoa.

<sup>7</sup> Tyotya waiyahene hoka irahenaha etahi: — Kaxiyani, exe halitite xane nemahena iniyalahare nomasehare hanako! nexaha amaikohareha Jesus kakoa.

<sup>8</sup> Hatyo najikinita Zaqueu tityoa hoka nexa Xekohaseti hiye: — Hasemehena, holinite noloxi hiyeta nisa maoloxaharenai ana. Exahe xala xamanite koxaka nokaiwita hoka 4-kite exahexe niseheta enomana — nexa.

<sup>9</sup> Hoka Jesus nexa: — Kalikini atyo exe haliti kaiyakeheta iniyalahare maniyata, exahe exe haliti tehitiya atyo Abraão jikolahare. <sup>10</sup> Hiyaiya, Haliti Ityani atyo tyoa taweheta, iyeheta maheta mititereharenae — nexa.

### 10-hokose Olo Hokosenai Tahī

(Mateus 25.14-30)

<sup>11</sup> Hatyaoseta Jesus xakaihitiya ihiyeha haxaimeneko-la kakoa iniraene semehenerenai ana. Jerusalém owitehena mokahita hoka exahekolaha hiye hoka motyala okoi Xekohaseti Enore nalitare kalorexe kaotyakehena aokahitaha hoka.

<sup>12</sup> Hatyo hiyeta Jesus nexa: — Hatya haliti kalorexe ityani konitare xane hakoa wenakalati seko akiya, kalorexe tyaona hoka hatyo najikinita haikoaheta maheta. <sup>13</sup> Haxanene nahitita kawisa 10-harenai hawakaneharenai hoka isa enomanaha inihatyaka-hokoseha olohokosenai ouro nomaka, hoka nehena ihiyeha: “Xasemehena, xoare xamanite xisoma exe olo kakoa, exahe xoanere xamanite xakajijyanetene na-haikoahetehenerere kijija”, nexa.

<sup>14</sup> — Hoka ihinaeharenai enawenakala yerenai kirawanetene. Hatyo hiyeta axikatya haiyaharenai enajikinita, nexa ihije maheta: “Kasani exe haliti maisa wiyekohase tyaona waokare”, nexaha maheta.

<sup>15</sup> — Hatyaoseta hatyo haliti kalorexe tyaona hoka haikoaheta hawenakala xeta. Hoka hawakaneharenai kawisa, etake olo isehenerere enomanaha akiti sema aokowita, xoanere xamani ala kajijyanetyahene hoka.

<sup>16</sup> — Hetatijehare kaoka hoka nexa ihije: “Xekohaseti, etake olo hokose ouro nomaka hisehenerere nomani kakoa 10-hokose olo nakajijyanetene”, nexa.

<sup>17</sup> “Waiye kaiserehare!” nexa. “Hiso atyo wakahare waiyexe! Hiyaiya, hawaiyore atyo hikaxaikota inirere. Hatyo hiyetaite 10-koa wenakalatinai xekohasehare namoka hiso”, nexa.

<sup>18</sup> — Hatyaoseta hatisa wakahare kaoka enomana hoka nexa ihije: “Xekohaseti, etake olo hokose ouro nomakere hisehenerere nomani kakoa 5-hokose olo nakajijyanetene”, nexa. <sup>19</sup> “Hiso atyoite 5-koa wenakalatinai xekohasehare hisaona”, nexa exekohase ihije.

<sup>20</sup> — Hatyaoseta hatya wakahare kaokehitiya enomana hoka nexa: “Xekohaseti, owene holoxa hokose. Nityahalisene imiti taose kakoa hoka nateroakisene.

<sup>21</sup> Nomaira hiso. Exahe waiyekehalakita atyo nomani hialijiniharene, exahe hiyitaterere haiyanai xiyehare, maisa xakore hixiyehare xini hoka. Exahe himixitaterere, maisa xakore hiyafera xini hoka”, nexa. <sup>22</sup> Hoka nexa ihije: “Hiso atyo wakahare maisa waiyexe! Hiraene kakoitaita iniyalahare namoka hiso. Waiyekehalakita atyo homana noxalijinihalini, exahe niyitere haiyanai xiyehare, maisa xakore noxiyehare xini hoka. Exahe nimixitaterere nomaxafirinihare. <sup>23</sup> Xoana hoka maisa noloxi olo xomokakala hanako hekoti hamokita?

Nikareya hamokarene hoka noxanini hekotaiya, na-haikoaheta hoka kajijyanexeya naresebehetene”, nexa.

<sup>24</sup> — Hoka nexa nali tyaoniterenai hiye: “Xiyeheta olo-hokose enonita hoka xisene 10-hokose olo kakoare ana”, nexa. <sup>25</sup> “Xekohaseti, koxaka atyo 10-hokose olo kakoare!” nexaha.

<sup>26</sup> — Hoka xekohaseti nexa: “Aliterexe nomita xihije: xala xamani atyoite kalore kakoare hoka exaheharexe ite kaxekakihitiya enomana. Xakore hoka xala xamani atyoite maisa xoare kakoare hoka exahe inirere kakoare ene hoka iyehenahitene atyoite enonita.

<sup>27</sup> Hoka kalikini xanolohena ali nahalakoiharenai, kasani emaxekohasehareneha notyaona aokiterenai hoka xaisehenahene nahalakoita!” nexa.

### Jesus Kaokehena Jerusalém Nali

(Mateus 21.1-11; Marcos 11.1-11; João 12.12-19)

<sup>28</sup> Hatyo iraehegere najikinita Jesus xanehitiya enahetaha Jerusalém xeta. <sup>29</sup> Hatyaoseta xane kaokehena wenakalatinai Betfagé, Betânia xoaha haliya, hoka Oliveiras tyairiya nalita axikatya hinamahare haxaotyakirahare maheta maniya, <sup>30</sup> hoka nexa ihiyeha: — Xiyanehena exe wenakalati waheta maniya tyaonitere nali. Xikaokehenaite hoka owene ite borikose exolatyakahare tyaonita, maokatyakaharetata eheno. Hoka maika xamaxolatene hoka xisoa ekakoa ali. <sup>31</sup> Maika xala xamani axehena xiso, exahe xoare maheta xamani xaolihene hoka xexa ihije,

“Xaotyakisatiye aokitene haomana”, xexa ihije — nexa. <sup>32</sup> Xaneha hoka Jesus iraetere akereta taita waiyaha. <sup>33</sup> Aolihenaha borikose hoka ekaxaikotyaseharenai axahene: — Xoana hoka borikose xaolihena? nexaha.

<sup>34</sup> — Xaotyakisatiye aokitene haomana hoka — nexaha.

<sup>35</sup> Hatyaoseta nolokaha borikose Jesus ana. Hoka mokaha eheno haimanasenaiha hoka kahinaetyaha Jesus tyoka eheno maheta. <sup>36</sup> Hatyoseta Jesus jiyehena hoka halitinai haimanasenaiha mokahitaha ahotyaho.

<sup>37</sup> Hatyaoseta kaokehena Jerusalém haliya, Oliveiras tyairiya xexoakala nalihena hoka kahare halitinai ekoamaniya tyaoniterenai xanetaha exema. Awaiyetiterenenai ihalaharehena Enore kakoa hoka kinatyaxa kawiyahenaha, tyotyaxoalini hare enómane waiyehenaherehare hiyeta. <sup>38</sup> Hoka nexahitaha:

— Kasani Xekohaseti Enore waiye moka kalorexe enexare kakoa tyoiterehare waokita! Wenati waiyexe enokoa nali, exahe Enore kakoa kaihalaharetyaka waokita! nexaha.

<sup>39</sup> Hatyaoseta haiyaharenai fariseunai tyaoniterenai kaharexe halitinai koni nexaha Jesus hiye: — Xaotyakisatiye, hiwatyalihena hikoamaniya tyaoniterenai hoka mema tyaonaha! nexaha.

<sup>40</sup> — Aliterexe nomita xihije — nexa Jesus: — Memaiya tyaohehitaha hoka sehalinaia kawiyatya — nexa.

### Jesus Tiya Jerusalém Kawa

<sup>41</sup> Hoka Jesus xane kaokehena Jerusalém haliya hoka waiya wenakalati hoka tiya ekawa. <sup>42</sup> Hoka nexa: — Kaxiyani, Jerusalém! Kalikinitaiya atyo waiyekehalaka homana, xoare xamaniya hisoma hoka wenati waiyexe koamaniya hawenaneheta hoka ehokoreya! Xakore hoka kalikiniya atyo maisa hatyoharenai waiyekehalakita homana. <sup>43</sup> Hiyaiya, haxowaka ferakenehenaite

hoka hahalakoaharenaite talahokotya hiso tolokoiyohi kakoa, exahiyatyahaite hiso, exahe ehotyasekoatya-haite hiso tyotya maniyata.

<sup>44</sup> — Mawenekoaretyahaite hiso, tyotya hikoa tyaoniterenai xoaha. Maisaite sehali hali heno tyaohitita. Hiyaiya, maisa atyo waiyekehalakita homana Enore tyoa iyeheta hiso aokowihenerere xowakere — nexa.

### Jesus Betetyatienai Aihikoaheta Iraexatyakalati Hanakota

(Mateus 21.12-17; Marcos 11.15-19; João 2.13-22)

<sup>45</sup> Hatyaoseta Jesus xane isoa Iraexatyakalati Hanako hoka aehikoaheta betetiterenai. <sup>46</sup> Nexa ihiyeha: — Iraitu Waiyexe kaxairatyakehenere nali exakere xairatyoare tyaonita Enore niraene:

Nohani atyoite Iraexatyakalati Hana kakaexaretyaka, nexa.

Xakore hoka xiso atyo kaiwarexenai xateroakisakala niyahare xamokene — nexa Jesus ihiyeha.

<sup>47</sup> Jesus aotyakijita halitinai ferakiti nihatyaka Iraexatyakalati Hanako. Hatyaoseta sacerdotenai xekohasenai, Xaotyakiyaho kakoa waiyoreterenai, judeunai nityohalitiranae xoaha aisahene aokowihenaha. <sup>48</sup> Hakore hoka maisa aliyakere nikare mokarahene, tyotya halitinai awaiyetyahitaha exaotyakira hoka.

### Jesus Atyo Iraitu Kakoare

(Mateus 21.23-27; Marcos 11.27-33)

**20** Haxowaka Jesus Iraexatyakalati Hanako tyaonita hoka aotyakijita halitinai, exahe xakaita ihiyeha Iraitu Waiyexe tahi. Hoka sacerdotenai xekohasenai, Xaotyakiyaho kakoa waiyoreterenai, judeunae nityohalitiranai xoaha kaokaha enomana <sup>2</sup> hoka axehenahene: — Hiyakaihena wihiye, xala niraene kakoare hiso hoka exeharenai hisomita? Xala axikatya hiso hoka nikare hisaonita? nexaha.

<sup>3</sup> Hoka Jesus nexa ihiyeha: — Natyo tehitiyaite naxa xiso. Hoka xekoaxahena: <sup>4</sup> Xala niraine xema João batixatya haliti? Xoana Enore niraene xema, xoana halitinai niraene xema kore? nexa.

<sup>5</sup> Hatyaoseta hekota hatyo kakoaha axakaoahenaha: — Xoare wehenaite? “Enore niraene xema”, wexaiya hoka nexaiya axa wiso: “Xoana hoka maisa xityakekota João?” <sup>6</sup> Exahiya, “Halitinai niraene xema”, wexa hoka exe halitinaiya mokotyaha wiso sehali kakoa. Hiyaiya, João atyo iraitu xakaisasehare terota aokahitaha — nexaha.

<sup>7</sup> Hatyo hiyeta nexaha: — Maisa wawaiyorexe. Kala xala niraene xema xamani João batixatya — nexaha.

<sup>8</sup> — Hoka natyo tehitiya atyoite maisa noxakaita xala niraene xema exeharenai notyomita — nexa Jesus.

### Masene Nomaseharenai Xalijiniharexenai Tahi

(Mateus 21.33-46; Marcos 12.1-12)

<sup>9</sup> Hatyaoseta Jesus exakere aimenekotya halitinai ana: — Hatya haliti fitya uva katenai hamasenekoa hoka halakisene haiyanai halitinai ana kaxaikone maheta hoka xonehena hoka irakakaoahenahitene maheta.

Hatyaoseta xane seko akiya hoka waha tyaona.

<sup>10</sup> Iximexaka xowakehena hoka axikatya hatya hawakanehare, isehenahitaha maheta enomana holi-ni. Hakore hoka masene kaxaikotyaseharenai mokonasetene hoka axikahenahitene ehare firereta.

<sup>11</sup> Hatyaoseta axikahitiya hatya hawakanehare, hakore hoka mokonasehenahitiyene. Haihare xakere mokahene hoka axikahenahitene ehare firereta.

<sup>12</sup> Hatyaoseta axikahitiya hatisa hawakanehare, hakore hoka masene kaxaikotyaseharenai mokotyahene tehitiya hoka axikahenahitene.

<sup>13</sup> — Hatyaoseta masene xekohasehare ahekotya: “Xoanaite notyaohena? Naxikatyaite nityani noxiyakawali. Hatyo atyoite hoka aiminisahene”, nexa.

<sup>14</sup> Hakore hoka masene kaxaikotyaseharenai waiyaha ityani hoka nexaha: “Exe atyo masene xekohasehare ityani. Nikahena hoka waisene hoka masene ite womanere tyaona”, nexaha. <sup>15</sup> Hatyaoseta otokaha ityani hoka xaneha haware ekakoa masene nonitata hoka aisahene.

Hatyaoseta Jesus axahene: — Xoanaite masene xekohasehare mohena hatyo masene kaxaikotyaseharenai xaoka? <sup>16</sup> Tyoaite hoka aisehena hatyo halitinai, exahe isehitiyaite hahananehare hahotyalinai masene kaxaikotyaseharenai ana — nexa.

Semaha hatyoharenai hoka nexaha: — Kasani maisa nikare kawenatyaka waokare! nexaha.

<sup>17</sup> Hakore hoka Jesus waiye wahakotya enomanaha hoka nexa: — Iraitu waiyexe kaxairatyakehenere atyo nexa:

“hali hati nomaseharenai maxaokarehenere atyo hati nekesako kaxomokaka”, nexa.

<sup>18</sup> Xala xamaniya atyo exoa hatyo sehali heno hoka taikoehakoa atyoite. Hoka hatyo sehaliya atyo hatya heno exoa hoka miyoheteniya atyo — nexa.

### Jesus Axaha Olo Xekaka Tahi

(Mateus 22.15-22; Marcos 12.13-17)

<sup>19</sup> Hatyaoseta Xaotyakiyaho kakoa waiyoreterenai, sacerdotenai xekohaseharenai xoaha ana waiyekehalakita. Jesus xaimenekola atyo etahiha irieta, hoka otokahene aokowi hatyo xowaka. Hakore hoka mairahitaha halitinai hoka maisa xoana mokahitene.

<sup>20</sup> Hatyaoseta kaxaikohenaha Jesus. Bakatyaha haiyaharenai halitinai hoka axikatyahene axaha maheta Jesus. Hoka waiyexeharexenai aokowiha hoka Jesus nawenane waiyaha hoka kasani hairaine kakoita komaniyatyoa aokahitaha hoka iraharetyahene maheta. Nikare tyaona hoka hatyohare hiyeta otokahene hoka isahene aokowiyahitaha kalorexe ana. <sup>21</sup> Hoka hatyo halitinai axahene: — Xaotyakisatiye, waiyekehalakita atyo womana. Hiraeterehare, haotyakijiterehare atyo aliterexe. Waiyekehalakita tehitiya womana. Hakakoa atyo hiyaiyita halitinai, hoka aliterexe kakoa haotyakijita halitinai Enore aokitere akereta. <sup>22</sup> Hoka hiyakaihena wihiye: Xoana wiyatyakisakaho ala axakoanetita, xoana mahokoanetita kore ala wiyekane olo kalorexe Roma yere ana? nexaha.

<sup>23</sup> Hoka Jesus otya iniyalahare exahekolaha hoka nexa: <sup>24</sup> — Xama ali nomani hatya olo hokose. Hoka xala nexare exahe tiho niyakotini exe olo hokose hiye? nexa.

— Kalorexe — nexaha.

<sup>25</sup> Hoka Jesus nexa ihiyeha: — Xoare xamani atyo kalorexe Roma yere anere hoka kalorexe ana xisene. Xoare xamani Enore anere hoka Enore ana xisene — nexa.

<sup>26</sup> Hoka maisa Jesus aliyakere xoare tahi kakoa irae-haretyahitaha halitinai nahalakoa. Hatyo hiyeta mema tyaonaha, hakaharetyoaha exekoaxala kakoa.

### Jesus Axaha Kamatinai Kaseneheta Tah

(Mateus 22.23-33; Marcos 12.18-27; João 5.21; Romanos 8.10-11; 1 Coríntios 15.35-57; 1 Tessalonicenses 4.16; Apocalipse 20.4)

<sup>27</sup> Hatyaoseta haiyaharenai saduceunai tyoaha Jesus ana. Enomanaha haliti wainihena hoka maisa kasehetere. Tyoaha Jesus haliya hoka nexaha: <sup>28</sup> — Xaotyakisatiye, Moisés atyo exakerexe aotyakisa wiso: Hatya halitiya waini hoka haiyanityo maisanihalota halakisa hoka iximarene atyoite tyoaheta hatyo wainianenehenolo kakoa. Hoka kaisaniha hoka enaxenane wainihenere ene ityaninai kaxaokaka maheta aoka.

<sup>29</sup> — Hoka 7-harenai haximarene kakoarenai tyaonahitaha hoka enahetahareha kaiyanityo hoka maisanihareta waini. <sup>30</sup> Hoka ihiyetare iximarene tyoaheta hatyo wainianenero kakoa, xakore hoka wainihitiya maisanihareta. <sup>31</sup> Nikare ihiyetare iximarene tyoahitiya ekakoa hoka wainihitiya. Nikare makere tyaonaha hatyo haximarene kakoarenai: tyotyaha wainiha maisaniharahitaha ekakoa. <sup>32</sup> Hatyo najikinita ohiro tehitiya waini. <sup>33</sup> Nikarite hoka xala exanityo kaisere ite hatyo ohiro tyoahetehena, kamatinai kasehetehenere xowakiya? Hiyaiya, tyotyaha atyo tyaonaha ekakoa — nexaha.

<sup>34</sup> Hoka Jesus nexa ihiyeha: — Ali waikohekoa atyo halitinai kaiyanityota, exahe ohironai hoka kaiyanenahitaha. <sup>35</sup> Hoka kasehetehenerenai, exahe wenati haxowaka niyahare anerenai terota atyoite maisa tyaonakakoahenahititaha. <sup>36</sup> Hiyaiya, anjonai akeretaha atyoite, exahe maisaiya atyo wainihenahititaha. Enore ityaninai atyo, hiyaiya, kasehenahitaha atyo.

<sup>37</sup> — Hiyaiya, waiyekehalaka atyo Moisés xakai kamatinai kaseneheta tahi. Hananehaliti kiritere tahi iraehenere xowaka. Enore tahi xairatya hoka Enore atyo Abraão, Isaque, Jacó xoaha Nenorexa aoka.

<sup>38</sup> Hatyoharenai atyo hotikijita hoka Enore atyo kasexenai Nenorexa, maisa kamatinai Nenorexa xini. Hiyaiya, enomana atyo tyotyaha atyo kasetaha — nexa.

<sup>39</sup> Hatyaoseta haiyaharenai Xaotyakiyaho kakoa waiyoreterenai nexaha: — Ehekere hekoaxatya, Xaotyakisatiye — nexaha.

<sup>40</sup> Hatyaoseta maisa kinatyatyako axehenahititene.

### Jesus Axahene Enore Kalorexe Aohenere Tah

(Mateus 22.41-46; Marcos 12.35-37)

<sup>41</sup> Hatyaoseta Jesus axahene: — Aliyakerexe hoka Enore Kalorexe Aohenere atyo Davi jikolahare aokahitaha? <sup>42</sup> Hiyaiya, hatyo Davi atyo exakere nexa, Salmos nanekoa nali:

Nexa Xekohaseti Noxekohase hiye: “Hisokehena nofihini maniya

<sup>43</sup> hahalakoaharenai hikiji katyahe namohenere kijiya”, nexa.

<sup>44</sup> Hiyaiya, Davi atyo Haxekohase aokene, hoka aliyakereya Enore Kalorexe Aohenere atyo Davi jikolahare xaohena? nexa.

### Jesus Irae Xaotyakiyaho Kakoa Waiyoreterenai Tah

(Mateus 23.1-36; Marcos 12.38-40)

<sup>45</sup> Halitinai semaxematyahitaha Jesus niraine hoka nexa haxaotyakiraharenai hiye: <sup>46</sup> — Xiriharira Xaotyakiyaho kakoa waiyoreterenai kakoa. Hatyonai atyo awaiyetyahitaha haetonanaha imiti waiyeharexe ako, exahe wetekokoa hoka kasani halitinai haxaiminiraha kakoa katyawaxaha ihiyeha aokahitaha. Xanehenaha xahohisakoatyakalati hanako hoka waiyexe okahakalati koa tyokahitaha, exahe nakairati xowakehena hoka kasani okahakalati waiyexe koa tyokaha aokowihitaha. <sup>47</sup> Exahe kaiwahitaha, mehotyahitaha wainianeneronai xiyehalo. Hoka teraharetyoaha aokowihenaha hoka waha tahi iraeatyahitaha. Hatyo hiyeta iniyalahare kaxomokakehenahere atyoite exahere niyalahare — nexa.

### Wainianenero Maoloxahalo Xekane Olo Tah

(Marcos 12.41-44)

**21** Jesus tityoita Iraexatyakalati Hanako hoka waha koita halitinai ana hoka waiya kaoloxerenai xomokala kajali olo nitini ako. <sup>2</sup> Waiya tehitiya hatya wainianenero maoloxahalo xomokala hinama hokose olo, inira xaimanexe.

<sup>3</sup> Hatyo hiyeta nexa: — Aliterexe nomita xihye: exe wainianenero maoloxahalo atyo isa tyotyaha haiyaharenae xahexe. <sup>4</sup> Hiyaiya, haiyaharenai atyo isa kamawanetere hiyeta. Hoka exe atyo, maoloxahalo kaiserehare xakore hoka hanakaira haxiyehalo niyahare tyotyaha isa — nexa.

### Jesus Irae Iraexatyakalati Hana Mawenekoaretyaka Tah

(Mateus 24.1-2; Marcos 13.1-2)

<sup>5</sup> Haiyaharenai irataha Iraexatyakalati Hana tahi, enawaiyehare ihye tyooniterenai sehalinai exahe xoolinihare kaxekakiterehare tahi.

Hoka Jesus nexa:

<sup>6</sup> — Haxowaka ferakenite tyotyaha exe xiyaiyitereharenai kamawenekoaretyakeheta. Hoka maisaiya hatya sehali hatya sehali heno tyoahitita — nexa.



**Howitiharexe Wenati, Irawaniti Xoaha Tahī**

(Mateus 24.3-14; Marcos 13.3-13)

<sup>7</sup> Hatyaoseta axahene: — Xaotyakisatiye, xoana xowakaite hatyoharenai kaotyakehena? Xoare hare hotohare ite kaotyakehena hoka hatyoharenai kaotyakene hotikihena? nexaha.

<sup>8</sup> — Maika xirihare hoka maisa xala hare maoseraita xiso. Hiyaiya, kahare tyaite nexare kakoa kaotyakehena hoka nehenaha: “Natyo atyo Enore Kalorexe Aohenere”, exahe, “Koxaka atyo enaose xane hikoa”, nehenahatyaita. Xakore hoka awa atyo hatyoharenai niraene xema xisaona.

<sup>9</sup> — Awa atyo ximairehena xasemehena xaisakakoati, xalijinihare tyaoniterenai tahi hoka. Hatyoharenai hotohare atyoite kaotyakehena. Xakore hoka maisa tyaite hatyo xowaka imiyanaose xane hikoahenere — nexa.

<sup>10</sup> — Hahotyalihare ite xane hahotyalihare kakoa aisakakoahena, exahe hakoatare ite xane hakoatare kakoa aisakakoahena. <sup>11</sup> Haiyanai koaite kaotyaka waikohe tatakoane, exahe nakiti, kawe akiti kaheneharexe xoaha. Kahare ite xalini hare amairakisare kaotyaka, exahe xalini hare ite enokoa nali kawaiyaka.

<sup>12</sup> — Xakore hoka tyotya hatyoharenai kaotyakehenere nahitaita xikaxotokaka, xikairaharetyaka. Xikakolatyakaite axaha maheta xiso xahisakoatyakalati hanako hoka hatyo najikinitaite berexoako xikaxomokaka. Nohiyetite xikakolatyaka kalorexeni, xekohasetinai nahalakoa. <sup>13</sup> Nikare ite xikaxomokaka hoka hatyo xowakaite Iraitī Waiyexe xiyakaihena ihiyeha. <sup>14</sup> Hoka xasemehena: maisaiya hatyo nahitita xahekohena xikahawaonitaretyoane xiraene tahi kakoa. <sup>15</sup> Hiyaiya, natyota atyoite nisa xomana iraiti, exahe waiyoliniti hoka xahalakoaharenaita maisa jiyahaotyahitaha xiso, exahe matyakekotyahitaha xiraene. <sup>16</sup> Exahe xexenai, xiximarenenai, xihinaeharenai kaisereharenai taite aberexotyakisaha xiso. Hoka aisahaite haiyaharenai xinekonitare. <sup>17</sup> Tyotyahaite kirawaneha xiso nohiyiti. <sup>18</sup> Xakore hoka maisaite hakase hekoti xisekase mitita. <sup>19</sup> Maika heko xisaona nokoamaniye. Hiyaiya, nikare atyoite xisaona hoka xikaiyakeheta — nexa.

**Jesus Irae Jerusalém Mawenekoaretyaka Tahī**

(Mateus 24.15-28; Marcos 13.14-23)

<sup>20</sup> Jesus nehitiya: — Maika xiyaiyehena Jerusalém exahiyatyoare sorarenai kakoare hoka waiyekehalaka xomana: Mawaheneta atyoite hoka kamawenekoaretyakehena. <sup>21</sup> Hatyo hiyeta maika xala xamani Judéia koa tyaonita hoka tekoahenaira tyairi koni xeta. Maika xala xamani wenakalati tyaonita hoka kikisoahetehena rotitaira enakoata. Maika xala xamani mase tyaonita hoka awa atyo haikoahetehena wenakalati. <sup>22</sup> Hiyaiya, hatyo xowaka atyoite judeunai nómane iniyalahare hiyeta kahenehare kaisere tyaona, hoka hatyo xowakaite tyotya Iraitī Waiyexe kax-

airatyakehenere irahenereharenai kaotyakehena. <sup>23</sup> Kaxiyani, hatyo xowakiya atyoite howitihare tyoahena tifalonai, xoimaisanironai xoaha ana! Hiyaiya, howitiharexe wenati atyoite kaotyaka waikohekoa, exahe Enore xomokala iniyalahare atyoite kaotyaka judeunai ana. <sup>24</sup> Kahare ite kaxaisakaha kesekase kakoa, exahe haiyaharenaita kakolatyaka alita eberexotyakeharenai akereta tyotya wenakalati kalokoarenai xeta. Exahe majudeuneharenaita tyaonaha Jerusalém nali, nalita kakikisakehetehenahere kijiya — nexa.

**Haliti Ityani Tyoaneneheta Tahī**

(Mateus 24.29-31; Marcos 13.24-27; 2 Tessonicensens 1.7; 2 Pedro 3.10; Apocalipse 1.7)

<sup>25</sup> — Xalini hare ite kaotyaka kamai, kaimare, xore-senai xoaha hiye. Hoka waikohekoaita tyotya haliti hotyalinaite mawaiyeharenaha kalore, hamairaneha one kaloxere, exahe one ainakoiyatyoitere nemahare hiyeta. <sup>26</sup> Hakakoare waikohekoaita kahare halitinaite mawaiyehareha kalore, hamairaneha, haxahekolaha xalinihare kaotyakene tahi xoaha hiyeta. Hiyaiya, enokoa nali kinatere tyaoniterenaita maiyaterehare tyaohitita. <sup>27</sup> Hatyaosetaite Haliti Ityanite kaotyakehetehena hoka exoahetehena kaiminiti konita, iyateliti, kalorexe xaokanatyakalati xoaha kakoa.

<sup>28</sup> — Hoka maika exeharenai kaotyakehena hoka maika heko xikinatere xisaona exahe maika xakenekakoahena. Xiyaiya, mawaheneta atyoite hoka xikaiyakehetehena — nexa Jesus.

**Jesus Halohalo Kate Hiye Aimenekotya**

(Mateus 24.32-35; Marcos 13.28-31)

<sup>29</sup> Hatyaoseta Jesus exakere aimenekotya enomana-ha: — Xasemehena, halohalo exahe hatyaterere atya kate tahi. <sup>30</sup> Xiyaiyehena atyo ehanahinai hikoaneheta hoka waiyekehalakita atyo xomana, okoi enonenehetehena. <sup>31</sup> Maika nikareta tehitiya exeharenai kaotyakene xiyaiyehena hoka waiyekehalakaira xomana Enore nalitare Kalorexe okoi haikoahetehenerehare — nexa.

<sup>32</sup> — Xotyaxematyaira exeharenai: exeharenaityaite kaotyaka kalikini kasetaterenai tyaonitereharenai makamaneharene nahitita. <sup>33</sup> Hoka enokoa, waikohe xoahanai tyaite maiyareheta, xakore hoka niraini tyatyoite tyaoneta mene — nexa Jesus.

**Kaxaikotyoati Tahī**

<sup>34</sup> Hoka Jesus halakihena hairaene hoka nehenahena: — Maika xikaxaikoawihena! Awa atyo hisehaliti, oloniti ahekakisare, exahe xawenane ali waikohekoare tahi taita xema xisaona. Hoka maisa hatyo ferakene ximaxatyahaneharetā kaotyakihitita xomana. <sup>35</sup> Hatyo ferakene ite kaotyakeheta tanolatyati akereta tyotyaha ana, hakakoare waikohekoa. <sup>36</sup> Hatyo hiyeta maika xikaxaikoawita, exahe xiraexata mene hoka xikaxaihare xisaona tyotya kaotyakehenerehare nonitata. Exahe heko xikinatere xisaona maheta Haliti Ityani nahalakoa — nexa.

<sup>37</sup> Jesus aotyakijita halitinai Iraexatyakalati Hanako ferakiti nihatyaka. Hoka makiya xanehitita Oliveiras tyairiya nali nemaka maheta. <sup>38</sup> Hoka tyotya halitinai xanahitaha makiyaseta Iraexatyakalati Hanako semaha maheta iniraene.

### Ahekotyaha Aisaha Maheta Jesus

(Mateus 26.1-5; Marcos 14.1-2; João 11.45-53)

**22** Maisa wahehetere Hisehaliti Nakairati Makaorehetyakahare nomaka xowaka Páscoa nexarexe naheta <sup>2</sup> hoka sacerdotenai xekohasenai, xaotyakiyaho kakoa waiyoreterenai xoaha ahekohenaha hametentaha haxaisaneha Jesus tahi, halitinai amairakisahitene hoka.

### Judas Matawahena Jesus

(Mateus 26.14-16; Marcos 14.10-11)

<sup>3</sup> Hatyaoseta Ahalakoahaliti kamilakoretya Judas Iscariotes nexarexe. Hatyo atyo 12-harenai exaotyakiraharenai konitare. <sup>4</sup> Hoka Judas xane irai sacerdotenai xekohasenai, Iraexatyakalati Hana kaxaikotyaseharenai kakoa, hamatawala Jesus enomanaha tahi. <sup>5</sup> Hoka kalore ihalahareha hoka olo isaha enomana aokowiha. <sup>6</sup> Hoka Judas tyakeko hoka kaxaikohena Jesus matawatya maheta halitinai masemakareneta.

### Jesus Nakairati Nomaka Aoka Páscoa Niyahare

(Mateus 26.17-25; Marcos 14.12-21; João 13.21-30)

<sup>7</sup> Hatyaoseta xane hikoa Hisehaliti Nakairati Makaorehetyakahare nomaka ferakene. Hatyo xowaka judeunai aisahitaha kalanero mokosenai hoka otyaxemahenahititaha Páscoa ferakene.

<sup>8</sup> Hatyo hiyeta Jesus axikatya Pedro, João xoaha hoka nexa ihiyeha: — Xiyane nakairati xisoma womana Páscoa niyahare — nexa.

<sup>9</sup> Hoka axahene: — Alyako wiyane wisoma hatyoharenai haokita? nexaha.

<sup>10</sup> Hoka Jesus nexa ihiyeha: — Xasemehena: xikaokenatyaita wenakalati hoka hatya haliti kolaitere tinihalitiri ako haonexa tyaita ahalakoatyaxiso. Hoka xiyanira hatyo haliti xema, hatyako isoahetehenere ako kijiya. <sup>11</sup> Hoka maika xexa hati xekohase hiye: “Xaotyakisatiye exakere waxa aokita, aliyeri akoite hatyo, exaotyakiraharenai xoaha kanakairehenaha Páscoa ferakene nahitita?” xexaite ihie. <sup>12</sup> Hoka hotikisaite xomana halyako kaloakore exomokakotyakahare, ehaore ako. Hoka hatyoakoite xisoma nakairati — nexa.

<sup>13</sup> Hoka xaneha wenakalati xeta hoka Jesus niraine akereta tyotya wiyaha. Hoka hatyo nali nakairati tyomaha Páscoa niyahare.

### Jesus Hakamane Aimenekoty Nakairati, Erati Kakoa

(Mateus 26.26-30; Marcos 14.22-26; 1 Coríntios 11.23-26)

<sup>14</sup> Enaose xane hikoa hoka Jesus tyoka mexa haliya haxaotyakiraharenai kakoa <sup>15</sup> hoka nehena ihiyeha: — Nokanakairi terota naokowi xikakoa exe nakairati kalikini Páscoa xowaka, nomakawatihalini nahitita.

<sup>16</sup> Hatyo hiyeta nomita: maisaiya xoana hekota nokanakairihitita exehare nakairati, nokanakairihenere aliterexe nakairati kaomakehenere Enore Nawenakala kijiya — nexa.

<sup>17</sup> Hatyaoseta Jesus iya erakakalati hoka iraexatya Enore hiye — Ehekore hamokita wiso, Abá — nexa. Hatyaoseta nexa haxaotyakiraharenai hiye: — Xotehena exe hoka xiserehenene ini xakini. <sup>18</sup> Aliterexe nomita xihie: maisaiya atyo xoana hekota exehare vinhoxa noterehitita, Enore nalitare Kalorexe kaoketehenenere kijiya — nexa.

<sup>19</sup> Hatyo najikinita iya nakairati hoka iraexatya Enore hiye. Hatyo najikinita taikasetene hoka irakene haxaotyakiraharenai ana hoka nehena: — Exe atyo noháre hoka kaxekakehenaite kahawaonitaretya xiso maheta. Exakerira xisoma xotyaxemaheta natyo maheta — nexa.

<sup>20</sup> Kanakairehenahere najikinita nikareta iyihitiya erakakalati hoka isehitiyene enomanaha teraha maheta hoka nexa: — Hiyaiya, exe atyo notimalaxi, kaxiratyakehenere kahare haliti wanahiya, kaxemaisatyakeheta maheta iniyalahare enómaneha. Exe timalati hiyeta atyo waitare wenati tyaheta halitinai ana Enore kakoa.

<sup>21</sup> — Hoka xasemehena! Matawatyatiye atyo ali tyokita nohakakoani ali mexa haliya. <sup>22</sup> Hiyaiya, Haliti Ityani atyoite wainihena, Enore aokitere akereta. Xakore hoka kirakoanite kaxomokaka Haliti Ityani matawatyasehare — nexa.

<sup>23</sup> Hatyaoseta exaotyakiraharenai hatyokakoaha makere axakakoahenaha, xala xamaniya nikare matawahenene.

### Xala Xamani Masákare Kalorexe Enekonitarefa

<sup>24</sup> Hatyaoseta exaotyakiraharenai kinatyaxa iraikakoaha, semaha maheta xala xamani enekonitarefa kalorexe kaiserehare hoka.

<sup>25</sup> Hoka Jesus nexa ihiyeha: — Kalorexenai ali waikohekoare atyo wakatita halitinai, exahe xekohasetinai atyo “Halitinai hinaeharenai” kaxaokakita. <sup>26</sup> Hoka xisoiya atyo maisa nikare xisaonita. Xakore hoka xinekoni kalorexe kaiserehare tyanonitere atyoite wakahare akereta tyahena, exahe wakatiterehare atyoite kawakatyakitere akereta tyahena. <sup>27</sup> Xala masakare kalorexe? Tyokitere mexa haliya kanakaira maheta, xoana etyaisasehare kore? Aliterexe atyo mexa haliya tyokitere kalorexe. Hoka xinekoni atyo natyo atyo tyajitere akereta notyaonita — nexa.

<sup>28</sup> — Hoka xiso atyo eko nohaliye xisaona nomakawatihalininai xowaka. <sup>29</sup> Hatyo hiyeta Baba kalorexe mohenerere natyo akeretaite natyo tehitiaite nikareta namoka xiso. <sup>30</sup> Xisonaite xikanakaira, xisera nawenakali nali, exahe xisokaite okahakalatikoa hoka 12-hotyalinai Israel hotyalinai xekohasenai xisaona — nexa.

**Jesus Irae Pedro Kakoa**

(Mateus 26.31-35; Marcos 14.27-31; João 13.36-38)

<sup>31</sup> Jesus nehitiya: — Simão, Simão, hasemehena waiye: Ahalakoahaliti atyo koxaka kahalakisaka hasakaharetya xiso maheta. Xoisaita xiso, masene no-masehare trigose haware mokitere ekase nonitata ak-ereta. <sup>32</sup> Xakore hoka niraexaita atyo hitahi, Simão, maisa hityakekone hahalakijita maheta. Hoka hisao-hetehitiyere nokoamaniye xowaka haihalahalinikisa maheta hihinaeharenai — nexa ihiye.

<sup>33</sup> Hoka Pedro nexa ihiye: — Nomimiye atyo notyaonita nokaberexotyaki, exahe nowaini maheta hihakakoane! nexa.

<sup>34</sup> Hoka Jesus nexa: — Natyo atyo nomita hihiyeha: awi-saita, takoirira makawiraharene nahitaitaite hanamakite himawaiyanenehare haoka natyo — nexa.

**Jesus Irae Haxaotyakiraharenai Kakoa**

<sup>35</sup> Hatyo najikinita Jesus axahena: — Xoana maisa xoare hare xaokita naxikahenere xiso ximabosane-hare, ximasakolanehare, ximakijitinihare xowaka? nexa.

— Maisa xoare waokita — nexaha.

<sup>36</sup> Hatyaoseta Jesus nexa: — Hoka kalikini xala xamani atyo kabosanexe, kasakolanexe hoka maika iye-hetehene. Exahe xala xamani maisa kakeserakasexe hoka maika betehena haimanase hoka iya haeho.

<sup>37</sup> Hiyaiya, Iraiti Waiyexe kaxairatyakehenere atyo nexa: “Xalijiniharexe akereta kaxomokaka”, nexa. Hoka natyo atyo nomita xihiyeha: nikare terotaitaite nokax-omokaki. Hiyaiya, xoare xamani atyoite xairatyoare tyaonita notahi hoka nikare ite nokaxomokaki — nexa.

<sup>38</sup> Hatyaoseta exaotyakiraharenaisa nexaha: — Xeko-haseti, owene hinamaeho kesekase — nexaha.

Hoka: — Ehekore — nexa Jesus ihiyeha.

**Jesus Xane Oliveiras Tyairiya Nali**

(Mateus 26.36-46; Marcos 14.32-42)

<sup>39</sup> Hatyaoseta Jesus xane, hawenane akereta, Oliveiras tyairiya xeta hoka exaotyakiraharenai xaneha exema.

<sup>40</sup> Xane kaoka aokiteraose hoka Jesus nexa: — Xiraex-ahena maisa xikamaoseratyakita maheta — nexa ihiyeha.

<sup>41</sup> Hatyaoseta kikisoa sekose aka enonyahitaha, kala xoana xamani hoka 30-metrone hare. Meholoa hakaolise kakoa hoka iraexahena, <sup>42</sup> hoka nexa: — Abá! haokaiya hoka hemaisaheta noniti exe er-akakalati emakawatikisare. Xakore hoka maisaiya atyo naokiterehare kaomakita hoka maika haokiterehare kaomaka — nexa.

<sup>43</sup> Hatyaoseta anjo enokoatare exoa enomana, aihalalinikisene maheta.

<sup>44</sup> Kalore amaikohareta hoka Jesus masakare aiy-ateretyoa iraexaita. Hoka ewatehirini xata motya timalati tohira ixoita waikoa.

<sup>45</sup> Iraexahenere najikinita tityoaheta, haikoaheta haxaotyakiraharenai tyaonitere nali hoka nemakitaha waiyehenahitene, kalore amaikoharahitaha hoka.

<sup>46</sup> Hoka nexa: — Xoanere hoka xisemakita? Xatityoa-hetehena exahe xiraexahena maisa xikamaoseratyaki-ta maheta — nexa.

**Jesus Berexotyaka Tahí**

(Mateus 26.47-56; Marcos 14.43-52; João 18.3-11)

<sup>47</sup> Jesus iraetata hoka kaokhehena kahare halitinai. Judas, 12-hare exaotyakiraharenai konitare, tyoita hatyo halitinai kakoa, hoka xane kaoka Jesus haliya sohi-tanakolisene maheta.

<sup>48</sup> Xakore hoka Jesus nexa ihiye: — Judas, xoana hiso-hitanakolira kakoaite hamatawahena Haliti Ityani? nexa.

<sup>49</sup> Hatyaoseta exaotyakiraharenai Jesus haliya tyaoniterenai ana waiyekehalaka hoka nexaha: — Xekohaseti, wiyehenaite wikaserakasenai hoka wijiye-hena enomanaha? nexaha. <sup>50</sup> Hoka hatya enekoni-hatareha mokoty kesekase kakoa sacerdotenai xeko-hasehare wakanehare hoka itinihe aikoty, ifihini maniya.

<sup>51</sup> Hoka Jesus watyalini: — Hahalakihenene! nexa. Hatyaoseta itinihe hiye ekaokakisa hakahe hoka awaiyehetene.

<sup>52</sup> Hatyaoseta Jesus nehena sacerdotenai xekohase-nai hiye, Iraexatyakalati Hana kaxaikotyaseharenai, judeunai nityohalitiranai xoaha tyohenerenai exo-tokase maheta hiye. — Xoana hoka xisoa nomani kesekase atyalihose harenai kakoa xotoka maheta natyo xalijiniharexe akereta? <sup>53</sup> Ferakiti nihatyaka notyaonita xikakoa Iraexatyakalati Hanako, xakore hoka maisa atyo xotokare natyo. Hoka kalikini terota atyo nikare xiyomokala natyo, exahe makaliroti niyatere xoaha hiyeta tehitiya — nexa.

**Pedro Hamawaiyanenehare Aoka Jesus**

(Mateus 26.69-75; Marcos 14.66-72; João 18.15-18, 25-27)

<sup>54</sup> Hatyaoseta Jesus otokaha hoka xaneha ekakoa sacerdotenai xekohase hana xeta. Hoka Pedro sekose-ta xaneta exema. <sup>55</sup> Hatyaoseta xane kaokaha hoka air-ihityaha wetekokoa hoka Pedro xane tyoka, hatyo tyokalyaosetiterenai haliya.

<sup>56</sup> Hoka hatya wakahalo waiyene tyokita nali irikati haliya hoka waiye wahakoty enomana hoka nexa: — Exe haliti tehitiya ene Jesus haliya tyaonita — nexa.

<sup>57</sup> Hoka Pedro teraharetyoahena hoka nexa: — Ohiro, maisa atyo nowaiyanihare xini! nexa.

<sup>58</sup> Hatyohekota mawahaneta, hatya haliti waiyehi-tiyene nalita hoka nehitiya ihiye: — Hiso tehitiya atyo enekonitareha — nexa.

Hoka Pedro nehitiya: — Maisa atyo enekonihatareha xini natyo — nexa.

<sup>59</sup> Hatyaoseta kala wahasehena hoka hatya aiyatere-tyoa exahita: — Aliterexe atyo hisaonita ene ehaliya. Hiyaiya, Galiléia koa yere tehitiya atyo hiso — nexa.

<sup>60</sup> Xakore hoka Pedro nexa: — Maisa atyo waiyekeha-lakere nomani hatyo hiraitere! nexa.

Hatyo xowaka, iracetata ene hoka takoira kawisa. <sup>61</sup> Hatyaoseta Xekohaseti ehaikoahare hoka kinatya wahakotya Pedro ana. Hoka oteheta Xekohaseti iraitere ekakoa: “Awisaite, takoira makawiraharene nahitaitaite hanamakite himawaiyanenehare haoka natyo”, nehenere. <sup>62</sup> Hatyaoseta Pedro hikoaheta nalita hoka tiya, kalore amaikohare hoka.

### Sorarenai Mokonasetyaha Jesus

(Mateus 26.67-68; Marcos 14.65)

<sup>63</sup> Hatyaoseta halitinai Jesus kaxaikoterenai koexahal-ihenahene, mokohenahene xoaha. <sup>64</sup> Talatyaha exose-naiha hoka nexahitaha ihiye: — Hotehena, xalatya mokotya hiso! nexahitaha. <sup>65</sup> Hoka kahare xoalini hare iraihitaha ekakoa, kahare watoxaharetyahene.

### Jesus Nolakaha Xekohasetinai Nahalakoa

(Mateus 26.59-66; Marcos 14.55-64; João 18.19-24)

<sup>66</sup> Ferakoa ihiyeha hoka judeunai nityohalitiranai, sacerdotenai xekohasenai, Xaotyakiyaho kakoa waiyoreterenai xoaha ahohisakoatyakakoa. Hatyo najikinaita Jesus nolokaha aokaha xekohasetinai ana.

<sup>67</sup> Hatyaoseta axehenahene: — Hiyakaihena wihiye: xoana, Enore Kalorexe Aohenere hiso? nexaha.

Hoka nehena ihiyeha: — Exahiya atyo, “Há, natyo”, nomi xihyeha hoka maisaiya atyo xityakekota natyo.

<sup>68</sup> Exahiya naxa xiso hoka maisaiya xekoaxaita nomani.

<sup>69</sup> Hoka kalikinaita atyoite Haliti Ityani xane tyokehena Enore maxaexahityakahare niyaterexere fihini maniya — nexa Jesus.

<sup>70</sup> Hatyaoseta tyotyaha axahene: — Hoka xoana, Enore Ityani hiso? nexaha.

— Xiso atyo nikare xiraeta — nexa Jesus ihiyeha.

<sup>71</sup> Hoka tyotyaha nexaha: — Maisaiya xoare maheta waxehitita etahi! Hiyaiya, wisota atyo wasema ini-raene! nexaha.

### Jesus Kolatyaha Pilatos Ana

(Mateus 27.1-2, 11-14; Marcos 15.1-5; João 18.28-38)

**23** Hatyaoseta tyotyaha tityoahenahitaha hoka xaneha Jesus kakoa Pilatos nali.

<sup>2</sup> Nali iraharehenahene hoka nexaha: — Wotoka exe haliti, mawaiye nawenanetita wihinaeharenai hoka. Exahe olo maxekakene aokita Kalorexe Roma yere ana. Exahe Enore Kalorexe Aohenere tehitiya aokowita, xekohaseti atyo — nexaha.

<sup>3</sup> Hatyaoseta Pilatos axa Jesus: — Xoana, judeunai xekohase hiso? nexa.

— Hiso atyo nikare hiraeta — nexa Jesus ihiye.

<sup>4</sup> Hatyaoseta Pilatos nehena sacerdotenai xekohaseharenai, exahe tyotyaha halitinae xoaha hiye: — Maisaiya xoare xemere exe haliti kaxaisaka naokita — nexa.

<sup>5</sup> Xakore hoka exaehare aiyateretyoaha exahita: — Exe atyo mawaiye nawenanetita Judéia koa tyaonitere-nai. Galiléia koa hotohare nikare tyaona hoka kalikini ali kaoka — nexaha.

### Jesus Axikatyaha Herodes Ana

<sup>6</sup> Hatyoharenai sema Pilatos hoka axahene: — Xoana exe haliti Galiléia koa tare? nexa.

<sup>7</sup> Sema, Jesus atyo Herodes kaxaikotere nalitare hoka Pilatos axikatene enomana, Herodes hatyo xowaka tehitiya nali Jerusalém tyaonita hoka.

<sup>8</sup> Herodes waiya Jesus hoka ihalahare, semita etahi hoka toahiyita waiyene aokowita. Kasani waiya aokowita xoalini hare metaharexe maomakahare waiyexe enómane. <sup>9</sup> Hatyo hiyeta axehekoatya Jesus, xakore hoka maisa ekoaxaita enomana.

<sup>10</sup> Hatyaoseta sacerdotenai xekohasenai, Xaotyakiyaho kakoa waiyoreterenai xoaha tityoaha hoka iraharetyaha kahare Jesus. <sup>11</sup> Herodes tehitiya hasorarex-anai kakoa koexahalisa Jesus, maisa aiminisahitene. Hatyaoseta mokaha ihiye imiti nase waiyeharexe hoka axikahenahitene Pilatos ana. <sup>12</sup> Herodes, Pilatos xoaha, hatyo nahitita hamahinaeharene aokakakoahitere, hatyo ferakene hahinaehare aokakakoaha.

### Jesus Kahalakisaka Kaxaisaka Maheta

(Mateus 27.15-26; Marcos 15.6-15; João 18.38-19.16)

<sup>13</sup> Hatyaoseta Pilatos ahohisakoatya sacerdotenai xekohaseharenai, judeunai nityohalitiranai, halitinai xoaha <sup>14</sup> hoka nexa ihiyeha: — Xiso atyo xakolatya exe haliti nomani, xihinaeharenai mawaiye nawenanitita xaoka hoka. Xakore hoka xityotyaha xihaotita naxehekoatene hoka maisa xoare harenai nasemita etahi hatyo xiraharetiterenenai akiti. <sup>15</sup> Exahe Herodes tehitiya maisa xoare hare iniyalahare semita. Hatyo hiyeta axikahetehitiyene womana. Nikare hoka aliterexere atyo exe haliti maisa xoare hare tyomita hoka mahaiya aliyakere kaxaisakita. <sup>16</sup> Kala emokonasetyaka naoka. Hatyo najikinaitaite nahalakisene hoka xaneheta — nexa. <sup>17</sup> Páscoa xowakehena hoka Pilatos aihikoahitita hatya berexoakota halitinai xaxane ximita hoka nikare irae.

<sup>18</sup> Hatyaoseta tyotyaha halitinai kawiyahenaha: — Barrabás haihikoahetehena womana hoka hatyo haliti xaisaka haohena — nexaha. <sup>19</sup> Barrabás hatyo xowaka kaberekyotyaka mawaiye nawenanititere wena-kalatikoarenai exahe katawanetere xoaha hiyeta.

<sup>20</sup> Hatyaoseta Pilatos, kasani halakiheta aokowita Jesus hoka iraihitia halitinai kakoa, <sup>21</sup> xakore hoka exaehare kawiyatyaha: — Haberekohenene atyalihose xaimaholatyaka hiye! Haberekohenene atyalihose xaimaholatyaka hiye! nexaha.

<sup>22</sup> Hoka Pilatos nehitiya ehanamakinihena hiye: — Hoka xoare iniyalahare tyoma? Maisa xoare enómane iniyalahare nowaiyita hoka mahaiya exaisaka naokita! Emokonasetyakaite naoka hoka hatyo najikinaitaite nahalakihetene — nexa.

<sup>23</sup> Xakore hoka heko kinatyaxa kawiyatyaha, kasani Jesus kaberekyotyaka atyalihose xaimaholatyaka hiye aokahitaha. Hoka ekawiyalaha jiyahaotene.

<sup>24</sup> Hatyaoseta Jesus kamane aoka Pilatos axahitere ak-ereta. <sup>25</sup> Exahe aihikoaheta enomanaha haliti

aokahitere, etake kaberekyakehenere mawaiye nawenanititere exahe katawanakaitere xoaha hiyeta. Hoka halakisa Jesus enomanaha hoka aokahitere akere ta mokahene maheta.

### Jesus Berekotyaka Atyalihose Xaimaholatyaka Hiye Tah

(Mateus 27.32-44; Marcos 15.21-32; João 19.17-27)

<sup>26</sup> Hatyaoseta sorarenai xaneha Jesus kakoa. Hoka ahotyaho ahalakoatyaha hatya haliti, Simão nexarexe, wenakalati Cirene yere, maseta ene tyohitita. Hoka otokaha Simão hoka atyalihose xaimaholatyaka kolatyaka aokaha ihiye hoka Jesus xema xane aokaha.

<sup>27</sup> Kahare halitinai xanetaha exema. Enekonihai haiyahalonalai ohironai tiyahitaha, amaikohaloahitaha ekawa.

<sup>28</sup> Hoka Jesus ehaikoahare enomanaha hoka nexa: — Ohironai, Jerusalém yolonalai! Awa atyo xitiya nokawi, xakore hoka maika xikawa exahe xityaninai kawa xitiyahena! <sup>29</sup> Hiyaiya, haxowaka ferakenehenaite hoka tyotyahaite nexaha: “Waiye kaiserehare atyo ohironai maisanihalonalai ana, exahe xoima maxawenakirahalonalai ana, exahe xoimanai maxaokokirahalonalai ana!” <sup>30</sup> Haxowakaite tyotyahaite nexaha tyairinasenai hiye:

“xoahena wiheno hoka xateroakisa wiso!”

Exahe nexaha tehitiyaite tyairinai hiye:

“xoahena wiheno hoka xaxaihonoty wiso!”

nexahaite. <sup>31</sup> Hiyaiya, nikareya kaxomokakita mowisati eholitaha hoka xoanaite kaxomokakehena nirehena hoka? nexa.

<sup>32</sup> Xaneha tehitiya hinamahare xalijiniharexenai kakoa, kaxaisakaha maheta Jesus hakakoane. <sup>33</sup> Xane kaokaha ekakoaha “Seriti Nahe” aokahitere nali hoka berekotyaha Jesus atyalihose xaimaholatyaka hiye, exahe ehaliya hoka hinamahare xalijiniharexenai berekotyaha atyalihose xaimaholatyakanai hiye. Hahare ifihini maniya, hahare ewatone maniya xoaha.

<sup>34</sup> Hatyaoseta Jesus nehena: — Abá, maika exe halitinai nómane iniyalahare hemaotyaneheta, maisa atyo waiyorexe háomaneha kakoa — nexa.

Hatyo najikinita sorarenai hasakaharetyakakoaha hoka Jesus nima irakakakoaha hatyokakoaha.

<sup>35</sup> Hoka halitinai nali tyaonahitaha hoka wahakotyahitaha. Hatyo nase judeunai nityohalitiranai koexahaxatyahitaha Jesus kakoa hoka nexahitaha: — Haiyanai atyo iyehitita. Hoka maika hatyota iyoawiheta, aliterexe atyo Enore Kalorexe Aohenere hoka! nexahitaha.

<sup>36</sup> Sorarenai tehitiya koexahaxatyaha ekakoa. Kaokaha Jesus haliya hoka isehenaha vinhoxa ewaxirahare enomana <sup>37</sup> hoka nexahitaha: — Aliterexe atyo judeunai xekohase hiso hoka hisota hiyoawihetehena! nexahitaha.

<sup>38</sup> Taba taose hiye, ehao maniya, xairatyoare tyaonita exakerexe:

EXE ATYO JUDEUNAI XEKOHASE

<sup>39</sup> Hatya nali xalijiniharexe kaberekotyakehenere aiyalatya enomana hoka nehena: — Xoana, maisa hiso

xini Enore Kalorexe Aohenere? Hoka hiyoawihetehena hisota hoka hiyeheta tehitiya wiso — nexa.

<sup>40</sup> Hoka hatya watyalihenene hoka nexa: — Xoana, maisa himairare Enore? Wityoty atyo hakakoa wikaxomokakita. <sup>41</sup> Iniyalahare wiyomokaka atyo kaxemerexe, hiyaiya, iniyalahare atyo wikaxomokakita wománenai hiyeta. Hoka hatyo atyo maisa xoare iniyalahare tyomare — nexa.

<sup>42</sup> Hatyaoseta nexa Jesus hiye: — Jesus, hotehetaira natyo, hisohetehene Kalorexe hisaona maheta xowaka — nexa.

<sup>43</sup> Hoka Jesus nexa ihiye: — Aliterexe atyo nomita hihiye, awijita atyoite hisaona nohaliye wenakalati waiyexe nali — nexa.

### Jesus Waini

(Mateus 27.45-56; Marcos 15.33-41; João 19.28-30)

<sup>44</sup> Hatyaoseta kala totahikoahena hare hoka kamai maxaokanala hoka tyoty waikohekoa makaliro tyaona makakoahena kijiya. <sup>45</sup> Hoka Iraexatyakalati Hanako imiti taose tyaonitere nekese taose halalakoa.

<sup>46</sup> Hatyaoseta Jesus kawiyaty kinatyaxa: — Abá, hikahekoa nahalakisa nisekohare — nexa. Nikare irahenehene najikinita waini.

<sup>47</sup> Hatyaoseta Roma yerenai sorare xekohasehare waiya hatyoharenai hoka tyakeko Enore hoka nexa: — Aliterexe atyo exe haliti maisa iniyalahare nomasehare xini — nexa.

<sup>48</sup> Tyoty nali hohisakoahenerenai waiyaha maheta nikare kaxomokakehenere waiyaha hatyoharenai hoka haikoahenahitaha hahanaha xeta haxamaikohareneha, exahe hatikolalinaihi hiye hamokolaha kakoa.

<sup>49</sup> Tyoty Jesus hinaeharenai, exahe ohironai Galiléia ta tyohenolonai exema xoahanai, sekota tyaonahitaha hoka wahakotyahitaha tyoty hatyoharenai ana.

### Jesus Xafityaka Tah

(Mateus 27.57-61; Marcos 15.42-47; João 19.38-42)

<sup>50</sup> Hoka nali tyaonita hatya haliti, José nexarexe, wenakalati Arimatéia yere, Judéia koa nali. Hatyo atyo waiyexeharexe, aiminisare, exahe atyahita Enore nalitare Kalorexe xahita. <sup>51</sup> Xekohasetinai konitare xakore hoka maisa haiyanae kalorexenai niraekakoane, exahe tyomehenahere ehokoreta enomana. <sup>52</sup> Hoka José xane Pilatos ana axa maheta Jesus háre. <sup>53</sup> Hatyaoseta iyeheta eháre atyalihose xaimaholatyaka hiyeta hoka olahisetene imiti kесе taosero kakoa. Hatyaoseta mokene xawatyakalati kasekakotyakehenere tyairi hiye ako. Maisa xala hare hatyoako kaxomokakehenere.

<sup>54</sup> Exowaka sexta-feira, okoi sábadohena.

<sup>55</sup> Ohironai Galiléia ta xanehenolonai Jesus xema xaneha José xema hoka waiyaha xawatyakalati, exahe Jesus xomokaka xoaha. <sup>56</sup> Hatyaoseta haikoahenahitaha hahanaha nali xeta hoka tyomaha airaxeronai eháre niyahare maheta. Hoka sábadu xowaka kawiniha Xaotyakiyaho aokitere akereta.

### Jesus Kásehetehehere Tahī

(Mateus 28.1-10; Marcos 16.1-8; João 20.1-10)

**24** Domingo xowaka witita, ohironai xane xawatyakalati xeta hoka tyomehenahere airaxeronai kolatyaha. <sup>2</sup> Hoka waiyehenaha atyo, xawatyakalati xisoakalahore sehali taose atyo koxaka kaiyakeheta. <sup>3</sup> Hoka isoaha xakore, hoka maisa waiyehenahititaha Xekohaseti Jesus háre <sup>4</sup> hoka maisa aliyakere ahekotya xaka mokahene. Hoka eharehena rotita enahalakoaha kaotyaka hinamahare halitinai imiti werokatexe akorenai. <sup>5</sup> Hoka kalore mairaha hoka meholokoaha hoka talatihotyoha. Hatyaoseta nexaha: — Xoana hoka kaminai tyaonitere aose xatawita kasetatere? <sup>6</sup> Maisa atyo aliyakeheta, koxaka kaseheta hoka. Xotyaxemahenaore iniraine xikakoa, Galiléia nalitaterere xowaka. <sup>7</sup> “Haliti Ityani atyoite kahalakisakenhena terota iniyalahare nomaseharenai ana. Kaberekotyakehena terota atyoite atyalihose xaimaholatyaka hiye hoka kasehetaite hanamaki ferakene najikinita”, nehenere — nexaha.

<sup>8</sup> Hatyaoseta ohironai otehetaha iniraine <sup>9</sup> hoka haikoahenahitaha xawatyakalatita hoka hatyoharenai xakaiha 11-hare exaotyakiraharenai hiye, exahe tyotya haiyaharenai hiye.

<sup>10</sup> Exehalonai nikareta: Maria Madalena, Joana, Tiago nityo Maria xoaha. Hatyonai, haiyahalonai ohironai xanehenolonai xoaha xakaiha tyotya hatyoharenai exaotyakiraharenai hiye.

<sup>11</sup> Xakore hoka motya ohironae maoseraita aokahitaha hoka maisa tyakekoahitaha. <sup>12</sup> Hoka Pedro tityoaheta tema xane xawatyakalati xeta. Meholoko waiyakotya maheta, xakore hoka maisa xoare waiyita, imiti kese taosero mohenahere taita, maisa xoare hitiya aka. Hatyaoseta haikoaheta hahana xeta hoka hakaharetyoa hatyoharenai kakoa.

### Wenakalati Emaús Naho Jesus Kaotyakeheta

(Marcos 16.12-13)

<sup>13</sup> Hatyo ferakeneta hinamahare enekonihatareha xanetaha wenakalati Emaús xeta. Jerusalém nalita kala 10-kilometro hatyo wenakalati. <sup>14</sup> Iraisahotyahitaha tyotya hatyoharenai kawenatyakehenere tahi.

<sup>15</sup> Iraisahotyahitaha, axakakoahitaha harenai ene hoka Jesus terota kaoka ehaliyaha hoka tonehena exemaha. <sup>16</sup> Exaotyakiraharenai waiyene, xakore hoka exosenaiha motya jhotyoare tyaonita hoka maisa waiyekehalakaharehitita enomanaha.

<sup>17</sup> Hoka Jesus axahene: — Xoare xexa xiraisahotita ahotyaho? nexa.

Hatyaoseta tityoaha haxamaikohareneha kakoa, <sup>18</sup> hoka hatya, Cleopas nexarexe, nexa: — Xoana, hiwawala hiso Jerusalém nali tyaonitere maisa hasemita kafaka kaotyakehenere tahi? nexa.

<sup>19</sup> — Xoare tahi? nexa axa.

— Jesus Nazaré yere tahi — nexaha. — Hatyo haliti ene iraiti xakaisasehare, exahe Enore hoka tyakekotene, exahe

tyotya halitinai hoka. Exahe haliti kinaterexe aokahitene enawenane, iniraene hiyeta. <sup>20</sup> Hoka sacerdotenai xekohasenai, winityohalitanai xoaha isahene Roma yerenai ana kaxaisaka maheta hoka so-rarenae berekotyahene atyalihose xaimaholatyaka hiye. <sup>21</sup> Motya atyoite wiyahakola hiye hoka hatyo iye-hetehehena Israel hotyalinai waokita. Hoka kalikini kakoita hanamakihena wisaonita hatyoharenai najikinita.

<sup>22</sup> — Hoka haiyahalonai ohironai winekonitarenai ahakaharetyoakisaha wiso. Xaneha makiyaseti xawatyakalati nali <sup>23</sup> hoka maisa waiyehenahititaha eháre. Haikoahenahitaha hoka xakaiha wihiye. Waiyaha anjonai hoka Jesus atyo kaseti aokaha ihiyeha. <sup>24</sup> Hatyaoseta haiyaharenai winekonitarenai xaneha xawatyakalati xeta hoka waiyaha ohironai xakaitere akereta hoka maisa atyo Jesus waiyehenahititaha — nexa.

<sup>25</sup> Hatyaoseta Jesus nehetehehena ihiyeha: — Xoana hoka howitihare waiyekehalakita xomana? Xoana hoka maisa xityakekota tyotya iraiti xakaisaseharenai irahenerehare? <sup>26</sup> Xiyaiya, nikare terota atyo Enore Kalorexe Aohenere xomokaka iniyalahare hoka hatyo hiyeta Enore isa maheta enomana kalorexe iyateliti — nexa.

<sup>27</sup> Hatyaoseta awaiyekehalakaty enomanaha tyotya Iraitī Waiyexe nanekoa iraitere etahi akiti. Moisés xairala tahi hotohare, exahe tyotya iraiti xakaisaseharenai xairala harenai.

<sup>28</sup> Xane kaokehenaha wenakalati xanahitere haliya hoka Jesus motya exaihakoha xeta xanetere akereta tyaona. <sup>29</sup> Hoka tihityoaha ihiye, hekota maheta ekakoaha hoka nexaha: — Alita hiso wihaliya. Hiyaiya, makakoahena, makehena — nexaha.

Hatyaoseta Jesus isoa exemaha. <sup>30</sup> Tyoka ekakoaha mexa haliya hoka iya nakairati hoka iraexatya Enore hiye. Hatyaoseta taikasetya nakairati hoka irakene enomanaha. <sup>31</sup> Hatyaoseta exosenaiha motya majiholatyoahetehehena ene hoka waiyekehalakahareheta Jesus enomanaha, xakore hoka maiyareheta enonyahitaha.

<sup>32</sup> Hatyaoseta hatya nexa hahinaehere hiye: — Motya wimahiyasenai kirita ene wimawinini ako ahotyaho iraitere, exahe awaiyekehalakaitere womana Iraitī Waiyexe nanekoa tahi xowaka — nexa.

<sup>33</sup> Hatyaoseta tityoahenahitaha hoka haikoahenahitaha Jerusalém xeta. Nali waiyehenahitaha 11-harenai exaotyakiraharenai, hohisakoahitaha haiyaharenai kakoa.

<sup>34</sup> Hoka hatyonai nexaha: — Aliterexe nika Xekohaseti kaseheta! Simão waiyeheta Xekohaseti! nexaha.

<sup>35</sup> Hatyaoseta hatyo hinamaharenai xakaiha waiyehenahere ahotyahore, exahe waiyekehalakaharehetehehene Xekohaseti enomanaha, nakairati irahetehehene enomanaha xowakere xoaha tahi.

**Jesus Kaotyakeheta Haxaotyakiraharenai Ana**  
(Mateus 28.16-20; Marcos 16.14-18; João 20.19-23; Atos 1.3-8)

<sup>36</sup> Hekotata xakaihakatyahitaha ene hatyoharenai tahi hoka Jesus ehárehena rotita kaotyakeheta enenekeseneha hoka nehena: — Kasani ximehexaikohare xisaona naokita — nexa.

<sup>37</sup> Hoka mawaiyehareha, kalore mairaha, motya isekohalititere aokahitene hoka.

<sup>38</sup> Hoka nexa: — Xoana hoka ximawaiyehareta? Xoana hoka kahare xoalini hare xahekoita? <sup>39</sup> Xiyaiyehena nokahenai exahe nokijina ana hoka natyo terotaita xiyaiyehetehena. Xotokoahena nohiye hoka xityakekohena. Hiyaiya, isekohaliti atyo maisa káhexe, káetexe xini natyo akereta — nexa.

<sup>40</sup> Nexa hoka hotikisa hakahenai, hakijina enomana-ha. <sup>41</sup> Xakore hoka maisa terota tyakekoreha, kalore ihalaharahitaha exahe hakaretyoahitaha xoaha hoka.

Hatyaoseta Jesus axahene: — Xoana ali xoalini hare kanakairatyakere? nexa.

<sup>42</sup> Hoka isaha enomana kohase jihatya halakoase, maha nolone xoaha <sup>43</sup> hoka otokene, exahe kanakairene ehaotyahitaha.

<sup>44</sup> Hatyaoseta nexa: — Notyaonitaterere xikakoa xowakaira noxakaitaira tyotya kaotyakehenerehare notahi kaxairatyakehenere Moisés Xaotyakiraho nanekoare, iraiti xakaisaseharenai xairala nanekoare, salmos nanekoare xoaha tahika — nexa.

<sup>45</sup> Hatyaoseta awaiyolikisahene waiyoreha maheta Iraití Waiyexe xairatyoare tyaonitere kakoa <sup>46</sup> hoka nexa ihiyeha: — Exakere atyo nita kaxairatyakehenere: Enore Kalorexe Aohenere atyoite kaxemakawatikisaka hoka hanamaki ferakene najikinita atyo ekaseneheta terota. <sup>47</sup> Hoka enexare hiyeta kaxakaisaka iraiti maheta tyotya haliti hotyalina hiye, kahalakisaka exahe kamaotyanyakeheta maheta iniyalahare enómanenai. Hatyoharenaite Jerusalém nali hotohare kaxakaisaka.

<sup>48</sup> — Xiso atyo xiyaiya tyotya nikare nokaxomokakihenerenai. <sup>49</sup> Hoka natyota atyoite naxikahena xomana Baba isa aokowiterehare. Xakore hoka maika xatyaha ali wenakalatita, iyateliti enokoata kaokehene xomana kijija — nexa.

### **Jesus Kakolatyaka Enokoa Xeta**

(Marcos 16.19-20; Atos 1.9-11)

<sup>50</sup> Hatyaoseta Jesus nolokahene haware wenakalati nonitata hoka xane ekakoaha wenakalati Betânia nali. Hatyo nali hakahenai ehaoha moka hoka waiyexe wenati aoka enomanaha. <sup>51</sup> Waiyexe wenati aokitata enomanaha hoka Jesus kikisoahena enonyahitaha hoka kakolatyaka eno xeta.

<sup>52</sup> Hatyohekota awaiyityahene. Hatyaoseta haikohenahitaha Jerusalém xeta haihalahareneha kakoa. <sup>53</sup> Hatyota Iraexatyakalati Hanako tyaonahitaha mene, ihalaharahitaha Enore kakoa xoaha.

# João

## Iraeti Exahe Wenati Tahī

(Colossenses 2.9-10; Hebreus 1.1-2; 1 João 1.1; 5.20)

**1** Hetati waikohe maomakahare xowakiya, koxaka terota Iraiti tyaonita. (“Iraiti”, nita, Jesus xaokaka nikare iraeta.) Enore nali atyo Iraiti tyaonita, Enore atyo hatyo Iraiti. **2** Hetati xowakiya atyo Enore nali terota atyo Iraiti tyaonita. **3** Hatyo Iraiti hiyeta Enore tyoma enokoa waikohekoa, exahe tyotya xooliniharenai hoka. Ekoiya awa hatyo Iraiti hoka maisaiya xoare harenai kaomakita.

**4** Hatyo Iraiti atyo waiyexe wenati kakoare hoka xaokanatyakalati akereta tyaona halitinai ana.

**5** Xaokanatyakalati aokanaita makaliroti koni hoka makalirotiya maisa aliyakere ewakaitene. (“Xaokanatyakalati”, nita tehitiya Jesus xaokaka. “Makaliroti”, nita xoolini hare iniyalahare xaokaka.)

**6** Enore axikatya João nexarexe **7** xakai maheta hatyo xaokanatyakalati tahi akiti halitinai hiye. João xakai halitinai hiye hoka tyotyaha sema xaokanatyakalati tahi akiti, exahe tyakekoha maheta. **8** João atyo maisa hatyo xaokanatyakalati xini xakore atyo hoka tyoa irae halitinae kakoa, xakai hatyo xaokanatyakalati akiti ihiyeha.

**9** Hatyo xaokanatyakalati atyo aliterexe, aokanaita tyotyaha halitinai ana. Hikoa halitinai koni hoka aokanaita enomanaha.

**10** Hatyo Iraiti hiyeta Enore tyoma enokoa waikoa tyotyaha xoolini harenai. Hatyaoseta Iraiti tyaona halitinai koni xakore hoka maisa waiyekehalakita halitinai ana.

**11** Tyaona hahinaeharenai judeunai koni xakore hoka maisa judeunai aokitene haomanaha. **12** Hoka haiyanai atyo tyakekone hoka haomanaha aokene. Tyakekone hoka hatyo hiyeta Enore haisaninai aokahene.

**13** Tyakekoha hoka Enore ityaninai tyaonaha. Xakore hoka maisa atyo xoima kakaisanisakitere akerexe xini Enore ityaninai tyaonaha, exahe maisa haliti xaokalaoseta xini nikare tyaonaha. Enore xaokalita ityaninai tyaonaha.

**14** Hatyo Iraiti atyo haliti kyawa hoka tyaona winekoni. Waiye wiyaiyene, kalorexe terota. Haliti awaitita kaisere, iraiti aliterexe taita iraeta. Enore Ityani haterore atyo hoka nikare kalorexe tyaonita.

**15** João atyo irae etahi akiti naliyerenai hiye: — Koxaka niraeta xikakoa hatyo akiti. “Maikaite najikinita tyohena noxahehare. Koxaka xakore atyo tyaonita terota nahitita nomawenaniharetatere xowakiya”, nomi xihiye. Hoka hatyo atyo kalini kaoka — nexa João irai.

**16** Kalore awaiyetya wiso hoka kahare xoolini hare waiyexe axikatya womana, fera hatyoharenai ijita womana. Hatyo hiyeta wawenane waiye tyaonita.

**17** Moisés atyo wawenanaho halakisa womana: — Exakerexe xisaona — nexa aotyakisa wahetakomaniyerenai. Hoka Jesus Cristo atyo waiye mokita haliti, awaiyetita haliti, exahe iraiti aliterexe taita iraeta.

**18** Maisa xala harenai Enore waiyare hoka Ityani Jesus awaiyekehalakatene halitinai ana. Hiyaiya, Enore Ityani haterore, hanexe haliya tyaonita, hanexe Enore akerexe terota atyo.

## João Batista Niraene

(Mateus 3.1-12; Marcos 1.1-8; Lucas 3.1-17)

**19** Hatyaoseta judeunai nityohalitiranai axikatyaaha sacerdotenai, Levi hotyalinai xoaha João nali xeta, João axaha maheta. Jerusalém nalita axikatyahitene.

Tyoa kaokehenahitaha João ana hoka: — Xala atyo hiso? nexaha ihiyeha.

**20** Hoka João nehenaha ihiyeha: — Maisa atyo Enore Kalorexe Aohenere xini natyo — nexa ihiyeha.

**21** Hoka nehenaha ihiyeha: — Hoka xalatya hiso? Xoana, Elias kore hiso? nexa axehenahitahaha João.

— Maisa Elias xini natyo — nihitiya ihiyeha.

— Xoana hiso iraiti xakaisasehare watyahitere? nexaha axehenahitahene.

Hoka: — Maisa — nexa ihiyeha.

**22** Hatyaoseta nehenaha João hiye: — Hoka xala kaisere hiso? Hiyakai wihiyeha hoka wasema hitahi akiti hoka wiyaneheta Jerusalém nali hoka wiyakai hitahi akiti wiyaxikatyasenai hiye — nexaha.

**23** Hoka João nehenaha: — Exakerexe babera Isaías niraene kakoare:

Hatya haliti maharexakiti kawiyaita: “Waiye xamohena ahoti hoka hatyoaho Xekohaseti jiya”, nita.

Hatyo kawiyaitere atyo natyo — nexa João ihiyeha.

**24** Hatyo kaokiterenai João ana atyo fariseunai.

**25** Hatyaoseta axehitahene: — Xoana maisa xakore Enore Kalorexe Aohenere xini hiso hoka habatixaita? Maisa Elias xini hiso, maisa iraiti xakaisasehare watyahitere xini hiso xakore hoka habatixaita? nexaha ihiyeha.

**26** Hoka João nehenaha ihiyeha: — Natyo atyo nabatixaita one kakoa hoka hatya xinekoni ximawaiyanenehare tyaonita. **27** Hatyo atyoite najikini maniyata iraihena xikakoa. Hatyo atyo noxahehare hoka maisaiya natyona aliyakere ikijitini nanohi hekoti naolikita — nexa João irai.



<sup>28</sup> Wenakalati Betânia nali irahitaha João kakoa one Jordão halakoiyaxa maniya, João tyaonitere batixaitere nali irahitaha ekakoa.

### Enore Kalaneroxa Mokose Tahî

<sup>29</sup> Kamaetali waiyehena atyo João, Jesus atyo tyoita hoka João nehena: — Xiyaiyehena, owene Enore xaxikalahare. Maikaite kalanero mokose wainitere akere waini halitinai ana emaisatya maheta iniyalahare enómaneha maheta — nexa. <sup>30</sup> — Ali koxaka notyaonita hoka etahi akiti niraeta xihiyê: “Maikaite najikinita tyohena noxahere. Koxaka atyo tyaonita terota nahitita nomawenaniniharetatere xowakiya”, nomi xihiyê — nexa.

<sup>31</sup> — Enore Ityani xakore atyo hoka maisa tehitiya waiyekehalakita nomani. Hoka nabatixatita haliti one kakoa Israel yerenai waiya maheta hatyo kalorexe — nexa.

<sup>32</sup> João nihitiya: — Nowaiya Isekohaliti Waiyexe watyahase akerehare exoahena enokoata hoka tyoa tyoka esiri heno. <sup>33</sup> Maisa atyo waiyekehalakahareta tehitiya nomani hatyo Enore Kalorexe Aohenere. Xakore atyo hoka Enore axikatya natyo one kakoa nabatixatya maheta. Hoka noxaxikatyasehare Enore nexa nohiyê: “Maikaite hatya ana exoahena Isekohaliti Waiyexe hoka: ‘Ahai, exe kore aokita. Exe atyoite Isekohaliti Waiyexe kakoa batixahena’, hehena”, nexa nohiyê. <sup>34</sup> Aliterexe atyo nowaiya nikare. Hatyo hiyeta, “Ahai, exe kore Enore Ityani”, nomi exaokaka — nexa João ihiyeha.

### Jesus Xaotyakiraharenai Hetatiyeharenai

<sup>35</sup> Kamaetali hoka João hatyo akitita hinamahare haxaotyakiraharenai kakoa xane tyaohenahitiyaha.

<sup>36</sup> Hoka waiyehena atyo João, Jesus atyo jiyita hoka João nehena: — Owene Enore xaxikalahare. Maikaite kalanero mokose wainitere akere waini halitinai ana — nexa.

<sup>37</sup> Hatyaoseta hatyo hinamahare João xaotyakiraharenai semaha João niraine hoka xaneha Jesus xema.

<sup>38</sup> Jesus xaneta ene hoka terehokoa waiya hajikini maniya, waiyehena atyo, tyoahitaha exema hoka axehenahene: — Xoare xatawita?

— Rabi — nexaha ihiyê. Wiyako maniya atyo, “Xaotyakisatiye”, nita. — Rabi, aliyako hisaonita? nexaha axahene.

<sup>39</sup> — Xisohena hoka xiyaiya — nexa Jesus ihiyeha. Hatyo xowaka makakoasehena.

— Xisohena hoka xiyaiya — nexa Jesus ihiyeha hoka xaneha Jesus xema, waiyaha tyaonitere nali hoka tyohenaha ehaliya heko maka ihiyeha. <sup>40</sup> Hatyo hinamahare xanetere Jesus xema atyo Simão Pedro ximarene André, exahe hatya tehitiya. João iraeta Jesus tahi hoka semene hoka xaneha Jesus xema.

<sup>41</sup> Hatyo najikinita André xane háxenane nali. Xane hikoa enomana hoka nexa ihiyê: — Wikaoka Cristo —

nexa. Cristo atyo wiyako maniya, “Enore Kalorexe Aohenere”, nita.

<sup>42</sup> Hatyaoseta André noloka háxenane Jesus tyaonitere nali. Xane kaokaha enomana hoka Jesus wahakotya Simão ana hoka nehena, — Hexare Simão, João ityani atyo hiso. Hoka kalikini atyo Cefas tehitiya hexare — nexa Jesus ihiyê. Cefas atyo wiyako maniya, “Sehali”, nita.

### Jesus Kawisa Filipe, Natanael Xoaha

<sup>43</sup> Kamaetali hoka Jesus xane aokowi Galiléia koa xeta. Haxánene nahitita xane tawa Filipe xahita.

Xane kaokene hoka nexa ihiyê: — Hisohena noximi — nexa. <sup>44</sup> Filipe atyo Betsaida nalitare, André, Pedro xoaha tyaonitere nalitare.

<sup>45</sup> Hatyaoseta Filipe tawa Natanael xahita hoka irai ekakoa. — Moisés, iraiti xakaisaseharenai xoaha xairatyaha Enore Kalorexe Aohenere tahi. Kalikini atyo wikaokene. Hatyo wenakalati Nazaré tare José ityani Jesus terota atyo — nexa Filipe Natanael hiyê.

<sup>46</sup> Hatyaoseta Natanael axehenene: — Xoana Nazaré nalitaiya kaotyaka xalini hare waiyexe? nexa, komita maisa tyakekota.

— Hisohena hoka hiyaiya — nexa Filipe ihiyê hoka xaneha Jesus tyaonitere nali xeta.

<sup>47</sup> Hatyaoseta waiyehena atyo Jesus, Natanael atyo kaokene hoka Jesus nexa: — Xiyaiya, owehena Israel yere kaiserehare, exe atyo maisa maoseratyaliye xini — nexa.

<sup>48</sup> Hatyaoseta Natanael axehena Jesus: — Alyako hiyaiya natyo? nexa.

— Filipe mairaineharetatere hikakoa xowaka nowaiya hiso, hisokita halohalo katyahe hoka — nexa Jesus ihiyê.

<sup>49</sup> — Xaotyakisatiye, Enore Ityani atyo hiso! Israel hotyalinai Xekohase Kalorexe atyo hiso — nexa Natanael ihiyê.

<sup>50</sup> Hoka Jesus nehena: — Xoana, “Halohalo katyahe hisokita hoka nowaiya hiso”, nomihenere hiyeta hityakeko natyo? nexa. — Maikaite exe xahere hiyaiya. <sup>51</sup> Hasemehena niraini: enokoaito totakore tyaona hoka anjonai Enore nalitarenaite kakohahitita, exoahitita xoaha Haliti Ityani ana. Exeharenaite xiyaiya — nexa Jesus ihiyê.

### Jesus Xane Wenakakoati Ana

**2** Hinama ferakene najikinita hoka sema wenakakoati hisehare wenakalati Caná nali Galiléia koa hoka Jesus nityo xane waiya hatyo hisehaliti. <sup>2</sup> Jesus haxaotyakiraharenai kakoa tehitiya kakaixakatyakaha hatyo wenakakoati ana hoka xaneha.

<sup>3</sup> Hatyaoseta nali tyaoniterenai terahitaha oloniti hoka ekakoita enoloneha vinhoxa tyotya hoka Jesus nityo nexa haisani hiyê: — Enoloneha tyotya — nexa.

<sup>4</sup> Nexa ihiyê hoka Jesus nehena: — Xoana hoka hirae-ta nokakoi? Xoana natyoiyatya hoka? Maisa terota

xane hikoahenere nokahinairaose — nexa hanityo hiye.

<sup>5</sup> Hatyaoseta inityo nexa nali waikatehare wakaneharenai hiye: — Aokitere akereta xisoma, iraihena xihiye hoka — nexa.

<sup>6</sup> Hatyo nali 6-ri tinihaliti kanote, kaloli, 80, 100 litrone niyahare. Judeunai nawenanaho hoka hatyohare akotarexa kakoa tihahitaha haitinihareha haháre xoaha.

<sup>7</sup> Hatyaoseta Jesus nexa wakaharenai hiye: — Xakaisexatya one tinihalitinai ako — nexa. Nexa hoka tinihalitinai kaisexatyaha one kakoa, kaise mokahene.

<sup>8</sup> Hatyaoseta Jesus nehitiya ihiyeha: — Xiyehena enakota hoka xiyane xisehena harekahare ana — nexa Jesus ihiyeha hoka kolatyaha exaokalaoseta harekahare ana.

<sup>9</sup> Hatyaoseta harekahare hotohare hasaka hatyo one. Hasahena hatyo one hoka koxaka vinhoxa kyawa. Maisa atyo harekahare semare hatyo vinhoxa nomaka akiti hoka wakaharenai atyo waiyoreta.

Hatyaoseta harekahare iraeheha kaiyanityohenere hiye <sup>10</sup> hoka nexa ihiyeha: — Haliti hisehaliti tyomehena hoka vinhoxa waiyexere hotohare ijita oloniti faharenai ana. Hatyaoseta teraha miyahenaha waiyexere hoka enajikini maniya atyo isihitita ewaxiraharexa enomanaha. Hoka hiso atyo enajikini maniya waiyexere hisehena — nexa.

<sup>11</sup> Wenakalati Caná Galiléia koa nali hetati Jesus nikare maomakahare tyoma, awaiyekehalakaharetyoa kalorexehawenane akiti enomanaha hoka exaotyakiraharenai atyo tyakekone.

<sup>12</sup> Hatyo najikinita Jesus xane wenakalati Cafarnaum nali xeta hanityo, haximarenenai, haxaotyakiraharenai hare kakoa hoka akaiki ferakene hatyo nali tyaonaha.

### Jesus Isoa Iraexatyakalati Hanako

(Mateu 21.12-17; Marcos 11.15-19; Lucas 19.45-48)

<sup>13</sup> Hatyaoseta okoi xane hikoahena hisehaliti Páscoa ferakene hoka Jesus xane Jerusalém xeta. Páscoa xowakehena hoka judeunai hisehare tyaohena. <sup>14</sup> Jesus xane kaoka Jerusalém nali hoka xane isoa Iraexatyakalati Hanako. Waiyehena atyo, owene bowi, kalanero, watyaha harenai betetyasenai tyaonita, owene olo ehaikoakihititere harenai tyokita hamexaneha haliyita. <sup>15</sup> Hatyohekota Jesus tyoma hamokotyakalahi olawahi hoka aihikoaheta tyotya hatyoakorenai, kalanero, bowi harenai kakoita.

Ehaikakoatya tyotya olo ehaikoakihitireharenai mexanenai enoloxaha kakoita <sup>16</sup> hoka nehena hatyo watyáha betetiterenai hiye: — Xiyakahetehena alita! Awa atyo Baba hanako exakere xisaona. Xoana wisokoliti nitini xaokitene? nexa ihiyeha.

<sup>17</sup> Hatyo najikinita exaotyakiraharenai otyaha Iraitu Waiyexe xakaisaseharenai xairala. Exakerexe exairalaha:

Nawaiyetita hihana hoka nikare tyaonaha enako hoka maisa waiyeta nohiye, Abá. Nikare tyaonaha hoka ewatyatya natyo.

<sup>18</sup> Hatyaoseta judeunai nityohalitiranai axehenene: — Xala niraene kakoare atyo hiso hoka nikare hisaona? Xoare ite hisomehena hoka wityakeko hiso? nexaha ihiyeha.

<sup>19</sup> — Xexoakiheta exe Iraexatyakalati Hana hoka hanamaki ferakene taitaite hoka notyoma namemahetene — nexa Jesus ihiyeha.

<sup>20</sup> Hoka nexaha ihiyeha: — 46-terehokoane hakahitaha exe Iraexatyakalati Hana hiye hoka mematyahene. Hoka hiso atyo, “Hanamaki ferakeneta takitaiya hoka notyomehitiyene”, hexa — nexaha.

<sup>21</sup> Hatyo Iraexatyakalati Hana tahi Jesus iraitere atyo haháre xaokaka nikare iraitere. <sup>22</sup> Waini hoka kasehete-hena najikini hoka exaotyakiraharenai hatyo xowaka iraitere otehenahitaha. Otehenahitaha hatyo xowakere iniraine hoka tyakekoha iraiti xakaisaseharenai xairala, Jesus niraine harenai.

### Jesus Atyo Waiyoreta Tyotya Halitinai Kakoa

<sup>23</sup> Jesus tyaonita hisehaliti Páscoa xowaka Jerusalém nali hoka kahare haliti tyakekotene, xalini hare enómane waiyaha hoka hatyo hiyeta tyakekoahitene.

<sup>24</sup> Hoka Jesus atyo maisa tyakekorahene, waiye otita exahekolaha hoka. <sup>25</sup> Maisaiya atyo xoare maheta haiyaharenai tahi akiti exahekolaha hare xakaita ihiyeha, koxaka atyo otita makere tyotya hakakoare xahekola.

### Jesus Irae Nicodemos Kakoa

**3** Haxowakiya Nicodemos nexarexe kaoka Jesus ana. Nicodemos atyo judeunai nityohalitira, fariseu tehitiya atyo.

<sup>2</sup> Makiya tyoa waiya maheta Jesus hoka nexa ihiyeha: — Wiso atyo wotita hiso, xaotyakisatiye. Enore xaxikalahare terota waokita hiso, wiaotyakisase maheta. Maisaiya xala harenai tyomita hisomitereharenai Enore mawenaneharene ekakoa hoka — nexa.

<sup>3</sup> Hoka Jesus nehena ihiyeha: — Hasemehena niraini: Maisaiya haliti kaxawenakisakihitiya hotohare hoka maisaiya aliyakere Enore xema maniya tyaonita — nexa Jesus ihiyeha.

<sup>4</sup> — Hoka aliyakereya koxaka inityohaliti haliti hoka tyaonihitiya? Xoana isoahitiyaiya hanityo tyako hoka tyaonihitiya? nexa Nicodemos axa Jesus.

<sup>5</sup> Jesus nihitiya ihiyeha: — Aliterexe nomita hihiye: maisaiya onexaiya Isekohaliti Waiyexe xoaha kakoa kaxawenakisakihitita hotohare hoka maisaiya aliyakere haliti Enore xema maniya tyaonita. <sup>6</sup> Wityo, wexe kaisanihena wiso hoka hatyoaha akereta wisaonita. Nikare Isekohaliti Waiyexe kaisanihena wiso hoka hatyo akereta tehitiya wisaonita. <sup>7</sup> Hiyeta hoka niraini hasemehena: “Maisaiya haliti kaxawenakisakihitiya hotohare hoka maisaiya aliyakere Enore xema maniya tyaonita”, nomi niraihena hoka awa, “Aliyakere ala aokita?” hexa.

<sup>8</sup> — Hoholati atyo aliye maniya xamani hoholatya aokowita hoka hatyo maniya atyo hoholaita. Wasemita atyo ehoholala nemahare xakore atyo hoka maisa

atyo wawaiyorexe ityoanene, exanene xoaha kakoa. Nikare tyaonita Isekohaliti Waiyexeta kaisanihenerenai tyaonehena hoka. Maisa wawaiyorexe exawenakisakaha kakoa — nexa Jesus ihiye.

<sup>9</sup> — Hoka aliyakerexe hatyo? nexa Nicodemos axene.

<sup>10</sup> Hoka Jesus nehena: — Xoana Israel yerenai xaotyakisase xakore hiso hoka maisa exe akiti kakoa hawaiyorexe? nexa. <sup>11</sup> — Hasemehena niraini: aliterexe nomita hihiye, xalini tahi nasema nawaiyore ekakoa xoaha hoka noxakaitene xihiyeha, xakore atyo hoka maisa atyo xityakekore niraini. <sup>12</sup> Noxakaita xihiyeha kalikiniyere wenati tahi, exahe halitinai nawenane tahi akiti harenai xihiyeha hoka maisa xityakekore niraini. Nikare hoka aliyakereya noxakaihena enokoa tahi xihiyeha hoka xityakekohena? <sup>13</sup> Maisa xala hare enokoa xeta xanexe. Hoka Haliti Ityani atyo enokoa terota tyaonita hoka exoaheta waikoa xeta — nexa Jesus. Haxaokakita “Haliti Ityani”, nita.

<sup>14</sup> — Toahiya Moisés berekotya owi xaimenekotyaka akerehare atyalihose hiye hoka atityoakisene ekakoare maharexakiti nali. Nikare ite berekotyaha Haliti Ityani atyalihose xaimaholatyaka hiye hoka atityoakisahene ekakoare. <sup>15</sup> Nikare ite mokahene hoka exema maniya tyaoniterenai maisa wainahitaha hoka tyaonaha mene matyotenehare maheta. <sup>16</sup> Enore atyo tyotya halitinai awaiyetita hoka haisani haterore axikatya halitinai koni waini enomanaha maheta hoka tyakekohenerenai maisa wainita maheta hoka tyaonaha mene matyotenehare maheta. <sup>17</sup> Enore axikatya Haisani halitinai koni iyehenahitene iniyalahare enómaneha nonitata maheta, maisa halitinai xawatya maheta xini — nexa.

<sup>18</sup> — Xala xamaniya atyo tyakeko Ityani hoka hatyoiya atyo maisa kaxawatyakita. Hoka xala xamaniya atyo maisa tyakekota hoka hatyoiya atyo waiye xawatyaka, maisa tyakekore haterore Enore Ityani hoka. <sup>19</sup> Xaokanatyakalati kaoka halitinai ana xakore hoka makaliroti waiyeta enomanaha, iniyalahare nomaseharenai hoka. Hatyo hiyeta waiye xawatyaka aokita Enore. <sup>20</sup> Iniyalahare tyomiterenai atyo maisa awaiyetyahitaha xaokanatyakalati hoka tekoahitaha enonita, haiyaharenai maisa waiyaha enómaneha iniyalahare aokareha hoka. <sup>21</sup> Hoka waiye maniya tyaoniterenai, exahe iraiti aliterexe xema tyaoniterenai atyo awaiyetita xaokanatyakalati, kaokahitaha ehaliya, waiye tyaonahitaha hoka. Enore aokitere akereta tyomahitaha hoka kasani halitinai waiyaha enómaneha aokahitaha — nexa.

### Jesus, João Batista Xoaha Tahi

<sup>22</sup> Hatyo najikinita Jesus xane haxaotyakiraharenai kakoa Judéia koa xeta. Hatyo nali akaiki ferakene tyaona ekakoaha hoka batixatita halitinai. <sup>23</sup> João tehitiya batixatita halitinai wenakalati Enom nali, wenakalati Salim haliyita. Hatyo nali kaloxa one hoka. Kahare haliti kaokita enomana hoka batixatyahitene. <sup>24</sup> João hatyo xowaka maisa kabereyotyakehenerere.

<sup>25</sup> Hatyaoseta haiyaharenai João xaotyakiraharenai iraeha kintyaxa hatya judeu kakoa: — Enore maniya wisaonita hoka exakere watihita tinihalitinai, exahe halitinai hare — nexaha.

<sup>26</sup> Hatyo najikinita xane iraeha haxekohase João kakoa. — Xaotyakisatiye, xoana hotita etake haliti one Jordãoxa halakoiya nali tyaonitere hikakoa, hirai etahi akiti xoaha. Xoana hotitene? Kalikini batixaita haliti hoka kahare haliti ekoamaniya tyaonita — nexaha.

<sup>27</sup> Hoka João nexa ihiyeha: — Kala Enore kahinaetitene nali. Ekoia awa Enore kahinaetita wiso hoka maisaiya xoare wisomita. <sup>28</sup> Koxaka xasema niraini. “Maisa atyo Enore Kalorexe Aohenere xini natyo. Enaheta maniya atyo Enore axikatya natyo”, nomi xihiyeha. <sup>29</sup> Xasemehena, wenakakoati xowakehetehena hoka hatyo kaiyanityohenerere atyo tyaonita hatyaonero kakoa. Hoka ihinaehare, exako semehena hoka ihalahareta hahinaehare kakoa. Nikarexe natyo notyaonita. Nasemehena Jesus tahi hoka nihalahareta. <sup>30</sup> Hatyo atyoite ekakoita kalorexe tyaona. Hoka natyo atyoite ekatyahakoreta hoka ekakoita atyoite kiranexe notyaona — nexa João ihiyeha.

### Etakehare Enokoata Tyoiterehare

<sup>31</sup> — Enore Ityani atyo enokoata tyoa hoka tyotya halitinai xaehare atyo. Hoka halitinai atyo waikoatarenai hoka waiyakitiya maniya tahi akiti kakoa taita waiyoreta hoka hatyohare tahi takita iraeata. Hoka hatyo enokoatare atyo tyotya halitinai xaehare. <sup>32</sup> Hatyo atyo xakaita hasemane, hawaiiya xoaha enokoa naliye xakore hoka maisa xala harenai tyakekore exakaini. <sup>33</sup> Xala xamani atyo tyakeko Enore Ityani niraine hoka tyakekota tehitiya atyo Enexe Enore niraine. Enomana atyo Enore aliterexe taita iraeata. <sup>34</sup> Enore axikahenerere atyo xakai iniraine halitinai hiye. Enore atyo axikatya Isekohaliti Waiyexe enomana maxaimenekotyakahareta hoka masakare kahinaetitene. <sup>35</sup> Enexe Enore awaiyetita Haisani hoka maxaiahityakahare mokene, tyotya xalini hare xekohasehare. <sup>36</sup> Xala xamani atyo tyakekota Enore Ityani hoka makamanehareya atyo tyaona. Hoka xala xamaniya atyo maisa tyakekota Ityani hoka maisaiya atyo tyaota menita, Enore ite iniyalahare motene mene.

### Jesus Irae Ohiro Samaria Yolo Kakoa

**4** Semehena atyo fariseunai, Jesus atyo kahare batixaita haliti, João xahe batixaita haliti. <sup>2</sup> Maisa atyo Jesus xini batixaita haliti, exaotyakiraharenai atyo batixatyahitene. <sup>3</sup> Jesus ana waiyekehalaka hatyo tahi akiti hoka xaneheta Judéia koa nalita hoka haikoaheta Galiléia koa xeta. <sup>4</sup> Ahoti atyo Samaria koaho jiyita. Hiyeta hoka Jesus hatyoaho jiyeheta.

<sup>5</sup> Jiyehena hoka xane kaoka wenakalati Sicar haliya. Ikinohareha Jacó haisani José ana waikohe isehenere haliyaseta hatyo wenakalati. <sup>6</sup> Hatyo nali tehitiya Jacó sehenere poço. Kala totahikoa harehena hoka Jesus

xane tyoka hatyo poço haliya, kiraharehena haitonane wenekoa hoka.

<sup>7</sup> Hatyaoseta hatya Samaria yolo tyoa hikoa one iya maheta hoka Jesus nexa ihiye: — Xama hisa nomani one hoka notera — nexa ihiye. <sup>8</sup> Exowaka Jesus hawawa tyaonita, exaotyakiraharenai koxaka xane wenaakalati xeta nakairati iyaha maheta hoka.

<sup>9</sup> — Hiso atyo judeu hoka natyo atyo Samaria yolo. Nikare hoka xoana hoka haxa natyo one? nexa ohiro Jesus hiye. Maisa judeunai kakoa Samaria yerenai awaiyetyakakoareha hoka nikare irae Jesus kakoa.

<sup>10</sup> — Hawaiiolotaiya Enore xekane kakoa, exahe hawaiiolota tehitiyaiya axitere one hiso kakoa hoka haxene tehitiyaiya one hoka isaiya one homana hoka hatyo oneya hisera hoka menanehaloti hisaona — nexa Jesus ihiye.

<sup>11</sup> Hatyaoseta hatyo ohiro nehena Jesus hiye: — Hiyaiya, maisa atyo hikaitiniharexe hoka one hiya haokowita. Poço atyo hateko. Aliyakereya hatyo one menanehalitiya hiyehena? nexa. <sup>12</sup> — Wikinohare Jacó atyo seka exe poço. Hatyaoseta hatyo, ityaninai, ijijyetenai, ikirakaharexanai hare terahitaha exe poço akotarexa. Xoana Jacó xahere hiso haokita? nexa ohiro Jesus niraene nahalakoa.

<sup>13</sup> Hatyaoseta Jesus nehena ihiye: — Xala xamaniya atyo exe akota one tera hoka oinihitiyaiya atyo. <sup>14</sup> Hoka one naokitereya atyo tera hoka maisaiya atyo oinihitita. Hatyo one nijitereya atyo maisa tyotehitita enonita. Tyaona meneya atyo ihiye hoka ekakoitaiya atyo menanehaliti tyaona — nexa Jesus.

<sup>15</sup> — Xama hisa nomani hatyo one hoka maisa noinihitita, exahe one nomakolalihalo notyaona alita — nexa ohiro ihiye.

<sup>16</sup> — Hiyane hakawiheta hexanene hoka hisoheta ekakoa ali — nexa Jesus ihiye.

<sup>17</sup> — Maisa nokaiyaniniro — nexa ihiye.

— Aliterexe hiraeta, “Maisa nokaiyaniniro”, hita.

<sup>18</sup> Koxaka 5-hare kakoa hisaona hoka maisa tyaonareha hikakoa. Kalikini hatya tyaonita hikakoa hoka alitere atyo maisa hexanene xini. Aliterexe atyo hiraeta — nexa Jesus ihiye.

<sup>19</sup> — Kalikini atyo hawaiiyekehalakahare nomani. Kala iraiti xakaisahere hiso — nexa. <sup>20</sup> — Wahetakomaniyereharenai kakoha exe tyairi heno hoka iraexatyahitaha Enore ana hoka awaiyetyahitene. Hoka xiso judeunai atyo xita: “Jerusalém nali taita atyo waiye niraexatyaka Enore hiye”, xita — nexa ohiro ihiye.

<sup>21</sup> — Waiye hasemehena niraini: Ekakoitaita maisa exe tyairi henose, exahe Jerusalém nali taita xini kairaexatyaka Enore hiye. (Aliyo xamani wisaonita hoka hatyo nali tehitiya waiye niraexatyaka Enore hiye.)

<sup>22</sup> Xiso Samaria yerenai atyo maisa xawaiyorexe Enore akiti kakoa hoka wiso judeunai atyo wawaiyore wisaonita Enore akiti kakoa. Hiyaiya, halitinai niyasehareheta atyoite judeunai konita kaotyaka.

<sup>23</sup> — Okoi enaose xane hikoahena, xakore hoka koxaka xane hikoa enaose hoka Baba xema maniya tyaoniterenaite awaiyetene haisekohareha kakoita ho-

ka tyaonaha kaiserehare ite exema maniya. Hatyohare hotyalinai Baba aokita haomana. <sup>24</sup> Enore atyo Iseko-haliti hoka hatyo hiyeta kasani haliti awaiyetene haisekohareha kakoita, exahe tyaona kaiserehare exema maniya aokita — nexa Jesus.

<sup>25</sup> — Enore Kalorexe Aohenere ite kaotyaka womana. Nasema hatyo akiti, notyakeko xoaha. Kaotyakaite womana hoka tyotyta awaiyekehalakahena womana — nexa ohiro Jesus hiye.

<sup>26</sup> — Natyo atyo Enore Kalorexe Aohenere atyo niraeta hikakoa — nexa Jesus ihiye.

<sup>27</sup> Hatyaoseta exaotyakiraharenai kaokehetehehena enomana hoka waiyaha iniraene ohiro kakoa hoka hakaharetyoaha. Xakore hoka maisa ohiro hekoti axahitaha, xoare xamani aokita ihiye hoka. Exahe tehitiya maisa axahitaha Jesus, xoare hiyeta xamani iraeta ekakoa hoka.

<sup>28</sup> Hatyaoseta hatyo ohiro halakisa haonexa nitini, haikoaheta hawenakala xeta hoka nexa nali tyaoniterenai hiye: <sup>29</sup> — Hatya haliti kaoka nomani poço nali hoka irae nokakoi. Tyotyta notyomiterenai kakoa waiyoreta. Xoana Enore Kalorexe Aohenere ala? Wiyala wiyane hatyo nali hoka xiyaiya — nexa ihiyeha. <sup>30</sup> Nexa xakai ihiyeha hoka kahare haliti xane hatyo Jesus tyaonitere nali xeta.

<sup>31</sup> Hatyo ohiro xanehenere nase exaotyakiraharenai nexa ihiye: — Xaotyakisatiye, ali nakairati. Witya hikanakairahena — nexaha ihiye.

<sup>32</sup> Xakore atyo hoka nexa: — Ali nonakairi ximawaiyanenehare — nexa Jesus ihiyeha.

<sup>33</sup> Nexa ihiyeha hoka axakakoahenaha hatyo kakoha: — Xoana koxakala hatya kaoka enomana hoka nakairati isa enomana? nexaha.

<sup>34</sup> — Noxaxikatyasehare aokitere akereta notyao-hena, exahe nohateni isehenere nomani namiyahena hoka hatyo atyo nakairati akereta nomani. <sup>35</sup> Exe tehitiya: xiso atyo exakere xita: “4-li kaimarehena hoka nakairati ihatihena”, xita. Hoka waiyira xiyaiya! Nakairati koxaka ihati, waiye niyakehena. <sup>36</sup> Xala xamani atyo xirikotyati hiye hahena hoka kabakatyaka atyoite. Hawenane matyotenehare naheta maniya mokitita. Nikare ite exafityasehare ixirikotyasehare xoaha haxawalita ihalahareha. <sup>37</sup> Hiyaiya, exakere babera iraiti kakoare:

Hatya fetene hoka ihatihena hoka hatisa irikohititene. Hatyohare aliterexe.

<sup>38</sup> — Xiso atyo maisa xafityare hoka naxikatya xiso xirikotyati maheta nakairati xonehenere. Xahetakomaniyereharenai hakaha ali xahitita, hoka xiso atyo xamiyahena ehateneha — nexa Jesus ihiyeha.

<sup>39</sup> Hatyaoseta Samaria yerenai kaokaha enomana. Kahare Samaria yerenai tyakekoha Jesus ohiro xakaini hiyeta. “Tyotyta nawenani tahi waiyore hoka xakai nohiye”, nitere hiyeta. <sup>40</sup> Hatyaoseta Samaria yerenai xane hikoa Jesus ana hoka irae ekakoa hoka kasani Jesus tyaona enawenakalaha aokahita hoka hatyo hiyeta hinamaki ferakene tyaona ekakoaha.

<sup>41</sup> Hatyaoseta Jesus irae ekakoaha hoka tyakekoha Jesus iniraene hiyeta hoka <sup>42</sup> nexaha ohiro hiye: — Kalikini atyo wityakeko. Wisota atyo wasema iniraine, maisa atyo hiyakaini hiyeta taita xini wityakekone. Aliterexe atyo Enore Kalorexe Aohenere, halitinai niyaseheta kaiserehare — nexaha.

### Jesus Aiyatelikiheta Hatya Xekohaseti Ityani

<sup>43</sup> Hatyo nali hinamaki ferakene Jesus tyaona hoka hatyaoseta jiyehitiya Samaria koa nalita hoka xane Galiléia koa. <sup>44</sup> Hatyota atyo nexa: — Sekorenai semaxemaita iraiti xakaisasehare hoka ewaikohera tyaoniterenai atyo maisa tyakekorene.

<sup>45</sup> Hatyaoseta xane kaoka Galiléia nali hoka nali waikatenai waiye mokahene. Galiléia koa yerenai xane hisehaliti Páscoa xowaka Jerusalém nali hoka exowaka waiyaha Jesus nómanenai hatyo nali hoka hatyo hiyeta waiye mokaha Jesus.

<sup>46</sup> Hatyaoseta Jesus kaoka Caná nali, one aikawahenere vinhoxa nali xeta haikoaheta. Hatyaoseta hatya xekohaseti tyoa irai Jesus kakoa, ityani hokakita ehanako wenakalati Cafarnaum nali hoka. <sup>47</sup> Koxaka sema Jesus tahi: — Koxaka tyoheta Judéia koata hoka kaokeheta Galiléia koa — nitere sema hoka xane irae ekakoa, kasani tyoa Cafarnaum nali hoka ityani aiyatelikiheta enomana aokita, ityani hawinitehena hoka.

<sup>48</sup> Hoka Jesus nexa hatyo xekohaseti hiye: — Xiso atyo maomakahare ximawaiyaneneharetá maisa xityakekore natyo — nexa.

<sup>49</sup> — Xekohaseti, hisohena rotita waiya aliya hoka nityani waini wimakaokeneharetá enomana — nexa ihiye, kaholawaka exánene kakoa.

<sup>50</sup> Hoka Jesus nexa ihiye: — Hiyanehetehehena hihana xeta. Hityanite waiyeheta — nexa ihiye. Nexa ihiye hoka tyakeko Jesus niraene hoka haikoaheta hahana xeta.

<sup>51</sup> Xaneheta Jesus nonita hoka ahotita ahalakoatya hawakaneharenai hoka ewakaneharenai nexaha ihiye: — Hityani waiyeheta.

<sup>52</sup> Hatyaoseta hawakaneharenai axa: — Otene kamai nityani waiyeheta?

Hoka ewakaneharenai nexa ihiye: — Kafaka makakoalihena hoka ewatyahisene tyoteheta enonita.

<sup>53</sup> Hatyaoseta enexe Jesus niraine, hatyaose kamai-hena hoka iraterere: “Hityanite waiyeheta”, nitere ihiye oteheta hoka tyakeko Jesus haiyanityo haisaninai harenai kakoita.

<sup>54</sup> Jesus tyoheta Judéia koata hoka Galiléia nali kaokeheta hoka hatyo xoima aiyatelekihetehenere kakoita hinamakihena maomakahare tyomita.

### Jesus Aetonalikiheta Maetonanehare

**5** Hatyo najikinita judeunai hisehare tyaohena Jerusalém nali hoka Jesus xane waiya. <sup>2</sup> Hatyo nali one nitini kalorexe, 5-hati taose kakoare wahaharexe tehitiya hatyo one haliya. Wenakalati Kalanero Xisoakala aokahitere nali maniya hatyo one nitini

kalorexe. Judeunai xako atyo, “Betesda”, nexahitaha hatyo one nitini xaokaka. <sup>3</sup> Kahare hokakitinai hatyo hati taosenae ako etolijoita one haliya, maxoseharenai, mawaiyehalitinai, maetonaneharenai hare. Tyaonahitaha atyahahitaha one watyalisaka xahita. <sup>4</sup> Haiya xowaka anjo exoita hoka one watyalita. Hatyo najikinita xala hotohare xamani exoa exaiya hoka kinatereheta.

<sup>5</sup> Exowakita hatya haliti hatyo nali etolijoita, 38-terehokoanehena hokakita. <sup>6</sup> Owene etolijoita hoka Jesus waiyene hoka otita wahehena ehokakene hoka nexa ihiye: — Xoana hikinatereheta haokowita? nexa ihiye.

<sup>7</sup> Hoka nehena Jesus hiye: — Xekohaseti, maisa xala hare mokare natyo onexa, one kawatyalisakehena hoka. Nexoa xakore naokowita exaiya hoka nahitita hatya hokakiti exoita exaiya — nexa.

<sup>8</sup> Hatyaoseta Jesus nexa ihiye: — Hatityoahetehehena hoka hiyetolisoakala hiyehetehehena hoka hatohetehehena — nexa.

<sup>9</sup> Nexa taita ihiye hoka exowakita hatyo haliti kinatereheta rotita, iyeheta haxetolisoakala, xaneheta.

Sábado xowaka aetonakihetene. <sup>10</sup> Hiyeta hoka judeunai nityohalitanai nexaha ihiye: — Kalikini sábado, mahateniti ferakene. Mahateniti ferakene hoka awa atyo hakolatya hiyetolisoakala. Wiyaotyakisakaho hiyeta hoka maisa waiyeta — nexaha ihiye.

<sup>11</sup> Hoka nehena ihiyeha: — Xasemehena, noxajiyakisase atyo nexa nohiye: “Hiyehetehehena hiyetolisoakala hoka hatohetehehena”, nexa nohiye.

<sup>12</sup> — Xala nikare irae hikakoa hoka nikare hisaona? nexa axahene.

<sup>13</sup> Hoka maisa atyo Jesus nexare semita. Jesus atyo koxaka xaneheta hatyo nalita, kahare haliti tyaonita hatyo akiti hoka. — Maisa nasemita noxajiyakisase nexare — nexa ihiyeha.

<sup>14</sup> Wahasehena hoka Jesus tyoa isoahitiya Iraexatyakalati Hanako hoka ahalakoatya hatyo haxajiyakirahare hoka nehena ihiye: — Hasemehena, kalikini atyo hawaiyeheta. Awa atyo iniyalahare hisomehitiya, waiya aliya hoka exahehena hisaonita — nexa ihiye.

<sup>15</sup> Nexa Jesus ihiye hoka hatyaoseta hikoaheta hoka xakaini judeunai nityohalitanai hiye: — Jesus nika aiyatelikiheta natyo — nexa ihiyeha.

<sup>16</sup> Hatyaoseta Jesus hiye ehareha, sábado xowaka haliti aiyatelikiheta hoka hatyo hiyeta ehareha ihiye, aisahene aokowiha.

<sup>17</sup> Ehareha hoka Jesus nehena ihiyeha: — Baba atyo hakita kalikini kijiya hoka natyo tehitiya nahakita — nexa Jesus.

<sup>18</sup> Hatyo iraterere hiyeta judeunai nityohalitanai aisahene aokowiha. Maisa exaotyakisakahoha xema tyaonita sábado ferakenehena, exahe Enore Ityani aokowita. Exahe Enore hákakoanehare aokowita nikare iraeta hoka maisa waiyeta enomanaha. Hatyo xemere aisahene aokowiha.

### Enore Ityani Atyo Iraitu Kakoare

<sup>19</sup> Hatyaoseta Jesus nehena: — Xasemehena niraini. Enore Ityani taitaiya atyo hoka maisaiya atyo xoare hare tyomita. Hanexe Enore nómane waiyehena hoka hatyo akereta Ityani tyomita. Enexe tyomehena hotohare hoka enajikini maniya Ityani tehitiya tyomihitita Hanexe tyomitere akereta. <sup>20</sup> Enexe atyo awaitita Haisani hoka tyotya háomanenai hotikijita enomana. Hotikisaite exaheharexe Haisani ana hoka hatyoharenai ite Ityani tyomehena hoka xahakaharetyoaita.

<sup>21</sup> — Hiyaiya, Enexe ekasekihetehehena kamatinai hoka kasehenahititaha. Nikare tehitiya Ityani ekasekiheta aokowihenere kamati ekasekihita. <sup>22</sup> Enexe maisa sema aokowita halitinai nómane tahi. Kasani Ityani sema halitinai nómane tahi hoka tyaonahiterene akereta mokahene aoka Enexe. <sup>23</sup> Kasani halitinai aiminisaha Ityani aokita Enexe kaxaiminisakitere akereta. Xala xamani atyo maisa aiminijita Ityani hoka maisa tehitiya atyo Enexe aiminisare. Hiyaiya, hatyo atyo axikatya Haisani.

<sup>24</sup> — Aliterexe nomita xihye, xala xamani atyo semaxemaita niraini hoka tyakekota tehitiya atyo noxaxikatyasehare hoka makamanehare atyo tyaona hoka maisaiya atyo kamawenekoaretyakita. Koxaka atyo hakamaneta kaseheta hoka menanehaliti tyaona.

<sup>25</sup> Aliterexe nomita xihye, enaose xane hikoahena, koxaka enaose xane hiko. Maika ite kamatinai semehenaha Ityani xako. Semehenahaite hoka kasehetehehahitaha. <sup>26</sup> Enexe atyo tyaota menita hoka ihiyeta halitinae kaseta tyaonita. Haisani nikare tehitiya moka hoka Ityani hiyeta halitinai kaseta tyaonita. <sup>27</sup> Enexe iyateliti isa Haisani ana axalisa maheta halitinai hoka tyomahitere tahi sema hoka nikareta mokahene maheta. Hiyaiya, Haliti Ityani tehitiya atyo hoka.

<sup>28</sup> — Awa atyo exeharenai hiyeta xahakaharetyoahena: ekakoitaite enaose xane hikoahena hoka tyotya kamatinai semehena Enore Ityani xako <sup>29</sup> hoka kamatinai kasehenahitehenaha haxawatyakalaha akota. Hatyaosetaite waiye tyomehenerenai atyoite menanehaliti tyaonaha hoka iniyalahare tyomehenerenai atyoite kaxawatyakehena — nexa Jesus.

### Jesus Atyo Iraitu Kakoare

<sup>30</sup> — Maisaiya atyo nowawiharenai hoka xoare hare notyomita. Baba niraine nasemita hoka nasemitere akereta namokita haliti. Tota maniya taita nahekoita halitinai kakoa hoka tyaonahitere akereta namokahitene. Baba Enore xaokaita nikare notyaonita, maisa noxaokaita xini.

<sup>31</sup> — Nowawiya niraeta notahi hoka maisaiya xoare maheta xityakekota niraeni. <sup>32</sup> Xakore hoka hatya tehitiya atyo xakai notahi akiti. Hatyo iraihena hoka maisa atyo maoseraita xini. <sup>33</sup> Hiyaiya, xaxikatya haliti João ana axene maheta. Axahene hoka João xakai notahi akiti ihiyeha hoka maisa maoseratyahitene xini. <sup>34</sup> Maisaiya xoare maheta halitinai iraha notahi

noxatyakekotyaki maheta xakore hoka noxakaita exe iraitu waiyexe xihye xikaiyakeheta maheta. <sup>35</sup> João atyo xaokanatyakalati. Takoa hoka aokanaitere akereta tyaonita halitinai koni, aotyakisahitene hoka. Maisa waha tyaonare xinekoni hoka exowaka xihalahare exaotyakira kakoa.

<sup>36</sup> — João xakai notahi akiti halitinai hiye tyakekoha maheta natyo. Hoka exe tehitiya João xahehare nawaiye: maika notyomitere hiyeta xityakeko natyo. Baba axikatya natyo ehatene notyoma maheta. Maika xityakekohena natyo nománinai hiyeta.

<sup>37</sup> — Noxaxikatyasehare Baba tehitiya irae notahi akiti, tyakeko natyo hoka. Hoka xiso atyo maisa xasemare exako, exahe xiyaiyarene. <sup>38</sup> Maisa iniraine tyaonita xikakoa. Xiyaiya, maisa natyo exaxikalahare xityakekota hoka.

<sup>39</sup> — Babera Iraitu Waiyexe kakoare xakaixarita minita. Exema maniya xisaona hoka ximakamanehare xisaona xaokita hoka. Xakore hoka notahi atyo hatyo Iraitu Waiyexe nanekoa xairatyoare tyaonita. <sup>40</sup> Xakore atyo hoka maisa xisaona xaokowiye nokoamanyi. Xisaonaiya nokoamanyi hoka ximakamanehariya xisaona — nexa Jesus.

<sup>41</sup> — Maisa atyo halitinai aeroretyaha natyo naokare.

<sup>42</sup> Hiyaiya, notita atyo xiso, maisa atyo Enore xawaityare kaisere, maisa exema maniya xisaonare. <sup>43</sup> Baba niraine kakoare atyo natyo xakore hoka maisa xaokita natyo xomana. Hatyaiya kaoka xomana haxaokaita hoka xawaiyeteniya. <sup>44</sup> Komitainiya maisa aliyakere Enore xema maniya xisaonita. Kasani halitinai ihalahareha xikakoa xaokita, komita maisa Enore ihalahareta xikakoa xaokare.

<sup>45</sup> — Xasemehena, maisaiya niraeharitata xiso Baba hiye. Xawaiyetita hatyo Moisés xaotyakira xakore hoka Moisés atyoite iraharetya xiso. <sup>46</sup> Hiyaiya, Moisés xairatya notahi akiti. Xityakekoreya Moisés xaotyakira hoka xityakeko tehitiyaiya natyo. <sup>47</sup> Maisaiya xityakekota Moisés xairala hoka aliyakereya xityakekohena niraini? nexa Jesus ihiyeha.

### Jesus Tyaisa Kahare Halitinai

(Mateus 14.13-21; Marcos 6.30-44; Lucas 9.10-17)

**6** Hatyo najikinita Jesus imahotyoya Galiléia xa. Tiberiades xa tehitiya enxare. <sup>2</sup> Kahare haliti xane exema, koxaka waiyaha enómane maomakahare hokakiterenai xaiyatelikisakeheta hoka. <sup>3</sup> Xane imahotyoya halakoiya hoka Jesus kakoha tyairi henose, xane tyoka haxaotyakiraharenai kakoa. <sup>4</sup> Hatyo xowaka okoi judeunai hisehare Páscoa tyaohena.

<sup>5</sup> Jesus atyo waiyehena, hisoaka atyo haliti tyoaha exema hoka nehena Filipe hiye: — Aliyakotaite wiyehena nakairati tyotya exe halitinai ana? nexa axene. <sup>6</sup> Koxaka atyo Jesus waiyoreta ityaisakaha kakoa hoka Filipe hasakaharetya aokowita hoka nikare iraeata.

<sup>7</sup> Hoka Filipe nehena ihye: — Owane, aliyakere xamani. Kala 200-olohokose kakoa nakairati wiya hoka wisa enomanaha hoka maisaiya kehexahitene — nexa.

<sup>8</sup> Hatyaoseta exaotyakirahare André, Simão Pedro ximarene irahena: <sup>9</sup> — Owene hatya xoima 5-tohase kolatita nakairati cevadahe nomakere, hinama kohase xoaha kakoare. Hoka wiseneya halitinai ana hoka maisaiya kehexahitene, hisoakaha hoka — nexa André.

<sup>10</sup> — Xiraihena halitinai hiye hoka tyokaha waikoa — nexa Jesus haxaotyakiraharenai hiye. Hatyo nali kalokoare ime koa. Hatyaoseta exaotyakiraharenai irae ekakoaha hoka tyoty tyokaha. Kala komita 5.000-hare haliti.

<sup>11</sup> Hatyaoseta isaha xoima nakaira Jesus ana hoka iraexatya: — Ehekere nakairati hisa womana, Abá — nexa iraexatya Enore hiye hoka irakene haxaotyakiraharenai ana hoka exaotyakiraharenai irakene tyokiterenai ana. Nikareta kohase irahitiya enomanaha. <sup>12</sup> Tyoty kanakaira, fakatehareha, kamawaneha.

Kanakaira, fakatehareha hoka Jesus nehena haxaotyakiraharenai hiye: — Ximexeheta enakairaha mawane hoka waiye xamoheta hoka maisa mitita — nexa.

<sup>13</sup> Nexa hoka imexehenahitene hoka 12-te koho ako kaise mokaha. 5-tohase nakairati xakore hoka 12-te kaise mokaha emawaneha.

<sup>14</sup> Hatyo Jesus nakairati aeroritere halitinai waiyaha hoka nexaha: — Iraitu xakaisasehare kalorexe kaotyakehenaite haliti koni aoka koxakereharenai. Kala maisa hoka exe Jesus terota hatyo kalorexe — nexahitaha.

<sup>15</sup> Hatyaoseta Jesus exekohaseha kalorexe tyahena aokahitaha hoka aiyateretyoaha exahita, kalorexe tyahena maheta. Xakore hoka Jesus sema hatyo tahi hoka xanehitiya hawawaharenai enonitaha tyairi henose xeta.

#### Jesus Tonita One Heno (Mateus 14.22-33; Marcos 6.45-52)

<sup>16</sup> Maka hoka Jesus xaotyakiraharenai aiheteheha onexa haliya, <sup>17</sup> isoahenahitaha kanowako hoka imahotyohenenahitaha hoka Cafarnaum maniya xanehenahitaha. Koxaka makaliro xakore hoka Jesus atyo makaokeneta enomanaha. <sup>18</sup> Xanehenahititaha onexa hoka kintyawiniti kaoka enomanaha, hoholasekoatyahene, one ainakiyaty. <sup>19</sup> Kala exaotyakiraharenai sekoheteheha, nekesexeheteheha hoka, waiyehenaha atyo, owehena Jesus tyohitita, oneheno atyo tonita. Tyoa kaokeheteheha kanowa ana hoka mairaha.

<sup>20</sup> — Awa atyo ximaira, natyo taore — nexa Jesus ihiyeha.

<sup>21</sup> Hatyaoseta ihalahareha, ekakohakihenahitene kanowako. Hatyaoseta jiyehenahitiyaha hoka haxerore xane kaokaha xane aokowitere nali.

#### Halitinai Tawehetaha Jesus

<sup>22</sup> Kamaetali hoka hatyo haliti jikotiterenai tawehena Jesus xahita. Nali haterore kanowa hoka koxaka hatyoako exaotyakiraharenai xanehenahitaha maxekohasehareta hoka motya hatyo nali aokahitaha ho-

ka tawehenaha exahita. <sup>23</sup> Hatyaoseta wenakalati Tiberiades nalitare tyoa kaokehena kanowanai kakoa, tyoa takoaha hatyo halitinai kanakairihenere nali, Jesus iraxahenere Enore hiye najikinita kanakairihenahere nali. <sup>24</sup> Maisa waiyehenahititaha Jesus, exahe exaotyakiraharenai hoka hatyaoseta kanowanai ako tyokaha hoka xanehenahitiya Cafarnaum nali xeta tawehenahitene maheta.

#### Jesus Atyo Nakairati Wenati Niyahare

<sup>25</sup> Imahotyoha hoka xane kaokehena hitaha Jesus halakoiya maniya. — Xaotyakisatiye, xoana xowaka ali hikaoka? nexaha ihie kaokehena hitene hoka.

<sup>26</sup> Hoka Jesus nehena ihiyeha: — Xasemehena, kafa-ka xikanakaira xifakatehare hoka hatyo hiyeta kalikini xatawa natyo. Maisa atyo waiyehelakitere maomakahare notyomehenere hiyeta xini xatawhitita natyo — nexa ihiyeha. <sup>27</sup> — Awa atyo nakairati kaiyalaharetatere xema xahaka. Exahe kalore xikanakaira xakore hoka haxowaka atyoite xiwaini. Maika menanehaliti nakaira xema xahaka. Halitiya kanakairene hoka makamanehareya tyaona. Haliti Ityani ijita hatyo nakairati xomana. Enore isa iyateliti enomana nikare tyaona maheta — nexa Jesus ihiyeha.

<sup>28</sup> — Hoka xoare wisoma aokita Enore? nexa axaha Jesus.

<sup>29</sup> — Xityakeko exaxikalahare aokita — nexa Jesus.

<sup>30</sup> Hoka nexaha ihie: — Hoka hiso atyo xoareya hisoma hoka wiyaiya hoka wityakeko hiso? nexaha. <sup>31</sup> — Wahetakomaniyerenai atyo kanakaira nakairati maná aokahitere maharexakiti nali. Hatyo tahi akiti kaxairatyaka Iraitu Waiyexe nanekoa exakere:

Enore isa enomanaha nakairati enokoata hoka kanakairaha.

— Hoka hisoiya atyo xoare hisoma hoka wityakeko hiso? nexaha ihie.

<sup>32</sup> Hoka Jesus nehena ihiyeha: — Xasemehena, Moisés isa nakairati enokoatare xomana xakore atyo hoka maisa atyo menanehaliti nakaira xini. Nakairati enokoatare ekaiserehare atyo Baba ijita. <sup>33</sup> Enore xaxikalahare atyo enalita exoa xomana hoka hatyo atyo nakairati. Halitinaiya tyaona exema maniya hoka menanehalitiya tyaonaha — nexa Jesus.

<sup>34</sup> — Xekohaseti, hiseta menira womana hatyo nakairati hiyeta — nexaha axahene.

<sup>35</sup> Hoka Jesus nehena ihiyeha: — Natyo atyo nakairati enokoatare. Xala xamaniya atyo tyaona noximi hoka maisaiya atyo nakihitita, maisaiya oinihitita — nexa.

<sup>36</sup> — Koxaka nomi xihie: Xiyaita xakore natyo hoka maisa xityakekore natyo. <sup>37</sup> Baba Enore ijita halitinai nomani hoka tyaonahaite noximi maniya. Tyaonahiya noximi maniya hoka maisaiya naxanekihenahitene haware. <sup>38</sup> Hiyaiya, Baba atyo axikatya natyo hoka notyoa enokoata notyoma maheta aokitereharenai. Exaokalita nikare notyaonita, maisa noxaokalita xini.

<sup>39</sup> — Baba noxaxikatyasehare atyo kasani nokoamaniye mohenerenai nokaxaiko waiye hoka maisa hatya hekoti meta nonitita aoka. Wainihenaha hoka

miyanitiye xowakehenaite nekasekihenahitene aoka.  
<sup>40</sup> Kasani tyoty tyoty noximi maniya tyaoahenerenai maka-  
 manehare tyaoahena aoka noxaxikatyasehare. Exahe  
 wainihena hoka nekasekihenahitenite miyanitiye  
 xowakehena — nexa Jesus ihiyeha.

<sup>41</sup> Nexa Jesus irae hoka judeunai sema hatyo iniraine  
 hoka maisa waiyeta ihiyeha. — Xoana hoka exakere  
 irae: “Natyo atyo nakairati enokoatare”, nita? nexaha  
 weraweratyakakoaha. <sup>42</sup> — Xoana, exe atyo José ityani  
 Jesus, aliterexe? Enexe inityo xoaha atyo wiyaiyane-  
 hare. Xoana hoka, “Enokoata nexoa” nita? nexaha.

<sup>43</sup> Hoka Jesus nehenahitene ihiyeha: — Xahalakihena xiwer-  
 awerala notahi. <sup>44</sup> Baba axikatya natyo hoka tyaona  
 noximi aohenerenai taita atyoite tyaona noximi  
 maniya. Maisaiya aokahitene nomani hoka maisaiya  
 aliyakere tyaonahitaha noximi maniya. Hoka miyani-  
 tiye ferakenehenaite hoka nekasekihenahitene. <sup>45</sup> Irait  
 xakaisaharenai xairala nanekoa exakerexe  
 xairatyoare tyaonita:

Enore ite tyoty aotyakisahene.

— Hoka xalanai xamani atyo semaxemaita Baba ni-  
 raine hoka ihiyeta atyo waiyorahitaha hoka tyaonahi-  
 taha noximi maniya. <sup>46</sup> Maisa atyo xala hare waiyare  
 Baba, enalita tyohenere taita atyo waiyitene.

<sup>47</sup> Aliterexe nomita xihye, xala xamaniya atyo tyakeko  
 natyo hoka tyaona mene matyotenehare. <sup>48</sup> Natyo atyo  
 nakairati enokoatare. Halitiya kanakairene hoka  
 tyaona meneya matyotenehare. <sup>49</sup> Xahetakomaniyere-  
 nai ene atyo kanakairaha nakairati maná maharexakiti  
 nali xakore hoka wainiha. <sup>50</sup> Hoka xala xamaniya atyo  
 kanakaira nakairati kaiserehare exoahenere enokoata  
 hoka maisaiya atyo wainita. <sup>51</sup> Natyo atyo nakairati  
 enokoatare. Xala xamaniya exe nakairati hiyeta  
 kanakaira hoka tyaona meneya atyo. Noháre atyo ty-  
 otya halitinai anere enakairaha maheta. Halitiya  
 kanakairene hoka tyaona meneya, maisaiya wainita —  
 nexa Jesus.

<sup>52</sup> Nexa Jesus irae hoka judeunai hatyaoseta ki-  
 natyaxa irakakoaha: — Aliyakereya hoka exe haliti  
 tyaisa halitinai haháre kakoa aokita? nexaha.

<sup>53</sup> Hatyaoseta Jesus nihitiya ihiyeha: — Aliterexe  
 nomita xihye, maisaiya xanijita Haliti Ityani nete, exa-  
 he xiserita itimalaxa hoka maisaiya xisaota menita  
 matyotenehare — nexa. <sup>54</sup> — Hoka xala xamani atyo  
 nete nisa, notimalaxi tera hoka tyaona mene maty-  
 otenehare. Eháre wainihena hoka miyanitiye xowake-  
 henaite hoka nekasekihetene. <sup>55</sup> Noháre atyo nakairati  
 kaiserehare, exahe notimalaxi atyo erati kaiserehare.  
<sup>56</sup> Xala xamani atyo nete nijita, notimalaxi terita xoaha  
 hoka tyaonita atyo nokakoi, exahe natyo tehitiya atyo  
 notyaonita tehitiya ekakoa.

<sup>57</sup> — Baba tyaota menitere hiyeta atyo maisa  
 nowainiye. Hatyo atyo axikatya natyo. Nikareta tehitiya  
 xala xamani nisa nete hoka maisaiya wainita, tyaona  
 meneya. <sup>58</sup> Exe nakairati atyo exoa enokoata. Maisa  
 atyo xahetakomaniyerenai ene kanakairehenere ma-  
 harexakiti akerehe xini. Hatyonai atyo kanakairaha ho-  
 ka enajikinita atyo wainiha. Hoka xala xamani atyo exe

nakairati naokitere kanakaira hoka tyaona meneya  
 atyo matyotenehare — nexa Jesus.

<sup>59</sup> Jesus hatahi irae ihiyeha Cafarnaum nali, xaho-  
 hisakoatyakalati hanako aotyakisahitene.

### Iraiti Menanehaliti Tah

<sup>60</sup> Hoka kahare Jesus xema tyaoniterehrenai sema  
 hatyo iniraine hoka maisa waiyeta ihiyeha. —  
 Exaotyakiraho atyo howitihare! Xalaiya tyaoahena haty-  
 oharaho? nexaha.

<sup>61</sup> Hoka Jesus atyo otita eweraweralaha hoka nehenahitene:  
 — Xoana xahalakihena xawenane nokoamaniye niraini  
 hiyeta? <sup>62</sup> Hoka Haliti Ityani haikoahetehena xihaotita  
 hetati tyaonitere nali enokoa xeta hoka xoanaiya  
 xisaohena? <sup>63</sup> Isekohaliti Waiyexe aiyatelikijita halitinai,  
 tyaona mene matyotenehare maheta. Hawawaiya hali-  
 ti hoka maisaiya aliyakere tyaota menita. Xasemaxe-  
 matya niraini xikakoa hoka ekakoitaite menanehaliti  
 xisaona — nexa. <sup>64</sup> — Haiyaharenai atyo xinekonitare  
 niraini tyakeko xakore hoka haiyaharenai atyo maisa  
 tyakekore — nexa Jesus ihiyeha. Jesus atyo enaheta  
 komaniyita otita matyakekotiterenai, exahe otita  
 hamatawatyasehare xoaha hoka: — Haiyaharenai atyo  
 maisa tyakekore niraini — nexa.

<sup>65</sup> — Hatyo hiyeta nomita xihye: Baba axikatya natyo  
 hoka tyaona noximi aohenerenai taita atyoite tyaona  
 noximi maniya. Maisaiya aokahitene nomani hoka  
 maisaiya aliyakere tyaonahitaha noximi maniya —  
 nexa Jesus.

<sup>66</sup> Hatyo najikinita kahare exema tyaoniterenai  
 haikoaheta enonita, xanehenahitaha hawenakalaha.

<sup>67</sup> Hatyaoseta 12-hare haxaotyakiraharenai axa: —  
 Xoana xiso tehitiya xiyanehetehena xaokowita? nexa  
 ihiyeha.

<sup>68</sup> — Maisaiya — nexa Simão Pedro. — Wahalakisaiya  
 hiso hoka xala xemaiya wisaonehena? Hiraine xemaiya  
 wisaona hoka ekakoitaiya wimakamanehare wisaona.  
<sup>69</sup> Wiso atyo wityakekota exahe waiyekehalakita atyo  
 womana. Enore xaxikalahare waiyexe atyo waokita  
 hiso — nexa Pedro Jesus hiye.

<sup>70</sup> Hoka Jesus nihitiya ihiyeha: — Xiso 12-hare no-  
 maniye naoka xiso hoka hatya xinekonitare atyo ti-  
 hanare — nexa Jesus ihiyeha. <sup>71</sup> Judas xaokaka, Simão  
 Iscariotes ityani xaokaka nikareta Jesus. Judas  
 exaotyakiraharenai konitare xakore hoka hatyo na-  
 jikinitaiya matawahena Jesus.

### Jesus Irae Haximarenenai Kakoa

**7** Hatyo najikinita Jesus xane Galiléia koa tonakon-  
 isahitene. Maisa Judéia koa xane aokowihitita,  
 naliyerenai judeunai nityohalitiranai aisene  
 aokowiyahitaha hoka. <sup>2</sup> Exowaka okoi judeunai hise-  
 hare aose xane hikoahena. Hatyo hisehaliti xowake-  
 hena hoka judeunai hatirisako tyaonahitaha hoka  
 “Hatirisako tyaoniterenai hisehare”, nexaha exaokaka.

<sup>3</sup> Hatyaoseta Jesus ximarenenai nehenahitene ihiyeha: —  
 Hiyanehena Judéia koa maniya hoka hisomiterehare-



nai hisomehena, hiyema tyaoniterenai hománe waiyaha maheta. <sup>4</sup> Hiyaiya, hatya haliti tahi waiyekehalaka kasemaka aohena hoka maisa hameteneta tyomare. Aliterexe atyo hisomita hoka hiyane ehaotiha hisomehena hoka tyotyaha waiyaha — nexaha ihiye. <sup>5</sup> Iximarenenai kakoita matyakekotitene hoka nikare irae-ta.

<sup>6</sup> Hoka Jesus nexa ihiyeha: — Maisa atyo xane hikoahenere noxanini aose. Hoka xiso xomana atyo haxowaketere. <sup>7</sup> Maisaiya atyo matyakekoneharenai ehareta xihye. Hoka nohiye atyo eharahitaha niraini xemere. “Xoana hoka iniyalahare xisomita?” nomihena ihiyeha hoka.

<sup>8</sup> — Xiyane atyo xiyaiye hena hisehaliti. Hoka maisaiya atyo kalikini natyo noxanita, maisa terota atyo xane hikoahenere noxanini aose — nexa Jesus haximarenenai hiye. <sup>9</sup> Nexa ihiyeha hoka hekota Jesus Galiléia koa nali.

### Jesus Xane Hatirisakorenai Hisehare Ana

<sup>10</sup> Hatyaoseta iximarenenai xaneha waiyaha maheta hisehaliti. Xaneha hoka hatyo najikinita Jesus tehitiya xane. Xane xakore atyo hoka hameteneta atyo xane, maisa atyo halitinai semahitaha exánene.

<sup>11</sup> Hatyaoseta judeunai nityohalitiranai tawehenene hatyo hisehaliti koa nali. — Xoana koxaka kaoka ali? nexa axaha hatyo nali tyaoniterenai.

<sup>12</sup> Hisehaliti koa nali tyaoniterenai kahare iraehehaha etahi akiti. Haiyanai atyo nexa exaokaka: — Hatyo atyo waiye — nexahitaha.

Hoka haiyanai atyo nexa: — Hatyo atyo maoseratita wiso — nexahitaha. <sup>13</sup> Kahare iraehe etahi akiti hoka maisa atyo tyotyaha haliti haoti xini, mairahitaha judeunai nityohalitiranai hoka.

<sup>14</sup> Hatyaoseta koxaka 4-ki ferakenehena ihisehareha tyaonita hoka Jesus xane isoa Iraexatyakalati Hanako hoka aotyakihenahene. <sup>15</sup> Aotyakisahitene hoka judeunai semahitaha exaotyakira hoka nexahitaha: — Aliyakerala hoka waiyore iraeta, maisa xakore waha kaxaotyakisakita hoka? nexa hakaharetyoaha.

<sup>16</sup> Hoka Jesus nehena ihiyeha: — Maisa atyo noxaotyakiri xini, noxaxikatyasehare Enore xaotyakira atyo hoka nikareta naotyakijita. <sup>17</sup> Xala xamani atyo Enore aokitere akereta tyoma aokowita hoka ekakoita ite waiyore noxaotyakiri kakoa hoka nehenaite: “Hatyo exaotyakira atyo Enore xaotyakira terota, maisa haxaotyakira kakoa xini aotyakijita wiso”. <sup>18</sup> Hatya halitiya atyo iraeta hatahita hoka hatyota atyo haxaexakerityaka aokita. Hoka haxaxikatyasehare xaexakerityakaiya aokita hoka hatyoiya atyo tota maniya tyaonita, maisaiya atyo maoseraita xini.

<sup>19</sup> — Moisés halakisa haxaotyakira xomana xisaona maheta exema maniya xakore hoka maisa atyo xisaonare exema. Xisaonitaiya exema maniya hoka maisaiya xaisa xaokowiye natyo. Xoana hoka nikareta xiso? nexa Jesus.

<sup>20</sup> — Xala aisa aokowita hiso? Kala tihanare tyaonita hikakoa hoka nikare hiraeta — nexa halitinai iniraene nahalakoa.

<sup>21</sup> Hatyaoseta Jesus nehena: — Kafaka hatya haliti hokakita hoka naiyatelikihetene hoka xityotyaha xahakaharetyoaha.

<sup>22</sup> — Xiso atyo enamokose tyaohena hoka enomanere milihe xaikotita Moisés xaotyakira akereta, sábadó ferakenehena hoka. Maisa hatyo akiti Moisés xowaka rotita xini nikare kaomaka. Enahetakomaniyerenai hotohare nikare tyaonita hoka Moisés xairahetene babera koa. <sup>23</sup> Mahateniti ferakene xakore atyo hoka Moisés niraene xema sábadó ferakenehena hoka enamokose nomanere milihe xaikotita hoka waiyeta xihye. Hoka xoanere hoka xehareta nohiye sábadó xowaka naiyatelikihetehena haliti hoka? <sup>24</sup> Waiyehena nikare xahekotya. Waiye maniya xamohena xiyahékola — nexa Jesus ihiyeha.

### Jesus Ála Enore Kalorexe Aohenere?

<sup>25</sup> Hatyaoseta haiyanai Jerusalém yerenai nehena: — Xoana aliterexe exe haliti aisaha aokowiyahitaha?

<sup>26</sup> Hiyaiya, wityotyaha wihaoti iraeta hoka maisa winityohalitiranai xoare nexareha ihiye, maisa mahokoanitaryeha iniraine. Xoana Enore Kalorexe Aohenere tehitiyala aokahitene? nexahitaha. <sup>27</sup> — Enore Kalorexe Aohenere ite tyohena hoka maisaite waiyekehalakita womana hetati kaotyakehenere aose kakoa. Xakore hoka exe haliti nawenane aose atyo waiyekehalakita womana — nexa iraeakaoahitaha.

<sup>28</sup> Hatyaoseta Jesus aotyakijita Iraexatyakalati Hanako hoka nexa: — Xoana aliterexe xiyaiyanehare natyo, exahe nawenani aose hoka waiyekehalakita xomana? Hatya axikatya natyo haliti koni, maisa noxaokalita xini nokaotyaki haliti koni. Noxaxikatyasehare atyo maisa maoseratyalie, xakore hoka maisa atyo xiyaiyanehare xini. <sup>29</sup> Hoka natyo atyo nowaiyitene, ehaliyata atyo notyoha, exaxikalahare atyo natyo hoka — nexa Jesus kintyaxa iraeta.

<sup>30</sup> Hatyaoseta otokaha xakore Jesus aokowiha hoka maisa xala harenai otokarene, maisa exotokakaose xane hikoahenere hoka maisa otokahitene. <sup>31</sup> Kahare haiyaharenai nali tyaoniterenai tyakekoha Jesus hoka nexaha: — Exe haliti kahare tyomita maomakahare wityakekone maheta. Xoana Enore Kalorexe Aohenere kaite tyohena hoka exe xaehare kaite tyomehena maomakahare? nexa axakaoahitaha.

### Axikatyaha Sorarenai Otokaha Maheta Jesus

<sup>32</sup> Fariseunai sema halitinai niraene Jesus tahi akiti hoka hatyo hiyeta axikatyaha sorarenai otokahene maheta. Sacerdotenai xekohasenai tehitiya kahi-naetyahene hoka sorarenai axikatyaha.

<sup>33</sup> Hoka Jesus nehena: — Iniraite notyaohitiya xikakoa hoka hatyohekotaite noxaniheta noxaxikatyasehare nali. <sup>34</sup> Noxanihetaite hoka xatawaite natyo hoka maisaiya xikaokehitiya

natyo. Hoka xisoiya atyo maisa aliyakere xiyaneta nox-anihenere nali — nexa.

<sup>35</sup> Hatyaoseta judeunai nexa irakakoahenaha: — Aliyakoiyala xane hoka maisa wikaokehititene? Xoana sekoala xanehena Grécia koa nali hoka judeunai tyaonahitere nali ala tyaohena? Xoana Grécia yerenai tehitiyalaite aotyakihena? <sup>36</sup> Xoana ala hoka nikare iraeta: “Noxanihetaite hoka xatawaite natyo hoka maisaiya xikaokehitita natyo. Hoka xisoiya atyo maisa aliyakere xiyaneta noxanihenere nali”, nita? nexaha.

### Hatya Oneseta Wenati Waiyexe Kaotyakehena

<sup>37</sup> Miyanitiye hisehaliti ferakene xowakehena kahare haliti hohisakoita hoka Jesus tityoa enekonyaha hoka kinatyaxa iraihena: — Xala xamani oinita hoka tyoa no-mani hoka nisa enomana one hoka tera — nexa. “One”, nitere atyo Isekohaliti Waiyexe xaokaka nikare iraeta.

<sup>38</sup> — Xala xamani tyakeko natyo hoka one ite kahare hikoia ihiyeta hoka tyaona mene matyotenehare Iraiti Waiyexe nanekoa iraetere akereta — nexa Jesus. <sup>39</sup> Jesus atyo Isekohaliti Waiyexe xaokaka iraeta. Exowakita maisa Isekohaliti Waiyexe kaokare tyakekohenerenai ana. Hoka Jesus waini hoka kaseheta hoka kalorexe tyaona hotohare hoka hatyaosetaiya Isekohaliti Waiyexe kaoka enomanaha.

### Halitinai Exaoretyakakoa

<sup>40</sup> Nexa hoka kahare naliyerenai semaha iniraine hoka nehenaha: — Aliterexe exe haliti atyo iraiti xakaisas-ehare Moisés aokitere — nexaha.

<sup>41</sup> Haiyanai atyo nexaha: — Exe atyo Enore Kalorexe Aohenere.

Hoka haiyanai atyo nexaha: — Xoana Enore Kalorexe Aohenere alaite Galiléia koata tyoa? <sup>42</sup> Exakere Iraiti Waiyexe nanekoa xairatyoare tyaonita: Enore Kalorexe Aohenere atyoite Davi jikolahare. Belém nali atyoite tyaona Davi tyaonitere nali — nexaha hahinaeharenai niraene nahalakoa.

<sup>43</sup> Hatyaoseta hahekore xakini ahekotya Jesus tahi.

<sup>44</sup> Haiyanai atyo otokaha Jesus aokowiha xakore hoka maisa otokahitene.

### Judeunai Nityohalitiranai Maisa Tyakekoahitaha

<sup>45</sup> Hatyaoseta sorarenai haikoaheta fariseunai, sacer-dote xekohasenai tyaonahitere nali. Haikoaheta hoka exekohasenai axahene: — Xoana hoka maisa xotokitene hoka ali xanolokitene? nexaha.

<sup>46</sup> Hoka sorarenai nexaha haxekohaseha hiye: — Maisa xala harenai hatyo haliti irahenere akere iraexe — nexaha.

<sup>47</sup> — Xoana xiso tehitiya emaoserala xema xisaona? nexaha. <sup>48</sup> — Xoana haiyaharenai kalorexenai, fariseu-nai xoaha tyakeko iniraine? Xiyaiya, maisa hatya hekoti tyakekore. <sup>49</sup> Alitere exe haliti hisoakere tyakekotene. Xakore atyo hoka exe halitinai maisa waiyorexeha

wiyaotyakisakaho kakoa hoka maisa waiyexeha Enore ana — nexaha sorarenai hiye.

<sup>50</sup> Hatyaoseta Nicodemos nexarexe, makiya xane irahenere Jesus kakoa, nehena ihiyeha: <sup>51</sup> — Wiyaotyakisakaho hiyeta atyo maisa haliti waberexot-yare rota. Wasema hotohare atyo iniraene, exahe etahi akiti hoka waberexowita — nexa.

<sup>52</sup> — Xoana hiso tehitiya Galiléia koatare? Hiyane hiyaiya babera iraiti xakaisaseharenai niraine kakoare. Maisa iraiti xakaisasehare kaotyakita Galiléia koata — nexaha ihiyeha.

<sup>53</sup> Nexa hoka hatyaoseta iniraikakoaneha tyotya hoka xanehenahitaha hahanaha nihatyaka.

### Hatya Ohiro Énatyalolo

**8** Hatyo najikinita Jesus xane Oliveiras tyairiya heno. <sup>2</sup> Kamaetali makiyita haikoaheta Iraex-atyakalati Hana nali hoka kahare haliti hohisakoa ehaliya exaotyakira semaha maheta. Jesus tyoka hoka aotyakisahitene.

<sup>3</sup> Hatyaoseta judeunai xaotyakiraho kakoa waiy-oreterenai fariseunai xoaha nolokaha hatya ohiro eno-mana. Hatya ena watyalitene hoka waiyahene hoka otokahene hoka tyoaha ekakoa Jesus ana. Tyoa kaoka-ha ekakoa hoka mokahene halitinai nenekesene <sup>4</sup> hoka nehenaha Jesus hiye:

— Xaotyakisatiye, exe ohiro wotoka, hatya ena watyalitene hoka. <sup>5</sup> Exakerexe atyo Moisés xaotyakira-ho aotyakisa wiso: “Maikaite nikare tyaoniterehalonai sehali kakoa kamokotyaka”. Nikare Moisés xairatya hoka hiso atyoite xoare hehena etahi? nexa axaha Jesus. <sup>6</sup> Nexa iraha ihiyeha hasakaharetyahene maheta, kasani haware irae Moisés niraine nonita aokowiyahitaha hoka eheno maniya xawatyahene aokowiyahitaha hoka.

Nexaha ihiyeha hoka Jesus meholokoa hoka xairatya hakahihi kakoa waikoa. <sup>7</sup> Hekota axahitene hoka Jesus aototaharetyoa hoka nehena ihiyeha: — Maika hatya maomanehare iniyalahare hotohare mokotya sehali kakoa exe ohiro — nexa hoka <sup>8</sup> meholokoahitiya waikoa hoka xairahitiya.

<sup>9</sup> Hatyo iniraine semaha hoka hikoahenahitaha hatya xakini, maisa xala hare iniyalahare maomanehare aka hoka. Inityohalitiranaiha hotohare hikoaheta, jikiniti maniya tyotya hikoahenahita. Ekakoita Jesus hawaw-itehena. Hatyo ohiro tehitiya hekota tityoita hatyo nali.

<sup>10</sup> Hatyaoseta Jesus aototaharetyoaheta hoka waiyehena atyo, maisa xala hare akeheta hoka nehena hatyo ohiro hiye: — Aliyo hiraeharetyasenai? Xoana maisa hatya hekoti hiyaisaka aokare? nexa.

<sup>11</sup> Hoka nexa Jesus hiye: — Maisa xala hare aka, Xekohaseti.

Jesus nihitiya ihiyeha: — Natyo tehitiya atyo maisa hiyaisaka naokita. Kotare hiyanehetehena. Hoka waiyehena atyo nikare iniyalahare hisomehitiya — nexa Jesus ihiyeha.

### Jesus Atyo Halitinai Xaokanatyakala

<sup>12</sup> Haxowaka Jesus iraihitiya halitinai kakoa: — Natyo atyo xaokanatyakalati akereta halitinai ana. Xala xamaniya atyo tyaona noximi hoka waiyeya atyo tyaona. Hoka maisaiya makaliroti koni tyaohitita — nexa.

<sup>13</sup> Nexa hoka fariseunai nehena Jesus hiye: — Kalikini atyo hitahi akiti taitehena hiraeta hikaxaexakeretyaka maheta. Hamaoseraita atyo wiso — nexaha.

<sup>14</sup> Hoka Jesus nehena ihiyeha: — Aliterexe xakore atyo notahi niraeta hoka maisa atyo namaoseraita xini. Aliterexe atyo niraeta hoka nawaiyoreta atyo notyoanini exahe noxaniniheta kakoa. Hoka xiso atyo maisa xawaiyorexe notyoanini exahe noxaniniheta kakoa. <sup>15</sup> Xiso atyo haliti xiyaiyehena, inira xawaiyorehena ekakoa hoka, “Exakerexe waiye xomokaka”, xita. Hoka natyo atyo maisa nikare niraexe halitinai xaokaka. <sup>16</sup> Haiya xowakiya nomihena, “Exe haliti atyo exakere tyaonita”, nomihenaiya hoka aliterexe atyo niraeta. Hiyaiya, maisa atyo nowawi xini notyaonita. Baba noxaxikatyasehare atyo tyaonita nokakoi hoka nikare niraeta.

<sup>17</sup> — Exakere iraiti xiyaotyakisakaho nanekoa xairatyoare tyaonita tehitiya:

Hinamahareya haliti xakai hawaiyane tahi hoka hakakoa irae ha hatyo tahi taita hoka xityakeko ini-raeneha. Iniraeneha atyo aliterexe.

<sup>18</sup> — Hiyaiya, natyo atyo noxakaita notahi akiti xihiyeha. Baba noxaxikatyasehare tehitiya xakaita notahi.

<sup>19</sup> Nexa ihiyeha hoka nehenaha ihiyeha: — Aliyo atyo hexe?

Hoka Jesus nehena ihiyeha: — Maisa xiyaiyanehare kaisere xini natyo, exahe Baba hoka maisa xiyaiyanehare xini. Xiyaiyanehare kaisereya natyo hoka Baba tehitiyaiya xiyaiyanehare — nexa Jesus ihiyeha.

<sup>20</sup> Exowaka Jesus aotyakijita Iraexatyakalati Hanako. Halyako olo nitini tyaonitere ako Jesus iraeta ekakoa ha. Irae ekakoaha hoka maisa otokahitene, maisa exotokakaosehenere hoka.

### Xala Atyo Jesus?

<sup>21</sup> Hatyaoseta Jesus nihitiya ihiyeha: — Noxanihete henaite xonita. Xatawa xakore ite natyo hoka maisaiya xiyaiyehitita natyo hoka iniyalahare xomane kakoitaite xiwaini hoka maisaiya atyo noxanihenere nali xijoita — nexa ihiyeha.

<sup>22</sup> Nexa irae hoka judeunai nexakakoahenaha: — “Maisaiya noxanihenere nali xijoita”, nita. Xoana tyaohena? Xoana hatyotala aisoawihena? nexakakoaha.

<sup>23</sup> Hatyaoseta Jesus nihitiya: — Xiso atyo ali waikoatare hoka natyo atyo enokoatare. Xiso atyo ali waikohekoare hoka natyo atyo maisa ali waikohekoare xini. <sup>24</sup> Hiyeta hoka nomita xihiyeha. “Iniyalahare xomane kakoitaite xiwaini”. Maisa tyare xityakekota natyo hoka — nexa Jesus ihiyeha.

<sup>25</sup> Hatyaoseta axehenahitiyene: — Xala atyo hiso? nexaha.

Hoka Jesus nehena ihiyeha: — Hetati xowakiyita nowaiya xiso hoka noxakai notahi xihiyeha. Kalikini noxakaihitiya xihiyeha. <sup>26</sup> Kahare xitahi nirai naokowita exahe nowatyali xiso naokowita. Hatyo noxaxikatyasehare atyo maisa maoseratyare xini hoka iniraine koxaka nasema hoka noxakaita halitinai hiye — nexa Jesus ihiyeha.

<sup>27</sup> Jesus xakore xakaita hanexe Enore tahi akiti ihiyeha hoka maisa waiyekehalakere enomanaha, motya hatya tahi iraeta aokahitaha.

<sup>28</sup> Hatyo hiyeta Jesus nihitiya ihiyeha: — Natyo atyo maisa atyo xoare noxaokali ximita notyomare. Baba aotyakihenere natyo taita atyo niraeta. Xainakihenaite Haliti Ityani hoka hatyaosetaite waiyekehalakeneha xomana “Natyo atyo Natyota terota” nomitere. <sup>29</sup> Noxaxikatyasehare atyo tyaonita nokakoi. Exaokalaoseta notyaona minita hoka maisa atyo nowawi halakisare — nexa Jesus ihiyeha. <sup>30</sup> Nikare Jesus hatyo tahi irae hoka kahare haliti tyakekoahene.

### Wakahare, Mawakaharehare Tyaoniterenai

<sup>31</sup> Hatyaoseta kahare judeunai tyakekoahene hoka Jesus nehena tyakekohenerenai hiye: — Niraini xemaia xisaona hoka noximi nawenatyasehareya naoka xiso <sup>32</sup> hoka waiyekehalakaiya xomana aliterexe hoka xikaiyakehetaiya xiwakaharene nonitata — nexa Jesus ihiyeha.

<sup>33</sup> Hatyaoseta nehenaha Jesus hiye: — Wiso atyo Abraão jikolaharenai, maisa atyo xoana xowakiya wakahare wisaonare, exahe wahetakomaniyeharenai hoka wakahare tyaonareha. Xoanere hoka wikaiyakeheta wiwakaharene nonitata haoka?

<sup>34</sup> Hoka Jesus nihitiya ihiyeha: — Xasemehena niraini: wakahareya atyo maisa aliyakere halakijita haxekohase. Nikareta iniyalahare nomaseharenaiya maisa aliyakere halakijita iniyalahare háomane. <sup>35</sup> Wakahare atyo maisa tyaoneta menexe haxekohase hanako hoka exekohase ityani atyo tyaoneta minita hanexe hanako. <sup>36</sup> Hoka Enore Ityaniya iyeheta xiso aokowi hoka iyehetaiya atyo xiso hoka maisaiya atyo hatyohekota wakahare xisaohitita.

<sup>37</sup> — Aliterexe atyo Abraão jikolaharenai xiso. Xakore atyo hoka xaisa xaokowita natyo, maisa noxaotyakiri xaokare xomana hoka. <sup>38</sup> Baba nali nowaiyehenere atyo noxakaita xihiyeha. Nikare xiso tehitiya xexe nali xawaiyorehenere akereta xisaonita — nexa Jesus.

<sup>39</sup> Hoka nehenaha: — Abraão atyo wexe — nexaha.

Hoka Jesus nehena ihiyeha: — Maisa Abraão jikolaharenai kaisere xini xiso. Abraão jikolaharenaiya atyo xiso hoka hatyo akeretaiya atyo xisaonita. <sup>40</sup> Nasema iraiti aliterexe Enore nali. Xakore hoka noxakaihene xihiyeha hoka hatyo hiyeta xaisa xaokowita natyo.

Abraão atyo maisa nikare tyaonare. <sup>41</sup> Xiso atyo xexe tyomehenere akereta xisomita — nexa Jesus.

Hoka nehenahitiyaha ihiyeha: — Hatita atyo Wexe, Enore taita atyo Wexe. Maisa hatya ityani xini wiso.

<sup>42</sup> Hoka Jesus nihitiya ihiyeha: — Maisa noxaokali ximita xini notyoa ali, Enore axikatya natyo. Enore nali-ta atyo notyoa hoka kalikini ali notyaonita. Enoreya atyo xexe hoka xawaiyetitaiya atyo natyo. <sup>43</sup> Xoana hoka maisa waiyekehalaka xasemare niraini? Maisa xasema xaokowiye niraini hoka hatyo hiyeta maisa waiyekehalakere xomana. <sup>44</sup> Tihanare xekohase ityaninai atyo xiso. Tihanare xekohase ityaninai atyo xiso hoka tyaonitere akereta xisaonita. Hetati xowakiya atyo aisarexe tyaona, maisa atyo iraiti aliterexe awaiyitita. Maoseratyaliye terota atyo, exahe maoseratyaliye kinohare. <sup>45</sup> Hatyo jikolaharenai atyo xiso hoka iraiti aliterexe niraihena xikakoa hoka maisa xityakekore natyo. <sup>46</sup> Xalaiya hotikisa nomani iniyalahare nománi? Xoana hoka iraiti aliterexe niraihena xikakoa hoka maisa xityakekore natyo? <sup>47</sup> Xala xamani atyo Enore xema maniya tyaonita hoka semaxemaita atyo Enore niraine. Hoka xiso atyo maisa xasemaxematyare iniraine, maisa atyo enomanerenai xini xiso hoka — nexa Jesus ihiyeha.

### Jesus Irae Abraão Tahí

<sup>48</sup> Hatyaoseta judeunai nehena Jesus hiye: — Kala ehokoreta wiraeta hitahi akiti. “Samaria yere atyo hiso, tihanare kakoare atyo hiso”, wita. Kala ehokoreta wiraeta — nexaha.

<sup>49</sup> Hatyaoseta Jesus nehena ihiyeha: — Maisa atyo tihanare kakoare xini natyo. Naiminijita atyo Baba hoka xiso atyo maisa xaiminisare natyo. <sup>50</sup> Maisa atyo naeroretyoa naokowiye. Hatya atyo aeroretya aokowita natyo. Maika hatyo ahekoty nokakoi — nexa. <sup>51</sup> — Xasemehena niraini, aliterexe niraeta: Xala xamaniya atyo tyaona niraini xema hoka maisaiya atyo wainita — nexa ihiyeha.

<sup>52</sup> Hatyaoseta judeunai nihitiya Jesus hiye: — Kalikini atyo waiyekehalaka womana. Tihanare terota tyaonita hikakoa. Abraão, iraiti xakaisaseharenai atyo toahiya waini. Hoka hita atyo: “Xala xamaniya atyo tyaona niraini xema hoka maisaiya atyo wainita”, hita. <sup>53</sup> Hiyaiya, wikinohare Abraão atyo waini. Xoana Abraão xahehare haokowita? Hatyo, iraiti xakaisaseharenai atyo waini tyoty. Xala haokowita? nexaha ihiyeha.

<sup>54</sup> Hoka Jesus nihitiya: — Natyotaiya atyo naeroretyoawi hoka maisaiya atyo waiyeta. Hoka maisa naerorityoawita, Baba atyo aeroritita natyo. Xenorexa xaokitere aeroritita natyo. <sup>55</sup> Xiso atyo maisa Enore xiyaiyare, exahe exema maniya xisaonare. Hoka natyo atyo nowaitene, exema maniya atyo notyaonita. “Maisa nowaiyarene”, nomiya atyo hoka xiso akere-taiya atyo namaoseratita. Hoka nowaiyitene atyo, notyaonita atyo iniraine xema. <sup>56</sup> Xikinohare Abraão atyo waiya notyoaniniheta ali xeta hoka ihalahare. Hatyo xowaka Abraão waiya natyo hoka ihalahare — nexa Jesus.

<sup>57</sup> Hoka judeunai nehena ihiyeha: — Maisa xakore 50 terehokoanehenere hekoti hisaonare hoka, “Nowaiya Abraão”, hita. Xoana hoka nikareta hiso? nexaha.

<sup>58</sup> Hoka Jesus nihitiya ihiyeha: — Aliterexe nomita xihiye: Abraão mawenanehareneta atyo koxaka terota Natyo Notyaonita — nexa Jesus.

<sup>59</sup> Nexa hoka hatyaoseta judeunai eharehenaha ihiyeha hoka xane iyaha sehali hoka mokotyaha Jesus aokowi. Xakore atyo hoka Jesus teroa enonyahitaha. Hatyaoseta hikoaheta Iraexatyakalati Hanakota hoka xaneheta enonyahitaha.

### Jesus Kaxoseheta Maxosehare

**9** Hatyaoseta Jesus jiyehena hoka waiya hatya haliti maxosehare. Nikarexe terota tyaona hanityo tyakota.

<sup>2</sup> Hoka exaotyakiraharenai axehenene: — Xaotyakisatiye, xoana hoka exe haliti tyaona maxosehare? Xoana iniyalahare ala tyoma, enexe inityo xoaha kore iniyalahare tyoma hoka hatyo nahalakoa maxosehare tyaona? nexaha.

<sup>3</sup> Hoka Jesus nehena ihiyeha: — Maisa enómane iniyalahare, exahe enexe, inityo xoaha nómane iniyalahare hiyeta maxosehare tyaona. Maxosehare tyaona Enore niyaterere kawaiyaka maheta — nexa. <sup>4</sup> — Xasemehena, waiye hakaka atyo ferakoa. Nikare kasani namiyatya naokowita noxaxikatyasehare hatene. Hiyaiya, makehena atyo. Maka atyoite hoka maisa xalahare hahitita. (“Makehena”, nitere atyo hakamane xaokaka nikareta). <sup>5</sup> Haliti koni notyaonitere xowaka atyo exaokanatyakalaha notyaonita enomanaha — nexa Jesus ihiyeha.

<sup>6</sup> Nexa hoka hatyaoseta xata hotya waikoa hoka inira aolowihitya waikohe haxataho kakoa hoka mokene maxosehare xose hiye hoka nehena: <sup>7</sup> — Hiyane hatihehete hena one nitini Siloé xaiya — nexa. Hatyo Siloé nitere atyo wiyako maniya, “Exaxikatyakahare”, nita.

Nexa ihiyeha hoka hatyaoseta maxosehare xane tiheheta hatiho hoka waiyakatyare haikoaheta tyaonitere nali.

<sup>8</sup> Hatyaoseta ewaiyaneharenai nexaha: — Exe haliti ferakiti nihatyaka tyoka ali hoka axita olo haomana. Hatyo terota, xoana alitere? nexa axakakoaha.

<sup>9</sup> — Há, hatyo terota — nexa haiyanai.

— Maisa hatyo xini, hatyo akerehare — nexa atyo haiyanai.

— Há, natyo terota — nexa hatyo haliti.

<sup>10</sup> Hatyaoseta axahene: — Aliyakere hisaona hoka kalikini hiyaiyakatyareheta? nexa axahene.

<sup>11</sup> Hoka nehena: — Hatya haliti Jesus nexarexe aolowihitya waikohe hoka mokene noxosenai hiye hoka nexa nohiye: “Hiyane one nitini Siloé nali hatihehete hena hitiho”. Nexa hoka hatyaoseta noxani natiheheta notiho hoka kalikini nowaiyakatyareheta — nexa.

<sup>12</sup> — Aliyo hatyo haliti? nexaha axahene.

— Owane — nexa ihiyeha.

### Fariseunai Axehekoatyaha Kaxosehetehehere

<sup>13</sup> Hatyaoseta hatyo haliti waiyakatyareheta hoka xaneha ekakoa fariseunai nali. <sup>14</sup> Hatyo Jesus aolowihitya waikohe hoka kaxosehetehehere haliti xowaka atyo sábadu ferakene.

<sup>15</sup> Xane kaokaha ekakoa enomanaha hoka fariseunai axene hatyo ekaxosetyakeheta akiti hoka nexa ihiyeha: — Moka haxalowehera noxosenai hiye hoka noxani natiheheta notiho hoka kalini atyo nowaiyakatyareheta — nexa.

<sup>16</sup> — Hoka hatyo haliti maisa Enore xaxikalahare xini. Hiyaiya, sábadu atyo mahateniti ferakene xakore hoka hakita. Maisa winaho xema tyaonita — nexaha fariseunai irieta.

Hoka haiyaharenai nexaha: — Aliyakereya iniyalahare nomasehare kalore tyoma maomakahare? nexaha. Hatyaoseta iraikakoaha hoka hahekore, hahekore xikini ahokotyahitaha.

<sup>17</sup> Hatyaoseta fariseunai axehitiyene: — Hoka hiso atyo xoare haoka hatyo hikaxosetyaseheta? nexaha.

— Iraitu xakaisasehare atyo naokene — nexa hatyo kaxosehetehehere ihiyeha.

<sup>18</sup> Hoka judeunai atyo maisa tyakekota iniraine hoka kawisaha enexe inityo xoaha hoka axahene: <sup>19</sup> — Xoana, exe haliti atyo xityani? Xoana alitere maxosehare terota tyaona? Nikare hoka aliyakere kalikini waiyakatyareheta? nexaha.

<sup>20</sup> Hoka enexe, inityo xoaha nehenaha: — Exe wityani terota, aliterexe maxosehare tyaona. <sup>21</sup> Hoka kalikini kaxosehetehehere akiti kakoa atyo maisa waiyorexe, exahe ekaxosetyasehare kakoa tehitiya maisa waiyorexe. Xala xamani ala kaxosehetene — nexaha. — Xaxehenene: inityohaliti tyare hoka hatyota xakai hatahi akiti xihye — nexa enexe, inityo xoaha ihiyeha.

<sup>22</sup> Enexe, inityo xoaha mairahitaha judeunai nityohalitanai hoka nikare irae. Judeunai nityohalitanai koxaka iraikakoaha: — Hatya halitiya: “Jesus atyo Enore Kalorexe Aohenere”, nexa irai hoka maxisoaniteneya xahohisakoatyakalati hanako — nexaha koxaka. <sup>23</sup> Hatyo hiyeta enexe, inityo xoaha nexa: — Xaxenore, koxaka inityohaliti — nexaha.

<sup>24</sup> Hatyo hekota kawihenahitiyaha hatyo maxosehare tyohenere hoka nexaha ihye: — Hasemehena, haiminisaira Enore. Exe hikaxosetyasehare atyo iniyalahare nomasehare, waiyore enawenane kakoa — nexaha ihye.

<sup>25</sup> Hatyaoseta nehena ihiyeha: — Kala xoana iniyalahare nomasehare xamani, maisa xamani ala, maisa waiyorexe ekakoa. Hoka exe taita kakoa atyo waiyore. Nomaxosehare ene hoka kalikini atyo nowaiyakatyareheta — nexa ihiyeha.

<sup>26</sup> — Xoana moka hiso? Aliyakere kaxoseheta hiso? nexa axehenahitiyene.

<sup>27</sup> — Koxaka noxakaini xihye hoka maisa xityakekota. Xoare maheta noxakaihitiya xihye xaowita? Xoana

xisaona xaokowita tehitiya exaotyakira xema? nexa ekoaxatya enomanaha.

<sup>28</sup> Nexa hoka hatyaoseta aiyalatya enomana: — Hiso atyo exaotyakira xema maniya nawenatyasehare. Hoka wiso atyo Moisés xaotyakira xema maniya wisaonita. <sup>29</sup> Enore irae Moisés kakoa, hatyo kakoa waiyore. Hoka exe hikaxosetyasehare atyoala alyakota xamani kaotyaka — nexaha.

<sup>30</sup> Hoka nihitiya ihiyeha: — Kaxiyani, xoana hoka winaho kakoa xaiyore xaokowita xakore hoka exe haliti kaotyakene akiti kakoa maisa waiyorexe? Kaxoseheta xakore natyo hoka maisa waiyorexe ekaotyakene akiti kakoa. <sup>31</sup> Hiyaiya, Enore atyo maisa iniyalahare nomaseharenai niraexala semaxematyare. Hoka awaiyetitaiya Enore hoka aokitere akeretaiya tyaonita hoka Enoreya semaxematya iniraexala. Hatyohare kakoa atyo waiyoreta. <sup>32</sup> Kalikini rotita maxosehare tyohenere kakaxosetyakeheta. Toahiya xowaka, exahe waikohe kaomakehene najikinita maisa kasemakere exehare tahi, kalini rotita kasemaka. <sup>33</sup> Ekoiya awa Enore axikaitene hoka maisaiya xoana mokita natyo — nexa ekoaxatya enomanaha.

<sup>34</sup> — Hisaohenere xowakita iniyalahare hisoma. Xoana hoka haotyakisa wiso xaokowita? nexaha ihye. Hatyaoseta maxisoanetene xahohisakoatyakalati hanako.

### Wenati Maniya Maxosehaliti

<sup>35</sup> Jesus sema emaxisoanene xahohisakoatyakalati hanako hoka hatyaoseta ahalakoatene hoka axene: — Xoana Haliti Iyani hityakekota? nexa.

<sup>36</sup> — Xekohaseti, xala atyo Haliti Iyani hoka notyakekone? nexa.

<sup>37</sup> — Kalini hiyaitene, natyo niraetere hikakoa — nexa Jesus ihye.

<sup>38</sup> — Xekohaseti, notyakeko — nexa meholokoa Jesus nahalakoa awaiyetene.

<sup>39</sup> Hatyaoseta Jesus nihitiya: — Notyoha nowatyali halitinai maheta. Nikare ite hoka maxoseharenaite waiyakatyareheta hoka kaxosenaite maxosehare tyaheta — nexa.

<sup>40</sup> Haiyanai fariseunai nali tyaonita hoka semaha Jesus niraine hoka nexaha: — Xoana wiso tehitiya wimaxosehare haokita? nexaha.

<sup>41</sup> — Ximaxosehariya hoka maisaiya xoare kaxawatyakita xiheno. Hoka, “Waiye wiyaita”, xita hoka kaxawatyakita xiheno — nexa Jesus ihiyeha.

### Jesus Xaotyakiraharenai Atyo Kalanero Akereta

**10** Jesus nihitiya: — Xasemehena niraini: Kaiwarexe iso aokowihena kalaneronai talalahokoako hoka maisa ixisoakala ahota isoare. Halaisoa jiyita talarehoko hoka xane hikoita kalaneronai ana. <sup>2</sup> Hoka ekaxaikotyasehare isoahena hoka ixisoakala nahota ijoita. <sup>3</sup> Xisoakalati kaxaikotyasehare majiholatita enomana hoka ijoita. Hatyaoseta iraihena hakaxaikoneharenai hoka hoka ekaxaikoneharenai kalaneronai otyahita ex-

ako. <sup>4</sup> Hatyaoseta ahikoatyahitene talarehokoakota hoka enahetaha tonita hoka kalaneronai xaneta exema, exako waiyekehalakita enomanaha hoka. <sup>5</sup> Mawaiyakahareya atyo hoka maisaiya atyo xanahitaha exema, tekoahaiya atyo enonita, maisa otyareha mawaiyakahare hako hoka — nexa Jesus.

<sup>6</sup> Hatyo tahi Jesus xakai ihiyeha aotyakisahitene maheta xakore hoka maisa waiyekehalakita enomanaha.

### Jesus Atyo Waiyexe Kaxaikotyatiye

<sup>7</sup> Hatyaoseta Jesus nihitiya: — Aliterexe nomita xihiye, natyo atyo xisoakalati kalaneronai xisoakalaho akereta. <sup>8</sup> Haiyanai nahitita kaokaha kalaneronai ana hoka maisa atyo kalaneronai semaxematyare iniraineha, kaiwarexe, xalijiniharexenai akereta taita hoka. (“Kalaneronai” nita Jesus, hakaxaikoneharenai haliti xaokaka nikare iraeta.)

<sup>9</sup> — Natyo atyo xisoakalati akereta. Xala xamaniya isoa nonaho hoka kaiyakehetaiya iniyalahare nonitata exahe isoaheta, hikoaheta, kanakairita harenai hoka waiyeya tyaona. <sup>10</sup> Hoka kaiwarexe atyo kaokehena enomanaha hoka kaiwita, aijita, mawenekoaretita kalaneronai. Hoka natyo atyo notyoo kalaneronai waiye tyaonaha maheta, exahe waiye kaiserehare tyaonaha maheta — nexa.

<sup>11</sup> — Natyo atyo kalanero kaxaikotyasehare waiyexe. Kalanero kaxaikotyasehare waiyexe atyo wainita hakaxaikoneharenai ana. <sup>12</sup> Wakahare atyo maisa kalanero kaxaikotyasehare kaisere xini, kaoloxa maheta taita atyo hakita. Kalaneronai maisa ehalanai xini. Hiyeta hoka ahoxa kaokehena enomana hoka tekoita hoka ahoxa aijita, aekoakijita kalaneronai. <sup>13</sup> Kaoloxa maheta taita hakita. Maisa iyakawatyare kalaneronai hoka nikare tekoita — nexa.

<sup>14</sup> — Hoka natyo atyo kalanero kaxaikotyasehare waiyexe. Nokaxaikonihiarenai atyo nowaiyanihiarenai makere. Natyo tehitiya atyo ewaiyanehareha. <sup>15</sup> Nikare Baba Enore atyo nowaiyanihare, hoka natyo atyo ewaiyanehare. Maikaite nowainihena nokaxaikonihiarenai ana — nexa Jesus.

<sup>16</sup> — Maisa aliyerenai taita xini nokaxaikonihiare. Hahotyalihiarenai tehitiya nokaxaikonihiare hoka kasani nahohisakoatyahene hoka hahotyalyita namoka nokaxaikonihiarenai naokowita. Hatyaosetaite niraini xema maniya tyaonaha. Nikare ite hoka hahotyalyita tyaonaha hoka haterore ite ekaxaikotyasehareha tyaona.

<sup>17</sup> Nowainite nokaxaikonihiarenai ana hoka hatyaosetaite nokaseheta. Hatyo hiyeta Baba Enore awaiyetita natyo. <sup>18</sup> Maisa halitinai xaokala xini nowainihena, noxaokalita atyoite nowainihena. Baba aiyatelikisa natyo hoka noxaokalita nowainihena. Hatyaosetaite noxaokalita nokaseheta. Baba irai nokakoi hatyo akiti hoka exaokalita nikareta natyo — nexa Jesus ihiyeha.

<sup>19</sup> Hatyaoseta judeunai semaha Jesus niraine hoka hahekore makere ahokotyahita, hoka haiyaharenai nexa: <sup>20</sup> — Tihanare tyaonita ekakoa hoka hatyahareta. Xoana hoka xasemaxemaita iniraene? nexaha haiyanai iraeta.

<sup>21</sup> Hoka haiyanai atyo nexaha: — Tihanare kamilakor-erahareya atyo hoka maisaiya exakere iraexe. Xoana, tihanareya kaxoseheta maxosehare? nexaha.

### Judeunai Kirawaneha Jesus

<sup>22</sup> Exowakiya judeunai Jerusalém nali otyaxematyahi-taha hahetakomaniyerenai nómane xahohisakoatyakalati hana hisehare. Exowaka wehe akiti.

<sup>23</sup> Hatyaoseta Jesus isoa Iraexatyakalati Hanako hoka tonakoita Iraexatyakalati Hanako Salomão xisoakalaho aokahitere nali.

<sup>24</sup> Hatyaoseta judeunai hohisakoaha ehaliya hoka axehenahene: — Kahare wahekoita hitahi hoka wamaikohareta. Xoana Enore Kalorexe Aohenere hiso, maisa kore? Hiyakaihena waiyekehalaka wihiye — nexaha ihie.

<sup>25</sup> Hoka Jesus nehena: — Koxaka Enore nalitare atyo natyo nomi xihiye hoka maisa xityakekota niraini.

Xiyaiya, kahare maomakahare notyoma Baba xaokalita. Baba nalitare terota atyo natyo hoka nikare notyaonita. <sup>26</sup> Xakore hoka maisa xityakekota natyo. Maisa atyo nokaxaikonihiarenai xini xiso hoka hatyo hiyeta maisa xityakekore natyo. <sup>27</sup> Nokaxaikonihiarenai semita noxako hoka naokitere akereta tyomahitaha. Ewaiyanehareha atyo natyo hoka tyaonahitaha niraini xema. <sup>28</sup> Nokaxaikoahinite hoka tyaonaha mene matyotenehare hoka maisaiya atyo wainahitaha. Maisaiya atyo xala hare iyehenahititene noniti. <sup>29</sup> Baba atyo maxaexahityakahare hoka maisaiya atyo xala harenai iyehitita nokaxaikonihiarenai enonitata — nexa.

<sup>30</sup> — Baba natyo xoaha atyo haterore, hakakoa wisaonita — nexa Jesus judeunai hiye.

<sup>31</sup> Hatyaoseta judeunai eharehenaha hoka xane kolatya sehalinai mokotyaha maheta Jesus.

<sup>32</sup> Ehareha ihie hoka Jesus nehena ihiyeha: — Kahare notyoma xihaoti, waiyexe makere nománinae. Baba aokiterehare taita notyoma. Xoana, hatyo nománi xemere xamokotyaxaokowita natyo? nexa axahene.

<sup>33</sup> Hoka judeunai nehena ihie: — Maisa atyo hománe waiyexe xemere xini wamokotyaxaokowita hiso. Hoka hiraine atyo maisa waiyexe womana, maisa haiminisare Enore hoka. Haliti xakore hiso hoka Enore haokowita hoka hatyo xemere wehareta hihiye — nexaha ihie.

<sup>34</sup> Hoka Jesus nehena ihiyeha: — Exakerexe xairatyoare tyaonita babera xiyaotyakisakaho nanekoa:

Enorenai makere xiso, nomita.

<sup>35</sup> — “Enorenai makere xiso”, nita Enore halitinai hiye, iniraine kaoka enomanaha hoka. Hatyo babera Enore niraine kakoare atyo aliterexe taita iraeta hoka maisaiya kahalakisakita. <sup>36</sup> Hiyaiya, Baba axikatya natyo halitinai koni haxaokalita. Nikare hoka xonanere hoka “Natyo atyo Enore Ityani”, nomihena hoka Enore maisa naiminisare xaokita? <sup>37</sup> Maisaiya Baba xaokalaoseta notyomare hoka ehokoretaiya atyo maisa xityakekota natyo. <sup>38</sup> Maisa xityakekota natyo hoka maika noty-

omiterenai hekoti xityakekohena. Nománinai hiyeta xawaiyorehena nokakoi. Baba atyo tyaonita nokakoi, exahe natyo hoka notyaonita ekakoa — nexa Jesus.

### Jesus Xaneheta Hatyo Nalita

<sup>39</sup> Nexa Jesus ihiyeha hoka eharehitiyaha ihiye hoka hatyaoseta tohenahitiyene aokowiha xakore hoka iyoawiheta enonyahitaha. <sup>40</sup> Jesus iyoawiheta enonyahitaha hoka haikoaheta one Jordão halakoiya maniya hoka João Batista hetati batixaitere aose xane tyaona.

<sup>41</sup> Nali xane tyaona hoka kahare haliti kaoka eno-mana. — João Batista atyo maisa xoare hare tyomita maomakahare. Xakore hoka tyotya irahenere Jesus tahi atyo aliterexe, maisa maoseraita xini wiso João — nexa iraha. <sup>42</sup> Kahare haliti tyakeko Jesus hatyo nali.

### Lázaro Kamane Tahi

**11** Haxowakiya Lázaro nexarexe hokakita. Wenakalati Betânia nali tyaonita, hahahalonai Marta, Maria xoaha kakoa. <sup>2</sup> Hatyo Maria atyo Jesus kiji taha hoka owika airaxero ikiji hiye, exahe hasekase kakoa tirihetene.

<sup>3</sup> Enahahareha Lázaro hokakita hoka enahahalonai axikaxatyaha Jesus ana: — Hihinaehare Lázaro hawaiyetitere hokakita — nexaha.

<sup>4</sup> Jesus sema ehokakene tahi hoka nexa: — Maisaiya hatyo kahehaliti kakoa Lázaro wainita. Hokakita hoka ite kaxaeyatelekisaka hoka hatyo hiyetaite Enore kaxaexakerityaka, exahe Enore Ityani hoka kaxaexakerityaka — nexa Jesus.

<sup>5</sup> Jesus awaiyetita Marta, iximalone Maria, enahahareha Lázaro xoaha. <sup>6</sup> Jesus sema Lázaro hokakene xakore hoka hatyo tyaonitere nalita heko hinamaki tyaohitiya. <sup>7</sup> Hinamaki ferakene najikinita hoka Jesus nehena haxaotyakiraharenai hiye: — Wiyala wiyane Judéia koa xeta — nexa ihiyeha.

<sup>8</sup> — Xaotyakisatiye, xoana hoka hiyanehitiya hatyo nali haokowita? Hiyaiya, kafaka maniya judeunai nali tyaoniterenai mokotyaha hiso aokowiha sehali kakoa — nexaha exaotyakiraharenai iniraine nahalakoa.

<sup>9</sup> — Maisa ferakiti tyokakere xini, wahakiya atyo. Watonita ferakoa hoka waiye wiyaiyita waheta maniya hoka maisa wahisehityoare. <sup>10</sup> Hoka makiya atyo wato-hena hoka haiya xowaka wahisehityoita, maisa waiye wiyakere makiya hoka — nexa. <sup>11</sup> — Xasemehena, wihinaehare Lázaro nemakita xakore hoka noxanite nekaosekihetene — nexa Jesus haxaotyakiraharenai hiye.

<sup>12</sup> — Nemakitaiya hoka waiyeya atyo kehexoawiheta — nexaha haxekohaseha hiye.

<sup>13</sup> Jesus iratere Lázaro kamane xaokaka. Hoka exaotyakiraharenai motya enemaka xaokaka nikareta aokahitaha.

<sup>14</sup> Hatyaoseta Jesus nexa: — Lázaro atyore waini — nexa, awaiyekehalakatene enomanaha. <sup>15</sup> — Waini atyo Lázaro. Hoka ehokoreta ali notyaonita, wainihena

xakore hoka. Enawenakala nali wisaonita hoka maisaiya xityakekota — nexa. — Wiyala kalikini hoka wiyaiya — nexa Jesus ihiyeha.

<sup>16</sup> Hatyaoseta Tomé Dídimó nexarexe nehena hahinaeharenai hiye: — Wiyala wiyane exema hoka wiyaini ehakakoane — nexa.

### Jesus Atyo Ekasekihitiya Haliti

<sup>17</sup> Hatyaoseta xaneha. Jesus xane kaokehena Betânia nali hoka Lázaro koxaka 4-kihena tyaonita xawatyakalatyako. <sup>18</sup> Wenakalati Betânia maisa sekore Jerusalém nalita, hanama kilometrone taita. <sup>19</sup> Maisa sekore hoka judeunai kahare xane wiyaha Marta, Maria xoaha emaxalotyahene maheta enahahareha kamane hiyeta.

<sup>20</sup> Hoka Marta sema Jesus kaokene. Owitehena hoka xane atihotene. Hoka Maria atyo hekota hahanakota.

<sup>21</sup> Marta xane atihotya Jesus hoka nehena ihiye: — Aliya hiso hoka maisaiya naháhare wainita, Xekohaseti — nexa ihiye. <sup>22</sup> — Waini xakore atyo hoka xalini hareya haxa Enore hoka tyomeniya homana. Waiyekehalakita atyo hatyo akiti nomani nexa Marta Jesus hiye.

<sup>23</sup> — Haháhare ite kaseheta — nexa Jesus ihiye.

<sup>24</sup> — Miyanitiye xowakehena atyoite hoka naháhare kaseheta. Nasemita hatyohare akiti hoka notyakekota — nexa Marta ihiye.

<sup>25</sup> — Natyo atyo kamatinai xekasekisasehareheta. Halitiya tyaona noximi maniya hoka waini xakoreya hoka kasehetaiya. <sup>26</sup> Exahe kasetere noximi maniya tyaonitereya maisa wainita. Xoana hityakeko niraini? nexa Jesus ihiye.

<sup>27</sup> — Há, notyakekota atyo, Xekohaseti — nexa. — Hiso atyo Enore Ityani, Enore Kalorexe Aohenere atyo hiso. Wahetakomaniyerenai nexaha exaokaka: “Maika xatyaha exahita. Ekakoitaite kaotyaka xomana”, nexaha — nexa Marta Jesus hiye.

### Jesus Tiya

<sup>28</sup> Nexa ihiye hoka haikoaheta hahana xeta hoka xane haximalone Maria kakoa irai hameteneta: — Xaotyakisatiye kaoka hoka kawijita hiso — nexa haximalone hiye.

<sup>29</sup> Maria semene hoka ihalahalo xane Jesus tyaonitere nali xeta. <sup>30</sup> Hatyo xowaka Jesus maisa kaokehenerene wenakalati, hekotata Marta ahalakohenere aose.

<sup>31</sup> Ehanakoha haiyanae judeunai tyaonita, Maria emaxalotyahitaha. Hoka waiyehenaha atyo, Maria atyo ihalahalo hikoa xane hoka hatyo emaxalotyasenai xaneha exema, motya atyo xane xawatyakalati nali hoka tiyahena maheta aokahitaha.

<sup>32</sup> Maria xane kaoka Jesus ana hoka exoa hakaoli kakoa ehaliya hoka nehena: — Aliya hiso hoka maisaiya naháhare wainita, Xekohaseti — nexa tiya.

<sup>33</sup> Waiyehena atyo Jesus, Maria atyo tiyita, judeunai tehititiya tiyita ehakakoane. Tiyahitaha makere hoka Je-

sus hiye kirakoane hoka amaikohare. <sup>34</sup> — Aliyo exawatyakala? nexa axahene.

— Witya hoka hiyaiya, Xekohaseti — nexaha ihiye.

<sup>35</sup> Hatyaoseta Jesus tiya.

<sup>36</sup> Jesus tiyita hoka judeunai nexaha: — Xiyaiyehena, tiyita. Kala awaiyetita tehitiya Lázaro — nexaha. <sup>37</sup> — Aliya Lázaro hokakitere xowakiya hoka xoanaiya mokene? Kafaka maniya maxosehare kaxoseheta. Aliya Lázaro hokakitere xowaka hoka xoana xamaniya hoka aiyatelikehete niya hoka maisa wainita — nexa haiyahrenai.

### Lázaro Kaseneheta Tahi

<sup>38</sup> Jesus hekotata kalore amaikohareta hoka xane xawatyakalati nali. Hatyo xawatyakalati atyo sehali kakoakotyaka, ijihola atyo sehali taose. <sup>39</sup> Jesus xane kaoka xawatyakalati nali hoka nexa ihiyeha: — Xiye-hete hena sehali taose — nexa ihiyeha.

Nexa hoka kamati nahahalo Marta nehena: — Maisaiya, Xekohaseti — nexa. — Hiyaiya, koxaka 4-kihena tyaonita xawatyakalatyako. Kala koxaka xetehena. Kotare mawatyalisakahare — nexa.

<sup>40</sup> — Maika xityakekohena hoka xiyaiya Enore nómane, nomira xihye ka. Xoana himaotyaneheta niraini? nexa Jesus ihiye.

<sup>41</sup> Nexa ihiye hoka iyehenahitaha sehali xawatyakalati jihola.

Iyehenahitene hoka Jesus wahakotyaxanoxeta hoka nehena: — Maisa xoana xowaka himaxekoaxalere niraini hoka nihalahareta hikakoa, Abá. <sup>42</sup> Hiyaxikalahare atyo natyo hoka hasemaxematya minita niraini hikakoa. Kalikini niraexaita homana exe halitinai haoti tyakekoha maheta hiso — nexa iraexatyaxano Enore hiye.

<sup>43</sup> Halakisa hairaexala hoka kintyaxa kawiyatyaxano: — Lázaro, hahikoahete hena hatyoakota — nexa.

<sup>44</sup> Nexa hoka Lázaro hikoaheta hakiji, hakahe, hatiho olalisoare kakoa haxawatyakalakota.

Eháre olalisoare imiti taose kakoa hoka Jesus nehena: — Xamaxolalihete hene hoka waiye toneheta — nexa ihiyeha hoka maxolalihete hene.

### Ahekotyaxano Aisaha Maheta Jesus

(Mateus 26.1-5; Marcos 14.1-2; Lucas 22.1-2)

<sup>45</sup> Hatyaoseta kahare judeunai Maria xema tyohenerenai tyakekoha Jesus, waiyaha enómane hoka. <sup>46</sup> Hoka haiyanai atyo xane hoka xakaihahene fariseunai hiye Lázaro ekasekihete hene tahi.

<sup>47</sup> Hiyeta hoka sacerdotenai, fariseunai xoaha nityohalitiranai ahohisakoatyakakoa iraekakoa maheta. — Xoanaita wamohenene? Exe haliti kahare tyomita maomakahare. <sup>48</sup> Wahalakiseniya hoka ekakoitaiya tyotyahaiya tyakekoahene hoka hatyaosetaiya maisa waiyeta Roma yerenai hiye hoka tyoahaiya iyaha wawenakala wiwaikohera xoaha wonita, exahe mawenekoaretyahaiya Iraexatyakalati Hana — nexa iraikakoa.

<sup>49</sup> Hatyo terehokoane xowakiya Caifás sacerdote xekohase tyaonita hoka nexa ihiyeha: — Xiso atyo

maisaxawaiyorexe. <sup>50</sup> Hatyaiya waini womana wityotyaxano anere maheta hoka waiyeya, maisaiya Israel yerenai kamehotyakitaxano. Kala maisa hatyohare akiti xahekotyaxano — nexa ihiyeha.

<sup>51</sup> Caifás iraihena hoka maisa hatyotaxano haxahekola xini iraeta. Sacerdotenai xekohase tyaonita hoka waiya Jesus kamane naheta maniyya Israel yerenai ana, <sup>52</sup> exahe seko tyaoniterenai xaoreterenai xoaha ana hoka hatyo najikinitaiya Enore kaxaikoneharenai hatyalita tyaonaha.

<sup>53</sup> Nexa Caifás irai ekakoaha hoka hatyo najikinitaxano judeunai nityohalitiranai iraekakoa Jesus haxaisane tahi. <sup>54</sup> Hatyo hiyeta Jesus maisa hotikijoita judeunai ana Jerusalém nali hoka xane enonyahitaha, xane kaoka wenakalati Efraim nali hoka hatyo nali tyaonahaxaotyakiraharenai kakoa maharexakiti maniyya.

<sup>55</sup> Hatyaoseta okoi Páscoahena, okoi judeunai hisehare aose xane hikoahena. Kahare judeunai xane Jerusalém xeta hisehaliti nahitita, waiye maniyya moka-ha hawenaneha maheta.

<sup>56</sup> Hatyaoseta Jerusalém nali tawaha Jesus xahita. Xane isoaha Iraexatyakalati Hanako hoka iraikakoa: — Xoana tyoa waiya xamanite hisehaliti, maisa xamanite? nexaha.

<sup>57</sup> Sacerdotenai, fariseunai xoaha nityohalitiranai otokaxa aokowiyahitaha Jesus. Hiyeta hoka nexa iraeha: — Maika kaokehena hoka aliyo xamani xiyaiyehene hoka waiyekehalakehena xomana hoka xiyakaini wihiye — nexaha otokaxa aokowitaha Jesus hoka.

### Jesus Xane Betânia Xeta

(Mateus 26.6-13; Marcos 14.3-9)

**12** Hatyaoseta Jesus xanehitiya wenakalati Betânia nali. Lázaro Jesus ekasekihete hene nali tyaonita. Exowaka 6-ki ferakenete hena hisehaliti Páscoaheta. <sup>2</sup> Xane kaoka hatyo nali hoka nakairati tyomaha Jesus ana hoka kaexakatyaha tehitiya haiyaharenai. Kanakairehena hoka Lázaro kanakaira ekakoaha. Haiyanae ihinaeharenai tehitiya kanakaira Jesus kakoa. Hoka Marta atyo nakairati mokita kanakairiterenai ana.

<sup>3</sup> Kanakairahitaha hoka Maria xane kaoka Jesus haliya tinihalitise airaxero kahekoalo. Hatyo airaxero kaloxaimane, maisa makarohare xini. Kaoka ehaliya hoka owikene Jesus kijinai hiye, exowakerota hasekase kakoita tirihete hene. Airaxako moka hatyako.

<sup>4</sup> Hoka Jesus xaotyakirahare Judas Iscariotes hiye maisa waiyeta. Hatyo najikinitaxano Judas matawatya Jesus. Maisa waiyeta ihiye hoka nexa: <sup>5</sup> — Exe airaxero maisa makarohare xini, exaimane atyo 300 hokose olo. Xoana hoka maisa betetitene hoka maxiyehahrenai ana ijita exaimane? nexa Judas.

<sup>6</sup> Maisa xakore maxiyehahrenai kahinaetya aokowiye hoka nikare iraeta, kaiwarexe xakore hoka. Kaxaikota Jesus noloxa exaotyakiraharenai xoaha noloxa hoka kaiwita.

<sup>7</sup> Nexa hoka Jesus ekoaxatyaxano enomana: — Awa xiwatyalini. Kotare airaxero moka nohiye. Noxafityaki



nahitata nikare mokita natyo. <sup>8</sup> Maxiyehareharenai atyoite tyaoneta mene xinekoni. Hoka natyo atyoite maisa notyaoneta menita xinekoni — nexa Jesus.

### Kahalakoahareha Lázaro Kakoa

<sup>9</sup> Judeunai sema Jesus kaokene Betânia nali hoka kahare tyoa kaokaha hatyo nali, waiyaha aokowitaha Jesus hoka, exahe ekasekihetehehene Lázaro tehitiya waiyaha aokowitaha hoka. <sup>10</sup> Kahare haliti xane waiyaha Jesus, Lázaro xoaha hoka hatyo hiyeta sacerdote nityohalitarianai okoawaharehena hoka Lázaro xaisaka tehitiya aokaha. <sup>11</sup> Ekasekihetehehene hiyeta kahare judeunai Jesus xema maniya tyaonita. Awaiyetyahitene hoka hanityohalitarianaiha maotyaneha hoka maisa waiyeta inityohalitarianaiha hiye.

### Jesus Kaokhehena Jerusalém Nali

(Mateus 21.1-11; Marcos 11.1-11; Lucas 19.28-40)

<sup>12</sup> Kamaetali hoka hisoaka haliti kaokhehena Jerusalém nali waiyaha maheta hisehaliti Páscoa hoka semaha Jesus tyoanene Jerusalém xeta. <sup>13</sup> Semahene hoka tyoaha ahalakoatyahene. Iyaliti kolatyaha hoka ahalakoatyahene, ihalahareha ekakoa.

— Wihalahareta hikakoa, Enore! Xekohaseti Enore, waiyíra hamohena héxare kakoa tyoitere! Xekohaseti Enore xaxikalahare tyoita Israel hotyalinai ana hoka waiyeta womana, Enore xoaha waiyeta womana — nexaha masakare ihalaharahitaha Jesus kakoa.

<sup>14</sup> Jesus ahalakoatya boriko mokose hoka tyoka eheno, babera Iraití Waiyexe nanekoa xairatyoare tyaonitere akereta:

<sup>15</sup> Awaira atyo ximawaiyeharehena, wenakalati Sião tyaoniterena! Ite Xiyekohase Kalorexe tyoa kaoka xomana boriko mokose heno.

<sup>16</sup> Hatyo xowakiya maisa exaotyakiraharenai ana waiyekehalakere. Hoka Jesus waini hoka kaseheta najikini maniyata rota otehenahitaha iraiti xakaisasehare xairala, exahe mohenerene boriko mokose heno hoka waiyekehalaka enomanaha.

<sup>17</sup> Halitinai ihalahare Jesus kakoa. Haiyaharenai haotita Jesus kawiheta Lázaro kamane exawatyakalakota hoka hatyo waiyehenerena xakaikoatyaha hatyo tahi. <sup>18</sup> Jesus ekasekihetehehene Lázaro tahi semahitaha hoka hisoaka haliti tyoa ahalakoatya Jesus.

<sup>19</sup> Hatyo hiyeta fariseunai amaikohareha: — Xiyaiyaore, halitinai maisa semaxematyare wiraine. Tyotyaha awaiyetyahitene hoka tyaonahitaha exema — nexakakoaha.

### Haiyaharenai Grécia Yerenae Waiyaha Aokowiha Jesus

(Mateus 26.20-25; Marcos 14.17-21; Lucas 22.21-23)

<sup>20</sup> Hatyaoseta haiyanai Grécia koatarenai kaokaha Jerusalém nali waiyaha maheta hisehaliti, Enore xoaha awaiyetyaha maheta. <sup>21</sup> Hatyaoseta ahalakoatyaha Filipe. Filipe atyo Galiléia yere, wenakalati Betsaida nal-

itare. Tyoa kaokaha Filipe ana hoka nexaha ihiye: — Wiyaiya waokowita Jesus — nexaha.

<sup>22</sup> Nexaha ihiye hoka Filipe xane André hiye irai hoka hatyo hinamanai xane iraha Jesus kakoa.

<sup>23</sup> Hoka Jesus nexa ihiyeha: — Hikoa Haliti Ityani kamaosehena hoka kasehetaite hoka kalorexe tyaona — nexa. <sup>24</sup> — Xasemehena, maisa namaoseraita xini: trigose kaxafityakehena waikoa hoka hikoita hoka esé atyo walolota, wainita. Hoka maxafityakahareya hoka haseroreya tyoata mene. Wainiya hoka hikoa hoka ekakoitaiya kahare kasé.

<sup>25</sup> — Xala xamani atyoite awaiyetita hawenane ali waikohekoa maniya hoka meta atyoite tyotyona enonita. Hoka xala xamani atyoite maisa awaiyetyare hawenane ali waikohekoa maniya hoka hatyo atyoite tyoata mene matyotenehare. <sup>26</sup> Xala xamani tyaona noximi maniya aokowi hoka maika tyakekohena niraini. Aliye xamanite notyaonita hoka hatyo tehitiyaite nali tyaonita. Tyaonaiya noximi maniya hoka Baba ite awaiyetene — nexa Jesus.

### Jesus Xakai Hakamane Tahí

<sup>27</sup> — Kalikini kalore namaikohareta. Okoi aisehenaha natyo hoka nomawaiyehareta. Xakore hoka maisaiya naxa Baba hoka kikiheta natyo nomakawatihalini nonitata naokita. Nowaini terota maheta notyona — nexa.

<sup>28</sup> Hatyaoseta iraexahena: — Abá, hikaxaexakeretyakehena naoka — nexa Jesus.

Hoka hatyaoseta enokoata iraiti kasemaka: — Koxaka nokaxaexakerityaki hoka haxowakaite nokaxaexakerityakihitiya — nexa.

<sup>29</sup> Halitinai semahene hoka nexaha: — Kala onetalolo nemahare — nexa haiyanae.

— Maisa onetalolo xini, kala anjo iraeta ekakoa — nexa haiyanai iraha.

<sup>30</sup> Hoka Jesus nehena: — Maisa nohiyiti xini exe iraiti tyoa. Xihiyeta tyoa xasemene maheta — nexa. <sup>31</sup> — Okoi Enore iraihena iniyalahare nomaseharenai tahi. “Exakere kaxomokakaha naoka”, nehenaite hoka exekohaseha Tihanare tehitiyaite kaxawatyakeheta — nexa.

<sup>32</sup> — Ainakisahaite natyo hoka hatyaosetaite kahare haliti ite tyakekohenaha natyo — nexa Jesus. <sup>33</sup> Hakamane, haberekotyaka atyalihose xaimaholatyaka hiye xaokaka nikareta, “Ainakisahaite natyo”, nita.

<sup>34</sup> Nexa hoka halitinai nexa ihiye: — Maisaite Enore Kalorexe Aohenere wainita, maikaite tyaoneta mene aokaha. Hatyo tahi kaxairatyaka babera Moisés niraine kakoare. Hoka hiso atyo hita, “Maika Haliti Ityani kaxainakisaka”, hita. Xala xaokaka nikare hiraeta? nexa axaha Jesus.

<sup>35</sup> — Xaokanatyakalati tyaonita kalini xikakoa hoka ininai ite tyaohtiyi. Xaokanatyakalati tyaonitata xikakoa hoka memere xamohena xawenane, waiya aliya hoka maisa ximemehene hekoti hoka makaliroti kaoka xomana. Howitihare netonatyaka atyo makaliroti koni. <sup>36</sup> Maika xaokanatyakalati aokanaitatere xomana xowaka xityakekohene hoka

hatyo xema maniya xisaohena — nexa Jesus ihiyeha. (Kasani halitinae exema maniya tyaona aokita hoka nikare iraeta.)

### Judeunai Maisa Tyakekotene

(Mateus 26.31-35; Marcos 14.27-31; Lucas 22.31-34)

Nexa Jesus ihiyeha hoka hatyaoseta xaneheta hatyo nalita hoka xane teroa judeunai nonita. <sup>37</sup> Kahare Jesus nómane maomakahare waiyexe waiyaha xakore hoka maisa tyakekorahene, <sup>38</sup> Isaías niraene akereta kawenatyakeheta maheta. Exakerexe Isaías xairatya:

Maisa xala hare tyakekore wiraine, Xekohaseti, exahe hiyaterere hoka maisa waiyekehalakere enomanaha.

<sup>39</sup> Exakerexe tehitiya Isaías xairala hoka maisaiya aliyakere tyakekoahitaha:

<sup>40</sup> Enore maxosehare mokahene, exahe maxahekola-hare mokahene, hoka maisa waiyakatyareha, maisa waiyekehalakere enomana, exahe maisa haikoa-henahitaha enomana hoka waiye mohenahitene hoka kaxaiyatelikisakehenahitaha.

<sup>41</sup> Nikare Isaías irae Jesus nawenane kalorexe waiya hoka nikare irae etahi.

<sup>42</sup> Nikare Isaías xairatya xakore hoka kahare judeunai nityohalitiranai tyakekoha Jesus. Tyakekoahene xakore atyo hoka mema atyo tyaonahitaha, maisa atyo xoare nexareha. Motyaiya fariseunai ehareha ihiyeha hoka mahokoanityaha ixisoaneha xahohisakoatyakalati hanako aokahitaha hoka mema tyaonahitaha.

<sup>43</sup> Kasani Enore ihalahare ekakoaha aokahitaha xakore hoka halitinae hotohare ihalahareta ekakoaha aokahitaha hoka hatyo hiyeta mema tyaonahitaha.

### Jesus Irae Xaxalisatiye Akereta

<sup>44</sup> Hatyaoseta Jesus kintyaxa irai: — Xala xamani atyo tyakekota natyo hoka maisa atyo natyo taita xini tyakekota. Noxaxikatyasehare tehitiya atyo tyakekota.

<sup>45</sup> Xala xamani atyo waiyita natyo hoka noxaxikatyasehare tehitiya waiyita. <sup>46</sup> Notyoa notyaona halitinae koni xaokanatyakalati akere enomanaha hoka tyakeko-henere natyo maisa makaliroti koni tyaona maheta — nexa Jesus.

<sup>47</sup> — Xala xamani atyo sema niraini hoka maisa tyaona exema maniya aokowita hoka maisaiya niraeharetyahitene. Notyoa atyo niyeheta maheta halitinae iniyalahare nonitata maheta. Maisa atyo niraeharetyahitene maheta xini. <sup>48</sup> Xala xamaniya maisa aokita natyo, maisa semaxematya aokowita niraini hoka hatyohare hiyetaite kairaeharetyaka miyanitiye xowaka — nexa.

<sup>49</sup> — Maisa niraini xini niraeta. Baba noxaxikatyasehare irai nokakoi hoka noxakaitene xihye aoka. <sup>50</sup> Iniraene atyo ijita wenati menanehaliti hoka wisaoneta meniya. Hatyohare akiti atyo waiyekehalakita nomani. Wisaona mene aokita. Hatyo hiyeta Baba iraetereharenae nohiye taita niraeta xihye — nexa Jesus ihiyeha.

### Jesus Tiha Haxaotyakiraharenai Kiji

**13** Hatyaoseta haki ferakenetehena hoka hisehaliti Páscoa ferakene tyaohena hoka Jesus ka-manaose xane hiko. Hoka Jesus atyo waiyoreta haka-manaose ferakene hikoane kakoa, exahe hahalakira halitinae hoka haxáneneheta hanexe nali kakoa. Awaiyetya haxaotyakiraharenai hakamane kijiya.

<sup>2</sup> Makehena hoka Jesus kanakairita haxaotyakiraharenai kakoa. Exowaka Tihanare koxaka haxahekola moka Simão ityani Judas Iscariotes mahiyasako mátawatya maheta Jesus. <sup>3</sup> Jesus ana atyo waiyekehalakita Enexe tyotyta xalini hare xekohasehare mohenerene kakoa. Exahe waiyoreta tehitiya atyo tyohenere Enore nalita kakoa, exahe haxaneneheta Enore nali xeta kakoa.

<sup>4</sup> Hatyaoseta Jesus tityoaheta hanakaira aoseta hoka aitoakisa haima ehaorete hoka iya tirihihoakalati taose hoka olatya hakitako hiye. <sup>5</sup> Hatyaoseta tirihihoakalati koa one moka hoka tihehena haxaotyakiraharenai kiji hoka tirityahaheta ikijiha tirihihoakalati kakoa.

<sup>6</sup> Xane kaoka Simão Pedro haliya hoka Simão Pedro nehena ihije: — Xoana, hatiha nokiji haokowi, Xekohaseti? nexa axa Jesus.

<sup>7</sup> — Há, natihaite hikiji — nexa Jesus. — Kalikini natihehena hikiji hoka maisa waiyekehalakere homana. Hoka haxowakaite waiyekehalaka homana — nexa Jesus.

<sup>8</sup> — Maisaiya hatihita nokiji, xoana hiyekohaseyatya natyo hoka? nexa Pedro ihije.

— Maisaiya natihita hikiji hoka maisaiya noxaotyakirihare naokita hiso — nexa Jesus.

<sup>9</sup> Nexa Jesus hoka Pedro nexa ihije: — Nikare atyo hoka hatihehena nokiji, nokahe, noseri hare, Xekohaseti — nexa.

<sup>10</sup> — Xala xamani atyo koxaka koaha hoka iyoma tyaona hoka ikiji taita katihakehitiya hoka ehokore. Koxaka xityotyta xikatihakere xisaonita, hatita taita atyo hekota maiyomenehare akereta tyaonita — nexa Jesus Pedro hiye. <sup>11</sup> Jesus atyo waiyoreta hamatawatyasehare kakoa hoka: — Hatita taita atyo hekota maiyomenehare akereta tyaonita — nexa iraeta.

<sup>12</sup> Hatyaoseta Jesus tiha ikijinaiha, miyatya hoka xane isoaheta haima ehaorete ako hoka tyokehetehtitiya enekoniha hoka nehena ihiyeha: — Xoana waiyekehalaka xomana natihehenere xikiji? nexa axahene. <sup>13</sup> — Xasemehena: xiso atyo, “Xaotyakisatiye, Xekohaseti”, xita nohiye xiraihena nokakoi hoka. Ehokoreta nikare xita, hatyo terota atyo natyo. <sup>14</sup> Xiyaiya, natyo xakore Xiyaotyakisase, Xiyekohase hoka natiha xikiji xomana. Maika nikare tehitiya xatiha kakoa xikijinai. <sup>15</sup> Xiyaiya, naimenekoita xomana hoka namokitere akereta xamoka maheta. <sup>16</sup> Waiye xasemehena: maisa wakahare haxekohase xahehare xini, exahe exaxikatyakahare hoka haxaxikatyasehare xahehare xini. <sup>17</sup> Exe akiti waiyekehalaka xomana hoka xisaonaiya exema hoka waiyeya xihalahareya xisaona — nexa Jesus irae haxaotyakiraharenai kakoa.

<sup>18</sup> — Maisa atyo xityotyta xiyaoakaka xini niraeta. Haiyaharenai naohenere nomani kakoa atyo nawaiyoreta. Xakore hoka hatya atyoite nahalakoihare tyaona. Exe Iraitu Waiyexe nanekoa kaxairatyakehenere akereitaite kawenatyaka:

Hatya kanakairitere nokakoite nahalakoihare tyao-heta.

<sup>19</sup> — Kalikinita exehare niraeta nikare kawenatyakehenere nahitita hoka nikare kawenatyakehena hoka xityakekohena maheta natyo. Hiyaiya, natyo atyo natyota terota — nexa.

<sup>20</sup> — Xasemehena niraini: Xala xamani waiye mokita noxaxikaliharenai hoka waiye mokita natyo. Nikare waiye mokita natyo hoka noxaxikatyasehare tehitiya waiye mokita — nexa Jesus ihiyeha.

### Jesus Hotikisa Matawatyatiye

(Mateus 26.20-25; Marcos 14.17-21; Lucas 22.21-23)

<sup>21</sup> Jesus hatyo tahi irai hoka enajikinita amaikoharehena hoka nehena ihiyeha waiyekehalaka: — Aliterexe niraeta: hatyaite xinekonitare matawahena natyo — nexa ihiyeha.

<sup>22</sup> Nexa ihiyeha hoka exaotyakiraharenai wahakotyakakoaha. — Xala xaokaka nikare iraeta? nexa ahokotyaha.

<sup>23</sup> Exowaka hatya tyokita Jesus haliya Jesus awaiyetitire. <sup>24</sup> Tyokita Jesus haliya hoka Simão Pedro aimenekokoatya enomana axa maheta Jesus.

<sup>25</sup> Aimenekokoatya enomana hoka axehena Jesus: — Xalaite matawahena hiso, Xekohaseti? nexa axa Jesus.

<sup>26</sup> Axa Jesus hoka Jesus nexa: — Nakairatite namaika hoka nisa enomana. Hatyo atyoite nomatawatyasehare tyao-hena — nexa hoka nakairati maika hoka isa Judas Iscariotes ana. Judas atyo Simão Iscariotes nexarexe ityani.

<sup>27</sup> Isa enomana hoka Judas kanakaira hatyo nakairati hoka Ahalakoahaliti kamilakoretene.

Hatyaoseta Jesus nexa ihiyeha: — Hiyanehena atyo hoka hisoma haokowitere hisomehena rotita — nexa.

<sup>28</sup> Nexa Jesus irai ekakoa hoka nali tyokiterenai semene hoka maisa hatya ana hekoti waiyekehalakita.

<sup>29</sup> Judas atyo enoloxaha kaxaikotyasehare tyaonita enomanaha hoka motya Jesus axikatene nakairati iya maheta hisehaliti niyahare aokahitaha. Haiyanai motya Jesus axikatene hoka isa maheta olo maxiye-hareharenai ana aokahitaha.

<sup>30</sup> Hoka Judas kanakaira hatyo nakairati isehenere enomana hoka xane rotita. Exowaka koxaka maka.

### Waitare Xaotyakiyaho

<sup>31</sup> Judas xaneheta enonyahitaha hoka Jesus nehena: — Kalikini Haliti Ityani kaxaexakerityaka, exahe Enore tehitiya hoka kaxaexakerityaka ihiyeta. <sup>32</sup> Enore kaxaexakerityaka ihiyeta hoka Enore hiyeta atyoite Haliti Ityani kaxaexakerityaka. Kalinite Enore nikare mohena — nexa Jesus.

<sup>33</sup> — Exeta atyoite maisa waha notyaohitita xikakoa, nokaxaikoiharenai. Noxanihetaite xonita hoka

xatawaite natyo hoka maisaite xikaokita natyo. Noxanihetehehena hoka maisaiya xijoita noxanihenere nali. Koxaka noxakai hatyo akiti judeunai hiye. <sup>34</sup> Hoka kalikini exe iraiti waitare kakoa naotyakihitiya xiso. Maika xawaiyetyakakoa nawaiyetitire xiso akere xawaiyetyakakoa tehitiya. <sup>35</sup> Xawaiyetyakakoa hoka tyotyta halitinai anaiya waiyekehalaka hoka, “Hatyonai atyo Jesus xema nawenatyaseharenai”, nexahaiya xiyaoakaka — nexa Jesus.

### Pedro Hiye Jesus Irae

(Mateus 26.20-25; Marcos 14.17-21; Lucas 22.21-23)

<sup>36</sup> Hatyaoseta Simão Pedro axehena Jesus: — Alyakoite hiyanehena, Xekohaseti? nexa axene.

— Awisa noxanihena hoka maisaiya atyo kalikinita hiyaneta noxanihenere nali. Hoka haxowaka atyoite hisoa noximi — nexa Jesus.

<sup>37</sup> — Xoana hoka maisa kalikinita notyao hiyema haokita? Koxaka nomimiye notyaonita nokamani niyahare hikakoa — nexa Pedro irai.

<sup>38</sup> — Xoana, alitere haokita? nexa Jesus. — Hasemehena niraini: Awisa takaira makawiraharenetaite hehena: “Exe haliti atyo maisa nowaiyanihare xini”, hexaite noxaokaki. Exakere ite hanamaki hirae — nexa Jesus Pedro niraine nahalakoa.

### Jesus Atyo Ahoti Enexe Xetare

**14** — Awa atyo ximawaiyehare — nexa Jesus haxaotyakiraharenai hiye. — Koxaka Enore xityakeko. Maika xityakeko tehitiya natyo — nexa. <sup>2</sup> — Baba nawenakala nali kahare hati wenati niyahare. Memere ite namoka hati xomanere. Maisaiya nikarexe hoka koxakaiya noxakaini xihiyeha. <sup>3</sup> Noxanite hoka memere namoka hoka nahaikoahetaite hoka nanoloka xiso hoka xisaona nohaliye — nexa. <sup>4</sup> — Koxaka xawaiyore hatyo noxanihenere nali akiti kakoa, exahe ahotyaho noxanihenere aho kakoa hoka xawaiyoreta — nexa Jesus ihiyeha.

<sup>5</sup> — Maisa wawaiyoreta hatyo hiyanehenere nali akiti kakoa. Aliyakereya hoka wawaiyore hatyo ahotyaho hiyanehenere aho kakoa? nexa Tomé axene.

<sup>6</sup> — Natyo atyo ahoti. Iraitu aliterexe atyo natyo. Nohiyitita haliti tyaona mene matyotenehare. Nohiyitita taita atyo kakáokatyakita Baba Enore nali. <sup>7</sup> Kalikini atyo xiyaita natyo hoka xiyaiya tehitiyaite Baba. Hoka kalikinitata xiyaitene. Xiyaiyanehare terota atyo — nexa Jesus ihiyeha.

<sup>8</sup> — Xekohaseti, hahotikisa Hexe womana hoka ehokore womana — nexa Filipe.

<sup>9</sup> — Waehena notyaonita xinekoni, Filipe. Xoana, maisa hiyaiyanehare xini natyo, exahe nawenani hoka waiyekehalakere homana? Xala xamani atyo waiyita natyo hoka waiyita tehitiya atyo Baba. Xoana hoka, “Hahotikihena Hexe womana”, hita? Koxaka xiyaiyene.

<sup>10</sup> Xoana motya maisa Baba tyaonare nokakoi haokita? exahe natyo hoka motya maisa notyaonare ekakoa haokita? Niraihena xikakoa hoka maisa natyota xini niraeta. Baba tyaonita nokakoi hoka tyomita hahatene

noxaihako maniyita. <sup>11</sup> Baba tyaonita nokakoi, exahe natyo hoka notyaonita ekakoa. Maika hatyo akiti xityakeko, maisa namaoseraita xini. Maisa xityakekota niraini hoka maika xityakeko natyo maomakahare notyomitere hiyeta. <sup>12</sup> Hatyaiya tyakeko natyo hoka tyomaiya notyomitere akereta. Ekakoitaiya hatyonai xahere tyomehena. Maikoisa Baba Enore nali noxanihena hoka hatyaosetaite notyomitere xahere tyomehena. Alitere naokita, maisa namaoseraita xini — nexa Jesus.

<sup>13</sup> — Nexare kakoaiya xaxehena hoka tyotyaiya notyoma xaokitereharenai xomana. Notyomeniya xomana Baba kaxaexakeretyaka maheta. <sup>14</sup> Xoare xamaniya xaxa nexare kakoa hoka tyotyoma notyoma xomana.

### Jesus Isa Aokowi Isekoaliti Waiyexe Halitinai Ana

<sup>15</sup> — Aliterexe xawaiyetita natyo hoka maika xasemaxematya niraini, xoolini hare naohena xihyie hoka. <sup>16</sup> Xasemaxemaitaiya niraini hoka naxaiya Baba hoka axikatya xomana xikahinaetyase maheta Isekoaliti Waiyexe hoka tyaoneta mene xikakoa. <sup>17</sup> Hatyo Isekoaliti Waiyexe atyo maisa maoseratyaliye xini. Maisa atyo matyakekoneharenae ana kaotyakita. Maisa waiyarahene, exahe waiyekehalakere enomanaha. Hoka hatyo Isekoaliti Waiyexe atyo xiyaiyanehare. Maika tyaona mene xikakoa — nexa Jesus.

<sup>18</sup> — Noxanihetehenaite xonita hoka maisaiya ximakaxaikotyakahare nahalakijita. Nahaikoahetaite xomana. <sup>19</sup> Iniraite notyaohitiya hoka hatyohekotaite maisa nokawaiyakhitita, maisaiya matyakekoneharenai waiyihitita natyo. Hoka xiso atyoite xiyaiyeheta natyo. Nowainite hoka nokaseheta hoka xiyaiyeheta natyo. Nokasehetaite hoka hatyota atyoite maisa nowainihitita hoka xiso tehitiyaite xiwaini hoka xikaseheta hoka hatyota maisa xiwainihitita. <sup>20</sup> Exowakehenaite hoka waiyekehalaka xomana notyaonitere Baba kakoa, exahe xiso xisaonitere nokakoi notyaonitere xikakoa akereta — nexa Jesus.

<sup>21</sup> — Hatyaiya tyaonita niraini xema hoka hatyoiya atyo awaiyetita natyo. Hatyo awaiyetitere natyo atyoite Baba awaiyetya, exahiya natyo hoka nawaiyetene hoka nahotikisoawiya enomana — nexa Jesus aotyakisa haxaotyakiraharenai.

<sup>22</sup> Hatyaoseta Judas iraihena. Maisa Judas Iscariotes xini, hatya Judas nexarexe iraihena Jesus kakoa: — Aliyakeriya hahotikisoahena womana hoka maisa matyakekoneharenai ana hahotikijoita? nexa axa Jesus.

<sup>23</sup> — Xala xamaniya awaiyetita natyo hoka tyaonita niraini xema hoka Babaiya awaiyetene. Hoka Baba natyo xoahaiya wisoa wisaona ekakoa. <sup>24</sup> Xala xamaniya maisa awaiyetita natyo hoka maisaiya tyaonita niraini xema. Hoka exe iraiti xasemitere atyo noxaxikatyasehare Baba niraine, maisa atyo niraini xini. <sup>25</sup> Hekotata notyaonita xihaliya hoka hatyo akiti niraeta xihyie — nexa.

<sup>26</sup> — Baba ite axikatya xomana xikahinaetyase Isekoaliti Waiyexe noxaokalita. Kaokaite xomana hoka

aotyakihena xiso kahare hoka xotyaxemaheta tyoty niraihenere xikakoa. <sup>27</sup> Nahalakisaite nomehexaikoalini xikakoa. Nisaite nomehexaikoalini xomana. Nowawi nikare namokita haliti, maisa waikohekoarenai namokitere akereta mokare. Awaira atyo ximawaiyeharehena, exahe ximairehena — nexa.

<sup>28</sup> — Koxaka xasema niraini: “Noxanihetaite hoka nahaikoahetaite xomana”, nomi xihyie. Xawaiyetitaiya natyo hoka xasema noxaniniheta Baba nali hoka xihalahareya, Baba atyo noxaehere hoka. <sup>29</sup> Kalikinita exeharenai tahi noxakaita xihyie enaheta maniyita hoka nikare tyahena hoka xityakeko maheta — nexa.

<sup>30</sup> — Exeta atyoite maisa waha niraihitita xikakoa. Owene matyakekoneharenai xekohase kaokehena womana, maisa xakore atyo noxaehere niyatere xini hoka. <sup>31</sup> Kasani tyoty waikohekoarenai ana waiyekehalaka Baba nawaiyetitere naokita. Hiyeta hoka aokitere akereta notyomita — nexa. — Xatityoahetehena hoka wiyanehitiya — nexa Jesus.

### Jesus Atyo Uva Kate Akere

**15** — Natyo atyo uva kate akere hoka Baba Enore atyo uva kate kaxaikotyasehare akere. <sup>2</sup> Xiso noximi maniya xisaoniterenai atyo ekanohinae akere. Hoka uva kaxaikotyasehare irikoita tyoty malihare kanohinae, exahe afiraharetita kalitere kanohinae masakare kali tyaonaha maheta. <sup>3</sup> Hoka xiso atyo ekanohinae exafiraharetyakahare akere xisaonita, koxaka naotyakisa xiso hoka. <sup>4</sup> Maika xisaoneta mene nohiye, exahe natyo hoka notyaoneta mene xihyie. Hiyaiya, uva kate kanohi taikoahena hakate hiyeta hoka maisa kalihetere. Hoka hekota tyaonita hakate hiye hoka kalita. Nikareya maisa xisaonita nohiye hoka maisaiya aliyakere xoolini hare waiyexe xisomita — nexa Jesus haxaotyakiraharenai hiye.

<sup>5</sup> — Natyo atyo uva kate akere, xiso atyo ekanohinae akere. Ekanohi hakate hiye tyaonita hoka kahare kalita. Nikarexe xisaona nohiye hoka kahare xoolini hare waiyexe xisoma. Hoka maisaiya xisaonita nohiye hoka maisaiya xoare hare xisomita.

<sup>6</sup> — Uva kate kanohi taikoahena hakate hiyeta hoka haxerore inira tyaonita hoka ekaxaikotyasehare awaiyetolisene hoka keraitene. Maisaiya xisaonita nohiye hoka nikareya xixaxomokaka. <sup>7</sup> Xisaona nohiye exahe niraini xema xisaona hoka xoolini hareya xaxehena Baba hoka tyomeniya xomana. <sup>8</sup> Uva kate kanohi kahare kali hoka waiye. Nikare xisaona noximi maniya hoka kahare xoolini hare waiyexe xisoma hoka Baba kaxaexakerityaka, exahe xiso hoka noximi nawenatyaseharenai naoka — nexa Jesus ihiyeha.

<sup>9</sup> — Baba awaiyetita natyo. Hatyo awaiyetitere natyo akereta nawaiyetita xiso. Nawaiyetita xiso. Maika hatyo xema xisaona. <sup>10</sup> Waiye xasemaxematya niraini hoka nawaiyetyaiya xiso. Xiyaiya, natyo tehitiya Baba niraine waiye nasemaxemaita hoka awaiyetita natyo.

<sup>11</sup> — Exe akiti noxakaita xihyie waiye xawenane tyaona maheta xomana hoka xihalahare kaiserehare xisaona maheta — nexa Jesus.

<sup>12</sup> — Exe tehitiya naoka xihye: Maika xawaiyetyakakoa nawaiyetitere xiso akereta.

<sup>13</sup> Hatyaiya awaiyetita kaiserehare hahinaeharenai hoka memereya tyaona hoka wainiya hahinaeharenai wenekoare.

<sup>14</sup> — Naokitere akeretaiya xisaona hoka nohinaeharenaiya naoka xiso. <sup>15</sup> Maisaiya wakahare naokita xiso. Wakahare atyo maisa waiyorexe haxekohase xahakola kakoa. Hoka natyo atyo nohinaeharenai naokita xiso. Kahare Baba nalita nasema iraiti hoka tyotyaxakaini xihye, nohinaeharenai naokita xiso hoka — nexa Jesus ihiyeha.

<sup>16</sup> — Maisa xiso xini xaoka natyo xomana. Natyo atyo naoka xiso nomani. Naoka xiso nomani. Uva kate kanohi kahare kalitere akere xisaona naokita, hoka kahare waiyexe xisoma naokita. Nikareya xisaona hoka maisaiya xománenai waiyexe kamaotyanyakita, exahe xoalini hare xaohena Baba hiye hoka niraini kakoarenaiya xiso hoka tyomeniya xomana — nexa.

<sup>17</sup> — Hiyeta hoka maika xawaiyetyakakoa. Xawaiyetyakakoa naokita hoka nikare niraeta xikakoa.

### Jesus Xema Tyaoniterenai Atyoite Kairawaiyakaha

<sup>18</sup> — Maika matyakekoneharenai kirawanehena xiso hoka xotyana natyo. Natyo hotohare kirawanehena. <sup>19</sup> Hatyonai akeretaiya xiso hoka awaiyetyahaiya xiso, ihinaeharenai xisaohenera hiyeta. Kalini atyo xiso maisa matyakekoneharenai akereta xini. Koxaka atyo enekonitaha nomániye naoka xiso hoka hatyo hiyeta kirawanahitaha xiso. <sup>20</sup> Xotyaira niraini: “Maisa wakahare haxekohase xahehare xini”, nomi xihye. Nikare hoka iniyalahariya mokaha natyo hoka iniyalahare tehitiyaiya mokaha xiso. Tyaonahaiya noxaotyakiri xema hoka xiyaotyakira xema tehitiyaiya tyaonaha — nexa Jesus.

<sup>21</sup> — Maika iniyalahare mokaha xiso nohiyiti. Hiyaiya, maisa atyo noxaxikatyasehare Enore ewaiyanehareha xini. <sup>22</sup> Awaiya natyo notyona niraeta ekakoaha hoka maisaiya háomaneha ewaxirahare kehexahitaha, waiyekehalakita enomanaha. Hoka notyona nirai ekakoaha hoka maisaiya atyo aliyakere teraharetyoahenahitaha — nexa.

<sup>23</sup> — Xala xamani atyo kirawaneta natyo hoka Baba tehitiya atyo kirawaneta — nexa.

<sup>24</sup> — Kahare maomakahare waiyexe notyoma enekoniha. Maisa xala harenae notyomitere akere tyomare. Ekoiya awa notyomita enekoniha maomakahare hoka maisaiya kehexareha iniyalahare háomaneha. Enekoniha notyoma hoka waiyaha hatyo hoka ihiyeta kirawanetaha natyo, exahe Baba tehitiya kirawanetaha — nexa.

<sup>25</sup> — Exakerexe xairatyoare tyaonita exaotyakisakahoha:

Maxemerehareta kirawaneha natyo.

— Nikare xairatyoare tyaonita hoka hatyo hiyeta kirawaneha natyo xairatyoare tyaonitere akereta kawenatyaka maheta — nexa.

<sup>26</sup> — Ite Isekohaliti Waiyexe kaoka xomana xikahinaetyase maheta. Aliterexe taita atyo iraeta. Baba nalita atyo tyoita, naxikatenite xomana hoka xakaihenaite notahi akiti xihye. <sup>27</sup> Xiso tehitiyaite xiyakaihena notahi akiti halitinai hiye. Hetati xowakiyata xisaonita nokakoi hoka kahare nománi xiyaiya hoka hatyo akiti ite xiyakai ihiyeha — nexa Jesus aotyakisa haxaotyakiraharenai.

**16** — Nikare nirai xikakoa hoka maisa xamaikohare, ximawaiyehare maheta xini — nexa Jesus haxaotyakiraharenai hiye.

<sup>2</sup> — Maxisoanityahaite xiso xahohisakoatyakalati hanako. Ekakoitaite aisaha xiso hoka motyaite Enore wini hekoreta aisahitaha xiso aokahitaha. <sup>3</sup> Nikarite mohenaha xiso, maisa Baba akiti waiyekehalakere enomanaha hoka, exahe natyo hoka maisa nawaiyekehalakere enomanaha hoka. <sup>4</sup> Hatyohare akiti noxakaita xihye hoka nikare tyahenaha hoka xotyaxematya niraini maheta hoka, “Hatyo akiti xakai wihiye”, xema maheta — nexa Jesus.

### Isekohaliti Waiyexe Hatene

— Maisa toahiyita noxakaita exe akiti xihye, hekotata notyaonita xinekoni hoka. <sup>5</sup> Hoka kalikini atyoite noxanihetehena noxaxikatyasehare nali. Xakore hoka maisa xala harenai axita natyo: “Alyakoite hiyanehetehena, Xekohaseti?” maisa nita nohiye. <sup>6</sup> “Awisa noxanihetehena xonita”, nomi noxakai xihye hoka kalore xamaikohareheta. <sup>7</sup> Maika waiye xasema niraini: ehkore atyo noxaniheta xonita. Nomaxaninihareya atyo xonita hoka maisaiya atyo haliti kahinaetyase Isekohaliti Waiyexe tyoita xomana. Hoka noxanihetaiya atyo hoka naxikatene xomana — nexa.

<sup>8</sup> — Isekohaliti Waiyexe atyoite tyohena hoka matyakekotiterenai hiye iraihena: “Xoana hoka iniyalahare xisomita? Waiye maniyaira xisaona! Enorite iniyalahare nomaseharenai mawenekoaretyaka aohena”, nehenaite ihiyeha hoka semehenaha. <sup>9</sup> Maisa tyakekoahitaha natyo hoka hatyo atyo maisa ehkoreta. <sup>10</sup> Noxanihetaite Baba nali hoka maisaite xiyaiyehitaita natyo. Hatyohare akiti kakoa maisa ehkore ahokotyahitaha. <sup>11</sup> Exahe matyakekoneharenae xekohase Tihanare mawenekoaretyaka aoka Enore — nexa Jesus.

<sup>12</sup> — Kaharetata niraini xikakoa, hoka maisaiya atyo kalikini noxakaitene xihye, waiye aliya hoka kaxiyehare xiyahekola tyaona xomana. <sup>13</sup> Hoka Isekohaliti Waiyexe atyoite kaokehena hoka awaiyekehalakatyatyotyoty iraiti aliterexe xomana. Maisaiya atyo haxahekolita iraeta, hasémane atyoite xakaihena xihye, exahe xakaihena atyoite kahare xoalini hare tahi emakaotyakenehareta. <sup>14</sup> Iraitihenaite xikakoa hoka awaiyekehalakahena niraini, notahi akiti xomana hoka ihiyetaite nokaxaexakeretyaki. <sup>15</sup> Tyotyoty Baba anerenai atyo nomaniye tehitiya hoka Isekohaliti Waiyexe ite tyoita hoka awaiyekehalakatene xomana hoka waiyexasema — nexa Jesus.

### Xamaikohaliti Exahe Ihalahaliti

<sup>16</sup> — Ininaitehena hoka ximawaiyanenehena natyo hoka hatyaosetaite mawahaneta hoka xiyaiyehitiya natyo. Hiyaiya, noxanihenaite Baba nali — nexa Jesus haxaotyakiraharenai hiye.

<sup>17</sup> Hatyaoseta exaotyakiraharenai iraikakoahenaha: — Xoare nexala aokowita hoka nikare iraeta wikakoa? Exakere nita: “Ininaitehena hoka ximawaiyanenehena natyo hoka hatyaoseta mawahanetaite hoka xiyaiyehitiya natyo”, nita. Exahe, “Hiyaiya, noxanihenaite Baba nali”, nita xoaha. <sup>18</sup> Xoare nexala aokowita hoka nikare iraeta? “Mawahanetaite”, nita. Maisa waiyekehalakita iniraine womana — nexakakoa exaotyakiraharenai.

<sup>19</sup> Axahene aokowitaha hoka Jesus otene hoka nehena ihiyeha: — Nomikira xihye: “Ininaitehena hoka ximawaiyanenehena natyo hoka hatyaosetaite mawahaneta hoka xiyaiyehitiya natyo”, nomi xihye. Xoana, hatyo akiti xaxakakoita? nexa Jesus. <sup>20</sup> — Noxanihete-henaite hoka xitiya xamaikohare kalore hoka matyakekoneharenaite ihalahareha. Alitere atyoite xamaikoharehena hoka hatyaosetaite xiyamaikoharene atyoite tyoteheta xonita hoka xihalahareheta. <sup>21</sup> Ohiro hiye xoima kawehena hoka amaikohalota, ekahe aosehena ihiye hoka. Hoka tyaona ityani ihiye hoka hatyo najikinita ihalahalohitita, maotyanehitita hawaolitini, tyaona ityani ihiye hoka. <sup>22</sup> Hatyo akereta tehitiya xiso. Kalikini atyo xamaikohareta hoka haxowakiyaite nowaiyehetehtitiya xiso hoka xihalaharehetaite hoka maisaiya atyo xala harenai examaikoharenekihitiya xiso — nexa Jesus ihiyeha.

<sup>23</sup> — Hatyo ferakene ite xane hikoahena hoka maisaiya xoalini hare xaxita natyo. Hoka nexare kakoaiya xaxa xoalini hare Baba hoka isiniya xomana. <sup>24</sup> Kalikini kijiya maisa xoare hare xaxehenere nexare kakoa. Xaxeniya hoka isiniya xomana masakare xihalahare xisaona maheta — nexa ihiyeha.

### Halitinai Jiyahaotyaka Tah

<sup>25</sup> — Iraiti metaharexe niraini namokita xomana hoka enaose xane hikoahena hoka maisaiya atyo nikare niraihitita. Hoka waiyekehalaka taita atyoite niraihena xikakoa Baba tahi akiti. <sup>26</sup> Hatyo xowakaite xaxene xoalini hare nexare kakoa. Natyoia atyo maisa xoare maheta niraeta xitahi ekakoa, Baba koxaka awaiyetita xiso hoka. <sup>27</sup> Baba awaiyetita xiso hoka xaokitere akerehetaite mohena xiso nomairainihareta ekakoa. Xiso atyo xawaiyetita natyo, xityakekota notyoanini Baba nalita hoka hatyo hiyeta Baba awaiyetita xiso — nexa Jesus.

<sup>28</sup> — Notyoa Baba nalita hoka notyaona ali halitinai koni hoka kalikini nahalakisa halitinai hoka noxanihete-hena Baba nali xeta — nexa Jesus ihiyeha.

<sup>29</sup> Nexa ihiyeha hoka exaotyakiraharenai nehenaha ihiye: — Kalikini atyo hiraine waiyekehalakita womana, maisa atyo metahare hiraine hamohitita womana.

<sup>30</sup> Hiso atyo tyotyaha hakakoare kakoa hawaiyoreta,

maisaiya xoare hare kakoa himawaiyorenehe, hoka maisaiya waxehitita hiso, hiraine waiyekehalakita womana hoka. Hiyeta hoka Enore nalitare terota woka hiso — nexaha Jesus hiye.

<sup>31</sup> Hatyaoseta Jesus nehena: — Xoana kalikini xityakeko? nexa ihiyeha. <sup>32</sup> — Kalikini atyo xiyexaoretyakaose xane hikoa hoka xiyaorehenaite xihananae nihatyaka hoka nowawite xahalakisa. Xakore atyoite hoka maisa atyoite nowawi xini xahalakisa. Baba atyo tyaonita nokakoi — nexa.

<sup>33</sup> — Exeharenai niraeta xihye xisaona noximi maniya hoka waiye ximehexaiko xisaona maheta. Matyakekoneharenaite maisa waiye mokahitaha xiso xakore hoka maika xihalahare xisaona. Nojiyahaotyaha atyo matyakekoneharenai exekohaseha kakoita — nexa Jesus haxaotyakiraharenai hiye.

### Jesus Niraexala Tah

**17** Hatyo irai najikinita hoka Jesus wahakotya enokoa xeta hoka nexa iraexahena: — Nokamani aose xane hikoa, Abá. Maika haerorehena natyo Hityani hoka natyo tehitiya naeroritya Hiso. <sup>2</sup> Tyotyaha halitinai xahere hamoka natyo, tyotyaha noximi maniya hamohenerenai menanehaliti namoka haokita hoka. <sup>3</sup> Hiso taita atyo Enore, natyo atyo hiyaxikalahare Jesus Cristo. Hatyohareya waiyekehalaka halitinai ana hoka hiyema maniyaiya, noximi maniya xoahaiya tyaonaha hoka menanehalitiya tyaonaha.

<sup>4</sup> — Nohateni haokitere notyoma namiyatya. Namiyatene hoka ihiyeta halitinai aexakerityahitaha hiso — nexa.

<sup>5</sup> — Hetati waikohe maomakaharetatere xowakiya Kalorexe notyaonita hinali, Abá. Kasani kalikini haerorehena natyo naoka hoka hetati xowakiya akereheta Kalorexe notyaoheta.

<sup>6</sup> — Haiyanai haliti hiyeheta matyakekoneharenai konita hoka hamokahene nokoamaniye, tyaonaha maheta niraini xema. Hoka natyo atyo nawaiyekehalakitya hiso enomanaha. Homanerenai terota hoka noximi maniya hamokahene hoka hiraine xema tyaonahitaha. <sup>7</sup> Hiso atyo kahare xoalini hare koxaka hisa nomani. Tyotyaha hatyohare hinalitarenai akiti waiyekehalakita noxaotyakiriharenai ana — nexa.

<sup>8</sup> — Koxaka hiraine hiyakai nohiye hoka noxakai ihiyeha hoka tyaonaha hiraine xema. Natyo atyo notyoa hinalita, hiso atyo haxikatya natyo. Hatyo akiti tehitiya noxaotyakiriharenai tyakekoha.

<sup>9</sup> — Kasani hikaxaikoahene naoka hoka hatyo hiyeta niraexatya etahihi hihye. Maisa atyo tyotyaha haliti tahi xini niraexatita hihye, maisa matyakekoneharenai tahi xini niraexaita. Exe nokoamaniye hamohenerenai tahi taita atyo niraexatita, homanerenai hoka. <sup>10</sup> Tyotyaha nokoamaniye tyahenerenai atyo homanerenae tehitiya hoka homanerenai tehitiya atyo nomaniyenai. Nokoamaniye tyaonahitaha hoka ihiyetaha nokaxaexakerityakita — nexa.

<sup>11</sup> — Kalikini atyoite notyohete-hena hinali xeta, maisa atyoite halitinai koni notyaohitita. Hoka noxaotyakiri-

harenai atyoite alitehena halitinai koni. Maika hikaxaikohena noximi maniya hamohenerenai, Abá, hoka hiyema maniya tyaonaha waiye, exahe exahekolaha hoka hakakoa tyaohena enomanaha hoka wiyahékola hakakoa tyaonitere akereta ahekohenaha.

<sup>12</sup> Matyakekoneharenai koni notyaonita ekakoaha hoka nokaxaikoahene hijitere kakoa. Hiso atyo nokoamaniye hamokahene hoka waiye nokaxaikoahene hoka maisa hatya hekoti halakijita hawenane hiyaotyakira xema maniya. Hatita taita atyo halakisa hatyakekone, hamawenekoaretyaka xetare terota hoka. Etahi akiti atyo kaxairatyaka Iraití Waiyexe nanekoa hoka aokitere akereta kawenatyaka maheta hoka halakisa hatyakekone.

<sup>13</sup> — Kalikini notyohetehena hinali xeta. Hekota halitinai koni notyaonita hoka exe akiti noxakai noxaotyakiriharenai hiye, kasani ihalahare tyaonaha naokita hoka. <sup>14</sup> Noxakai hiraine ihiyeha hoka matyakekoneharenai kirawanahene, maisa hatyoha akerexeha xini hoka. Noxaotyakiriharenai atyo maisa matyakekoneharenai akereta xini, exahe natyo hoka maisa matyakekoneharenai akerexe xini — nexa Jesus.

<sup>15</sup> — Maisa hiyehenahitene halitinai konita naokare. Kasani hikaxaikoahene Tihanare xolani hare iniyalahare nonitata naokita. <sup>16</sup> Natyo atyo maisa matyakekoneharenai akereta xini, exahe noxaotyakiriharenai hoka maisa hatyonai akereta xini.

<sup>17</sup> Hiyaotyakira atyo waiyexe, aliterexe. Maika haotyakisa noxaotyakiriharenai hoka waiye tyaonaha hikoamaniya.

<sup>18</sup> — Hiso atyo haxikatya natyo halitinai koni. Nikareta natyo tehitiya naxikatya noxaotyakiriharenai halitinai koni awaiyekehalakatya maheta hiraine.

<sup>19</sup> Noxaotyakiriharenai hiyeta hikoamaniya terota notyaona naokowi. Hikoamaniya terota notyaona naokowi hatyonai sema Iraití Waiyexe hoka hikoamaniya tehitiya waiye tyaonaha maheta.

<sup>20</sup> — Maisa noxaotyakiriharenai tahi taita xini naxita hiso, Abá. Maikaite haiyanai iniraineha semaha hoka noximi maniya tyaohenerenae tahi tehitiya naxita hiso. <sup>21</sup> Kasani exahekolaha hakakoa tyaona enomanaha naokita. Hiyaiya, noxahekoli, hiyahékola xoaha atyo hakakoa, Abá. Kasani wikoamaniya tyaonaha naokita, Abá. Hiso atyo haxikatya natyo halitinai koni. Kasani noxaotyakiriharenai hakakoa ahekotyaha naokita hoka matyakekoneharenai hiyaxikalahare terota aokaha natyo maheta.

<sup>22</sup> — Hihiyeta nokaxaiminisakita hoka hatyo hiyeta tehitiya noxaotyakiriharenai kaxaiminisakita hamaniya taita exahekolaha tyaona maheta wiyahékola hamaniyita tyaonitere akereta. <sup>23</sup> Natyo atyo notyaonita noxaotyakiriharenai kakoa hoka hiso hoka hisaonita nokakoi noxaotyakiriharenai waiye tyaona maheta, exahe hamaniya taita ahekohenaha maheta. Hiso atyo haxikatya natyo halitinai koni, exahe hawaiyetya natyo, exahe hawaiyetya tehitiya noxaotyakiriharenai. Kasani halitinai ana hatyohare akiti waiyekehalaka naokita — nexa.

<sup>24</sup> — Abá, kasani nokoamaniyi hamohenerenai nohaliye tyaonaha naokita hoka nawenani kalorexe waiyaha maheta. Hiyaiya waikohe maomakaharene xowakita atyo hawaiyetya natyo — nexa Jesus.

<sup>25</sup> — Hiso atyo hawaiye, Abá. Xakore hoka matyakekoneharenai maisa wiyare hiso, exahe hitahi akiti hoka maisa waiyekehalakere enomanaha. Hoka natyo atyo nowaiyita hiso. Hiso atyo haxikatya natyo ali xeta. Hatyo akiti waiyekehalakita noxaotyakiriharenai ana. <sup>26</sup> Koxaka naotyakisahitene hitahi akiti kakoa. Naotyakisahenite hoka hatyo akiti waiyekehalaka enomanaha hoka tyaonahitaha hikoamaniya. Hiso atyo hawaiyetya natyo hoka hatyo akereta awaiyetyakakoa-ha naoka, exahe natyo hoka waiye notyaona ekakoaha naokita — nexa Jesus iraexatya Enore hiye.

### Jesus Kabereotyaka

(Mateus 26.47-56; Marcos 14.43-50; Lucas 22.47-53)

**18** Jesus halakisa hairaexala hoka hikoa xane haxaotyakiriharenai kakoa one hiyase Cedrom nexarexe halakoiya. Hanakati tyaonitere atya ime kakoare nali Jesus xane ekakoaha. <sup>2</sup> Jesus kahaliki nali xane haxaotyakiriharenai kakoa hoka ematawatyasehare Judas tehitiya waiyita hatyo nali. <sup>3</sup> Jesus xane kakoa hatyo atya, ime iyiti kakoare akiti hoka wahasehena tyaonita hoka Judas tyoa kaokehena hatyo nali sorarenai kakoa, Iraexatyakalati Hana kaxaikotyasenai hare kakoa tyoa kaoka hatyo nali. Sacerdotenai, fariseunai xoaha xekohasenai axikatyahene Judas xema. Kesekase, xaokanatyakalati hare kolatyahitaha.

<sup>4</sup> Koxaka atyo Jesus hatyo nikare mohenaherene akiti otita maheta maniya. Atyahita exahitaha hoka kaokehena enomana hoka xane ahalakoatyahene hoka nexa ihiyeha: — Xala xatawita? nexa axahene.

<sup>5</sup> — Jesus Nazaré tare watawita — nexaha.

— Natyo — nexa Jesus ihiyeha. Exowaka ematawatyasehare Judas enekoniha tyaonita.

<sup>6</sup> — Natyo — nexa taita Jesus ihiyeha hoka haikoa-haxahenahitaha hoka exoaha waikoa.

<sup>7</sup> — Xala xatawita? nihitiya Jesus ihiyeha.

— Jesus Nazaré tare watawita — nehenahitayaha ihiyeha.

<sup>8</sup> — “Natyo”, nomita xihiyeha. Aliterexe atyo natyo xatawita hoka maika exenai xahalakisa hoka xanehenahitaha — nexa Jesus ihiyeha.

<sup>9</sup> Jesus iraexaitere Enore hiye xowakiya nexa: “Hiso atyo nokoamaniye hamoka noxaotyakiriharenai hoka nokaxaikoahene hoka maisa hatya hekoti halakijita hawenane hiyaotyakira xema maniya”, nexa hatyo xowakiya. Hoka sorarenai tyoa hikoaha enomana hoka, — Maika exenai xahalakisa hoka xanehenahitaha — nexa Jesus sorarenai hiye, iraexahenere akereta kawenatyaka maheta.

<sup>10</sup> Hatyaoseta Pedro iya hakeserakase initini akota hoka Malco nexarexe tinihe aikotyaha, ifihini maniya. Malco atyo sacerdote kalorexe wakanehare.

<sup>11</sup> Hatyaoseta Jesus nexa irahena Pedro hiye: — Hamohetehena hakeserakase initinako. Baba Enore isa

nomani erati notera maheta. Xoana, motyaite maisa noteritene haokita? nexa Jesus Pedro hiye, makawati kaxomokakehenere xaokaka nikare iraeta hatahi.

### Jesus Kakolatyaka Anás Nahalako

<sup>12</sup> Hatyaoseta sorarenai exekohaseha kakoita, Iraex- atyakalati Hana kaxaikotyasenai hare otokaha Jesus hoka olatyahene. <sup>13</sup> Otokahene, olatyahene hoka xane- ha Caifás nimatyokoe Anás hana xeta ekakoa. Hatyo xowaka terehokoane Caifás sacerdotenai xekohase tyaonita. <sup>14</sup> Koxaka Caifás nexa irai judeunai xekohase- nai hiye: “Maika hatya haliti waini tyotya halitinae ana hoka ehokore”, nexa irae.

### Pedro Maisa Jesus Xaotyakirahare Xini Aokowi

(Mateus 26.69-70; Marcos 14.66-68; Lucas 22.54-57)

<sup>15</sup> Xaneha Jesus kakoa hoka Simão Pedro hatya Jesus xaotyakirahare xoaha xaneha exema. Hatyo Jesus xaotyakirahare atyo sacerdotenai xekohase waiyane- hare hoka hatyo tehitiya atyo isoa Jesus kakoa Anás hana talahokolako. <sup>16</sup> Hoka Pedro atyo hekota hati ta- lahokola kanase nali. Hatyaoseta ihinaehare sacerdote kalorexe waiyanehare hikoaheta hoka irae hati jihola kaxaikotyasero hiye hoka noloka Pedro aisoakisa hati talahokotyakako.

<sup>17</sup> Hatyaoseta jihore kaxaikotolo nehena Pedro hiye: — Xoana hiso tehitiya exe haliti xaotyakirahare? nexa axene.

Hoka Pedro nexa: — Maisa atyo exaotyakirahare xini natyo — nexa ihiye.

<sup>18</sup> Kala tihita wakaharenai, sorarenai hiye hoka airatyaha hoka tyoa hatyo haliya tityoa hoka jijikoaha. Hatyaoseta Pedro isoa enekonyaha jijikoa maheta.

### Jesus Kakolatyaka Sacerdotenai Xekohase Nahalako

(Mateus 26.57-67; Marcos 14.55-65; Lucas 22.66-71)

<sup>19</sup> Hatyaoseta sacerdotenai xekohase axa Jesus exaotyakira, exaotyakiraharenai tahi akiti.

<sup>20</sup> Axene hoka Jesus nexa ihiye: — Tyotyaha ehaotya hitaha niraeta. Nikare naotyakisahitene Iraexatyakalati Hanako, xahohisakoatyakalati hanako hare. Hoka maisa atyo xoana xowaka xoare metereta niraexe — nexa. <sup>21</sup> — Xoana hoka haxita natyo? Kahare halitinae sema niraini. Maika hatyonai haxa hoka xakaihaha hi- hiye — nexa Jesus sacerdotenai xekohase niraine na- halakoa.

<sup>22</sup> Nikare Jesus iraeta ene hoka hatya sorare mokotene itihokoa. — Xoana hoka nikare hiraeta sac- erdotenai xekohase kakoa? nexa.

<sup>23</sup> — Xoare nomi namaoseratya hoka hamokotya natyo? Aliterexe niraeta hoka xoana hoka hamokotya natyo? nexa Jesus iniraine nahalako.

<sup>24</sup> Hatyo najikinita Anás axikatya Jesus olatyoaretata haxaise Caifás hana nali xeta. Exowaka Caifás sacer- dotenai xekohase tyaonita.

### Pedro Maisa Jesus Xaotyakirahare Xini Aokowihitiya

(Mateus 26.71-75; Marcos 14.69-72; Lucas 22.58-62)

<sup>25</sup> Hoka Pedro atyo hekota irikati haliya jijikoita hoka axehenahitiyene: — Kala maisa hoka hiso tehitiya exe haliti xaotyakirahare — nexaha.

— Maisa natyo xini — nexa Pedro teraharetyoa.

<sup>26</sup> Hatyaoseta sacerdotenai xekohase wakanehare axehitiyene: — Motya akere hiso hare nowaiya ekakoa etake atya, ime hare kakoare tyaonitere nali. Xoana alitere? nexa ihiye. Pedro aikotinihenere hinaehare nikare iraeta ekakoa.

<sup>27</sup> Hoka Pedro nexa: — Maisa natyo xini — nexa tera- haretyoahitiya. — Maisa natyo xini — nexa taita hoka takoira kawisa.

### Jesus Kakolatyaka Pilatos Nahalako

(Mateus 27.1-2, 11-14; Marcos 15.1-5; Lucas 23.1-5)

<sup>28</sup> Hatyaoseta xaneha Jesus kakoa Caifás hana nalita kalorexe Pilatos hana nali xeta. Exowaka weta. Xaneha ekakoa hoka maisa isoareha ekakoa kalorexe hanako, hisehaliti Páscoa nakaira kanakairaha aokowihenaha hoka. Isoahaiya majudeuneharenai hanako hoka aiyalaharetyahaiya hawenaneha hoka maisaiya aliyakere kanakairahitaha Páscoa nakaira. Nikare atyo exaotyakisakahoha hoka.

<sup>29</sup> Maisa isoahitaha Pilatos hanako hoka hikoa eno- manaha sema maheta enomanaha. — Xoare xemere nikare xamokene? nexa ihiyeha.

<sup>30</sup> — Ekoiya waiyexe haliti hoka maisaiya wotokene hoka wijoita homana ekakoa — nexaha Pilatos hiye.

<sup>31</sup> — Kala xiyane ekakoa hoka waiye xasema etahi hoka xinaho maniya akereta xamokene — nexa Pilatos ihiyeha.

— Maisaiya aliyakere wajjita haliti. Waiseniya hoka maisaiya waiyeta Roma yerenai hiye — nexaha.

<sup>32</sup> Koxaka Jesus irai haxaisaka tahi akiti hoka hatyo hakamane aohenere akereta efaharenai mokene, Je- sus niraine akereta kawenatyaka maheta.

<sup>33</sup> Hatyaoseta Pilatos isoahetehtitiya hahakatyakala ako hoka kawisa Jesus hoka axehenene: — Xoana alitere judeunai xekohase hiso? nexa axehenene.

<sup>34</sup> — Xoana hisota nikare hahekotya hoka nikare haxita natyo? Hatya kore nikare irae notahi akiti hoka haxita natyo? nexa Jesus ihiye.

<sup>35</sup> — Xoana judeu yatya natyo hoka? Sacerdotenai xekohasenai, haiyaharenai hare, hisoharero makere atyo nolokaha hiso nomani hoka hiyaisaka aokaha no- hiye. Xoare hisoma hoka nikarahitaha? nexa Pilatos Je- sus hiye.

<sup>36</sup> — Kalorexe xakore atyo natyo hoka maisa atyo aliyere kalorexene xini natyo. Aliyere kalorexeya natyo hoka nowakaniharenaiya xalijinihareha hoka maisaiya judeunai otokahitaha natyo. Hoka maisa atyo aliyere kalorexe xini natyo — nexa Jesus.

<sup>37</sup> — Nikare hoka kalorexe atyo hiso? nexa axehi- tiyene.



— Hiso atyo kalorexe haokita natyo — nexa Jesus. — Hatyo niyahare terota notyaona halitinai koni noxakai maheta iraiti aliterexe ihiyeha. Tyotya iraiti waiyexe awaititerenai atyo semaxemaita niraini — nexa Jesus.  
<sup>38</sup> — Xoare iraiti aliterexe haokita? nexa Pilatos Jesus hiye hoka hikoahitiya hoka xane iraihitiya judeunai hiye.

### Jesus Kahalakisaka Kaxaisaka Maheta

(Mateus 27.15-31; Marcos 15.6-20; Lucas 23.13-25)

Hikoahitiya enomanaha hoka nehena ihiyeha: — Maisa xoare iniyalahare nasemita etahi akiti. Maisaiya xoare xemere kaxaisakita — nexa.  
<sup>39</sup> — Hoka xinaho maniya atyo terehokoakiti nihatyaka hisehaliti Páscoa xowakehena hoka hatya berexo ako tyaonitere nahalakhitita xomana. Hoka xoana judeunai xekohase nahalakhiteta xomana xaokita? nexa Pilatos axahene.  
<sup>40</sup> — Maisa exe kahalakisakeheta waokare. Maika hahalakhiteta Barrabás womana — nexaha kintyaxa kawiyatyaha enomana.

Hatyo Barrabás atyo haliti fahare.

### Jesus Kamokonasetyaka

**19** Exowakerota Pilatos Jesus mokonasetyaka aoka.  
<sup>2</sup> Hatyaoseta sorarenai tyomaha xolatyaolisoakalati katohere kakoare hoka mokahene eseri hiye, exahe imitinase xotere ako aisoakisahene.

<sup>3</sup> — Hawaiyeta womana, judeunai xekohase — nexa koexahaxatyaha ekakoa, itihokoa hare mokotyahene hakahe kakoa.

<sup>4</sup> Hatyaoseta Pilatos hikoahitiya hoka iraihitiya judeunai kakoa: — Naihikoatenite xomana hoka xiyaiya! Hoka xasemehena: Natyo nomani atyo maisa xoare hare iniyalahare tyomare — nexa Pilatos ihiyeha.

<sup>5</sup> Nexa hoka aihikoatya Jesus enomanaha. Katohere seriyeta, imiti xotere nasakoreta hioa enomanaha.

— Xiyaiyehenenira! nexa Pilatos ihiyeha.

<sup>6</sup> Sacerdotenai, Iraexatyakalati Hana kaxaikotyasenai harenai waiyaha Jesus hoka kintyaxa kawiyatyaha: — Haberekotene atyalihose xaimaholatyaka hiye! Haberekotene atyalihose xaimaholatyaka hiye! nexaha kintyaxa kawiyatyaha, Jesus xaisaka aokahitaha.

— Maika atyo xiso xiyanehena ekakoa hoka atyalihose xaimaholatyaka hiye xaberekotene. Natyo nomani atyo maisa xoare iniyalahare tyomare — nexa Pilatos ihiyeha.

<sup>7</sup> — Xaotyakisatyaho kakoare wiso. Wiyaotyakisakaho xema wisaonita hoka exe haliti xaisaka waoka, Enore Ityani aokowita hoka — nexa judeunai Pilatos hiye.

<sup>8</sup> Hatyo akiti sema Pilatos hoka maira kalore. <sup>9</sup> Xane isoahitiya hatyako hoka axehitiya Jesus: — Aliyotare kaisere hiso?

Nexa xakore hoka maisa ekoaxaita enomana.

<sup>10</sup> — Xoana hoka maisa hekoaxaita nomani? Hiyaiya, kalorexe atyo natyo. Hikahalakisakehetaiya naoka hoka hikahalakisakeheta. Hikaxaisakaiya atyalihose

xaimaholatyaka hiye naoka hoka hikaxaisakaiya. Xoana eko waiyekehalakita homana? nexa axa Jesus.

<sup>11</sup> — Ekoiya awa Enore kalorexe mokita hiso hoka maisaiya xoana hamokita natyo. Hatyo hiyeta nomatawatyasehare kalore iniyalahare tyoma — nexa Jesus kalorexe hiye.

<sup>12</sup> Pilatos sema iniraine hoka halakhiteta Jesus aokowihena. Xakore hoka judeunai kawiyatyaka kintyaxa enomana: — Awaira atyo hahalakhitethenene. Hahalakhiteniya atyo hoka maisaiya atyo waiyeta Roma yerenai xekohase César ana. Hiyaiya, hatya haliti kalorexe tyaona aokowita hoka César nahalakoahare terota tyaonita — nexaha Pilatos ana kawiyatyaha.

<sup>13</sup> Hatyo iniraine sema Pilatos hoka aihikoaheta Jesus menanaka tyaonahitereha nali. Hatyaoseta Pilatos kalorexe nokahakalaose tyokeheta, “Sehalikoa” aokahitere nali. Hebreunai xako maniya atyo: “Gabatá”, nexahitaha hatyo xaokaka. <sup>14</sup> Exowaka okoi totahikoahena. Kamaetali hoka Páscoa ferakene tyoahena.

Pilatos tyokeheta hoka nexa judeunai hiye: — Xiyaiyehena, owene xiyekohase kalorexe — nexa ihiyeha.

<sup>15</sup> — Maisa! Waiye xaisaka atyo! Waiye berekotyaka atyalihose xaimaholatyaka hiye! nexaha kintyaxa kawiyatyaha enomana.

— Xoana xiyekohase kaberekotyaka atyalihose xaimaholatyaka hiye xaokita? nexa.

— Maisa exe xini wiyekohase. Roma yerenai xekohase taita atyo wiyekohase — nexaha sacerdotenai ni tyohalitiranai Pilatos hiye.

<sup>16</sup> Nexaha hoka Pilatos halakisa Jesus sorarenai ana berekotyahene maheta atyalihose xaimaholatyaka hiye hoka exowakerota xaneha ekakoa.

### Jesus Berekotyaka Tahí

(Mateus 27.32-44; Marcos 15.21-32; Lucas 23.26-43)

<sup>17</sup> Hatyaoseta xaneha Jesus kakoa Calvário, Seriti nahe aokahitere nali. Hebraico xako atyo, “Gólgota”, nexahita exaokaka. Xanehenaha ekakoa hoka Jesus kolatya atyalihose xaimaholatyaka haberekotyaka niyahare. <sup>18</sup> Xane kaokaha ekakoa hatyo nali hoka berekotyaha Jesus atyalihose xaimaholatyaka hiye. Hinamahare tehitiya berekotyaha atyalihose xaimaholatyakanai hiye, hamaniya hahare, hamaniya hahare xoaha atityoakisahene hoka Jesus enenekeseneha tyaona.

<sup>19</sup> Pilatos xairatya taba taose hiye hoka hatyo taba taose berekotyaha Jesus seri hao. Exakerexe xairatyoare, hebraico, grego, latim xoaha xako:

JESUS NAZARÉ YERE JUDEUNAI XEKOHASE

<sup>20</sup> Wenakalati haliyita berekotyahene hoka kahare judeunai jiyehenaha hatyo nali hoka waiyehenaha hatyo xairatise hoka kaixaretyahitene.

<sup>21</sup> Hatyaoseta sacerdotenai xekohasenai xane hoka nexaha Pilatos hiye: — Awaiya atyore, “Judeunai xekohase”, hexa haxairatyare. “Natyo atyo judeunai xeko-

hase", hexaiya atyore haxairatya — nexaha Pilatos hiye.

<sup>22</sup> — Nikare naxairatya hoka kotare nikareta — nexa Pilatos ihiyeha.

<sup>23</sup> Sorarenai berekotya Jesus atyalihose xaimaholatya hiye hoka hatyaoseta inima ekatyahexete aikosekoatyaha 4-taose hoka haihatyaka tyaonaha ekakoa. Hoka inimanase atyo maisa itinolatyakahare xini hoka maisa aikosekoatyahitene.

<sup>24</sup> — Kotare maxaikotyakahare wahalakisa inimanase hoka wahasakaharetyakakoa ihiyeha hoka xala xamani tyaona ekakoa — nexakakoaha.

Nexakakoaha hoka hatyaoseta hasakaharetyakakoa-ha hoka hahare tyaona inimanase kakoa. Hatyo nikare tyaohenahere akiti kaxairatyaka iraiti waiyexe nanekoa hoka nikare tyaona:

Nimi atyoite irakakakoaha hoka nimanase hiye atyoite hasakaharetyakakoa.

Hatyo akereta sorarenai tyaona.

<sup>25</sup> Atyalihose xaimaholatya haliya Jesus nityo haximalone kakoa, exahe Maria Madalena, Clopas exanityo Maria harenai tityoahitaha hoka <sup>26</sup> hatyaoseta Jesus waiya hanityo. Inityo haliya tyaonita exaotyakirahare awaiyetiterene hoka Jesus waiyene hoka nexa hanityo hiye: — Hiyaiya, exe atyo hityani — nexa hanityo hiye.

<sup>27</sup> Hatyaoseta haxaotyakirahare hiye nihitiya: — Hiyaiya, exe atyo hityo — nexa ihiyeha.

Nexa ihiyeha hoka exaotyakirahare noloka Jesus nityo hahanako xeta hoka tyaona ehaliya maheta.

### Jesus Kamane Tah

(Mateus 27.45-56; Marcos 15.33-41; Lucas 23.44-49)

<sup>28</sup> Hatyo najikinita atyo waiyekehalakehena Jesus ana, koxaka atyo tyotyaka kawenatyakeheta. Hoka nexa: — Noinita — nexa, kasani Irait

<sup>29</sup> Hatyo nali tinihali vinhoxa katyalaxere kakoare tyaonita hoka xane tihaharetyoakalati mitoloka hatyoxa hoka atyakase hiye mokene hoka xane Jesus kanase hiye ekaokakisene.

<sup>30</sup> Tera hatyo vinhoxa hoka nexa: — Koxaka tyotyaka memaka hoka imiyane nahikoa — neheta takita hoka xawinoka haseri hoka waini.

### Sorare Tonotyaka Jesus Halatako

<sup>31</sup> Hatyaoseta judeunai xane axa Pilatos, atyalihose xaimaholatya hiye tyaoniterenai kasahe taikaha aohenaha hoka wainiha haxerore hoka atyalihose xaimaholatya hiyeta iyehenahitene maheta, memere mokakatyaha sábadu ferakene nyahare aokowiyahitaha hoka. Kamaetali sábadu xowaka atyo Páscoa ferakene hoka kasani maisa heko atyalihose xaimaholatya hiye tyaonaha sábadu xowaka aokareha judeunai hoka nikare irae ha Pilatos hiye.

<sup>32</sup> Xane irae ha Pilatos kakoa hoka axikatya sorarenai hoka xane atyalihose xaimaholatya hiye tyaoniterenae kasahe taikaha maheta. Jesus hakakoane bereko-

henahere hahare hotohare kasahe taikaha, hatyaoseta hahare taikehehenahitayaha. <sup>33</sup> Hoka Jesus ana xane xakore hikoahenaha, koxaka atyo waini hoka maisa ekasahe taikahitaha. <sup>34</sup> Xakore atyo hoka hahare sorare atyo hatonotyakala kakoa Jesus koihako tonotyaka. Tonotene hoka hatyo etonolaoseta iratyoka timalati, one xoaha. <sup>35</sup> Ewaiyasehare waiya hatyo nikare mohenahere Jesus hoka xakaini. Maisa maoseraita xini, aliterexe nikare mokaha Jesus. Waiyene hoka xakaini xityakeko maheta.

<sup>36</sup> Exakerexe xairatyoka tyaonita Irait

nanekoa: Maisaiya hanahe hekoti enahe taikoita.

Nikare etahi kaxairatyaka hoka nikare mokaha Jesus iraiti akereta kawenatyaka maheta.

<sup>37</sup> Hakiti tehitiya exakerexe xairatyoka tyaonita: Wahakotyahaite hatyo hatonolahareha ana.

### Jesus Xafityaka Tah

(Mateus 27.57-61; Marcos 15.42-47; Lucas 23.50-56)

<sup>38</sup> Hatyo najikinita José nexarexe xane irae Pilatos kakoa, iyeheta maheta Jesus háre atyalihose xaimaholatya hiyeta hoka fetene maheta. José atyo Ari-matéia nalitare, Jesus xema nawenatyasehare. Exema nawenatyasehare xakore hoka mema tyaonita, judeunai amairakijitene hoka.

Xane axa Pilatos hoka: — Ahá, hiyane hiyehetene — nexa Pilatos ihiyeha hoka xane atyalihose xaimaholatya hiyeta iyeheta Jesus háre. <sup>39</sup> Nicodemos nexarexe tehitiya xane José xema. Hatyo Nicodemos atyo etake makiya xane irae hene Jesus kakoa. Nicodemos xane José xema, kolatya airaxero ekaketatyakahare aloés, mirra xoaha kakoare. Timena hatyo airaxero kolatya.

<sup>40</sup> Xaneha hoka xane iyehenahitaha Jesus háre atyalihose xaimaholatya hiyeta hoka olahisityahene imiti kese taosero kakoa hoka airaxero kaolaxahenahere kakoa airaxehisahene. Judeunai atyo nikare haka-manaha moka hoka fityahitaha.

<sup>41</sup> Hatyo Jesus berekohenahere nali akiti hanakatihaliti kakoare, hoka hatyo nali sehali kakoakotyaka. Waitare kaomakere hoka maisa xala hare hatyoako kaxafityakehene. <sup>42</sup> Maisa sekore hatyo sehali kakoakotyaka hoka hatyoako xane Jesus háre mokaha. Exowaka okoi sábadu ferakenehena judeunai hiye hoka nikare tyaonaha.

### Xawatyakalati Firakoheta

(Mateus 28.1-8; Marcos 16.1-8; Lucas 24.1-12)

**20** Domingo xowaka weta makiyasete Maria Madalena xane Jesus xawatyakala nali xeta.

Xane kaoka, waiyehena atyo, xawatyakalati atyo majiholatyoare. Ijihola sehali taose atyo koxaka kaiyaka hoka majiholatyoare tyaonita.

<sup>2</sup> Nikare waiya hoka tema xane Simão Pedro, háhare Jesus awaiyetitere xoaha ana hoka nexa ihiyeha: — Iyehenahita Xekohaseti Jesus háre exawatyakala akota hoka kala aliyo xamani ala xane mokahene — nexa Maria xakai ihiyeha.

<sup>3</sup> Nexa ihiyeha hoka Pedro hatya exaotyakirahare xoaha xane xawatyakalati nali. <sup>4</sup> Tema xaneha, háhare atyo Pedro xahe winihare hoka tema xane hoka hatyo hotohare xane hikoa xawatyakalati nali. <sup>5</sup> Xane hikoa hoka tanatyokoty hoka imiti kese taosero waiyeheta hoka maisa atyo ijoita xawatyakalati ako. <sup>6</sup> Enajikinita atyo Pedro xane hikoa hoka isoa xawatyakalati ako hoka waiyeheta imiti taose, nali tyaonita hoka. <sup>7</sup> Jesus seri hiye olalihenahere taose haware tyaonita imiti linho taose eháre hiye olalihenahere nonitata. <sup>8</sup> Hatyaoseta exaotyakirahare hetati xane hikoahenere tehitia isoa hoka waiya. Waiya hoka tyakeko. <sup>9</sup> Exowakiya maisa waiyekehalakere enomanaha Iraeti Waiyexe nanekoa xairatyoare tyaonitere, Jesus ite kasehetehenere nitere. <sup>10</sup> Hatyaoseta hatyo hinamanai haikoahetaha hahanaha xeta.

### Jesus Kaotyakeheta Maria Madalena Ana

(Mateus 28.9-10; Marcos 16.9-11)

<sup>11</sup> Hoka Maria Madalena atyo hekota tyaonita xawatyakalati haliya, tiyita. Haosexa naseta meholokoa tanatyoa waiyakoty xawatyakalati. <sup>12</sup> Waiyehena atyo, owene hinama anjo tyaonita iyomere nimere makere. Tyokahita Jesus xomokakaose nali, hatya eseri maniya, hatya ikiji maniya xoaha. <sup>13</sup> — Xoana hoka hitiyita? nexaha axaha Maria. — Iyehenahitaha noxekohase háre hoka aliyo xamani xane mokahene — nexa Maria ihiyeha. <sup>14</sup> Nexa hoka ehaikoahaloheta, waiyehena atyo, Jesus atyo owene tityoita hoka motya maisa hatyota xini aokitene. <sup>15</sup> Hatyaoseta Jesus axene: — Xoana hoka hitiyita? Xala xahita hatawita? nexa. Motya hatyo naliye hanakati kaxaikotyasehare aokene Maria hoka nexa ihije: — Xoana, hiso hiyeheta noxekohase háre? Aliyo hamokene? Alitere atyo hokolatene hoka hiyakai nohiye hoka noxani nakolahetene hahalakihenerene nalita hoka hakiti noxani nafehetehitiyene — nexa Maria ihije. <sup>16</sup> Hatyaoseta: — Maria! nexa Jesus. Nexa hoka ehaikoa enomana hoka nexa: — Raboni — nexa ihije, hebreunai xako irai. Wiyako maniya atyo, “Xaotyakisatiye”, nita. <sup>17</sup> — Awa atyo hotohena natyo noxanini nahitita Baba nali. Hiyane kaisere nohinaeharenai hiye hiyakaihetehena natyo. Maika hexa ihiyeha: “Eno tyaite xanehena Hanexe Enore nali, exahe Xexe Enore nali”, hexa ihiyeha — nexa Jesus Maria Madalena hiye. <sup>18</sup> Nexa ihije hoka Maria Madalena xane xakaiheta Jesus xaotyakiraharenai hiye: — Nowaiyehetaore Xekohaseti — nexa Maria Madalena ihiyeha, Jesus niraene harenai xakai ihiyeha.

### Jesus Kaotyakeheta Haxaotyakiraharenai Ana

(Mateus 28.16-20; Marcos 16.14-18; Lucas 24.36-49)

<sup>19</sup> Hatyo domingone makehena hoka exaotyakiraharenai hohisakoaha hati waiye jihotyakere ako, judeunai nityohalitiranaiha amairakisahitene hoka. Ho-

hisakoaha hoka Jesus kaotyaka enomanaha hoka tityoa enenekeseneha.

— Maika waiye ximehexaikohare xisaona naoka — nexa ihiyeha, <sup>20</sup> hotikisa hakahekoa berekotyakaose, hakoihakore tonotyakaose hare hotikisa enomanaha.

Waiyehenahita haxekohaseha hoka ihalaharehenahita.

<sup>21</sup> — Maika waiye ximehexaikohare xisaona naoka. Baba Enore axikahenere natyo akereta atyoite naxikatya xiso — nexa ihiyeha.

<sup>22</sup> Nexa ihiyeha hoka aomomaharehenahitene. — Isekohaliti Waiyexe tyaona xikakoa naoka — nexa ihiyeha. <sup>23</sup> — Haiyanai nómanenai iniyalahare xemaisatita hoka kamaotyanyakaiya. Hoka maisaiya xemaisatita hoka maisaiya kamaotyanyakita — nexa Jesus ihiyeha.

### Jesus, Tomé Xoaha

<sup>24</sup> Jesus kaotyakehetehenere enomanaha xowaka atyo maisa nali enekoniha aka háhare exaotyakirahare Tomé, Dídimó aokahitere.

<sup>25</sup> Tomé kaokoheta enomanaha hoka exaotyakiraharene haiyanai nehenaha ihije: — Wiyaiyeheta Xekohaseti — nexaha.

— Kala xamaoseraita. Maisaiya atyo nowaiyita eberekotyakaose ekahekoa, exahe namokita nokahihi eberekotyakaose, exahe namokita nokahe etonotyakaose ekoihako akiti hoka maisaiya atyo notyakekota xiraini — nexa Tomé.

<sup>26</sup> Tyaohenaha, hasemanane najikinita kala Jesus xaotyakiraharenai hohisakoahenahitiyaha, Tomé kakoareha atyo. Hati waiye jihotyakahare ako tyaonahitaha. Hatyaoseta Jesus kaotyakihitiya enomanaha. Tityoa enenekeseneha hoka nexa ihiyeha: — Maika waiye ximehexaikohare xisaona naoka — nexa ihiyeha.

<sup>27</sup> Hatyaoseta Tomé hiye nexa: — Wityaira hiyaiya hoka hikahihi hamohena nokahikoi, exahe hikahe hoka nokoihako. Awaira hamatyakekohena. Maika hityakeko — nexa Jesus ihije.

<sup>28</sup> Hoka nexa ihije Tomé: — Noxekohase, Nenorixi! nexa taita iniraine nahalakoa.

<sup>29</sup> — Hityakekoheta atyo, hiyaiyeheta tyare natyo hoka. Hoka waiye kaiserehare atyo mawaiyaneharetatyakekote natyo — nexa Jesus.

### Xoare Niyahare Xamani Exe Iraiti Waiyexe

<sup>30</sup> Jesus atyo kahare xoalini hare tyoma haxaotyakiraharenai haoti tyakekoha maheta, hoka maisa atyo tyotyta etahi kaxairatyakita exe baberanekoa. <sup>31</sup> Haiyanai enómanenai taita kaxairatyaka xityakeko maheta Jesus. Hatyo atyo Enore Ityani. Jesus atyo Enore Kalorexe Aohenere. Xityakekone hiyetaite menanehaliti xisaona.

### Jesus Kaotyakeheta 7-hare Haxaotyakiraharenai Ana

**21** Hatyo najikinita Jesus kaotyakehitiya haxaotyakiraharenai ana hokoxa Tiberíades

aokahitere nali. Exakere kaotyaka enomanaha: <sup>2</sup> Haiyaharenai exaotyakiraharenai nali tyaonita, Simão Pedro, Tomé Dídimo, Natanael, Zebedeu ityaninai, hinamahare tehitiya harenai nali tyaonita. Natanael atyo Caná nalitare, Galiléia koa yere.

<sup>3</sup> Nali tyaonahita hoka Simão Pedro nexa hahinaeharenai hiye: — Noxani namairatya — nexa.

Nexa hoka: — Wisoa tehitiyaite hiyema hoka wamairatya — nexa ihinaeharenai ihiye.

Nexaha ihiye hoka mánene kanowako isoaha hoka xaneha. Hatyo makene mairatyaha heko ferakoa hamairalaha kakoita xakore hoka maisa xoare hare nolokahitaha.

<sup>4</sup> Ferakoahena, waiye waiyakehena hoka, waiyehenaha atyo, owene atyo Jesus one kilihi kaiholokoa tyaonita. Xakore hoka motya atyo maisa Jesus xini aokahene.

<sup>5</sup> — Xoana xanoloka kohase? nexa kawiyatya Jesus enomanaha.

— Maisa xoare — nexaha ihiye.

<sup>6</sup> — Xaxawahena maka kohase hiyakakala kanowa halatako fihini maniya hoka kohase nalita xahiya — nexa ihiyeha.

Exowakerota xawatyaha onexa maka kohase hiyakakala hoka kahare isoa enako. Kahare kohase isoa enako hoka maisa aliyakere noloka aihikoa-henahitita kanowako hahiyakakalaha, timena hoka.

<sup>7</sup> Hatyaoseta exaotyakirahare Jesus awaiyetitere nexa Pedro hiye: — Xekohaseti Jesus nikaore — nexa Pedro hiye.

Pedro sema Xekohaseti nali tyaonitere hoka isoaheta haimanasako, maimahiro ene tyaonita hoka. Isoaheta haimanasako, exoa onexa hoka maxakoa xane Jesus tyaonitere nali xeta. <sup>8</sup> Haiyaharenai exaotyakiraharenai atyo kanowakota nolokehaxatya tyoahita kohase kakoare hahiyakakalaha. Maisa sekore kaiholokoa nonita.

<sup>9</sup> Tyoa hikoahenahitaha kaiholokoa nali hoka exoahenahitaha kanowakota. Waiyehenaha atyo, kohase jihatyaka tyaonita nakairati kakoare irikatyaose.

<sup>10</sup> — Xamehena nomani kohase xinolokala hiyeta — nexa Jesus ihiyeha.

<sup>11</sup> Exowakerota Pedro nolokihitya kohase hiyakakala kohase kakoare, aihikoatya iyoherotikoa. Kahare kohase, kaise ihiyakakalako. Ihatyahene hoka 153-kohase, kalorexe taita. Kahare, kalorexe taita xakore hoka aihikoatene hoka maisa irikoita ihiyakakalaha.

<sup>12</sup> Hatyaoseta Jesus iraihena: — Witya xikanakairahena — nexa ihiyeha.

Maisa xala hare axarene. Xekohaseti Jesus terota aokahitene hoka waiyekehalakita enomanaha hoka maisa xala hare axarene, haiharahitene hoka.

<sup>13</sup> Hatyaoseta Jesus kaoka ehaliyaha hoka nakairati isa enomanaha. Nikare tehitiya kohase isa enomanaha.

<sup>14</sup> Koxaka hinamaki Jesus kaotyakeheta haxaotyakiraharenai ana hakamane najikinita, kaseheta hoka. Exe kakoita hanamaki kaotyaka enomanaha.

## Jesus Irae Pedro Kakoa

<sup>15</sup> Kanakairaha najikinita Jesus axa Simão Pedro: — Simão, João ityani, xoana hawaiyetita natyo exe haiyanai xahexe? nexa.

— Há, nawaiyetita hiso, Xekohaseti. Hatyo akiti waiyekehalakita homana — nexa iniraine nahalakoa.

— Maikaite hikaxaikohena nokalaneroksi mokosenai nomani — nexa Jesus ihiye, (exema maniya tyaonitere-nai xaokaka nikareta iraeta).

<sup>16</sup> Hatyaoseta Jesus axehitiyene: — Simão, João ityani, xoana hawaiyetita natyo?

— Há, nawaiyetita hiso, Xekohaseti. Hatyo akiti waiyekehalakita homana — nehitiya Pedro ihiye.

— Maikaite hikaxaiko nokalaneroxinai nomani — nehitiya Jesus ihiye.

<sup>17</sup> Hatyaoseta mawaheneta hoka axehitiyene: — Pedro, João ityani, xoana, aliterexe hawaiyetita natyo? nexa axehitiyene.

Hatyaoseta Pedro hanamakihena axita hoka amaikoharehena: “Xoana, hawaiyetita natyo?” nita ihiye hoka.

Amaikoharehena mokitene hoka nehena: — Xekohaseti, tyotya hakakoare atyo waiyekehalakita homana. Nawaiyetita kaiserehare hiso. Hatyo akiti waiyekehalakita homana — nexa Pedro ihiye.

— Maikaite nokalaneroxinai hikaxaiko nomani — nehitiya Jesus ihiye. <sup>18</sup> — Hiyoimaharene xowakiya ene atyo aliyo xamani hiyane haokowihena hoka himako hisoa hoka hiyaneta ene. Hoka maikaite hinityohaliti-hena hoka haimatya hikahe haiyanai ana hoka olatyaha hiso hoka kolatyaha hiso, maisa xakorite hiyane ekakoaha haokowiye hoka hiyanite — nexa Jesus ihiye.

<sup>19</sup> Pedro kamane xaokaka nikare iraeta Jesus. Pedro kamane hiyetaite Enore kaxaerorityaka.

Hatyaoseta Jesus nehitiya Pedro hiye: — Hisaohena noximi maniya — nexa ihiye.

## Jesus Irae Hatya Haxaotyakirahare Kakoa

<sup>20</sup> Hatyaoseta Pedro terehokoa waiya Jesus xaotyakirahare masakare awaiyetitere ana. Hatyo exaotyakirahare atyo hisehaliti Páscoa xowakiya kanakairahitaha hoka tyokita Jesus haliya hoka nita Jesus hiye: “Xala himatawatyasehare?” nita axita Jesus. <sup>21</sup> Pedro waiya hatyo Jesus xaotyakirahare hoka nexa Jesus hiye: — Hoka exe ite xoana tyaoahena? nexa axa Jesus.

<sup>22</sup> — Hekotaiya makamanehare tyaona naoka hoka hekotaiya tyaona nahaikoahetehenere kijiya. Xoaneretya haoka? hatyo nali, maisa hiso xini. “Hisaohena noximi”, nomita hihiye — nexa Jesus Pedro ni-raene nahalakoa.

<sup>23</sup> Hatyaoseta xakaikoatyaha hakakoare hatyo exaotyakirahare makamanene akiti, maisa xakore atyo nikare Jesus nexare hoka nexa taita xakore atyo hoka, “Hekotaiya makamanehare tyaona naoka hoka hekotaiya tyaona nahaikoahetehenere kijiya. Xoaneretya haoka? hatyo nali, maisa hiso xini”, nexa taita xakore atyo Jesus Pedro hiye hoka.

<sup>24</sup> Hatyo exaotyakirahare atyo xakaini hatyo Jesus iraitere tyomehenere harenae tahi akiti, exahe xairahetene baberanekoa. Maisa maoseraita xini, aliterexe iraeta. Hatyo akiti waiyekehalakita womana.

### Imiyane

<sup>25</sup> Hekota Jesus tyomitere akiti maxakaihakatyakahare kahare. Hatyoiya kala tyotyaxairatyakere hoka kalaiya exahe waikohe hakakoare hoka maisaiyala hatyo babera hakakoaneta naoka, nexa hatyo exaotyakirahare.

# Atos

## Xairahenerene Niraene

(Lucas 1.1-4)

<sup>1</sup> Koxaka naxairatya babera homana, Xekohaseti Teófilo, hetatita tyotyta Jesus aotyakihenerere, ty-omehenerenae tahi enokoa kakolatyakehenere kijiya. <sup>2</sup> Enokoa kakolatyakehenere nahitita halaisa hairaene haomanerenae haxaotyakiraharenae aohenerenae ana, Isekohaliti Waiyexe niyaterere hiyeta. <sup>3</sup> Hakamane najikinita Jesus kaotyakeheta kahare maniyata haxaotyakiraharenae ana, 40-ki ferakene. Maisa maoserare xini, kaseheta kaiserehare. Exaotyakiraharenae waiyehetene. Jesus irae ekakoaha Enore maniya nawenatyaka tahi.

<sup>4</sup> Hatyo xowaka Jesus tyaonita haxaotyakiraharenae kakoa hoka iraeta ekakoaha: — Hekoira Jerusalém nali xisaona. Xatyaha Enore isa aokowitere xahita, noxakaitere xihye xahita. <sup>5</sup> João atyo aliterexe one kakoa batixatya. Hoka xiso atyo ite Isekohaliti Waiyexe kakoa xikabatixatya ininaetehena hoka, maisa waha-hetere.

## Jesus Atyo Kakolatyaka Enokoa Xeta

(Lucas 24.50-53)

<sup>6</sup> Jesus niraine kakoarenai, ehaliya hohisakoiterenae xoaha axene: — Xekohaseti, xoana kalikini xowakaite Israel hotyalinae ana ewaikoheraha hisehetehena?

<sup>7</sup> — Maisaiya atyo kaxawaiyehalatyakita hatyohare akiti xomana. Wexe Enore ana taita atyo waiyehalakita hatyo haxaokala ximita aemenekohenere ferakene kakoa — nexa Jesus ihiyeha. <sup>8</sup> — Hoka xikaxaiyate-likisaka ite. Isekohaliti Waiyexe exoahena xomana hoka xiyane notahi ite xiyakaihena Jerusalém tyaoniterenae hiye, tyotyaha Judéia koa, Samaria koa tyaoniterenae hiye, exahe sekorenai hiye hoka.

<sup>9</sup> Nexa Jesus irae taita hoka kanolokaka enoxeta tyotyaha ehaotyahitaha. Hatyaoseta kaiminiti talatene ononyahita hoka maisa waiyehenahititene.

## Cristo Haikoahaneheta

(1 Tessalonicenses 4.13-18; 5.1-4; 2 Tessalonicenses 1.7-10; Hebreus 10.37)

<sup>10</sup> Hekota wahakotyahitaha enoxeta Jesus xanetere xahita hoka eharehena rotita hinamahare haliti kaotyaka enomanaha iyomere akoreha <sup>11</sup> hoka nenhena: — Galiléia yerena, xoana hoka enokoa xeta xawahakotita? Exe Jesus enokoa xinekonita xanehenerere eno xeta akereta ite tyoheta — nexaha.

## Matias Xomokaka Judas Wenekoare

<sup>12</sup> Hatyaoseta haikoahenahitaha Jerusalém nali xeta, Oliveira tyairiya nalita. Sábado ferakene watohenere akere xikako, maisa sekore xini.

<sup>13</sup> Kaokehenahitaha hoka isoahenahitaha hatyako, xaneha enoako. Hatyoako tyaonahitaha Pedro, João, Tiago, André, Filipe, Tomé, Bartolomeu, Mateus harenai, Alfeu ityani Tiago, Simão Zelote, Tiago ityani Judas xoahanae hatyoako tyaonahitaha. <sup>14</sup> Tyotyaha haxawalita iraexataha minita Enore hiye, ohironae hare kakoa, Jesus nityo Maria harenai kakoa, iximarenenae harenai xoaha kakoa.

<sup>15</sup> Hatyo najikinita 120-hare Jesus xema maniya tyaoniterenae hohisakoahitaha hoka Pedro tityoa hoka nehena: <sup>16</sup> — Xasemehena, nohinaeharenai. Isekohaliti Waiyexe Davi kanasakota aehikoaxatya etake Judas Jesus matawatyasehare tahi akiti, hoka nikare terota kawenatyaka. Hiyaiya, Judas atyo Jesus xotokaseharenai ana matawatene. <sup>17</sup> Winekoni ene tyaonita, Jesus aokene hairaine kakoare maheta haka haxawalita wikakoa maheta. <sup>18</sup> Judas xane iya waikohe Jesus matawahenerere xaimane kakoa. Hatyo waikohe háiyane nali exoa hoka enajihiri irikotyosekoa hoka tyotyaha hikoa enajihiri — nexa Pedro ihiyeha.

<sup>19</sup> — Hatyo tahi tyotyta Jerusalém tyaoniterenae semaha hoka “Aceldama” nexaha kaixaretyaha hatyokoa waikohe — nexa Pedro ihiyeha. Exakoha atyo “Aceldama”. Wiyako maniya atyo “Timalati koa”, nita.

<sup>20</sup> — Salmo nanekoa exakere hatyo tahi kaxairatyaka: Maika ehana firakiti tyaheta hoka maisa xala hare tyaonehitita nali.

Nexa tehitiya:

Hatya atyo ite tyaona ewenekoare hoka ehatene tyoma.

<sup>21</sup> — Hiyeta ite hoka hatya haliti wamoka Judas wenekoare Jesus kaseneheta tahi xakaisasehare maheta. Haiyaharenai waiyehenahere Jesus tyaonitaterere winekoni xowaka <sup>22</sup> tyaonaha wikakoa João batixahenereneta enokoa kakolatyakehenere kijiya. Maika hatya hatyoharenai konitare wamoka Judas wenekoare.

<sup>23</sup> Hatyo hekota hotikisaha hinamahare, José Barsabás Justo kaexareharenahere, Matias xoaha enomanaha. <sup>24</sup> Hatyohekota iraexahenaha: — Hiyaiyita atyo wityotyta wiyahakola, Xekohaseti. Hahotikihena kalikini womana xala xamani ite haoka <sup>25</sup> haka wikakoa

maheta hoka Jesus niraine kakoare tyaona tehitiya. Hiyaiya, Judas atyo halakisa hahatene hoka xane hakiti haomanere nali xeta.

<sup>26</sup> — José xamani, Matias xamani — nexaha hoka hasakaha xala xamani tyaona maheta. Hatyaoseta Matias nexare kaotyaka hoka hatyo tyaona Jesus niraine kakoare 11-harenae koni.

### Isekohaliti Waiyexe Xexoane

(Atos 8.14-17; 10.44-47; 19.1-7)

**2** Pentecostes ferakene xowakehena hoka tyotyaha Jesus xema maniya tyaoniterenae hatyo nalita hohisikoahitaha. <sup>2</sup> Tyaonahitaha ene hatyoako hoka semehenaha atyo, kaemaharehena enokoata, motya kinatyawiniti hoholala. Hatyako tyaonahitere tyokahitere ako tyoa ekaisitya hoka tyotyaha semahene. <sup>3</sup> Hatyaoseta waiyehenaha atyo, motya atyo irikati birobirola kaotyaka. Hatyo irikati birobirola akerehare xaorekoa, inihatyakaha xane kaoka enomanaha. <sup>4</sup> Hoka tyotyaha Isekohaliti Waiyexe kaxaihakoretyahene. Hatyaoseta iraihenaha haiyanai xako. Isekohaliti Waiyexe inihatyakaha iniyatereha isa enomanaha hoka nikare tyaonahitaha.

<sup>5</sup> Exowakiya Jerusalém nali tyaonahita judeunae Enore maniya ahekotiterenae. Koxaka tyoa kaokaha waikohe niहत्याका maniyata. <sup>6</sup> Hatyo sekotarenae semaha emahaliti hohisikoahitereha nali hoka tema xaneha waiyaha maheta, hisoaka haliti xaneha. Jesus xema maniya tyaoniterenae atyo irateta haiyaharenae xako hoka semahenaha atyo, hatyo irateterenae atyo exakoha irateta hoka waiyekehalaka semahene hoka hakaharetyoaha.

<sup>7</sup> Hatyo haliti hisoakerenae hakaharetyoahenaha mairihenaha hoka nehenaha: — Exe halitinae iraiterenae atyo Galiléia yerena. <sup>8</sup> Hoka aliyakereyala hoka wasemita iniraineha wiyako maniya? <sup>9</sup> Hiyaiya, seko akiyata atyo wisoa: Pártia nalita, Média nalita, Elão nalita, Mesopotâmia nalita, Judéia nalita, Capadócia nalita, Ponto nalita, Ásia nalita, <sup>10</sup> Frígia nalita, Panfilia nalita, Egipto nalita, Líbia koa maniyata, Cirene haliyata wisoa. Exahe haiyaharenae Romatara xoaha tyoa.

<sup>11</sup> Haiyaharenae atyo judeu, haiyanae majudeunehare xakore atyo hoka judeu akereta atyo tyaonita. Haiyanae atyo Creta nalitare, Arábia nalitare xoaha. Xonanere ala hoka nikare wasema iraiti? Aliyerenae iraihenaha hoka wiyakonae iraiyahitaha? Enore nómane kalore xoalini hare waiyexe tahi — nexaha.

<sup>12</sup> — Xonanere kala? nexaha axakakoaha. Hakaharetyoaha, maisa aliyakere tyaona xaka.

<sup>13</sup> Hoka haiyaharenae atyo koexahalisahene: — Hekahitahata exe halitinaeka — nexaha.

### Pedro Xakaihakala

<sup>14</sup> Hatyaoseta Pedro tityoa 11-harenae kakoa iraihenaha tyotyaha halitinae hiye: — Xasemehena niraini, xiso nohinaehare judeunae, exahe xiso xityotyaha Jerusalém nali tyaoniterenae. Waiye xasema niraihenere.

<sup>15</sup> Xoana motya exenae hekahitaha xaokita? Maisa

nikare xini. Xiyaiya, kalikini rota enokamaehena.

<sup>16</sup> Maisa nikarexe xini kalikini kawenatyakitere. Iraiti semasehare Joel xairatya exe kalikini kawenatyakitere tahi akiti:

<sup>17</sup> “Exakere ite notyoma miyanitiye xowakehena hoka”, nexa Enore. “Maika ite Nisekohare nexaorekoatya tyotyaha halitinae ana. Hoka ityaninae ite xakaihena niraini tahi akiti. Maika ite xoimahalitinae ite kaxawaiyanikisaka, inityohalitinae ite kaxekaijihinikisaka.

<sup>18</sup> Hatyo xowakiya ite nexaorekoatya Nisekohare nowakaniharenae, nowakanihalonae ana hoka xakaihena niraini.

<sup>19</sup> Enokoa maniya ite xoalini hare nahotikisa. Nikareta tehitiya ite ali waikoa namoka hoka hakaharetyoaha. Maika ite timalati irikati hare kaotyaka, irikati niyite kalore tyaona.

<sup>20</sup> Kamae ite makehekoa tyaona, kaimarite xotere tyaona timalati akere Xekohaseti xaimenekola ferakene kaheneharexe nahitita.

<sup>21</sup> Hoka tyotyaha haiyanae Enore hiye hakahinaetyaka aohenerenae atyo ite iniyalahare nonitata waiyexe maniya kaxomokaka”.

<sup>22</sup> — Israel hotyalinae, xasemahenaira niraini. Enore atyo Jesus Nazaré yere kaxaehakoritita hoka xityotyaha xihaoti kahare xoalini hare maomakahare tyomita, exahe hokakitinae hoka aiyaatelikijita. Hatyohare waiyekehalakita xomana. <sup>23</sup> Xakore hoka xiso atyo exaisaseharenae xisaona hoka xisene iniyalahare tyaoniterenai ana hoka berekotene atyalihose xaimaholatya hiye hoka aisene xomana. Xakore hoka koxaka Enore waiyoreta ekakoa enahetakota, exaokala ximita nikare kaxomokaka. <sup>24</sup> Hoka hatyo najikinita Enore ekasekiheta Jesus. Ekamane kaiserehareta iyehetene, maisaiya waha aliyakere ekamane tyaonita.

<sup>25</sup> — Exakere Davi Jesus tahi akiti nexa:

Nowaiyeta minita Xekohaseti, nohaliye tyaonita hoka maisa xoare harenae nomairare.

<sup>26</sup> Hatyo hiyeta nihalahareta noxahekoli kakoa, nihalahareta niraini kakoa. Exahe ite nowaini hoka nokaseheta. Nikare ite hoka nomehexaiko notyaoneheta.

<sup>27</sup> Maisa ite hahalakijita nisekohare kamati tyaonitere akitiya, Xekohaseti. Exahe ite Haohenere Waiyexe wainihena hoka maisaiya eháre tokomita.

<sup>28</sup> Koxaka hahotikisa nomani menanehaliti nahotiraho hoka menanehalitite notyaona. Hihaliyehena ite natyo hoka nihalahare kaiserehena.

<sup>29</sup> — Nohinaeharenae, awisa hoka waiyekehalaka noxakai xihiyeha wahetakomaniyere Davi tahi. Waini hoka kaxafityaka, hekotata exawatyakala tyaonita ali winekoni. <sup>30</sup> Davi atyo Enore niraine semasehare. “Nikarexe ite namoka hiso. Maika ite hatya hijikolahare hiwenekoare tyaona kalorexe”, nitere ihiye waiyekehalakita enomana.

<sup>31</sup> — Davi koxaka enahetako maniyita otita hatyohare hoka, “Ahai, nikarexite Enore tyoma. Kalorexe Aohenere kasehetehenere xaokaka: ‘Maika ite maisa kahalakisakita kamatinae tyaonitere akitiya, exahe eháre hoka maisa ite tokomita’”, nexa.

<sup>32</sup> — Enore exe Jesus ekasekiheta hoka tyotyaha hatyo harenae wiyaiya. <sup>33</sup> Hatyaoseta kakolatyaka Enore fihini maniya tyoka maheta. Enexe aokitere Isekohaliti Waiyexe isa enomana hoka hatyo kalikini xasemita, xiyaiyita. Inisekohare xaorekoita winekoni. <sup>34</sup> Hiyaiya, maisa atyo Davi ene xini enokoa xaneta. Xakore hoka nexa atyo irae:

Xekohaseti nexa Noxekohase hiye: Hisokehena nohaliye nofihini maniya,

<sup>35</sup> hahalakoaharenae hikiji katyahe namohenere kijiya (enahalakoaharenai mehotyaka xaokaka nikare irae).

<sup>36</sup> — Waiye xasemehena, xityotyaha xiso Israel hotyalinae. Exe Jesus xaisehenere atyalihose xaimaholatyaka hiye Enore ekasekiheta hoka Kalorexe Xekohaseti aokene hoka mokene Xekohaseti — nexa Pedro.

### “Xoana Ite Wisaohehena?”

(Atos 16.27-33; 22.16; 24.24-26)

<sup>37</sup> Pedro niraine semaha hoka tyotyaha kalore amaikohareha hoka axaha Pedro exahe tehitiya ihinaena hoka. — Wihinaeharenae, xoana ite wisaohehena?

<sup>38</sup> Hoka Pedro nexa ihiyeha: — Xahalakihena iniyalahare xomane hoka xikabatixatyaka Jesus Cristo nexare kakoa hoka iniyalahare xomane kaxemaisatyakeheta, kamaotyanyakeheta. Hoka Isekohaliti Waiyexe kaoka xomana Enexe nalita. <sup>39</sup> Exe iraiti atyo xomanere, xityaninae anere xoaha, exahe seko akiya tyaoniterenai anere tehitiya hoka. Exahe xala xamani Enore aohena haomana hoka hatyo iraiti enomanere tehitiya.

<sup>40</sup> Pedro aiyateretyoita hairaine kakoa, kahare irae: — Enore maniya xisaohena, awa atyo iniyalahare tyaoniterenae xema xisaona.

<sup>41</sup> Hatyohekota Pedro niraine kahare tyakekoha. Semaxematyaha iniraine hoka kabatixatyakaha. Hatyo xowakiya komita ene 3.000-hare haliti tyaona Jesus xema maniya. <sup>42</sup> Hatyota kinatere tyaonaha Jesus niraine kakoarenai xaotyakira xema, exahe awaiyetyakakoahita. Kanakairehenaha hoka haxawalita tyaonahitaha, exahe iraexahenaha hoka haxawalita tyaonahitaha.

### Hetatiye Tyakekohatiyena Nawenane

<sup>43</sup> Jesus niraine kakoarenai tyomita kahare xoalini hare maomakahare waiyexe, hokakitinae aiyatelikihenahititaha harenai. Hiyeta hoka tyotyaha halitinae hakaharetyoahitaha, waiye aiminisahitaha xoaha.

<sup>44</sup> Tyotyaha tyakekoterena haxawalita tyaonahitaha, exahe haxiyeharenae hoka isakakoahita, <sup>45</sup> betityaha hawaikoheranaeha haxiyeharenae harenae xoalini harenae haomanereha hoka irakahita exaimane maimahiroterena nakiterena ana. <sup>46</sup> Ferakiti nihatyaka haxawalita hohisakoahita Iraexatyakalati Hanako, hamaniyita haxahakola mokahitaha. Hahanahanae ako haxawalita kanakairahitaha, ihalahare tyaonahitaha, maisa xalijiniharexeha. <sup>47</sup> Aexakeretyahitaha Enore, exahe tyotyaha halitinai ana hoka waiyahitaha makere. Ferakiti nihatyaka Enore aihisoakatyahitene ferakiti ni-

hatyaka, hoka kahare haliti waiyexe maniya tyaonahitaha.

### Maetonanehare Xaiyatelikisakeheta

<sup>3</sup> Haxowaka makakoahena iraexatyati kamae aosehena hoka Pedro, João xoaha xane Iraexatyakalati Hana xeta. <sup>2</sup> Ferakiti nihatyaka hatya haliti Iraexatyakalati Hana kanase nali tyaonita. Maetonanehare terota tyaona. Xisoakalati waiyeharexe nexahitere nali mokahitene axa maheta olo Iraexatyakalati Hanako ijoiterena nonitata maheta. <sup>3</sup> Hatyaoseta Pedro, João xoaha isoahena hoka waiyahene hoka axahene olo.

<sup>4</sup> Hatyaoseta Pedro waiye wahakotyaha enomana hoka nexa: — Hawahakohena womana.

<sup>5</sup> Hatyo haliti wahakotyaha enomanaha, atyahaharetyoa xoalini hare exekaneha enomana xahita.

<sup>6</sup> Hatyaoseta Pedro nexa ihiyeha: — Maisa nokaoloxiye hekoti xakore atyo ite hoka nisa homana, maisaiya nomaxekanita homana. Jesus Nazaré yere nexare hiyeta hainakoa hatohetehena.

<sup>7</sup> Hatyaoseta Pedro otoka ifihini maniya kahe, kahi-naetene hoka ainakihetene. Exowakita kinatere tyaoheheta ikinoli ikijinae. <sup>8</sup> Hatyaoseta halaisoa tityoaheta hoka toheta. Hatyo hekota isoa Iraexatyakalati Hanako exemaha. Tonita, halaijoita, ihalahareta Enore kakoa. <sup>9</sup> Tyotyaha hatyoako tyaoniterena waiyaha ehala-soakola inihalaharene Enore kakoa.

<sup>10</sup> Hatyaoseta waiyekehalaka enomanaha: — Ahai, etake olo axitere xisoakalati waiyeharexe aokahitere nali tyokitere kore — nexaha. Hakaharetyoaha mairaha, nikare tyaoheheta hoka.

### Pedro Xakaihakala Iraexatyakalati Hanako

<sup>11</sup> Hatyo haliti kaxaiyatelikisakehetehene Pedro, João xoaha haliya tyaona hoka tyotyaha hohisakoaha ehaliyaha Iraexatyakalati Hana tyaisera kilihi Salomão nómene aokahitere nali hoka hakaharetyoaha.

<sup>12</sup> Hatyohekota waiyahene Pedro hoka nehena ihiyeha: — Israel hotyalinae, xoana hoka nikare xahakaharetyoita? Xoana hoka xawahakotita womana? Xoana exe haliti tohetehene motya wiyaokala wiyatere hiyeta toheta xaokita, exahe hoka motya waiye maniya wawenane hiyeta xaokita? <sup>13</sup> Xasemehena, wahetako-maniyeharenae Abraão, Isaque, Jacó xoaha nEnorexa kalorexe moka hawakanehare Jesus. Xiso atyo xisene xekohaseti Pilatos ana aisene maheta. Pilatos xakore ehalakisakeheta aoka hoka xiso atyo maisa xaoka. <sup>14</sup> Hatyo xakore atyo waiyexe kaiserehare hoka xiso atyo maisa xaokitene. Exahe ehalakisakeheta xakore aoka hoka haliti fahare halakisaka xetatere xaoka Pilatos hiye. <sup>15</sup> Nikare xiso xaisa wenati waikatehare. Xakore atyo hoka Enore atyo ekasekihete. Wisonae atyo ewaiyasehare wisaona. <sup>16</sup> Jesus nexare, niyatere atyo exe haliti aiyatelikiheta, exe xiyaiyitere. Enexare tyakekotyaka, Jesus tyakekotyaka atyo aiyatelikihetene xityotyaha xihaoti.



<sup>17</sup> — Maisa Jesus waiyekehalakere xomana hoka nikare xamokene, nohinaeharenae, xiso xinityohalitarianae xoaha. Hatyohare waiyekehalakita nomani.

<sup>18</sup> Kalorexe Aohenere makawatini tahi Enore xakai. Koxakereharenae iraiti xakaisaseharenae kanasakota aehikoaxatene. Hoka xakaihenahere akereta kalini kaxomokaka.

<sup>19</sup> — Hoka xahalakihena nikare xawenane hoka Enore maniya xisaohetehena hoka iniyalahare xománe kamaotyanyakeheta. <sup>20</sup> Hoka ekakoita exahe waitare iyateliti kaoka xomana Enore nalitare. Exahe axikatya Kalorexe Aohenere xomana. Hiyaiya, Jesus atyo Enore Kalorexe Aohenere. <sup>21</sup> Enokoa tyaonita kalikini. Heko atyo ite kotare enokoa tyaonisa. Tyotyta xalini hare hotohare tyomihitiya hoka hatyo xowaka rota atyoite Jesus axikaheta. Hatyo akiti koxakereharenae iraiti xakaisaseharenae kanasakota Enore aehikoaxatya. <sup>22</sup> Hiyaiya, exakere Moisés nexa:

Enore ite maika hatya xinekonita kaoyakatya iraiti xakaisasehare xomana hatyo akere. Hoka maika xasemaxematya iniraine, xoare nehena xamani xihye hoka.

<sup>23</sup> Hoka xala xamaniya atyo maisa semaxemaita iniraine hoka Enore kaxaikone hotyali konita kakikisakeheta hoka kamawenekoaretyaka.

<sup>24</sup> — Tyotyaha iraiti xakaisaseharenae hatyo xaka xakaihahitaha. Samuel hotohare iraine, hatyo hekota enajikini maniyatarenai tyotyaha xakaihaha kalikini wisaonitere akiti. <sup>25</sup> Xiso atyo iraiti xakaisaseharenae jikolaharenae. Xahetakomaniyerenae anere aokitere Enore tehitiya xomanere. Hiyaiya, nexa atyo Abraão hiye:

Hijikolaharenae hiyetaite tyotyta waikoa tyaonitere-nae waiye maniya kaxomokaka.

<sup>26</sup> — Nikare Enore hawakanehare axikatya xomana hotohare, waiye maniya moka xiso maheta, xahalakisa iniyalahare xománe maheta — nexa Pedro ihiyeha.

#### Pedro, João Kalorexeharenae Haotita Tyaonita

**4** Pedro, João xoaha iratata ekakoaha hoka tyoa kaoka sacerdotenae, Iraexatyakalati Hana kaxaikotyasenaekohase, saduceunae hare kaokaha. <sup>2</sup> Ehareha hatyo hinama Jesus niraene kakoarenae hiye exaotyakiraha hiyeta. Saduceunae atyo kamati makasenehare aokiterenaekohase. Hoka, “Koxaka Jesus kaseheta. Nikare ite kamatinaekaseheta”, nexahitere hiyeta ehareha Jesus niraene kakoarenaekohase.

<sup>3</sup> Hatyaoseta otokahene hoka berexotyahene, mokahene berexo ako kamaetali nyahare. Hatyo xowaka koxaka makehena.

<sup>4</sup> Xakore hoka koxaka atyo kahare haliti semehenere-nae iraiti tyakeko, kala 5.000 hare.

<sup>5</sup> Kamaetali hoka ahohisakoatyakakoaha Jerusalém nali judeunae nityohalitarianaekohase, judeu xaotyakiraho koxaka waiyoreterenaekohase, exahe wenakalati waikateharenaekohase hare. <sup>6</sup> Hatyo hohisakoahenahere koni tehitiya sacerdotenae xekohasehare Anás, Caifás, João, Alexan-

dre harenaekohase. Haiyanaekohase tehitiya hatyo sacerdotenae xekohase hotyali harenaekohase hohisakoaha.

<sup>7</sup> Hatyaoseta xane nolohenahitene berexo akota hoka mokahene enahalakoaha hoka axalihenahene: — Xoana hoka nikare xisaonita? Xala nyatere koxaka, xala xaokala xema nikare xamokita?

#### Waiyexe Maniya Nawenatyakeheta

(Atos 13.38-39; 16.27-33; Romanos 4.6-8; 6.23)

<sup>8</sup> Hatyaoseta Pedro, Isekohaliti Waiyexe kaxaihakoretene hoka nehena ekoaxahena enomanaha: — Xasemehena, xekohasetinaekohase, judeunai nityohalitarianaekohase. <sup>9</sup> Kalikini xaxita wiso exe haliti ana waiyexe koxakehenere tahi, exaiyatelikisakeheta tahi. <sup>10</sup> Xasemehena xityotyta, exahe tyotyta Israel hotyalinaekohase: Exe haliti kaxajiyakisaka Jesus Nazaré yere nyatere xema, etake xaisehenere atyalihose xaimaholatyaka hiye hoka Enore ekasekihetehenere nyatere xema. <sup>11</sup> Xiso hati nomaseharenai maisa hatya sehali xaokare hati nomaeka nyahare hoka hatyo najikinita kaxomokaka hati hiye hoka kinatere tyaona. Jesus Nazaré yere xaokaka nikareta. <sup>12</sup> Ekoamaniyata takita Enore maniya wikaxomokakita. Hatyo taita iniyalahare wenati nonitata iye-hitita haliti. Maisa hatya aka hoka nikare iniyalahare emaisatyare. Enore atyo exe exaliti moka hoka hatyo hiyeta tyotyta waiyexe maniya tyaohenahitaha maheta — nexa.

<sup>13</sup> Hoka kalorexenaekohase waiya Pedro, João xoaha mairaneharene hoka hakaharetyoaha, maisa Pedro, João xoaha masakare waiyorexeha hoka. Hatyo hiyeta tehitiya otehenahitaha Jesus xema tyaonahitere.

<sup>14</sup> Waiyaha exaiyatelikirahareha tityoita ehaliyaha hoka maisa aliyakere iniyalahare iratata ekakoaha.

<sup>15</sup> Hatyaoseta hatyo hinamahare Jesus niraene kakoarenaekohase aihikoahetaha tyaonahitereha akota, hoka kalorexenaekohase makere hatyokakoaha irakohahenaha.

<sup>16</sup> — Xoana ite wamohenahene? Koxaka tyotyaha Jerusalém tyaoniterenaekohase semaha exaiyatelikirehenahitaha haliti. Maisaiya aliyakere emaoseralaha waokita — nexaha. <sup>17</sup> — Xakore hoka kala waiyateretyoa ite exahitaha hoka maisa hatyo tahi halitinaekohase koni xaoreta hoka maisa xala harenaekohase hiye Jesus tahi irahititaha.

<sup>18</sup> Hatyaoseta kawihenahitene, iraha ekakoaha maisa xakaihenahititaha, maisa aotyakihenahititaha hekoti maheta.

<sup>19</sup> Hoka nihitiya Pedro, João xoaha, — Enore nahalakoita nikareta wiso wityotyta. Xoana xiyema kore wisaona, Enore xema kore? nexaha. <sup>20</sup> — Maisaiya atyo aliyakere wahalakijita wiraine koxaka wasemehenere, wiyaiyehenere tahi.

<sup>21</sup> Hatyaoseta judeunae nityohalitarianaekohase kinatyaxa iraha ekakoaha amairakisahene maheta. Hatyaoseta axikahenahitahene hoka xanehenahitaha. Maisaiya aliyakere xekohasetinai iniyalahare mokahitahene, tyotyta halitinai Enore koxaka ihalaharahitere hiyeta, waiyexe kaotyakitere hiyeta. <sup>22</sup> Hatyo kaxaiyatelikisakehetehenere 40-terehokoane jiyarehena tyaonita.

### Jesus Xema Maniya Tyaoniterenae Niraexala Tahī

<sup>23</sup> Halakisaha Pedro, João xoaha hoka xanehenahitaha. Kaokehenahitaha hahinaeharenae ana hoka xakaihakatyaha ihiyeha sacerdotenae xekohasenae, judeunae nityohalitiranae xoaha iraihenahere ekakoaha tahi.

<sup>24</sup> Semaha exakaihakalaha nikarexe hoka tyotyaha haxawalita iraexahenaha Enore hiye, nehenaha: — Xekohaseti, Hiso atyo tyotyaha hisoma enokoa, waikoa, one kaloxere. Exahe tyotyaha xalini harenae tyaonitere harenae enokoa hoka. <sup>25</sup> Hiso atyo Isekohaliti Waiyexe koamanyata hirae hiwakanehare Davi wahetako-maniyere hiye hoka exakere irae:

Xoana hoka majudeuneharenae judeu hare hotyalināe eharahitaha? Xoana hoka nikare hatyaharahitaha?

<sup>26</sup> Xekohasetinae tyotyaha xalijinihare, kahi-naetyakakoaha hoka kahalakoahareha Enore, Kalorexeha Aohenere xoaha kakoa.

<sup>27</sup> — Aliterexe ahohisakoatyakakoaha Herodes, Pôn-cio Pilatos harenae, exahe majudeuneharenae, Israel hotyalinae xoahanae ahohisakoatyakakoaha hoka kahalakoahareha Kalorexeha Aohenere Jesus kakoa maheta. <sup>28</sup> Ahohisakoatyakakoaha tyomaha maheta toahiya haokitere akereta kawenatyaka maheta.

<sup>29</sup> — Xekohaseti, xalijiniharehenahere wihiye hiyaiya kalikini. Wimamairanehare hamohena hoka wiyakai hiraine halitinae hiye. <sup>30</sup> Hokakitinae hare haiyateleki-hetehena, exahe xalini harenae maomakahare hoka hisomehena Hiwakanehare waiyexe Jesus nexare hiyeta hoka wiyaha maheta.

<sup>31</sup> Halakisaha taita hairaexalaha hoka hohisakoahitereha akiti tatakoka ekakoareha hoka tyotyaha Isekohaliti Waiyexe kaxaihakoretyahene. Hatyohokota iraiti xakaihenahitayahā hamamairaneneha kakoa.

### Tyotyaha Irakakakoahitaha Haxiyeharenaeha Tahī

<sup>32</sup> Hatyo xowaka tyotyaha tyakekohenerenae hakakoa exahekolanaeha tyaona enomanaha hoka nikare makere ahokotyahitaha. Haxiyeharenaeha maisa aokareha haomana hoka hahinaeharenaiha ana irakahitene maxiyehareharenāe ana. <sup>33</sup> Kalore iyateliti kakoa Jesus niraine kakoarenāe xakaihaha Xekohaseti Jesus kasehetehenere tahi akiti. Enore kalore waiyemokahene. <sup>34</sup> Maisa atyo xala harenāe enekoniha nakere, maimahiro tyaonare. Kawaikohererenāe hawaikoheraha betetita, kahanerenāe hoka betetyahitaha hahanaha hoka exaimane olo <sup>35</sup> isahita Jesus niraine kakoarenāe ana. Exowakerota xala xamani nakita maimahirota hare hoka hatyo olo ijita enomanaha aokahitere akereta. <sup>36</sup> Nikare tehitiya José nexarexe betetya hakoa hawaikohera hoka xane exaimane isa Jesus niraine kakoarenāe ana. José atyo Levi hotyali, Chipre nalitare. <sup>37</sup> Hoka Jesus niraine kakoarenāe “Barnabé”, nita exaokaka. Nere atyo: “Wiyaxaihahalahalinikisase”.

### Ananias Safira Xoaha Tahī

<sup>5</sup> Hatya haliti Ananias nexarexe Safira nexalolo kakoa tyaonita. Kawaikoherere hoka hawaikohera betetya. <sup>2</sup> Xakore hoka holini taita isa Jesus nirāene kakoarenāe ana, holini exaimane kakoa tyaona. Koxaka Safira ana hatyo tahi waiyekehalaka.

<sup>3</sup> Hatyaoseta Pedro nexa Ananias hiye: — Xoana hoka Tihanare koamaniya hisaona? Xoana hoka Isekohaliti Waiyexe hamaoseratya? Xoana hoka holini kakoa hisaona, waikohe habetehenere xaimane kakoa?

<sup>4</sup> Himabeteraharetatere waikohe xowaka hiwakohera terota, exahe habetehene hoka exaimane holoxa terota. Xoana hoka nikare hisaona? Maisa haliti xini hamaoseratya, Enore atyo hamaoseratya.

<sup>5</sup> Ananias nikare iraiti sema taita hoka exoa, waini. Tyotyaha semehenerenāe hatyo akiti mairaha.

<sup>6</sup> Hatyaoseta tyoa haiyanae xoimahalitinae hoka olahisetyahene, kolatyahene hoka xane fityahene.

<sup>7</sup> Ekamane najikinita wahasehena hoka exanityo tyoa hikoa, maisa haiyanene kamane semare hekoti.

<sup>8</sup> Exowakerota Pedro axene: — Hiyakaihena nohiye xiwakohera hexanene betehenere xaimane: Xoana nikarexe xaresebetya exaimane?

— Há, nikarexe — nexa.

<sup>9</sup> Pedro nihitiya ihiyeha: — Xoana hoka hexanene kakoa nikare xahasakaharetya Enore Nisekohare? Hiyaiya, owehetehena xoimahalitinae hexanene haxaferaha hekota hoka kolahenaha tehitiyaite hiso.

<sup>10</sup> Nexa takita hoka exoa waikoa waini Pedro kinoli haliya. Hatyaoseta xoimahalitinae hikoahenahitenahā xakore, waiyehenaha atyo, owene ekamane tyaonita hoka kolahenahitayahene exanene xawatyakala nahalakoita fehenahitayahene. <sup>11</sup> Tyotyaha iraiti tyakekoterenāe, exahe haiyanae hoka semaha etahi akiti hoka kalore mairaha.

### Maomakahare Waiyexe Tyomahitaha Kaihalaharetyakere

<sup>12</sup> Hatyo najikinita Jesus niraine kakoarenāi kahare xalini hare maomakahare tyomaha halitinae koni, hokakitinae hare aiyatelekihenahitaha. Tyotyaha hohisakoahitaha Iraexatyakalati Hana tyaisera kilihi Salomão nómane aokahitere nali. <sup>13</sup> Haiyanae atyo maisa enekoniha tyaonaha aokowiyeha, mairahitaha hoka. Xakore atyo hoka waiye atyo irāetaha etahiha akiti.

<sup>14</sup> Ekakoita hisoakaha tyakekoahitaha iraiti, enanae ohironae harenāe hoka kahareha tyaonaha.

<sup>15</sup> Hatyo hokakitinae aiyatelekihenahititere hiyeta nali tyaoniterenāe hahokakitiranaeha kolatyaha ahoti-aho kilihi mokahitaha exetolisoakalaha kakoita Pedro naheta, jiyehena hoka iniyakotini hekoti kaokaha ihiyeha hoka waiyehenahitaha aokahitaha hoka. <sup>16</sup> Hisoaka haliti tyoita Jerusalém haliyatarenāe, hahokakitiranaeha kolatyahitaha xoaha enomanaha. Exahe isekohaliti iniyalahare kamilakorerenāe hare nolokahitaha enomanaha hoka tyotyaha aiyatelekihenahititene.

### Iraiti Xakaisaseharenae Kairawaiyakita

<sup>17</sup> Hatyaoseta sacerdotenae xekohase, tyoty ihinaeharenae xoaha haokoawahareneha, ehareha saduceunae kakoita Jesus niraine kakoarenai hiye. <sup>18</sup> Ehareha Jesus niraine kakoarenai hiye hoka otokahene hoka mokahene berexoako.

<sup>19</sup> Berexoako xakore mokahene hoka hatyo xatinita anjo enokoatare exoa hoka majiholaheta berexo hana ekakoareha, aehikoahenahitene menane aka hoka nexa ihiyeha: <sup>20</sup> — Xiyane Iraexatyakalati Hana nali hoka halitinae hiye xiraihitiya Jesus maniya nawenatyaka akiti — nexa. <sup>21</sup> Tyakekoha hoka kamaetali weta xane isoaha Iraexatyakalati Hanako hoka aotyakihihitiya.

Hatyaoseta sacerdotenae xekohase hahinaeharenae kakoa hohisakoaha, kalorexena makere. Israel hotyalinae nityohalitiranae tehitiya kaexakatyaha hoka tyoa kaokaha enomanaha. Ahohisakoatyakakoaha hoka axikatyaha sorarenae Pedro, João xoaha nolokaha maheta berexoakota.

<sup>22</sup> Xane kaokaha berexo hana nali hoka xane xakore waiyaha enako, maisa waiyehenahitita Jesus niraine kakoarenai. Hatyaoseta maisa nali aka hoka haikoa-henahitaha hoka nexaha kalorexena hiye: <sup>23</sup> — Wiyane wahikoa berexotyakalati nitini ana. Waiye jihatyakere, owene ekaxaikotyasenae tyaonita, kaxaikota hati. Wamajiholatene hoka wisoa xakore enako hoka maisa xala hare enako wiyaiyita.

<sup>24</sup> Semahene sacerdotenae xekohasena, Iraexatyakalati Hana kaxaikotyaseharenae xekohase harenae hoka maisa xoare nexa kakanasahitaha. Ahekotyahitaha, Jesus niraine kakoarenai nikare tyaonaha hoka.

<sup>25</sup> Hatyaoseta hatya tyoa kaoka enomanaha hoka nehena ihiyeha: — Xasemehena, etake hinamahare haliti xaberexohenere Iraexatyakalati Hana nali tyaonita, aotyakijita halitinae.

<sup>26</sup> Hatyaoseta Iraexatyakalati Hana kaxaikotyaseharenae xekohase xane sorarenae kakoa Iraexatyakalati Hana xeta hoka noloka Jesus niraine kakoarenai. Maisa atyo iniyalahare mokahitene, waiya aliya hoka halitinae sehali kakoa mokotyahene aokaha hoka.

<sup>27</sup> Nolohehahitene, xane kaokehenahitaha ekakoaha kalorexena nali. Hatyaoseta sacerdotenae xekohase nexa: <sup>28</sup> — Maisa xiyaotyakira waxakoanehetita etake haliti nexare kakoa. Hiyaoreka xiyaotyakira xaore tyoty Jerusalém koa. Exahe hoka wiso waisene xaokita.

<sup>29</sup> Hatyaoseta Pedro, haiyanae Jesus niraine kakoarenai hare nehenaha: — Enore niraine xema atyoite wisaona, maisaiya atyo halitinae niraine xema wisaonita. <sup>30</sup> Wahetakomaniyerena nEnorexa ekasekiheta Jesus, etake xaisehenerene najikinita. <sup>31</sup> Ekasekihetene hoka hafihini maniya mokene Kalorexena maheta. Israel hotyalinae iniyalahare háomaneha halakisaha hoka kaxemaisatyakeheta iniyalahare enómaneha maheta. <sup>32</sup> Wiso atyo ewaiyasehare terotere, Isekohaliti Waiyexe tehitiya ewaiyasehare. Xala xamani atyo

tyaonita Enore xema maniya hoka ijita atyo Haisekohare enomanaha.

<sup>33</sup> Hatyaoseta inityohalitiranai semaha iniraineha hoka masakare ehareha ihiyeha, kasani aisahene aokowihaha. <sup>34</sup> Xakore hoka hatya enekonitareha tityoa, Gamaliel nexarexe. Fariseu, waiyore Moisés xaotyakira kakoa. Tyotyaha tyakekoahitere hoka nehena ihiyeha: — Xaehikoatyahene ininae menane aka.

<sup>35</sup> Aehikoatyahene hoka hatyaoseta nehena: — Xasemehena, Israel hotyalinae. Xiyaira, waiya aliya hoka exe hinamanae xoanani xamoka.

<sup>36</sup> — Toahiyaseta hatya haliti kaotyaka Teudas nexarexe, kalorexena aokowita. Waiyore iraeta hoka 400-hare haliti tyaona exema maniya. Hatyohekota kaxaisaka hoka exema tyaoniterena xaorehenahitaha tyotyaha hoka kamiyane. <sup>37</sup> Hatyo najikinita nikare hatya kaotyakihihitiya Judas nexarexe, Galiléia yere, halitinae kaxihatyakitere xowakiya. Nikare kahare haliti tehitiya tyaona exema. Waini ononyahitaha hoka xaore exema tyaoniterena.

<sup>38</sup> — Hiyeta hoka awa atyo xalini hare xisoma exe halitinae kakoa. Xahalaisahene hoka xanehenahitaha. Xiyaiya, exe hateniti atyo ite haliti xahekolita, haliti hateneta hoka maiyareheta. <sup>39</sup> Hoka Enore xaokalaiya atyo hoka maisa aliyakere xemaisahitene, waiya aliya hoka Enore kakoa xikalalakoahare — nexa.

### Mokonasetyaha Jesus Niraene Kakoarenae

(João 15.18-21; Atos 14.21-22; 1 Coríntios 4.9-13; Filipenses 1.28-30)

<sup>40</sup> Nexa ihiyeha hoka tyakekoha iniraene. Xakore hoka kawihenahitaha Jesus niraine kakoarenai hoka isoahenahitaha. Hatyaoseta mokonasetyahene hoka nehenaha: — Waiyehenaira xiyakai Jesus tahi akiti — nexaha ihiyeha hoka hatyo najikinita halakihenahitene.

<sup>41</sup> Halakisahene hoka Jesus niraine kakoarenai hikoahenahita ononyahita, xanehenahitaha. Mokohekoatyahene xakore hoka ihalahare hikoahenahitaha. — Waiye kaisere. Hiyaiya, Jesus hinaenai terota wiso hoka nikare mokahitaha wiso — nexaha.

<sup>42</sup> Hatyohekota ferakiti nihatyaka Iraexatyakalati Hanako heko aotyakisahitaha halitinae, exahe ehananaihako nihatyaka aotyakisahene minita Jesus Enore Kalorexena Aohenere tahi akiti.

### Sete Harenae Tyaona Iraiti Xakaisaseharenae Xema

**6** Hatyohekota wahehena hoka ekakoita haliti kaharehena tyaonita Jesus xema maniya. Hatyohekota nehenaha hebreuna xako iraiterena hiye Grego xako iraiterena: — Maisa waiyeta womana winekonitalonae maiyanenehalonae nakairati maxekakene.

<sup>2</sup> Hatyohekota 12-hare Jesus niraine kakoarenai ahohisakoatyaha iraiti tyakekoterena hoka nehenaha: — Maisaiya ehokoreta xini wahalakisa Enore niraine xakaisaka hoka nakairati hiye wisaona hoka. <sup>3</sup> Kala xinekonitare 7-hare xamoka waiyexeharexe, waiyorexe, Isekohaliti Waiyexe kaxaikonehare hoka exe hateniti wahalakisa enomanaha, wihinaeharenae.

<sup>4</sup> Hoka wiso atyoite wiraexatita, Enore niraine kakoa waotyakijita takita — nexaha.

<sup>5</sup> Tyotyaha Jesus niraine kakoarenai niraene tyakekoha. Hatyaoseta mokaha Estêvão, Filipe, Prócoro, Nicanor, Timon, Pármenas, Nicolau harenae. Nicolau atyo Antioquia tare. Majudeunehare xakore hoka koxaka judeunae xaotyakira xema tyaonita. Estêvão atyo iraiti tyakekota kaiserehare, Isekohaliti Waiyexe kaxaihakoretitene.

<sup>6</sup> Hatyaoseta xane hotikisahene Jesus niraine kakoarenai ana hoka hakaheha mokaha eseriha heno hoka iraexatyaha etahi akiti waiye hakaha maheta.

<sup>7</sup> Hekota Enore niraine xaoreta, hakakoare semaha. Ekakoita Jesus maniya tyaoniterenae Jerusalém nali hisoaka kaisereharehena tyaonahitaha. Kahare sacerdotenai tehitiya tyakekoahitaha hoka tyaonahitaha Jesus xema maniya.

### Estêvão Berexotyaha Aokowitaha

<sup>8</sup> Enore kahinaetita Estêvão, hoka waiyore iraeta. Kahare xoalini hare maomakahare tyomita halitinae koni, hokakitinae hare aiyatelikihitita enomanaha.

<sup>9</sup> Xakore hoka haiyanae ana maisa waiyeta hoka ehareha Estêvão hiye. Xahohisakoatyakalati “Mawakahareharenae xahohisakoatyakala hana” aokahitere nalitarenai. Hatyo judeunae Cirene, Alexandria nalita tyohenerenae. Hatyonai, exahe haiyanae judeunai Cilícia koatarenai, Ásia nali koatarenae xoaha kahalakohare Estêvão kakoa hoka kinatyaxa iraeaha ekakoa.

<sup>10</sup> Xakore hoka maisa jiyahaotyahita Estêvão. Isekohaliti Waiyexe kaxaehakoretitene hoka jiyahaotyahene tyoty.

<sup>11</sup> Hatyaoseta haiyaharenae bakatyaha hoka nexaha maheta: — Wasema exe haliti niraene iniyalahare Enore, Moisés xoaha xaokaka.

<sup>12</sup> Hatyaoseta xane iraeaharetyahene hoka halitinae, judeu xaotyakiraho kakoa waiyoreterenae, inityohalitarianae harenae ehareha makere Estêvão hiye hoka otokahene, kalorexena nahalakoa kolatyahene.

<sup>13</sup> Haiyanae iniraeharetyase maheta mokaha hoka exakere maoserahenaha: — Exe haliti maisa iniyalahare hairaine halakisare wiraexatyakala hana tahi akiti, exahe Moisés xaotyakiraho akiti hoka. <sup>14</sup> Exakere niraine wasemita: “Jesus Nazaré yere ite mawenkoaretya hati wiraexatyakala hana, exahe Moisés iraitiya halakihenere womana hoka hahekore moka” — nexaha.

<sup>15</sup> Hatyaoseta tyoty hatyoako kalorexere tyokiterenae wahakotyaha waiye Estêvão ana, waiyehenaha atyo itihana. Motya atyo anjo tiho.

### Estêvão Irae Iniraenaha Nahalakoa

**7** Hatyaoseta sacerdotenae xekohasehare axehena Estêvão: — Xoana aliterexe irataha hitahi?

<sup>2</sup> Hoka nehena Estêvão: — Xasemehena, abá xoimanae, nohinaeharenae. Enore werokakoa tyaonitere tyoa kaotyaka wahetakomaniyere Abraão

ana tyaonitaterere Mesopotâmia nali xowakiya, Harã nali mawenaneharetatere xowaka. <sup>3</sup> Enore nexa ihiye: “Hakikisoahena ali hiwaikoherata hihinaeharenae nonitata. Hiyanehena waikohe nahotikihenere koa homana xeta”.

<sup>4</sup> — Hoka Caldeunae waikohera nalita xane, xane tyaona wenakalati Harã nali. Hatyaoseta enexe kamane najikini maniya Enore noloka Abraão kalikini ali xisaonitere nali. <sup>5</sup> Xakore hoka maisa Abraão ana ini hekoti waikohe ijita. Hoka nexa atyo Enore ihiye: “Ekakoita ite exe waikohe homanere tyaona, exahe hijikolaharenae anere hoka waikohe tyaona”, nexa ihiye. Enore iraitere Abraão kakoa xowaka maisa kaisaniye.

<sup>6</sup> — Exakere Abraão hiye irai: “Hijikolaharenae ite xane tyaonaha hakitiya. Mawaiyahare hotyali, wakahare akere ite tyaonaha. Iniyalahare ite kaxomokaha waha aka 400-terehokoane”. <sup>7</sup> Enore nehitiya: “Hatyo najikinita iniyalahare ite namoka hijikolaharenae iniyalahare mohenerere, wakahare mohenerere. Hatyaoseta ite haikoahenahitaha hoka ali tyaochenaha noko maniyere”.

<sup>8</sup> — Hatyaoseta nehena Abraão hiye: “Maika no-maniye hisaona hoka homanere milihe haikotya hihanako tyaoniterenae kakoa”, nexa ihiye. Hatyaoseta Isaque kaisani hoka 8-ferakenehena hoka enomanere milihe aikotya. Nikare Isaque Jacó kaisani hoka enomanere milihe aikotya. Nikare tehitiya Jacó 12-hare kaisani hoka enomanere milihe aikotya.

<sup>9</sup> Estêvão heko iraeta: — José hiye okoawahare enaxenanenae wahetakomaniyereharenai hoka betetyahene Egito nali wakahare tyaona maheta. Xakore hoka Enore atyo kaxaikotene <sup>10</sup> hoka emaisatya enonita examaikoharene, exahe enawenane howitharexe. Faraó, kalorexere Egito naliyere, José waiyehenere xowaka Enore waiyexe waiyoliniti isa enomana hoka Faraó awaiyetene hoka kalorexere mokene hahanako.

<sup>11</sup> — Hatyaoseta Egito nali Canaã nali nakiti tyaona hoka maisa xoare kanakairihenahitere wahetakomaniyerenae. <sup>12</sup> Nakahitaha hoka ekakoita semehena atyo Jacó, Egito nali nakairati hoka hetatiye axikahena haisaninae wahetakomaniyerenae Egito nali xeta nakairati iyaha maheta. <sup>13</sup> Hatyota xanehenahitiyaha hoka José awaiyekehalakaharetyoa haxenanenae ana. Hatyaoseta xekohaseti Faraó ana waiyekehalaka ihinaeharenae tahi. <sup>14</sup> Hatyaoseta José kawisa hanexe Jacó, tyotyaha ihinaeharenae Egito nali xeta. Hatyo xowakiya Jacó hotyali 75-hare ehohisakoanaha. <sup>15</sup> Jacó xane tyaona Egito nali hoka hatyo nali waini, wahetakomaniyereharenae harenai. <sup>16</sup> Wainiha najikini kolahenahitene Siquém nali xawatyakalati nitinako mohenahtitaha, enatyokoeha Abraão niyane Emor jikolaharenae nonitata ako.

<sup>17</sup> — Hatyo hekota Abraão ana Enore afetalatitere terehokoane okoi hikoahena: “Egito nalite nanoloheta xiso”, nitere aose xane hikoahena hoka hisoakehena Jacó hotyali tyaonita Egito nali. <sup>18</sup> Hatyaoseta hatya tyaohtiyi xekohaseti Egito nali, maisa José waiyasehare xini. <sup>19</sup> Hatyo xekohaseti waiyore wahetakomaniy-

erenae kakoa hoka xalijiniharehena exahitaha, exahe ityani mokosenaiha xawatyaka aokita ihiyeha wainiha maheta. <sup>20</sup> Hatyo xowakiya Moisés tyaona, waiye mokose. Hanamali kaimare inityo, enexe hatyako taita kaxaikotahene. <sup>21</sup> Hatyaoseta halakisahene kanowalise akota, maisa aliyakere xoana mokahene xaka hoka. Hoka Faraó ityani waiyene hoka anaetene haisani kaiserehare akere. <sup>22</sup> Hiyeta hoka Moisés waiyore xoalini hare kakoa Egito yerena xaotyakira akiti kakoa. Exahe xoalini hare tyoma aokowihena hoka waiyore tyomita, iraeta xoaha.

<sup>23</sup> — Kala Moisés ekakoita 40-wanonehena hoka xane hahinaeharenae Israel hotyalinae waiya aokowita. <sup>24</sup> Xane hoka waiyehena, owene atyo ihinaehare Egito yere maisa waiye xini mokita. Hatyaoseta kaxemeretya hahinaehare hoka aisa Egito yere. <sup>25</sup> Motya atyoala Moisés xahekola hiye semahitaha exaihako maniyata Enore niyaneheta Israel yerena aokita Egito nalita. Xakore hoka maisa atyo waiyekehalakere enomanaha.

<sup>26</sup> — Hatyota kamaetali hoka Moisés waiyehena atyo, hinamahare ihinaehare Israel yerena makere atyo owene mokotyakakoita. Hatyaoseta xane kaoka enomanaha hoka watyalihenahene. “Xoana hoka nikareta xiso, Israel yerena makere xiso hoka?” nexa. <sup>27</sup> Hoka masakare xalijiniharetere hahinaehare xahita herawaseharetene hoka ekoaxatya enomana: “Xoana hoka hiwatyali wiso? wiyekohase kore hiso?” <sup>28</sup> Xoana haisakore natyo haokowita kafaka haijitere Egito yere akere?” nexa. <sup>29</sup> Sema Moisés hatyo haxaisane tahi hoka tekoaheta, xane tyaona Midiã koa nali. Nali hinama mokose ityani tyaona.

<sup>30</sup> — Hatyo nali 40-terehokoanehena Moisés tyaonita hoka anjo kaotyaka enomana atya mokose kiritere koni maharexakiti Sinai tyairiya nali. <sup>31</sup> Moisés wahakotya enomana xakore, maisa kera tyotere hoka: “Xoanere kaisere?” nexa, xane ehaliya kaoka enomana waiye waiya maheta.

— Hatyaoseta Enore niraine semehena: <sup>32</sup> “Natyo atyo hahetakomaniyerena Abraão, Isaque, Jacó xoaha nEnorexa”. Nexa hoka Moisés tatakoa maira, maisa aliyakere wahakotya xaka enomana.

<sup>33</sup> — Hatyaoseta Enore nexa ihiye: “Haitoakihena hiki-jitini. Ali hatyahakitere koa atyo notyaonita hoka nikareta natyo. <sup>34</sup> Nowaiyita nokaxaikoni hotyalinae makawatini Egito nali, ewaolitiniha. Hiyeta notyoya niyehenahitene maheta hatyo nalita. Naxikatya ite hiso kalikini Egito xeta”.

<sup>35</sup> — Hatyo Moisés Israel hotyalinae maxawaiyerehenereta: “Xoana hoka hiwatyali wiso? wiyekohase kore hiso?” Xakore hoka Enore atyo mokene xekohaseti mokene iyehenahitene maheta, anjo atya takoitere koni kaotyakehenere enomana kahinaetene hoka.

<sup>36</sup> Hatyo Moisés atyo Israel yerena iyeheta Egito nalita. Kahare xoalini harenae waiyexe maomakahare tyoma, hatyo waikohe nali, maharexakahare nali, one xotyaxere hare nali, 40-terehokoane.

<sup>37</sup> — Hatyo Moisés ta nexa Israel yerena hiye: “Enore ite hatya iraiti xakaisasehare xinekonita moka natyo akereta. Maikaite xinekonita kaotyaka xomana”, nexa.

<sup>38</sup> Hatyo Moisés tyaonita hahotyalita Israel yerena kakoa maharexakiti, nali tyaonita wahetakomaniyerena kakoa. Exahe anjo iraitere ekakoa tyairi Sinai nali kakoa hoka. Hatyo ana atyo kaxekaka iraiti xairatyaka Enore niraine waiyexe womana.

<sup>39</sup> — Xakore hoka wahetakomaniyerena maisa Moisés xaotyakira xema tyaona aokowiye, kasani haikoahenahita aokowiyahita Egito nali xeta. <sup>40</sup> Hoka nexaha Arão hiye: “Hisoma womana wenorexanae hoka hatyo enorenae xaneha waheta maniya. Kala xoana xamani tyaona Moisés iyehetehenere wiso Egito nalita. Maisa waiyekehalakere womana”.

<sup>41</sup> — Hatyaoseta tyomaha haenorexaha maheta bowi mokose akerehare hoka xoalini hare aisaha hoka fetatya enomana. Hatyo najikinita tyomaha hisehaliti hatyo haenorexaha tyomehenahere kakoa ihalahareha maheta. <sup>42</sup> Hatyo hiyeta Enore kikisoa enonyahitaha, halakisahene. Halakisahene, enokoa xorese tyaoniterena aokaha haenorexaha maheta. Hiyaiya, owene kaxairatyaka:

Xasemehena, Israel hotyalinae: maisa nomani xini xaisa kirakahare hoka xafetatya 40-terehokoane xisao-henere nase maharexakiti nali.

<sup>43</sup> Xakolatya xenorexa Moloque hanalise. Exahe Renfã xoresera xisoma hoka xakolatya xenorexa maheta, hatyohare xenorexa xaokita. Hatyoharenae xisoma xisaona exemaha maheta. Hatyohare hiyeta ite naxanikisa xiso Babilônia xaihako maniya.

<sup>44</sup> — Hatirise kakoare wahetakomaniyerena tyaonita maharexakiti nali. “Nikarexe hisoma”, nexa Enore Moisés hiye aotyakijitene, hoka hatyo hotikijitere akere tyomene. <sup>45</sup> Hatirise kakoarehena wahetakomaniyerena ityaninai hoka Josué kakoa xane Canaã koa isoahenaha hoka kolatyahene. Kaokaha hoka tyaonaha hatyo Canaã waikoherakoa, hawaikohera aokahene. Nali tyaoniterena Enore kikisa enonyahitaha.

— Davi tyohenere xowakiya hekotata hatyo hatirise tyaonita. <sup>46</sup> Enore awaitita Davi hoka Davi hati tyoma enomana aokowi, Jacó hotyali nEnorexa ana. <sup>47</sup> Xakore hoka Salomão atyo tyoma hatyo hati Iraexatyakalati Hana Enore anere maheta.

<sup>48</sup> — Hoka Enore atyo masakare kalorexe kaiserehare hoka maisaiya aliyakere haliti nómane ako tyaonita, iraiti xakaisasehare irahenere akereta:

<sup>49</sup> Enokoa atyo nokahakali, nexa Enore. Hoka waikoa atyo nokiji namokita. Aliyakereya xisoma hati nomani? Aliyakereya xisoma nomani hoka hatyo nali notyao-hena?

<sup>50</sup> Xoana maisa natyo xini tyotya xoalini hare notyoma?

<sup>51</sup> Hatyaoseta nexa Estêvão miyatya haxakaini: — Kaxiyani ximahakaisere, xikinatere xaokowita. Ximatanakoahare hoka maisa Enore niraine xasemare xaokowiye. Xahetakomaniyerena akereta xisaonita,

Isekohaliti Waiyexe kakoa xikahalakoahareta.

<sup>52</sup> Hiyaiya, xahetakomaniyereharenae iraiti xakaisaseharenae xahita xalijinihareta, exahe hoka aisahitaha Enore niraine xakaisaseharenae, Waiyexe Wakahare tyoanene tahi xakaiterena. Exahe xiso atyo kalini xamatawatya hoka xaisa hatyo Iniyalahare Maomanehare — nexa.

<sup>53</sup> — Anjo hiyeta xakore kaotyaka xomana xaotyakisati hoka maisa xisaonare exema — nexa Estêvão miyaty.

### Estêvão Kamane Tahī

<sup>54</sup> Hatyaoseta hatyo inityohalitiranae semaha Estêvão niraine hoka masakare ehareha ihiye, haxehareneha haikoliha hiye, “Karai, karai, karai”, nexaha mokaha exahita.

<sup>55</sup> Hoka Isekohaliti Waiyexe kaxaihakoretya Estêvão hoka eno maniya wahakoty. Waiyehena atyo, owene Enore tyaoniteretoko werokita. Waiya tehitiya Jesus, owene tityoita Enore fihini maniya ehaliyita.

<sup>56</sup> Hatyaoseta nehena: — Xiyaiyehena! Owene enokoa totakore tyaona hoka nowaiya Haliti Ityani. Tityoita Enore fihini maniya.

<sup>57</sup> Nexa hoka talatya, jihotyaha hatanakoako. Hatyaoseta kawiyatyaha toli kinatyaxa hoka tyotyaha jiyaha Estêvão ana. <sup>58</sup> Hatyohekota nolokasekoatyahene, hikoaha menane aka ekakoa, xaneha wenakalati nonitata haware ekakoa hoka sehali kakoa mokotyahene. Iniraeharetyasena Saulo nexarexe xoimalahiti ana isaha haimanasenaiha enomana kaxaikone maheta.

<sup>59</sup> Mokotyahiterene nase Estêvão kawihena: — Xekohaseti Jesus, hiyeheta nisekohare.

<sup>60</sup> Hatyo najikinita hakaoli kakoa tyoka hoka kawiyatyaha kinatyaxa: — Xekohaseti, awaira atyo iniyalahare hamohenahene exe iniyalahare mohenahere natyo xemere.

Nexa taita hoka waini. Hoka Saulo hiye waiye kaokene exaisaka.

### Saulo Kahalakoahareta Jesus Koamaniya Nawenatyaseharenai Kakoa

**8** Kahenehare tyaonahenaha hatyo xowakita Jesus xema maniya tyaoniterena xahita Jerusalém nali. Tyoty tyakekoterena xahita xalijinihareha, aekoakisahene hoka xaoreha. Judéia koa Samaria koa xoaha xaneha, xaoreha. Jesus niraine kakoarenai taita heko tyaonita Jerusalém nali. <sup>2</sup> Hoka haiyanae haliti waiyexeharexena fitya Estêvão, kahare tiyaha ekamane hiyeta.

<sup>3</sup> Xakore hoka Saulo Jesus maniya tyaoniterena mawenekoaretya aokowi. Xane ijoita hatinae nihatyaka, nolokehekoaita enanae, ohirona hare, xane xawatyahitene berexo ako. <sup>4</sup> Hoka hatyo xaoreterena xane xakaihakatyahitaha iraiti tyoty wenakalatinah nihatyaka koa.

### Iraiti Waiyexe Samaria Nali

<sup>5</sup> Hatyaoseta Filipe xane wenakalati Samaria, xakaihakatyaha Enore Kalorexe Aohenere tahi akiti nali tyaoniterena hiye. <sup>6</sup> Xakaihakatyaha ihiyeha hoka waiyese maxematyahitaha Filipe niraine. Tyotyaha semahitaha, waiyahitaha xoalini harenae maomakaharenae enómane. <sup>7</sup> Isekohaliti iniyalahare kamilakoriterena nonita aihikoahitita. Hikoahetehena enonyahitaha hoka aweralikikoatyahitene. Kahare mawaiyenetonaneharenae, maitonaneharenae hare aiyatelikheta. <sup>8</sup> Nikare hoka tyotyaha ihalaharetaha hatyo wenakalati nali.

<sup>9</sup> Nali tyaonita hatya haliti Simão nexarexe. Haholiharexe atyo hoka xoalini hare tyomita. Wahakiyehena nikare tyaonita hoka hakaharetyoa Samaria yerenae mokita. Kalorexe aokowita <sup>10</sup> hoka tyotyaha nali tyaoniterena waiyese maxematyahita iniraine, iraihena hoka waiyese tyakekoahitene. — Exe haliti Enore niyateretoko kaiserehare. Kalorexe iyateliti aokahitere kakoare — nexahitaha. <sup>11</sup> Wahahena nikare tyaonita, haholihareta hoka tyakekoahitene, hakaharetyoa mokahitene, xoalini hare tyomehena hoka.

<sup>12</sup> Xakore hoka Filipe xakaini Iraiti Waiyexe Enore koamaniya nawenatyaha tahi tyakekoha hoka kabatixatyakaha Jesus nexare kakoa, enanae exahe ohirona tehitiya hoka.

<sup>13</sup> Hatyaoseta hatyo Simão nikare tehitiya tyakeko hoka kabatixatyaha. Hoka Filipe kaxaikota hoka kahare xoalini hare maomakahare, hokakitinae hare kaxaiyatelikisakihititere waiya hoka hakaharetyoa.

<sup>14</sup> Hatyaoseta Jerusalém nali Jesus niraine kakoarenai tyaoniterena semaha wenakalati Samaria tyaoniterena nawenane Enore koamaniya hoka hatyo hiyeta Pedro, João xoaha axikatyaha nali xeta. <sup>15</sup> Hatyo hinamanae xane kaokaha hoka iraexatyaha Samaria yerenae tahi, Isekohaliti Waiyexe kaoka tyakekoterena ana maheta. <sup>16</sup> Hatyo xowaka maisa xala harenae ana exoahenere Isekohaliti Waiyexe. Koxaka taita atyo kabatixatyakaha Jesus nexare kakoa. <sup>17</sup> Hatyaoseta Pedro, João xoaha eseriha heno mokaha hakaheha hoka Isekohaliti Waiyexe exoa enomanaha.

<sup>18</sup> Simão waiya Jesus niraine kakoarenai xekaokakira hakaheha ihiyeha hoka Isekohaliti Waiyexe kaokene hatyo halitinae ana. Hoka hatyo hiyeta aimatya olo Pedro, João xoaha ana <sup>19</sup> hoka nehena: — Owene olo hoka xisa nomani hatyo iyateliti hoka nikare nekaokakihena nokahe hatya hiye hoka Isekohaliti Waiyexe kaoka enomana.

<sup>20</sup> Hatyaoseta Pedro nehena ihiye: — Maika Enore axikatyaha hiso, holoxa xoaha irikati koni! <sup>21</sup> Maisaiya aliyakere wihatene koni hahakita. Hiyaiya, hiyahekola maisa waiyexe Enore haoti. <sup>22</sup> Hahalakihena exe hiyahekola iniyalahare hoka Enore hiye hiraexatya hoka maotyaneheta iniyalahare hiyahekola. <sup>23</sup> Nowaiyita hiso, masakare hokoawahareta. Hokoawaharene atyo motya nikanati tihene, exahe iniyalahare hománe atyo tokita hiso.

<sup>24</sup> Hatyaoseta Simão nehena Pedro João xoaha hiye: — Xiraexatya Enore hiye notahi akiti hoka maisa nikare notyaonita exe xiraitere akere.

<sup>25</sup> Hatyaoseta Pedro, João xoaha haikoahenahitaha Jerusalém nali xeta haxakainiha Enore niraine najikinita. Xanehenahitaha ahotyaho hoka xakaihakaho-henahititaha Iraitu Waiyexe Samaria koa tyaoniterenae hiye.

### Filipe Ahalakoatya Kaxaiko Akatyatiye

<sup>26</sup> Hatyaoseta anjo Enore nalitare nexa Filipe hiye: — Haxakaiharetioahena hoka hiyane Jerusalém naho Gaza xeta — nexa. Hatyo naho komita maisa kahare haliti jiyare.

<sup>27</sup> Nexa hoka Filipe xakaiharetioa hoka xane hatyo maniya. Ahotyaho xaneta ene hoka ahalakoatya hatya haliti kaxaiko akatyatiye, Etiópiatane. Haikoahitita hawaikohera xeta. Hatyo haliti komita ene kalorexe tyaonita. Etiópiya yerena xekohasero Candace wakanehare tyaonita. Tyotyaxi iyehare enoloxa hare kaxaikotyasehare tyaonita. <sup>28</sup> Koxaka Jerusalém nali xane Enore awaiyetya maheta hoka hatyo nalita haikoahitita, xanehitita hakarosana hawaikohera xeta. Tyokita hakarosana hoka ihatita iraitu xakaisas-ehare Isaiás xairala.

<sup>29</sup> Hatyaoseta Isekohaliti Waiyexe nexa Filipe hiye: — Hiyane hikaoka enomana hoka exe karosakore xema hiyane.

<sup>30</sup> Filipe xanehena, xane okoi kaokehena ekarosane ana hoka semehena atyo, kaixaretita atyo iraitu xakaisasehare Isaiás baberanexa. Hoka axehenene: — Xoana waiyekehalakita homana hatyo hakaixaretitere?

<sup>31</sup> — Maisaiya aliyakere waiyekehalakita nomani exe nakaexaretitere nomaxawaiyekehalakatyakinihareta — nexa.

Hatyaoseta nehitiya: — Hisohena, hisoka nohaliyi — nexa hoka Filipe kakoha ekarosana, tyoka ehaliya.

<sup>32</sup> Exakerexe tahi kaexaritita Iraitu Waiyexe nanekoa, hatyo kaxaiko akatyatiye:

Kalanero exaisakaose kanolokakitere akereta mokahene, exahe kalanero mokose kaxaikolisakehena hoka haxaikolisasena ana mema tyaonitere akereta maisa kakanaseta enomanaha.

<sup>33</sup> Maisa kaxaiminisakita. Maisa aiminisahitene, maisa waiye mokahitene. Xalaiya ijikolahare tahi xakaihena? Hiyaiya, kamiyane atyo enawenane ali waikoheko.

<sup>34</sup> Hatyaoseta hatyo kaxaiko akatyatiye axehena Filipe: — Hawaiyekehalakatya nomani: Xala tahi nikare iraeta? Xoana haxaokakita? Hatya xaokaka kore?

<sup>35</sup> Hatyaoseta Filipe awaiyekehalakatya hatyo akiti enomana, xakaihena Waiyexe Iraitu Jesus xaka ihiye.

### Batixatyati

(Marcos 16.15-16; Romanos 6.3-5; Colossenses 2.12)

<sup>36</sup> Xanahitaha hoka xane hikoaha one ana hoka hatyo kaxaiko akatyatiye nehena ihiye: — Hiyaiyehena, owene one. Maisaiya xoare hare mahokoanetita nobatixatyati, alitereka?

<sup>37</sup> — Waiyeya hityakekota kaiserehare hoka ehokoriya nali — nexa Filipe ihiye.

Hoka nexa: — Há, notyakekota kaiserehare. Jesus Cristo atyo Enore Ityani naokita.

<sup>38</sup> Hatyaoseta hatyo kaxaiko akatyatiye amemakisa hakarosane hoka exoaha hatyo onexa hoka Filipe batixatene. <sup>39</sup> Hatyaoseta kenekoahenahitaha onexata hoka Enore Nisekohare kolatya Filipe. Hatyo kaxaiko akatyatiye maisa waiyehitene hekoti, xakore hoka jiya xanehitia haihalaharene kakoa. Ihalahare kaiserehare atyo.

<sup>40</sup> Hatyaoseta Filipe xane eharehenerota kaoka wenakalati Azoto nali. Hatyaoseta xakaita Waiyexe Iraitu tyotyaxi naliyerena hiye, nikare wenakalati koarena hiye Cesaréia nali xane hikoahenere kijiya.

### Saulo Waiyexe Maniya Tyaohenere Tahi

(Atos 22.6-16; 26.12-18)

<sup>9</sup> Hatyo xowaka Saulo masakare xalijinihare tyaonita Jesus xema maniya tyaoniterenae xahita.

Hatyaoseta xane irai sacerdotena xekohase kakoa, <sup>2</sup> axita baberane iniraine kakoare judeuna xahohisakoatyakala hanakona niyahare wenakalati Damasco nali hotikisa maheta. Hatyo iraitu hiyeta Saulo otoka aokowita Jesus koamaniya tyaoniterenae ena, ohiro harena hoka kolahenahitene olatyoare Jerusalém nali xeta maheta.

<sup>3</sup> Hoka Damasco naho xaneta Saulo, okoi kaokehena wenakalati nali hoka enokoata xaokanatyakalati ehoko haliya werokakoa moka. <sup>4</sup> Hatyaoseta exoa waikoa hoka semehena atyo iraitihena ekakoa: — Saulo, Saulo, xoana hoka hiyalijinihare noxahiti? nexa.

<sup>5</sup> — Xala hiso, Xekohaseti? nexa Saulo axene.

— Natyo atyo Jesus hikirawanetere. <sup>6</sup> Hainakoahetehena hoka hiyane hisoahena wenakalati xeta. Nalite irae ha hihye hawenane tahi akiti.

<sup>7</sup> Halitinae Saulo xema xaneterenae tyotyaxi amematyoaha, maisa xoare nexa iraetaha. Semaha xakore atyo iraitu hoka maisa atyo xala hare waiyahitaha.

<sup>8</sup> Hatyaoseta Saulo tityoaheta, waiyakahetehena xakore, maisa waiyakahitita. Hatyaoseta otokahisahene ekahe hiyeta hoka xaneha ekakoa Damasco nali.

<sup>9</sup> Hanamaki ferakene mawaiyahakalahare tyaona. Hatyo ferakenena maisa kanakairare, maisa terare hekoti.

<sup>10</sup> Damasco nali tyaonita hatya Jesus xema maniya tyaonitere, Ananias nexarexe. Kaxawaiyanikisaka hoka Xekohaseti kaotyaka enomana hoka kawisa: — Ananias! nexa.

— Xoare haoka, Xekohaseti? nexa.

<sup>11</sup> Hatyaoseta Xekohaseti aotyakisene: — Hiyanehena Judas hana nali xeta hoka ahoti Totahore aokahitere hatawa haliti Tarso tare Saulo nexarexe xahita. Nali iraexatita. <sup>12</sup> Koxaka kaxawaiyanikisaka: kaotyaka enomana Ananias nexarexe. Isoa hatyako enomana, moka hakahe ihiye hoka waiyakaheta waiyitere akereta maheta.

<sup>13</sup> Nexa xakore hoka Ananias nehena: — Xekohaseti, kahare halitinae xakaita hatyo haliti tahi akiti. Jerusalém nali iniyalahare mokita kahare hiyema maniya tyaoniterenae. <sup>14</sup> Kalikini ali Damasco tyoa sacerdoté xekohasena baberanexa kakoa olatya hoka berexoty maheta hiyema maniya tyaoniterenae — nexa.

<sup>15</sup> Hatyaoseta Xekohaseti nehitiya Ananias hiye: — Hiyanehena enomana. Naoka hatyo haliti nowakanihare maheta hoka xakai maheta notahi akiti tyoty haliti hotyalinae hiye, exahe xekohasetinae hiye, exahe Israel hotyalinae hiye hoka. <sup>16</sup> Natyotaite Saulo ana nahotikihena exemawatikisaka nohiyeti — nexa.

<sup>17</sup> Hatyaoseta Ananias xane isoa Judas hanako hoka ekaokakisa hakahena Saulo hiye hoka nehena: — Nohinaehare Saulo, Xekohaseti axikatya natyo ali. Etake hiyaiyehenere Jesus Damasco naho nali axikatya natyo homana hiyaiyakahitiya maheta, Isekohaliti Waiyexe kaxaehakoretya hiso maheta.

<sup>18</sup> Nexa taita ihiye hoka exoahetehena kohase tyatyase akerehare Saulo xose akota hoka waiye heta. Hatyo najikinita ainakoaheta hoka xane kabatixatyaka. <sup>19</sup> Kanakairihenere najikinita kinatere tyaheta hetatiye akereta.

#### Saulo Tyaona Damasco Nali

Hatyaoseta Saulo tyaona akaiki ferakene Jesus koamaniya tyaoniterenae kakoa Damasco nali. <sup>20</sup> Xakaihena rotita Jesus tahi akiti ihiyeha judeunae xahisakoatyakala hananae ako. Nehena: — Jesus atyo Enore Ityani.

<sup>21</sup> Tyotyaha semahitaha Saulo niraine hoka hakaharetyoaha, axakakoahitaha: — Xoana, maisa exe haliti xini aijita tyoty Jesus koamaniya tyaoniterenae Jerusalém nali? Xoana, maisa exe xini ali tyoa hoka olatya Jesus koamaniya tyaoniterenae hoka kolatyahene maheta sacerdotenae xekohasena ana aokowitere xini?

<sup>22</sup> Xakore hoka Saulo hairaine kakoa aiyateretyoa iraiti kakoa, ekakoita waiyore kaiserehare irai. — Jesus atyo Enore Kalorexe Aohenere terota — nita xakaita ihiyeha. Waiyore xakaita hoka judeunae Damasco nali tyaoniterenae maisa aliyakere xoare nexareha.

#### Judeunae Aisa Aokowiha Paulo (Atos 9.15-16; 13.45, 50; 14.5-6; 14.19-20)

<sup>23</sup> Tyaona waha ferakenehena hoka judeunae aho-hisakoatyakakoaha hoka aisahene aokowiha. <sup>24</sup> Xakore hoka Saulo atyo sema exahekolaha tahi akiti. Wahatyahene wenakalati xisoakala nali. Ferakoa, makiya xoaha wahatyahitaha aisahene maheta. <sup>25</sup> Hoka haxowaka makene Saulo hinaeharenae xane ekakoa hoka exoakisahene talare hoko motokoare xowata. Moka-hene koho ako hoka exoakisahene.

#### Saulo Tyaona Jerusalém Nali

<sup>26</sup> Hatyaoseta Saulo xane Jerusalém xeta hoka kasani Jesus koamaniya tyaoniterenae kakoa haxawalita tyaona aokowita. Xakore hoka tyotyaha mairahitaha, maisa tyakekoreha Jesus xema maniya enawenane hoka. <sup>27</sup> Hatyaoseta Barnabé xane exema kahinaetene hoka hotikisene Jesus niraine kakoarenae ana maheta. Xakai ihiyeha Saulo waiyehenere Jesus ahotyaho, Jesus iraihenere ekakoa tahi hare. Barnabé xakai ihiyeha tehitiya Saulo xakaihakala Iraitu Waiyexe tahi akiti, maisa haxakaini kakoa mairita Jesus tahi akiti wenakalati Damasco nali. <sup>28</sup> Hatyo hekota Saulo tyaona enekoniha. Xaneta etalokoaita tyoty wenakalati Jerusalém koa, aiyateretyoita haxakaini iraitu Xekohaseti tahi akiti kakoa. <sup>29</sup> Hatyo Jerusalém nali haiyanae judeunae hoka grego xako iraiterenae kakoa Saulo iraeta hoka komita kinatyaxa iraikakoahitaha. Hatyaoseta kasani aliyakere xamani mokahene hoka aisahene aokowiyahitaha. <sup>30</sup> Hatyaoseta ihinaeharenae semahene hoka Saulo nolokaha wenakalati Cesaría nali hoka hatyo nalita axikatyahene wenakalati Tarso nali xeta.

<sup>31</sup> Hatyaoseta Jesus koamaniya tyaoniterenae mehaxoiko tyaonahitaha, Judéia koa, Galiléia koa, Samaria koa tyaoniterenai. Ekakoita tyakekoaha kaiserehare. Isekohaliti Waiyexe kahinaera hiyeta hisoakehena, waiye aiminisahitaha Xekohaseti.

#### Pedro Xane Wenakalatinai Nali

<sup>32</sup> Hatyo xowakiya Pedro xaneta tyoty wenakalatinae koa xeta. Ekakoita xane kaoka wenakalati Lida nali waiya maheta Enore kaxaikoneharenae. <sup>33</sup> Nali Enéias nexarexe ana hiko. Maitonanehare, 8-terehokoanehena maisa moxomoxore hekoti haxehokotyokakalata.

<sup>34</sup> Hatyaoseta Pedro nehena: — Enéias, Jesus Cristo aiyatelikiheta hiso. Hatityoahetehena hoka hiyehokotyokakala haxakaihetehehena — nexa. Nexa ihiye hoka Enéias tityoaheta rotita.

<sup>35</sup> Hatyaoseta tyoty tyaoniterenae wenakalati Lida, Saron nali xoaha semaha hatyo tahi hoka Xekohaseti xema maniya tyaonaha.

<sup>36</sup> Exowaka wenakalati Jope nali hatya ohiro tyaonita Jesus koamaniya, Tabita nexalolo. Hatyo enexalo atyo Dorcas Grego xako. Tyaonitere xowakiya waiyexe tyomita, kahare kahinaetita maoloxaharenae. <sup>37</sup> Hatyo xowakiya Dorcas hokaka hoka waini. Tihaha ehálo. Hatyaoseta kolatyahene xane mokahene hatyako enoako.

<sup>38</sup> Hatyaoseta Jesus koamaniya tyaoniterenae semehenaha atyo, Pedro tyaonita wenakalati Lida nali, Jope haliyita. Hoka axikatyaha hinamahare haliti enomana kaexakatyahene maheta. — Hisohena rotita Jope xeta, hihalahare — nexaha.

<sup>39</sup> Nexaha ihiye hoka Pedro xane exemaha. Xane kaokaha hoka nolokahene enoako xeta. Tyoty maiyanenehalonae exahiyatene hoka tiyahitaha, hotik-



isahitaha haimaha itinolala kasetatere xowakere enomanaha. <sup>40</sup> Hatyaoseta Pedro aihikoahenahitene tyotyaha hatyoakota. Hatyaoseta tyoka hakaoli kakoa hoka iraexatya. Hatyo najikinita ehaikoaheta kamati maniya hoka nehena: — Tabita, hainakoahetehena — nexa.

Hatyaoseta Tabita waiyaliheta. Waiya Pedro hoka tyokeheta. <sup>41</sup> Pedro otokene ekahe hiyeta, kahinaetene hoka atityoakihetene. Hatyaoseta kawisa tyotyaha Jesus koamaniya tyaoniterenae maiyanenehalonae kakoita hoka isehenahitene enomanaha kasexe.

<sup>42</sup> Hatyo nexaka hakakoare xakaikoatyaha wenakalati Jope nali hoka kahare haliti Xekohaseti Jesus koamaniya tyaonaha, tyakekoaha hoka. <sup>43</sup> Hatyaoseta Pedro nali waha ferakene tyaona militi xaxotyatyasehare Simão nexarexe hanako.

### Cornélio Atyo Tyaonita Xekohaseti Koamaniya

**10** Hatyo xowaka wenakalati Cesaréia nali tyaonita Cornélio nexarexe, sorarenae xekohasehare.

“Itália tarenae”, nexahitaha hatyo sorarenae xaokaka. <sup>2</sup> Waiyexehare tyaonita, waiye aiminijita Enore, tyotyaha haisaninae haiyanityo kakoita Enore koamaniya tyaonita. Kahinaetita kahare judeunae maoloxaharenae, Enore hiye iraexata minita.

<sup>3</sup> Haxowaka makakoahena hoka Cornélio kaxawaiyanikisaka. Hatya anjo Enore nalitare tyoa kaoka enomana. Waiye waiyene. Kaoka ehaliya hoka: — Cornélio! nexa ihiye

<sup>4</sup> Hamairane kakoa waiye wahakotyaha anjo ana hoka axehenene: — Xoare haoka, xekohaseti?

Hoka anjo nehena: — Enore awaitita hiraexaitere, exahe maoloxahare waiye hiyomokala hoka otya hiso.

<sup>5</sup> Kalikini haxikahena haiyanae haliti wenakalati Jope xeta hoka nolokaha maheta Simão Pedro nexarexe.

<sup>6</sup> Tyaonita Simão hanako, militi xaxotyatyasehare hanako one kaloxere kilihini maniya — nexa.

<sup>7</sup> Hatyaoseta anjo xaneheta hoka Cornélio kawisa rotita hinama hawakanehare hatya sorare xoaha. Hatyo sorare Enore koamaniya tehitiya tyaonita, Cornélio ana hakita. <sup>8</sup> Hatyaoseta Cornélio xakai ihiyeha hawaiyane xaka hoka axikatyahene Jope nali xeta.

<sup>9</sup> Kamaetali hoka totahikoahena hoka Pedro kakoha, xane hati maiyeho iraexatya maheta. Hatyo nase Cornélio wakaneharenae xanehitaha ahoti, owitehena Jope mokahitaha. <sup>10</sup> Hatyaoseta Pedro nakehena, kasani kanakaira aokowita. Hoka tyomahitere nakairati nase kaxawaiyanikisaka. <sup>11</sup> Waiyehena atyo Pedro, enokoa totako tyaona hoka imititaose kalohero olatyoare xalakakoa maniya tonone akerehare exoa waikoa. <sup>12</sup> Hatyo nakoako tyotyaha hotyalihare kirakaharenae tyaonita, xalakakoa kijiye hotyalinae, waikoa nolokoitereharenae, kotehalanae hare.

<sup>13</sup> Hatyaoseta Pedro semehena atyo, iraitihena atyo: — Pedro, nikahena hoka haisa hoka hanisa.

<sup>14</sup> — Maisaiya, Xekohaseti. Maisa xoana xowaka nanihenere xoalini hare kaiyalaharexe manikakahare — nexa.

<sup>15</sup> Xakore hoka nehitiya iraiti: — Awa atyo kaiyalahare manikakahare haoka Enore koxaka waiyexe kanikakere mohenerere.

<sup>16</sup> Hanamaki nikare tyaona hoka hatyaoseta hatyo imititaose akerehare kakolatyakeheta enokoa xeta.

<sup>17</sup> Pedro amaikohare hatyo waiyehenerere akiti kakoa: — Xoare akiti kala nikareta aotyakisa aokowita natyo? nexa.

Pedro nikare ahekotitere nase Cornélio xaxikalanae tyoa kaokaha. Koxaka axaha hatyo nali tyaoniterenae hoka aotyakisahene hoka tyoa amematyoaha Simão hana kanase. <sup>18</sup> Kawisaha hatya hatyakota hoka axaha: — Xoana ali Simão Pedro nexarexe tyaonita? nexaha.

<sup>19</sup> Pedro heko otyaxematitata hawaiyane tahi akiti hoka Isekohaliti Waiyexe nexa ihiye: — Hasemehena, owene hanama hare haliti tawita hiso. <sup>20</sup> Hexoaheta hoka haxakaiharetioahena hoka hiyane exemaha. Hiyane exemaha, awa atyo himawaiyehare hiyanene kakoa. Natyo atyo natyoanikisahene ali.

<sup>21</sup> Hatyaoseta Pedro exoaheta hoka nexa ihiyeha: — Natyo atyo xatawitere. Xoana hoka ali xisoa? nexa.

<sup>22</sup> Hoka nexaha ihiye: — Xekohaseti Cornélio axikatya wiso. Waiyexehare hatyo haliti. Awaitita Enore, exahe judeunae hoka tyotyaha tyakekoahitene. Hatya Enore nalitare anjo irai ekakoa, aoka hikakawisaka ehana nali xeta, sema maheta hiraine — nexaha. <sup>23</sup> Hatyaoseta Pedro aisoakisahene hatyako, hatyo xatini nemakaha Simão hanako.

Kamaetali hoka Pedro xakaiharetioa, xane exemaha. Haiyanae iraiti tyakekoterenae ihinaeharenae Jope nali tyaoniterenae tehitiya xaneha exemaha.

<sup>24</sup> Kamaetali hoka xane kaokaha wenakalati Cesaréia nali. Cornélio koxaka kaexakatya hahinaeharenae kaiserehare hoka atyahahitaha Pedro xahita. <sup>25</sup> Xane kaokahena Pedro hoka Cornélio tyoa ahalakoatene, enahalakoa meholokoa hakaoliri kakoa. <sup>26</sup> Xakore hoka Pedro atyo ainakihetene hoka nexa ihiye: — Hatityoahetehena, hiso akerehare tehitiya haliti natyo — nexa.

<sup>27</sup> Iraikakoaha Cornélio kakoa hoka hatyaoseta xane isoa hatyako. Owene atyo kahare haliti koxaka hohisakoita nali. <sup>28</sup> Hatyaoseta Pedro nexa tyotyaha ihiyeha: — Waiyehalakitaha atyo xomana judeunae nawenanaho mahokoanititere majudeuneharenae waiyaka exahe xahohisakoatyaka ekakoaha. Xakore hoka Enore atyo hotikisa nomani hoka maisaiya atyo xala hare mahekorenehare naokita. <sup>29</sup> Hiyeta hoka xakawisa natyo hoka nihalahalini kakoa notyoha ali xeta. Xiyakaihena nohiye: xoana hoka xakawisa natyo?

<sup>30</sup> Hoka Cornélio nehena: — Ali hanamaki ferakene nahitita niraexaita makakoasehena nohanyako. Hoka eharehena rotita hatya haliti iyomere nimere kaotyaka nomani <sup>31</sup> hoka nexa nohiye: “Cornélio, Enore semita hiraexala. Otita hiso hakahinaetitere maoloxaharenae hiyeta. <sup>32</sup> Haxikatya hatya Jope nali xeta hoka hatya haliti Simão Pedro nexarexe noloka maheta. Militi xaxotyatyasehare Simão hanako tyaonita, one kaloxere kilihini maniya”, nexa nohiye. <sup>33</sup> Hoka nakawisa rotita hiso. Ehekoareta hisoa. Kalikini wisaonita ali, wiho-

hisakoita Enore haoti, wasema waokowi hiraene, xoare nexa xamani Enore airaekihena hiso hoka — nexa.

### Pedro Xawaiyekehalakala Tahī

<sup>34</sup> Hatyaoseta Pedro nehena: — Kalikini atyo waiyekehalakehena nomani. Enore ana atyo tyotyā haliti hakakoita. <sup>35</sup> Awaiyetita exema maniya tyaoniterenae, waiye tyaoniterenae, exahe hahotyalihare hoka. <sup>36</sup> Xiso atyo koxaka xasema Enore niraine Israel hotyalinae anere Iraitī Waiyexe, wenati waiyexe Jesus Cristo hiyeta. Hatyo atyo tyotyā halitinae Xekohase. <sup>37</sup> Koxaka xasemita kawenatyakehenere tahi akiti, Judéia koa hakakoare kasemaka. Galiléia koa hotohare nikare tyaona, João xakaihenere batixahenere najikinita.

<sup>38</sup> — Xasemita tehitiya Jesus Nazaré yere tahi akiti. Enore isa Isekohahaliti Waiyexe enomana hoka aiyatelikisa halitinai. Tonakoatya, hakakoare xane, waiyexe tyomita, aiyatelikihitita tyotyā tihanare xahokakalanae, Enore atyo kaxaikotene hoka. <sup>39</sup> Wiso atyo tyotyā xoalini harenāe enómanē wiyaiya judeunae waikoherakoa nali, exahe Jerusalém nali. Xakore hoka atyalihose xaimaholatyaka hiye berekotyahene hoka aisahene. <sup>40</sup> Xakore hoka Enore ekasekihetene hanamaki ferakene najikinita hoka hotikihetene tehitiya womana. <sup>41</sup> Maisa atyo hakakoare haliti waiyehititene hoka wiso atyo wiyaiyehetene. Wiso atyo ewaiyasehare Enore xaokalita. Wiyaiyehetene hoka wikanakairiheta, wisereheta ekakoa ekaseneheta najikinita. <sup>42</sup> Enore atyo axikatya wiso wiyakai maheta halitinai hiye Iraitī Waiyexe. Enore mokene kalorexe, kasexenae ekamānenāe xekohase, sema enawenaneha tahi akiti hoka enómanenai akereta mokahene maheta. <sup>43</sup> Tyotyā iraitī xakaisaharenāe Jesus tahi akiti xakai hoka nexaha: Xalanae xamani atyo tyakekone hoka iniyalahare enómaneha kamaotyānetyakeheta ihiyeta — nexa.

### Majudeuneharenāe Ana Isekohaliti Waiyexe Exoa

(Atos 2.1-4; 8.14-17; 19.1-7)

<sup>44</sup> Pedro irāetata hoka Isekohahaliti Waiyexe exoa hoka kaxaihakoretya tyotyā semaxemaiterenāe iraitī.

<sup>45</sup> Judeunae Jesus koamaniya tyaoniterenāe Jope nalita tyoiterenāe Pedro xema hakaharetyoaha. Enore exaoretya Isekohaliti Waiyexe majudeuneharenāe ana hiyeta. <sup>46</sup> Semehenaha atyo, iraihenaha atyo xakotinae masemakahare. Ihalahare tyaonaha Enore kakoa.

Hatyaoseta Pedro nehena: <sup>47</sup> — Exe halitinae ana Isekohahaliti Waiyexe kaoka tehitiya kaokitere womana akereta. Nikare hoka xalaiya mahokoanehena ebatixatyakaha one kakoa?

<sup>48</sup> Hatyaoseta aoka ebatixatyakaha Xekohaseti Jesus nexare kakoa. Hatyo najikinita akaiki ferakene Pedro nawenane aokaha nali hahaliyaha.

### Pedro Awaiyekehalakatya Tyotyā Tyomehenere Tahī

**11** Hatyaoseta Jesus niraine kakoarenai, exahe haiyanae Jesus xema maniya tyaoniterenāe semaha Judéia koa nali majudeuneharenāe nawenane

Enore niraine xema maniya. <sup>2</sup> Pedro haikoaheta Jerusalém nali hoka haiyanae kintatyaxa irāe ekakoa, kasani haomanere milihi aikotiterenāe taita tyaona Enore koamaniya aokahitaha <sup>3</sup> hoka nexaha: — Hise-maka maxaikolahare haomanere milihinae hanako, hikanakaira harenāe ekakoaha. Xoana hoka?

<sup>4</sup> Hatyaoseta Pedro xakaihakatya tyotyā hawaiyane tahi akiti, hetatiye aoseta, waiye awaiyekehalakatene enomanaha. <sup>5</sup> — Notyaonita wenakalati Jope nali hoka nokaxawaiyanikisaki. Nowaiyehena atyo, motya imiti taose kalohero enokoata tyoa ewaikoatyoa. Olatyoare etonone xalakakoa maniya tyoa amematyoa nohaliye. <sup>6</sup> Waiye atyo nowaiyehena, owene atyo kirakaharenāe tyaonita enako, xalakakoa kijiye, xalijiniharexena, waikoa nolokoiterehare, kotehalanae hare. <sup>7</sup> Hatyota nasemehena atyo, iraitī nexa: “Pedro, haisehena hoka hanisa”, nexa. <sup>8</sup> Hoka nomi: “Maisaiya, Xekohaseti, maisa xoana xowaka nanisare kaiyalaharexe manikakahare”. <sup>9</sup> Hatyaoseta enokoata iraitī nehitiya: “Awa atyo kaiyalahare manikakahare hexa Enore koxaka waiyexe kanikakere mohēnere xaokaka”. <sup>10</sup> Nikare hanamaki tyaona hoka hatyaoseta tyotyā haikoaheta enokoa xeta.

<sup>11</sup> — Hatyonase hanamahare haliti kaxaxikatyakitere nomani Cesaréia nalitarenāe tyoa kaokaha hati notyaonitere nali. <sup>12</sup> Isekohaliti Waiyexe noxanini exemaha aoka nohiye. “Awa atyo himawaiyehare exemaha hiyanene kakoa”, nexa nohiye. Exe 6-harenāe wihi-naeharenāe Jope nalitarenāe tehitiya tyoaha noximi. Wityotyā wiyane wisoa Cornélio hanako. <sup>13</sup> Hatyaoseta Cornélio xakai wihiye hahanako waiyehenere anjo. Tityoa enahalakoa hoka nexa ihiyē: “Haxikatya hatya Jope xeta hoka xane noloka Simão Pedro nexarexe.

<sup>14</sup> Hatyo atyoite iraihenāe hoka Enore koamaniya kaiserehare xikaxomokakehena hexanityo, hityaninai harenai kakoa”, nexa.

<sup>15</sup> — Hatyaoseta niraehena hoka Isekohaliti Waiyexe tyoa exoa enomanaha, hetatiye exoitere womana akereta. <sup>16</sup> Hatyaoseta noteheta Xekohaseti Jesus niraine: “Aliterexe atyo João batixaita one kakoa hoka xiso atyoite Isekohaliti Waiyexe kakoa xikabatixatyaka”.

<sup>17</sup> — Hiyaiya, wityakeko Xekohaseti Jesus Cristo hoka hatyo hiyeta Enore isa Isekohaliti Waiyexe womana. Majudeuneharenāe ana tehitiya kaxekaka kaxekakehenere womana akereta. Enore xaokalita hoka xalaiya natyo hoka Enore kakoa nokahalakoiharehena? nexa Pedro ihiyeha.

<sup>18</sup> Semaha iniraine hoka halakisaha hairaehekoalaha. Ihalahare Enore kakoa hoka nexaha: — Eheketeta Enore nikare moka majudeuneharenāe hoka halakisa-ha tehitiya háomaneha iniyalahare hoka waiyexe matyotenehare tyaonaha maheta — nexaha.

### Antioquia Yerenāe Tyaonita Jesus Koamaniya

<sup>19</sup> Jesus koamaniya tyaoniterenāe xaoreha hairawaiyakaha hiyeta, Estêvão kaxaisakehenere najikinita. Haiyanae xane Fenícia, Chipre, Antioquia xoha nali xeta. Xane kaokaha hoka xakaihaha Iraitī

Waiyexe judeunae hiye taita. <sup>20</sup> Xakore hoka haiyanae Chipre tarenae, Cirene nali tarenae xoaha xaneha Antioquia nali xeta hoka xakaihaha Iraitu Waiyexe Jesus tahi akiti majudeuneharenae hiye. <sup>21</sup> Enore niyaterere kakoareha hoka kahare haliti tyakeko iraitu hoka tyaonaha Xekohaseti xema maniya.

<sup>22</sup> Hatyo tahi akiti enexakaha semaha Jerusalém nali tyaoniterenae tyakekohatiyena hoka axikatyaha Barnabé Antioquia xeta. <sup>23</sup> Xane kaokehena, waiyehena atyo, koxaka atyo Enore waiye mokahitene hoka ihalahare tyaona ekakoaha, hoka aotyakisahene Xekohaseti koamaniya takita heko kinatere, haihalahareneha kakoa tyaonaha maheta. <sup>24</sup> Barnabé atyo haliti waiyexe, Isekohaliti Waiyexe tyaonita ekakoa, tyakekohatiyeharenae. Kahare haliti semaha iniraine hoka tyakekoha hoka Enore koamaniya tyaonaha.

<sup>25</sup> Hatyo najikinita Barnabé xane wenakalati Tarso nali noloheta maheta Saulo. <sup>26</sup> Xane kaoka enomana hoka nolohetene Antioquia xeta. Nali tyaonaha hoka hohisakoaha tyakekoterena kakoa. Haterehokoane tyaonaha ekakoaha hoka aotyakisahene. Kahare haliti aotyakisaha, heko miyatyaha hatyo terehokoane. Antioquia nali hotohare Cristo koa maniya tyaoniterenae kakaixaretyaka.

<sup>27</sup> Hatyo xowakiya haiyanae iraitu xakaisaseharenae Jerusalém nalita Antioquia nali xeta xaneha. <sup>28</sup> Hatya enekonihatareha Ágabo nexarexe. Tityoa hoka Isekohaliti Waiyexe niyaterere hiyeta nehena: — Maikaite kalore nakiti tyaona tyoty hakakoare waikoheko — nexa. Cláudio kalorexe tyaonitere xowakiya nikare nakiti tyaona.

<sup>29</sup> Hatyaoseta Xekohaseti koamaniya tyaoniterenae kahinaetyaha aokowiha hahinaeharenaiha Judéia koa tyaoniterenae hoka haihatyakaha isaha olo. Haiyanae kaoloxerenae hoka kalore isaha, haiyanae maoloxaharenae hoka inira isaha. <sup>30</sup> Hoka axikatyaha olo haxekaneha Barnabé, Saulo xoaha xema, tyakekoterena nityohalitiranae ana Jerusalém nali kaxekaka maheta.

#### Kairawaiyakahitaha Wenati Waiyexe Hiyeta

**12** Hatyo xowaka terehokoane kalorexe Herodes xalijinihare tyaona haiyanae Iraitu tyakekotere-nae xahita. <sup>2</sup> Wakatya sorarenae hoka xane aisaha João naxenane Tiago kesekase kakoa. <sup>3</sup> Waiye kaokene judeunae nityohalitiranae ana hoka Herodes wakahitiya sorare hoka olahitiya Pedro. Hisehaliti nakairati makaolatyakahare nomakere xowaka nikare tyaona. <sup>4</sup> Olatyahene hoka berexoako mokene Herodes xaokali. Xalakakoa hotyali sorare ekaxaikotyasenai tyaona aoka, xalakakoahare makereha. Hisehaliti najikinita Herodes aihikoatene aokowita judeunae ana. <sup>5</sup> Nikare Pedro berexoako tyaonita hoka sorarenae waiye kaxaikoitene. Xakore atyo hoka iraitu tyakekotere-nae kahare iraexatyahitaha enomana.

#### Pedro Hikoaheta Berexotyakalati Hanakota

<sup>6</sup> Makiya, Herodes xaihikoarene hoka hotikisene halitinae ana aokowitere nahitita Pedro nemakita hinamahare sorarenae xikako, hinama maniya olatyoare kamatiherahi kakoa berexo ako tyaonita. Berexotyakalati hana jihola kanase sorarenae tehitiya kaxaikota.

<sup>7</sup> Hatyaoseta ehárehena rota anjo kaotyaka Enore nalitare, werokeheko moka hatyo akiti. Totoka Pedro kanoli hiye, kaosetene hoka nexa: — Hihalahare hainakoahetehena — nexa. Hatyaoseta exola kamatiherahi itoaheta ewaotyalinai hiyeta.

<sup>8</sup> — Haiyatyahetehena hijiterone hihiye, hikijitini holahetehena — nexa ihiye anjo hoka Pedro anjo iraitere akereta tyaona.

— Himanase ako hisoahetehena hoka hisohena noximi — nexa anjo Pedro hiye.

<sup>9</sup> Hatyaoseta Pedro hikoaheta berexo akota, xane anjo xema. Xakore hoka komita ene maisa waiyekehakita enomana anjo niyanehetene, motya kaijihinita aokita. <sup>10</sup> Hetatiye jiyehenahitaha, hatyotare sorare kaxaikotere aose jiyehenahitiyaha hoka xane hikoahenahitaha kamatihera jiorere wenakalati xisoakala nali. Jihore kalorexe kamatihera xakore hoka majiholatyoata hawawa hoka hikoahenahitaha. Hatyaoseta jiyaha ahotyaho. Hatyaoseta anjo xaneheta, nali halakiheta Pedro.

<sup>11</sup> Hatyaoseta Pedro otyakaheta hoka nehena hawawaharenae: — Kaxiyani, aliterexe Enore axikaty anjo iyeheta maheta natyo Herodes nonitata, exahe judeunae nonitata hoka. Ikoiya awa hoka xoana xamaniya mokaha natyo.

<sup>12</sup> Pedro ana waiyekehalakehenere najikinita xane Maria hanako, João Marcos nityo hanako. Kahare haliti nali tyaonita. Hohisakoahitaha hoka iraexaitaha.

<sup>13</sup> Pedro xane hikoahati ana hoka mokotyati hati jihola hiye hoka wakahalo Rode nexalolo xane waiya exahita, xala xamani hoka. <sup>14</sup> Semehena atyo, Pedro xako sema hoka ihalahalo. Maisa majiholatita hekoti hoka tema haikoaheta, “Pedro owene menanaka”, nexa maheta ihiyeha.

<sup>15</sup> Hatyaoseta nexaha ihiye: — Awa hihatyahalo!

Xakore hoka aiyatolotyao: — Aliterexe naokita.

— Kala ekaxaikotyase anjo — nexaha.

<sup>16</sup> Hatyo nase Pedro mokoita hati jihola hiye. Ekakoi-ta xane majiholatyaha hati jihola, waiyehenaha atyo, Pedro terota atyo hoka hakaharetyoaha.

<sup>17</sup> Hatyaoseta Pedro aimenekotyati enomanaha hakahe kakoa, mema tyaonaha maheta. Mema tyaonaha hoka xakai ihiyeha Enore niyanehetene berexo akota. — Maika xiyakai hatyo tahi Tiago hiye, exahe haiyanae iraitu tyakekotere-nae hiye — nexa. Hatyohekota xanehitiya hako xeta.

<sup>18</sup> Ferakoa hoka sorarenae waiyaosetya Pedro hoka maira, tatakoaha, maisa waiyekehalakita nikare Pedro tyaohenere akiti enomanaha hoka. <sup>19</sup> Hatyaoseta Herodes axikatyati haliti hoka tawehetehene. Xakore

hoka maisa kaokehenahititene. Hatyaoseta Herodes, axalihenere ekaxaikotyasena sorarenae najikinita, haiyanae wakatya aisaha maheta hatyo sorarenae.

Hatyo najikinita Herodes xaneheta Judéia koa nalita, xane tyaona wenakalati Cesaréia nali.

### Herodes Kamane Tahī

<sup>20</sup> Hatyaoseta xekohaseti Herodes ehare wenakalati Tiro, Sidom tyaoniterena hiye. Hoka kahare xaneha waiyahene maheta. Xane irae ha hotohare Herodes hana kaxaikotyasehare Blasto nexare kakoa, kasani kahinaetyahene aokahita. Hatyaoseta xane irae ha Herodes kakoa maisa iniyalahare mokahitene maheta, Herodes waikoherakoata taita nakairati ewaikoheraha nali kaokita hoka.

<sup>21</sup> Hatyaoseta Herodes aimenekotya enomanaha hoka hatyo ferakenehena isoa haimako xekohaseti nimako, tyoka haokahakala koa hoka waha irae ihiyeha.

<sup>22</sup> Hoka hatyo halitinae kawiyatyaha: — Maisa atyo haliti xini irae ta, enore atyo irae ta — nexaha.

<sup>23</sup> Hatyo xowakita Enore nalitare anjo ahokakatya Herodes, maisa aiminijita Enore hoka. Ahokakatene hoka xoxohi tyaona ihie, nisene hoka waini.

<sup>24</sup> Hatyo najikinita Enore niraine tahi xaorekoa, exahe kaxakaisaka hakakoare. <sup>25</sup> Barnabé, Saulo xoaha miyatyaha hahateneha Jerusalém nali hoka haikoahenahitaha Antioquia nali. Nolakaha João Marcos.

### Barnabé Saulo Xoaha Kaxaxikatyaka Hakaha Maheta

**13** Antioquia nali iraiti tyakekoterena koni iraiti xakaisaseharenae, xaotyakisatiyena tyaonita: Barnabé, Simão Negro nexarexe, Lúcio, Manaém, Saulo xoaha. Lúcio atyo Cirene nalitare. Manaém atyo xekohaseti Herodes kakoa haxawalita kaxanaityakaha. <sup>2</sup> Haxowaka iraexatyahitaha Enore hiye manakairahareta hoka hatyaoseta Isekohaliti Waiyexe nexa ihieha: — Haware xamoka nomani Barnabé, Saulo xoaha hoka hakaha hateniti. Hatyo niyahare naokahene nomani.

<sup>3</sup> Hatyaoseta manakairahareta iraexahenahitiyaha, mokaha hakaheha Barnabé, Saulo xoaha seri heno Enore hatene waiye hakaha maheta hoka jinakahene hoka xaneha maheta.

### Ehateneha Chipre Nali

<sup>4</sup> Hatyaoseta, Isekohaliti Waiyexe axikatya Barnabé, Saulo xoaha hoka xaneha wenakalati Selêucia nali. Hatyo nalita kanowa kalorexe ako xaneha iyolirotikoa Chipre nali xeta. <sup>5</sup> Xane kaokaha wenakalati Salamina nali hoka xakaihenaha Enore niraine naliyerenae hiye judeunae xahohisakoatyakala hanako. João Marcos kahinaetyahitene iraiti exakainiha hiye. <sup>6</sup> Hatyaoseta jiyaha katalatyaha hatyo iyolirotikoa hoka xane kaokaha wenakalati Pafos nali.

Hatyo wenakalati nali ahalakoatyaha hatya judeu Barjesus nexarexe. Haholiharexe atyo, iraiti xakaisasehare aokowita xakore hoka maoseraita. <sup>7</sup> Barjesus

atyo kalorexe Sérgio Paulo hinaehare. Hatyo Sérgio Paulo atyo Chipre nali xekohaseti tyaonita. Waiyore, irihare ahekotita. Hatyaoseta hatyo xekohaseti kawisa Barnabé, Saulo xoaha, sema aokowita Enore niraine hoka. <sup>8</sup> Hoka hatyo haholiharexe Elimas kahalakohare Jesus niraine kakoarenai kakoa. Elimas atyo enexare grego xako. Maisa xekohaseti tyakeko Jesus tahi akiti aokare hoka kahalakoahare ekakoaha.

<sup>9</sup> Hatyaoseta Saulo iraihena. Paulo tehitiya atyo masakare kaexaretyahitene. Isekohaliti Waiyexe masakare kaxaehakoretene hoka kintya wahakotya Elimas ana hoka nexa: <sup>10</sup> — Tihanare ityani, tyoty waiyexe nahalakoahare, haliti ewaxirahare, maoseratyalie! Xoana hoka maisa hahalakisare iniyalahare hománe hoka Enore xaotyakiraho waiyexe kakoa kaxaotyakisaka haokare? <sup>11</sup> Kalinite iniyalahare mohana hiso hoka himaxosehare hisaohena wahakiya, maisaiya hiyaiyehitita kamai xaokanala — nexa.

Nexa taita hoka Elimas haoti makehekoa tyaona, hoka hakakoahena hatya xahita, ekahe hiye otokene hoka otokahisene maheta. <sup>12</sup> Xekohaseti Sérgio waiya hatyo nikare hoka tyakeko, hakaharetyoa exaotyakira Enore tahi akiti kakoa.

### Ehateneha Antioquia Pisídia Koa Nali

<sup>13</sup> Hatyaoseta Paulo hahinaeharenae kakoa xane isoaha kanowa kalorexe ako, xanehenahitaha Pafos nalita. Xane wenakalati Perge nali xeta Panfília koa. Xane kaokaha hoka hatyo nalita João Marcos halakisahene hoka haikoaheta Jerusalém xeta. <sup>14</sup> Hatyaoseta xanehenahitiyaha Perge nalita hoka xane kaokaha wenakalati Antioquia nali Pisídia koa.

Sábado xowaka xane judeunae xahohisakoatyakala hanako isoaha hoka tyokaha. <sup>15</sup> Hatyoako tyaoniterena Moisés xairala, iraiti xakaisaseharenae baberaxa xoaha kaixaretyaha hotohare hoka hatyo najikinita hatyo xahohisakoatyakala hana xekohaseharenae kawisahene: — Nohinaeharenai, xoare xamani xirai xaokowita hoka witya xiraihena kalikini hoka xaihala-halinikisa wiso — nexaha.

<sup>16</sup> Hatyaoseta Paulo tityoa hoka hakahe kakoa aimenekotya enomanaha hoka mema tyaonaha maheta. Hoka nehena: — Israel hotyalinae, exahe xiso haiyanae majudeuneharenae ali Enore awaititerena hoka xasemehena. <sup>17</sup> Toahiya Israel nEnorexa wahetakomaniyerenae haomanere aoka. Egito nali tyaonahitere xowaka hisoaka mokahene. Nalita iye-henahitene haiyaterere kakoa. <sup>18</sup> Hatyo halitinae tyaonaha maharexakiti 40-terehokoane. Maisa Enore xakore aokitere akereta tyaonareha hoka maisa emaxahalikisahitene. <sup>19</sup> Hatyaoseta xane kaokaha Canaã waikohera. Enore mawenekoaretya 7-hotyali haliti hatyo nali hoka Israel hotyalinae waikohe waikatehare tyaonaha. <sup>20</sup> Hatyaoseta 450-terehokoane tyaonaha hatyo waikohekoa.

— Hatyo nase ekaxaikotyasenaia, ewatyalisasenaeha aotyakisahitene, heko Samuel tyaonitere kijiya.

<sup>21</sup> Hatyaoseta axaha xekohaseti haomana hoka Enore

moka Saul enomanaha exekohaseha maheta. Saul atyo Quis ityani, Benjamim hotyalihare. 40 tere-hokoane exekohaseha tyaona. 22 Hatyaoseta Saul emaisaheta hoka Davi moka exekohaseha maheta. Nexa Davi xaokaka: “Jessé ityani Davi atyo waiyeta no-mani, nawaiyeta xoaha enomana. Naokitere akere-taite tyomehena”, nexa.

23 — Hatyaoseta wahehena hoka hatya Davi jikola-hare tyaona, Jesus. Enore mokene Israel hotyalinae niyaseheta maheta, ekoamaniya tyaonaha maheta iraihenere akere-ta. 24 Jesus tyoanene nahetakota João Batista xakaita iraiti Israel hotyalinai hiye halakisaha iniyalahare háomaneha, exahe hoka kabatixatyaha maheta. 25 João haxakaini okoi halakihena hoka nexa halitinae hiye: “Xala xaokita natyo? Maisa atyo xatyahitere xini natyo. Najikinita atyoite tyohena. Hatyo atyo noxahere hoka maisaiya natyona alyakere ikijitini nanohi hekoti naolikita”.

26 — Xasemehena, nohinaeharenae Abraão mokose-harenae, exahe xiso majudeuneharenae awaititerena-e Enore. Xasemehena, exe iraiti wityoty womanere ma-heta kaxaxikatyaka waiyexe maniya moka maheta wiso. 27 Aliterexe Jerusalém nali tyaoniterena-e, exahe exekohasenaiha hoka maisa waiyekehalakita Jesus enomanaha, motya maisa haliti niyasehareheta xini aokahita. Exahe tehitiya hoka maisa iraiti xakaisase-harenae niraine waiyekehalakita enomanaha, sábadó nihatyaka xakore kakaixaretyakita enomanaha hoka. Maisa waiyekehalakere enomanaha hoka Jesus xaisa-ka aokaha. Koxakereharenae xaokalaoseta mokahene.

28 Maisa xakore xoare xemere hoka aisahene aokowiyahita hoka Pilatos hiye exaisaka aokaha. 29 Hatyaoseta Iraiti Waiyexe nanekoa kaxairatyake-henere etahi akere-ta mokahene. Hatyo najikinita atyal-ihose xaimaholatyaka hiyeta iyehenahitene hoka ko-latyahene, xane mokahene xawatyakalati nitini ako. 30 Xakore hoka Enore ekasekhetene. 31 Kahaliki kaotyakeheta hahinaena ana, Galiléia ta xanehena Jerusalém xeta hoka exema xanehenerena-e ana. Ka-likini atyo hatyona-e Jesus waiyasehare tyaona Israel hotyalinae koni hoka Jesus tahi irateta ihiyeha.

32 — Kalikini wiso ali Iraiti Waiyexe wiyakai xihye maheta. 33 Enore tyoma womana wahetakomaniyere-nae kakoa iraitere akere-ta. Hatyo atyo ekasekiheta Je-sus. Hiyaiya, exakerexe kaxairatyaka Salmo nanekoa 2 hiye:

Nityani hiso hoka Hexe notyaona kalikini.

34 — Exakere Enore Jesus ekasekhetehenere tahi aki-ti irae, exahe eháre matokomenene akiti hoka:

Davi kakoa niraihenere akere-taite waiyexe maniya hikaxomokaka.

35 — Nexa tehitiya, hakiti Iraiti Waiyexe nanekoa wakaexaretya:

Maisaite hiwakanehare waiyexe háre hahalakisa hoka tokomita.

36 Paulo nehitiya: — Aliterexe atyo Davi Enore aokitere akere-ta tyoma kasetatere xowaka. Hatyo na-jikinita waini hoka kaxafityaka hahetakomaniyerenai

xawatyakala hijiyita hoka tokoma atyo eháre. 37 Hoka Enore ekasekhetehenere atyo maisa tokomita haka-mane xowaka.

### Waiyexe Maniya Nawenatyakeheta

(Atos 4.11-12; 16.27-33; Romanos 4.6-8; 6.23)

38 — Nohinaeharenae, waiyira xasema iraiti aliterexe Jesus hiyeta kaxakaisaka, iniyalahare kahalakisaka ho-ka kamaotyanyakeheta maheta. Hatyo akiti kax-akaisaka xihye. 39 Xasema tehitiya: xala xamani tyakeko hoka enómane iniyalahare kamaotyanyake-heta. Hoka Moisés xaotyakira atyo maisa emaisa-hetere iniyalahare wenati.

40 — Hiyeta hoka xirihare waiya aliya hoka koxakere-harenae niraine aosetaiyatya xisaona:

41 Xiyaiyehena, xiso koexahalijiterena-e. Ximairaita, ex-ahe ximaiyare. Hiyaiya, kalikinite notyomehena hatya xalini hare xakoreya hoka hatyaiya xakaini xihye ho-ka maisa xityakekota.

42 Paulo, Barnabé xoaha hikoahetehena ho-hisakoahitere hekota hoka hatyo halitinae hatyotare sábadone tyohenahitiyaha hoka hatyo xakita xakaihi-tiyaha ihiyeha aokaha. 43 Hohisakoahitere najikinita ka-hare judeunae, exahe judeu xaotyakiraho xema tyao-henerena-e tyakekoha Paulo, Barnabé xoaha xaotyaki-ra. Hatyo Jesus niraine kakoarenai irae ha ekakoaha ai-halahalinikisahene hoka Enore xawaiyera xema heko tyaonaha maheta.

44 Haxowaka sábadone hitiya hoka komita ene we-nakalati tyaoniterena-e tyoty hohisakoaha semaha maheta Enore niraine. 45 Hoka judeunae waiyaha hatyo hisoakere halitinae hoka okoawahareha. Ehare-ha hoka hatyaoseta Paulo niraene kakoa kahalakoa-hareha hoka kirawanahene.

46 Xakore hoka Paulo, Barnabé xoaha aiateretyoaha hairaineha kakoa: — Xiso judeunae ana hotohare atyo kaxakaisaka Enore niraine maheta. Hoka maisa xase-maxematya, maisa xaokarene xomana, maisa wenati matyotenehare xaokare xomana hoka wahalakisaite xiso hoka wiyane majudeuneharenae hiye wiyakai Iraiti Waiyexe. 47 Exakerexe Enore aoka wihiye iraiti xakaisasehare xaihako maniyata:

Xaokanatyakalati akere namoka hiso halitinae ana hoka hihiyeta hakakoare haliti waiyexe maniya kax-omokakeheta maheta.

48 Majudeuneharenae semaha hatyo iraiti hoka ihala-hareha, waiye enomanaha Xekohaseti tahi akiti. Waiye enomanaha hoka tyakekoha Enore niraine menane-haliti aohenerenai Enore. 49 Enore niraine xaorekoa hakakoare hatyo nali.

50 Xakore hoka judeunae matyakekotiterenai ehare-ha hoka xane irae ha wenakalati waikateharenai hiye, exahe majudeunehalonae xekohasetironae Enore tyakekoterena-e hiye. Hatyohekota xalijinihare tyaona-ha Paulo, Barnabé xoaha xahita hoka hatyo nalita axikahenahitene. 51 Hoka Jesus niraine kakoarenai mokotyahatyaha hakijitininaiha waikohe exoaki-henahitaha, maisa waiyeterere iniraeneha aimenekoty-

ha maheta. Hatyaoseta Paulo, Barnabé xoaha xaneha wenakalati Icônio nali xeta.

<sup>52</sup> Xakore hoka Jesus xema maniya tyaoniterenae atyo ihalahare tyaonahitaha, Isekohaliti Waiyexe kaxai-hakoretyahitene xoaha.

#### Icônio Nali Xakaihakatya Iraitu Waiyexe

**14** Icônio nali hoka nikareta tyaohenahitiyaha. Paulo, Barnabé xoaha xane isoaha judeunae xahohisakoatyakala hanako irahenahitiyaha irae ahitere akereta, hoka kahare judeunae, majudeuneharenae hare tyakekoha iniraineha hoka tyaonaha Jesus xema maniya. <sup>2</sup> Xakore hoka judeunae matyakekoneharenae aisatanakotyia majudeuneharenae hoka Jesus xema maniya tyaoniterenae kirawaneha. <sup>3</sup> Jesus niraine kakoarenai waha tyaonaha Icônio nali, aiyateretyoahitaha haxakainiha Xekohaseti tahi akiti kakoa. Enore hotikijita hawaiyexehare aliterexe tahi exakaihakalaha hiyeta. Iyateliti ijita Jesus niraine kakoarenai ana hoka waiyexe maomakahare tyomahitaha iniraine katyakekotyaka maheta.

<sup>4</sup> Hoka halitinae wenakalati tyaoniterenae hahekore xakini ahekotyaha. Haiyanae judeunae xema tyaonita, haiyanae Jesus niraine kakoarenai koamaniya tyaonita xoaha. <sup>5</sup> Hatyaoseta majudeuneharenae, judeunae xoaha ahekotyaha hanityohalitiranae kakoa hoka xalijiharehenahitaha Jesus niraine kakoarenai hiye. Maisa waiye mohenahitahene, sehali kakoa mokotyahene aokowiha. <sup>6</sup> Hoka Paulo, Barnabé xoaha semaha hatahiha akiti hoka tekoahenahitaha Listra, Derbe xoaha nali xeta Licaônia koa, exahe hatyonai haliyita wenakalati tyaoniterenae nali. <sup>7</sup> Hatyo nali xane kaokaha hoka xakaihenahitiyaha Iraitu Waiyexe tahi.

#### Ehateneha Listra, Derbe Xoaha Nali

<sup>8</sup> Hatyo Listra nali hatya haliti tyaonita, maisa waiyehaliti xini. Tyokita takita, maetonanehare hoka. Nikarexe terota tyaona tyaohenere hekota, maisa tonareta hekoti. <sup>9</sup> Hatyo maitonanehare Paulo niraine semita hoka tyakekoha. Paulo waiyene hoka kaxaiyate-likisakehetere hoka hatyaoseta wahakotyia enomana hoka nexa kinatyaxa: <sup>10</sup> — Hainakoa! Hatityoahetehena!

Nexa hoka hatyo haliti halaisoa, tityoaheta hoka toheta.

<sup>11</sup> Waiya halitinae, Paulo nikare tyomehenere hoka kawisaha haxakoha: — Enorenne kaoka womana halitinae akerehare!

<sup>12</sup> “Júpiter”, nexaha kaixaretyaha Barnabé, “Mer-cúrio”, nexaha kaixaretyaha tehitiya Paulo. Paulo atyo iraitu xakaita ihiyeha hoka nikare kaexaretyahene.

<sup>13</sup> Júpiter anere iraxatyakalati hana wenakalati nahalakaita tyaonita. Hiyeta hoka sacerdotu Júpiter anere xane kolatita bowi, exahe seriti hoko iyiti kakoare hoka mokita wenakalati xisoakala nali. Hatyo halitinae aisa kirakahare aokowiyahitaha fetatyaha Paulo, Barnabé ana xoaha.

<sup>14</sup> Hatyo hinama Jesus niraine kakoarenne semaha hatyo tahi hoka halalakaha haimaha haxamaiko-hareneha hoka tema xaneha halitinae koni hoka kawiyatyaha enomanaha: <sup>15</sup> — Xoana hoka nikare xisaona? Xiso akereheta haliti tehitiya wiso — nexaha. — Ali wisaonita wiyakaihakatya Waiyexe Iraitu maheta xihiyeha hoka xahalakisa maheta exehare nikareterenae hoka Enore menanehaliti koamaniya xisaona maheta. Enokoa, waikoa, one, tyotyia xolalini harenne nomasehare koamaniya xisaona maheta. <sup>16</sup> Toahiya Enore maisa watyaliye halitinae. Aliyakere xamani hawenane kakoa tyaona aokowita hoka nikare tyaona hawenane heko maheta. <sup>17</sup> Xakore hoka maisa haliti ana mahotikirere waiyexe háomanenne. One enokoata axikatya hoka hanakatihaliti aihatikijita enaose akehena hoka. Nakairati harenne tehitiya ijita, exahe hoka kalore aihalahalinihijita xiso — nexaha.

<sup>18</sup> Hatyo iniraineha najikinita hekota aisaha kirakahare hoka fetatyaha enomanaha aokowiyahitaha. Hoka aiyaterityoa exahitaha, kotare maxaisakahare enomanaha aokahitaha.

#### Paulo Kamokotyaka Sehali Kakoa

(Atos 16.22-24; 20.19; 21.27-36; 22.22; 23.12-15)

<sup>19</sup> Hatyaoseta haiyanae judeunae tyoaha Antioquia nalita, Icônio nalita. Aisatanakotyahitaha halitinai hoka kahinaetyahene hoka mokotyaha Paulo sehali kakoa. Hatyaoseta nolokehekoatyahene haware wenakalati nonitata hoka halakisahene, motya atyo waini aokahitaha.

<sup>20</sup> Hatyaoseta Jesus koamaniya tyaoniterenae aho-hisakoatyakakoa hoka ehokohaliya tityoaha hoka kaseheta enomanaha. Tityoaheta hoka xanehitiya wenakalati xeta. Kamaetali hoka Paulo, Barnabé xoaha xanehitiyaha wenakalati Derbe nali xeta.

#### Haikoahenahitaha Antioquia Síria Koa Nali

<sup>21</sup> Paulo, Barnabé xoaha Derbe nali xakaihenahitiya Iraitu Waiyexe tahi akiti hoka hatyo nali tyaoniterenae semaha iraitu hoka haiyanae Jesus koamaniya kahare tyaonaha. Hatyaoseta haikoahenahitaha Listra, Icônio, Antioquia Pisídia koa nali xeta. <sup>22</sup> Aihalahalinihikisa, aotyakisaha harenne Jesus koamaniya tyaoniterenae masakare tyakekoha maheta. — Maikaite iniyalahare hotohare wikaxomokaka hoka hatyo najikinitaite wiyane wikaoka Enore nawenakala nali — nexaha ihiyeha.

<sup>23</sup> Hahotyali konita, hahotyali konita xakini iraitu tyakekoterenne nityohalitiranae moka enomanaha. Manakairaharahitaha iraxatyahitaha hatyo inityohalitiranaiha tyaohenere ana. Xekohaseti maniya tyaonahitaha hoka iraxatyahitaha Xekohaseti kaxaiko maheta tyakekoterenne nityohalitiranae.

<sup>24</sup> Hatyaoseta Paulo, Barnabé xoaha xanehenahitaha enonyahitaha hoka katalatyaha Pisídia koa, xane kaokaha Panfília koa. <sup>25</sup> Xakaihaha iraitu wenakalati Perge nali. Hatyota xanehenahitiyaha Atália nali one kilih. <sup>26</sup> Hatyo nalita xaneha kanowa kalorexe ako An-

tioquia xeta Síria koa nali, hetati kaxaxikatyake-henahere Enore hatene hiye hakaha maheta nali. Miyatyaha hahateneha hoka haikoahenahitaha hatyo nali xeta.

<sup>27</sup> Nali kaokehenahitaha hoka ahohisakoatyakakoaha Jesus koamaniya tyaoniterenae kakoa hoka xakai-hakatyaha tyotya Enore tyomitere ihiyetaha tahi akiti. — Exakere majudeuneharenae tehitiya tyakekoha Iraitu Waiyexe Enore xaokalita — nexaha.

<sup>28</sup> Hatyaoseta waha tyaonaha hahinaeharenaiha kakoa Antioquia nali.

### Xahohisakakoati Jerusalém Nali Tahu

**15** Hatyaoseta haiyanae judéia koa tarenae tyoa kaokaha Antioquia nali hoka aotyakihenaha Jesus xema maniya tyaoniterenae: — Maisaiya xomanere milihi kaxaikotyakita Moisés xaotyakiraho aokitere akereta hoka maisaiya aliyakere xikaiyakihiti-ta iniyalahare nonitata.

<sup>2</sup> Hoka maisa Paulo, Barnabé xoaha hiye waiyeta hoka kinatyaha irai kakoaha hatyo tahi akiti. Hatyaoseta ahokotyaha hoka Paulo, Barnabé haiyanae xoaha tehitiya xaneha aokaha Jerusalém xeta, hatyo tahi akiti ahokotyaha maheta Jesus niraene kakoarenae, tyakekohatiyena nityohalitiranaia xoaha kakoa.

<sup>3</sup> Hatyaoseta Antioquia nali tyakekoterena axikatyahene Jerusalém nali xeta. Jiyaha Fenícia koa, Samaria koa harenae hoka xakaihaha nali tyaoniterenae hiye Enore koamaniya majudeuneharenae tyaonitere tahi. Hoka nali tyaoniterenae tyakekoterena ihalahareha exakainiha kakoa.

<sup>4</sup> Hatyaoseta xane kaokaha Jerusalém nali hoka naliyerenae tyakekoterena, Jesus niraine kakoarenae, inityohalitiranaeha xoaha waiye mokahene. Hatyohokota xakaihakahenaha Enore xoalini hare exaihakoha maniyata tyomitere.

<sup>5</sup> Xakore hoka haiyanae fariseuna, tyakekoterena tehitiya, tityoa hoka nehenaha: — Maika majudeuneharenai nomanere milihe kaxaikotyaka, exahe tehitiya hoka Moisés xaotyakiraho xema tyaonaha.

<sup>6</sup> Hatyaoseta Jesus niraine kakoarenai, inityohalitiranaia harenae ahohisakoatyakakoaha hoka ahokotyaha maheta hatyo tahi akiti. <sup>7</sup> Waha iraesekoa-henahere najikinita Pedro tityoa hoka nehenaha: — Nohinaeharenae, koxaka waiyekehalakita xomana toahiyita Enore aoka natyo xinekonita noxakai Iraitu Waiyexe maheta majudeuneharenae hiye hoka semahene hoka tyakekoha maheta. <sup>8</sup> Enore atyo waiyita makere tyotya wiyahakola hoka majudeuneharenae tehitiya aokita haomana. Hiyaiya, Isekohaliti Waiyexe isa enomanaha isehenere womana akereta. <sup>9</sup> Maisa ininae hekoti hawarehare tyomita ekakoaha, exahe wikakoa hoka. Maotyaneheta iniyalahare enómane ityakekoneha hiyeta.

<sup>10</sup> — Nikare hoka xoana hoka Enore xahasakaharetita? Xoana hoka kolare akere xamoka xaokowita kalini tyakekohenerena heno? Hiyaiya, maisaiya wisonae hekoti, wahetakomaniyeharenae hekoti ana mahow-

itihareta. <sup>11</sup> Maisa nikare xini. Wityakeko hoka waiyexe maniya wikaxomokaka Xekohaseti Jesus nawaiyexehare hiyeta tyaochenahere akereta — nexa Pedro.

<sup>12</sup> Hatyaoseta tyotya nali tyaoniterenae mema tyaonaha hoka semaxematyaha Barnabé, Paulo xoaha xakaihakala Enore exaihakoha maniyata maomakahare tyomitere majudeuneharenae koni.

<sup>13</sup> Halakisaha hairaineha hoka Tiago nehenaha: — Nohinaeharenae, xasemehena: <sup>14</sup> Simão koxaka halakisa hairaine haxawaiyekehalakala, majudeuneharenae hotohare Enore anere tyaochenere akiti. Hiyaiya, enekoni-hata hahotyali haomanere maheta aoka. <sup>15</sup> Iraitu xakaisaseharenae iraehenere akereta. Exakere Iraitu Waiyexe nanekoa:

<sup>16</sup> “Hatyo najikinitaite nahaikoaheta”, nexa Xekohaseti. “Hoka waitarite notyomehitiya Davi hana, ehana exoachenere akereta. Nahohisakoahetaite ehohoxona hoka notyomehetene”, nexa.

<sup>17</sup> “Nikare namoka hoka tyotya haliti hotyalinae naoka nomani hoka nomaniye hotyali tyaona maheta hoka Xekohaseti xemaite tyaochenaha”. Exakere nexa Xekohaseti,

<sup>18</sup> toahiyatita exeharenae tahi xakai.

<sup>19</sup> — Exe atyo noxahekali: maisaiya wahowitiharekijita majudeuneharenae Enore xema maniya tyaochenere. <sup>20</sup> Kala maisa hoka waxairatya enomanaha hoka waxikatya enomanaha hoka maisa nisahitaha eteti kafetatyakitere enore metalaharenae anere. Exahe hoka maisa ohiro kakoa iniyalahare tyomahita. Exahe tehitiya maisa nisahitaha kirakahare kakirolokasetyaka kaxaisakiterehare, exahe timalati hoka maisa kanakairahitaha.

<sup>21</sup> — Hiyaiya, Moisés xairahenere iraitu toahiyatita kakaexaretyakita kaxawaiyekehalakatyakita judeunae xahohisoakoatyakala hanako nihatyaka, sábadu nihatyaka, exahe iniraine kaxakaihakatyakita wenakalatinae nihatyaka — nexa Tiago.

### Babera Majudeuneharenae Anere Tahu

<sup>22</sup> Hatyaoseta Jesus niraine kakoarenae, inityohalitiranaeha, exahe tyotya tyakekoterena ahokotyaha hoka hinamanae hanekonitareha mokaha, Silas, Judas Barsabás xoaha, hoka axikatyahene Paulo, Barnabé xema Antioquia xeta. Hatyo hinamanae waiye kaxaiminisakita tyakekoterena hiyeta. <sup>23</sup> Hatyohokota axikatyaha baberane exemaha exakerexe:

Wiso, Jesus niraine kakoarenae, exahe tyakekotere-nae nityohalitiranaeha, xihinaeharenae, waxikaxatya wiraine xiso wihinaeharenae majudeuneharenae ana, Antioquia nali tyaoniterenae Síria koa Cilícia koa xoaha tyaoniterenae ana.

<sup>24</sup> Wasema winekonitarenae tyoa nali hoka hairaine kakoa kaxiye mohenahere xawenane xomana. Xakore hoka maisa wirainexa xema xini nikare tyaonaha.

<sup>25</sup> Hiyeta hoka wityotya nikare wahekoty hoka hinamahare waxikatya xomana. Tyoahaite wixiyakawala Barnabé, Paulo xoaha xema,

<sup>26</sup> etake komita kaxaisakehenerenae Jesus Cristo hatene xema hiyeta.

<sup>27</sup> Waxikatya xomana Judas, Silas xoaha iraeaha xikakoa maheta exe waxairatitere xomana tahi akiti xiháre hiyeta.

<sup>28</sup> Isekohaliti Waiyexe, wiso xoaha maisa howitihare xawenane wamoka waokowiye. Xoalini hare waiyexe taita atyo kaomaka waokita. Hatyoharenai maisaiya aliyakere maomakita:

<sup>29</sup> Awa atyo kirakahare efetatyakahare enore metalaharenae anere xanihena, exahe hoka awa atyo timalati xikanakaira, exahe kirakahare kakirolokasetyaka kaxaisakiterehare awa atyo xanisa hatyohare. Awa atyo iniyalahare xisoma ohiro kakoa. Exeharenae xisomita hoka waiye xisaona. Maika waiye xikinaterere xisaona waokita, eko xoaha.

<sup>30</sup> Axikatyaha hanekonitarenae hoka xaneha Antioquia xeta. Xane kaokaha hoka ahohisakoatyaha tyakekohatiyenae hoka babera isaha enomanaha.

<sup>31</sup> Kaixaretyaha hatyo babera hoka ihalahareha, hatyo iraiti aihalahalinihikisahene.

<sup>32</sup> Judas, Silas xoaha iraiti xakaisaseharenae atyo hoka waha iraeaha ekakoaha. Xakaihahitaha iraiti Jesus xema maniya tyaoniterenai hiye, aiyaterekisahitene, aihalahalinihikisahitene xoaha. <sup>33</sup> Waha tyaonaha ekakoaha hoka xanehenahitaha aokowiha hoka ihinaeharenaiha waiye exanenehenahitaha aokaha hoka axikahenahitene exaxikatyasenae ana. <sup>34</sup> Xakore hoka Silas atyo hekota enaliahita, maisa xaneheta aokowita hoka.

<sup>35</sup> Paulo, Barnabé xoaha waha tyaonaha ekakoaha Antioquia nali. Hatyonae, haiyaharenae xoaha xakaihakatyaha Iraitu Waiyexe, aotyakisaha tyakekohatiyenae nali tyaoniterenae.

#### Paulo, Barnabé Xoaha Haware Xakini Tyaona

<sup>36</sup> Hatyo najikinita Paulo nehena Barnabé hiye: — Nika wahaikoaheta hoka wiyaiyeheta wihinaeharenae wenakalati nihatyaka wiyakaihenerekoanae iraiti Jesus tahi akiti. Xoana waiye xamani tyaonahitaha hoka — nexa.

<sup>37</sup> Barnabé noloka aokowi João Marcos <sup>38</sup> hoka maisa Paulo wini hekoreta. Koxaka nikare nolokahene iraiti hiye kahinaetyahene maheta hoka holinita halakisahene, Panfília koa nalita hoka haikoaheta enonyahitaha hoka. <sup>39</sup> Hatyo hiyeta kintatyaxa iraikakoaha. Kintatyaxa iraikakoaha hoka xaoreha. Barnabé noloka João Marcos, isoaha kanowa kalorexere ako hoka xaneha iyolirotikoa Chipre nali xeta.

<sup>40</sup> Hoka Paulo Silas hahinae maheta noloka hoka xaneha. — Maika Enore kaxaiko xiso — nexaha ihinaeharenaeha ihiyeha hoka xaneha.

<sup>41</sup> Paulo Síria koa maniya Cilícia koa jiyaha hoka aihalahalinihikijita Iraitu Waiyexe xema maniya tyaoniterenae.

#### Timóteo Xane Paulo Silas Xoaha Xema

**16** Ekakoita Paulo xane kaoka wenakalati Derbe, Listra xoaha nali. Listra nali hatya haliti tyaonita, Timóteo nexarexe, Jesus koamaniya tyaonita. Inityo atyo judeunero hoka enexe atyo Grécia yere. <sup>2</sup> Tyoty ihinaeharenae Jesus koamaniya tyaoniterenae Listra, Icônio nali tyaoniterenae waiye irae ahitaha Timóteo tahi akiti. <sup>3</sup> Hoka Paulo noloka Timóteo aokowita hoka enomanere milihe aikoty. Paulo xanehenere nali akitiya judeunae semita Timóteo nexere Grécia yere hoka hatyo hiyeta nikare mokene.

<sup>4</sup> Tona, jiyahitaha wenakalatinæ hoka isahitaha babera Jesus xema maniya tyaoniterenae ana, Jesus niraine kakoarenæ, exahe tyakekohatiyenæ nityohalitiranæ Jerusalém nali ahekohenahere kakoa aotyakisahitene, tyaonaha maheta iniraenaha xema maheta.

#### Trôade Nali Paulo Kaxawaiyanikisa Hoka Waiya Haliti Macedônia Tare

<sup>5</sup> Nikare mokahitene hoka masakare tyakekoahitaha, kinaterere tyaonahitaha Xekohaseti koamaniya, exahe haiyanae tyotyaki ferakene tyakekoahitaha hoka hisoaka tyaonita tyakekohatiyenae.

<sup>6</sup> Hatyaoseta xanehenahitayaha Frígia, Galácia koa xoaha. Hoka Isekohaliti Waiyexe atyo maisa iraiti xakaihaha aokita Ásia koa nali. <sup>7</sup> Xane kaokehenaha Mísia koa nali hoka hatyaoseta Bitínia nali xakore xane aokowiha hoka maisa Jesus Nisekohare exaneneha aokita. <sup>8</sup> Hatyaoseta jiyaha Mísia koa, xane kaokaha wenakalati Trôade nali, one kaloxere kilihi.

<sup>9</sup> Hatyo xatini Paulo kaxawaiyanikisaka. Waiya hatya haliti Macedônia yere. Tityoita hoka nita: — Hisohena Macedônia xeta hoka hakahinaetya wiso — nexa.

<sup>10</sup> Nikare Paulo kaxawaiyanikisaka hoka wiyane rota waokowi Macedônia xeta. — Hiyaiya, Enore kawisa wiso naliyerenæ hiye wiyakai Iraitu Waiyexe maheta — wexa.

#### Filipos Nali Lídia Iraitu Waiyexe Xema Tyaona

<sup>11</sup> Hatyaoseta Trôade nalita kanowa kalorexere ako wiyane fihit iyolirotikoa Samotrácia nali xeta. Kamaetali hoka wiyane wikaoka wenakalati Neápolis nali one kilihi. <sup>12</sup> Hatyohekota wiyane wenakalati Filipos nali xeta. Filipos atyo wenakalati kalorexere, Macedônia koa tyaonita. Hatyo nali tehitiya atyo Roma yerenæ nawenakala. Nali wiyane wikaoka hoka akaiki ferakene wisaona.

<sup>13</sup> Hatyaoseta sábadu ferakene wiyane one haliya xeta. Motya nali judeunæ niraexatyakala aose waokita hoka. Wisoka hoka wiraihena nali ohironæ hohisakoitolonæ kakoa. <sup>14</sup> Hoka hatya ohiro enekonitarenæ semaxematita wiraine, Lídia nexalolo. Wenakalati Tiatira nalitalo, imiti waiyexe, misaxere betetyasero. Lídia koxaka Enore koamaniya tyaonita. Hatyaoseta Xekohaseti awaiyolonekisene hoka Paulo niraine



waiyekehalaka sema maheta. <sup>15</sup> Hatyaoseta tyotya ehanako tyaoniterenae kakoita kabatixatyakaha.

Hatyaoseta Lídia noloka wiso hoka nehena: — Xekohaseti koamaniyolo xaokita natyo hoka xisohena nohanyako xisaona — nexa wihiye hoka wiyane ehanako wisaona.

### Berexo Filipos Naliye Tah

<sup>16</sup> Haxowaka wiyanela iraexatyakalati aose nali xeta hoka tyoa ahalakoaty wiso hatya wakahalo. Tihanare kamilakoretita hatyo xoimalaloti hoka otita xoalini hare ahetakoti maniya. Hoka exekohasena kalore olo resebityahita exakaini hiyeta. <sup>17</sup> Hatyo xoimalaloti Paulo najikinita, wajikinita xoaha tonita hoka kawijita: — Exe halitinae atyo Enore maxaexahityakaharexe wakaneharenae. Xakaihahitaha iraiti: “Exakere xisaona waiyexe maniya xikaxomokakeheta maheta”.

<sup>18</sup> Nikare kawiyalijita wiso kahareki ferakene. Wahehena hoka Paulo emaxahalikihena hoka terehokoa wahakoty enomana hoka nexa tihanare hiye: — Jesus Cristo nexare kakoa wirai: hahikoahetehena exe xoimalaloti nonitata — nexa. Nexa hoka exowakita tihanare hikoa, xaneheta imilakota.

<sup>19</sup> Hatyaoseta hatyo xoimalaloti xekohasena amaikoharehena, maisa aliyakere resebehenahitaha exakaini hiyeta hoka. Ehareha hoka Paulo, Silas xoaha otokaha, nolokasekoatyahene wenakalati nekesekoa kalorexena nahalakoa. <sup>20</sup> Xane kaokaha ekakoaha wenakalati kaxaikotyaseharenae ana, Roma yerenaenirainexa kakoarenae ana hoka nehenaha: — Exe halitinae atyo judeunae, hoka tyomahitaha xoalini hare, exahe kahiraharhitaha ali wawenakalako hoka hahekore wawenane mokaha aokowiyahitaha.

<sup>21</sup> Aotyakisahitaha wiyaotyakisaka nonitata hawarehare. Roma yerenaenirainexa atyo wiso hoka maisaiya aliyakere wisaonita exaotyakiraha xema — nexaha.

### Mokonasetyaha Iraeti Kakoarenae

(Atos 9.15-16; 20.19; 21.27-36; 22.22; 23.12-15; 2 Coríntios 4.8-12)

<sup>22</sup> Hatyaoseta halitinae hohisakoa otokaha maheta Paulo, Silas xoaha. Exekohasenaeha halalakasekoatyaha inimanaeha hoka sorarenae hiye emokonasetyakaha aokaha atyakase kakoa. <sup>23</sup> Kahare mokonasetyaha hatyo hinamanae hoka xane mokahene berexotyakalati hanako. Iraeha berexotyakalati hana kaxaikotyasehare hiye hoka waiye kaxaikoahene maheta.

<sup>24</sup> Sema iniraeneha berexotyakalati hana kaxaikotyasehare hoka xane mokahene nekesako, exahe atyalihosena timenerena hiye olatyaha ikinolinaeha.

<sup>25</sup> Xakore hoka kala wahaxatihena hoka Paulo, Silas xoaha iraexahenaha, xerehenaha Enore ana hoka berexoako tyaoniterenae semaxematyahitene. <sup>26</sup> Xerahitaha ene hoka eharehenerota waikohe tatakohaeha, sehali hati hiyexe amoxomoxokisa. Hatyo xowakita tyotya jihorenae majiholatyoa, kamatiherahinae exolahinaiha irikotyasekoaheta.

### Xoanaiya Notyaona Hoka Nokaiyakheta?

(Atos 2.37-40; 22.16; 24.24-26)

<sup>27</sup> Hatyaoseta berexo hana kaxaikotyasehare kaose. Waiyehena atyo, berexo nitini jiholanae tyotya majiholatyoare taita. Motya atyo kokaxa berexoako tyaoniterenae tekoaheta aokita hoka kesekase iya hoka aisoawi aokowihena.

<sup>28</sup> Hoka Paulo kinatyaxa kawiyatya enomana: — Awaira atyo nikare hisaohena! Wityotya alita!

<sup>29</sup> Hatyaoseta berexo kaxaikotyasehare aokanatyaha enomana aoka hoka kaholawaka isoa enomanaha berexo hanako. Hakaoli kakoa xane tyoka Paulo, Silas xoaha kinoli haliya, tatakoka kalore. <sup>30</sup> Hatyaoseta xane hikoa ekakoaha menanaka hoka nehena: — Xoanaiya notyaona hoka iniyalahare nonitata nokaiyakheta? nexa.

<sup>31</sup> — Hityakekohena Xekohaseti Jesus hoka waiyexe maniya hikaiyaka, hexanityo hityaninae xoaha kakoa — nexaha ihiye.

<sup>32</sup> Hatyaoseta xakaihaha Iraeti Waiyexe ihiye, tyotya ehanako tyaoniterenae xoaha hiye. <sup>33</sup> Hatyo xowaka makiyeneta berexo hana kaxaikotyasehare waiye mohenahitene. Wairahenahene, tihaosehetehena emokotyakaosena ihiyeha. Hatyaoseta tyotya haiyanityo, haisaninae harenae kakoita kabatixatyakaha. <sup>34</sup> Hatyaoseta Paulo, Silas xoaha noloka hahanako xeta hoka tyaisahene. Haiyanityo, haisaninae harenae kakoita ihalahareha tyaonaha, Enore koamaniya tyaonaha hoka.

<sup>35</sup> Ferakoa hoka Roma yere xekohasetinae axikatya sorarenae iraiti kakoare berexo kaxaikotyasehare ana. — Hahalakihetehena exe halitinae hoka xanehenahitaha.

<sup>36</sup> Hatyaoseta berexo kaxaikotyase nehenaha Paulo hiye: — Xekohasetinae xihalakisaka aoheta. Nikare hoka xahikoaheta hoka waiye maika xiyaneheta — nexa.

<sup>37</sup> Xakore hoka Paulo nehena sorarenae hiye: — Maisa xoare harenae wisomare, exahe hoka Roma yerenaenirainexa tehitiya wiso. Xakore hoka maxemereharet mokonasetyaha wiso tyotya ehaotiha exahe mokaha wiso berexoako. Hoka kalikini axikahetaha wiso aokowihena hametene ahitaha. Maisa nikare xini. Maika xekohasetinae ali tyoa hoka iyeheta wiso berexo akota hoka ehokore — nexa Paulo ihiyeha.

<sup>38</sup> Hatyaoseta sorarenae xane hoka xakaihahene xekohasetinae hiye. Semehenaha atyo, Paulo, Silas xoaha atyo Roma yerenaenirainexa hoka mairaha.

<sup>39</sup> Hatyaoseta tyoa kaokaha enomanaha. — Kaxiyanira, nikare wamoka xiso — nexaha ihiyeha, haihareha. Aihikoahenahitahene berexoakota hoka aokaha exanenehenahitaha hatyo wenakalati.

<sup>40</sup> Hatyaoseta Paulo, Silas xoaha hikoaheta berexoakota hoka xaneha Lídia hana nali xeta. Hatyo nali kaokakakoaha hahinaeharenaiha kakoa hoka ihalahareha mokahitene. Hatyo najikinita xanehenahitaha hatyo wenakalati nalita.

### Ehateneha Tessalônica Nali

**17** Hatyaoseta Paulo, ihinaeharenae xoaha hoka jiyaha Anfípolis, Apolônia koa xoaha, xane kaokaha Tessalônica nali. Hatyo nali judeunae xahohisakoatyakala hana hoka <sup>2</sup> xane nali xeta hoka isoa. Nikare atyo Paulo nawenane hoka. Hanamaki sábadone Iraití Waiyexe kaxairatyakehenere tahi irae-sekoatya naliyerenae kakoa. <sup>3</sup> Paulo waiye awaiyekehalakaita enomanaha Enore Kalorexe Aohenere tahi akiti: — Nikare terota Enore Kalorexe Aohenere kaxemakawatikisaka hoka waini. Waini xakore hoka kasehetehtiyi. Exe Jesus noxakaitere xihiyi atyo Enore Kalorexe Aohenere — nexa.

<sup>4</sup> Paulo, Silas xoaha niraine haiyanae tyakeko hoka exema maniya tyaonaha. Kahare hisoaka Grécia nali tyaoniterenae awaiyetya Enore hoka tyaonaha tehtiyi Silas, Paulo koamaniya. Ohironae kalorexeneronae tehtiyi kahare tyakekoha hoka ekoamaniyaha tyaonaha. <sup>5</sup> Xakore hoka haiyanae judeunae matyakekotiterenae okoawahareha hoka ehareha ihiyeha hoka xaneha ahotyaho tawaha maheta xalijiniharexena xahita hoka Jesus koamaniya tyaoniterenae xahita xalijinihareha maheta. Xane ahohisakoatyaha xalijiniharexena hoka kahenehare mokaha hatyo koa wenakalati. Xane kaokaha Jasão hana nali hoka Paulo, Silas xoaha xahita tawaha, nolohenahitene haliti hisoakere koni maheta.

<sup>6</sup> Xakore hoka maisa kaokahitaha Paulo, Silas xoaha hoka xalijinihareha Jasão xahita hoka nolohehekoatyahene, exahe haiyanae iraiti tyakekoterenae harenae nolohehekoatyaha hoka xane hikoaha kalorexena nali ekakoaha hoka nexa kawiyatyaha: — Etake halitinae kaokenehana hoka kirasakahare tyaoniterenae wenakalati nihatyaka, kalikini ali kaokaha wawenakala. <sup>7</sup> Exahe Jasão hahanako mokahitene. Hatyonai maisa semaxematyareha xekohaseti Roma yere niraene. Hatya atyo kalorexe xekohaseti Jesus nexarexe aokahitaha — nexaha, kintyaxa iraeaha.

<sup>8</sup> Nikare irae hoka hisoakere haliti, exahe kalorexena hatyo iraiti semaha hoka maisa waiyeta ihiyeha hoka tyotya haliti kahare iraehekoatyaha. <sup>9</sup> Hatyaoseta kalorexena habakatyakaha aokaha hoka Jasão, ihinaeharenae bakatyahene hoka hatyaoseta halakisahene.

### Beréia Nali

<sup>10</sup> Hatyaoseta makehena hoka Paulo, Silas xoaha ihinaeharenae axikatyaha Beréia nali xeta. Beréia nali xane kaokaha hoka xaneha judeunae xahohisakoatyakala hana nali. <sup>11</sup> Nali tyaoniterenae atyo waiyexehare, maisa atyo Tessalônica tyaoniterenae akerehaha xini, sema atyo aokowiyahitaha iraiti. Ferakiti nihatyaka atyo waiye kaixaretyahita babera Enore niraene kakoa. — Xoana aliterexe xamani aokita Paulo, maisa xamani hoka — nexaha.

<sup>12</sup> Nikare kahare tyakekoha Paulo niraine, tyaonaha Iraití Waiyexe xema. Ekakoita kahare Grécia yerenai,

exahe Grécia yolonae kalorexeneronae hoka tyaonaha Iraití Waiyexe xema.

<sup>13</sup> Hatyaoseta Tessalônica nali tyaoniterenae judeunae semaha Paulo xakaini Enore niraine Beréia nali hoka tyoaha hatyo nali xeta. Nali xaneha aisananakotyaha Beréia nali tyaoniterenae hoka xalijinihare tyaonaha maheta Paulo, ihinaeharenae xoaha xahita.

<sup>14</sup> Hatyaoseta iraiti tyakekoterenae axikatyaha rota Paulo one kaloxere kilihi maniya. Xakore hoka Silas, Timóteo xoaha atyo hekota Beréia nali. <sup>15</sup> Paulo hinaena, kahawaonitaretiterenae xaneha exema Atenas kijiya. Hatyaoseta haikoahenahitaha Beréia nali xeta hoka Paulo niraine xakaiha Silas, Timóteo xoaha hiye, ihalahareha Atenas nali ahalakoahenahitene maheta.

### Atenas Nali

<sup>16</sup> Paulo atyahakaheta Silas, Timóteo xoaha xahita Atenas nali hoka waiya hatyo wenakalati nali kahare enore metalahare xaemenekotyaka hoka maisa waiyeta ihiyeha. <sup>17</sup> Hatyo hiyeta xane judeunae xahohisakoatyakala hanako hoka iraeata hatyo tahi akiti judeunae, majudeuneharenae Enore koamaniya tyaoniterenae hiye. Exahe ferakiti nihatyaka xane iraeata wetekokoa nali tyaoniterenae kakoa.

<sup>18</sup> Haiyanae xaotyakisatiyenae, epicureu, estóico xoaha aokahiterenae tehtiyi irae-sekoatyahitaha ekakoa. Axakakoahitaha hare. — Xoare nexa aokowita exe mawaiyorehare?

Haiyanae ekoaxatyahitene: — Motya xamanita hahotyaliharenae nenorexa tahi iraeata — nexaha. Nikare irae ahitaha, Paulo xakaita Jesus tahi akiti, exahe kamati kaseneheta tahi iraeata hoka.

<sup>19</sup> Hatyaoseta nolokahene Areópago aokahitere nali, kalorexena hohisakoahitere nali hoka axehenene: — Wasema waokowita hiyaotyakira waitare kalikiniye hiyakaitere akiti. <sup>20</sup> Xoalini hare hiyakaitere akiti maisa waiyekehalakere womana hoka hatyohare akiti wase-ma waokowita — nexaha. <sup>21</sup> Tyotya Atenas nali tyaoniterenae, exahe hahotyaliharenae nali tyaoniterenae hoka awaiyetyahitaha waitare iraiti hoka nikarahitaha. Semaha waitare hoka xakaihakatyaha mene aokowitaha hoka.

<sup>22</sup> Hatyaoseta Paulo tityoa Areópago nali hoka nehena ihiyeha: — Xasemehena, xiso Atenas tyaoniterenae: xikaenorexere, kahare xahekoita xenorexanai akiti kakoa. <sup>23</sup> Hiyaiya, nojiyehena ali wenakalati koa hoka xahotyalikisa kakoitere nali nowaiyita hakiti exakere xairatyoare nowaiya:

#### ENORE MAWAIYAKAHARE ANERE

— Hatyo Enore mawaiyahare xaokitere waiyexe tahi terota atyo noxakaita xihiyeha. <sup>24</sup> Hatyo Enore atyo waikohekoa tyoma, exahe tyotya xoalini hare enakoa tyaoniterenaharenae tyoma. Hatyo atyo enokoa waikohe waikatehare tyaonita hoka maisa atyo haliti nómane hatyako tyaonare. <sup>25</sup> Maisaiya atyo xoare maheta xoalini harenae kaomakita enomana. Hiyaiya, hatyo atyo wenati ijita tyotya ana, xiyawinisoati, tyotya xoalini

hare. <sup>26</sup> Haterore haliti hiyeta kahare hotyalihare haliti tyoma waikohekoa tyaonaha maheta. Hatyo atyo aimenekoty ferakiti, halitinae nawenakala aose harenae. <sup>27</sup> Nikare Enore moka tawaha exahita maheta, xoana xamani hoka kaokahene maheta. Hiyaiya, maisa seko xini tyaonita wonita. <sup>28</sup> Hiyaiya, ihiyeta atyo wisaonita. Wimoxomoxota, wikinaseta wisaonita haiyanae xinekonitarenae iraetere akere: Wiso tehitiya atyo Enore ityaninai

**Miyanitiye Xaxalisati**  
(Apocalipse 20.11-15)

<sup>29</sup> — Hiyeta hoka maisaiya aliyakere Enore halitinae hawaiyoreha hiyeta tyomahitere enore metalahare ouro, prata, sehali akerehare waokita. <sup>30</sup> Hetati ene maisa Enore xoare nexare exehare mawaiyoliniti xaokaka. Hoka kalikini atyo kasani tyoty hakakoare haliti halakihena hawenane iniyalahare aokita. <sup>31</sup> Koxaka aimenekoty: miyanitiye xowakehenaite semehena tyoty halitinae nómáne, hatya haliti waiyexe aohenere xaihako maniyata. Hoka tyomahiterene akere-ta mokahene. Hatyo harenae hotikisa tyoty halitinai ana hatyo haliti ekasekihetehehene xowaka — nexa.

<sup>32</sup> Paulo niraine semaha kasetyatiheta tahi hoka haiyanae koexahalisahene. Xakore hoka haiyanae atyo nexaha: — Haxowakaite wasemehitiya waokowi hatyo hiraitere akiti.

<sup>33</sup> Hatyaoseta Paulo nalita xaneheta. <sup>34</sup> Hoka haiyaharenae tyakeko hoka tyaonaha iniraine xema maniya. Dionísio, hatya ohiro Damáris nexalolo, exahe haiyanae tehitiya hoka tyakekoha. Dionísio atyo kalorexe, kalorexena kakoa hohisakoita Areópagó nali.

**Ehateneha Corinto Nali**

**18** Hatyo najikinita Paulo xaneheta Atenas nalita hoka xane kaoka Corinto nali. <sup>2</sup> Nali ahalakoaty hatya judeu, Áquila nexarexe, wenakalati Ponto naliyere. Kaokeheta taita Itáliata haiyanityo Priscila kakoa. Tyoty judeunae kikisoaneheta Roma nalita aoka kalorexe Cláudio hoka hatyo hiyeta tyoheta. <sup>3</sup> Paulo xane waiyahene hoka hatyaoseta hekota ehaliyaha haka ekakoaha maheta. Paulo, hatyona xoaha hati bojirise nomasehareha makere hoka. <sup>4</sup> Hoka sábadohena nihatyaka Paulo xaneta xahohisakoatyakalati hanako hoka iraeta judeunae, Grécia yerenai xoaha kakoa, iniraene akere-ta tyaonaha maheta.

<sup>5</sup> Hatyaoseta Silas, Timóteo xoaha tyoa kaokeheta enomana Macedônia nalita hoka Paulo halakisa hatene hoka iraiti haxakaini maniya taita tyaona. Iraeta judeunae kakoa: — Jesus atyo Enore Kalorexe Aohenere — nita.

<sup>6</sup> Xakore hoka Paulo xakaini maisa waiyeta enomana hoka kirawanahene. Hatyaoseta Paulo xaxakatetya haimanase niyaxate exahitaha hoka nehena: — Hoka iniyalahare atyoite xixaxomokakehena hoka maisa natyo xini nikare nokaxomokakihena xiso. Xisota atyoite nikare xamokoawihena — nexa. — Hoka kalikini

atyoite noxani noxakaihena iraiti majudeuneharenae hiye.

<sup>7</sup> Hatyaoseta halakisahene hoka xaneheta enonitaha, xane tyaona Tício Justo haliya. Majudeunehare xakore hoka Enore koamaniya tyaonita. Ehana atyo judeunae xahohisakoatyakala hana haliyita. <sup>8</sup> Hatyaoseta Crispo, judeunae xahohisakoatyakala hana xekohasehare tyakeko Xekohaseti tahi, tyoty haiyanityo, haisaninae harenae kakoa. Kahare Corinto nali tyaoniterena semaha iraiti, tyakekoha hoka kabatixatyakaha.

<sup>9</sup> Hamakiyene Paulo kaxawaiyanikisaka. Xekohaseti iraeta ekakoa: — Awa atyo himairehena. Hekoira hiraera, awa atyo hahalakisa hiraene. <sup>10</sup> Hiyaiya, nokaxaikota hiso. Maisaiya xala hare iniyalahare mokita hiso. Aliyerenae kahare nomaniye — nexa Xekohaseti ihie.

<sup>11</sup> Nali Paulo haterehokoane mokotexe tyaona, awaiyehalalakaita Iraiti Waiyexe nali tyaoniterena ana.

<sup>12</sup> Hatyaoseta, Gálio xekohaseti tyaohehene Grécia nali xowaka, judeunae ahohisakoatyakakoaha hoka Paulo otokaha, xaneha kalorexena ana ekakoa <sup>13</sup> hoka nexaha kalorexe hiye: — Exe haliti kasani halitinae jiyahaoty hoka Enore koamaniya tyaonaha aokita. Xakore hoka maisa Roma yerenai xaotyakisakaho akere-ta xini aotyakijita. Nikare hoka maisa waiyeta — nexaha.

<sup>14</sup> Paulo xakore irae aokowihena hoka Gálio nehena judeunae hiye: — Ikoia xoalini hare tyomita iniyalahare hoka xaokitere akere-taiya notyoma. <sup>15</sup> Hoka iraiti xemere, xahetakomaniyerenae xaotyakira tahi xemere taita hoka maisaiya xoare notyomita. Xisota hatyo akiti xahekoty. Maisa nasemene naokowiye — nexa.

<sup>16</sup> Hatyaoseta aehikoahenahitene xekohaseti hana nalita.

<sup>17</sup> Hatyaoseta otokaha Sóstenes, judeunae xahohisakoatyakala hana kaxaikotyasehare, hoka mokohekoatyahene kalorexe hana nahalakoita. Xakore hoka maisa atyo kalorexe Gálio watyalyahitene.

**Haikoahetehehene Antioquia Xeta Tahi**

<sup>18</sup> Paulo waha tyaona Jesus koamaniya tyaoniterena kakoa Corinto nali. Hatyo najikinita jinahetahene hoka xaneheta kanowa kalorexe ako Síria xeta, Priscila, Áquila xoaha kakoa. Xane kaoka wenakalati Cencreía nali hoka talowalisa hakaiyehe, Enore kakoa iraehehene akere-ta.

<sup>19</sup> Hatyaoseta jiyehenahitihaha hoka xane kaokaha Éfeso nali hoka Priscila, Áquila xoaha halakisa hatyo nali. Paulo xane judeunae xahohisakoatyakala hanako isoa hoka iraesekoaty naliyerenae kakoa. <sup>20</sup> Hatyaoseta, kasani waha tyaona ehaliyaha aokaha xakore hoka maisa aoka.

<sup>21</sup> Xanehitiya hoka nexa ihieha: — Enore xaokali-taiya hoka haxowakiya notyoa nowaiyihitiya xiso — nexa.

Hatyaoseta Paulo kanowa kalorexe ako xanehitiya Éfeso nalita. <sup>22</sup> Hatyaoseta xane kaoka Cesaría nali,

hoka haxeroreta jiyehitiya Jerusalém xeta waiya maheta Jesus koamaniya tyaoniterenae hoka hatyaoseta jiyehitiya Antioquia xeta Síria koa maniya. <sup>23</sup> Nali tyo-hena mene hoka jiyehitiya. Xane Galácia koa Frígia koa aihalahalinikijita Jesus koamaniya tyaoniterenae.

### Apolo Kaoka Éfeso Nali

<sup>24</sup> Hatyaoseta hatya judeu Apolo nexarexe wenakalati Alexandria nalitare kaoka Éfeso nali. Waiyore xakaihakaita, awaiyekehalakaita iraiti, tyotya hakakoare Iraiti Waiyexe nanekoa tyaonitere waiyekehalakita enomana hoka. <sup>25</sup> Xekohaseti koamaniya nawenatyaka kakoa tehitiya exaotyakisakahare. Haihalaharene kakoa iraeta, waiyekehalaka aotyakijita Jesus tahi akiti. Xakore hoka João batixaitere akiti taita atyo waiyekehalakita enomana. <sup>26</sup> Xakaihakahena judeunae xahohisakoatyakala hanako, haihalaharene kakoa hoka Priscila, Áquila xoaha semaha iniraine hoka nolokahene hahanako, waiye awaiyekehalakatyaha maheta enomana Enore koamaniya nawenatyakaho akiti.

<sup>27</sup> Hatyaoseta Apolo xane aokowi Grécia xeta hoka tyakekohatiyenae kahinaetyahene hoka babera xairatyaha. Xane kaokhehena hoka waiye mokahene maheta. Xane kaoka hoka kahare kahinaetya Enore xawaiyerahene hiyeta tyakekohenerenae. <sup>28</sup> Apolo aiyateretyoa iraeta judeunae xahita. Waiyore iraeta ekakoaha hoka jiyahaotyahitene halitinae haotita. — Jesus atyo Enore Kalorexe Aohenere — nexa, kaxairatyakehenere Iraiti Waiyexe nanekoa tyaonitere tahi hotikijita enomanaha.

### Paulo Tyaonita Éfeso Nali

**19** Apolo Corinto nali tyaonitere nase Paulo xane hamaniya hoka xane kaoka Éfeso nali hoka haiyaharenae tyakekohatiyenae ahalakoatya. <sup>2</sup> Hoka Paulo axahene: — Xoana xityakekohenerere xowaka Isekohaliti Waiyexe kaoka xomana?

— Maisa Isekohaliti Waiyexe akiti wasemare ini hekoti — nexaha.

<sup>3</sup> — Hoka xoare nawenatyaka xema maniya xikabatixatyaka? nexa Paulo axahene.

— João Batista batixahenerere akereta atyo wikabatixatyaka — nexaha Paulo hiye.

<sup>4</sup> Hatyaoseta Paulo nehena: — João batixaitere xowaka atyo halitinae iniyalahare háomane halakihititerenae anere. João tehitiya aotyakijita Israel hotyalinae, kasani enajikinita tyohenere tyakekoha aokita hoka. Hatyo enajikinita tyohenere atyo Jesus.

### Hawarehare Xakoti

(Atos 2.4-8; 10.45-46; 1 Coríntios 14.1-40)

<sup>5</sup> Hatyo akiti semaha najikinita kabatixatyakaha Xekohaseti Jesus nexare kakoa. <sup>6</sup> Hatyaoseta Paulo ekaokakisa hakahe ihiyeha hoka Isekohaliti Waiyexe exoa tyotya enomanaha. Hoka irahenaha rotita iraeti masemakahare, hoka Enore tahi tehitiya xakaihenaha. <sup>7</sup> Exe halitinae 12-hareha.

<sup>8</sup> Paulo hanamali kaimare xane minita judeunae xahohisakoatyakala hanako. Hoka hamamairanenehare kakoa iraeta halitinae kakoa. Iraeta ekakoaha, kasani Enore koamaniya mokahene aokowita hoka. <sup>9</sup> Xakore hoka haiyaharenae atyo maisa semaxematyare, maisa tyakekoreha, iniyalahare iraetaha Xekohaseti koamaniya nawenatyakaho tyotya haiyaharenae haotita. Hatyaoseta Paulo nalita hikoaheta hoka noloka tyakekohatiyenae. Hatyaoseta ferakiti nihatyaka xakaihakahena ihiyeha hatya haliti Tirano nexarexe xaotyakisakala hanako.

<sup>10</sup> Nikare aotyakisahitene hinama terehokoane. Ekakoita tyotya Ásia koa tyaoniterenae, judeunae, majudeuneharenae hare semaha Enore niraine.

### Ceva Ityaninae

<sup>11</sup> Enore kahare xoalini hare waiyexe tyoma Paulo xaihako maniyata. <sup>12</sup> Paulo mokitere hahiye imiti taose kolatyahitaha hokakitinae ana otokahene maheta. Otohenaha hatyo hoka kinaterehenahititaha rotita. Exahe hatyo kakoa tihanare kamilakoretiterenae nonita tihanare axanikihenahititaha.

<sup>13</sup> Haiyaharenae judeunae hakoa wenakalati xaneta, hakoa wenakalati xaneta xoahita hoka axikahenahititaha isekohaliti ewaxiraharenae. Hatyaoseta Xekohaseti Jesus nexare kakoa irae ahitaha, kasani Paulo tyomitere akereta tyomaha aokowiyahitaha hoka. Nexahitaha isekohaliti ewaxiraharenae hiye: — Jesus nexare, Paulo xakaitere kakoa naxikaheta xiso xiyaneheta maheta — nexaha. <sup>14</sup> Hatyo nikare tyaoniterenae atyo 7-hare judeunae, Ceva nexarexe ityaninae. Ceva atyo sacerdotenae xekohase.

<sup>15</sup> Xakore hoka isekohaliti ewaxirahare nexa ihiyeha: — Nowaiyita Jesus, exahe Paulo hoka nowaiyita. Hoka xalanai atyo xiso? nexa. <sup>16</sup> Hatyaoseta hatyo haliti kakaxaihakoretyakitere jiya enomanaha, mokohekoatyahene hoka aekoakisahene hatyakota. Inimanaiha halalaka, kawe mokahene. <sup>17</sup> Tyotya Éfeso nali tyaoniterenae, judeunae, majudeuneharenae xoaha semaha hatyo tahi akiti hoka kalore mairaha hoka exowakerota exahehare aiminisaha Xekohaseti Jesus nexare.

<sup>18</sup> Hatyaoseta haiyanae iraiti tyakekoterenae irae-hetehena tyotya haiyaharenae haotita hetati iniyalahare tyomahitere tahi. <sup>19</sup> Exahe haiyanae haholita-harexenaehene tehitiya ahohisakoatyaha hababeranexaha, keratyahene maheta tyotya haiyaharenae haotita. Ihatehenahitaha hatyo hababeraxaha kerahenahere xaimane hoka 50.000 hokose prata xaimanexe xane tyaona. <sup>20</sup> Nikare Xekohaseti niraine kinatere xaore hoka kahare haliti tyaona exema maniya.

### Emawaiye Nawenaneha Éfeso Nali

<sup>21</sup> Hatyo najikinita Paulo xane aokowi Macedônia koa, Acaia koa xoaha. Hatyotya xane aokowi Jerusalém nali xeta. — Jerusalém ite noxani hoka hatyo najikinita noxani Roma nali xeta — nita.

<sup>22</sup> Hatyaoseta axikatya Macedônia xeta hinamahare hahinaenae haheta maniya Timóteo, Erasto xoaha. Hoka wahase atyo tyaona Ásia koa nali.

<sup>23</sup> Hatyo xowaka maisa waiyihitita wenati tyaohitita Éfeso nali Xekohaseti koamaniya nawenatyaka hiyeta.

<sup>24</sup> Hatya ouro, prata hiye hakatyasehare Demétrio nexarexe nali tyaonita, hoka hatirisenae tyomita haenoloxa Diana anere hoka betetyahene. Nikare haiyaharenae hakiterenae ekakoa tyaonaha hoka kalore kaoloxita. <sup>25</sup> Demétrio eharehena hoka hatyaoseta kawisa hatyohare hiye hakiterenae hoka nexa: — Nohinaeharenae, xasemehena. Exakere wahakita hoka waiye wikaoloxita. <sup>26</sup> Xasemehena, waiye nikare wisaonita ene hoka exe Paulo kaoka. Koxaka xasema etahi. Halitinae nómáne atyo maisa Enore kaiserehare xini aokita. Hoka kahare haliti alitare, exahe Ásia koatare tyakekoha iniraene. <sup>27</sup> Exakerite hoka ekakoita halitinae matyakekotya wixiyeharenae. Maisa exe taita xini. Nikarite hoka hati Diana anere ite kahalakisaka hoka nikaretaite maika kahalakisaka tehitiya enolo Diana. Tyotyaha Ásia koa tyaoniterenae ene haenoloxa aokahitene, exahe seko tyaoniterenae tehitiya hoka — nexa.

<sup>28</sup> Hatyo akiti halitinae sema hoka ehareha kawerahare hoka kawisaha: — Maika tyaona mene Éfeso tyaoniterenae nenoloxa Diana.

<sup>29</sup> Hatyaoseta werahaliti xaorekoa wenakalati koa. Hatyaoseta halitinae otoka Gaio, Aristarco xoaha. Hatyo hinamanae atyo Macedônia yere hoka Paulo hinanae. Nolohekekoatyahene, xane isoaha ekakoaha xoalini hare ana halitinae wahakotitere nali.

<sup>30</sup> Hatyaoseta Paulo xakore xane irae aokowihena hisoakere halitinae kakoa hoka ihinaeharenae mahokoanitya iniraene. <sup>31</sup> Paulo hinaehare kalorexe tyaoniterenae axikatya hairaenaha enomana, emaxisoanene aokaha hisoakere halitinae tyaonitere nali.

<sup>32</sup> Hatyaose nikare tyaonahitaha hoka kahare haliti maisa waiyekehalaka tyaonare. Hatya hahekore kawisa, hatya hahekore kawisa xoahita. Hoka kaharexe haliti ana atyo maisa waiyekehalakere xoare hiyeta xamani nali tyaonahitaha hoka.

<sup>33</sup> Hatyaoseta haiyaharenae motya Alexandre nikare enawenaneha mokita aokahitaha hoka judeunae axikatene irai maheta ekakoaha. Hatyaoseta Alexandre isoa enekoniha hoka hohoty hakahe kakoa enomanaha mema tyaonaha hoka irae ekakoaha maheta, kasani awaiyekehalakatya aokowita hatahi halitinae ana hoka.

<sup>34</sup> Hatyaoseta waiyahene hoka waiyekehalakahare enomanaha, judeu nika hoka haxawalita kinatyaxa kawiyatyaha: — Maika tyaota mene Éfeso tyaoniterenae nenoloxa Diana — nexaha, waha kinatyaxa kawiyatyaha.

<sup>35</sup> Hatyaoseta wenakalati kaxaikotyasehare wakanehare, babera xairatyasehare, irae ekakoaha mema tyaonaha hoka nehena: — Xasemehena, Éfeso tyaoniterenae. Wenoloxa Diana hana atyo ali tyaonita hoka waiye kakaxaikotyakere tyaonita, exahe sehali

taose enokoata exoahenere tehitiya hoka waiye kakaxaikotyakere tyaonita. Hatyohare akiti atyo tyotyaha ana waiyekehalakita. <sup>36</sup> Hoka maisaiya xala hare hatyohare mahokoanetita. Hatyo hiyeta xahalakihena nikare xisaonitere. Awa atyo xoalini hare xisoma ximaxahekolahareneta. <sup>37</sup> Hiyaiyaore, xanoloka exe halitinae ali, maisa xakore xoare hare iniyalahare tyomareha wenoloxa Diana hana kakoa, maisa xakore kirawanexahene hekoti hoka. <sup>38</sup> Maika Demétrio, exahe ekahinaetyaseharenae hatya kakoa kahalakoaharehena hoka hatyohare niyahare atyo kaferakenexe kaxahohisakoatyakakoita, hatyohare niyahare atyo kalorexena. Hoka hatyo nali atyoite waiye hatyo nali irae. <sup>39</sup> Hoka maika xoalini hare xirae xaokowihitiya hoka hatyoharenae atyoite kairaityaka halitinae aho-hisakakoatyohaena hoka wawenanaho akereha hoka. <sup>40</sup> Hiyaiya, kahenehare xamokita wawenane. Exakereya xisaona hoka maisaiya waiyeta kalorexe hiye. Wikairawaiyakaiya kalikini exakere tyaonitere hiyeta. Maisa ene kaxiyehare kawenatyaka maheta xini. Aliyakereya tyoty exeharenae wawaiyekehalakaita kalorexe ana, axehena wiso hoka? nexa ihiyeha.

<sup>41</sup> Nexa taita irae hoka xahotyalikisakakoati miyatya.

#### Paulo Jiya Macedônia Koa, Grécia Koa Nali

**20** Tyoty hatyo werahaliti hoka Paulo kawisa hahinaeharenae hoka aihalahalinihisahene.

Hatyaoseta jinakahene hoka xane ononyahitaha Macedônia xeta. <sup>2</sup> Hatyaoseta Macedônia koa jiya, aotyakijita, aihalahalinihisahene tyakekohatiyena. Hatyaoseta xane kaoka Grécia nali hoka <sup>3</sup> nali hanamali kaimare tyaona. Xanehena ene Síria nali xeta aokowi hoka judeunae aisahene aokowiterehare tahi sema hoka haikoaheta Macedônia maniya. <sup>4</sup> Hatyaoseta haiyaharenae xane exema: Pirro ityani Sópatro, Aristarco, Segundo, Gaio, Timóteo, Tíquico, Trófimo xoaha. Sópatro atyo Beréia nalitare. Aristarco, Segundo xoaha atyo Tessalônica nalitarenai. Gaio atyo Derbe nalitare. Timóteo, Tíquico, Trófimo xoahanae atyo Ásia koa nalitarenae. <sup>5</sup> Hatyonae xane wahitita, atyahaha wiso wenakalati Trôade nali. <sup>6</sup> Hisehaliti nakairatinae makaketatyakahare kaomakehenere aokahitere najikinita wijiyehtiya wenakalati Filipos nalita kalorexe kanowako. Hatyaoseta 5-ki ferakene najikinita wiyane wikaokenehitene wenakalati Trôade nali. Hatyo nali hasemanane wisaona.

#### Paulo Xane Trôade Nali

<sup>7</sup> Domingo makiyene wahohisakoatyakakoa wihinaeharenae kakoa hoka wirakakakoa nakairati. Paulo xakaihakahena wihiye, heko wahaxati ihiye haxakaihakala kakoi. Kamaetali xanehetehena hoka.

<sup>8</sup> Hati ehaore ako wihohisakoitere nali kahare xaokanatyakalati takoare tyaonita. <sup>9</sup> Hatya xoimahaliti Éutico nexarexe tyokita janela kanase. Hoka Paulo heko xakaihakaita hoka ekakoita xoimahaliti nemaka

kawehena. Hatyaoseta nemaka hoka exoa enoakota. Ainakihetehenahene xakore koxaka waini.

<sup>10</sup> Hatyaoseta Paulo exoaheta meholokoa xakoloharetya xoimalaliti hoka nehena: — Awa atyo ximawaiyehare, kasetata.

<sup>11</sup> Hatyaoseta Paulo enoako kakohaheta, iraka nakairati hoka kanakaira. Heko waha aka iraeta, heko hairaene kakoita ferakoa ihiye. Hatyaoseta xaneheta.

<sup>12</sup> Hatyaoseta xoimalaliti kakoa ehanako xanehenahitaha. Kinatere tyaoheheta hoka ihalaharehenahitaha ekakoa.

### Xaneha Trôade ta Mileto Xeta

<sup>13</sup> Hatyaoseta wiyanehitiya kanowa kalorexe ako. Wiyane wahikoa wenakalati Assôs nali kanowa xamematyoakala nali. Hatyo nali Paulo wiyatyahane hoka. Nali haxatyahaka aoka, tonare tyoita hoka. <sup>14</sup> Tyoa hikoaheta womana Assôs nali hoka kanowa kalorexe ako haxawalita wiyanehitiya Mitilene nali xeta.

<sup>15</sup> Hatyaoseta kamaetali hoka wijiyehitiya nalita, wiyane iyolirotikoa tyaohehene Quios haliya wijiya. Kamaetali hoka wiyane wahikoa Samos nali, nikare kamaetali hoka wiyane Mileto nali wahikoa. <sup>16</sup> Paulo maisa Éfeso nali tyaona aokowita, exahe Ásia koa hoka maisa waha tyaona aokowita. Kasani haxerore kaoka aokowita Jerusalém nali hisehaliti Pentecostes ferakene nahitita hoka. Hatyo hiyeta kaholawakita.

### Paulo Xakaihakala Tahī

<sup>17</sup> Paulo Mileto nali tyaonita hoka kawisa iraiti tyakekoterena nityohalতিরানা Éfeso nali tyaoniterena ahalakoatyahene maheta.

<sup>18</sup> Tyoa kaokaha hoka Paulo nexa: — Waiyekehalakita atyo nawenani akiti xomana. Hetati nokaokihenere Ásia koa xowaka, exahe kalikini kijiya hoka waiyekehalakita xomana.

<sup>19</sup> — Xekohaseti wakanehare natyo hoka nohateni notyoma nomaxaheniriharene kakoa. Haiya xowaka notiyita, howithare nawenani tyaona, judeunae kahalakoahare ahitere nokakoi hiyeta. <sup>20</sup> Xiyaiya, noxakai atyo Iraitī Waiyexe xihye. Naotyakisa xiso halitinae haotita, exahe hatinae nihatyakako hoka naotyakisa nakahinaetya maheta xiso. Exeharenae atyo waiyekehalakita xomana. <sup>21</sup> Naiyateretyoa judeunae, majudeuneharenae hiye, halakisaha iniyalahare háomanaha hoka Enore koamaniya tyaonaha hoka tyakekoha Xekohaseti Jesus maheta.

<sup>22</sup> — Hoka kalikinite noxanihena Jerusalém xeta Isekohaliti Waiyexe xaokala ximita. Maisa notyare nahiti maniya, xoana xamanite nali notyaohena. <sup>23</sup> Isekohaliti Waiyexe xakaita nohiye, tyotyta wenakalatināe koa nojiyehena hoka. Noberexotyaki, exahe nawenani howitharexe nahiti maniya tyaonita aoka. <sup>24</sup> Xakore hoka maisa atyo hatyohare hiyeta nomawaiyeharexe nokakoi. Kasani atyo namiyatya naokowita nohateni, Xekohaseti Jesus isehenere no-

mani. Hatyo nohateni atyo exe: Iraeti Waiyexe exahe Enore xawaiyera halitinae tahi akiti xakaisaka.

<sup>25</sup> — Notyaonita xinekoni hoka noxakaita xihye Enore koamaniya nawenatyaka tahi akiti. Hoka kalikini atyoite maisa xiyaiyehitita natyo. <sup>26</sup> Hiyeta hoka kalikini aliterexe niraeta xihye: xala xamani atyoite hamawenekoaretyakaho xane hoka maisa atyoite nohiyiti xini nikare tyaona. <sup>27</sup> Xiyaiya, noxakai atyo xihye tyotyta Enore ahekoitereharenae tahi akiti.

<sup>28</sup> — Maika xikaxaikoawi, exahe tyakekohatienae hoka xikaxaiko. Hiyaiya, Isekohaliti Waiyexe ekaxaikotyaseha maheta moka xiso hoka maika waiye xikaxaikotahene. Hiyaiya, Haisani timalaxa hiyeta iye-hetehenerena atyo. <sup>29</sup> Exe akiti kakoa nawaiyore: noxanihenere najikinite ahoxa xalijiniharexe akerehare haiyanae haliti kaokehena xomana hoka maisaiya airakoaneharetyahitaha tyakekohatienae. <sup>30</sup> Exahe haxowakaite hoka haiyaharenae xinekonitarenae maoserahenaha, hahinaeharenae hawenaneha akere-ta mokaha maheta.

<sup>31</sup> — Hiyeta hoka maika xiriharira. Xotyaxematya hanamaki terehokoane naotyakihenere xiso, ferakoa, makiya xoaha kakoita. Haiya xowaka nosehi kakoita naotyakijita xiso. <sup>32</sup> Kalikini atyo nahalakhena xiso Enore ana kaxaiko maheta xiso. Koxaka xasema exawaiyera xiso akiti. Hatyo atyoite kahinaetya xiso hoka heko xikinatere xisaona, exahe tehitiya hoka waiyexe isa xomana hakaxaikone hotyali ana mokitere.

<sup>33</sup> — Maisa atyo hatya xiyehare nomaiyasexe, maisa ouro, prata, imiti harenae hekoti naokare nomani. <sup>34</sup> Hiyaiya, nokahe kakoita nahaka hoka niya naokitereharenae exahe nohinaeharenae aokitereharenae hoka. Hatyohare akiti waiyekehalakita xomana.

<sup>35</sup> — Tyotyta xolani hare hateniti hiye nahotikisa nawenani xomana. Nikareya atyo hoka maxiyehareharenae wakahinaetya. Xotyaxematya Xekohaseti Jesus niraene: “Waiye kaiserehare atyo ijitaterehare hatya resebetiterehare nonitata”.

<sup>36</sup> Hatyaoseta Paulo halakisa hairaine ekakoaha hoka hakaoli kakoa tyoka hoka iraexatya hahinaeharenae kakoa. <sup>37</sup> Hatyaoseta xakoloharetyaha, sohitanakolihena Paulo hoka tyotyaha tiyaha. <sup>38</sup> Tyotyaha kalore amaikohareha mawaiyanahene aohenere hiyeta. Hatyaoseta xane mokaxematyahene kanowa kalorexe nali.

### Paulo Xane Jerusalém Xeta

**21** Hatyaoseta wijinahenahitene hoka wiyaneheta enonyahitaha kanowa kalorexe ako. Wiyane fihī iyolirotikoa tyaohehene Cós nali xeta. Kamaetali wiyane wamematyoa wenakalati Rodes nali. Hatyaoseta wiyanehitiya wenakalati Pátara nali xeta. <sup>2</sup> Nali hatya kanowa kalorexe wahalakoatyā Fenícia koa xetare hoka hatyoako wiyanehitiya. <sup>3</sup> Hatyaoseta wiyane wahikoa hakiti hoka nalita wiyaiya Chipre iyolirotikoa, xakore hoka fihī wijiya wiwatone maniya Síria koa maniya. Wikaoka wenakalati Tiro nali. Hoka hatyo nali wexoa hoka kolare exoakisaha kanowa ako-

ta. <sup>4</sup> Nali haiyaharenae Jesus koamaniya tyaoniterenae ana wahikoa hoka hasemanane wisaona ehaliyaha.

Hatyaoseta Isekohaliti Waiyexe aotyakisa hatyo naliyerenae hoka Paulo hiye iraeaha hoka maisa xaneta maheta Jerusalém xeta. <sup>5</sup> Xakore hoka wiyane ferakene hikoa hoka wiyanehitiya. Hoka tyoaha wihinaeharenae wiyema, haiyanityonaiha, haisaninaiha harenae kakoa. Hatyaoseta sekose wenakalati nonitata wityoty wisaona wikaolise kakoa one kilih hoka wiraexatya. <sup>6</sup> Hatyo najikinita wijinakahene hoka wiyane wakakoha kanowa ako hoka hahanaha xeta haikoahenahitaha.

<sup>7</sup> Hatyaoseta wijiyehitiya Tiro nalita wenakalati Ptolemaida nali xeta. Hatyo nali Jesus koamaniya tyaoniterenae wahalakoatya hoka wikatyawaxa ihiyeha, haki ferakene wisaona ehaliyaha. <sup>8</sup> Kamaetali wijiyehitiya hoka wiyane wikaoka wenakalati Cesaría nali hoka wiyane Filipe iraeiti xakaisasehare hanako wisoa hoka wisaona. Filipe atyo Jerusalém nali 7-harenae kaxomokakehenerenae konitare. <sup>9</sup> Kaisaniye 4-halo, maiyanenehalo makereha, Enore niraene xakaisasehalonae.

<sup>10</sup> Wahasehena wikaokene najikinita wisaonita hoka tyo kaoka Judéia koa nalita hatya iraiti xakaisasehare Ágabo nexarexe. <sup>11</sup> Tyo kaoka womana hoka iya Paulo jiterone hoka olatya hakiji, hawaotyali xoaha hiye hoka nehena: — Exakere nexa Isekohaliti Waiyexe: “Exakerite exe jitero waikate kaxolatya Jerusalém nali. Judeunae hiyeta kaxekakaite majudeuneharenae ana xoalini hare tyomaha maheta ekakoa” — nexa.

<sup>12</sup> Wasema hatyo hoka wamaikohare wityoty naliyerenae wihinaeharenae kakoa hoka Paulo máxanene waoka Jerusalém nali xeta.

<sup>13</sup> Xakore hoka nexa wihiye: — Xoana hoka nikare xityiyita hoka xexamaikoalinikijita natyo? Xiyaiya, maisa noxolatya maheta taita xini nomimiye notyaonita. Nomimiye tehitiya notyaonita noxaisaki Jerusalém nali nyahare Xekohaseti Jesus hiyeta — nexa.

<sup>14</sup> Wiwatyalini xakore hoka maisa semaxemaita wiraine hoka hatyaoseta waxa: — Maika Enore aokitere akereta kaomaka.

<sup>15</sup> Wahase nali wisaona hoka hatyo najikinita wakaiseheta wixiyeharenae hoka wiyanehitiya Jerusalém xeta. <sup>16</sup> Haiyanae wihinaeharenae wenakalati Cesaría nalitarenae tyoaha wiyema. Nolokaha wiso hatyako hoka nali wisaona. Hatyo hati xekohasehare atyo Menasom nexarexe. Chipre nalitare, toahiyita Jesus koamaniya tyaonita.

### Paulo Xane Waiya Tiago

<sup>17</sup> Wiyane wikaoka Jerusalém nali hoka wihinaeharenae waiye mokaha wiso haihalahareneha kakoa. <sup>18</sup> Kamaetali hoka Paulo tyo wiyema Tiago waiya maheta. Tyoty Jesus koamaniya tyaoniterenae nityohalitiranae nali makere hohisakoita. <sup>19</sup> Hatyaoseta Paulo katyawaxa ihiyeha hoka xakaihakatya ihiyeha, tyoty Enore xoalini hare tyomehenerere ihiyeta majudeune-

harenae koni tahi akiti. <sup>20</sup> Hatyo exakaihakala semaha hoka ihalahareha Enore kakoa.

Hatyaoseta nexaha Paulo hiye: — Hiyaiyehena, kahare wihinaehare judeunae tyaonaha Jesus koamaniya hoka Moisés xaotyakira xema kinatere tyaonahitaha.

<sup>21</sup> Exakere haiyanai semahitaha hitahi: haotyakijita judeunae hawaikoherakoa nonitata haware tyaoniterenai kasani maisa tyaonaha Moisés xaotyakira xema haokare aokaha. Haotyakijita tehitiya maisa ityaninaeha nomanere milihi xaikotyaka haokare, exahe maisa tehitiya ityaninaeha judeunae nawenanaho tyaona haokare aokaha. <sup>22</sup> Hoka kala kalikini koxaka semaha ali hikaokene tahi. Xoare ite wisomehena hoka tyakekohenaha hiso? <sup>23</sup> Kala maisa hoka exakere hisaona: ali 4-hare haliti tyaonita winekoni, Enore ana xoalini hare iraihenahere tyomaha aokowihenahere akereta tyaonaha maheta. <sup>24</sup> Hiyane exemaha hoka tihaharetyoahenahitehenerere nali hatihaharetyoaheta tehitiya. Hatyaosetaite habakatya enomanaha hoka talowalisaha hakaiyehaha. Hatyo hiyetaite irae-henahere hitahite maisa aliterexe xini aohenahitaha. Hoka tyotyahaite Moisés xaotyakiraho xema nawenatyasehare aohenahitaha hiso.

<sup>25</sup> — Hoka Jesus koamaniya tyoahenerere majudeuneharenae ana atyo koxaka babera waxikatya. Exakere: “Awa atyo xanisa eteti enore metalaharenae ana fetatyaka. Awa atyo kirakahare timalane xikanakaira, exahe kirakahare kikirolokasetyaka kaxaisakiterehare nete. Awa tehitiya atyo ohiro kakoa iniyalahare xisoma”, waxa.

<sup>26</sup> Hatyaoseta Paulo irae hatyo 4-harenae kakoa hoka kamaetali xane exemaha tihaharetyoahenahitaha maheta. Hatyo najikinita xane Iraexatyakalati Hanako isoa kaexakatya maheta hatihaharetyoaneha ferakene miyane hoka kirakahare xaisaka fetatyaka ferakene aose xane hikoa.

### Paulo Otokaha Iraexatyakalati Hanakota

(Atos 22.22; 23.12-15; 2 Coríntios 4.8-12; 11.22-33)

<sup>27</sup> Hatyaoseta exaimenekolaose etake 7-ki ferakene tihaharetyoati okoi tyotehena hoka haiyaharenae judeunae Ásia koa nalitarenae waiyaha Paulo Iraexatyakalati Hanako hoka hatyaoseta irae-tanakotyaha haliti hisoakerenae hoka otokaha Paulo.

<sup>28</sup> Hoka kawihenahitaha: — Xakahinaehena wiso, Israael yerena! Exe haliti atyo tonakoaita, aotyakijita tyoty hakakoare koa, majudeuneharenae kahalakohare Israel yerena kakoa maheta. Kasani maisa judeunae xaotyakiraho tyakekoha aokare, exahe maxaimanisaka Wiraexatyakala Hana aokita. Hiyaiya, kalikini ali majudeuneharenae nolokita Iraexatyakalati Hanako hoka aiyalakoty exa waiyexe ako — nexaha. <sup>29</sup> Koxaka waiyaha Trófimo Paulo kakoa Jerusalém nali, hoka motyala Paulo isoa ekakoa Iraexatyakalati Hanako aokahitaha hoka nikarahitaha. Trófimo atyo Éfeso nalitare.

<sup>30</sup> Hatyo mawaiyekehalakiti kasemaka hakakoare Jerusalém nali hoka hatyo nali tyaoniterenae tema

tyoaha. Hatyaoseta otokaha Paulo, nolohehekoatya-hene Iraexatyakalati Hanakota. Aihikoahenahitene hoka jihohenahitaha Iraexatyakalati Hana.

<sup>31</sup> Okoi halitinae aisehena Paulo hoka sorarenae xekohasehare sema hatyo Jerusalém tyaoniterenae xalijiniharene. <sup>32</sup> Hatyaoseta kaholawaka aho-hisakoatya sorarenae exekohasenai kakoita hoka tema xane hikoaha haliti hisoakere koni. Hatyo halitinae waiyaha sorarenae xekohasehare, sorarenae xoaha hoka halakisaha Paulo hamokohekoalaha. <sup>33</sup> Hatyaoseta sorarenae xekohase xane hikoah Paulo ana hoka otokene hoka exolatyaka hinamahi kamatiherahi kakoa aoka. Hatyaoseta axehenahene: — Xala exe haliti? Xoare tyoma?

<sup>34</sup> Hatyaoseta halitinae kawiyahena kinatyaxa, haiyanae hahekore, hahekore xakini. Kaxiyehere irae ahitaha hoka sorarenai xekohase ana maisa waiyehahalakere nikare enawenaneha. Hoka Paulo kolatyaka aoka sorarenae tyaonitere hati kalorexe ako nali.

<sup>35</sup> Xane kaokaha ekakoa kakohakalati haliya hoka sorarenae kolatyaha Paulo halitinae nonitata, exaisaka aokahitaha hoka. <sup>36</sup> Exemaha tyoahitaha kawiyatyahitaha: — Xaisehenene, xaisehenene — nexahitaha.

#### Paulo Irae Kahawaonitaretyoawi Maheta

<sup>37</sup> Paulo xane mohenaha sorarenae tyaonitere ako hoka nehena sorarenae xekohasehare hiye: — Xoana waiyehenaiya niraie hikakoa?

— Xoana hawayore Grécia yerenai xako hiraeta?

<sup>38</sup> Xoana maisa etake Egito tare xini hiso hoka toahiyaseta xalijiniharexena taita 4.000-hare hanoloka hoka hiyane maharexakahare nali hoka hikirakaharetere xini?

<sup>39</sup> Hatyaoseta Paulo nehena ihiye: — Natyo atyo judeu, wenakalati Tarso nali atyo notyaona, Cilícia koa nali. Tarso atyo wenakalati masakare waiyexe. Xoana, waiyehenaiya hahalakisa natyo hoka niraie exe halitinae kakoa?

<sup>40</sup> Hatyaoseta sorarenai xekohasehare halakisene irae maheta hoka Paulo tityoa kakohakalati heno hoka hakahe kakoa aimenekoty mema tyaonaha hoka irae ekakoaha maheta. Hatyaoseta tyoty halitinae mema tyaonaha hoka iraeheka ekakoaha hebreu xako hoka nehena:

**22** — Nohinaeharenae, inityohaliti harenae, xasemehena niraini nakahawaonitaretyoawi maheta — nexa.

<sup>2</sup> Iniraene hebreu xako semaha hoka mema kaiserehare tyaonaha.

Hatyaoseta Paulo nehena: <sup>3</sup> — Natyo atyo judeu, notyaona Tarso, Cilícia koa nali. Xakore hoka ali Jerusalém atyo nokaxanaetyaki, Gamaliel atyo noxaotyakisase. Hoka wahetakomaniyeharenae nawenanaho nokaxaotyakisakihenere maisa mahowitihare xini xakore hoka notyaona exema kaiserehare. Enore koamaniya ene notyaonita, ali kalikini xiso xisaonitere akereta.

<sup>4</sup> — Naisa naokowita, noxalijinihareta ene Jesus koamaniya tyaoniterenae xahita. Ena ohiro harenae nolaty hoka berexo ako namoka. <sup>5</sup> Sacerdotenae xekohasehare, judeunae nityohalitiranae ana atyo exe niraetereharenai waiyehahalakita. Hiyaiya, xairatyaha babera wihinaeharenae judeunae Damasco nali tyaoniterenae ana hoka isahitaha nomani. Hatyo babera kakoa noxani nali naberehotya maheta Jesus xema maniya tyaoniterenae kamatiherahi kakoa hoka Jerusalém xeta nakolatyahitene, iniyalahare kaxomokakaha maheta.

#### Paulo Xakai Jesus Koamaniya Tyaohenere Tah

(Atos 9.1-19; 26.12-18)

<sup>6</sup> — Noxanita Damasco xeta hoka okoi nokaokihena hoka kala totahikoahena hare hoka eharehena rota enokoata werokakoa moka noxahiti. <sup>7</sup> Hatyaoseta nexoa waikoa hoka nasema iraiti: “Saulo, Saulo, xoanere hoka hiyalijinihareta noxahiti?” nexa. <sup>8</sup> “Xala hiso, Xekohaseti?” nomi. Hoka nehena: “Natyo atyo Jesus Nazaré yere hikirawanetere”, nexa. <sup>9</sup> Nohinaeharenae tyoiterenae noximi waiyaha exaokanala xakore atyo hoka maisa atyo semahitaha iraehehene nokakoi niraene.

<sup>10</sup> — Hatyaoseta naxehitiyene: “Xekohaseti, xoanaite notyaohena?” “Hainakoahetehena hoka hiyanehena wenakalati Damasco xeta. Nalite iraehehena hikakoa, aliyakere xamani hisaona aokita Enore hoka”, nexa.

<sup>11</sup> Hatyo xaokanatyakalati weroka nowaiyehenere mawaiyahakalaty natyo. Hatyo hiyeta nohinaeharenae otokahisaha natyo Damasco xeta.

<sup>12</sup> — Hatyo nali hatya haliti tyaonita, Ananias nexarexe. Waiyexehare, wiyaotyakisakaho maniya tyaonita, exahe tyoty judeunae Damasco nali tyaoniterenae hoka aiminijitene. <sup>13</sup> Tyoa kaoka nohaliye hoka nehena: “Nohinaehare Saulo, hiyaiyakahetehena”, nexa nohiye hoka nowaiyakahetehena rotita hoka nawahakoty enomana.

<sup>14</sup> — Hatyaoseta nehena nohiye: “Saulo, wahetako-maniyeharenae nEnorexa aoka hiso haomana, aokitere akereta hisaona maheta. Hatyo Waiyexeharexe Aohenere hiyaiya, exahe iniraine hikakoa hoka hasema aokita. <sup>15</sup> Hoka hiso atyoite hiyakaihena etahi tyoty halitinae hiye, tyoty xalini hare hiyaiyehenereharenae, hasemehenereharenae xoaha”, nexa. <sup>16</sup> “Xoare hatyahita? Haxehena Xekohaseti kahinaetya maheta hiso hoka hikabatixatyaka hoka iniyalahare hománe kamaotyanteyakeheta maheta”, nexa nohiye.

#### Paulo Hatene Tah

<sup>17</sup> — Hatyaoseta nahaikoaheta Jerusalém xeta. Niraexatita ene Iraexatyakalati Hanako hoka nokaxawaiyanikisaki. <sup>18</sup> Nowaiya Xekohaseti hoka nexa nohiye: “Hiyanehetehena rota ali Jerusalém nalita. Hiyaiya, aliyerenae atyoite maisa semaxematya aokowiyahitaha hiyakaini notahi akiti”, nexa.

<sup>19</sup> — Hoka nomihena: “Xekohaseti, waiyehahalakita atyo enomanaha judeunae xahohisakoatyakala



hanako nihatyaka noxani hoka naberehoitere namokonasetitere hikoamaniya tyaoniterenae namokonasetiterekare akiti. <sup>20</sup> Exahe Estêvão hitahi xakaisahare aisehenahere xowaka natyo tehitiya nali notyaonita, nakahinaetyahitene. Nokaxaikota exaisasenai nima”, nomi.

<sup>21</sup> — Xakore hoka Xekohaseti nehena: “Hiyanehena, natyo atyoite naxikahena hiso seko akiya majudeuneharenae koni”, nexa.

<sup>22</sup> Hatyo kijiya Paulo niraene halitinae semaxematya hoka hatyaoseta nexa kawiyahenaha: — Xaisehenene. Waiye xaisaka. Maisaiya xoare maheta maxaisakita — nexaha. <sup>23</sup> Kawiyatyahitaha, xaxakahitaha haimanase-naeha, iyaxati harenae eno maniya xawatyahitaha.

<sup>24</sup> Hatyaoseta sorarenae xekohasehare Paulo xaisoakisakeheta aoka sorarenae tyaonitere hanako nali. Emokonasetyaka aoka, xakai maheta xoare hiyeta xamani judeunae kirawanetene hoka kawiyalijiterene tahi.

<sup>25</sup> Olatyahene mokonasetyahene maheta hoka Paulo nehena haxotokasehare sorarenae kaxaikotyasehare hiye: — Xoana ehokoretaiya xamokonasehena Roma yere? Xoana ehokoretaiya xamokonasehena hatya, etahi masemakahareta?

<sup>26</sup> Iniraene sema hatyo sorarenae kaxaikotyasehare hoka xane haxekohase ana hoka nexa ihiye: — Hiri-harira exehare hisomiterekare kakoa. Exe haliti atyo Roma yere — nexa.

<sup>27</sup> Hatyaoseta sorarenae xekohasehare xane irae Paulo kakoa maheta hoka nexa axene: — Hiyakaihena nohiye. Xoana aliterexe Roma yere hiso?

— Há, aliterexe — nexa Paulo.

<sup>28</sup> Hoka hatyo xekohaseti nehena: — Natyo tehitiya Roma yere. Kalore nabakatya nikare notyaona maheta — nexa.

Xakore hoka Paulo nehitiya ihiye: — Roma yere terota atyo natyo notyaonehenereta — nexa.

<sup>29</sup> Hatyaoseta Paulo axaha maheta haiyaharenae ehaliya tyaoniterenae kikisoaheta rotita. Hatyo sorarenae xekohasehare maira, Paulo nawenane tahi sema hoka exolatyaka aohenere hiyeta.

### Paulo Mokaha Kalorexenai Nahalako

<sup>30</sup> Hoka sorarenae xekohasehare waiyekehalaka sema aokowita, xoare hiyeta xamani Paulo xaisaka judeunae aokahitaha hoka. Hatyaoseta kamaetali kamatiherahi niyakeheta Paulo hiyeta aoka. Hatyaoseta sacerdoti xekohaseharenae, inityohalitiranae harenae xahohisakakoatyokane aoka. Hatyaoseta wakaty sorarenae hoka kolatyaha Paulo hoka enahalakoaha mokahene.

**23** Hatyaoseta Paulo kinatya wahakoty judeunae nityohalitiranae ana hoka nehena: — Nohinaeharenae, kalikini kijiya maisa xoare iniyalahare Enore haoti notyomare.

<sup>2</sup> Hoka sacerdotenae xekohasehare Ananias, Paulo kanasako mokotyaka aoka ehaliyita tityoiterenae hiye.

<sup>3</sup> Hoka Paulo nehena Ananias hiye: — Teraharetyoare! Maika Enore iniyalahare moka hiso. Hatyaose hisokita Xaotyakiyaho aokitere akereta hasema haokowita notahi akiti. Xoana hoka nomokotyaki haokita? Maisa atyo nikarexe xini Xaotyakiyaho.

<sup>4</sup> Hatyaoseta halitinae Paulo haliyita tityoiterenae nehena: — Xoana hoka iniyalahareta hiraeta sacerdotenae kalorexe, Enore wakanehare kakoa?

<sup>5</sup> Hoka Paulo nehena: — Nohinaeharenae, motya atyo maisa sacerdotenae kalorexe xini naokita.

Hiyaiya, Iraeti Waiyexe nanekoa atyo nexa:

Awa atyo hikaxaikone hotyali xekohase tahi iniyalahare hira.

<sup>6</sup> Hatyaoseta waiyekehalaka Paulo ana. Hatyo kalorexenai koni haiyanae saduceunae hotyali, haiyanae fariseunae hotyali xoaha. Hatyaoseta Paulo kinatyaxa irae: — Nohinaeharenae, fariseu ityani atyo natyo, fariseu tehitiya natyo. “Maikaite kamatinae kaseheta”, nomitere hiyeta kalikini exakere nokaxomokakita — nexa.

<sup>7</sup> Nexa Paulo irae hoka fariseunae, saduceunae kinatyaxa irae kakoaha hoka hahekore xakini kalorexenae ahekoty. <sup>8</sup> Maisa atyo saduceunae tyakekore kamatinae kaseneheta akiti, exahe maisa atyo anjo, isekohaliti aka enomanaha hoka maisa tyakekoreha. Hoka fariseunae atyo tyoty hatyohare tyakekota.

<sup>9</sup> Hatyaoseta masakare kinatyaxehena irakakohitaha. Haiyanae fariseunae Xaotyakiyaho kakoa waiyoreterenae tityoaha hoka nehenaha irahenaha kinatyaxa: — Womana atyo exe haliti maisa xoare hare iniyalahare tyomare. Kalaiya maisa hoka isekohaliti xamani, anjo xamani irae ekakoa — nexaha.

<sup>10</sup> Kaheneharenaha hoka sorarenae xekohasehare mawaiyeharenaha. Aisahaiya Paulo aokita hoka sorarenae axikatya iyehetahene maheta enekonitaha hoka kolahenahitene sorarenae tyaonitere nali maheta.

<sup>11</sup> Hatyo najikinita makiya Paulo ana Xekohaseti kaotyaka hoka nexa ihiye: — Awa atyo himaira! Koxaka atyo hira notahi ali Jerusalém. Nikareta tehitiyate Roma nali hiraehitiya.

### Paulo Aisaha Aokowihenahere Tahi

(Atos 9.15-16; 22.22; 2 Coríntios 4.8-12; 11.22-33)

<sup>12</sup> Kamaetali haiyaharenae judeunae aho-hisakoatyakakoaha hoka maxaisaneharetatahaiya Paulo maisa kanakairahitaha, maisa terahitaha hekoti aokowiha. <sup>13</sup> Hatyo nikare ahekoiterenae atyo 40-hare jiyare.

<sup>14</sup> Hatyaoseta xane iraeha sacerdotenae xekohaseharenae, judeunae nityohalitiranae xoaha kakoa hoka nexaha: — Exakerexe owa wirae kakoa: maisaiya xoare wikanakairihitita Paulo wimaxaisaneharetaha. <sup>15</sup> Hoka maika xiso kalorexenae xiraehena sorarenae xekohasehare kakoa hoka Paulo ali noloka. “Maika waiye wasema waokowita etahi akiti”, xexa ihiye. Hoka wimemerite wisaona kaokohenere nahitita waisene maheta — nexaha.

<sup>16</sup> Xakore hoka Paulo nahahalo ityani sema nikare ex-  
ahokolaha hoka xane sorarenae tyaonitere nali hoka  
tyotya xakaini Paulo hiye. <sup>17</sup> Hatyaoseta Paulo kawisa  
hatya sorarenae kaxaikotyase hoka nexa ihiye: —  
Hiyane exe xoimahaliti kakoa xiyekohase nali. Hoka  
xoalini hare tahi xakai maheta — nexa.

<sup>18</sup> Hatyaoseta sorarenae kaxaikotyase xane ekakoa  
haxekohase nali hoka nexa ihiye: — Etake Paulo  
berexoako tyaonitere kawisa natyo hoka exe xoimahal-  
iti nanoloka homana xoalini hare tahi xakai hihiye ma-  
heta aoka.

<sup>19</sup> Hatyaoseta exekohase otoa xoimahaliti ekahe  
hiye hoka xane ekakoa hamaniya hoka axehenene: —  
Xoare hiyakai haokowita nohiye?

<sup>20</sup> Hoka nehena: — Judeunae kasani makani Paulo  
hakolatya kalorexena ana aokaha. Kasani waiye  
kaiserehare sema aokowitaha, hamaoseralaha. <sup>21</sup> Hoka  
awa atyo hityakekohena iniraenaha. Hiyaiya, 40-hare  
jiyare ite wahahena Paulo aisaha maheta. Tyotya  
nikare ahkehenerenae maisa kanakairaha, maisa ter-  
aha aokowihenahititaha Paulo hamaxaisanenehareha  
nahitita. Nikare tyaonaha aokowiha. Kalikini memere  
tyaonahitaha, atyahahita hiraine xahita taita.

<sup>22</sup> Hatyaoseta sorarenae xekohasehare nehena ihiye:  
— Awa atyo hatya hiye hiyakaihena exe hiyakaitere no-  
hiye — nexa hoka axikaheta xoimahaliti.

#### Paulo Kaxaxikatya Kalorexex Félix Ana

<sup>23</sup> Hatyaoseta sorarenae xekohase kawisa hinama-  
hare sorare kaxaikotyasenae hoka nehena ihiyeha: —  
200-hare sorarenae, 70-hare kawalo henore, 200-hare  
tonotyakalatikase kakoarenae xoaha memere xamoka  
hoka Cesaréia xeta xaneha. Maika ximemere xisaona  
hoka awisa makiya xiyane. <sup>24</sup> Maika Paulo ana tehitiya  
kawalo memere xamoka ehainali maheta hoka waiye  
xiyane ekakoa kalorexex Félix nali — nexa wakatyah-  
ene.

<sup>25</sup> Hatyo hekota sorarenae xekohasehare xairatya  
babera exakerexe:

<sup>26</sup> Xoana waiye hisaonita, kalorexex Félix?

<sup>27</sup> Judeunae otoa exe haliti hoka komita ene aisa-  
hene. Hoka nasemehena atyo, Roma yere atyo hoka  
nosorarexinae kakoa wiyehetene hoka maisa  
aisahitene.

<sup>28</sup> Hatyaoseta kasani waiye nasema naokowita etahi  
akiti hoka noxani judeunae nityohalitiranae ana  
ekakoa, xoare hiyeta xamani kirawanahitene hoka.

<sup>29</sup> Hatyaoseta waiyekehalaka nomani. Maisa xakore  
nika xoare tyomare hoka kaberehotyaka, kaxaisaka  
harenae aokahitaha. Haxaotyakisakahoha hiyeta nika  
nikare mokahitene.

<sup>30</sup> Hatyaoseta nasemehitiya judeunae aisene  
aokowitere akiti hoka hatyo hiyeta naxikatene  
homana. Exahe nirae ekakoaha hoka xaneha hinali xe-  
ta hoka hihaotisa iraharehenahitiyene naoka hoka.  
Eko xoaha, Cláudio Lísias.

<sup>31</sup> Hatyaoseta haxekohaseha aokitere akereta so-  
rarenae tyaona. Makiya xaneha Paulo kakoa we-

nakalati Antipátride nali kijiya. <sup>32</sup> Kamaetali hatyo nali-  
ta sorarenae haikoaheta sorarenae tyaonitere nali xe-  
ta, hoka kawalo henorenae taita xanehitiya Paulo  
kakoa. <sup>33</sup> Xane kaokaha ekakoa Cesaréia nali hoka  
babera isaha kalorexex ana hoka Paulo tehitiya halak-  
isaha enomana.

<sup>34</sup> Hatyaoseta kalorexex kaixaretya babera hoka axa  
Paulo nawenakalakoah tahi akiti. Waiyekehalaka eno-  
mana Paulo atyo Cilícia koa tare hoka nexa ihiye: <sup>35</sup> —  
Hiraeharetyasenaite kaokehena hoka nasemehitiya hi-  
tahi — nexa ihiye. Hatyaoseta eberehotyaka aoka  
Herodes hana hati wahaharexe ako.

#### Judeunae Iraeharetyaha Paulo

**24** Hatyaoseta 5-ki ferakene najikinita sacerdotē-  
nae xekohase Ananias xane Cesaréia nali,  
haiyanae judeunae nityohalitiranae, hatya Tértulo  
nexarexe xoaha kakoa xane. Tértulo waiyore iraeta ho-  
ka. Xane kaokaha kalorexex Félix ana hoka irahare-  
henaha Paulo.

<sup>2</sup> Hatyaoseta kawisaha Tértulo hoka hatyo irahare-  
hena Paulo hoka nehena: — Xekohaseti kalorexex Félix,  
waiye hamokita wiso judeunae hoka wimehexaikohare  
wisaonita, haxakaihiti wawenane waiye wisaona ma-  
heta. <sup>3</sup> Wihalahareta hikakoa taita tyotya wenakalati-  
nai koa, xoalini hare hijitereharenae womana hiyeta.  
<sup>4</sup> Hoka kasani maisa nahowitihalikisa naokowiye hiso.  
Hatyo hiyeta ininaitaite noxakai exe haliti tahi hoka  
hasemehena niraini.

<sup>5</sup> — Exe haliti maisa waiyexe! Judeunae koni  
hakakoare koa xane hoka kaxiyehare mokita enawe-  
naneha. Hatyo Nazaré yere koamaniya tyaoniterenae  
xekohase tehitiya tyaonita. <sup>6</sup> Maisa tehitiya aiminjita  
Iraexatyakalati Hana. Hatyo hiyeta wotokene hoka  
wiyatyakisakaho akereta ene wamokene waokowi  
<sup>7</sup> xakore hoka sorarenae xekohasehare Lísias tyoa iye-  
hetene wonita sorarenae kakoa, komita ene maisa  
waiye xini mokita wiso. <sup>8</sup> Hatyaoseta hatyo Lísias ali  
hahalakoa tyoa iniraeharetyasena hoka iraharetene  
aoka. Kalikiniya exe haliti haxa hoka tyotya wiraetere-  
harenae taitaiya aliterexe hasema etahi — nexa.

<sup>9</sup> Hatyaoseta judeunae kahinaexatya iniraene hoka  
nehenaha: — Alitere aokita — nexaha.

#### Paulo Irae Félix Nahalakoa Kahawaonitaretyoawi Ma- heta

<sup>10</sup> Hatyaoseta kalorexex aimenekoty Paulo ana irae  
maheta iniraenaha nahalakoa hoka hatyaoseta Paulo  
nehena: — Wahehena kalorexex hisaoniterehare akiti  
judeunae koni atyo waiyekehalakita nomani. Hiyeta  
hoka nihalahalini kakoa nirahena inirainaha naha-  
lakoa hihaotita, kalorexex. <sup>11</sup> Kalikini 12-ki ferakenehena  
notyaohitita Jerusalém nali noxani Enore kakoa nihala-  
harehenere najikinita. Haxaiya haiyanae ana hoka,  
“Aliterexe aokita”, nexahaiya hihiye. <sup>12</sup> Maisa exe  
aokahitereha akereta xini notyaonita. Maisa kinatyaxa  
niraexex xala harenae kakoa Iraexatyakalati Hanako,

exahe xahohisakoatyakalati hanako. Maisa hakiti hekoti xoalini hare iniyalahare notyomare wenakalati Jerusalém nali. <sup>13</sup> Hoka maisaiya aliyakere exehare no-tahi irae-terehareha hatyonaiha aliterexe aokahitaha hihiye. <sup>14</sup> Xakore hoka exe taitaite noxakai hihiye: aliterexe atyo “Wenati Waiyexaho” xema notyaonita hoka hatyohare atyo judeunae iniyalahare aokahitaha. Exakere atyo notyaonita Enore koamaniya: Notyakekoto Moisés xaotyakiraho tyotya, exahe Iraitu Xakaisase-harenae xairala harenae hoka.

#### Kamatinae Atyoite Kaseheta

(João 5.25-29; Atos 26.8; Apocalipse 20.11-15)

<sup>15</sup> — Atyahahitere akereta natyahita Enore xahita: “Tyotyaita kamatinai kaseheta, waiyexeharexena, mawaiyexehareharenae xoaha”, nitere hakakoa wityakekota. <sup>16</sup> Hiyeta hoka nawenani kakoa naiyaterityoita, kasani Enore haoti waiye notyaona naokowita, exahe halitinai haoti hoka — nexa.

<sup>17</sup> — Waha terehokoane nomaxaninitere Jerusalém najikinita noxani nali xeta olo nakolatya nohinaeharenae maoloxaharenae ana maheta, exahe kirakahare naisa hoka nafetatya Enore ana maheta. <sup>18</sup> Nikare notyaonita hoka hatyo kirakahare nafetahenere najikinita haiyahare judeunae waiya natyo Iraexatyakalati Hanako. Hatyo xowaka maisa kahare haliti tyoare noximi, exahe hoka maisa xoare hare iniyalahare notyomare. <sup>19</sup> Xakore hoka haiyahare judeunae Ásia koatarenae exowaka nali tyaonita hoka waiyaha natyo. Hatyonaiya atyo ali tyoaha irae-haretyaha natyo hihiye hoka ehokoriya, iniyalahare xamani aliterexe notyomita hoka.

<sup>20</sup> — Exahiya exe halitinae xoare xamani inityohalitranae sema iniyalahare nománi tahi enahalakoaha noxanihenere xowaka hoka xakaihahene hihiye.

<sup>21</sup> Hatyo xowaka natityoa enahalakoaha hoka kinatyaxa nomi taita: “Maikaite kamatinae kaseheta. Hiyeta hoka kalikini exakere xamokita natyo” — nexa Paulo.

<sup>22</sup> Hatyaoseta Félix, Wenati Waiyexe koamaniya nawenatyaka akiti waiyekehalakita enomana hoka nehena: — Maikaite sorare xekohasehare Lísias kaokehena hoka nahekoty hitahi hoka kamiyane — nexa.

<sup>23</sup> Hatyaoseta sorare xekohase hiye irae hoka sorare moka Paulo kaxaikotyase maheta aoka. Kasani waiye kaxaikone aoka, exahe hoka ihinaeharenae kotare tyoa waiyahene hoka kahinaetyahene xoalini harenai kakoa aoka.

#### Paulo Tyaonita Félix Drusila Xoaha Nahalakoa

<sup>24</sup> Hatyo najikinita, wahehena hoka Félix tyoa haiyanityo Drusila kakoa. Judeunero atyo exanityo. Hoka kawisa Paulo, semaha iniraine Jesus Cristo koamaniya nawenatyaka akiti maheta.

<sup>25</sup> Hatyaoseta Paulo irae-hena wenati waiyexe tahi, kaxaikoawiti, exahe xaxalisati miyanitiye xowakehena harenae tahi hoka Félix maira hoka nehena: — Kalikini hiyanehetehena, haxowakaite nakawihitiya hiso hoka

waiye nasemehitiya hiraine — nexa. <sup>26</sup> Motyalaite Paulo olo isa enomana aokita hoka hatyo hiyeta fera kawijitene hoka irae-eta ekakoa.

<sup>27</sup> Hatyaoseta hinama terehokoane najikinita hatisa kalorexe tyoahena Félix wenekoare, Pórcio Festo nexarexe. Hoka Félix xanehetehena hoka Paulo berexo akota halakisa judeunae aihalahalinikisa maheta.

#### Paulo Xane Roma Yere Kalorexe Ana Aokowi

**25** Festo kaoka hoka hanamaki taitata tyaonita Cesaréia nali hoka xane Jerusalém xeta. <sup>2</sup> Xane kaoka hoka sacerdotena xekohasehare, judeunae nityohalitranae xoaha irae-hena ekakoa, Paulo kakoa kahalakoharahitereha tahi akiti. Hoka axaha Festo, <sup>3</sup> kasani Paulo Jerusalém xeta axikatya aokaha. Kasani Paulo tyoa hoka ahotita aisahene aokowiyahitaha hoka.

<sup>4</sup> Hoka Festo nehena ihiyeha: — Paulo atyo berexo ako tyaonita Cesaréia nali. Nahaikoahetehenaite nali xeta hoka <sup>5</sup> maika xinityohalitranae tyoa noximi hoka irae-haretyahene nohaotita, xoare xamani iniyalahare tyoma xaokita hoka — nexa.

<sup>6</sup> 8-ki ferakene xamani, 10-ki ferakene xamani ala Festo tyaona ekakoaha hoka hatyaoseta haikoaheta Cesaréia xeta. Kamaetali hoka xane tyoka kalorexe nokahakalaose hoka kawisa Paulo.

<sup>7</sup> Paulo kaoka hoka judeunae, Jerusalém nalita tyohenerena exahiyatyahene hoka irae-harehenahene hairawaneha. Xakore hoka maisa xoare hotikisare Festo tyakekohena maheta iniraeneha. <sup>8</sup> Hatyaoseta Paulo nehena kahawaonitaretyoawi maheta: — Maisa atyo xoare hare notyomare iniyalahare Moisés xaotyakiraho kakoa, maisa Iraexatyakalati Hana nomaxaiminirere, maisa Roma yerena xekohase tahi akiti hoka iniyalahare niraexe — nexa.

<sup>9</sup> Hatyaoseta Festo aihalahalinikisa maheta judeunae hoka nexa Paulo axa: — Xoana maisa Jerusalém nali hiyane hoka hatyo nali naxalisa hiso haokare hatyohare hiyeta?

<sup>10</sup> Hoka Paulo nehena: — Ali notyaonita kalorexe nokahakala Roma yere nahalakoa nokaxaxalisaki mahetare aose. Hiyaiya, maisa atyo xoare hare iniyalahare notyomare judeunae ana. Hatyo hare akiti atyo waiyekehalakita homana. <sup>11</sup> Maisaiya atyo naiminijita Roma yerena xaotyakiyaho, exahe iniyalahareya notyoma hoka nawaiye xaisaki haokita hoka nomimiye atyo notyaonita nokamani niyahare. Hoka exe irae ahitere notahi atyo maisa aliterexe xini hoka maisaiya xala hare aliyakere halakijita natyo enomanaha. Hatyo hiyeta noxani naokowita Roma nali Kalorexe sema maheta notahi hoka kamiyane maheta — nexa.

<sup>12</sup> Hatyaoseta Festo hakahinaetyasena kakoa irae hotohare hoka hatyaoseta nehena: — Hiyane tyare haokowita Kalorexe ana Roma nali hoka nalite hiyane — nexa.

**Paulo Tyaonita Agripa, Berenice Xoaha Nahalakoa**

<sup>13</sup> Hatyo najjikinita xekohaseti Agripa, Berenice kakoa kaoka Cesaréia nali waiyaha exahe katyawaxaha maheta Festo hiye. <sup>14</sup> Hatyo nali akaiki ferakenehena tyaonahitaha hoka Festo xakaihena Agripa hiye Paulo tahi hoka nehena: — Félix halakisa hatya haliti ali berexo ako. <sup>15</sup> Noxani Jerusalém hoka sacerdoté xekohasena, judeunae nityohalitiranae xoaha xakai nohiye kahalakoahare ahitere ekakoa tahi akiti. Hoka aokaha exaisaka nohiye. <sup>16</sup> Hoka nomi ihiyeha: “Roma yerenaé maisa nikare masemakahareta aisetere. Iniraeharetyasenaeya hotohare atyo iraeaharetene ehaotita hoka kairaeharetyakitere tehitiya irae hatahi, xoare xamani tyoma hoka”.

<sup>17</sup> — Hatyaoseta ali kaokaha hoka maisa nohowitihareta. Kamaetali noxani kalorexe nokahakala heno notyoka hoka hatyo haliti nakawisa. <sup>18</sup> Hatyaoseta enahalakoaharenai kaoka xakore hoka maisa iniyalahare enómane tahi xakaitaha, nahekohenere akere.

<sup>19</sup> Hawenanahoha xemere taita nika nikare mokahitene. Hatya haliti koxaka wainihenere Jesus nexarexe xemere tehitiya nikare mokahitene. Hoka Paulo atyo hatyo haliti kaseta aoka. <sup>20</sup> Hoka komita ene maisa waiyekehalakita nomani hatyo akiti. Hatyo hiyeta Paulo naxa, xoana Jerusalém nali xamani xane aokowita hoka hatyo tahi akiti kakoa kaxaxalisaka hatyo nali aokita hoka. <sup>21</sup> Xakore hoka Paulo Roma nali xane aokowi Kalorexe sema maheta etahi hoka kamiyane maheta. Hoka hatyaoseta berexo ako exomokaka naoheta naxikahenerene Kalorexe Roma nali tyaonitere ana kijiya.

<sup>22</sup> Hatyaoseta Agripa nexa Festo hiye: — Kasani natyo tehitiya nasema naokowi hatyo haliti niraene.

— Maika ite makani hasema iniraene — nexa Festo.

<sup>23</sup> Kamaetali Agripa Berenice kakoa mokaharetyoa hoka isoa kahare haliti, sorarenae, xekohasetinae hare kakoa. Wenakalati kalorexe tyaoniterenaé hare kakoa isoa semaxematyaha maheta. Hatyaoseta Festo Paulo kawisa.

<sup>24</sup> Paulo isoa hoka hatyaoseta Festo nehena: — Xekohaseti Agripa, exahe xiso ali tyaoniterenaé hoka xiyaiyehena exe haliti! Exe kakoa aliyere judeunae, exahe Jerusalém nali tyaoniterenaé hoka kahalakoahareta hoka exaisaka aokahitaha nohiye. <sup>25</sup> Xakore hoka nomani atyo maisa xoare hare tyomare hoka exaisaka aokahitaha. Hoka haxaxikatyaka aoka Roma nali Kalorexe ana hoka exaokala akeretaite namokene.

<sup>26</sup> — Hoka kalikini kakoita maisa waiyekehalakere nomani noxaxikali niyahare noxairali etahi akiti Kalorexe ana. Hatyo hiyeta ali nanolokene xahalakoa, exahe hiso xekohaseti Agripa nahalakoa kaisere hoka haxene maheta. Nikare ite hoka nawaiyore naxairatya etahi akiti. <sup>27</sup> Hiyaiya, nomani atyo hoka maisaiya aliyakere hatya eberexotyakahare tyaonitere haxikaita Kalorexe ana maxawaiyekehalakatyakahareta etahi akiti.

**Paulo Irae Agripa Nahalakoa Kahawaonitaretyoawi Maheta**

**26** Hatyaoseta Agripa nexa Paulo hiye: — Hiraihena iniraineha nahalakoa.

Hatyaoseta Paulo aimatya hakahe irae maheta iniraine nahalakoa: <sup>2</sup> — Xekohaseti Agripa, kalikini nihalahare hihaotita niraihena notahi akiti judeunae niraeharera natyo nahalakoa. <sup>3</sup> Hiso homana judeunae nawenane, xaotyakiraho harenae masakare waiyekehalakita. Hoka maika hasema niraini himaholowakene-ta.

<sup>4</sup> — Tyotya judeunae waiyita nawenani noxoimahalinitita kalikini kijiya, exahe Jerusalém nali hoka noxoimahrenitita kalikini kijiya. Noxoiminita nowaikohiri exahe Jerusalém nali notyaona, hatyo hare waiyekehalakita enomanaha. <sup>5</sup> Waiyekehalakita enomanaha, xakaihaiya aokowiha hatyo akiti hoka xakaihaha: noxoiminita atyo fariseunae nawenanaho notyaona. Fariseu nawenane atyo maisa mahowitiharexe xini.

<sup>6</sup> Hoka kalikini ali notyaonita hoka exakere nokaxomokakita Enore isa aokowihenerehare wahetakomaniyereharenae ana natyahitere hiyeta. <sup>7</sup> Hiyaiya, wiso Israel yerenaé hotyaliharenae atyo 12-hare hoka wawaiyetyahitaha Enore ferakoa, makiya harenae. Atyahahitaha tehitiya atyo natyo akereta Enore isa aokowiterehare xahita. Hoka hasemehena, Xekohaseti, hatyo natyahitere hiyeta exakere judeunae kahalakoahareta nokakoi.

<sup>8</sup> — Xoanere hoka maisa xityakekore Enore xekasekiriheta kamatinae?

<sup>9</sup> — Natyo tehitiya hetati ene nikare nahekoita hoka kalore nokahalakoihareta Jesus Nazaré yere koamaniya tyaoniterenaé kakoa. <sup>10</sup> Jerusalém nali nikare notyaonita. Naberehotya kahare Enore kaxaikone hotyali, sacerdotenaé xekohasenaé niraene kakoare notyaona hoka. Exaisakaha aohenaha hoka natyo tehitiya naokita exaisaka. <sup>11</sup> Kahareki iniyalahare namokahitene xahohisakoatyakalati hananaé nihatyaka, exahe namahokoanetita etyakekoneha. Aehalikisahitaha natyo hoka noxanita haiyanaé wenakalatikoanaé iniyalahare namokahene maheta.

**Paulo Xakai Jesus Koamaniya Hawenane Tah**

(Atos 9.1-19; 22.6-16)

<sup>12</sup> Heko Paulo iraeta: — Nikare iniyalahare namokahene maheta, noxanita Damasco xeta sacerdotenaé xekohaseharenaé niraenexa xema hoka <sup>13</sup> exakere notyaona, xekohaseti. Totahikoahena hoka nowaiya xaokanatyakalati tyoanene enokoata, kamae xaehare werokene. Hoka hatyo xaokanatyakalati werokakoa moka nohoko haliya, exahe haiyaharenai tyoiterenai noximi hoko haliya hoka. <sup>14</sup> Wityotya wexoa waikoa hoka nasemehena atyo, iraeahena atyo nokakoi hebreu xako: “Saulo, Saulo, xoana hoka hiyalijinihare noxahiti? Hisota atyo iniyalahare haxomokanikijoita. Bowi hatotokakala kase xahita tyahakahiyakatya hoka kawemokoawitere akere atyo hisaonita”, nexa nohiye.

<sup>15</sup> — Hatyaoseta naxene: “Xala hiso, Xekohaseti?” nomi. Hoka nexa nohiye: “Natyo atyo Jesus hiki-rawanetere”, nexa nohiye. <sup>16</sup> Hatyaoseta: “Hainakoa-hetehena, hatityoahetehena. Nowakanihare naoka hiso maheta nokaotyaki homana hiyakai maheta halitinai hiye kalikini hiyaiterehare, exahe exe najikinita nahotikihenerehare homana tahi akiti hiyakai maheta. <sup>17</sup> Nokaxaiko ite hiso judeunai nonitata, exahe majude-neharenai nonita. Hiyaiya, hatyonai konite naxikatya hiso. <sup>18</sup> Hiso atyo ite haotyakihenahene hoka iniyalahare wenati nonitata wenati waiyexe maniya hamohenahitehenahene. Hoka Tihanare nonitata Enore koamaniya haxomokanikihenahitehenahene. Hoka tyakekohenahere natyo hiyeta ite iniyalahare enómaneha kamaotyanyakeheta hoka Enore aohenere haomanere hotyalinai koni tehitiya tyaohenahitaha”, nexa.

### Paulo Xakai Hahatene Tahi

<sup>19</sup> Hatyaoseta Paulo hairaene halakihena maheta hoka nehena: — Xekohaseti Agripa, enokoata nokax-awaiyanikisakihenere atyo maisa nomatyakekonita. <sup>20</sup> Damasco nali hotohare noxani noxakai iraeti. Hatyaoseta Jerusalém nali, exahe Judéia koa hakakoare. Majudeuneharenae hiye noxakaihitiya. Hoka nomita ihiyeha, halakisaha iniyalahare háomaneha hoka Enore koamaniya tyaohenahita hoka waiyemaniya tyaohenahitaha hoka katyakekotyakaha maheta. <sup>21</sup> — Hatyo hiyeta Iraexatyakalati Hanakota judeunae otoka natyo hoka aisaha aokowiha natyo. <sup>22</sup> Xakore hoka kalikini kijiya Enore kahinaetita natyo. Hiyeta hoka noxakaita iniraine tyotya halitinae hiye, wakaharenae, kalorexena harenae hiye. Iraitu xakaisaseharenae Moisés xoaha xoalini hare kaotyakene tahi xakaihena here akereta atyo noxakaita. <sup>23</sup> Hiyaiya, exakere atyo xakaihaha: “Enore Kalorexe Aohenere ite kaxaisaka hoka hatyo hotohare ite kaseheta. Hoka hatyota wenati waiyexe xaka kaxakaisaka judeunae hiye, majudeuneharenae xoaha hiye”. <sup>24</sup> Exakere Paulo hatahi iraeta ene hoka Festo kinatyaxa irae: — Hihatyahareta, Paulo. Kalore hikaxaotyakisaka hoka hihatyaharexe moka. <sup>25</sup> Paulo nexa Festo hiye: — Maisa atyo nohatyahareta xini, xekohaseti Festo. Waiye atyo noxahekoli tyaonita hoka aliterexe niraeta. <sup>26</sup> Hatyaoseta nexa xekohaseti hiye: — Xekohaseti Agripa, hihaotita niraeta hoka nihalahareta niraitere akiti kakoa, hawayiore tyare exeharenae akiti kakoa hoka. Hiyaiya, maisa atyo hatyoharenae hakiti meta-harexe akiti xini kaotyaka. <sup>27</sup> — Xekohaseti Agripa, xoana hityakeko Iraitu Xakaisaseharenae xakaini? Hityakekota terota naoka, xekohaseti. <sup>28</sup> Hoka Agripa nexa ihiye: — Xoana motya hiyaheko-la hiye hoka haxerore Cristo koamaniya nawenatyasehare notyaona haokita?

<sup>29</sup> Hoka Paulo nexa: — Enore xaokalita ite hoka xoana haxerore xamani, xoana waha najikinita xamani ite Cristo koamaniya hisaona. Exahe maisa hiso taita xini hoka kalikini ali tyotya semaxemaiterenae kakoitaite natyo akereta Cristo koamaniya xisaona. Xakore hoka maisaiya atyo exehare kamatiherahi kakoa xikaberexotyakita.

<sup>30</sup> Hatyaoseta xekohaseti Agripa, Festo, Berenice exahe tyotya haiyaharenae nali tyaoniterena tityoahenahitaha hoka hikoahenahitaha. <sup>31</sup> Hikoahenahitaha hoka iraesekoatyaha hatyo tahi: — Exe haliti maisa xoare tyomita. Maisaiya xoare maheta kaxaisakita, kabereboxotyakita harenae.

<sup>32</sup> Hatyaoseta Agripa nexa: — Ikoia awa Roma nali kalorexe tyaonitere ana kaxaxikatya aokita hoka kalikiniya kaxaihikoatyakeheta berexo akota.

### Paulo Xane Roma Xeta

**27** Hatyaoseta axikatya aokowiha wiso Itália xeta. Hoka Paulo, haiyaharenai berexo ako tyaoniterenai harenai isaha sorare xekohasehare Júlio nexare ana. Júlio hotyaliharenai xaokaka atyo, “Kalorexe Augusto sorarexanai”, nexahitaha.

<sup>2</sup> Hatyaoseta wakakoha kanowa ako wenakalati Adramítio nalitare.

Ásia koa xetare hatyo kanowa. Hatyaoseta wiyane. Aristarco, Macedônia yere, wenakalati Tessalônica tare toa wiyema. <sup>3</sup> Kamaetali hoka wiyane wikaoka wenakalati Sidom nali. Júlio waiye mokita Paulo hoka halakisene, xane waiya hahinaeharenai hoka xoalini hare aokitereharenai isaha enomana maheta.

<sup>4</sup> Hatyaoseta Sidom nalita wijiyehtiya hoka iy-olirotikoa tyaohenere Chipre haliya wijiya, hoholati ehaikoawini wiyahita hoka. <sup>5</sup> Hatyaoseta wiyane wakatalatya Cilícia xa, Panfília xa xoaha. Hoka wiyane wikaoka wenakalati Mirra, Lícia koa nali. <sup>6</sup> Hatyo nali Júlio ahalakoatya kanowa wenakalati Alexandria nalitare. Itália xetare hoka hatyoako aisoakisa wiso.

<sup>7</sup> Wiyanehtiya akaiki ferakene, wawaiyexakahare wiyaneta. Howitihare xakore hoka nikareta wiyane wikaoka wenakalati Cnido haliya. Hatyaoseta hoholati, ehaikoawiniheta wiyahita hoka wexahiyatya Creta iy-olirotikoa tyaohenere nali. Hatyaoseta wijiya wenakalati Salmona maniya. <sup>8</sup> Nikare one kilihi makere, howitihare wiyaneta. Ekakoita wiyane wikaoka Xamematyoakalati Waiyexe aokahitere nali, wenakalati Laséia haliya.

<sup>9</sup> Waha nali wisaona. Hoka hatyo xowakiya kahenehare netonatyaka tyaonita kintya winiti hiyeta, exahe koxaka Iniyalahare Maotyanyatya hisehare ferakene kajiyane.

Hatyo hiyeta Paulo nexa: <sup>10</sup> — Xasemehena, exe taita wijiyehtiya hoka kaheneharehena witonane tyaonita womana. Kolare ite meta, exahe kanowa ite hoka. Haiyanai ite waini tehitiya — nexa.

<sup>11</sup> Nexa hoka Júlio, eberexotyakaharenai kolatyasehare maisa tyakekota Paulo niraene. Hoka kanowa

kaxaikotyasehare, exahe kanowa xekohasehare xoaha niraene atyo tyakekota.

<sup>12</sup> Hatyo xamematyoakalati nali maisa waiye xatya-hakere tihere tyoteneheta xahita. Hiyeta hoka nalita wijiyehitiya aokahitaha hoka nikare konita wiyane wikaoka Fenice nali aokahitaha. Hatyo xamematyoakalati atyo Creta nali. Hatyo nali atyo kanowa xamematyoakalaose tihalo maniya, exahe one holola maniya hoka tyaonita. Hoka hatyo nali tihere tyoteneheta xahita watyaha akatya aokahitaha.

### Kinatyawiniti Kahenehare Tyaona Onexa

<sup>13</sup> Hatyaoseta Egito maniyata inira hoholati kaokenhena hoka ahekohenahere akereta kaxanetyaka aohenaha. Hoka wanoloheta kanowa xamemakisakala hoka wiyane Creta kilihi maniya. <sup>14</sup> Wiyaneta ene hoka eharehena rota hoka kinatyawiniti kaoka womana iyolirotikoa tyaohehene maniyata. <sup>15</sup> Hoka hoholasekoatya kanowa hoka hamaniyatere axanikisene hoka maisa aliyakere wiyane waokowitere notota wamohititene. Hatyaoseta wahalakisene hoka hoholati hoholatene wikakoare.

<sup>16</sup> Hatyaoseta iyolirotikoa tyaohehene, Cauda nexarexe katyahe maniya wijiya. Hoka hatyo nali wijiyehena hoka howitihare wiyeheta kanowase.

<sup>17</sup> Hatyaoseta kanowa xaitonakisaseharenai ainakihenahitaha kanowase. Hatyaoseta olatetyaha kanowa kalorexe olawahi kakoa kintere tyaona maheta.

Mairahitaha kanowa hoholatyaka kaiholokoa Líbia kilihi maniya xeta hoka exoakihenahitaha kanowa xaitonakisakala imiti taose hoka hoholati xema taita kanowa tona.

<sup>18</sup> Hatyaoseta kahenehare kinatyawiniti heko tyaonita. Kamaetali hoka xawahenaha kolare kanowa akota onexaiya. <sup>19</sup> Nikare kamaetali hoka kanowa kaxaikotyaseharenai kanowa xiyehare xawatyaha onexaiya. <sup>20</sup> Kahareki ferakene maisa aliyakere wiyaiyare hekoti kamai, xoresenai. Hoka hekoti hoholati hoholaita. Hatyaoseta wimakamanene xahita wahekoitere tyoty wonita hoka wikamane xahita taita watyaha-hena.

<sup>21</sup> Wahehena wimanakairahare wisaonita hoka Paulo enenekeseneha tityoa hoka nehena: — Xasemehena, ikoia niraini xasemaxematyare hoka Creta nalita wisaonare hoka maisaiya kalikini exakere wisaonare. <sup>22</sup> Hoka awa atyo ximawaiyeharehena. Maisaiya xala hare wainita. Kanowa taita ite meta. <sup>23</sup> Hiyaiya, exe xatini anjo Enore nalitare kaotyaka nomani. Enore kaxaikonehare atyo natyo, exahe enomana atyo nahakita. <sup>24</sup> Anjo kaotyaka nomani hoka nexa nohiye: “Paulo, awa atyo himaira. Hiyaiya, hiyanite hikaoka Roma yere xekohaseti nali. Maisaiya hiwainita, exahe exe xaneterenai hikakoa hoka maisaiya xala hare wainita”, nexa nohiye. <sup>25</sup> Hiyeta hoka awa atyo ximawaiyeharehena. Enore atyo notyakekota hoka iraehehene nokakoi akereitate tyoma. <sup>26</sup> Xakore hoka hakiti iyolirotikoa tyaohehene nalite wiyane wahikoa hoka wikaxawatyaka — nexa Paulo ihiyeha.

<sup>27</sup> Nikare makere wiyaneta. Hinama semanane najikinita, makiya, kinatya winiti hoholasekoaita wiso Mediterrâneo xa nali. Kala wahaxatihena hoka kanowa xaitonakisaseharenai ana waiyekehalakehena wahikoahena waikohe ana.

<sup>28</sup> Hatyaoseta olawahi timenere kakoare xawatyaha one xaiya hoka 36-metrone hatekonexa hatyaose akiti. Wijiyehitiya hoka aimenekohenahitiyaha hoka 27-metrone hatekonexa taitehena. <sup>29</sup> Hatyaoseta mawaiyeharehena kanowa sehalinai hiye mokoxatyoane kakoa. Hatyo hiyeta 4-hi olawahi timenere kakoare exoakisaha kanowa tyokoli maniya maetonanetene maheta. Hatyaoseta iraexatyaha haxerore ferakoa maheta. <sup>30</sup> Hatyaoseta kanowa xaetonakisaseharenai tekoaha aokowihenaha kanowa akota hoka exoakisaha kanowase onexa. Hoka kanowa xamemakisakala exoakisahitaha enaheta maniya aokowiha, hamaoseralaha.

<sup>31</sup> Hatyaoseta Paulo nehena Júlio, exahe sorarenai xoaha hiye: — Kanowa xaitonakisaseharenaiya halakisa kanowa hoka xiwaini — nexa.

<sup>32</sup> Nexa hoka hatyaoseta sorarenai irikoty kanowase xola hoka halakisahene onexa.

<sup>33</sup> Ferakoahena hoka Paulo iraehehena ihiyeha, kasani kanakairaha aokita hoka nehena: — Koxaka 14-ki ferakenehena xatyahita taita hoka hatyoki ferakenenai maisa xoare hare xikanakairare. <sup>34</sup> Hoka maika kalikini xalini hare xikanakairehena naoka. Xikanakairehena hoka maisa xiwainita. Hiyaiya, maisaiya xala hare sekase hakase hekoti mitita — nexa.

<sup>35</sup> Hatyaoseta Paulo iya nakairati hoka ehaotyahitaha iraexatya Enore hiye. — Ehekere waiye hamokita wiso, Abá — nexa. Hatyaoseta iraka nakairati hoka kanakairahena. <sup>36</sup> Hatyaoseta aihalahalnikisahene hoka kanakairehena. <sup>37</sup> Kanowa ako wihohisakoane 276-hare.

<sup>38</sup> Kanakairehenehene najikinita trigose sakone tyoty xawatyaha one xaiya, kanowa amala tyaona maheta.

### Tyotyaha Waiyeta Kaokaha

<sup>39</sup> Ferakoa hoka kanowa xaitonakisaseharenai ana maisa waiyekehalakihitita waikohe. Xakore hoka waiyaha one talakoanexa kaiholokoa hoka hatyo nali kanowa atakoakisaha aokowiha. <sup>40</sup> Hatyaoseta irikotyaha kanowa xamemakisakala nanohi hoka halakisahene one xaiya hoka aolikaha eremo, kanowa xaimoakisakala. Hatyaoseta kanowa nimitira taose ainakihenahitaha enaheta maniyere hoka kaiholokoa notota xane maheta. <sup>41</sup> Xakore hoka kanowa kolatyoa kaiholo waiyetoli tyaoitere hiye. Enaheta maniyere kolatyoa kaiholo hiye hoka ityokoli maniyere kinatyaxere taikakoahena.

<sup>42</sup> Hatyaoseta sorarenai aisaha aokowihena eberexotyakaharenai, kasani maisa hatya hekoti enekonitareha kaiholokoa nali xane hikoa hoka tekoa aokareha hoka. <sup>43</sup> Xakore hoka sorare xekohasehare, kasani Paulo maisa kaxaisaka aokita hoka watyali ahene. Ho-

ka hatyaoseta irae waiyore maxakoiterenai hiye hoka hatyonai hotohare one xaiya halaisoaha hoka maxakoaha kaiholokoa xeta aoka. <sup>44</sup> Irae tehitiya haiyaharenai mamaxakoanehrenai hiye. Hoka atya taose xamani, kanowa hiyetare taose hiye xamani otokoaha hoka malaloaha hoka maisa wainyahitaha aoka. Hatyo aokitere akereta wiyane wityotyá watákoa kaiholokoa nali, maisa xala hare wainita.

### Enawenaneha Malta Nali

**28** Wiyane watákoahenere waikohekoa najikinita waiyekehalaka womana. Hatyo iyolirotikoa tyao-henere nexare nika atyo Malta.

<sup>2</sup> Nali tyaoniterenai waiye moka wiso. Oneta hoka tiha aka tyaonita hoka kalore fakihityaha. <sup>3</sup> Hoka Paulo xane olahisetya mowisati hoka tyoa xawatita ene irikatyaose hoka owi tekoahena watere nonitata hoka alalatyoa Paulo kahe hiye hoka tyalokene.

<sup>4</sup> Hatyaoseta hatyo iyolirotikoa nali tyaoniterenai, waiyaha owi xalalatyoane Paulo kahe hiye hoka nexaha: — Exe haliti ala aijitaterehare. Maisa wainita one xaiya, xakore hoka maisaiya maxaisakita — nexaha.

<sup>5</sup> Xakore hoka Paulo xaxakahisa hakahe hoka owi irikatyaose exoa hoka maisa xoare kihixita hahiye.

<sup>6</sup> Wahakotyahitaha taita enomana, motyaite faka ihiye xamani, xoana wainihena rota xamanite aokahitaha. Wahakohenaha mene enomana hoka maisa xoana tyaonare hoka hawarehare ahekohenahitayaha hoka nehenaha: — Kala enore — nexaha.

<sup>7</sup> Hatyo haliyaseta Públio nexarexe kawaikoherere. Hatyo atyo iyolirotikoa tyao-henere xekohasehare. Waiye moka wiso hahanako hoka hanamaki ferakene wisaona ehanako. <sup>8</sup> Enexe hokakita hoka ehokotyaita taita kamakoa, watyahiseta exahe ityako hare kaweta. Hoka Paulo xane isoa hoka iraexatya enomana, hakahe ekaokakisa ihiye hoka aiyatelikihetene.

<sup>9</sup> Hatyo najikinita tyotyá hatyo iyolirotikoa nali hokakiterenai tyoaha hoka aiyatelikihenahitene.

<sup>10</sup> Hatyaoseta nali tyaoniterenai kahare xoalini hare isaha womana. Wijiyehitiya hoka wiyane niyahare tyotyá waokitereharenai isaha womana.

### Xaneha Malta ta Roma Xeta

<sup>11</sup> Hanamali kaimare iyolirotikoa wisaohenere najikinita wijiyehitiya hatya kanowa Alexandria tare ako, "Haximarene Kakoa Haxawalita Tyao-henerenai" nexarexe ako. Hatyo kanowa atyo iyolirotikoa nali atyahaheta tihere tyoteneheta xahita.

<sup>12</sup> Hatyaoseta wiyane wikaoka wenakalati Siracusa nali hoka hanamaki ferakene wisaona. <sup>13</sup> Hatyaoseta wijiyehitiya hoka wiyane wikaoka wenakalati Régio nali. Kamaetali hoka África maniyata hoholati hoholahena hoka hatyo hiyeta hinamaki ferakene kakoita wiyane wikaoka wenakalati Puzuoli nali. <sup>14</sup> Hatyo wenakalati nali haiyaharenai tyakekohatiyenai ana wiyane wikaoka hoka hasemanane wisaona ehaliyaha aokaha. <sup>15</sup> Wihinaeharenai Roma nali tyaoniterenai se-

ma wikaokene hoka tyoa ahalakoatyaha wiso wenakalati Ápio nali, exahe wenakalati Hanama Betetyakalati aokahitere nali akiti tehitiya haiyaharenai ahalakoatya wiso. Paulo waiyahene hoka ihalahare Enore kakoa, exahe ihalahare tyaona.

### Paulo Kaoka Roma Nali

<sup>16</sup> Wiyane Roma nali wikaoka hoka Paulo halakisaha hoka haxaokala ximita tyaona. Xakore hoka hatya sorare kaxaikotene. <sup>17</sup> Hanamaki ferakene najikinita Paulo kawisa judeunai nityohalitiranai, Roma nali yerenai, ahalakoatyahene maheta. Ahohisakoatyakakoaha hoka nehena: — Nohinaeharenai, maisa nokahalakoi-harexe wihinaeharenai kakoa, exahe maisa nokahalakoi-harexe wawenanaho, wahetakomaniyere harenai aotyakihenere wiso kakoa. Xakore hoka judeunai berexotyaha natyo Jerusalém nali hoka Roma yerenai ana isaha natyo. <sup>18</sup> Hoka hatyonai axalisaha natyo hoka halakihenahitaha natyo aokowiha, maisa maxemehareta nokaxaisaki aokahitaha hoka. <sup>19</sup> Xakore hoka judeunai atyo maisa nohalakisakiheta aokita ihiyeha. Hatyo hiyeta naxahene hoka Kalorexe ana no-tyoa hoka sema notahi maheta. Xakore hoka maisa atyo natyohotyalihare niraeharetya maheta xini.

<sup>20</sup> Hatyo hiyeta naxa xiso, nowaiyeheta xiso, exahe wirae kakoa maheta. Israel hotyalinai atyahitere xahita hiyeta nokaxolatyaki exe kamatiherahi kakoa — nexa.

<sup>21</sup> Hatyaoseta nehenaha ihiye: — Maisa babera kaokare womana Judéia koa nalitare hitahi akiti. Exahe maisa wihinaeharenai hatyo nalita kaokehenaha hoka xakaiye wihiye hitahi akiti, exahe maisa irae-haretyareha hekoti hiso. <sup>22</sup> Xakore hoka wasema waokowita hiyahekola. Hiyaiya, wasemita atyo hakakoare hatyo hisaoniteraho kakoa kahalakoahare ahitere tahi akiti taita — nexaha ihiye.

<sup>23</sup> Hatyaoseta aimenekotyaha haxahalakoatyakakoaneha ferakene Paulo kakoa. Hatyaoseta exaimenekolaha ferakenehena hoka kahareha xaneha Paulo tyaonitere nali. Witita hoka heko maka ihiye haxakaihakala ihiyeha kakoa hoka awaiyekehalakatya enomanaha wenati Enore koamaniya tahi akiti. Moisés xaotyakiraho, iraeiti xakaisaseharenai xairala harenai tahi kakoa awaiyekehalakatya enomanaha hoka hotikisa Jesus tahi akiti enomanaha. — Hiyaiya, hatyo atyo Enore Kalorexe Aohenere — nexa ihiyeha, aiyateretyoa exahitaha.

<sup>24</sup> Haiyaharenai atyo tyakeko iniraene hoka haiyaharenai atyo maisa tyakekota iniraene. <sup>25</sup> Hatyaoseta tyotyá xanehenahitaha enonita hoka hatyo kakoa makere irae kakoaha. Xanehenahitehenere nahitita Paulo nexa ihiyeha:

— Aliterexe nika Isekohaliti Waiyexe kaxaihakoretya Isaías hoka iraeiti xahetakomaniyereharenai hiye.

<sup>26</sup> Hiyaiya, exakere atyo nexa:

Hiyanehena hoka hexa judeunai hiye: Xasemenite, xakore hoka maisaite waiyekehalakita xomana. Xawahakotyaita, xiyaenite xakore hoka maisaite waiyekehalakita xomana.

<sup>27</sup> Hiyaiya, hatyo halitinai xahekola atyo maisa waiyexe. Jihotyahita hatanakoakonaeha, exahe jihatyahitaha haxosenaeha. Ikoiya awa nikare tyaonahitaha hoka haxosenaiha kakoaiya waiyehenahitaha, exahe hatanakoakonaiha kakoaiya semahita hoka waiyekehalakaiya enomanaha. Hoka tyaohenahitahiya nokoamaniye hoka naiyatelikihenahiteniya, nexa Enore.

<sup>28</sup> Hatyoseta Paulo halakihena hairaene hoka nexa: — Xasemehena, Enore atyo axikatya Iraeti Waiyexe majudeuneharenai ana kaiyakehenahitaha maheta. Hoka

semahenite hoka aokahenite haomanaha — nexa ihiyeha.

<sup>29</sup> Hatyaoseta semaha iniraene hoka xanehenahitaha. Hoka hatyo kakoaha makere kinatyaxa irae kakoaha.

<sup>30</sup> Hatyo najikinita hinama terehokoane Paulo tyaona hati axehenere ako. Hoka kahare haiyaharenai xane waiyitene hatyo nali. <sup>31</sup> Xakaita ihiyeha Enore koamaniya nawenatyaka tahi akiti, exahe Xekohaseti Jesus Cristo tahi hare xakaita ihiyeha hamamairanenehare kakoita. Maisa xala hare mahokoanityare iniraine.



# Romanos

## Iraiti Waiyexe Tyotyta Halitinai Anere

<sup>1</sup> Natyo Paulo naxairatya exe babera. Natyo atyo Jesus Cristo wakanehare exahe iniraene kakoare. Enore atyo aoka natyo hawakanehare maheta hoka axikatya natyo noxakai Iraiti Waiyexe maheta halitinai hiye.

<sup>2</sup> Toahiya xowaka exe Iraiti Waiyexe kakaisaka iraiti xakaisaseharenae hiyeta. “Exe Iraiti Waiyexe halitinae anere”, nexa Enore hoka Iraiti xakaisaseharenae xairatene babera waiyexe nanekoa. <sup>3</sup> Enore irae Haisani Wiyekohase Jesus Cristo tahi, xekohaseti Davi hotyalihare nerekatu exaokaka. Haliti waiyekoarehare akereta tyaona Davi ene nawenakala nali. <sup>4</sup> Enawenane waiyexe atyo kaotyaka kasehetehenere haiyaterere kakoare xowaka hoka hatyo hiyeta Enore Ityani kaxaokaka.

<sup>5</sup> Hiyeta atyo Enore iraiti kakoare moka natyo Cristo hatene nahaka maheta. Tyotyta haliti hotyaliharenai hiye noxakaini hoka tyakekoha exahe tyaonaha exema maheta.

<sup>6</sup> Hoka hatyonai konitare atyo xiso Roma nali tyaoniterenai. Xisonai tehitiya atyo Enore aoka Jesus Cristo anerenai xisaona maheta. <sup>7</sup> Hiyeta exakere naxairatya xiso Roma yerenai ana, xiso Enore awaiyetiterenai exahe hahotyaliharenai aohenerenai ana.

Maika wenati waiyexe, Wexe Enore mehaxaikharene exahe Wiyekohase Jesus Cristo xoaha nalitare tyaona xikakoa.

## Paulo Niraexala

<sup>8</sup> Exe hotohare nirae naokowita: Jesus Cristo hiyeta nihilahareta Enore kakoare xihiyeta. Hiyaiya, hakakoarehena xityakekone tahi semahitaha. <sup>9</sup> Xasemehena, Enore ana nahakita nihilahalini kakoare, Waiyexe Iraiti noxakaita Ityani tahi akiti. Natyo atyo niraexatya xomana tyotyaki ferakene. Hatyo akiti waiyekehalakita Enore ana. <sup>10</sup> Niraexaita xomana. Naxita Enore hoka exaokalitaiya hoka notyooa nowaiyeheta xiso. <sup>11</sup> Kasani nowaiyeheta xiso hoka naotyakisa naokowita xiso waiyexe kakoare hoka xikinaterere xisaona maheta. <sup>12</sup> Exakere atyo nirae naokowita, kasani atyo wityotyta, natyo, xiso xoaha atyo haxowakita wakahinaetyakakoa naokita hoka xikinaterere xisaona notyakekoni hiyeta, exahe natyo tehitiya hoka nokinaterere notyaona xityakekone hiyeta.

<sup>13</sup> Nohinaeharenae, kasani exeharenae waiyekehalakita xomana naokita. Kahaliki xakore notyooa nowaiye-

heta xiso naokowita hoka xoalinihare tyaonita nomani hoka maisa aliyakere notyooare. Kasani nohateni tehitiya kekoare xinekoni naokita, haiyaharenai majude-neharenae koni nohateni kekoaretere akereta.

<sup>14</sup> Nikarexe terota atyo nohateni: owiteneta tyaoniterenae, exahe seko tyaoniterenae, exahe koxaka kaxaotyakisakitereharenae, exahe mawaiyoreharenae harenai atyoite naotyakhena. <sup>15</sup> Hatyo hiyeta kalikini atyo nomimiye notyaonita Iraiti Waiyexe noxakaini kakoare xiso Roma tyaoniterenae hiye.

## Wityakekone Hiyeta Atyo Enore Haliti Waiyexe Aokita Wiso

(Romanos 3.21-26; 4.5; 5.1; 8.1; Gálatas 3.1-7)

<sup>16</sup> Maisa atyo nohaiharexe Iraiti Waiyexe noxakaini kakoare. Hiyaiya, hatyo atyo Enore niyaterere iyeheta maheta tyotyta tyakekohenerenae. Judeunai hotohare ite, hatyaosetaite majudeuneharenai. <sup>17</sup> Hiyaiya, Iraiti Waiyexe atyo hotikijita womana hoka Enore atyo haliti waiyexe aokita wiso wityakekone hiyeta, hetatita, imiyane kijiya, Iraiti Waiyexe iraetere akereta: “Xala xamani atyoite Enore haliti waiyexe aoka ityakekone hiyeta hoka tyaota mene atyoite”, nitere akereta.

## Halitinai Nómáne Iniyalahare Tahi

<sup>18</sup> Hiyaiya, Enore xeharene atyo enokoata tyoita tyotyta iniyalahare nomaseharenae ana. Hatyo iniyalahare háomanaha hiyeta atyo talatitaha Iraiti Waiyexe, kasani haiyanai maisa semahene aokareha hoka.

<sup>19</sup> Enore atyo iniyalahare mokahitene. Hiyaiya, halitinai ana waiyekehalakita etahi akiti. Enore ta atyo hatyoharenai hotikisa enomanaha. <sup>20</sup> Hetati Enore waikohe tyomehenere xowakiyita, enawenane mawaiyakahare, iniyaterere matyotenehare, enawaiyore harenai waiyekehalakita enómanenai hiyeta. Halitinai tyotyta hatyoharenai waiyaha hoka hatyo hiyetaiyo maisa xoare maheta teraharetyoahitaha. <sup>21</sup> Enore xakore waiyahitaha hoka maisa aiminisarahene, exahe hoka maisa ihalaharexeha ekakoa. Hatyo hiyeta exahekola-ha maisa waiyexe, motya makaliroti exahekola-ha tyaonita. <sup>22</sup> Waiyore xakore aokowitaha hoka hatyaharexeha atyo. <sup>23</sup> Enore makamanehare xema tyaonareha mahetare ene hoka enomakahare xema tyaonahitaha. Haliti xaimenekotyaka, kotehala, kirakahare, owi harenae xaimenekotyaka xema tyaonahitaha. Hatyoharenae atyo haenorexa aokahitaha.

<sup>24</sup> Nikare atyo hatyo halitinai tyaonita hoka Enore atyo halakisahene hoka haxahekolaha iniyalahare ximita tyaonaha hoka xalini hare iniyalahare kahai-haretyakere tyomaha hahinaeharenai kakoa maheta. <sup>25</sup> Enore niraene aliterexe atyo halakisahana hoka maoseratyati xema tyaonahitaha. Enore tyomehenere-harenae xema atyo tyaonahitaha, maisa enomasehare xema tyaonareha. Enore nómanenai hiyeta ene atyo kaihaharetyakehena ekakoa maheta ene.

### Wenati Iniyalahare

(1 Corintios 3.3-4; 10.6-10; 2 Corintios 12.20-21; 1 Timóteo 1.9-10)

<sup>26</sup> Hatyoharenae tyomahitereharenae hiyeta Enore halakisahene hoka kahaiharetyakere tyomahitaha, exahe ohironae kakoita hoka haohironehatyanae kakoa iniyalahare tyomita. Maisa ene hatyoharenae kaomaka maheta ene xini. <sup>27</sup> Exahe enanae tehitiya hoka halakisahana ohironai hoka xane hatya haenanehatya kakoa iniyalahare, kahaiharetyakere tyomahitaha, kalore maiyasekakoahitaha hoka nikare tyaonahitaha. Nikare tyaonahitaha hoka hatyotaha atyo iniyalahare axomokanikisoahitaha hoka iniyalahare kaxomokakahitaha hatyoharenai hiyeta.

<sup>28</sup> Maiha Enore tahi akiti aliterexe semaha aokowiye-ha hoka iniyalahare xahekotyati isa enomanaha hoka tyomaha maheta xalini hare hamaomanenehareha niyahare maheta. <sup>29</sup> Maisa waiye ahekotyareha, maisa waiyexeha. Xiyehaliti maiyasahitaha. Okoareha, aisahitataha, mokotyahitataha, maoseratyahitataha, xekahatiharetaha harenai. <sup>30</sup> Iraeharetyahitataha, exahe iniyalahare iraetaha hahinaeharenai tahi. Kirawanahitaha Enore exahe kinatere aokowitaha. Ahinityareha exahe aokowiharetyoareha. Kahare iniyalahare aomatikisahana hoka tyomahitaha. Maisa hanexenai niraene tyakekoreha.

<sup>31</sup> Ohiroareha, enatyaloha tyaonahitaha, maisa hairaene akereta tyaonareha, maisa kaisereha, exahe maisa haiyanai airakoaneharetyareha. <sup>32</sup> Waiyekehalakita atyo Enore xaotyakiraho enomanaha. Hiyaiya, xala xamaniya atyo nikare tyaonita hoka waiye xaisaka atyo, nitere. Hatyoharenae xakore waiyekehalakita enomanaha hoka hekota hatyoharenai tyomahitaha hoka haiyanae hatyo tyomahitere akereta tyomitere-nai atyo awaiyetyahitaha.

### Enore Xaxalira Tahi

**2** Nohinaehare, xoana hoka haiyaharenai hiraeharetita? Exahe atyo xala xamani hiso hoka maisaiya atyo hateraharetyoita. Hiyaiya, haiyanai xakore atyo hiraeharetita enawenaneha hiyeta hoka hatyo tyaonahitere akereta atyo hisaonita hoka hisota atyo iniyalahare maniya haxomokanikijoita. <sup>2</sup> Exe atyo waiyekehalakita womana: Enore atyo maisa iniyalahare nomasehare xini hoka ehokoreta atyo hatyoharenai tahi iraeta. <sup>3</sup> Hoka hiso nohinaehare atyo hisomita iniyalahare, haiyanai tahi hiraetere akereta. Hoka xoana hiyahakola hiyetaite hoka motyalaite Enore axalihenerere xowaka maisa iniyalahare mokita hiso haoki-

ta? <sup>4</sup> Xoana himatyakekoneheta kore Enore nawaiyexehare, maxeharenehare, exahe emamaxahareneharene? Waiyekehalakita atyo enawaiyexehare homana, kasani hahalakiheta iniyalahare hománenai aokita. <sup>5</sup> Hoka hiso atyo maisa waiye hahekotyare, exahe maisa hityakekohatiye. Hatyo hiyeta aeroretyoitata atyo iniyalahare hiyomokaka Enore haxeharene, exahe haxahekolana waiyexenai hotikihenerere ferakene niyahare.

<sup>6</sup> Hiyaiya, tyotya haliti ana, hatya xakini ana atyoite isehetehena tyomehenere akereta. <sup>7</sup> Hoka isaite wenati matyotenehare waiyexe tyomitereharenai ana, waiyexe tawitereharenai ana, aiminisarenai ana, wenati matyotenehare tawitereharenai ana. <sup>8</sup> Hoka hawawa aokowitereharenae, waiyexe mahokoanititereharenae hoka iniyalahare xema tyaonitereharenae ana atyoite haxeharene hotikihena. <sup>9</sup> Hatyo xowakehenaite hoka wenati howitiharexe, exahe xamaikohaliti harenaite kaotyakehena tyotya iniyalahare nomaseharenae ana. Judeunae ana hotohare ite kaotyaka, hatyaosetaite majudeuneharenae ana.

<sup>10</sup> Hoka Enore ite ihalaliti, xaiminisati, mehaxaikohaliti harenai isa tyotya waiyexe tyomitereharenae ana. Judeunae ana hotohare ite isa. Hatyaosetaite majudeuneharenae ana. <sup>11</sup> Hiyaiya, Enore ana atyo tyotya halitinae hakakoa hoka tyotya halitinae hakakoa mokita.

<sup>12</sup> Majudeuneharenae atyo maisa Moisés xaotyakiraho kakoare xini hoka iniyalahare tyomehenaha hoka maisa atyo Moisés xaotyakiraho xema xini kamawenekoaretyakahitaha. Hoka judeunae atyo Moisés xaotyakiraho kakoare hoka iniyalahare tyomehenaha hoka hatyo xaotyakiyaho aokitere akereta atyo iniyalahare kaxomokakahitaha. <sup>13</sup> Hiyaiya, Enore atyo maisa haliti waiyexe aokare Xaotyakiyaho semaxemaiterehare xini. Xaotyakiyaho aokitere akereta tyaonitereharenae atyo haliti waiyexe aokita.

<sup>14</sup> Majudeuneharenae atyo maisa Xaotyakiyaho kakoare xini. Hoka haxahekolaha ximita atyo tyaonahitaha Xaotyakiyaho aokitere akereta hoka hatyoha terota atyo haxaotyakira xema tyaonahitaha, maisa xakore atyo Moisés xaotyakiraho kakoareha xini hoka.

<sup>15</sup> Hawenaneha hiyeta atyo hotikisahitaha Xaotyakiyaho xairatyoare tyaonitere hamahiyaseha hiyexe. Exahekolaha atyo hatyoharenai aliterexe aokita ihiyeha. Hoka haiya xowaka examaikohalinikisahitene, exahe haiya xowaka hoka aihalahalikisahitene xoaha. <sup>16</sup> Hoka hatyo akeretaite, exe Iraiti Waiyexe noxakaitere akere-ta, hatyo ferakenehena hoka Enore ite Jesus Cristo hiyeta hotikihetehena tyotya halitinai xahekola meta-harexenai.

### Judeunai, Xaotyakiyaho Xoaha

<sup>17</sup> Xoana kaisere hisaonita? Hiyaiya, judeu haokowita, Moisés xaotyakiraho hityakekota, exahe hahinitita Enore kakoa xoaha. <sup>18</sup> Enore xahekola kakoa hawaiyoreta, exahe Xaotyakiyaho kakoa hikaxaotyakisakita waiyexe xema hisaona maheta. <sup>19</sup> Aliterexe atyo maxoseharenai xotokahisase hiso, xaokanatyakalati akere-

ta hisaonita makaliroti koni tyaoniterenai ana,  
<sup>20</sup> haotyakijita atyo mawaiyoreharenae, xoimanae  
 xaotyakisase atyo hisaonita. Aliterexe atyo hiraeta,  
 xaotyakiyaho nali atyo tyotyta waiyoliniti tyaonita, exa-  
 he xoalini hare aliterexe.

<sup>21</sup> Hiso haiyanai haotyakijitere, xoana hoka maisa  
 hisota haotyakisoawiye? Kaiwati xakore hama-  
 hokoanetita hoka xoana hoka hiso atyo hikaiwita?  
<sup>22</sup> Ohiro mawatyalisakene xakore haokita hoka  
 xoanere atyo hoka hiwatyalita? Maisa xakore  
 hawaiyetyare enore metalaharenai hoka xoana hoka  
 hikaiwita hatyo enore metalaharenai hanakotare xiye-  
 halitinai? <sup>23</sup> Hiso atyo hihalahareta Enore xaotyakiraho  
 waiyekehalakiterehare homana kakoa hiyeta, xakore  
 hoka hehaihalikijita atyo Enore, maisa exaotyakiraho  
 akereta hisaonire hoka. <sup>24</sup> Hiyaiya, exakere atyo Iraitu  
 Waiyexe kaxairatyaka:

Majudeuneharenae atyo iniyalahare iraeta minita  
 Enore tahi xiso judeunae hiyeta.

<sup>25</sup> Xaiko nomanere milihisiati xoalini hare tyoma  
 homana, hiso judeu ana, Xaotyakiyaho aokitere akere-  
 ta hisaona hoka. Xakore hoka maisaiya aokitere akere-  
 ta hisaonita hoka motyaiya maxaikotyakahare ene  
 hisaona. <sup>26</sup> Hoka majudeuneharenaia atyo maxaiko  
 nomanere milihesakahareha, xakore hoka xaotyakiya-  
 ho aokitere akeretaia tyaonaha hoka Enoreya atyo ex-  
 aiko nomanere milihesakaharenai akereta mokahene.  
<sup>27</sup> Nikare ite hoka xiso judeunaite xikairaharetyaka  
 majudeuneharenai hiyeta. Hiyaiya, maisa atyo  
 xaotyakiyaho akereta xisaonare, exairatyakahare xako-  
 re xaotyakiyaho xomana, exahe exaiko nomanere mili-  
 hisakahare xakore xiso hoka. Xakore hoka majudeune-  
 harenai atyo tyaonahitaha xaotyakiyaho xema, maisa  
 xakore atyo kaxaiko nomanere milihisakereha xini  
 eháreha hiye hoka.

<sup>28</sup> Nikare hoka xala kaisere judeu, exahe aliterexe ex-  
 aiko nomanere milihisakahare? Judeu kaiserehare atyo  
 maisa etakehare henekoa maniya taita haháre hiyexe  
 aikotiterehare xini. <sup>29</sup> Xakore hoka judeu kaiserehare  
 atyo etakehare waiye ahekoiterehare, etakehare  
 iniyalahare halakijiterehare. Enore Nisekohare atyo  
 nikare mokitene hoka Xaotyakiyaho exairatyakahare  
 atyo maisa xala hare nikare mokare. Hatyohare haliti  
 atyo Enore tyakekota, maisa atyo halitinai xini.

**3** Nikare hoka xoare maheta judeu kaxaokowisaka?  
 Exahe hoka xoare mahetaia womanere milihi  
 kaxaikotyaka? <sup>2</sup> Waiyehenaiya kahare maniyaata. Exe  
 hotohare: Enore halakisa hairaene judeunai ana. <sup>3</sup> Ho-  
 ka hatyaoseta? Nikare ite hoka haiyanaite maisa  
 tyakekotene hoka hatyo hiyetaite Enore tehitiyaite  
 maisa tyakekohatiye xini tyaohena? <sup>4</sup> Maisa atyo  
 nikare xini! Exahe atyoite tyotyaha maoseratyareha  
 taita hoka Enore atyoite hekota aliterexe niraetyase-  
 hare tyaohena. Hiyaiya, exakere atyo nexa Iraitu  
 Waiyexe etahi:

“Maika himamaoseralahare hikaxaokaka hiraehena  
 hoka exahe maika maisa xoare kawaiyakita hihiye  
 hikairaharetyakehena hoka”, nexa.

<sup>5</sup> Nikareya hoka iniyalahare wománe hiyetaia, Enore  
 maomaneharene iniyalahare hotikijita hoka xoare we-  
 henaite? Nikarala hoka Enore ala maisa waiyexe,  
 iniyalahare moka aokowihena wiso hoka? Kalini niraeta  
 haiyanae iraetere akereta. <sup>6</sup> Maiha nikarexe xini!  
 Enoreya maisa waiyexe hoka aliyakereya axalihena  
 halitinai? <sup>7</sup> Nomaoserali hiyetaia Enore katyakekotya-  
 ka, exahe xoalini hare tyomiterehare waiyexe waiyeke-  
 halaka hoka xoanaiya hoka hekotata iniyalahare  
 nokaxomokahiena, iniyalahare nomasehare akereta?  
<sup>8</sup> Xoanere hoka maisa wexare: “Nika iniyalahare wiso-  
 ma hoka hatyo iniyalahare hiyeta waiyexe kaotyaka”,  
 wexare? Haiyaharenai atyo nikare niraeta aokahitaha  
 hoka maoseratyahitaha. Hoka hatyonai atyoite maisa  
 waiye xini kaxomokaka.

### Maisa Xala Hare Waiyexe Aka

<sup>9</sup> Nikarala hoka wiso judeunae, majudeuneharenae  
 xahehare nawaiye wisaonita? Maiha nikare xini!  
 Hiyaiya, judeunae, majudeuneharenae xoaha atyo ty-  
 otyaha iniyalahare nomasehare makere. Koxaka haty-  
 oharenae noxakai xihiye. <sup>10</sup> Hiyaiya, exakere Iraitu  
 Waiyexe nexa:

Maisa atyo xala hare waiyexe aka, maisa hatya  
 hekoti.

<sup>11</sup> Maiha xala hare ana Enore akiti waiyekehalakere,  
 maisa xala hare taware Enore xahita.

<sup>12</sup> Tyotyaha haware tyaonahitaha Enore nonita, maisa  
 xoare tyomareha, metaha atyo. Maisa xala hare  
 waiyexe xema tyaonare, maisa hatya hekoti.

<sup>13</sup> Etororoneha atyo xawatyakalati majiholatyoare ak-  
 ereta tyaonita. Ininiseha hiyeta emaoseralaha hikoita  
 hoka komaniyaita haliti.

Ekanasakotaha iniyalahare iraitu hikoita, owi naikoli  
 xata kahe akerehare.

<sup>14</sup> Ekanasenaiha ako atyo iniyalahare taita tyaonita.

<sup>15</sup> Kaholawakahitaha hamokolaha exahe haxaisaneha  
 haliti kakoa.

<sup>16</sup> Aliyo xamani xane tyaohenaha hoka nali  
 mawenekoaretyahitaha, exahe xamaikohaliti harenae  
 halakisahitaha.

<sup>17</sup> Maisa atyo wenati waiyexe akiti waiyekehalakere  
 enomanaha.

<sup>18</sup> Exahe maisa atyo Enore aiminisareha.

<sup>19</sup> Hiyaiya, exehare atyo waiyekehalakita womana. Ty-  
 otya xaotyakiraho iraetereharenai atyo xaotyakiyaho  
 xema tyaonitereharenai anere. Hatyo hiyeta tyotyaha  
 materaharetyoanehareha tyaonaha maheta, exahe ty-  
 otya halitinai hoka iniyalahare nomaseharenai makere  
 tyaona maheta Enore nahalako. <sup>20</sup> Hiyaiya, Enore ana  
 atyo maisa xala hare waiyexe aka xaotyakiyaho  
 aokitere akereta tyaonitere hiyeta. Hiyaiya, xaotyakiya-  
 ho atyo haliti ana hotikijita iniyalahare enómaneha.

**Waiyexe Maniya Nawenatyakeheta Tyakekotyati Hiyeta**  
 (Romanos 1.16-17; 4.5-8; 5.1; 8.1; Gálatas 3.1-7)

<sup>21</sup> Hoka kalikini atyo Enore hotikisa halitinai ana  
 haxaokane haomana akiti hoka haliti waiyexe aoka-

hene maheta. Maisa atyo xaotyakiyaho hiyeta xini. Moisés xaotyakiraho, exahe iraiti xakaisaseharenai xoaha hatyohare tahi xakai. <sup>22</sup> Enore atyo haliti waiyexe aokita halitinae ityakekoneha Jesus Cristo hiyeta. Nikare atyo mokita tyoty tyakekohenerenai. Hiyaiya, maisa atyo hatya hawareharexe xini hatya nonitata. <sup>23</sup> Hiyaiya, tyotyaha atyo iniyalahare tyomaha hoka haware atyo tyaonahitaha wenati masakare waiyexe nonitata Enore nali. <sup>24</sup> Xakore hoka Enore atyo hawaiyexehare hiyeta maisa xoare aokita ihiyeha. Hoka haliti waiyexe aokahene, Jesus Cristo hiyeta waiye maniya mohenahitene hoka. <sup>25</sup> Enore atyo axikatya Cristo, atyalihose xaimaholatyaka hiye wainihenere hiyeta halitinae ityakekone hoka, Cristo hiyeta kaxemaisatyakeheta iniyalahare enómanenaiha maheta. Nikare Enore tyoma hotikisa maheta waiyexe háo-mané. Toahiya xowaka maisa kaholawakita halitinae nómanenai iniyalahare kakoa. <sup>26</sup> Xakore hoka kalikini atyo axikatya Cristo hotikisa maheta waiyexe háo-mané. Nikare hoka Enore atyo waiyexe nomasehare hoka tyakekoterenai Jesus haliti waiyexe aokita.

<sup>27</sup> Nikare ite hoka hatyoharenai hiyeta waokowihare-tyoahena? Mahaiya! Xoanereya hoka maiha? Xoana wisaonitere Xaotyakiyaho hiyeta? Maisa nikarexe xini! Wityakekotere Cristo hiyeta. <sup>28</sup> Hatyoharenai hiyeta waiyekehalaka womana. Hiyaiya, Enore atyo haliti waiyexe aokita ityakekoneha hiyeta, maisa atyo xaotyakiyaho aokitere akereta tyaonitere hiyeta xini.

<sup>29</sup> Hoka nikarala hoka Enore ala judeunai Nenorexa taita? Nikarala hoka maisala majudeuneharenai Nenorexa tehitiya xini? Há! majudeuneharenai Nenorexa tehitiya atyo. <sup>30</sup> Hiyaiya, Enore atyo haterore. Hoka haliti waiyexe aokita judeunae, majudeuneharenai harenai, ityakekoneha hiyeta. <sup>31</sup> Nikarala hoka wityakekohenerere hiyeta wemaisatya Xaotyakiyaho? Maiha atyo nikarexe xini. Hekota atyo Xaotyakiyaho kakoaretata wisaonita, wikaiyakehetenere najikinita.

#### Abraão Nawenane Tahi

**4** Hoka xoare wehenaite wahetakomaniyehare Abraão xaokaka? Xoarala tyoma? <sup>2</sup> Hiyaiya, enómané waiyexe hiyetai haliti waiyexe aokene Enore hoka nikareya hoka ehokoreya aokowiharetyoa. Xakore hoka mahaiya atyo Enore haotita xini. <sup>3</sup> Hiyaiya, Iraitai Waiyexe atyo nexa:

Abraão tyakeko Enore hoka ityakekone hiyeta haliti waiyexe aokene.

<sup>4</sup> Xala xamani atyo hahena hoka kabakatyakita atyo. Hatyoharenai atyo maiha ekahinaetyaketerere xini, enómanere terota atyo hatyoharenai. <sup>5</sup> Hoka xala xamaniya atyo maisa hakare Xaotyakiyaho aokitere akere-ta hoka Enoreya atyo ityakekone hiyeta haliti waiyexe aokene. Iniyalahare nomasehare xakoreya hoka haliti waiyexeya aokene Enore.

#### Waiyexe Maniya Nawenatyakeheta

(Romanos 6.23; 8.1-10; 1 Coríntios 15.2-4; 2 Coríntios 5.20-21)

<sup>6</sup> Exeharenai tahi Davi xakai aokowita etake Enore waiyexenai aohenerenai nihalaharene tahi irahenerere xowaka. Iniyalahare enómaneha maotyaneheta hoka hatyo hiyeta haliti waiyexe aokahene.

<sup>7</sup> Waiye kaiserehare atyoite tyoahena haiyaharenai. Enore atyo iniyalahare enómaneha maotyaneheta, exahe enómané iniyalahare hoka emaisaheta.

<sup>8</sup> Waiye kaiserehare atyoite hatya haliti tyoonehena, Enore atyo iniyalahare enómané maotyaneheta hoka.

<sup>9</sup> Hoka xoana exe ihalahaliti tahi Davi irahenerala exaiko nomanere milihisahahrenai anere taita? Maiha. Maxaiko nomanere milihisahahrenai anere tehitiya. Hatyo hiyeta Iraitai Waiyexe nehenerere wirahetiya:

Abraão tyakeko Enore hoka hatyo hiyeta haliti waiyexe aokene.

<sup>10</sup> Xoana xowaka Enore awaiyetene? Xoana Abraão kaxaiko nomanere milihisakehenere nahitita, xoana enajikinita kore? Enahitita, maisa enajikinita xini. <sup>11</sup> Wahenhena atyo hoka kaxaiko nomanere milihisaka. Hoka hatyo aikonomanere milihisoahenerere atyo Abraão hotikisa maheta taita hatyakekone. Enore ityakekone hiyeta haliti waiyexe aohenerene, emaxaiko nomanere milihisakitaterere nahitita hiyeta. Hatyo hiyeta Abraão atyo tyoty Enore tyakekohenerenai nexa, exahe haliti waiyexe aokahene, maisa xakore atyo kaxaiko nomanere milihisakereha hoka. <sup>12</sup> Exahe tyoty exaiko nomanere milihisahahrenai nexa tehitiya tyaona. Maiha exaikonomanere milihisakehenahere hiyeta xini. Xakore hoka Abraão tyakekone akereta tyoahenahere hiyeta. Hiyaiya, Abraão tyakeko Enore hamaxaikonomanere milihisahahrenai nahitita.

#### Enore Irae Abraão Hiye Hoka Tyakeko Iniraene

<sup>13</sup> Enore atyo halakisa aokowi waikohe Abraão ana, ijikohalaharenai xoaha ana. Nikare isa Abraão ana aokowi, xakore hoka maisa atyo Xaotyakiyaho xema tyaonitere hiyeta xini. Ityakekone hiyeta Enore haliti waiyexe aokene hoka waikohe isa enomana aokowi.

<sup>14</sup> Enore xalini hare isa aokowihenerereya Xaotyakiyaho xema tyaoniterenai anere taita hoka nikareya hoka halitinae tyakekoneya maisa xoare tyomita. Exahe Enore xalini hare isa aokowitereharenaiya maisa xoare tyomita. <sup>15</sup> Hiyaiya, Xaotyakiyaho hiyeta atyo Enore xeharene kaotyakita. Xakore hoka alyako xamani atyo maisa Xaotyakiyaho aka hoka maisa tehitiya atyo nali Xaotyakiyaho matyakekotyaka aka.

<sup>16</sup> Hiyaiya, tyakekoti hiyeta taita atyoite Enore tyoty xalini hare isa aokowihenerereharenai Abraão jikolaharenai ana isa maxaimanehareta. Hatyoharenai maisa Xaotyakiyaho xema tyaoniterenai anere taita xini. Tyoty Abraão tyakekone akereta tyakekohenerenai anere tehitiya. Hiyaiya, Abraão atyo wityoty wexa. <sup>17</sup> Exakere atyo nexa Iraitai Waiyexe:

“Kahare haliti hotyalinai nexa atyo namoka hiso”, nexa Enore Abraão hiye.

Hatyo hiyeta Enore atyo isa aokowihenerhare xeko-hasehare tyaona, hatyo Abraão tyakekonehare, Enore kamatinai ekasekihiterere, exahe xoalini hare makaotyakenehare hoka ekaotyakatiterere. <sup>18</sup> Maisa xakore aliyakere atyahaheta xaka hoka Abraão heko tyakeko, heko atyaha. Hatyo hiyeta kahare hotyalihare halitinae nexa tyaona. Exakere atyo nexa Iraitu Waiyexe:

“Hijikolaharenaite hisoaka tyaona”, nexa.

<sup>19</sup> Abraão xakore okoi 100-wanonehena hoka maisa matyakekoneta. Ohiyehena, okoi xakore wainihena hoka heko tyakekota. Exahe exanityo Sara hoka ohiyehena hoka maisaiya aliyakere kaisanita. Maisanityakohalo xakore hoka maisa Abraão matyakekoneta.

<sup>20</sup> Abraão maisa halakijita hatyakekone, maisa matyakekotita Enore isa enomana aokowitereharenae. Ityakekone aiyatelikisene hoka hatyo hiyeta aexakereya Enore. <sup>21</sup> Waiyakehalakita atyo enomana Enore tyoma aokowitereharenae kakoa hoka. <sup>22</sup> Hatyo hiyeta, “Enore haliti waiyexe aoka Abraão ityakekone hiyeta”.

<sup>23</sup> “Haliti waiyexe”, nehenere iraitu atyo maisa exaoka-taita xini iraeta. <sup>24</sup> Wiyaoakaka tehitiya iraeta. Hiyaiya, wityakeko Wiyekohase Jesus xekasekisasehare Enore. Hatyo hiyeta Enore haliti waiyexe aoka wiso. <sup>25</sup> Jesus atyo kaxaxikatyaka iniyalahare wománe hiyeta waini maheta. Hatyaoseta kaxekasekisakeheta haliti waiyexe Enore aoka maheta wiso.

#### Wityakekone Hiyeta Atyo Enore Haliti Waiyexe Aokita Wiso

(Romanos 1.16-17; 3.21-26; 4.5; 8.1; Gálatas 3.1-7)

**5** Kalini atyo Enore haliti waiyexe aoheta wiso wityakekone hiyeta hoka mehaxaikhahali akeheta atyo womana, Wiyekohase Jesus Cristo hiyeta. <sup>2</sup> Cristo atyo kolatya wiso wityakekone hiyeta Enore ana hoka waiye mokita wiso, hoka kalikini wikinatere wisaonita exema. Hatyo hiyeta wihalahareta Enore nali wisaonene akiti kakoa. <sup>3</sup> Exahe wihalahareta tehitiya howitihare wisaonitereharenae kakoa. Hiyaiya, waiyakehalakita atyo womana: hatyohare howitihare wisaonitereharenae hiyeta atyo wimehexaikhohare wisaonita. <sup>4</sup> Hoka wimehexaikhohare wisaonitere hiyeta atyo Enore tyakekota wiso. Hoka tyakekotere wiso hiyeta atyo watyahita Xekohaseti xahita. <sup>5</sup> Hoka watyahitere hiyeta atyo maisa wamaikhoharexe. Hiyaiya, Enore atyo isa womana hawaiyexehare, Isekohaliti Waiyexe isehenerere womana hiyeta.

#### Cristo Atyo Waini Womana

(Romanos 4.24-25; 1 Coríntios 15.2-4; Gálatas 1.4; Tito 2.11-14)

<sup>6</sup> Enore xaimenekolaose xane hikoa hoka Cristo waini womana, wiso iniyalahare nomaseharenae ana. Hatyo nahitita maisa ene waiyexe wisomare. <sup>7</sup> Hiyaiya, komitaineya maisa xala hare wainita hatya haliti waiyemaniya tyanonitere wenekoare. Kala xoana xamaniya hoka nikarehare hiyetaiya hatya kinatyatyako waini hatya haliti waiyexe wenekoare. <sup>8</sup> Hoka Enore atyo hotikisa hawaiyexehare womana. Hiyaiya, iniyalahare

nomaseharenae xakore wiso hoka Cristo waini womana. <sup>9</sup> Kalikini atyo Enore haliti waiyexe aoheta wiso Cristo wainihenerere atyalihose xaimaholatyaka hiye hiyeta. Hoka waiye kaiserehare atyo ite wisaohena ihiyeta Enore xeharene nonitata. <sup>10</sup> Enore nahalakoaharenae ene wiso, xakore hoka haisani kamane hiyeta hahinaehare aoheta wiso. Kalikini atyo Enore hinaeharenae wisaoheta hoka wikaiyakehetehena atyo ite Cristo kasehetehenerere hiyeta. <sup>11</sup> Hatyo hiyeta kalikini wihalahareta Enore kakoa, Wiyekohase Jesus Cristo hiyeta. Hatyo atyo Enore hinaeharenae moheta wiso.

#### Adão, Cristo Xoaha

<sup>12</sup> Iniyalahare atyo waikohekoa kaotyaka haterore haliti hiyeta. Hoka hatyo iniyalahare hiyeta kamati kaotyaka. Hoka kamati exaoretyoa tyotyaha halitinae ana. Hiyaiya, tyotyaha atyo iniyalahare tyomaha. <sup>13</sup> Halitinae ana Xaotyakiyaho makaotyakeneharetatere nahitita atyo koxaka terota iniyalahare tyaonita ali waikohekoa. Xakore hoka iniyalahare atyo maisa kawatyalisakere, maisa Xaotyakiyaho aka hoka.

<sup>14</sup> Hiyaiya, Adão xowakiyata kamati jiyahaoty tyotyaha haliti Moisés kijiya hoka waini tyotyaha. Maisa xakore atyo iniyalahare tyomareha Adão Enore niraene mase-maxemala hoka iniyalahare tyomehenerere akereta xini hoka.

Hoka Adão atyo aimenekoita kaotyakehenerere tyoanene. <sup>15</sup> Xakore hoka hatyo hinamaharenae atyo hawareharexe makere. Hiyaiya, Enore waiyexe ijitereharenae kakoaiya atyo maisa aliyakere Adão iniyalahare tyomehenerere kakoa kaxaimenekotyakita. Aliterexe atyo kahare haliti waini haterore haliti iniyalahare tyomehenerere hiyeta. Xakore hoka Enore waiyexe ijitereharenae atyo exaehare, hoka hatyo hiyeta wenati waiyexe maxaimaneharetata ijita kahare haliti ana haterore haliti xawaiyera wiso hiyeta. Hatyo haliti atyo Jesus Cristo.

<sup>16</sup> Hahekorexe atyo Enore waiyexe ijiterehare nonitata hatya haliti iniyalahare tyomehenerere. Iniyalahare tyomehenerere hiyeta atyo mawenekoaretyati aho kaotyaka haterore iniyalahare tyomehenerere hiyeta. Xakore hoka hawaiyexeharene hiyeta atyo Enore maxaimaneharetata haliti waiyexe aokita kahare iniyalahare tyomitereharenae. <sup>17</sup> Aliterexe atyo haterore haliti nómane iniyalahare hiyeta kamati kaotyaka tyotyaha halitinae ana. Xakore hoka Jesus Cristo tyomehenerere atyo exaehare tyaona. Hatyo hiyetaite Enore tyotyaha aohenerena, exahe wenati waiyexe isehenerere enomanaha hiyetaite waiye tyaonaha Cristo hiyeta.

<sup>18</sup> Hiyaiya, haterore iniyalahare tyoma hoka hatyo atyo tyotyaha halitinae nawenane aiyalaharetya. Nikare tehitiya hatya haliti waiyexe taita tyoma hoka tyotyaha iyehenahitene hoka wenati waiyexe isa enomanaha. <sup>19</sup> Haterore haliti matyakekohenerere Enore hiyeta tyotyaha halitinae iniyalahare nomasehare tyaonaha. Nikareta tehitiya ite haterore haliti tyakekone hiyetaite Enore haliti waiyexe aokahene.

<sup>20</sup> Xaotyakiyaho atyo kaotyaka iniyalahare aeroretya maheta. Hatyo iniyalahare aeroretyoahenere hiyeta atyo Enore xawaiyera exahehare tyaona. <sup>21</sup> Hiyaiya, iniyalahare kinatere tyaona kamati hiyeta. Nikareta tehitiya Enore xawaiyera kinatere tyaona wenati waiyexe hiyeta hoka ijita womana wenati matyotenehare, Wiyekohase Jesus Cristo hiyeta.

### Cristo Hiyeta Waitare Wenati Tyaona

**6** Xoare wehenaite hatyo hiyeta? Nikare ite hoka heko iniyalahare wisomehena, Enore xawaiyera exahehare tyaona maheta? <sup>2</sup> Maiha nikare xini. Koxaka atyo wenati iniyalahare ana wiwaini hoka aliyakereya heko iniyalahare wisomehena? <sup>3</sup> Exehare akiti ala waiyekehalakita xomana naoka. Hiyaiya, wikabatix-tyakehena atyo haxawalita wisaona maheta Jesus Cristo kakoa, exahe wikabatixatyaka tehitiya atyo haxawalita ekakoa wainitere akereta wiwaini maheta. <sup>4</sup> Hatyo hiyeta wikabatixatyakehenere xowaka atyo ehakakoaneta wikaxafityaka, wainihenere akereta atyo wiwaini. Nikare wisaona Cristo kaxekasekisakehenehenere Enexe niyaterere waiyexe hiyeta akereta tehitiya wikaseheta hoka waitare wenati xema wisaoheta maheta.

<sup>5</sup> Hiyaiya, haxawalitaiya atyo wiwaini ekakoa ekamane akereta hoka nikare tehitiyaite kasehetehenere akereta haxawalita wikaxekasekisakeheta. <sup>6</sup> Hiyaiya, exehare atyo waiyekehalakita womana. Toahiyere iniyalahare womane hiyeta wikaxaisaka Cristo kakoa atyalihose xaimaholatyaka hiye, wawenane toahiyere kamawenekoaretyakeheta maheta. Hoka hatyo hiyeta maisa atyo iniyalahare anerenaiheta xini wiso.

<sup>7</sup> Hiyaiya, hatyaiya atyo waini hoka maisaiya atyo aliyakere iniyalahare tyomehitita. <sup>8</sup> Koxaka atyo Cristo kakoa wiwaini hoka wityakekota tehitiya atyo wikaseneheta ekakoa. <sup>9</sup> Cristo atyo kaxekasekisakeheta hoka maisaiya atyo wainihitita, makamanehare atyo tyaona. Hoka hatyo kamati atyoite maisa xoana mohenahitene. Hatyohare akiti atyo waiyekehalakita womana. <sup>10</sup> Wainihenere atyo iniyalahare ana waini hoka hakirore atyo nikare tyaona matyotenehare niyahare. Hoka kalikiniye enawenane atyo Enore anere.

<sup>11</sup> Maikaira nikareta tehitiya ekamane akereta xisaohena iniyalahare xomane ana, xakore hoka xikaseta atyoite Enore koamaniya, Jesus Cristo kakoa haxawalita xisaonitere hiyeta. <sup>12</sup> Hiyeta hoka awa atyo iniyalahare jiyahaotya xihare wainiterehare hoka toahiyere iniyalahare kaxawaiyetyakitereharenae xema moka xiso. <sup>13</sup> Awaira atyo ininae hekoti xihare hiyetare iniyalahare ana xahalakihena, iniyalahare xisoma maheta. Xakore hoka Enore koamaniya taitaira xamohena xawenane, kaxaisakehenerenai kaiyakihititere exaisakaha nonitata akereta. Maika Enore maniya taita xamoka xawenane, xalini hare waiyexe xisoma maheta. <sup>14</sup> Maika maisa iniyalahare jiyahaotita xiso. Hiyaiya, maiha atyo Xaotyakiyaho xema xini xisaonita, xakore hoka Enore xawaiyeraho xema atyo xisaonita.

### Enore Wakaneharenae

<sup>15</sup> Xoanere? Iniyalahare ite wisomehena, maiha tyare atyo judeunae Xaotyakiraho xema xini wisaonita hoka? Xakore hoka Enore xawaiyeraho xema tyare atyo wisaonita hoka? Maisa nikarexe xini. <sup>16</sup> Waiyekehalakita atyo xomana exeharenai: Hiyaiya, hatya haliti wakanehare atyo xisaohena hoka xityakekota iniraene, aliterexe ewakanehare xiso hoka. Hatyo hiyeta xoana xityakekohenaite iniyalahare hoka hatyo hiyeta xiwainihena, xoana xityakekohena xamanite Enore hoka haliti waiyexe aohena xiso. <sup>17</sup> Toahiya ene atyo iniyalahare xema taita xisaonita. Hoka kalikini atyo Enore xaotyakira kaxakaisaka xihiyehoka xihalaharene kakoa xisaonita exema. Hatyo hiyeta nihalahareta Enore kakoa. <sup>18</sup> Iniyalahare nonitata atyo xikaiyakeheta hoka Enore wakanehare xisaoheta hoka aokitere akereta xisaona maheta. <sup>19</sup> Maisa atyo metahare xini niraeta xikakoa ximaiyaterene hiyeta. Toahiya ene iniyalahare xema taita xisaonita, iniyalahare xisoma maheta. Hoka maika kalikini Enore xema xisaohena hoka ewakaneharenae xisaona hoka waiyexe wenati xema xisaoheta maheta.

### Waiyexe Maniya Nawenatyakeheta

(Atos 4.11-12; Romanos 4.6-8; 8.1-10; 2 Coríntios 5.20-21; Efésios 1.7)

<sup>20</sup> Iniyalahare xema xisaonitere xowaka maisa Enore aokitere akereta xisaonare ene. <sup>21</sup> Xoareharenae kaotyaka xomana toahiya iniyalahare xisoma hoka kalikini hatyoharenae kakoa xihaiharehititere? Hatyoharenae hiyeta atyo kawainisakita. <sup>22</sup> Xakore hoka kalikini atyo iniyalahare nonitata xikaiyakeheta hoka Enore wakaneharenae atyo xisaoheta. Kalikini atyo enomanerenaere terota xisaoheta hoka hatyo hiyeta wenati matyotenehare ite tyaona xomana. <sup>23</sup> Iniyalahare wisomitere hiyeta atyo wiwainita. Xakore hoka Enore maxaimanehareta ijiterehare atyo wenati matyotenehare ekaotyakahitita, Wiyekohase Jesus Cristo koamaniya wisaonitere hiyeta.

### Wenakakoati Hiye Aimenekotya

**7** Nohinaeharenae, kalaite niraehena hoka waiyekehalaka xomana, xawaiyoretyare Xaotyakiyaho kakoa hoka. Hatya haliti kasetatere xowaka taita atyo halitinai xaotyakiraho xema tyaonita. <sup>2</sup> Hatya ohiro kaiyanenero atyo exanene kasetatere xowaka haiyanene niraene xema tyaonita. Exanene atyo wainihena hoka maisa atyo haiyanene niraene xema xini tyaohitita. <sup>3</sup> Exaneniyaya kasetata hoka xane hatya ena kakoa tyaona hoka iniyalahare nomasehaloia atyo kaxaokaka. Exaneniyaya waini hoka xane hatya ena kakoa tyaohitiya hoka ehokore, maisaiya atyo iniyalahare nomasehalo kaxaokakita. <sup>4</sup> Hiyaiya, nikare atyo xisaonita, nohinaeharenae. Xiso tehitiya atyo koxaka xiwaini Cristo kakoa haxawalita hoka hatyo hiyeta Xaotyakiyaho atyo maisa xoare tyomehetere xomana. Hoka kalikini atyo enomanerenaere

xisaona. Kaseheta atyo waiye wawenane tyaona maheta Enore koamaniya. <sup>5</sup> Hoka toahiya wiyahékola ximita wisaonitere xowaka atyo xaotyakiyaho atyo hotikisa womana iniyalahare wiyahékola tyaonitere wi-háre hiye hoka hatyo hiyeta wiwaini. <sup>6</sup> Xakore hoka kalikini atyo maisa Xaotyakiyaho xema xini wisaonita. Hiyaiya, koxaka atyo wiwaini mawaiye nawenanititere wiso ana. Kalikini atyo waiye wisaoheta Enore aokitere akereta wisaona maheta. Enore nisekohare atyo wenati waitare iseheta womana. Hatyo hiyeta maisa atyo toahiyere Xaotyakiyaho exairatyakahare tyaonitere anereheta xini wiso.

### Xaotyakiyaho, Iniyalahare Xoaha

<sup>7</sup> Xoare wehenaite? Xaotyakiyaho ala nikare hoka iniyalahare? Maiha nikare xini. Xaotyakiyaho atyo awaiyekehalakatyá nomani iniyalahare akiti. Hiyaiya, Xaotyakiyaho atyo nexa: “Awa atyo hatya xiyehare hi-maiyase hoka haokene homana”, nexa hoka ikoiya awa hatyo hoka maisaiya waiyekehalakita nomani hatyo akiti. <sup>8</sup> Hoka iniyalahare atyo Xaotyakiyaho hiyeta hoka tyotyá xoalini hare nomaiyasetereharenai hotikisa nomani. Hiyaiya, iniyalahare atyo haware tyaonita xaotyakiyaho nonitata hoka maisa xoare tyomita. <sup>9</sup> Hiyaiya, toahiya Xaotyakiyaho nomásemani-haretatere xowaka waiye ene notyaonita hoka nase-mehenere Xaotyakiyaho xowakata iniyalahare aeroretýoa hoka aisa natýo. <sup>10</sup> Xaotyakiyaho atyo wenati waiyexe isa nomani mahetareta ene hoka axaisakisa natýo. <sup>11</sup> Hiyaiya, iniyalahare atyo Xaotyakiyaho hiyeta maoseratya natýo hoka hatyo Xaotyakiyaho hiyeta iniyalahare aisa natýo.

<sup>12</sup> Hiyaiya, Xaotyakiyaho atyo aliterexe waiye, exahe iraiti hoka waiyexe kaiserehare. <sup>13</sup> Nikarala hoka waiyexe hiyeta noxaisaki kaotyaka? Maiha atyo nikare xini! Iniyalahare atyo nikare axomokanikisa natýo. Hiyaiya, iniyalahare atyo waiyexe hiyeta noxaisaki ekaotyakatya nomani. Nikare tyaona iniyalaharaho kahotikisaka maheta. Hatyo hiyeta, xaotyakiyaho hiyeta, iniyalahare exahehare henehare tyaota.

### Maisa Notyoma Naokowiterehare Notyomare

<sup>14</sup> Xaotyakiyaho atyo Enore nalitare hoka natýo atyo haliti maiyaterehare. Hiyeta hoka iniyalahare ana nokahalakisaki. <sup>15</sup> Maisa atyo notyomitereharenae waiyekehalakere nomani. Hiyaiya, maisa atyo notyoma naokowitereharenae xini notyomita, xakore hoka nomamani naokowiterehare taita atyo notyomita.

<sup>16</sup> Nomaomani naokowiterehare notyomitere hiyeta atyo Xaotyakiyaho notyakekóta, exahe aliterexe waiyexe. <sup>17</sup> Hatyohare hiyeta waiyekehalaka nomani. Maiha atyo natýo xini hatyohare notyomita. Iniyalahare tyaonitere nohiye atyo nikare axomokanikijita natýo. <sup>18</sup> Hiyaiya, waiyexe atyo maisa tyaonare nohiye. Hatyo atyo nawenani. Waiyexe noxahekoli xakore notyoma naokowita hoka maisa terota hatyoharenae notyomare. <sup>19</sup> Hiyaiya, maisa atyo waiyexe notyoma

naokowitereharenae notyomare xakore hoka nomamani iniyalahare naokowitereharenae atyo notyomita. <sup>20</sup> Nomaomani naokowitereharenae atyo notyomehena hoka maisa atyo natýo xini hatyoharenae notyomita. Iniyalahare tyaonita nohiye hoka hatyo atyo nikare axomokanikijita natýo.

<sup>21</sup> Hatyo hiyeta exakerala nawenani tyaonita naoka: notyoma naokowihena xoalini hare waiyexe hoka iniyalahare taita notyomita. <sup>22</sup> Enore Xaotyakiraho atyo waiyeta nomani, hatyohare kakoa nawaiyoreta. <sup>23</sup> Xakore hoka hatya xaotyakiye hawareharexe atyo heko aiyateretyoita noxahiti, waiyexe notyoma naokowitereharenae maisa notyoma aokare hoka. Hatyo hiyeta atyo iniyalahare tyaonitere noháre hiye wakanehare notyaonita. <sup>24</sup> Natýo atyo haliti maihalaharehare. Xalaite iyehetehena natýo exe nomawenekoaretyakaho nonitata? <sup>25</sup> Wiyekohase Jesus Cristo ite iyehetehena natýo, hatyo hiyeta nihalahareta Enore kakoa.

Hiyeta hoka exakerexe tyaonita nawenani: noxahekoli hiye hoka Enore xaotyakiraho notyaonita, xakore hoka iniyalahare xaotyakiye xema kaisere atyo notyaonita.

### Isekohaliti Waiyexe Xema Nawenatyaka

(Romanos 1.16-17; 3.21-26; Efésios 2.8-9)

**8** Hiyeta hoka kalikiniya atyo maisa xoare xemere kamawenekoaretyakihitita Jesus Cristo koamaniya tyaoniterenae. <sup>2</sup> Enore Nisekohare aotyakisa wiso hoka exaotyakira atyo Cristo koamaniya moheta wiso. Exahe hoka iyeheta natýo wenati iniyalahare nonitata, exahe nomawenekoaretyaki xoaha nonitata. <sup>3</sup> Wiso halitinae atyo maisa wikinaterexe hoka hatyo hiyeta Moisés Xaotyakiraho maisa aliyakere kahinaetita wiso. Xakore hoka Enore atyo haisani axikatya iniyalahare halitinae tyomitereharenae emaisaheta maheta. Ityani atyo wiso halitinae akereta tyoa hoka iniyalahare wisomiterehare emaisaheta maheta.

<sup>4</sup> Nikare Enore tyoma Xaotyakiyaho irahenere aokitere akereta kaiserehare wisaona maheta. Hiyaiya, Xaotyakiyaho iratere atyo waiye. Hoka Enore Nisekohare aokitere akereta atyo wisaonita hoka maisa atyo haliti xahekola iniyalahare xema xini wisaonita. <sup>5</sup> Haiyanae atyo haxahekola xema taita tyaonahitaha hoka hatyo aokitere akereta atyo tyaonahitaha. Hoka Enore Nisekohare xema tyaoniterenae atyo Isekohaliti aokitere akereta exahekolaha tyaonita. <sup>6</sup> Haliti xahekola xema taita kawenatyakiterehare atyo axaisakisare. Hoka Isekohaliti aokitere akereta kawenatyakiterehare atyo wenati waiyexe, exahe mehaxaikaliti xoaha maniya mokita haliti.

<sup>7</sup> Hiyeta hoka hatya haliti Enore nahalakoahare tyaonita, haliti xahekola xema taita tyaohena hoka. Maisa atyo Enore Xaotyakiraho xema tyaonare hoka, exahe maisaiya aliyakere tyaonita exema. <sup>8</sup> Xalanae xamaniya atyo haxahekola xema taita tyaonita hoka maisaiya atyo aliyakere Enore aihalahalinkijita.

<sup>9</sup> Hoka xiso atyo maisa halitinae xahekola akereta xini xisaonita, xakore hoka Enore Nisekohare aokitere akereta atyo xisaonita, aliterexe hareya atyo Enore Nisekohare tyaonita xikakoa hoka. Xalanae xamani atyo maisa Cristo Nisekohare kakoare xini hoka maisa atyo Cristo anerenai xini. <sup>10</sup> Hoka aliterexeya atyo Cristo tyaonita xikakoa hoka xihárenae xakoreya atyo waini iniyalahare xománe hiyeta hoka Enore Nisekohareya atyo wenati waiyexe isa xomana. Hiyaiya, Enore atyo haliti waiyexe aoka xiso. <sup>11</sup> Enore atyo ekasekiheta Jesus. Hatyo Nisekohareya atyo tyaonita xikakoa hoka Cristo ekasekihetehehene akereta tehitiyaite ekasekiheta xiháre wainitere, Inisekohare tyaonitere xihiyehiyeta.

<sup>12</sup> Xasemehena nohinaeharenae, maisaiya aliyakere wiyahakola xema taita wisaonita. <sup>13</sup> Xiyahakola xema taitaiya xisaona hoka xikamane ana atyo xiyaneta. Xakore hoka Enore Nisekohareya atyo emaisatya iniyalahare xisomitere hoka wenati waiyexe anaite xiyane xahikoa. <sup>14</sup> Hiyaiya, tyotya Enore Nisekohare kaxaikoneharenai atyo Enore ityaninae. <sup>15</sup> Isekohaliti Enore isehenere xomana atyo maisa wakahare akereta mokare xiso, exahe ximamairanehare atyo mokita. Hatyo Isekohaliti hiyeta atyo Enore ityaninae xisaona. Exahe Isekohaliti hiyeta tehitiya hoka wihalaharene kakoa Enore hiye, "Abá, Abá", wita.

<sup>16</sup> Enore Nisekohare atyo haxawalita tyaonita wisekoharenae kakoa hoka Enore ityaninai terota waokowi maheta. <sup>17</sup> Enore ityani tyare atyo wisaona hoka xoolini hare waiyexe ite womanere tyaona hakaxaikoneharenae ana mokitereharenae. Nikare tehitiyaite xoolini hare waiyexe Enore Cristo ana mokitere womanere tehitiya tyaona. Iniyalahare kaxomokakehenere Cristo akereta wikaxomokakehenere hiyeta atyoite xoolinihare waiyexe, tyaonitere enomanere tehitiya womanere tyaona.

### Waiyexe Watyahitere

<sup>18</sup> Nomani atyo iniyalahare wikaxomokakitereharenai ali waikohekoa kakoaiya maisa aliyakere kaxaimenekotyakita wenati waiyexe kahotikisakehenere womana kakoa naokita. <sup>19</sup> Tyotya xoolini hare Enore nómanenai haholawaka kakoa atyahahitaha Enore ityaninae kaokeneheta xahita. <sup>20</sup> Hiyaiya, tyotya Enore nómanenai atyo maisa waiye tyahohitita. Maiha atyo haxaokalaitaha xini nikare tyaonaha, Enore xaokala ximita atyo nikare tyaonaha. Xakore hoka exehare atyo kaxatyahakita: <sup>21</sup> Haxowakaite tyotya Enore tyomehenerenaite kaiyakeheta iniyalahare kaxomokakahitere nonitata, hoka Enore haisaninai waiye mohenere xowakaite, waiye tehitiya kaxomokakehenahitaha. <sup>22</sup> Hiyaiya, Enore tyomehenerena atyo kalikini kijiya waolitita, ohiro ityani kawehena hoka waolititere akereta.

<sup>23</sup> Maisa atyo Enore tyomehenerenai taita xini waolitita. Wiso tehitiya xakore Enore Nisekohare kakoare hoka wiwaolitita. Watyahitere Enore haisani aohenere wiso nase, exahe wiháre hoka waiyexe maniya mo-

hetehehene nase. <sup>24</sup> Hiyaiya, wiyatyahane hiyeta atyo wikaiyakeheta. Xakore hoka wiyaitaiya atyo watyahitere hoka hatyohare atyo maisa xatyahati xini. Hiyaiya, xala hare ala atyahita xoolini hare waiyitereharenai xahita? <sup>25</sup> Xakore hoka xoare xamani atyo maisa wiyaiyare hoka wimamaxaharenehareneta kakoa atyoite watyahahena exahita.

<sup>26</sup> Nikare tehitiya Enore Nisekohare kahinaetita wiso wimaiyatereharene hiyeta. Maisa wawaiyorexe wiraexala kakoa, xakore hoka Enore Nisekohare, wiwaolitita akereta mokita wiso hoka axita witahi, komita maisa eneya maisa aliyakere wiraene kakoa hatyoharenai wawaiyehahalakaita. <sup>27</sup> Enore atyo halitinae xahekola waiyita, exahe Isekohaliti Waiyexe xahekola hoka waiyehahalakita enomana. Hoka Isekohaliti Waiyexe atyo kahinaetita Enore kaxaikoneharenae hoka axita witahi Enore aokitere akereta. <sup>28</sup> Hiyaiya, waiyehahalakita atyo womana: Exahe tyotya xoolini hare kaotyakiterena womanera hoka Enore hakita tyotya hatyoharenae koni, exawaiyetyaseharenai, exahe haomana aohenereharenae waiye tyaonaha maheta. Haxaokala ximita.

<sup>29</sup> Toahiya xowakita atyo Enore koxaka haiyanae haomanere terota aokita hoka haware tehitiya mokahitahene hoka Ityani Jesus akereta tyaonaha maheta. Jesus Cristo ximarene kahare halitinai tyaona maheta nikare Enore mokahene. <sup>30</sup> Nikare Enore haomanere aohenerenai kawisa. Maisa kawisahene taita xini, haliti waiyexe aokahene tehitiya. Maisa haliti waiyexe taita xini aokahene, exahe iraka tehitiya enomanaha waiyexe tyaonitere enáli maheta.

### Enore Xawaiyera Wiso Jesus Cristo Hiyeta

(Romanos 16.25; 1 Coríntios 1.8; Filipenses 1.6; Judas 24-25)

<sup>31</sup> Exeharenae hiyetaite xoare wehena? Enoreya atyo kahinaetita wiso hoka xalaiya jiyahaohena wiso?

<sup>32</sup> Maisa atyo Haisani makamanene hekoti aokita hoka axikatene iniyalahare wománe hiyeta waini maheta. Hiyaiya, Haisani atyo axikatya, waini maheta iniyalahare wománe hiyeta hoka xoana maisaiyaka tyotya xoolini hare waiyexe maxaimaneharetia ijita tehitiya womana? <sup>33</sup> Xalaiya iraharehena Enore kaxaikoneharenae? Maisaiya xala. Enoreta atyo iniyalahare maomaneharenai aokahene. <sup>34</sup> Hoka xalaiya iniyalahare exomokaka aohena? Hiyaiya, Cristo atyo waini enomanaha, exahe kaxekasekisakeheta hoka Enore fihini maniya tyaonita. Hoka iraeta witahi Enore hiye.

<sup>35</sup> Nikare hoka xalaite kikihena wiso Cristo xawaiyera nonitata? Xoana, kirakoane wisaoniterehare, howitiharexe wawenane, wirawaiyaka, winaka, wimaxiyehareharene, kaheneharexe, exahe xoana wikamane kore ite kikihena wiso?

<sup>36</sup> Exakere atyo Iraitia Waiyexe nanekoa nexa: Wawaiyeterere hiso hiyeta waha aka wikaxaisakita, motya etakehare kalanero kakolatyaka hoka kaxaisakiterehare xaisakalati hana nali akereta wikaxomokakita.



<sup>37</sup> Nikare xakore atyo wikaxomokakita hoka hatyoharenai atyo wijiyahaotya, awaiyehenere wiso niyaterere hiyeta. <sup>38</sup> Hiyaiya, nomani atyo maisaiya xoare hekoti kikihitita wiso Enore xawaiyera nonitata. Mahaiya wikamane, wikasene, anjonai, haiyanai xekohasetinai, xoana tihanarenai, exahe kalikiniye wawenane, wahetakomaniyere wawenane hekoti hoka kikihitita wiso enonita. <sup>39</sup> Mahaiya wihaokoa maniya tyaonitere, wikatyahe maniya tyaonitere harenai hekoti kikihitita wiso. Hakákoare exe enokoa, waikohokoa tyaonitere konitareya, maisa hatya hekoti hatyonai kikihitita wiso Enore xawaiyera nonitata, Wiyekohase Jesus Cristo awaiyetitere wiso hiyeta.

### Enore, Ekaxaikone Hotyalinai Xoaha

**9** Exe niraeterehare atyo aliterexe. Cristo anere atyo natyo hoka maisa namaoseratyare, Isekohaliti Waiyexe ana atyo waiyekehalakita exe niraetereharenae hoka tyakekota niraini. <sup>2</sup> Kalore namaikohareta, noxamaikohalini maisa tyotere, nohinaeharenae nohotyaliharenai kaiserehare hiyeta. <sup>3</sup> Waiyeya tyaonaha maheta komitaene atyo natyo Enore iniyalahare moka naokita, exahe Cristo nonitata hoka haware notyaoheta naokowita. <sup>4</sup> Enore kaxaikone hotyali terota atyo Israel hotyalinae. Haomanerena atyo aokahene hoka wenati masakare waiyexe isa enomanaha aokowi. Iraitai Waiyexe xairatyoare, exahe Xaotyakiyaho hoka isa enomanaha hoka waiyoreha wenati Enore koamaniya kakoa. Xoalini hare waiyexe Enore isa enomanaha aokowihenerenai atyo enomanereha terota. <sup>5</sup> Toahiyereharenae jikolahareha atyo, exahe Cristo tehitiya hoka toahiyereharenae jikolahare. Haliti tyoohenere hiyeta, hatyo halitinae hotyalihare atyo tyaona. Hiyaiya, Enore atyo tyotya halitinae xekohasehare tyaona. Hoka maika kaihalaharetyaketa mene ekakoa. Nikare naoka.

<sup>6</sup> Maihatya Enore irahenere atyo maisa xoare tyomita, nomita xini. Hiyaiya, maisa atyo tyotya Israel hotyalinae Enore kaxaikoneharenai xini. <sup>7</sup> Exahe maisa atyo tyotya Abraão jikolaharenae Enore ityaninae xini. Hiyaiya, Enore atyo nexa Abraão hiye:

“Isaque jikolaharenae taita atyoite hijikolaharenae kaxaokaka”, nexa.

<sup>8</sup> Hatyo hiyeta Abraão jikolaharenai terota atyo kaxaokaka Enore irahenere hiyeta tyaohenerenai. Hoka maisa atyo tyaotehenerenai xini ijikolaharenai kaxaokakita.

<sup>9</sup> Exakere atyo Enore irae:

“Notyohetaite hoka hatyo xowakaite Sara kaisanihena”, nexa.

<sup>10</sup> Exe tehitiya: hinamahare Rebeca ityaninai nexa atyo haterore, wahetakorehare Isaque. <sup>11</sup> Xakore hoka Enore atyo háhare nawenane waiyexe maniya moka hoka nexa Enore Rebeca hiye, hatyo xoimanae nawenane nahitita:

“Inityohaliti atyoite xoimere wakanehare tyaona”, nexa.

<sup>12</sup> Exakere nexa Enore iniyalahare, waiyexe xoaha enómaneha nahitita. Nikare atyo Enore tyoma exahe haxaokala ximita. Maiha atyo xoalini hare enómaneha hiyeta xini. <sup>13</sup> Hiyaiya, exakere tehitiya Iraitai Waiyexe nexa:

Jacó atyo nawaiyitya hoka Esaú atyo maisa nawaiyeta, nexa.

<sup>14</sup> Nikare ite hoka xoare wehenaite? Enore maisa waiyexe wehenaite? Maisa nikarexe xini. <sup>15</sup> Hiyaiya, exakere atyo nexa Moisés hiye:

Nairakoaneharetya naokowihenerere ite nairakoaneharetya, exahe nakanakaharetya naokowihenerere ite nakanakaharetya, nexa.

<sup>16</sup> Hatyo hiyeta maisa atyo wiyaokalita, exahe wománenai hiyeta xini, xakore hoka Enore xairakoaneharera wiso hiyeta taita atyo waiye wisaonita. <sup>17</sup> Hiyaiya, exakere atyo xairatyoare tyaonita Iraitai Waiyexe nanekoa: Enore nexa Faraó hiye:

“Niyatere nahotikisa, exahe waikohekoa hakákoarekoa tyaoniterenai semaha notahi maheta kalorexe namoka hiso”, nexa.

<sup>18</sup> Hiyeta Enore atyo xala xamani airakoaneharetya aokowihena hoka airakoaneharetita, exahe xala xamani maxahekolatya aokowita hoka maxahekolaita.

### Enore Xairakoaneharera, Iniyalahare Exomokala

<sup>19</sup> Hoka xinekonitare ite nehena nohiye: “Nikarexe hoka aliyakereya Enore hatya haliti iniyalahare nomasehare aohena? Xalaiya Enore aokiterehare mahokoanehena?”

<sup>20</sup> Hoka xala atyo hiso hoka Enore kakoa kinyatya hirae haokowita? Nikarala hoka kamohese nomaka tinihaliti haomasehare kakoa iraeta? “Xoana hoka exakere hisoma natyo?” nita. <sup>21</sup> Hiyaiya, hatya haliti atyo kamohese tinihaliti tyomehena hoka aliyakere xamani mokene aokowihena hoka nikare mokitene. Kamohese haterore hiyetaiya hinama tinihaliti enomasehare tyoma, hatya waiye, hatya maisa waiyexe xoahaiya.

<sup>22</sup> Nikare atyo Enore tyoma haxeharene hotikisa maheta, exahe haiyaterere hotikisa maheta. Nikare maisa maxahareta iniyalahare nomaseharenai kakoa, maisa xoare hare tyomita ekakoaha. Hamawenekoaretyakaho terota xakore xanahitaha hoka. <sup>23</sup> Hotikisa tehitiya aokowi Waiyexe Wenati maniya mohetehenerere wiso. Hatyo hiyeta airakoaneharetya, exahe memere moka wiso isa maheta wenati waiyexe womana. Toahiyita atyo memere moka hatyoharenai hoka kalikini isene womana. <sup>24</sup> Hiyaiya, Enore atyo haomanerena aoka wiso. Maisa judeunae taita xini haomanerena aoka, majudeuneharenae tehitiya hoka haomanerena aoka.

<sup>25</sup> Nikarexe atyo Oséias nanekoa kaxairatyaka ini-raene:

Xalanae ene xamani atyoite, exahe maisa nomaniye hotyalinae xini hoka nomaniye hotyalinae atyoite naokene. Xala hotyali xamani ene atyoite maisa nawaiyetyare hoka noxawaiyiriharenae atyoite naokahene.

<sup>26</sup> Hatyo nanekoita exakerexe tehitiya:

“Xiso atyo maisa nokaxaikoni hotyali xini”, nexa xakore hoka Enore makamanehare ityaninae nerekatite exaokakaha.

<sup>27</sup> Exakere Isaiás irae Israel hotyali tahi:

Exahe xakore ite Israel hotyali hisoaka waikohese one kaloxere kilihi tyaonitere akereta hoka haiyanae taitaite waiyexe maniya tyaoheta.

<sup>28</sup> Enore ite hairaene akereta tyoma hakákoare waikohesha. Maisaite wahita hekoti hoka nikare tyoma hairaene akereta.

<sup>29</sup> Hatyo Isaiás tehitiyita atyo koxaka nikare irae:

“Ikoiya awa Xekohaseti kinaterexe wijikolaharenai maheta haiyaharenai halakijita hoka wenakalati Sodoma akeretaiya moka wiso, Gomorra akeretaiya wisaona”, nexa.

### Israel Hotyalinai, Iraitu Waiyexe

<sup>30</sup> Nikare hoka xoare wehenaite? “Majudeuneharenae ana ene atyo maisa Enore koamaniya nawenatyaka waiyekehalakere, xakore hoka Enore atyo haliti waiyexe aokahene ityakekoneha hiyeta”, wehenaite.

<sup>31</sup> Hoka Enore haomanere aohenerena Israel xakore atyo xaotyakiyaho xema tyaona aokowiyahitaha, kasani hatyo hiyeta haliti waiyexe aokahene aokahitaha xakore hoka maisa atyo haliti waiyexe aokahitene.

<sup>32</sup> Xoana hoka nikare tyaonaha? Motya maisa ityakekoneha hiyeta xini haliti waiyexe aokahene aokahitaha. Motya atyo enawenaneha xaotyakiyaho hiyeta Enore haliti waiyexe aokahene aokahitaha hoka. Nikare tyaonaha hoka “hisehityoaha hatyo sehali hisehityoakalati” hiye. <sup>33</sup> Hiyaiya, exakere atyo Iraitu Waiyexe nexa:

Namokaite Jerusalém nali sehali hoka hatyo hiye ite hisehityoaha hoka exoaha. Xakore hoka xala xamani atyoite tyakekone hoka maisaiya maihalahareneta ekakoa.

**10** Xasemehena, nohinaeharenae, kasani Israel hotyali waiyexe maniya kaiyakeheta naokita. Hatyo hiyeta Enore hiye niraexaita etahiha. <sup>2</sup> Enore koamaniya xakore atyo tyaona aokowiyahitaha hoka maisa atyo Enore koamaniya nawenatyakaho kakoa waiyorahitaha. Hatyoharenae waiyekehalakita no-mani. <sup>3</sup> Maisa waiyekehalakere enomanaha Enore aokiterehare haliti haomana akiti kakoa hoka tyaonahitaha haxahekolaha ximita. Maisa waiyeta enomanaha Enore aokiterehare haliti haomana. <sup>4</sup> Hiyaiya, Cristo atyo xaotyakiyaho kamiyanetya, hoka tyoty tyakekohenerenai haliti waiyexe aoka maheta.

### Waiyexe Maniya Nawenatyaka Atyo Tyotyaha Halitinae Anere

<sup>5</sup> Moisés atyo exakerexe xairatya Enore aokitere haliti haomana tahi akiti, Xaotyakiyaho xema tyaonitere hiyeta:

Xala xamani atyoite Xaotyakiyaho aokitere akereta taita tyaona hoka tyaota mene atyoite.

<sup>6</sup> Xakore hoka nexa atyo Enore aokitere haliti haomana ityakekone hiyeta akiti: “Awa atyo hisota haxoawi: Xalaite enokoa xeta xanehena?” Exakerexe atyo exe akiti: “Xalaite xane enokoata Cristo nolohetehena?” nita atyo.

<sup>7</sup> Awa atyo exakere hekoti haxehena: “Xalaite exoahena toloko hatekoakore?” Exakerexe atyo exe akiti: “Xalaite xane kolahetehena Cristo kamatinae tyaonitere nalita?” nita atyo.

<sup>8</sup> Exakere atyo nexa: “Enore niraene atyo hihaliya tyaonita, hikanasako, himahiyasako xoaha”. Exe Iraitu wiyakaihenerere atyo katyakekotyaka maheta.

<sup>9</sup> “Notyakekota Xekohaseti Jesus”, hexaiya hiraeta hikanase kakoa, exahe hityakeko kaiserehare, Enore ekasekiheteherene xoaha akiti hoka waiyexe maniyaiya hikaiyakeheta. <sup>10</sup> Hiyaiya, wityakekota kaiserehare atyo hoka haliti waiyexe Enore aokita wiso. Wikanase kakoa atyo wiraeta wityakekone tahi hoka waiye maniya wikaxomokakihitita.

<sup>11</sup> Hiyaiya, exakere atyo Iraitu Waiyexe nexa:

Xala xamani atyoite tyakekone hoka maisaiya maihalahareneta ekakoa, nexa.

<sup>12</sup> Tyotyaha haliti hotyalinae xaokaka atyo nikare iraeta. Hiyaiya, judeunae, majudeuneharenae xoaha atyo maisa hawareharexeha makere xini. Enore atyo tyotyaha haliti Xekohase, exahe waiye mokita hoka xalanae xamani hakahinaetyaka aokita ihiyeta hoka kahinaetyahitene.

<sup>13</sup> Hiyaiya, exakere atyo Iraitu Waiyexe xairatyoare tyaonita:

Xala xamani atyoite hakahinaetyaka aoka Enore hiye hoka waiyexe maniyaite kaxomokakeheta, nexa.

<sup>14</sup> Hoka aliyakereya axehenaha, maisa xakore tyakekorahene hoka? Hoka aliyakereya tyakekohenahene, maisa xakore iraitu semareha hoka? Hoka aliyakereya semehenaha Iraitu xakore, maisa xalahare xakaiye ihiyeha hoka? <sup>15</sup> Hoka aliyakereya xakaihena, maxaxikatyakahare iraitu xakaisaseharenai hoka? Hiyaiya, exakere atyo Iraitu Waiyexe nexa:

“Waiye kaiserehare atyo iraitu xakaisaseharenai kaoketehena hoka waiyexe tahi xakaihakahenaha hoka”, nexa.

<sup>16</sup> Xakore hoka maisa atyo tyotyaha tyakekoreha Iraitu Waiyexe. Isaiás exakere irae: “Xekohaseti, xala tyakeko Iraitu Waiyexe wiyakaihenerere?” nexa.

<sup>17</sup> Nikare tyakekotu kaotyaka Iraitu semaka hiyeta, exahe Iraitu atyo kaotyaka Cristo tahi kaxakaisakitere hiyeta.

<sup>18</sup> Hoka natyo atyo naxita: Xoana maisa ala semahitaha Iraitu tahi? Koxaka atyo semaha Iraitu. Exakere Iraitu Waiyexe nexa:

“Tyotyaha waikoheko, tyotyaha wenakalatinaekoa tyaoniterena semaha iniraeneha, exahe seko akiya tyaoniterena hoka semahene”, nexa.

<sup>19</sup> Hoka naxehityaite: Xoana Israel hotyalinai anala maisa exeharenae waiyekehalakita? Hiyaiya, Moisés hotohare atyo nexa:

“Naokoawahalinikisaite xiso halitinai hahotyralita mawenaneharenai hiyeta, exahe naxehalinikisaite xiso halitinai mawayioreharenai hiyeta”, nexa.

<sup>20</sup> Isaías maisa mairita hekoti hoka nexa:

Haiyaharenae xakore atyo maisa Enore tawareha hoka ekoamaniya tyaonaha, exahe maisa xakore axareha etahi akiti hoka kaotyaka enomanaha, nexa.

<sup>21</sup> Hoka exakere atyo Isaías nexa Israel hotyali tahi:

Fera nokahe naimatya exe halitinae masemaxemalaharenai, matyakekoneharenae ana hoka maiha terota, nexa.

### Enore Xairakoaneharera Israel Yerenai

**11** Hatyo hiyeta kalikini naxehitiya: Xoana Enore ala hakaxaikonehare hotyalinai maisa aokita haomana? Maisa nikarexe xini! Hiyaiya, natyo tehitiya atyo Israel hotyalihare, Abraão jikolahare, exahe Benjamim hotyalihare konitare. <sup>2</sup> Enore atyo maisa maxaokalita haomanere hotyaliharenai, hetati xowakita aohenerenai haomana. Iraitu Waiyexe iraehehene akiti atyoala waiyekehalakita xomana Enore haotita, Elías Israel hotyali iraehehene tahi akiti. Exakere nexa:

<sup>3</sup> Xekohaseti, hiraene xakaisaseharenae atyo aisaha, exahe xoalini hare kafetatyakitere homana aose hoka mawenekoaretyaha. Hoka nowawitehena nokasetata hoka kalini aisaha natyo aokowitaha.

<sup>4</sup> Xoare nexa Enore ekoaxatene? Exakere nexa:

Waiye atyo namoka 7.000-hare halitinai nomanie maheta, enore metalahare Baal koamaniya mawenaneharenai.

<sup>5</sup> Hatyo akereta atyo kalikini tyaonita: Enore nawaiyexehare hiyeta haiyanai tyaonita exema haomanere aohenerenai. <sup>6</sup> Hawaiyexehare hiyeta atyo Enore aokahene haomana, maisa atyo enómaneha hiyeta xini. Haliti tyomiterehare hiyetaiya aokahitene haomana hoka enawaiyexehareya atyo maisa xoarehare tyomare.

<sup>7</sup> Xoare wehenaite? Israel hotyali tawiterehare maisa kaokahitaha. Hiyaiya, Enore haomanere aohenerenai taita kaokahene hoka haiyaharenae atyo matanakoakohare akereta tyaonaha, Enore niraene semaha hoka.

<sup>8</sup> Hiyaiya, Iraitu Waiyexe atyo nexa:

Enore atyo kinatere moka emahiyaseha, exahe exahekolaha xoaha, hoka kalikini kijiyehena maiha waiyakatyareha haxosenaiha kakoa, maiha semakatyareha hatanakoakonaiha kakoa, nitere akereta.

<sup>9</sup> Hoka Davi atyo nexa:

Maikaite hisehaliti heko kaxotokakaha hoka kamaoseratyakaha. Nikare ite tyaonaha hoka iniyalahare ite kaxomokakaha.

<sup>10</sup> Maikaite exosenaeha jhotyoare tyaona hoka maisa waiyakahenahitaha. Exahe maika aonikoakoataha mene hawenaneha howitiharexe hiyeta, nexa.

<sup>11</sup> Kalikini naxehitiya: judeunae hisehityoahenere xowakala hisehityoaha hoka hamahakaisereneha ana hikoaha? Maisa nikarexe xini. Iniyalahare tyomaha hoka hatyo hiyeta wenati waiyexe tyaona majudeune-

harenae ana hoka judeunae okoawahareha ihiyeha maheta. <sup>12</sup> Judeunae iniyalahare tyomehenahere hiyeta atyo kalore wenati waiyexe kaotyaka tyotyali hotyalinae ana. Exahe ematyakekoneneha hiyeta atyo majudeuneharenae tyakekone kaotyaka enomanaha. Hoka judeunae haiyaharenai tyakekohetehenerenai Enore anaite xane hikoaheta hoka hatyo xowakaite masakare waiye kaiserehare wenati tyoahetehena.

### Waiyexe Maniya Nawenatyakeheta Majudeuneharenai Hiyeta

<sup>13</sup> Kalikini atyo niraeta xiso majudeuneharenae kakoa. Natyo tyare atyo majudeuneharenae ana terotere iraitu xakaisasehare notyaona hoka hatyo hiyeta nihalahareta nohateni kakoa. <sup>14</sup> Xoana xamaniya hoka exakere notyaona hoka nohinaeharenaiya okoawahare hoka hatyoharenai hiyetaiya haiyanae waiyexe maniya namoheta. <sup>15</sup> Hiyaiya, judeunae maxawaiyetyakehenere hiyeta atyo tyotyali hotyalinae Enore hinaehare tyaona. Hoka xoanaite tyoahenaha, kaxawaiyetyakehenahere xowaka? Hatyo xowaka atyoite kamatinae kasehetiterehare akereta tyoahetehena enawenaneha.

<sup>16</sup> Hetatiye tohase nakairati hiyetaiya kaxekaka Enore ana hoka mainikere tehitiya atyo enomanere. Nikare tehitiyaiya atya tyahare Enore ana kaxekaka hoka ekanohinae tehitiyaiya enomanere terota. <sup>17</sup> Haiya kanohinai kataikaka oliveira exafityakahare kate hiyeta hoka hatya atya maxafityakahare kanohitare kaxomokaka ihie. Xiso majudeuneharenae atyo hatyo atya maxafityakahare kanohi akereta hoka kalikini atyo judeunae niyaterere, exahe enawenaneha xoaha xomanere tyoaheta. <sup>18</sup> Hatyo hiyeta awaira atyo ximaxawaiyerehena atya exafityakahare kanohinae kataikakehenerenae kakoa. Xoanereya hoka xaokowiharetyoahena? Xisonae atyo atyakate kanohinai akere-taita. Maisa atyo xiso xini xaiyatelikijita atya tyahare. Atya tyahare atyo aiyatelikijita xiso.

<sup>19</sup> Xakore hoka xehenaite: “Atya kanohinae atyo kaxirikotyaka hoka hatyonae wenekoare wisaona maheta”, xehenaite. <sup>20</sup> Hiyaiya, ematyakekoneneha hiyeta atyo kaxirikotyakaha. Hoka xiso atyo atyakate hiye xikahiyalatyaka xityakekone hiyeta. Hatyoharenai waiyekehalakita xomana hoka awa atyo xaokowiharetyoa, xakore hoka maika ximairehena kaisere.

<sup>21</sup> Hiyaiya, Enore atyo maisa iniyalahare maxomokalita judeunai, atya kanohi kaiserehareha xakore atyo hoka. Hoka xoana xiyahakola hiye, motyaiyala maisa iniyalahare tehitiya mokita xiso xaokita?

<sup>22</sup> Enore atyo waiyexehare, exahe xalijinihare tehitiya. Kaxirikotyakehenerenae xahita atyo xalijinihareta hoka waiyexehareta atyo xihie, hekoiya enawaiyexehare xema xisaona hoka waiyeya mota mene xiso. Mahaiya hoka irikotyatehitiyaiya xiso.

<sup>23</sup> Hiyaiya, judeunaiya halakisaha hamatyakekoneha hoka haikoahenahitahaiya hetati tyaonahitere akiti xeta. Hiyaiya, Enore atyo kinatere hoka ehaikoaki-

henahiteniya. <sup>24</sup>Xiso majudeuneharenae atyo atya maxafityakahare kanohi kaxirikotyaka hoka atyakate exafityakahare hiye kahiyalatyakitere akereta. Hoka judeunae atyo atyakate exafityakahare kanohinai kaiserehare akereta. Hatyo hiyeta Enore anaiya atyo maisa howitihare hiyalatyakehitita atya kanohinai ekate hiyeta kaxirikotyakehenereharenai.

### Enore Awaitita Tyotya Halitinae

<sup>25</sup>Nohinaeharenae, kasani exe Iraitu Waiyexe meta-haretere waiyekehalaka xomana naokita, maisa xaokowiharetyoa maheta, xawaiyore xaokowita maheta: Israel hotyalinai matyakekonene atyoite maisa tyaota minita. Majudeunehare hotyalinae konitarenai tyotya tyakekohenahere Enore kijiya taitaite.

<sup>26</sup>Hatyaosetaite tyotya Israel hotyalinai waiyexe maniya kaxomokakeheta Iraitu Waiyexe irahenere akereeta:

Haliti niyaseharehetaite Sião nalita tyoheta hoka tyotya Jacó hotyaliharenae iniyalahare tyomitere emaisaheta.

<sup>27</sup>Nikare ite namokahene iniyalahare enómaneha nemaisahetehenere xowaka.

<sup>28</sup>Judeunae atyo maisa Iraitu Waiyexe aokahita haomanaha hoka hatyo hiyeta Enore nahalakoahare tyaonaha, xiso majudeuneharenae hiyeta. Xakore hoka Enore atyo aokahene haomana enahetakomaniyereharenae hiyeta, hoka ihinaeharenae atyo tyaonaha.

<sup>29</sup>Hiyaiya, Enore atyo xala xamani aohena haomana, exahe waiye moka aokowihena hoka maisa atyo hahakore haxahakola mokare.

<sup>30</sup>Hoka xiso majudeuneharenae atyo toahiya maisa Enore niraene xityakekota. Xakore hoka kalikini atyo Enore airakoaneharetya xiso, judeunai matyakekonene hiyeta. <sup>31</sup>Nikare hatyo airakoaneharenere xiso hiyeta, kalikini judeunai matyakekonahitaha Enore, hoka haxowakehenaite Enore airakoaneharetayahene maheta xihiyeta. <sup>32</sup>Hiyaiya, Enore atyo tyotya matyakekoneharenai mokahene, hotikisa maheta haxairakoaneharera tyotya haliti hotyalinai ana.

### Enore Xaexakeretyaka

<sup>33</sup>Kaxiyani, Enore atyo waiye kaiserehare! Tyotya waiyekehalakita enomana, exahe waiyore. Xalaiya awaiyekehalakaty exahekolana? Xala anaiya waiyekehalaka enawenane? <sup>34</sup>Exakere atyo Iraitu Waiyexe nanekoa nexa:

Xala anaite waiyekehalakehena Xekohaseti xahakola? Xalaiya aotyakihenene?

<sup>35</sup>Xala koxaka xoalini hare Enore ana isa, Enore bakatene maheta?

<sup>36</sup>Hiyaiya, tyotya xoalini hare atyo enómanenai taita. Ihiyeta atyo tyotya xoalini hare kaotyaka, exahe hoka enomanerenae makere atyo. Hatyo hiyeta maika Enore kakoa kihalalaharetyaka matyotenehare! Nikare waoka. Eko xoaha.

### Wenati Waitare

**12** Hatyo hiyeta, nohinaeharenai, maika Enore airakoaneharetitere xiso hiyeta niraehena xikakoa: maika xiháre xisehena Enore ana, kinasetatere isoawitere akereta, ehatene xisoma maheta, exahe aokitere akereta xisaohena. Nikareya atyo xisaona hoka hatyoia atyo aliterexe xisaonita ekoamaniya.

<sup>2</sup>Hoka awa atyo matyakekoneharenai tyaonitere akereeta xisaona, xakore hoka maika kotare Enore waiyemaniya moheta xiyahekolana. Nikare ite hoka waiyekehalaka xomana Enore aokitereharenai, xoare xamani waiyexe, ehokorexe, exahe awaiyetitereharenai.

<sup>3</sup>Enore hawaiyexehare hiyeta iyateliti isehenere nomani hiyeta niraehena xikakoa: Awa atyo hatya xinekonitare hatahi taita ahokohena, exahe hoka haiyanae xahexe nawaiye aokowihena. Maika waiye ahokoty, Enore hatya ana xakini tyakekoti isehenere hiyeta. <sup>4</sup>Hiyaiya, wiháre kaxiyehare hoka hatya xakini atyo kahatenexe. <sup>5</sup>Nikare tehitiya wiso tyakekohenere-nae. Wikahare xakore hoka Cristo hiyeta haterore wisaona. Hoka wityotya hahotyalita wisaonita haiyanae hawareharexe haríti kaomakere kakoa.

### Waiyoliniti, Iyateliti Waiyexe Enore Isa Halitini Ana

(1 Coríntios 12.4-11; Efésios 4.9-12)

<sup>6</sup>Hatyo hiyeta nika wisomehena wihatene hawareharexe xakini, Enore isehenerehare womana hawaiyexehare hiyeta. Wihatene atyoite wiyakaini Enore niraene tahi hoka hatyoharenai atyoite wisomehena wityakekone hakakoaneta. <sup>7</sup>Wahaka mahetaiya hoka wahaka. Waotyakisa mahetaiya hoka waotyakisa. <sup>8</sup>Exahe waihalahalinikisa mahetaiya haiyanai hoka waihalahalinikisahene. Hatyaiya haxiyehare hiyeta isa aokowita haiyanae ana hoka maika haihalaharene kakoa isa. Xala xamaniya xekohaseti hoka hahatene kakoa irihare. Exahe xala tehitiya xamaniya haiyanae kahinaetya hoka haihalaharene kakoa kahinaetyahene.

### Wenati Waiyexe

(Atos 10.35; Gálatas 5.22-24; Efésios 4.1-3; 4.25-5.2)

<sup>9</sup>Maika xawaiyetya kaiserehare haiyanai. Xahalakihena iniyalahare hoka waiyexe xema taita xisaohena.

<sup>10</sup>Maika xihinaeharenae xihalaharene kakoa xawaiyetya, Cristo xema tyaonahitere hiyeta. Exahe maika waiyexe taita xisomehena haiyanai kakoa, xaiminisakakoa maheta. <sup>11</sup>Maika kalore xahaka, awa atyo ximaxahare. Xihalaharene kakoaira xahaka Xekohaseti ana. <sup>12</sup>Heko xatyahahena Xekohaseti xahita xihalaharene kakoa, exahe xakore haiya xowaka xawenane howitihare tyaonita hoka heko ximamaxaharehare xisaona hoka awa atyo xahalakihena xiraexala.

<sup>13</sup>Haiyanae Enore koamaniya tyaoniterenae xoalini hare aokitereharenae kakoa xirakakakoahena xoare

xamani xikaxiyehareta hoka. Exahe haiyanae kaokehena hoka waiye xamokahene xihanako.

<sup>14</sup> Enore hiye xiraehena kirawanetereharenae xiso waiye moka maheta. Xaxehenene hoka waiye mokene hoka awa atyo iniyalahare exomokakaha xaoka. <sup>15</sup> Maika ihalahareterenaekakoa xihalahare, exahe tiyitereharenaekakoa hoka xitiya. <sup>16</sup> Haiyanaekakoa ximehexaiko xisaohena hahotyalita. Awa atyo xaokowiharetyoa, awa atyo ximaxawaiyera wakaharenaek, awa atyo kalore xawaiyore xaokowi.

<sup>17</sup> Awa atyo haiyanaek iniyalahare mohena xiso hoka hatyo nahalakoa iniyalahare xamokene. Maika xisomehena tyotyalyalitiwaiyexe aokitereharenai. <sup>18</sup> Exahe xoana xamani xikaxomokakehena hoka maika xaiyateretyoa hoka ximehexaikohare xisaona haiyanai kakoa. <sup>19</sup> Nohinaeharenaek, maika hatya iniyalahare moka aokowihena xiso hoka awa atyo xikatolikoa xaokowi. Maika Enore ana xahalakisene hoka katolikoaretya xiso. Exakere atyo Iraiti Waiyexe nanekoa nexa:

“Natyo atyoite nakatolikoarehena xiso, exahe nabakahenahene”, nexa Xekohaseti.

<sup>20</sup> Iraiti Waiyexe nanekoa irahenere akereta xisaona:

Maika hahalakoahare nakita hoka nakairati hisa enomana hoka kanakaira, oinita hoka one hisa enomana hoka tera. Nikareya hisaona hoka hahalakoahare hehaihalikisa, nexa.

<sup>21</sup> Awa atyo iniyalahare xahalaisa hoka jiyahaotyalya xiso. Xaiyateretyoa hoka waiyexe kakoa iniyalahare xijiya-haotyalya.

#### Kalorexenaek Xaiminisaka Tahik

**13** Maika tyotyalyalitiwaiyexe kalorexenaek niraene tyakeko. Hiyaiya, maisa atyo hatya kalorexetyaotere Enore maxaokalahareneta. Kalorexetyaoniterenaek atyo Enore xomokalanai. <sup>2</sup> Nikareya xala xamani kalorexenaek mahokoanetita hoka Enore axikahenerehare atyo mahokoanetita. Nikare tyaoitereharenaek atyo hatyoahitaha iniyalahare maniya axomokanikisoahitaha. <sup>3</sup> Hiyaiya, iniyalahare tyomitereharenaek taitaiya atyo mairihena xekohasetinaek. Hoka waiye tyaoiterehenaek atyo maisa xoare maheta mairahitaha. Maika atyo maisa himaira haokowiye xekohasetinaek hoka waiyexe taita hisoma. Nikareya hisaona hoka ihalaharehaiya hikakoa. <sup>4</sup> Enore ana atyo hakahitaha, kasani waiye maniya hisaona aokahitaha hoka. Iniyalahareya atyo hisaonita hoka himaira. Kalorexenaek atyo kinatere hoka iniyalahareya mokaha hiso. Enore hatene atyo tyomahitaha hoka hatyo hiyetaiyalya iniyalahare mohena xala xamani iniyalahare tyomita hoka. <sup>5</sup> Hiyeta hoka maika xekohasetinaek niraene hityakekohena. Maisa iniyalahare mokahitere Enore aokitere akereta hiyeta taita xini. Xakore hoka xahekore hiyeta tehitiya.

<sup>6</sup> Hiyeta hoka kalorexenaek aokitereharenai xabakatya. Hiyaiya, hahateneha atyo tyomehenaha hoka Enore hatene atyo tyomahitaha. <sup>7</sup> Hatyo hiyeta xabakahenaek xikakotanetereharahene. Xabakahena xeko-

hasetinaek xabakatya aokitereharenai, exahe xixiyeharenai hiyeta aokitereharenai xaimane hoka xabakahena. Maika xaiminisatyotyalya kalorexenaek, exahe xityakekohene.

#### Xawaiyetyakakoati Tahik

<sup>8</sup> Awa atyo haiyanai ximabakalahare xisaona. Awa atyo haiyanaek ximaxawaiyerahare xisaona. Hiyaiya, xala xamaniya atyo haiyanaek awaiyetita hoka Xaotyakiyaho xema atyo tyaoonita. <sup>9</sup> Exakere atyo Xaotyakiyaho nexa:

Awa atyo haiyanaek nohiroxa hiwatyalik, awa atyo haisa halitik, awa atyo hikaiwa, awa atyo hatya xiyehare hi-maiyase, nexa.

Tyotyalyalitiwaiyexe, exahe haiyanai xoaha atyo kaxakiranetyaka hoka haterore Xaotyakiyaho tyaoonaha hoka nexa:

Hawaiyehena haiyanaek hawaiyetyoawitere akereta, nexa.

<sup>10</sup> Xala xamaniya atyo xawaiyetyatik kakoare hoka maisaiya atyo iniyalahare mokita hahinaehare. Hatyo hiyeta wawaiyehena atyo hoka Xaotyakiyaho xema atyo wisaonita.

<sup>11</sup> Maika nikare xisaohena, hiyaiya, waiyekehalakita atyo xomana kalikini wisaonitereharenai. Xiyaiya, kaosetyaose ferakene atyo xane hikoa. Hiyaiya, waiyexe maniya wiyomokakeheta atyo maisa seko-hetere kalikini, maisa atyo etake wityakekohenere xowaka akereta xini. <sup>12</sup> Hiyaiya, makiya atyo tyotehena hoka ferakoahena atyo wihiye. Hatyo hiyeta nikahena hoka wahalakisa makalirotik koni anerenai hoka wiyaiyatelilisakala wiya hoka wikipatere wisaona xaokanatyakalatik xema. <sup>13</sup> Nikahena hoka waiyexe maniya taita wisaona haiyanaek ferakoa tyaoitere akereta. Hoka wahalakihena kaisere wimaxaloharene, weratetyoane, ohiro hiye wawenane, xoalini hare kehaisakere, wiyalijinihare kakoane, wokoawahare kakoane harenaek. <sup>14</sup> Maika Wiyekohase Jesus Cristo niyateretere kakoa xisaona, awa atyo iniyalahare kaxawaiyetyakitere xema xisaona.

#### Awa Atyo Iniyalahare Hihinaehare Hamoka Haokowi

**14** Maikaira kotare xinekoni xamoka xala xamani maisa kalore tyakekore hoka. Xakore hoka awa atyo exahekolanai hiyeta kinatyaxa xirae ekakoa. <sup>2</sup> Hiyaiya, haiyanaiya atyo hatyakekoneha hiyeta kanakairaha tyotyalya xoalini harenai. Hoka haiyanaiya atyo maisa kalore tyakekoreha hoka atyalik, exahe hananehalitik taitaiya atyo kanakairaha. <sup>3</sup> Hoka maika hatyo tyotyalya xoalini harenai kanakairiterenaek awa hahinaeharenai manakairiterenaek maxaiminira. Exahe awa atyo hatya hananehalitik taita kanakairitere irasekoatyalya hatyo tyotyalya xoalini harenai kanakairiterenaek tahik. Hiyaiya, Enore atyo haomanere aokene. <sup>4</sup> Xala atyo hiso hoka hiraeharetita hatya wakanehare? Exahiya, xoana heko xamani kinatere tyaoonita, exahe xoana maisa xamani kinatere tyaoonita hoka exekohase

atyoite ahekohena etahi. Hekoite kinatere tyaona. Xekohaseti atyoite aiyaatelikisene.

<sup>5</sup> Haiyanae xahekola hiye atyo hoka haferakene atyo haiyanai ferakenenai xahexe nawaiye aokahitaha. Hoka haiyanai xahekola hiye atyo hoka ferakitina ni-hatyaka atyo hakakoa ferakeneta. Hoka maika nikarehena hoka hatya xakini haxahekola xema tyaona.

<sup>6</sup> Xala ana xamani atyo haferakene masakare waiyeta hoka hatyo atyo Xekohaseti aiminijita, exahe ihalahareta atyo ekakoa. Xala xamani atyo kanakairita tyoty xoalini harenai hoka Xekohaseti atyo aiminijita, Enore kakoa atyo ihalahareta nakairati hiyeta. Nikare xala xamani maisa eteti harenai nisare hoka Xekohaseti atyo aiminijita, exahe Enore kakoa atyo ihalahareta.

<sup>7</sup> Maisa atyo womanita xini wisaonita, exahe maisa atyo womanita xini wiwainita. Xekohaseti anaiya atyo wisaonita hoka enomanere atyo wisaonita, <sup>8</sup> exahe wiwainihena hoka Xekohaseti anere atyo wiwainita. Exaheya xoana wikaseta xamani, wiwainihena xamani hoka Xekohaseti anere atyo wisaonita. <sup>9</sup> Hatyoharenae niyahare atyo Cristo waini, exahe kaseheta hoka kamatinae, kaseterena xoaha Xekohase tyaona maheta. <sup>10</sup> Hatyo hiyeta xoana hoka hihinaehare tahi hiraesekoaita? Exahe hatya, xoana hoka himaxaiminirita hihinaehare? Hiyaiya, wityoty atyoite Enore nahalakoa wiyane hoka hatyo atyoite wisomitere akereta mohenena wiso. <sup>11</sup> Hiyaiya, exakere atyo Iraitai Waiyexe nexa: "Aliterexe niraeta", nexa Xekohaseti. "Tyotyaita halitinae hakaoli kakoa meholokoahena nahalakoi hoka nenahaite: 'Aliterexe nika hiso Enore', nexahaite", nexa. <sup>12</sup> Hatyo hiyeta wityotyaita hatya xakini wiyakaihena wawenane tahi Enore hiye.

#### Awa Atyo Iniyalahare Maniya Hihinaehare Hamoka

<sup>13</sup> Hatyo hiyeta nikareta kaisere wiraeharetya haiyanai. Hoka awa atyo xoalini hare xisoma hoka iniyalahare maniya xihinaeharenai xaxomokanikisa. <sup>14</sup> Xekohaseti koamaniya notyaonitere hiyeta, nomani atyo maisa xoarehare manakairatyakahare aka. Hoka xala ana xamaniya atyo xoalini hare manakairatyakahare tyaonita hoka manakairatyakahare terota atyo tyaonita enomana. <sup>15</sup> Hexamaikohalinikijitaiya hihinaehare, hikanakairiterehare hiyeta hoka maisa atyo hihinaehare hawaiyetyare. Awa atyo hikanakairiterehare hiyeta hihinaehare iniyalahare maniya haxomokanikisa. Hiyaiya, Cristo atyo waini enomana. <sup>16</sup> Awa atyo xoalini hare xisoma hoka haiyanai iniyalahare iraeaha, xoalini hare waiyexe xaokitere tahi. Xiriharira hatyohare kakoa. <sup>17</sup> Hiyaiya, Enore koamaniya nawenatyaka atyo maisa nakairati, erati xoaha xini. Xakore hoka waiyexe wenati, mehaxaikaliti, ihalahaliti atyo. Isekohaliti Waiyexe atyo hatyoharenae ijita. <sup>18</sup> Hoka xala xamani atyo nikare tyaonita Cristo ana hoka aihalahalinijita atyo Enore, exahe halitina atyo tyakekotene. <sup>19</sup> Hatyo hiyeta nika kaisere wisaohena xoalinihare amehaxaikalikijitere wiso, exahe kahinaetya wiso

hoka haiyanai tyakekohatiyenai waiyatelikijiterehare ityakekoneha kakoa xema. <sup>20</sup> Hoka awa atyo nakairati hiyeta Enore hatene hemaisatya. Tyoty nakairatina atyo kakanakairatyakere taita, xakore hoka maisa atyo ehokoreta nakairatyaka xini etakehare hatyohare hiyeta hatya iniyalahare maniya axomokanikijiterehare. <sup>21</sup> Waiye atyo eteti manikakene, exahe vinhoxa maerakene, exahe xoalini hare maomakene, maisa hihinaehare iniyalahare maniya haxomokanikijita maheta. <sup>22</sup> Hiso atyo hawaiyoreta hityakekone kakoa, exahe Enore hoka waiyoreta hityakekone kakoa. Waiye kaiserehare atyo xala xamani hatyakekone kakoa tyomita xoalini hare hoka. <sup>23</sup> Hoka hatya anaiya atyo maisa waiyekehalakere hoka mahaiya atyo nijita eteti. Maisaiya hatyakekone kakoa xoalini hare kanakairita hoka maisaiya Enore ana waiyeta. Xoare xamani atyo maisa hityakekone kakoa xini hisomita hoka hatyo atyo iniyalahare.

#### Haiyanai Waiye Xomokaka Tah

**15** Wiso wikinatere wityakekone kakoa wisaoniterenai atyoite wakahinaehena inira tyakekoterenai, hakolalaha kolatyaha maheta. Maisaiya atyo witahi taita wahekoita. <sup>2</sup> Nika hoka wihalahalinihikisa wihinaehare waiye tyaona maheta, exahe ityakekoneha kekoare maheta. <sup>3</sup> Hiyaiya, Cristo atyo maisa hatahi taita xini ahekoty. Iraitai Waiyexe atyo exakere nexa: Xalijiniharexenai kirawanehenere hiso atyo exoa noheno, nexa. <sup>4</sup> Tyoty kaxairatyakehenere Iraitai Waiyexe nanekoa atyo aotyakisa wiso maheta hoka wimamaxaharenehare watyaha maheta Xekohaseti xahita. Exahe wimamairanehare mokitere Iraitai xairatyaoare tyaonitere kakoa maheta. <sup>5</sup> Kasani Enore, mehaxaikaliti, iyateliti xekasehare kahinaetya xiso hoka waiye xamokakakoa naokita, Jesus Cristo haiyanae waiye mohenere akereta. <sup>6</sup> Nikare ite hoka xityoty haxawalita xaexakeritya Wiyekohase Jesus Cristo Nexa Enore.

#### Waiyexe Iraitai Majudeuneharenai Ana

<sup>7</sup> Hatyo hiyeta haiyanae xaohena xomana, Enore kakoa ihalahareha maheta, Cristo aohenere xiso akere. <sup>8</sup> Cristo atyo judeunae wakanehare tyaona, Enore katyakekotyaka maheta, exahe hoka Enore toahiya irahenereharenae enahetakomaniyereharenae hiye kaotyaka maheta. <sup>9</sup> Exahe majudeuneharenae hoka Enore aexakerityaha maheta enawaiyexehare hiyeta. Exakere atyo Iraitai Waiyexe nexa: Hiyetaite hoka naexakeritya hiso majudeuneharenae koni, exahe noxaexakiliri kakoaita noxera homana, nexa.

<sup>10</sup> Exakere nehitiya Iraitai Waiyexe: Xiso majudeuneharenae, maika xihalaharehena Enore haomanere aohenerena kakoa, Israel hotyalinai kakoa.

<sup>11</sup> Exakere tehitiya nexa:

Xiso majudeuneharenae, xityoty xaexakerehena Xekohaseti. Xityoty xiso haliti hotyalinae xaexakerehenene.

<sup>12</sup> Isaías tehitiya nexa:

Jessé jikolahare ite tyoa. Kaotyakaite hoka majudeuneharenae Xekohase tyaona hoka exahita atyoite atyaharetyoahenaha.

<sup>13</sup> Maika Enore, axatyahanikijiterehare wiso, kalore aihalahalnikisa, amehexaikohalikisa xiso, xityakekoterene hiyeta hoka xiyatyahane heko kekoare Isekohaliti Waiyexe niyaterere hiyeta.

#### Paulo Xawaiyehalalaka

<sup>14</sup> Nohinaeharenai, noxahekoli hiye hoka kalikini ala xawaiyexehare, exahe xawaiyore xoalini hare kakoa, exahe xawaiyore xaotyakisakakoita naoka. <sup>15</sup> Hoka kalikini exe babera naxairatya nomamairanini kakoa, haiya akiti Iraitinae xotyaxematya maheta Enore iyateliti isehenere nomani hiyeta.

<sup>16</sup> Iyateliti isa nomani Jesus Cristo wakanehare notyaona hoka majudeuneharenae nakahinaetya maheta. Sacerdote akereta atyo notyaonita Waiyexe Iraitinae Enore niraene noxakaitere hiyeta. Nikare notyaonita, kasani majudeuneharenae, Enore aokahene haomana efetatyakaharenai akereta naokita, Isekohaliti Waiyexe hiyeta.

<sup>17</sup> Hatyo hiyeta Jesus Cristo kakoa haxawalita notyaonita hoka nahakitere Enore hatene hiyetaite naokowiharetyoahena. <sup>18</sup> Hiyetaite hoka niraehena Cristo xoalini hare tyomitere nohiyeti tahi akiti taita, majudeuneharenae Enore tyakeko maheta. Hatyoharenai atyo kaomaka Iraitinae hiyeta, wenati waiyexe hiyeta, <sup>19</sup> exahe metaharexe nomaka hiyeta, exahe Enore Nisekohare niyaterere xoaha hiyeta. Nikare, Jerusalém nalita, exahe Ilíria nali kijiya, Waiyexe Iraitinae noxakaita tyoty Jesus Cristo tahi halitinai hiye. <sup>20</sup> Naiyateretyoa minita atyo noxakaini Iraitinae Waiyexe kakoa haiyanaikoa Cristo tahi masemaneharenai hiye. Maisa noxakai maheta xini koxaka haiyanai xakaihenereharenai hiyeta maheta xini.

<sup>21</sup> Hiyaiya, exakere atyo Iraitinae Waiyexe nexa:

Haiyanae Jesus Cristo tahi masemaneharenae ite waiyehenahene, exahe haiyanae masemaneharenae etahi ana ite waiyehalalaka.

#### Paulo Xane Waiyeheta Roma Yerenae Aokowi

<sup>22</sup> Kahaliki xakore notyoya nowaiyeheta xiso naokowita hoka maisa aliyakere xaka. <sup>23</sup> Xakore hoka koxaka tyare atyo nohateni alikoanai namiyatya hoka toahiyita tyare nowaiyeheta naokowita xiso hoka <sup>24</sup> kalikini atyoite notyoya nowaiyehetehena xiso. Kasani Espanha noxanihenere xowaka nowaiyeheta naokowita xiso, exahe kasani tehitiya xakahinaetya natyo naokita noxanini nali xeta kakoa, nowaiyehetehenere xiso najikinita.

<sup>25</sup> Xakore hoka kalikini atyoite noxanihena Jerusalém xeta Enore kaxaikoneharenai nakahinaetya maheta.

<sup>26</sup> Macedônia, Grécia nali xoaha Enore xema tyaoniterenaeha ahotalikisaha xiyehaliti, kahinaetyaha aokowihana Jerusalém nali Enore kaxaikonehare hotyalinai maxiye-harehare tyaoniterenaeha maheta. <sup>27</sup> Hatyoahitaha nikare ahekotyaha, nikare terota atyo ehateneha judeunae kahinaetyaha maheta. Hiyaiya, judeunae atyo Enore koamaniya nawenatyaka kakoa kahinaetyaha majudeuneharenaeha. Hiyeta hoka majudeuneharenaeha ite kahinaehena judeunae haxiyehareha xoalini hare waiyexe kakoa.

<sup>28</sup> Exe hateniti ite namiyatya, exahe exe ahohisakoharenahere xiyehaliti hotohare ite nisa namiyatya hoka hatyo najikinitaite noxani Espanha xeta hoka notonani heko nowaiyeheta xiso. <sup>29</sup> Nowaiyehenere xiso xowakaite waiyexe xoalini hare Cristo nalitare kaotyakehena xomana. Hatyoharenaeha waiyehalalaka nomani.

<sup>30</sup> Naxa xiso, nohinaeharenaeha, Wiyekohase Jesus Cristo hiyeta, exahe Isekohaliti xawaiyetyati ijitere womana hiyeta. Maika xakahinaetya natyo xiraexala kakoa. <sup>31</sup> Xiraexatya nomani hoka Judéia nali matyakekoneharenai tyaoniterenaeha maisa xoana mokita natyo, exahe Enore kaxaikoneharenaeha Jerusalém naliyerenai hoka nohateni kakoa ihalahareha. <sup>32</sup> Nikare ite, Enore xaokalita hoka nokaokihena xomana hoka nihalahare, exahe xihalahalnikisaite natyo. <sup>33</sup> Maika Enore, mehexaikohaliti ijitere womana, kaxaiko xityoty naoka. Xoaha taita.

#### Haxakaisakeheta Aoka Hahinaeharenaeha Hiye

**16** Wihinaehalo Febe tahi niraeha xihye. Cencreia nali Cristo xema tyaoniterenaeha kahinaetyasero tyaonita. <sup>2</sup> Maika exe wihinaehalo waiyeha xamoka. Nikare atyo Enore koamaniya tyaoniterenaeha hahinaeharenaeha mokita. Maika xisa enomana, xoarenai hiye xamani xakahinaetene aohena hoka. Hiyaiya, koxaka atyo kahare haliti kahinaetya, exahe natyo tehitiya hoka koxaka kahinaetya.

<sup>3</sup> Maika xiyakaiheta natyo Priscila, Áquila xoaha hiye. Hatyonai atyo haxawalita hakaha nokakoi Jesus Cristo hatene hiye. <sup>4</sup> Hakahinaeraha natyo hiyeta komita kaxaisakaha. Hatyoharenai hiyeta nihalahare ekakoaha. Maiha natyo taita xini. Majudeuneharenaeha Cristo koamaniya tyaoniterenaeha hotyalinai tehitiya ihalahareha ekakoaha.

<sup>5</sup> Maika xiyakaiheta tehitiya natyo Cristo koamaniya tyaoniterenaeha ehanakoha nali hohisakoiterenaeha hiye.

Maika xiyakaiheta tehitiya natyo noxiyakawalihare nohinaehare Epêneto hiye. Hatyo hotohare atyo Cristo koamaniya hawenane moka Ásia koa nali.

<sup>6</sup> Maika xiyakaiheta natyo Maria hiye. Hatyo atyo kalore haka xinekoni.

<sup>7</sup> Maika xiyakaiheta natyo Andrônio, Júnias xoaha hiye. Hatyonai atyo nohinaeharenai judeunai atyo. Haxawalita kaberehotyaka hoka nokakoi. Cristo niraene kakoarenaeha waiyaneharenai kaiserehare atyo tyaonaha. Nahitita atyo Cristo koamaniya tyaonaha.

<sup>8</sup> Maika xiyakaiheta natyo noxiyakawali Ampliato hiye. Xekohaseti koamaniya tyaonita hoka hatyo hiyeta nakakawatene.

<sup>9</sup> Maika Cristo hatene hiye kahinaetitere wiso Urbano hiye xiyakaiheta natyo. Exahe tehitiya noxiyakawali-hare nohinaehare Estáquis hiye hoka xiyakaiheta natyo.

<sup>10</sup> Maika Apeles, Cristo koamaniya masakare tyaonitere hiye xiyakaiheta natyo. Aristóbulo exanityo, ityaninae harenae hiye hoka xiyakaiheta natyo.

<sup>11</sup> Maika nohinaehare kaiserehare judeu Herodião hiye xiyakaiheta natyo, exahe Narciso hotyali Cristo koamaniya tyaoniterenae hiye hoka xiyakaiheta natyo.

<sup>12</sup> Maika xiyakaiheta natyo Trifena, Trifosa, Xekohaseti ana hakiterenae hiye. Exahe tehitiya noxiyakawalihalo nohinaehalo Pérside hiye xiyakaiheta natyo. Hatyo tehitiya atyo kalore haka Xekohaseti ana.

<sup>13</sup> Maika xiyakaiheta natyo Rufo hiye. Hatyo atyo kalore haka Xekohaseti ana. Exahe inityo hiye hoka xiyakaiheta natyo. Inityo waiye mokita natyo haisani akereta.

<sup>14</sup> Maika xiyakaiheta natyo Asíncrito, Flegonte, Hermes, Pátrobas, Hermas, xoahanae hiye, exahe wihi-naeharenae nali tyaoniterenae hiye hoka.

<sup>15</sup> Maika xiyakaiheta natyo Filólogo, Júlia, Nereu, enahalo xoaha hiye. Exahe tehitiya Olimpas, tyotya Enore kaxaikoneharenae nali tyaoniterenae hiye hoka xiyakaiheta natyo.

<sup>16</sup> Maika xikatyawaxakakoahena hoka xasohitanakolisakakoa xiyawaiyetyakakoane hiyeta. Tyotya Cristo koamaniya tyaoniterenae tehitiya haxakaisakeheta aokaha xihye.

#### **Maika Xirihare Xaotyakisatiyenae Metalahare Kakoa** (2 Coríntios 11.12-15; 1 Timóteo 1.6-7; 4.1-3)

<sup>17</sup> Nohinaeharenai, maika xirihare haiyaharenai exaoretitereharenai wenati kakoa, exahe haiyanai tyakekone ahowitikijiterenai, exahe xikaxaotyakisakehenere hare mahokoanetitereharenai kakoa. Maika xakikisoaheta enonitaha. <sup>18</sup> Hiyaiya, nikare tyaoniterenai atyo maisa Wiyekohase Jesus Cristo xema xini tyaonahitaha, haxahekolaha ximita atyo nikare tyaon-

ahitaha. Exahe waiyore irateta hoka aihalahalíníkisa haliti maotikonexe hoka maoseratyahitene.

#### **Xaotyakisati Miyane**

<sup>19</sup> Iraiti Waiyexe xema xikinaterere xisaonitere atyo tyotya halitinae ana waiyekehalakita. Hiyeta hoka nihalahareta xikakoa. Kasani xawaiyore waiyexe kakoa naokita, exahe hoka maisa xawaiyorexe iniyalahare kakoa naokare. <sup>20</sup> Enore mehaxaikohaliti ijitere womanaite haxeroreta xikiji katyahe moka Ahalakoahaliti hoka xatyahakahekoatene.

Maika Wiyekohase Jesus Cristo waiye moka xiso naoka.

<sup>21</sup> Timóteo, nokahinaetyase hateniti hiye, haxakaisakeheta aoka xihye. Lúcio, Jasão, exahe Sosípatro, judeunae tehitiya, haxakaisakehenahitaha aokaha xihye.

<sup>22</sup> Natyo Tércio exe babera Paulo axikahenere naxairatya hoka maika xiyakaiheta natyo Cristo koamaniya tyaoniterenae hiye.

<sup>23</sup> Gaio haxakaisakeheta aoka xihye. Ehanako atyo notyaonita, ehanako nali atyo Cristo koamaniya tyaoniterenae ahohisakoatyakakoita hoka haxakaisakeheta aokaha xihye. Ali wenakalatikoa olo kaxaikotere Erasto haxakaisakeheta aoka xihye, exahe wihi-naehare Quarto tehitiya hoka haxakaisakeheta aoka.

<sup>24</sup> Maika Wiyekohase Jesus Cristo waiye kaxaiko xiso naoka.

#### **Iraexatyati Xaexakeretyati Miyane**

<sup>25</sup> Maika waexakerehena Enore. Hiyaiya, Waiyexe Iraití noxakaihenere Jesus Cristo tahi hiyeta Enore aiyateliníkisa xiso, xityakekone hiyeta. Exahe toahiya Iraití Waiyexe metahare tyaonitere kalikini kaotyakehenere xoaha hiyeta. <sup>26</sup> Kalikini exe Iraití Waiyexe kaotyaka toahiya Iraití xakaisaseharenae xairahenere hiyeta. Enore menanehaliti xaokalita atyo kasemaka exe Iraití hoka tyotya haliti hotyalinae semene hoka tyakekone maheta. <sup>27</sup> Kasani, Enore haterore, exahe waiyorexe kakoa kaihalaharetyaka mene naoka, Jesus Cristo hiyeta. Xoaha taita.



# 1 Coríntios

## Paulo Tyawaxa

**1** Natyo, Paulo, Jesus Cristo niraene kakoare notyaona Enore xaokalita. Wihinaehare Sóstenes kakoa <sup>2</sup> naxairatya exe babera Enore koamaniya tyaoniterenae wenakalati Corinto yerenae ana. Xiso Cristo koamaniya xisaona hoka Enore aohenerenai haomanexe ana. Exahe exe babera atyo tyotyta Jesus Cristo kahinaera axiterenai anere, exahe hatetere awaiyitita Jesus hoka exe babera enomanere tehitiya. Xekohaseti Jesus Cristo atyo Exekohaseha, exahe wityotyta Wiyekohase.

<sup>3</sup> Maika Wexe Enore, exahe Wiyekohase Jesus Cristo xoaha nalitare waiyexe wenati, exahe mehexasikohaliti xoaha tyaona xikakoa naoka.

## Waiyexe Nomaka Cristo Hiyeta

<sup>4</sup> Nihalahareta Enore kakoa tyotyaki ferakene xihiyeta. Hiyaiya, Enore kahare waiyexe tyomita xomana Jesus Cristo hiyeta. <sup>5</sup> Cristo koamaniya xisaona hoka xawenane waiye kaiserehare tyaona. Xawaiyore xiraeata, exahe xawaiyore xahekotita harenai. <sup>6</sup> Cristo tahi xasema hoka xityakeko hoka xikinaterere xisaonita ekoamaniya, <sup>7</sup> hoka maisa xoare waiyexe maxekaneta xomana, exahe xatyahita Wiyekohase Jesus Cristo haikoahaneheta xahita.

## Enore Ite Waiye Kaxaiko Wiso

(Romanos 8.31-39; 16.25; Filipenses 1.6; Judas 24-25)

<sup>8</sup> Hatyo atyoite waiye kaxaiko xiso hoka xikinaterere moka miyanitiye ferakene kijiya niyahare, Wiyekohase Jesus Cristo tyohetehenerere xowaka maisa xoare hare iniyalahare kawayakita xihiyeha maheta. <sup>9</sup> Enore atyo irahena hoka aliterexe atyo iraeata, maisa maotyanexe hairaene. Hiyaiya, hatyo atyo kawisa xiso, Ityani Wiyekohase Jesus Cristo kakoa hahotyalita xisaona maheta.

## Hahekore Xakini Corinto Yerenai Ahekotyta

<sup>10</sup> Nohinaeharenai, niraehena xikakoa Wiyekohase Jesus Cristo xaokalita: Maika hakakoa xiraehena, awa atyo haware hahotyaliti ahekotyta hahotyaliti nonitata hoka maisa awaiyetyakakoita. Maikaira hahotyaliti xahekotyta hatita hiye, exahe hatita xisoma xaokowitere tahi. <sup>11</sup> Nohinaeharenai, Cloe hotyalihare konitarenai kaoka nomani hoka xakai xitahi nohiye hoka xiki-rawanekakoita aokaha.

<sup>12</sup> Exakere nomita xihiyeha: hahekore xakini xahekotita. Hatya nita: "Natyo atyo Paulo xaotyakira xema notyaonita". Hatya hoka: "Natyo atyo Apolo xaotyakira xema notyaonita". Hatya hoka: "Natyo atyo Pedro xaotyakira xema notyaonita". Exahe hatya hoka: "Natyo atyo Cristo xaotyakira xema notyaonita", nita.

<sup>13</sup> Xoana Cristo kaxehakasekoatyaka kahare taose? Xoana Paulo kaberekotyaka atyalihose xaimaholatyaka hiye xomana? Xoana xikabatixatyaka Paulo nexare kakoa?

<sup>14</sup> Maisa xala hare xinekonitare nabatixaita hoka hatyo hiyeta Enore kakoa nihalahareta. Kala Crispo exahe Gaio hare taita nabatixatyaka. <sup>15</sup> Nikarite hoka maisa xalahare Paulo nexare kakoa xikabatixatyaka aokita.

<sup>16</sup> (Nabatixatyaka tehitiya nika Estéfanas, exahe exanityo, ityaninai harenai hoka, motya akere maisa hatehitiya nobatixalihare aka.) <sup>17</sup> Cristo atyo maisa nabatixatyaka maheta xini axikatya natyo. Axikatya atyo natyo noxakai Waiyexe Iraititi halitinai hiye maheta. Maisa nawaiyolini kakoa xini noxakaihakatya aoka. Kasani maisa Cristo wainihenerere atyalihose xaimaholatyaka hiye tahi kaxemaisatyaka aokare hoka maisa xoare tyomare.

## Cristo Atyo Enore Niyatere, Enawaiyore

<sup>18</sup> Hiyaiya, hamawenekoaretyakaho xaneterenae ana atyo Cristo atyalihose xaimaholatyaka hiye wainihenerere tahi atyo hatyahalititi enomanaha. Hoka wiso koxaka wikaiyakehetehenerenae ana atyo Enore niyaterere waokitene. <sup>19</sup> Hiyaiya, exakere atyo Iraititi Waiyexe nexa:

"Namiyatyaite waiyorexenai nawaiyore, nemaisatyaitaite waiyore ahekoiterenae xahekola".

<sup>20</sup> Hiyeta hoka aliyo waiyorexenae, waiyore ahekoi-tereharenai? Aliyo waiyore iratereharenai ali waikohokoarenai? Enore ana atyo halitinae nawaiyore hatyahalititi! <sup>21</sup> Enore, hawaiyore hiyeta, maisa halitinae waiyorehitaha etahi akiti hawaiyoreha kakoa aokita. Xakore hoka waiye maniya atyo moheta aokowi tyakekohenerenai. Nikare tyoma iraititi "hatyahalititi" aokahitere wiyakaitere hiyeta.

<sup>22</sup> Judeunae atyo xalinihare nomaka aokahitaha, waiyaha hotohare hoka tyakekoha maheta. Hoka gregonae atyo waiyoliniti tawita. <sup>23</sup> Hoka wiso atyo Cristo kaberekotyakehenerere atyalihose xaimaholatyaka hiye tahi wiyakaihakaita hoka hatyo tahi aehalikijita judeunae, hoka majudeuneharenai ana atyo hatyohare tahi hatyahalititi aokahitaha.

<sup>24</sup> Hoka Enore aohenerenae haomanerenae ana atyo, xoana judeunae xamani, xoana majudeuneharenai xamani hoka, Cristo atyo Enore niyaterere, Enore nawaiyore aokahitaha. <sup>25</sup> Hiyaiya, Enore hatyaharene aokahitere atyo haliti nawaiyore xahexe, exahe Enore maiyaterene kaxaokakiterehare atyo halitinai niyaterere xahehare.

<sup>26</sup> Xasemehena, nohinaeharenae, xotehenaira xawenane Enore haomana aohenere xiso nahitita. Exowakiya komita ene maisa xala hare waiyorexe aka, xekohaseti hare aka, kaoloxere aka xinekoni. <sup>27</sup> Ehaihalikisa maheta haliti waiyorexenai, Enore aoka haomana etakehare hatyahaliti aokiterehare halitinai. Ehaihalikisa maheta xekohasetinae, aoka haomana etakehare maiyatererehare aokiterehare halitinai.

<sup>28</sup> Enore aoka tehitiya haomana halitinae nirawanakorenane, exahe kirakoane tyaonitere hoka maxoare-waikatehare aokahiterehare hoka haomana aokahene emaisatya maheta halitinai ana waiyetererehareni.

<sup>29</sup> Hatyoharenai hiyetaiya maisaiya xala hare aokowiharetyoita Enore nahalakoa.

<sup>30</sup> Xakore hoka Enore terota atyo moheta xiso Jesus Cristo koamaniya, exahe hoka Cristo hiyeta wawaiyorene isa womana. Exahe hoka Cristo hiyeta haliti waiyexe Enore aoka wiso, Enore hotyalihare wisaona, waiyexe maniya wikaiyakeheta. <sup>31</sup> Hiyaiya, exakere Iraitai Waiyexe nexa:

“Xala xamani aokowiharetyoa aokowita hoka, aokowiharetyoahena Xekohaseti tyomehenere kakoa”, nexa. Kasani nikare wisaona aoka.

### Cristo Kaberekohenere Tahī

**2** Nohinaeharenae, notyoa noxakaihenere xihiyē Enore metaharene tahi xowaka, maisa waha tahi niraeta, maisa kalore nowaiyolini kakoa xini noxakaihakatya xihiyē. <sup>2</sup> Nali notyaohenere xinekoni xowaka tyotyā xalinihare nomaotyani naokowita, Jesus Cristo wainihenerere atyalihose xaimaholatyaka hiye tahi taita notya naokowita. <sup>3</sup> Notyoa nowaiyehenerere xiso xowaka maisa nokinatere notyaonare, natatakoita nomairani hiyeta. <sup>4</sup> Naotyakijitere, noxakaihakaitere atyo maisa halitinae nawaiyore akereta xini. Xakore hoka Enore Nisekohare atyo aiyatelikijita natyo, hoka hatyo hiyeta niraehena xikakoa hoka iniyaterere xixihixita xihiyē. <sup>5</sup> Hatyo hiyeta xityakekone atyo maisa halitinae nawaiyore hiyeta xini. Enore niyaterere atyo aiyatelikijita xityakekone.

### Enore Nawaiyore

<sup>6</sup> Xakore hoka niraeta atyo etakehare waiyexe maniya hawenane mohetehenerenai nawaiyore tahi. Hoka maisa atyo exe waiyoliniti ali waikohekoare xini, maisa etakehare xekohasetinai haiyaterere ximita kaxaikoakaitereharenai hoka ekalorexeneha nonitata kakikisakihititerereharenai xini. <sup>7</sup> Exe waiyoliniti metaharexe atyo Enore nalitare, kaxateroakisaka atyo halitinai nonitata. Waikohe kaomakehenere nahitita atyo

Enore womanere terota aokene waiye wisaona maheta. <sup>8</sup> Maisa xala hare kalikini kalorexe tyaoniterenae ana waiyekehalakere hatyo waiyoliniti. Waiyekehalakitaiya enomanaha hoka maisaiya berekotyahitaha atyalihose xaimaholatyaka hiye enokoatare Xekohaseti.

<sup>9</sup> Hiyaiya, exakere Iraitai Waiyexe nexa:

“Enore xalinihare waiyexe memere moka awaiyeterereharenae ana. Xakore hoka maiha xala hare waiyarene, semarene. Maisa xalahare ahekotita hatyohare kaotyakene tahi akiti”.

<sup>10</sup> Xakore hoka Enore atyo hotikisa womana hametaharene Haisekohare hiyeta. Isekohaliti Waiyexe atyo tyotyā tawihitita xalini hare, Enore xahekola metaharexe tyaoniterehare kakoita waiyoreta. <sup>11</sup> Hiyaiya, haliti nisekohare taita atyo waiyoreta hatyo haliti ahekoiterehare kakoa. Nikareta Enore Nisekohare taita waiyoreta xalinihare ahekoiterehare kakoa. <sup>12</sup> Maisa atyo isekohaliti ali waikohekoatare kaxekakita womana xakore hoka Isekohaliti Enore axikahenerere womana atyo awaiyekehalakaita tyotyā xalinihare Enore isehenererehare womana.

<sup>13</sup> Hatyo hiyeta wiraeta Enore Nisekohare aotyakihenere wiso kakoa, maisa atyo haliti waiyoliniti kakoa aotyakihenere wiso kakoa xini wiraeta. Wawaiyekehalakaita Iraitai Aliterere waiyexe maniya tyaonitereharenai ana.

<sup>14</sup> Hoka xala xamani atyo maisa Enore Nisekohare kakoare hoka maisaiya atyo aliyakere Enore Nisekohare xaotyakira waiyekehalakita enomana. Hatyohare aliterere xakore hoka hatyo atyo hatyahaliti enomana. Hiyaiya, hatyohareya atyo kawaiyoretyaka wenati waiyexe maniya kawenatyakehenere hiyeta. <sup>15</sup> Haliti Isekohaliti Waiyexe kakoare atyo waiyore ahekoita tyotyā xalini hare kakoa. Waiyoreta haiyaharenai nawenane kakoa hoka haiyaharenae atyo maisa waiyorexe enawenane kakoa.

<sup>16</sup> Hiyaiya, exakere Iraitai Waiyexe nexa:

“Xala waiyoreta Xekohaseti xahekola kakoa? Xalaiya aotyakisene?”

Hoka wisonai atyo Cristo xahekola kakoare.

### Enore Wakaneharenae

**3** Nohinaeharenae, maisaiya aliyakere niraeta xikakoa Enore Nisekohare kakoarenai namokitere akereta. Hatyo hiyeta niraeta xikakoa matyakekoneharenai kakoa kairaityakitere akereta. Xoima akereta atyo xisaonita xawenane Cristo koamaniya kakoa hoka. <sup>2</sup> Exowaka xoima kaxaerakisakitere totonexati kakoa akereta naotyakisa xiso, maisa atyo nakairati kinaterere kakoa katyaisakitere akereta xini naotyakisa xiso. Maisa atyo hatyohare niyahare ximemehenere hoka. Exahe kalikini hoka maisa ximemehenere.

**Enore Maxawaiyerene**

(Romanos 1.26-32; 1 Coríntios 10.6-10; 1 Timóteo 1.9-10; Tiago 3.10-16)

<sup>3</sup> Hiyaiya, matyakekoneharenae tyaonitere akereta atyo xisaonita: Xokoawaharekakoahena, xiki-rawanekakoahena harenai hoka hatyohare hiyeta matyakekoneharenae akereta xisaonita, haiyanae tyaonitere akereta xisaonita. <sup>4</sup> Hiyaiya, hatya nehena: “Natyo atyo Paulo xaotyakira xema notyaonita”, exahe hatya hoka, “Natyo atyo Apolo xaotyakira xema notyaonita”, nita. Nikare xisaonita hoka matyakekoneharenae tyaonitere akereta atyo xisaonita.

<sup>5</sup> Hiyaiya, xala atyo Apolo? Xala atyo Paulo? Wiso atyo Enore ana wahakita hoka wiyaotyakira hiyeta atyo xityakeko Xekohaseti. Xekohaseti isehenere womana wihatene wihatya atyo wisomita. <sup>6</sup> Natyo hotohare atyo nafetene hoka Apolo atyo horeraharetya hatyo hananehaliti, hoka Enore atyo akekoaretene. (“Hananehaliti”, nita Iraitu Waiyexe xaokaka.) <sup>7</sup> Hiyaiya, nikare hoka fehenerene, ehoreraharetyase xoaha komita ene maisa xoare hare tyomita. Xakore hoka Enore atyo akekoarenikisene. <sup>8</sup> Hatyo hiyeta maiha atyo hawareharexe xakini xini exafityasehare exahe ehoreraharetyasehare xoaha hoka. Enore atyoite isehena enomanaha hahenahere akereta. <sup>9</sup> Hiyaiya, wiso atyo wikahinaehare kakoita hoka haxawalita wahakita Enore ana, exahe xiso atyo emasenekoa akereta.

Xiso tehitiya atyo Enore hana wahaharexe akereta. <sup>10</sup> Enore nawaiyolini isehenere hiyeta atyo hati no-masehare waiyexe akereta notyaonita. Notyoma hati kilihi hoko hoka hatya tyomiterene eheno akereta. Maika xirihare xihatene xisomitere kakoa. <sup>11</sup> Hiyaiya, Enore atyo koxaka Jesus Cristo hati kilihi hoko akereta moka hoka maisaiya atyo aliyakere hatya kaxomokakita. <sup>12</sup> Hoka haiyaharenae atyo ouro, prata, exahe hoka sehahise kaxaimanexe kakoa hati tyomitere akereta. Hoka haiyaharenai atyo atyakase, ime, atya niyali harenai kakoa hati tyomitere akereta.

<sup>13</sup> Hoka Cristo tyohetehenerene xowakaite waiyekehalakeheta ehateneha. Hatyo xowakaite kahotikisaka hatya, hatya xakini hatene. Irikati atyoite hatyohare ehateneha hotikihena: xoana waiyexe xamani, xoana maisa xamani. <sup>14</sup> Hoka xala xamani atyoite waiye hahatene tyoma hatyo hati hiye hoka maisaite kerita hoka hatyo ana atyoite waiyexe kaxekaka. <sup>15</sup> Hoka xala hatene xamani atyoite kera hoka maisaiya atyo xoarehare waiyexe kaxekakita enomana. Xakore hoka hatyo atyoite kaiyakeheta, hatya irikati koni jiya hoka makeralinitere akereta atyoite tyaona.

<sup>16</sup> Xasemehena, xiso atyo Enore hana akereta hoka Enore Nisekohare atyo tyaonita xikakoa. Hatyohare akiti kakoala xawaiyoreta naoka. <sup>17</sup> Hiyaiya, xala xamaniya mawenekoaretia Enore hana hoka Enoreya mawenekoaretene. Hiyaiya, Enore hana atyo waiyexe hoka xiso terota atyo ehana.

<sup>18</sup> Awa atyo hatya hatyota maoseratyoawi. Maika hatya xinekonitare waiyore aokowihena halitinai

nawaiyore akereta hoka maika hatyaharexe tyaohena hoka hatyaosetaite aliterexe waiyorexe tyaona.

<sup>19</sup> Xoalinihare waiyoliniti tyaoniterehare halitinae ana atyo Enore ana hatyahalitita. Hiyaiya, exakere Iraitu Waiyexe nexa:

“Enore atyo otokita waiyorexenai enómanenaiha hiyeta”.

<sup>20</sup> Exe tehitiya:

“Xekohaseti atyo waiyoreta waiyore aokowiterehare xahekola kakoa. Hatyoharenae atyo maisa xoare hare tyomare enomana”.

<sup>21</sup> Hiyeta hoka maisaiya xalahare aokowiharetyoita xolini hare halitinae tyomiterehare kakoa. Hiyaiya, tyotyaxolini harenai atyo xomanere. <sup>22</sup> Paulo, Apolo, Pedro, exahe waikohekoa, wenati, kamati, kaliniye, exahe haxowaka harenai, tyotyaxatyoharenae atyo xomanere. <sup>23</sup> Hoka xiso atyo Cristo anere, hoka Cristo atyo Enore anere.

**Cristo Niraene Kakoarenae**

**4** Maika Cristo wakanehare akere xamoka wiso, hiyaiya, wiso atyo wawaiyekehalakaita Enore xahekola metaharexe. <sup>2</sup> Hiyaiya, hahakita hiyekohase ana hoka hiyekohase tyakekota hiso hoka ehokoreya. Hoka maisaiya tyakekota hiso hoka maisaiya aliyakere hahakita enomana. <sup>3</sup> Natyo atyo nahakita noxekohase ana hoka xoare xamani atyo xahekotita notahi, exahe kalorexena hoka axahitaha notahi hoka nomani atyo maisa xiyahakola, exahe exahokolaha hoka xoare tyomare. Exahe noxahokolita notahi tehitiya hoka maisa xoare tyomare. <sup>4</sup> Nomani atyo maisa xoare hare iniyalahare notyomare, xakore hoka hatyo atyo maisa hotikijita nawenani waiyexe halitinai ana. Hoka Xekohaseti atyoite ahokohena notahi, aliyakere xamani moka natyo aokowi hoka.

<sup>5</sup> Hiyeta hoka awa atyo xahekotya iniyalahare hatya haliti tahi Xekohaseti makaokeneharetia. Hatyo atyoite kaoketehena hoka hotikihena halitinae nómane, xoalinihare tyomitereharenae metaharexe, halitinae xahekola xoare xamani tyomaha aokowiterehare hoka hotikihena. Hatyo najikinitaite aliyakere xamani tyomaha hoka hatyo tyomehenahere akereta makere mohenahene.

<sup>6</sup> Nohinaeharenae, natyo Apolo xoaha hiye naimenekoita, wiso wihinamanai hiye. Xawaiyore maheta hatya iraitu nitere: “Xaiminisa xairatyoare tyaonitere”. Maisaiya xala hare aokowiharetyoita hatya haliti hiyeta, hoka hatya maxaiminirita. <sup>7</sup> Xala kalorexe moka hiso haiyanai ana? Maisa kore Enore xini tyotyaxoalinihare isa homana? Xoanere hoka haokowiharetyoita, motya etakehare maisa Enore xekane kakoa ene xini?

<sup>8</sup> Koxaka tyotyaxolini hare xaokiterehare kakoare xiso! Koxaka xikaoloxahare xisaona! Xisonai atyo koxaka xekohaseti xisaona, hoka wiso atyo maiha! Waiye kaiserehariya atyo aliterexe xekohaseti xiso hoka wiso tehitiya xekohaseti wisaona xihakakoane.

### Jesus Tyakekohenerenae Kakoa Atyoite Kakahalakoa-haretyoaka

(João 15.18-21; 16.1-4; Atos 5.40-41; 14.21-22; Filipenses 1.28-30)

<sup>9</sup> Hiyaiya, noxahekoli hiye hoka motya akere Enore moka wiso Jesus niraene kakoarenae miyanitiye aose. Wiso atyo etakehare haliti kahalakisaka hoka kaxaisakiterehare kahare halitinaí nahalakoa akereta, hakakoare tyaoniterenae waiyane maheta akereta, anjonai exahe halitinaí xoaha waiyane maheta akereta.

<sup>10</sup> Cristo xema wisaonitere hiyeta atyo wihatyaharene aokahitaha, xakore hoka xiso atyo xawaiyore, exema xisaonitere hiyeta. Wiso atyo maisa wikinaterexe hoka xiso atyo xikinaterere. Wiso atyo maisa wikaxaiminisakere hoka xiso atyo xikaxaiminisakita. <sup>11</sup> Kalikini kijiyehehena kirakoane wisaonita winaka, woinane kakoa. Imiti xololohare ako wijoita, wikamokonasetyakita, maisa wikahanere hakitinaí. <sup>12</sup> Wikirahareta wihatene kakoa xoalini hare wiya womana maheta. Kirawanehenaha wiso hoka wenati waiyexe waokita enomanaha. Wikaxiholakehena hoka mema wisaonita. <sup>13</sup> Watoxaharehenaha wiso hoka wawaiyexeharene kakoa wekoaxaita enomanaha. Imexati atyo wikaxaokakita hoka kalini kijiyehehena iyaxati tyaonitere exe waikohokoa akereta mokahitaha wiso.

<sup>14</sup> Maisa exakere naxairatya xomana hoka nehahalikisa maheta xini xiso. Naotyaisa maheta xiso, nityaninae kaisereharenai noxiyakawaliharenai akereta namokitere xiso hiyeta. <sup>15</sup> Exahiya kahare halitinae aotyakisa xiso Cristo koamaniya xisaonitere xowaka hoka haterore atyo xexe. Hiyaiya, natyo atyo xexe notyaona, Cristo koamaniya xisaohenerere hiyeta, Iraití Waiyexe noxakaihenere xihiyexowaka.

<sup>16</sup> Hatyo hiyeta kasani notyaonitere akereta xisaona naokita. <sup>17</sup> Hatyo hiyeta naxikahena Timóteo xomana. Hatyo atyo nityani noxiyakawalihare naokita, Xekohaseti koamaniya kinatere tyaonitere hiyeta. Kahi-naetyaite xiso xotyaxemaheta maheta waitare wenati xema notyaonitere Jesus Cristo hiyeta tahi. Hatyohare tahi naotyakijita tyoty tyakekohatiye hotyalinae hiye.

<sup>18</sup> Hoka haiyaharenae xinekoni tyaoniterenae aokowiharetyoahitaha, motyalaite maisa nali nojiyita aokahitaha hoka. <sup>19</sup> Xakore hoka Enore xaokalitaiya hoka haxerore notyoya nowaiyeheta xiso. Hoka nasema hatyo aokowiharetyoiterenai niraene. Maisa iniraeneha taita xini nasema maheta, nowaiya maheta xoalini hare iniyatere. <sup>20</sup> Hiyaiya, Enore koamaniya nawenatyaka atyo maisa iraiti taita xini, xakore hoka iyateliti atyo. <sup>21</sup> Aliyakerexe notyoya namoka xiso xaokita? Xoana mokonasetyakalatihi kakoa, xoana kalorexe xawaiyetyati kakoa, waiyexehaliti kakoa kore notyoya xomana xaokita?

### Tyakekohatiyenae Nómene Iniyalahare

(1 Coríntios 6.15-20; 1 Tessalonicenses 4.3-7; Hebreus 13.4)

**5** Nasemita xinekoni wenati iniyalahare tyaonitere tahi. Exahiya matyakekoneharenae hoka maisaiya nikare tyomita. Hiyaiya, nasema hatya haliti xinekoni

tyaonitere hanexe exanityo kakoa nawenane tahi.

<sup>2</sup> Nikare hoka xoanere hoka xaokowiharetyoita? Hatyohare ene atyo kalore xamaikohaliti, hatyohare hiyeta atyo hatyohare haliti xikikiriheta ene xinekoni.

<sup>3</sup> Maiha xakore atyo kalikini xinekoni notyaonare hoka nisekohare atyo tyaonita xinekoni. Hoka motya ene nali notyaonita hoka Wiyekohase Jesus Cristo nexare kakoa koxaka nahekotya hatyo haliti iniyalahare tyomehenerere tahi. <sup>4</sup> Xahohisakoatyakakoahenerere xowakaite xinekoni nisekohare tyaonita, Wiyekohase Jesus Cristo niyatere tehitiyaite tyaonita wikakoa hoka <sup>5</sup> xisehena hatyo haliti Ahalakoahaliti ana hoka eháre kamawenekoaretyaka maheta. Hoka Xekohaseti tyohetehenerere xowaka inisekohare kaiyakeheta.

<sup>6</sup> Maiha atyo waiyexe xini xaokowiharetyoita! Xasemita atyo etake iraiti nitere: "Inira xakore kaorehetyakalati hoka kaorehitita hakakoare trigohe", nitere. <sup>7</sup> Xaxawahena toahiyerehare kaorehetyakalati. (Wenati iniyalahare xaokaka "Kaorehetyakalati", nita). Hoka waiyexe maniya kaiserehare xisaoheta. Nikare ite hoka waitarehe ketehe makaorehetyakahare akere-ta xisaoheta. Koxaka nikare xisaoheta, hatyohare waiyekehalakita nomani. Hiyaiya, wihisehare nakairati makaorehetyakahare atyo koxaka kalikini mema hoka Cristo wikalaneroxa mokose nakairati makaorehetyakahare nakairatyaka ferakene niyahare atyo koxaka kaxaisaka. <sup>8</sup> Nikahena hoka wimaxalohare nakairati makaorehetyakahare hiye. Hatyo nakairati atyo maisa ekaorehetyakahare xini hoka wenati waiyexe kakoare atyo. Kaorehetyakalati toahiyere atyo iniyalahare, ohiro watyalisaka harenae kakoare. (Wenati waiyexe xaokaka "Nakairati makaorehetyakahare", nita).

<sup>9</sup> Hane baberane naxikahenerere xomana nanekoa niraexihiye: Maika xakikisoaheta haliti etakehare ohiro watyaliterehare nonitata. <sup>10</sup> Xakore hoka maisa matyakekoneharenae nonitata xakikisoaheta maheta xini, tyoty ohiro watyalisaseharenai, maiyasehatiyenai, kaiwarexenae, xalijiniharexenae, xoana enore metalahare xema tyaoniterenai nonitata maheta xini. Maisaiya aliyakere ximawaiyaneta matyakekoneharenae. Ameteniya atyo xakikisoaheta exe waikohekoata rotita hoka ximawaiyanahene. <sup>11</sup> Exakere atyo niraeta xihiyexe: kasani atyo xakikisoaheta Cristo koamaniya tyaona aokowitere xakore hoka ohiroarexe, maiyasehatiyexe, enore metalahare xema nawenatyasehare, hekaliye, iraehekoaitaterehare, xalijiniharexe xoaha tyaonitere nonitata. Nikare tyaoniterenai kakoa atyo kasani maisa xikanakaira hekoti naokare.

<sup>12</sup> Maisa exaxikatyakahare xini natyo nasema maheta Enore koamaniya mawenaneharenai tahi. Enore atyoite semehena etahiha. <sup>13</sup> Xakore hoka xoana maisaiya xisota xiwatyalita xihinaeharenai Cristo koamaniya tyaonitereharenai? Hiyaiya, exakere atyo Iraití Waiyexe nexa:

"Xakikihetehena hatyo haliti iniyalahare tyomitere xinekoni", nexa.

### Paulo Niraene Hahinaeharenae Tahí

**6** Xoana hoka hatya xihinaehare kakoa maisa waiye xisaonare hoka xiyaneta ekakoa kalorexenaí nahalakoa awaiyekehalakatya maheta xawenane xomana, maisa xakore atyo Cristo koamaniya tyaonareha hoka? Hiyaiya, xaxehenaine atyo Enore anere hotyalinai hoka watyalihenaha ene xiso, xala xamani ehkore tyaonita, xala xamani maisa ehkore tyaonare hoka. <sup>2</sup> Xoana maisa kore waiyekehalakere xomana miyanitiyehena xowaka Enore kaxaikone hotyalinai semane halitinai tahi? Hiyaiya, xasemehenaite halitinai tahi. Hoka xoanaiya hoka hatyo inirere tahi maisa xisota xawaiyore hoka xiwatyali kakoita? <sup>3</sup> Xoana maisa waiyekehalakere xomana anjonai tahi kakoita wisemane, miyanitiyehena xowaka? Hoka xoanereya hoka maisa kalikiniye wawenane maisa waxakajijita?

<sup>4</sup> Hatyo hiyeta maika xalini hare inirere hiyeta xirae-haretyakakoahena hoka awa atyo xatawa Enore koamaniya tyaoniterenai matyakekolaharenai hoka watyalihena xiso. <sup>5</sup> Xoana hoka kahaiharetyaka xisaonita? Xoana maisa xala hare xinekoni waiyorexe aka hoka aotyakisare xiso, awaiyekehalakatya xawenane xomana? <sup>6</sup> Hiyaiya, haiyaharenai waiyorexe tyaonita xinekoni. Xakore hoka xalini harehena hoka xihinaeharenae xakolaita matyakekoneharenae ana, kalorexenae ana hoka xiyaneta awaiyekehalakatya xomana xawenane maheta.

<sup>7</sup> Xalini hare tahi kaotyakehena xinekoni hoka hatyoharenai atyo koxaka hotikijita ximawaiye nawenanene. Xoana maisaiya atyo kotare iniyalahare xikaxomokakita? Xoana maisaiya atyo kotare xikakaiwaharetyakita? <sup>8</sup> Xakore hoka xiso atyo iniyalahare xamokita xihinaeharenae, xikaiwaharetyahitene hare, xityotyaxakore tyakekohatienai xaokowita hoka nikare xisaonita.

### Iniyalahare Nomaseharenae Atyoite Maisa Xaneta Enore Nawenakala

(Gálatas 5.19-21; Efésios 5.1-7; Colossenses 3.5-6; Apocalipse 21.8, 27)

<sup>9</sup> Hiyaiya, iniyalahare tyomiterenae atyoite maisa Enore waikoherakoa xane tyaonahitaha. Koxaka atyo xawaiyoreta hatyohare tahi kakoa. Awa hatya maoserahena xiso hoka hatyo xema xisaona. Hiyaiya, maisaiya atyo Enore waikoherakoa xane tyaonita: ohiroarenai, enatyalolonai, ohiro hiye tyaonitereharenai, enore metalahare xema tyaonitereharenai, haenanehatya hiye tyaoniterenai, <sup>10</sup> kaiwarexenai, xiyehaliti xawaiyetyaseharenai, hekatikarenai, haliti niraetyaseharenai, xalijiniharexenai harenaiya atyo maisa Enore waikoherakoa xane tyaonahitaha.

<sup>11</sup> Toahiya ene haiyaharenae xinekonitarenai nikare tyaonahitaha. Xakore hoka xikatihakeheta atyo iniyalahare nonitata, Enore anere xisaoheta maheta, haliti waiyexe aoka xiso maheta, Wiyekohase Jesus Cristo hiyeta, Enore Nisekohare xoaha hiyeta.

### Enore Aokitere Akereta Nawenatyaka Kaihalaharenityaka Ekakoa Maheta

<sup>12</sup> Hatyaiya nehena: "Notyomaiya tyoty notyoma naokowitereharenai". Aliterexe, xakore hoka maisa tyoty waiyexe xini homana. Natyo tehitiyaiya nomi: "Notyomaiya xalini haretere". Xakore hoka maisaiya atyo nahalakisoawi hoka hatyohare jiyahaotita natyo.

<sup>13</sup> Hatyaiya nehena: "Nakairati atyo waji niyahare, waji atyo nakairati niyahare maheta". Aliterexe, xakore hoka Enore atyoite mawenekoaretya hatyo hinamanai. Hiyaiya, wiháre kakoa atyo maisa iniyalahare wisoma maheta xini ohiro kakoa. Xakore hoka Xekohaseti anere atyo wiháre, ehatene wisoma maheta. <sup>14</sup> Hiyaiya, Enore atyo ekasekiheta Xekohaseti Jesus, hoka nikareta tehitiyaite ekasikeheta wiso haiyaterere kakoa.

### Xikaxaikoawi Iniyalahare Ohiro Kakoa Xománe Nonitata

(1 Coríntios 5.1-5; 1 Tessalonicenses 4.3-7; Hebreus 13.4)

<sup>15</sup> Xoana maisa kore waiyekehalakere xomana xiháre Cristo háre hiyeta? Nikareya hoka Cristo háre hiyeta? Niya hoka ohiro enatyalolo hiye namoka? Maisaiya aliyakere nikare namokita! <sup>16</sup> Xoana maisa kore waiyekehalakere xomana hatya haliti tyaohena hatya enatyalolo hiye hoka haterore eháreha tyaoniterehare? Hiyaiya, Iraiti Waiyexe atyo nexa: "Hinamanai háre atyoite haterore tyaona", nexa.

<sup>17</sup> Nikare xala xamani Xekohaseti kakoa haxawalita tyaonita hoka haterore atyo tyaonahitaha, inisekoharenaeha hiyeta.

<sup>18</sup> Xisekoahena ohironae hiye xawenane nonitata! Hiyaiya, xalini hare iniyalahare hatya tyomehena hoka hatyo atyo maisa haháre aiyalaharetyare. Hoka ohiro kakoa atyo iniyalahare wisomehena hoka wiháre atyo waiyalaharetita. <sup>19</sup> Xoana maisa kore xawaiyorexe? Hiyaiya, wiháre atyo Isekohaliti Waiyexe hana. Hatyo atyo tyaonita xikakoa, Enore xekane atyo. Maisa atyo xomanereta xini xisaonita. <sup>20</sup> Hiyaiya, Enore atyo iya xiso hoka bakatya xiyaimane. Hatyo hiyeta aokitere akereta xisaohena xiháre kakoa, kaihalaharetyaka Enore kakoa maheta.

### Wenakakoati Tahí

**7** Kalikini ite nekoaxahetehena xaxairahenere nomaní tahi. Waiye kaiserehareya atyo ena maiyanityohare hoka. <sup>2</sup> Xakore hoka kahare atyo ohiro hiye nawenatyaka tyaonita, hoka hatyohare hiyeta hatya haliti ite kaiyanityore terota tyaohena, exahe ohiro hoka kaiyanenero terota ite tyaohena. <sup>3</sup> Maika exanene hoka tyomehena enomana tyoty aokiterehare. Nikare tehitiya exahe exanityo hoka haiyanene aokitere akereta tyomehena enomana. <sup>4</sup> Exanityo atyo maisa hahalo waikatyo xini tyaonita. Exanene anere atyo ehálo tyaonita. Nikare tehitiya exanene hoka maisa hahare waikate xini tyaonita. Exanityo anere atyo eháre tyaonita. <sup>5</sup> Maika hatyo hinamanai maisa maxikakoahi-

taha, ameteniya atyo hatyohare tyomaha aokowiha haware xakini hoka iraexatyaha aokowiha maheta hoka. Hatyaosetaiya atyo kaokakakoahenahitaha hetatiye akereta hoka maisa Ahalakoahaliti hasakaharetyahitene emawaiye kaxaikoawininiha hiyeta.

<sup>6</sup> Hoka maisa atyo nawakaita xini xiso, exe atyo noxahekoli. <sup>7</sup> Natyo akeretaiya xisaonita hoka waiyeya. Xakore hoka Enore atyo hahekore xakini wenati moka, hatya nawenane hahekorexe, hatya nawenane hahekorexe xoaha.

<sup>8</sup> Maiyanityoharenai, wainyaneneronai ana atyo niraehena: waiye kaiserehare kotare maiyanityohareha, maiyanenehaloha tyaonaha natyo akereta. <sup>9</sup> Hoka maisaiya atyo xisonai xahalakisare xiyahekola hoka maika xisaonakakoa. Hiyaiya, waiye nawenakakoatyaka atyo nikareya hoka maisaiya xamaikohareta.

<sup>10</sup> Hoka koxaka tyaonakakoahenerenai ana owene xaotyakiye, xakore hoka maisa atyo noxaotyakiri xini, Xekohaseti xaotyakira atyo: ohiro kaiyaneneroiya maisa aliyakere halakihitita haiyanene. <sup>11</sup> Hoka halakihetaiya haiyanene hoka maika maisa kaiyanenehitita, xoana haiyanene kakoita xamani awaiyexeharetyakakoahetaha hoka tyaonakakoahenahitaha. Exahe exanene hoka maika maisa halakihitita haiyanityo.

<sup>12</sup> Haiyaharenae hiye atyo natyota niraehena, maisa atyo Xekohaseti niraene xini: hatya haliti tyakekohatiyeya tyaonita hatya ohiro matyakekonehalo kakoa hoka haxawalitaiya tyaona ekakoa aokowi hoka awairatyo halakihetehene. <sup>13</sup> Hoka hatya haloti tyakekohatiroiya tyaonita hatya ena matyakekonehare kakoa hoka haxawalitaiya tyaona ekakoa aokowi hoka awairatyo halakihetehene. <sup>14</sup> Hiyaiya, exanene matyakekonehare atyo Enore waiye mokita, haxawalita tyaonitere haiyanityo kakoa hiyeta. Exanityo matyakekonehalo atyo Enore waiye mokita, haxawalita tyaonitere haiyanene tyakekohatiye kakoa hiyeta. Awaiya nikare tyaonahitaha hoka ityaninahaiya matyakekoneharenai ityaninai akereta tyaonaha. Xakore hoka nikare atyo tyaonaha hoka Enore atyo waiye mokita ityaninai.

<sup>15</sup> Matyakekonehaloiya tyaona tyakekohatiye kakoa hoka halakiheta haiyanene aokowi hoka kotare halakihetene. Nikare tehitiyaiya ena matyakekonehare tyaona ohiro tyakekohatiro kakoa hoka halakiheta haiyanityo aokowita hoka kotareya xaneheta. Hatyo xowaka atyo exanene tyakekohatiye, exahe exanityo tyakekohatiro xoaha atyo maisa xoare hare akeheta ihiyeha, xoalini hare tyomaha maheta. Hiyaiya, Enore atyo aoka wiso haomana wimehexaikohare wisaona maheta.

<sup>16</sup> Hoka hasemehena, tyakekohatiro: xoana hihiyetaiya hexanene waiyexe maniya tyaoheha xamani, maisa xamani. Hatyohare maisa waiyekehalakere. Hasemehena, tyakekohatiye: xoana hihiyetaiya hexanityo waiyexe maniya tyaoheha xamani, maisa xamani. Hatyohare maisa waiyekehalakere.

### Maika Xiyaiminira Enore Kakoa Xisaona

<sup>17</sup> Maika hatya xakini tyaoheha, Xekohaseti enawenane isehenere enomana akereta, hetati Enore aohenerene haomana akereta. Exehare kakoa atyo naotyakijita tyoty tyakekohatiyenai. <sup>18</sup> Hatya haliti exaiko nomanere milihisakahareya Enore koamaniya tyaona hoka maisaiya xoare maheta haxaiko nomanere milihisaka emaisahitita. Exahe hatya haliti maxaiko nomanere milihisakahareya Enore koamaniya tyaona hoka maisaiya xoare maheta aiko nomanere milihijoita. <sup>19</sup> Maisa atyo xoarehare tyomare, xoana exaiko nomanere milihisakahare xamani hiso, xoana maiha xamani. Hoka Enore xaotyakiraho xema nawenatyaka atyo waiye.

<sup>20</sup> Enore aohenerene xiso haomana xowakiya nahitita aliyakere xamani xisaonita hoka maika kotare nikareta xisaohitiya. <sup>21</sup> Enore haomana aohenerene hiso xowakiya ene wakahare hisaonita? Awa atyo himawaiyehare hatyoharenae kakoa. Hoka maisaiya wakahare hisaohitita aokaha hoka haiyateretyoahena hoka maisa wakahare hisaohitita. <sup>22</sup> Hiyaiya, wakahare ene hatya tyaonita hoka Enore haomanere aokene hoka mawakaharenehare tyaoheha, hoka Enore anere tyaona. Nikare tehitiya hatya haliti mawakaharenehare tyaonita hoka Cristo aokene haomana hoka Cristo wakanehare tyaona. <sup>23</sup> Enore atyo iya xiso, exahe xiyaimane hoka bakatya, hoka awa atyo halitinae wakanehare xisaona. <sup>24</sup> Nohinaeharenai, maika Enore haotita hetati xisaonitere akereta xisaona, Enore haomanere aohenerene xiso nahitita xisaonitere akereta.

### Maiyanityoharenae, Wainyaneneronae

<sup>25</sup> Maiyanityoharenae ana atyo maisa xoare nita Xekohaseti. Xakore hoka niraehena atyo noxahekoli. Hiyaiya, Enore xairakoaneharera natyo hiyeta waiye nahekoita hoka nokatyakekotyakita. <sup>26</sup> Noxahekoli hiye atyo hoka waiye kaiserehareya atyo hatya haliti tyaonitere akereta kotare tyaona, kalikini howitihare wisaoniterehare hiyeta. <sup>27</sup> Xoana hikaiyanityore? Hikaiyanityore hoka awa atyo hahalakihetene haokowi. Xoana himaiyanityohare? Himaiyanityohare hoka awa atyo hikaiyanityo haokowi. <sup>28</sup> Xakore hoka hikaiyanityoiya atyo hoka maisa iniyalahare hisomita, exahe maiyanenehalo tehitiyaiya kaiyanene hoka maisaiya iniyalahare tyomita. Xakore hoka kasani atyo nairihalinikisa xiso naokowita, howitihare xawenane tyaohehenehare xisaonakakoahenehare najikinita kakoa.

<sup>29</sup> Nohinaeharenae, exakerexe niraeta: maisa wahere waheta maniya. Hatyo hiyeta maika exehekota kaiyanityorenai hoka motya maisa kaiyanityoreha ene xini tyaohehena. <sup>30</sup> Exahe amaikohareterenai hoka motya maisa amaikoharetaha ene xini tyaohehena. Exahe ihalahareterenai hoka motya maisa ihalaharetaha ene xini tyaohehena. Exahe iyakatiterenai hoka motya maisa iyahitereharenai kakoare ene xini tyaohehena.

<sup>31</sup> Exahe exe waikohekoata xoalinihare tyomiterehare-nai hoka maika motya maisa xoarehare ene xini ihiyeta tyomahitaha ene xini tyaohenaha. Hiyaiya, tyotyate xoalini hare kalikini ali tyaonitereharenae maiyareheta rota.

<sup>32</sup> Kasani nakahinaetya xiso hoka maisa ximawaiyehare xawenane kakoa naokare. Hiyaiya, maiyanityohare atyo Xekohaseti aokiterehare tahi ahekoita, kasani aihalahalinalikisene maheta. <sup>33</sup> Hoka haliti kaiyanityore atyo waikohekoare tahi ahekoita, haiyanityo aihalahalonalikisa maheta. <sup>34</sup> Hatyo hiyeta hinama maniya ahekoita, haiyanityo, Xekohaseti tahi xoaha hoka.

Nikare ohiro maiyanenehalonae exahe wainyaneronae atyo ahekotitaha Xekohaseti tahi taita, kasani ehatene tyomaha aokowitaha hoka. Hoka ohiro kaiyanenero atyo waikohekoare tahi ahekoita, haiyanene aihalahalinalikisa maheta.

<sup>35</sup> Nikare niraeta kasani nakahinaetya xiso maheta, maisa nahowitiharetya maheta xini xiso. Xakore hoka kasani atyo xisoma xoare xamani waiyexe, ehkorexe xoaha naokita, hoka Enore hatene xiyaiyateretyoane kakoa xisoma naokita.

<sup>36</sup> Tyaonakakoaha aokowiha hoka hatyo najikinita maisa tyaonakakoaha aokowihenahititereharenae ana atyo niraehena: xoimalaliti xahekola hiyeya hoka nikare atyo maisa ehkoreta xini haiyanityohenere kakoa tyaonita, masakareya kalore hekota awaiyetitene, tyaonaiya ekakoa aokowiheta hoka maika tyaonakakoaha. Maisa atyo hatyohare iniyalahare xini. <sup>37</sup> Xakore hoka xoimalalitiya maisa kaiyanityo aokowita, kotareya maiyanityohare tyaona aokowi, waiyeya kaxaikoawita, exahe koxakaiya ahekotyá hómáne tahi kakoa hoka ehkoretaiya maisa tyaonita xoimalaloti kakoa. <sup>38</sup> Nikare atyo haiyanityohenere kakoa tyaona hoka ehkoreta atyo, xakore hoka xala xamani atyo maisa tyaonita haiyanityohenere kakoa hoka hatyo atyo masakare waiyexe tyomita.

<sup>39</sup> Hoka ohiro kaiyaneneroiya atyo maisa aliyakere hatya ena kakoa tyaonita, exanene kasetata hoka. Exaneneya atyo waini hoka hatyo najikinitaiya tyaona aokowi hatya kakoa hoka ehkore atyo. Xakore hoka tyakekohatiye kakoa taitaiya atyo tyaona. <sup>40</sup> Xakore hoka kotareya atyo maiyanenehalota tyaona hoka waiyeya atyo tyaona. Exe atyo noxahekoli. Hiyaiya, Enore Nisekohare tehitiya atyoala tyaonita nokakoi naoka.

### Nakairati Fetyaka Enore Metalahare Ana

(1 Coríntios 10.14-29; 1 João 5.21)

**8** Kalikinite niraehena nakairati kafetatyakiterehare enore metalahare ana tahi. Aliterexe atyo “Wityotyá wawaiyore”, nerekatita. Xakore hoka hatyo waiyoliniti atyo axaheneratyakijita hatya haliti. Hoka xawaiyetyati atyo kahinaetita haliti kekoareheta maheta Enore koamaniya. <sup>2</sup> Hatyaiya haxahekola hiyeta xoalini hare kakoa waiyoreta aokowi hoka maisa atyo waiyekehalakehenere enomana waiyekehalakehenerehare enomana mahetare kakoa. <sup>3</sup> Xakore hoka

xala xamani atyo Enore awaiyitita hoka ewaiyanehare atyo tyaonita.

<sup>4</sup> Hatyo hiyeta nakairati kafetatyakiterehare enore metalaharenai ana tahi atyo waiyekehalakita womana. Hiyaiya, enore metalahare xaimenekotyaka atyo aimenekoita etakehare xoalini hare makaotyakenehare. Hoka waiyekehalakita atyo womana: haterore atyo Enore. <sup>5</sup> Halitinai atyo, “Enorenai”, nexaha exaokakaha. Exahekolaha hiye hoka kahare “enorenai”, exahe “xekohasetinai” hoka tyaonahitaha enokoa, waikohekoa xoaha aokahitaha. <sup>6</sup> Hoka womana atyo haterore Enore. Wexe tyotyá xoalini hare nomasehare atyo, enomana atyo wisaonita. Haterore atyo Xekohaseti, hatyo atyo Jesus Cristo. Ihiyeta atyo tyotyá xoalini harenae kaomaka, ihiyeta atyo wikaotyaka.

<sup>7</sup> Xakore hoka exeharenae atyo maisa waiyekehalakere tyotyá halitinae ana. Haiyaharenai atyo koxaka otyahareha enore metalahare kakoa, hoka kalikini kijiyeheha, kanakairehenaha hoka motya exahekolaha hiye hoka hatyo nakairati enorenai metalahare anere kaiserehare aokahitaha. Exahekolaha atyo maisa kinaterexe. Hatyo hiyeta kanakairahenaha hoka kehexaharetyoahenahititaha rota. Hatyo nakairati hiyeta iniyalahare tyomahitaha. <sup>8</sup> Hiyaiya, maisa nakairati hiyeta xini Enore aokita wiso haomana. Exahe wikanakairita xamani, xoana maisa xamani wikanakairare xoaha hoka maisaiya xoare hare hatyohare kakoa wisomita, maisaiya xoare hare wimetita.

<sup>9</sup> Xawaiyore hatyohare kakoa hoka maika xirihare xawenane kakoa hoka maisa hatyoharenai hiyeta ininaitata tyakekoterenai iniyalahare maniya xaxomokanikijita.

<sup>10</sup> Hiyaiya, xala xamaniya maisa kalore tyakekore, hoka hiso “waiyekehalakitere homanaiya” ehaotita enore metalahare hanako hisoa hoka hikanakairehena hoka xoana maisaiyaka isoa hoka kanakaira enore metalahare nakaira aokowita tehitiya? <sup>11</sup> Nikare ite hoka hatyo haliti inira tyakekotere, hatyo hihinaehare ana Cristo wainihenere ite iniyalahare maniya haxomokanikiheta, hatyo “hawaiyorene” hiyeta. <sup>12</sup> Nikare ite hoka iniyalahare maniya tyare haxomokanikiheta hihinaehare, exahe exahekola tyare haiyalaharetya hoka iniyalahare atyo hisomita Cristo ana.

<sup>13</sup> Hatyo hiyeta nakairati hiyetaiya nohinaehare iniyalahare maniya naxomokanikijita hoka maisaiya xoana hekota nanihitita eteti, maisa iniyalahare maniya naxomokanikijitene maheta.

### Iraiti Xakaisasehare Hatene, Nómáne Tahi

**9** Xoana motya wakahare xaokita natyo? Xoana motya maisa iraiti kakoare xini natyo xaokita? Xoana motya maisa nowaita Xekohaseti Jesus xaokita? Xoana motya maisa nohateni Xekohaseti ana hiyeta xini exema maniya xisaona xaokita? <sup>2</sup> Exahe atyoite haiyaharenai maisa Iraiti kakoare xini aoka natyo hoka xiso atyoite Iraiti kakoare xaohena natyo. Xiso terota atyoite Iraiti kakoare xaohena natyo, Wiyekohase xema maniya xisaonitere hiyeta.

<sup>3</sup> Haiyaharenae iraharetita natyo hoka exakere nekoaxatita enomanaha: <sup>4</sup> Xoana natyo xakoaniya atyo maisa nokanakairita, noterita harenai nohateni heko isehenaha nomani hoka? <sup>5</sup> Xoana, nokaiyanityoreya hoka noxanitere heko maisa nanoloitene xaokita? Hiyaiya, haiyaharenae iraiti kakoarenae kolatyahitaha haiyanityonaeha. Xekohaseti Jesus ximarenena, exahe Pedro hare hoka nolokahitaha haiyanityona. <sup>6</sup> Xoana, Barnabé, natyo xoaha taitaite wahahena womanita xaokita?

<sup>7</sup> Xala koxaka sema hatya sorare bakala haxiyeharenae xaimane hakitere nali? Exahe hatya masene nomasehare manakairehenere haxafirita uvali? Exahe hatya bowi xanaityasehare maeranehenere habowiya totonexa tahi? (Maisa atyo xala hare nikare tyaonare.)

<sup>8</sup> Maisa exeharenae wenati tahi akiti taita xini. Moisés xaotyakira tehitiya nikare irae. <sup>9</sup> Exakere atyo Moisés xaotyakiraho kaxairatyaka:

Awa atyo bowi kanase xolatya trigó kase tyahakita hoka.

Xoana Enore ala bowi xahekola taita ahekoita xaowita?

<sup>10</sup> Xoana wiyaokaka kore nikare irae? Aliterexe atyo wiyaokaka nikare irae! Exahe fititerehare, imexehititerehare xoaha atyo hakita hoka atyahahitita atyo holini haoxekakeheta.

<sup>11</sup> Xinekoni wisaonita hoka wawaiyekehalakaita Iraitu xomana, hanakatise xafityaka akereta. Xoana maisaiyaka nakairati exahe imiti harenai hoka waxita xiso wihatene xaimane xaowita? <sup>12</sup> Hiyaiya, haiyanae ana atyo xoalinihare xiyekane xahita atyahahitaha hoka xoana maisa atyoala wiso exahehareha xini xoalinihare waokita xihiye? Xakore hoka maisa atyo xoarehare xekaka womana waokare, maisa wahowitiharetya waokowita Iraitu Waiyexe Cristo tahi hoka.

<sup>13</sup> Waiyekehalakita atyo xomana Iraexatyakalati Hanako hakiterenai ana nakairati kaxekakiterehare Iraexatyakalati Hanakotare hiyeta. Waiyekehalakita tehitiya atyo xomana kirakahare fetatyaseharenai ana kaxekakiterehare holini nete efetalaha hiyeta.

<sup>14</sup> Nikareta tehitiya Xekohaseti axikatya Iraitu Waiyexe xakaisaseharenai hoka exakainiha Iraitu Waiyexe hiyeta kakahinaetyakaha aoka.

<sup>15</sup> Hoka maisa atyo hatyo aokitere akereta notyaonita, maisa kalikini exakere naxairatita hoka maisa hatyoharenai xini naokita nómanita. Kasani atyo heko nikare notyaona naokowita nokamani kijiya. Hoka maisaiya atyo xalahare nihalahalini iyehitita nikare notyaonitere hiyeta. <sup>16</sup> Maisaiya atyo Iraitu Waiyexe noxakaitere hiyeta naokowiharetyoita. Hiyaiya, hatyoharenai atyo nohateni. Hoka kirakoaniya atyo notyaona maisa Iraitu Waiyexe noxakaita hoka. <sup>17</sup> Hatyo hiyeta noxaokali ximitaiya nahakita hoka xoana natyahahenaite nobakatyaki xahita. Xakore hoka nowakatyakiya atyo notyomita hoka hatyo hateniti atyo Enore isa nomani. <sup>18</sup> Nikare hoka xoare ite nokaosexekaihena nohateni xaimane? Maxaimanehare atyo Waiyexe Iraitu noxakaita nihalahalini kakoa, maisa

xoare naxare nohateni xaimane. Hatyo nihalahalini kakoa nahakitere atyo noxekaki.

<sup>19</sup> Natyo atyo maisa wakahare xini, maisa xalahare wakanehare xini natyo. Xakore hoka wakahare akere atyo notyaonita tyotyta halitinae ana. Kahare halitinae nawenane namoka Cristo koamaniya naokowita hoka nikare notyaonita. <sup>20</sup> Nahahena atyo judeunai koni hoka judeu akereta atyo notyaonita, enawenaneha Cristo koamaniya namoka maheta. Maisa atyo Moisés xaotyakira xema notyaonare, xakore hoka judeunai koni atyo notyaohena hoka Moisés xaotyakira xema akereta atyo notyaonita, enawenaneha Cristo koamaniya namoka maheta. <sup>21</sup> Nikare tehitiya majudeuneharenai koni notyaohena hoka maisa Moisés xaotyakira xema notyaonare, enawenaneha namoka maheta. <sup>22</sup> Haiyaharenae maisa kinaterexe hatyakekone kakoa hoka enawenaneha akereta notyaonita, Cristo koamaniya enawenaneha namoka maheta. Nikare halitinae koni nahakita hoka xoare xamani tyomehenaha hoka nikareta notyomita, haiyaharenae hekoti Cristo koamaniya namoka maheta. <sup>23</sup> Nikare notyaonita Iraitu Waiyexe noxakaitere hiyeta, wenati waiyexe nahikoa maheta.

<sup>24</sup> Xawaiyoreta atyo temati xowakehena hoka kahare tematiyenai temitere akiti kakoa, xakore hoka hatita xane hikoahetehena enahitita hoka hatyo ana taita kaxekakita xoalini hare. Hatyo temati akereta xaiyateretyoa xawenane kakoa hoka kaxekaka xomana Cristo nalitare xoalini hare waiyexe.

<sup>25</sup> Tyotyta tematiyena kaxaotyakisakitereharenai atyo haxaotyakisakahoha howitiharexe akereta tyaonahitaha, seritihoko kaxekaka enomanaha maheta. Xakore hoka hatyoharenae atyo haxeroreta tyotita. Hoka wiso atyo Cristo aokitere akereta wisaonita hoka seritihoko matyotenehare kaxekaka womana maheta. <sup>26</sup> Hatyo hiyeta fihitatemita imiyanaose xeta. Natyo tehitiya atyo hatya mokotyarexe mokohena hoka maxekoalahare tyaonitere akereta notyaonita. <sup>27</sup> Noháre nakawexomokakijita mokotyatinai kakoa, exahe waiye nokaxaikoawita hoka noxakaihene Iraitu Waiyexe haiyanai hiye najikinita maisa natyota nahalakisoawityakijoita maheta.

#### Xaotyakisati Enore Metalahare Nonitata

(1 Coríntios 8.1-13; 10.14-29; 1 João 5.21)

**10** Nohinaeharenae, kasani xotyaxematya naokita toahiyere wahetakomaniyerenae nawenane, Moisés xema tyaohenahere xowakere. Tyotyaha atyo tonaha kaiminiti katyahe, exahe One Xotyaxere iyoaho hoka hatyoaho imahotyooaha. <sup>2</sup> Nikare kabatixatyakaha hatyo kaiminiti katyahe, onexa xoaha, Moisés xaotyakiraharenai tyaonaha maheta. <sup>3</sup> Tyotyaha hatyo nakairati Isekohaliti isehenahere enomanaha kanakairaha, <sup>4</sup> tyotyaha teraha tehitiya one Isekohaliti isehenere enomanaha. Hatyo terehenahere atyo se-



hali xanetere exemaha hiyetare Isekohaliti xekane. Hatyo sehali atyo Cristo. <sup>5</sup> Xakore hoka kahare haiyaharenae axamaikohalinikisaha Enore, hoka hatyo hiyeta wainaha hoka ehárenaiha kaxawatyaka mahaxakiti nali.

### Wenati Iniyalahare

(1 Coríntios 3.3; 2 Coríntios 12.20-21; 1 Timóteo 1.9-10; Tiago 3.10-16)

<sup>6</sup> Tyotya hatyoharenai kaotyaka, hotikisa womana hoka maisa hatyoaha akereta ewaxirahare waokita womana maheta, <sup>7</sup> exahe maisa wawaiyetita enore metalahare maheta, haiyaharenai awaiyehenere enore metalahare akereta. Hiyaiya, exakere atyo Iraití Waiyexe nexa:

“Hatyo halitinae tyokaha hoka kanakairaha, teraha maheta hoka hatyaoseta ainakoahenahitaha holikoha maheta”.

<sup>8</sup> Hoka wisoiya atyo maisa ohironae hiye tyaonahitere akereta wisaonita. Hiyaiya, haiyanai nikare tyaonahitaha hoka hatyo hiyeta haferakeneta 23.000-hare halitinai waini. <sup>9</sup> Hoka wisoiya atyo maisa wahasakaharetita Xekohaseti. Hiyaiya, haiyaharenae hasakaharetyaha Enore hoka hatyo hiyeta kahare halitinae owi tyaloka hoka waini. <sup>10</sup> Awa atyo tyaonahitere akereta xisaona. Hiyaiya, haiyaharenae ehare hoka iraehekoatyaha Enore tahi hoka hatyo hiyeta anjo aisarexe kaoka enomanaha hoka aisahene.

<sup>11</sup> Koxaka nikare kaotyaka wahetakomaniyerena ana, hotikisa maheta haiyaharenae ana hoka maisa nikare tyaonahitaha maheta. Hatyo tahi kaxairatyaka womana hoka airihalikisa wiso maheta. Hiyaiya, kalini atyo okoi imiyanaosehena wahikoita. <sup>12</sup> Hiyeta hoka maika xala xamani kinatere tityoita aokowita hoka maika waiye kaxaikoawi hoka maisa exoita. <sup>13</sup> Xikahasakaharetyakehenaite haiyaharenae kahasa-haretyakitere akereta, xakore hoka Enore atyo maisa maotyanexe hairaine, exahe maotyanexe xiso. Xikahasakaharetyakaite hoka maisaite xiyatere xahexe xikahasakaharetyakita. Xihrasaharetyaka xowakehenaite hoka Enore ite isa xomana iyateliti hoka hatyo kakoaita xikinatere xisaona, xijiyahaotene maheta.

<sup>14</sup> Hatyo hiyeta, nohinaeharenae noxiyakawalinae, xisekoahena enore metalahare xawaiyetyaka nonitata.

<sup>15</sup> Kalini niraehena xikakoa haiyaharenai ana xoalinihare metaharexe waiyekehalakitere hare akereta. Hoka xiso atyoite xahekohena niraehenere xikakoa kakoa. <sup>16</sup> Xahekohena exe vinhoxa waiyexe wiseritere hiyeta. Xoana, wiserehena ala exe vinhoxa hoka maisala Cristo timalaxa xini wiserita? Exahe hatyo nakairati wikanakairehena hoka Cristo háre xaimenekola atyo. Exahe hatyo nakairati wirakakakoa-hena hoka maisala wikanakairita xini Cristo háre?

<sup>17</sup> Wikahare xakore atyo hoka nakairati haterore atyo wikanakairita. Hatyo hiyeta hahotyalihare wisaonita. Cristo háre atyo wiso.

<sup>18</sup> Xahekohena judeunai nawenane tahi: etakehare xoalini hare efetatyakahare tyaoniterehare Enore

anere nijitereharenai atyo nikare tyaonahitaha hoka Enore koamaniya atyo tyaonahitaha.

<sup>19</sup> Exakere nomita xihye: enore metalahare, exahe nakairati kafetatyakitere ala xoalinihare tyomita?

<sup>20</sup> Hatyohare atyo maisa xoare tyomare. Exakere nomita: enore metalaharenae ana kafetatyakitere atyo tihanare ana kafetatyakita, maisa Enore ana xini. Hoka kasani atyo maisa tihanare koamaniya xisaona naokare. <sup>21</sup> Enore anereya xiserehena hoka maisaiya atyo aliyakere xiserita tehitiya tihanare nolone. Exahe nakairati Enore anereya xikanakairihena hoka maisaiya atyo aliyakere tihanare anere tehitiya xikanakairita. <sup>22</sup> Xoana waokoawahalinikisa ala Xekohaseti waokowita? Xoana Enore niyatere xahehare ala wiyatere xaowita?

### Mehexaikohaliti Xawaiyetyati Xoaha

<sup>23</sup> Haiyaharenae exakere nita: “Xoare xamaniya atyo wisoma waokowita hoka wisomeniya”, nexahitaha. Há, xisomeniya, xakore hoka maisa atyo tyotya xoalinihare kaomakiterehare waiyexe xini. “Xoare xamaniya atyo wisoma waokowi hoka wisomeniya”. Xakore hoka maisa atyo tyotya xoalini hare kaomakiterehare kahi-naetyare xini. <sup>24</sup> Mahaiya atyo xalahare aokiterehare tahi taita ahekoita, xakore hoka ahekohena tehitiya atyoite haiyanai aokitereharenai tahi.

<sup>25</sup> Eheketetaiya atyo xanisa tyotya kabetyakitereharenai eteti hanakore, xakore hoka maisaiya atyo xikatyakoiyahareta. <sup>26</sup> Hiyaiya, exakere atyo Iraití Waiyexe nexa:

“Waikohekoa, tyotya enakoa tyaonitereharenai atyo Xekohaseti anere”.

<sup>27</sup> Hatya matyakekonehareya noloka xiso hahanako xikanakaira maheta ekakoa hoka maika xiyane xaokowi exema hoka xiyane. Exahe nakairati mohena xahalakoa hoka kotare xikanakairene, hoka awa atyo xaxakakoahena xityakoiyaharenai hiyeta. <sup>28</sup> Hoka hatyaiya nehena: “Exe nakairati atyo enore metalahare ana kafetatyaka”, nehenaiya xihye hoka awairatyo xikanakairehenene iraehenere hiyeta, exahe ityakoiyahare xoaha hiyeta tehitiya. <sup>29</sup> Hiyaiya, maisa atyo hityakoiyahare hiyeta xini hoka hatya tyakoiyahare hiyeta atyo.

Xakore hoka hatyaiya axehena: “Xoanereya hoka nawenani kamahokoanetyakehena hatya tyakoiyahare hiyeta? <sup>30</sup> Koxakaiya niraexatya Enore hiye nakairati nokanakairitere tahi hoka xoanereya hoka iniyalahare kairaetyaka notahi, koxaka Enore kakoa nihalahare hoka?” nehenaiya.

<sup>31</sup> Xakore hoka xikanakairitaiya, xiserita, xoana xisomita xamaniya xoaliniharetere hoka maika xisomehena tyotya hatyoharenai kihalalaharetyaka maheta Enore kakoa. <sup>32</sup> Maika xirihare xawenane kakoa hoka maisa xamawaiye nawenanitita judeunae, majudeuneharenae, Enore maniya nawenatyaseharenae xoaha.

<sup>33</sup> Maika notyomitere akere xisoma. Hiyaiya, tyotya notyomitereharenai kakoa naihalahalinikisa naokowita tyotya halitinai hoka maisa atyo nawenani tahi taita xi-

ni nahekotita. Xakore hoka tyoty enawenaneha tahi atyo nahekotita, kaiyakehenahitaha iniyalahare nonitata maheta.

**11** Maika noxamotyahasehare xisaohena. Hiyaiya, natyo tehitiya atyo Cristo xamotyahasehare.

### Ohironae Nawenane Xahohisakoatyakalati Hanako Tah

<sup>2</sup> Nihalahareta xikakoa, xotita natyo hoka naotyakenere xiso akereta xisaonita hoka. <sup>3</sup> Xakore hoka kasani exehare waiyekehalaka xomana naokita: Cristo atyo tyoty halitinae xahekola xahehare, exahe ohiro kaiyanenero hoka exanene atyo exahekola xahehare tyaonita. Nikare Enore tehitiya atyo Cristo xahekola xahehare tyaonita. <sup>4</sup> Hatya halitiya talatya haseri, iraexahena xamani, xoana xakaihena xamani iraiti Enore tahi xahohisakakoati heko hoka maisaiya atyo aiminsare Cristo. <sup>5</sup> Nikare tehitiyaiya hatya ohiro xakaihakahena Enore tahi, xoana iraexahena xamani xahohisakakoati heko hoka maisaiya haseri talaita hoka maisa atyo haiyanene aiminsare. Nikareya hoka motyaiya hatya ohiro etalowakaiyehityakahalo akereta tyaonita. <sup>6</sup> Ohiroiya maisa haseri talatya aokowita hoka hasekaseya aikoty hoka ehokoreya. Hoka haihalotaiya hatalowa kaiyehetyaka, hasekase xaikotyaka kakoa hoka haseriya talatya hoka ehokoreya.

<sup>7</sup> Enaiya atyo maisa xoare maheta haseri talaita. Hiyaiya, ena atyo Enore háre akerehare kaomaka, exahe ihalahareta atyo ekakoa. Hoka ohiro kakoa atyo ena ihalahareta. <sup>8</sup> Hiyaiya, ena atyo maisa ohiro hiyeta nomakere xini, hoka ohiro atyo ena hiyeta nomakere. <sup>9</sup> Ena atyo maisa ohiro waiyakahare xini kaomaka, hoka ohiro atyo kaomaka ena waiyakahare. <sup>10</sup> Hatyo hiyeta anjonai hiyeta atyoite ohiro mohena haseri hiye imiti taose walawalere, hotikisa maheta haiyanene katyahakoreta hawenane.

<sup>11</sup> Xekohaseti koamaniya wisaonitere hiyetaiya atyo maisa aliyakere ohiro hawawahalonai tyaonita ena nonitata, exahe ena hoka maisaiya aliyakere hawawaharenai tyaonita ohiro nonitata. <sup>12</sup> Hiyaiya, ohiro atyo ena hiyeta kaotyaka. Nikareta tehitiya ohiro hiyeta ena tyaona. Hatyoharenai atyo Enore nalita tyoita.

<sup>13</sup> Xahekohena xisota: xoana ehokoretala, xahohisakoatyakalati hanako ohiro iraexaita Enore hiye, maisa xakore xoare haseri hiye mokare hoka?

<sup>14</sup> Hiyaiya, wawenaneta atyo aotyakijita wiso hoka hatya ena atyo kasehokohena hoka kahaiharetyakita atyo womana. <sup>15</sup> Xakore hoka ohiro kakoa kaihalaharetya maheta atyo esekase wahaharexe kaxekaka enomana. Esekase wahaharexe atyo kaxekaka enomana imiti taose walawalere akereta eseri talatya maheta.

<sup>16</sup> Xakore hoka hatyaiya hatyoharenai tahi iraehekoatya hoka exakere taitaiya nomi ihiye: hiyaiya, maisa atyo exahe Enore koamaniya tyaoniterenai hekoti hoka hawaharexe xini wahekoita xahohisakakoati heko. "Hatyo terota atyo wawenane", nomiya ihiye.

### Xekohaseti Timalaxa Neraka, Eháre Nakairatyaka Tah

<sup>17</sup> Kalikini naotyakihena xiso hatahi akiti kakoa hoka maisaiya atyo nihalahareta xikakoa. Hiyaiya, xahohisakoatyakakoahena hoka iniyalahare xisomita waiyexe xahexe. <sup>18</sup> Hiyaiya, exakerexe xakaiha nohiye haiyaharenai kirawanekakoahiterenai iraexatyakalati ako xahohisakoatyaka heko tahi. Hoka notyakeko hatyoharenai, kala aliterexe nikare xisaonita. <sup>19</sup> Nikare atyo xisomita hoka waiye atyo haware xakini xomokaka xiso hoka kawaiyaka maheta waiye tyaonitereharenai.

<sup>20</sup> Xihohisakoahena xikanakaira maheta nakairati Xekohaseti anere aokahitere hoka maisa atyo aokitere akereta xini xisaonita. <sup>21</sup> Xiyaiya, xikanakairehena maheta hoka xikaholawakita xinakaira kakoa hoka jikiniti kaokehenere hanaka kakoa tyaonita. Exahe haiyanee hoka hekahitaha. <sup>22</sup> Xoana maisa xikahanere hoka hatyoakota xikanakairare, xiserare? Nikare atyo xisaohena hoka maisa atyo xaminisare Enore koamaniya tyaoniterenai, exahe maxiyehareharenae hoka xehaihalikijita. Xoare nomihenaite xihiyehi? Nihalaharehena korite xikakoa? Maisaiya atyo nihalahareta xikakoa!

<sup>23</sup> Hiyaiya, Xekohaseti atyo aotyakisa natyo hoka hatyo kakoa atyo naotyakisa xiso. Xekohaseti Jesus kamatawatyakehenere xatini iya nakairati <sup>24</sup> hoka iraexatya Enore hiye. Hatyo najikinita taikasetene hoka isene enomanaha hoka nexa ihiyeha: "Exe atyo noháre, kaxekakehenere kahawaonitaretya xiso maheta. Maika exakere xisoma xotyaxemaheta natyo maheta", nexa. <sup>25</sup> Nikareta tehitiya kanakairehenahere najikinita iya erakakalati hoka nexa: "Exe erakakalati akore atyo waitare wenati tyaothetehenero halitinai ana Enore naliye aimenekoita, kakaferoxyatya atyo notimalaxi kakoa. Maika exe erakakalati akore xiserehenere nihatyaka xotyaxemaheta natyo", nexa. <sup>26</sup> Hiyaiya, xikanakairehenere hatyo nakairati exahe xiserehenere hatyo erakakalati akore nihatyaka atyo xiyakaita Xekohaseti kamane. Tyohetehenero kijiyaite nikare xisaona.

<sup>27</sup> Hatyo hiyeta, xala xamaniya kanakaira nakairati Xekohaseti anere hiyeta, xoana tera xamani erakakalati akore hiyeta, maisa xakore waiye tyaonare hoka iniyalahareya atyo tyoma Xekohaseti háre, timalaxa xoaha kakoa. <sup>28</sup> Hatyo hiyeta maika xikanakairehenere nakairati, xiserehenere erakakalati akore nahitita, maika hatya xakini ahekoty hawenane tahi.

<sup>29</sup> Xala xamaniya kanakaira hatyo nakairati, tera erakakalati akore xoaha hoka motyaiya maisa Xekohaseti háre tahi xini aimenekoita aoka hoka kanakairita, terita xoaha iniyalahare haxomokaka niyahare atyo. <sup>30</sup> Hatyohare hiyeta terota kahare haiyaharenai xinekonitarenai hokakahitaha, maisa kinaterehetere tyaonareha, exahe haiyaharenai hoka koxaka wainiha.

<sup>31</sup> Wahekoty hotohareya atyo wawenane kakoa hoka maisaiya atyo Enore xoare tyomita wikakoa. <sup>32</sup> Hoka maisaiya waiye maniya wawenane wamokita hoka Xekohaseti atyo ahekoita witahi, exahe howitihare

kakoa aotyakijita wiso, kasani maisa matyakekone-harenae kakoa haxawalita wikamawenekoaretyaka aokare hoka.

<sup>33</sup> Hatyo hiyeta, nohinaeharenai, xahohisakakoatyoha-hena Xekohaseti anere xikanakaira maheta hoka maika xatyahakakoa hoka haxawalita xikanakaira. <sup>34</sup> Hoka maika xala xamani nakita hoka maika kanakaira hanakota. Nikareya xisaona hoka maisaiya Enore xoare tyomita xikakoa xihohisakoitere hiyeta.

Haiyanai tahi atyoite nawaiyekehalakatya xomana nali nokaokihena hoka.

### Isekohaliti Waiyexe Ijita Iyateliti Waiyoliniti Xoaha

**12** Nohinaeharenai, kasani xawaiyore naokita Isekohaliti Waiyexe ijiterhare iyateliti harenai kakoa naokita. <sup>2</sup> Toahiya ximatyakekonehare xisaonitere xowakiya ene enore metalahare mairaenehare xema xisaonita, hoka haware ene Enore nonita mokita xiso, hoka exemaha xisaonita. <sup>3</sup> Hiyeta hoka waiye xasema niraini: Xala xamaniya atyo nexa: "Jesus atyo maisa waiyexe", nexa, hoka maisaiya atyo Enore Nisekohare xini tyaonita ekakoa. Hoka nexaiya: "Jesus atyo Xekohaseti", nexaiya atyo hoka Isekohaliti Waiyexeya atyo tyaonita ekakoa. Awaiya Enore Nisekohare tyaonita ekakoa hoka maisaiya nikare iraeta.

### Waiyoliniti, Iyateliti Waiyexe Xoaha Enore Isa Halitini Ana

(Romanos 12.6-8; Efésios 4.9-12)

<sup>4</sup> Haterore atyo Isekohaliti Waiyexe, xakore hoka kahare atyo hawareharexe xakini ijita iyateliti harenai. <sup>5</sup> Hawareharexe xakini atyo wahakita, xakore hoka haterore Xekohaseti ana atyo wahakita. <sup>6</sup> Hawareharexe xakini atyo iyateliti ijita hateniti nyahare, xakore hoka haterore Enore atyo ijita iyateliti, hatya ana xakini ehatene tyomaha maheta.

<sup>7</sup> Waiye atyo tyaonaha maheta Enore atyo ijita hatya ana xakini xalini hare Isekohaliti Waiyexe nalitare kahinaetyahene maheta. <sup>8</sup> Hatya ana hoka Isekohaliti waiyexe ijita waiyoliniti, hatya ana hoka hatyo Isekohalitita ijita irihaliniti. <sup>9</sup> Hatya ana hoka Isekohaliti ijita tyakekoti, hatya ana hoka ijita iyateliti aiyatelikiheta maheta hokakiterenai. <sup>10</sup> Hatya ana atyo Isekohaliti ijita iyateliti tyoma maheta maomakahare. Hoka hatya ana atyo ijita waiyoliniti xakaihakatya maheta Enore tahi. Hatya ana atyo ijita irihaliniti waiyekehalaka enomana maheta hawareharexe xakini waiyolitini tyoitereharenai Isekohaliti Waiyexe nalitare, exahe maisa Isekohaliti Waiyexe nalitare xini tyoitereharenai xoaha. Hatya ana atyo ijita iyateliti irae maheta haiyaharenai xako, hoka hatya ana atyo ijita iyateliti awaiyekehalakatya maheta hatyo xakotinai. <sup>11</sup> Xakore hoka haterore atyo hoka hatyo Isekohalitita atyo tyotyatyoharenai tyomita. Hawareharexe xakini atyo ijita waiyoliniti hatya ana haxaokala ximita.

### Haterore Haréti Hoka Kahare Akiti Atyo

<sup>12</sup> Hiyaiya, Cristo atyo haréti kahare kaxiyeharexe tyaonitere akereheta. Hoka hatyo xiyehalitinai xakore atyo kahare hoka haterore haréti atyo tyaonahitaha. (Wiso tyakekohatiyenai atyo Cristo háre). <sup>13</sup> Nikareta tehitiya, wityotyta wiso, judeunae exahe majudeuneharenae, wakaharenai exahe mawakahareneharenae xoaha, wikabatixatyaka haterore Isekohaliti kakoa hoka Cristo háre hiye wisaona maheta. Hoka hatyo hiyeta Isekohaliti wityotyta womana kaxekaka.

<sup>14</sup> Hiyaiya, haréti atyo maisa haterore nomakere xini, xakore hoka kahare xiyeharexe atyo kaomaka. <sup>15</sup> Kijitiya nexa: "Maisa atyo kahiti xini natyo. Hiyeta hoka maisa atyo haréti hiyexe xini natyo", nexa xakoreya hoka maisa atyo haréti hiye xini mawenaneta. <sup>16</sup> Nikare tehitiyaiya tanakoakoti nexa: "Maisa xositi xini natyo. Hiyeta hoka maisa atyo haréti hiyexe xini natyo", nexa xakoreya hoka maisaiya atyo haréti hiye xini mawenaneta. <sup>17</sup> Tyotyta harétiya xositi taita hoka aliyakeriya wasemakahena? Hoka tyotyta harétiya tanakoakoti taita hoka aliyakereya waexe akahena?

<sup>18</sup> Nikare Enore tyoma haliti háre hahekorexe xikini mokene haréti hiye aokitere akereheta maheta.

<sup>19</sup> Harétiya hatyotyta jiyane makere hoka maisaiya atyo haréti tyaonita. <sup>20</sup> Nikare kahare akiti xakore hoka haterore atyo haréti.

<sup>21</sup> Hatyo hiyeta xosetiya maisa aliyakere nita kahiti hiye: "Maisa atyo naokare hiso nomani", nita. Exahe seriti hoka maisaiya aliyakere nita kijiti hiye: "Maisa naokare hiso nomani", nita. <sup>22</sup> Exahe haiya akiti wiháre hiye tyaonitere maisa kinatere tyaonare xakore hoka waokitene womana. Ekoiya awa hatyo haréti hiye maiyaterhare xiyehalitinai tyaonita hoka maisaiya aliyakere wisaonare. <sup>23</sup> Hoka etakehare ekatyahakohareta waiyeterharenai womana atyo waiye wikaxaikota. Haiya akiti maisa waiyeharexe, xakore hoka waiye atyo wikaxaikotene. <sup>24</sup> Hoka haiya akiti masakare waiyehare tyaonitere atyo maisa nikare kakaxaikotyakere. Nikare Enore tyoma haréti hoka haiya akiti maxawaiyetyakiterenai akiti masakare waiye kaxomokaka maheta.

<sup>25</sup> Hatyo hiyeta maisa atyo haréti hiyexe haware xakini xini tyaonita, xakore hoka tyotyta xiyehalitinai atyo hakakoa kahinaetyakakoahitaha. <sup>26</sup> Hakitiya haréti hiye kawé hoka tyotyta haiyakitini hiye tehitiyaite kawé. Hakiti kakoaiya kaihalaharetyaka hoka tyotyta haiyakitini tehitiya atyoite ihalahareha ehakakoaneta.

<sup>27</sup> Xasemehena, xisonae atyo Cristo háre. Hoka haxiyehare xakini atyo eháre hiye xisaonita. <sup>28</sup> Hatyo hiyeta tyakekohatiyenai ana Enore isa ehateneha makere: Iraiti kakoarenai hotohare kaxomokakaha, ihiyetare Iraiti xakaisaseharenai. Ihiyetare tyakekohatiyenai xaotyakisaseharenai. Hatyaoseta maomakahare tyomiterenai. Enajikinita etakehare wairatyarenai, kahinaetitereharenai, aotyakijitereharenai, hawareharexe xakoti iratereharenai xoaha. <sup>29</sup> Maisa atyo tyotyaha xini Iraiti kakoarenai. Maisa atyo tyotyaha Iraiti

xakaisaseharenai, exahe tyakekohatiyenai xaotyakisaseharenai xini. Maisa atyo tyotyaha xini maomakahare nomasehareha. <sup>30</sup> Maisa atyo tyotyaha xini hokakitere-nai wairatyaseharenai, hawareharexe xákore ni-raetyaseharenai, hawareharexe xákore Iraití xawaiyekehalakatyaseharenai xini. <sup>31</sup> Hatyo hiyeta xaiyateretyoahenaira iyateliti waiyexe, waiyoliniti waiyexe kaxekakehenere xomana kakoa.

Xakore hoka nahotikisaite xomana ahoti. Hatyo atyo haiyanai xaehare nawaiye.

### Xawaiyetyati

**13** Niraiya naokowita halitinae xako, exahe anjonae xako hoka niraeya. Xakore hoka maisaiya nawaiyetyare halitinae hoka niraeniya atyo maisa xoarehare tyomare, kamatihera kamokotyakehena hoka tai, tai, nitere akereya atyo notyaonita. <sup>2</sup> Exahiya atyo nawaiyore noxakaihakatya Enore tahi, nawaiyore tyotyaha xoalini hare kakoa, nawaiyore tyotyaha meta-harexe tyaoniterenae kakoa, exahe kalore notyakeko hoka hatyo hiyeta nakikiheta tyairinae. Xakore hoka maisaiya atyo halitinae nawaiyetyare hoka maisaiya atyo xoare notyomare. <sup>3</sup> Exahiya atyo tyotyaha noxiyehare nisa maxiyehareharenai ana, exahe noháre kak-eratyaka harenai hoka maisaiya atyo halitinae nawaiyetyare hoka maisaiya atyo xoare notyomare.

<sup>4</sup> Xawaiyetyati atyo mehaxaikhahare, waiyexehare. Xawaiyetyati atyo maisa okoawaharexe, maisa ahinit-yarexe, maisa jiyahaotyare. <sup>5</sup> Maisa atyo kawera-harexe, maisa aokowiharetyoare. Maisa atyo ehare-hatiye, maisa tiyaharexe. <sup>6</sup> Xawaiyetyati atyo maisa ihalaharexe haiyanai nómanenai iniyalahare kakoa, xakore hoka iraiti aliterexe kakoa atyo ihalahareta. <sup>7</sup> Xawaiyetyati atyo maisa xoana xowaka amaikoharexe wenati howitiharexe kakoa, xakore hoka heko atyo tyaonita hatyakekone kakoa, haxatyahane kakoa, hamehexaikhaharene kakoa.

<sup>8</sup> Xawaiyetyati atyo maisa tyotere xini. Kahare atyo xakaihakere waiyexe, xakore hoka maisa atyoite waha xini tyaonaha. Wawaiyore atyo hahotyaliharenai xako wiraeta, xakore hoka tyotyaha rotitaite. Kalore atyo wiri-hareta, xakore hoka kamiyane tehitiyaite. <sup>9</sup> Hiyaiya, maisa atyo tyotyaha wiriharene kakoa wawaiyorexe kaisere, Iraití Waiyexe wiyakaihakaite renai xoaha kakoa hoka maisa wawaiyorexe kaisere. <sup>10</sup> Hoka wenati waiyexe kaiserehare ite tyaohena womana hoka hatyo wimawaiyorene ite maiyareheta.

<sup>11</sup> Noxoimitatere xowaka ene niraini, nawenani, nox-ahekali harenai xoima akereta tyaonita. Hoka kalikini atyo nonityohaliti hoka maisa atyo xoima nawenane akereta notyaohitita. <sup>12</sup> Kalikini wiyaiterehare atyo motya etakehare wiyakakalatikoa xoalini hare niyako-tini mawaiyenenai wiyaitere akereta, xakore hoka hatyo najikinita atyoite hakakoare wiyaiyene. Hoka ka-likini atyo haiyakitinaeta nowaiyetene, xakore hoka hatyo najikinita atyoite hakakoare nowaiyene, kalikini Enore waiyanehare notyaonitere akereta.

<sup>13</sup> Hoka kalikini atyoite heko tyaohena tyakekoti, xatyahati, xawaiyetyati xoaha. Hoka exenai konitare masakare waiyexe atyo xawaiyetyati.

### Hawarehare Xakoti

(Atos 2.4-8; 10.45-46; 19.5-6)

**14** Hatyo hiyeta xawaiyetyati atyoite xaohena. Mai-ka xaohitiya xomana iyateliti waiyoliniti xoaha Isekohaliti Waiyexe nalitare. Exahe hoka maika xaiy-ateretyoa hoka Iraití Waiyexe kakoare xisaona, hoka Enore niraene xiyakai.

<sup>2</sup> Xala xamani atyo irae hena masemakahare xako hoka irae atyo Enore kakoa, hoka maisa atyo halitinae kakoa xini irae. Hiyaiya, maisa xala hare ana waiyekehalakere. Aliterexe metaharexe tahi atyo irae Isekohaliti Waiyexe niyaterere hiyeta. <sup>3</sup> Hoka xala xam-aniya atyo xakaita Enore niraene hoka halitinae hiye atyo irae hoka kahinaetyahitene, aihala-halinikisahitene, emaxalokisahitene harenai atyo. <sup>4</sup> Ho-ka xala xamani atyo masemakahare xako irae hena ho-ka hatyota atyo kahinaetyoawita. Hoka xala xamani atyo xakaita Enore niraene hoka hatyo atyo kahinaeti-ta tyotyaha tyakekohatiyenae.

<sup>5</sup> Kasani xityotyaha masemakaharenae xakonae xawaiyore xirae naokita. Xakore hoka xityotyaiya xawaiyore xiyakaihakatya Enore niraene hoka hatyoia atyo waiye kaiserehare. Hiyaiya, xala xamani atyo Enore niraene xakaita hoka hatyo atyo masemakahare xako irae tere xaehare nawaiye kaiserehare. Hoka ameteniya atyo hatya awaiyekehalakatyaha hatyo irae tere hoka ehokoreya. Nikareya atyo hoka tyotyaha tyakekohatiyenai kakahinaetyaka enawenaneha kakoa.

<sup>6</sup> Nohinaeharenai, nokaokiya xomana hoka niraiya xikakoa masemakahare xako hoka aliyakereya nakahi-naehena xiso? Maisaiya nawaiyekehalakaita xomana Enore tahi, xaotyakiye tahi, wenati tahi harenai hoka maisaiya xoare hare notyomita.

<sup>7</sup> Hiyaiya, xerati nonitata, haiyaharenai xerati niya-hare kaomaka flauta, harpa xoaha. Hoka maisaiya waiye kaxaemahalikisakita hatyo xerati anerenai hoka aliyakereya hatya ana waiyekehalakehena, xoarexa xam-ani kaxaemahalikisakita hoka? <sup>8</sup> Nikareya sorarenai konetaxa xaemahalikisase maisa waiyore aimahalikiji-ta hoka aliyakereya sorarenai ana waiyekehalakehena hoka memere tyaohenaha xaisakakoati ana?

<sup>9</sup> Hatyo akereta tehitiyaite, aliyakereya haiyanai ana waiyekehalakehena xiraetereharenai haiyanai xako, maisa waiyekehalaka xiraexe hoka? Xiraenenai atyoite motya hati firakore ana xiraetere akereta tyaona.

<sup>10</sup> Waikohekoa hakakoare atyo kahare hawareharexe makere xakotinai, xakore hoka hatyohotyaliharenai makere atyo semakakoahitaha haxakonaiha. <sup>11</sup> Xakore hoka hatyaiya irae hoka maisaiya waiyekehalakere nomani iniraene hoka nomani atyo hatyo hahotyali-hare. Exahe natyo hoka hahotyalihare atyo notyaonita enomana.

<sup>12</sup> Hatyo hiyeta kasani tyare Isekohaliti nalitare waiyoliniti xaokita xomana hoka maika xaiyateretyoahena hoka xawaiyore waiyoliniti kakoa hoka xakahinaetya tyakekohatiyenai enawenaneha kakoa. <sup>13</sup> Hatyo hiyeta hatyaiya iraeta masemakahare xako hoka maika iraexatya hoka waiyore hoka awaiyekehalakatene maheta hahinaeharenae ana. <sup>14</sup> Hiyaiya, niraexaitaiya atyo hahotyalihare xako hoka nisekohare atyo iraexaita hoka nirihalini ana atyoite maisa waiyekehalakere. <sup>15</sup> Hoka xoana ite notyaohena? Nisekohare kakoa atyoite niraexahena, xakore hoka nirihalini kakoa tehitiya atyoite niraexahena. Hoka noxerehena atyoite nisekohare kakoa, xakore hoka nirihalini kakoa tehitiya atyoite noxerehena.

<sup>16</sup> Hisekohare kakoa taitaiya hihalahareta Enore kakoa hoka aliyakereya hatya tyaonita hihaliya hoka "Ehekore", nehena, hiraexala najikinita? Xoare hexa xamani atyo hiraexaita hoka maisa atyo waiyekehalakere enomana. <sup>17</sup> Exahe xakoreya atyo Enore ana hihalaharene niraexala waiyexe xakore hoka hatyo haliti atyoite maisa ini hekoti hakahinaetita.

<sup>18</sup> Xiyaehare atyo niraeta masemakahare xakotinai hoka hatyo hiyeta nihalahareta Enore kakoa. <sup>19</sup> Xakore hoka tyakekohatiyenai atyo hohisakoahena hoka haiyasenai taita atyo niraeta, waiyekehalaka enomana maheta, hoka kakahinaetyakaha hoka hatyo atyo waiye. Xakore hoka waha tahi masemakahare xako niraeta hoka maisa waiyekehalakita enomanaha hoka maisa atyo xoare notyomare.

<sup>20</sup> Nohinaeharenai, awa atyo xoima xahekola akereta xahekotya. Hoka maika atyo iniyalahare ana xoima akereta xisaona, xakore hoka maika xiyahekola inityohaliti xahekola akereta tyaona. <sup>21</sup> Xiyaiya, exakere atyo Iraitai Waiyexe nanekoa xairatyoare tyaonita:

"Niraehenaite Israel hotyalinae kakoa", nexa Xekohaseti. "Niraehena ite hahotyaliharenae kanasakota ekakoaha, hahotyaliharenae xako maniyata. Xakore hoka maisaiya xoana xowaka niraini xema tyaonitaha", nexa Xekohaseti.

<sup>22</sup> Hatyo hiyeta hawareharexe xakoti kairaetyakiterehare atyo kahinaetya maheta matyakekoneharenai, hoka maisa atyo kahinaetya maheta xini tyakekohatiyenai. Hoka kairaetyakiterehare Enore niraene atyo kahinaetya maheta tyakekohatiyenai, hoka maisa atyo kahinaetya maheta xini matyakekoneharenai.

<sup>23</sup> Xahekohenaore, xihohisakoitaiya hoka xityotyaiya xiraeta masemakahare xakotinai. Hoka kaokehenaiya hatyaterere, exahe xoana matyakekonehare xamani hoka xoana maisaiyaka xihatyaharene aokahitaha.

<sup>24</sup> Xakore hoka xityotyaiya atyo xiyakaita Enore niraene hoka isoahenaiya nali matyakekonehare exahe hatyaterere hoka semahaiya xiyakaini hoka halakisaiya iniyalahare háomane. Hoka hatyo semehenere hiyetaiya waiyexe maniya tyaoheha. <sup>25</sup> Hoka exahekolani metaharexeniya kahotikisaka, hoka hatyaosetaiya waikoa tyoka hakaolise kakoa hoka awaiyehena Enore hoka nehenaiya: "Aliterexe atyo Enore tyaonita xinekoni", nexaiya.

### Maika Xirihare Xisaona Xahohisakoatyakalati Hanako

<sup>26</sup> Nohinaeharenae, exakere atyo niraeta naokowita: Xihohisakoahena atyo xahohisakoatyakalati hanako hoka hatya xihinaehare atyo xera aokowita. Hatya hoka xolani hare kakoa aotyakisa aokowita. Hatya hoka Enore hotikihenerere tahi xakai aokowita. Hatya hoka iraiti masemakahare xakoti xakai aokowita. Exahe hatya hoka awaiyekehalakatya aokowita hatyo Iraitai xakoti masemakahare xakaihenerere tahi. Xirihare xisomehenere kakoa xakahinaetya tyakekohatiyenai maheta. <sup>27</sup> Maika xinekonitane iraehena masemakahare xakoti hoka maika hinama xamani, xoana hanama taita irae, maika hatya iraehenerere najikinita, hatya irae xoaha, hoka hatya awaiyekehalakatya hatyo kairaetyakehenerenai. <sup>28</sup> Hoka maisaiya atyo xalahare aka awaiyekehalakatene maheta hoka maika kotare ximairaehenere, hoka maika xiraehena hoka xikakoita exahe Enore xoaha kakoa taita.

<sup>29</sup> Hoka hinamahare, hanamahareya atyo Enore niraene kakoareha hoka hatyonai atyoite iraehenaha, hoka haiyanai atyoite semaxemahenaha iniraeneha, xoana waiyexe xamani, maisa xamani. <sup>30</sup> Hatya tyokitere hiyeya Enore hairaene xakaisaka aoka hoka maika iraterere mema tyaona. <sup>31</sup> Hiyaiya, waiyehenaiya atyo xityotyaiya xiyakai Enore niraene, xakore hoka hatya xakiniya xirae, tyotyaha waiyoreha hoka ihalahareha maheta. <sup>32</sup> Maika xala xamani Enore niraene xakaita hoka maika waiye kaxaikoawi hoka waiye Enore niraene xakai. <sup>33</sup> Hiyaiya, Enore atyo aoka wiso haomana maisa kaxiyehare wamoka maheta xini wawenane, xakore hoka waiye atyo wisaona maheta.

Maika haiyaharenai tyakekohatiyenai hotyalinai tyaonitere akereta xisaohena. <sup>34</sup> Maika ohironai mema tyaonaha xahohisakakoati xowaka. Hiyaiya, maisa atyo xala hare iraeha aokare. Hiyaiya, exakere atyo judeunai xaotyakisakaho nexa: maisaiya atyo ohironai wakatyati niyahare kaxomokakahitaha, nexa. <sup>35</sup> Maika xoare tahi xamani waiyekehalaka semaha aokowitaha hoka maika hahanaha nali axaha haiyaneneha. Hiyaiya, kahaiharetyakere atyo ohiro iraeta xahohisakakoati heko.

<sup>36</sup> Xoana Enore niraene xinalita kaotyaka xaokita? Xoana xomanere ala taita kaotyaka? <sup>37</sup> Hatyaiya atyo Enore niraene xakaisasehare aokowita, exahe xoana Isekohaliti nalitare waiyoliniti kakoare aokowita hoka waiyekehalakaita atyo enomana exe naxairaitere. Hiyaiya, exe atyo Xekohaseti xaotyakira.

<sup>38</sup> Hoka hatyaiya atyo maisa semaxematya aokowita exeharenai hoka maika xahalaisene, hoka awa atyo xasemaxemahena iniraene. <sup>39</sup> Hoka maika nikare xisaona, nohinaeharenae. Maika xaiyateretyo xiyakaini Enore niraene kakoa. Hoka awa atyo hatya masemakahare xako iraterehare xamahokoanetya.

<sup>40</sup> Hatyo hiyeta maika tyotyaiya xisomehena waiyexe, ehokorexe xoaha taita.

**Cristo Atyo Waini Iniyalahare Wománe Hiyeta**  
(Romanos 6.23; 8.1-10; 2 Coríntios 5.20-21; Efésios 1.7; 2.8-9)

**15** Nohinaeharenae, kasani xotyaxematya Waiyexe Iraitu noxakaihenere xihye naokita. Hatyo iraitu atyo xaoka xomana, exahe heko xityakekota. <sup>2</sup> Iraitu noxakaihenere xihye atyo Waiyexe Iraitu. Hoka hatyo Waiyexe Iraitu hiyeta atyo xikaiyakeheta, hekotaiya xikinatere xisaona exema maniya hoka. Hoka ameteniya atyo xityakekohenerere maisa xoarehare tyomita xomana hoka.

<sup>3</sup> Tyotya kaxakaisakehenere nohiye atyo noxakai xihye. Hatyo atyo masakare waiye kaiserehare: Cristo atyo waini iniyalahare wománe hiyeta, kaxairatyakehenere Iraitu Waiyexe nanekoa akereta. <sup>4</sup> Waini hoka kaxafityaka, hatyaoseta ehanamakini ferakene hiye kaseheta, kaxairatyakehenere Iraitu Waiyexe nanekoa akereta. <sup>5</sup> Kaseheta hoka kaotyakeheta Pedro ana, hatyaoseta kaotyakehetehtitiya 12-hare hairaene kakoarenai ana. <sup>6</sup> Hatyaoseta kaotyakehetehtitiya 500-hare jiyare exaotyakira xema tyaonitereharenae ana. Hekota atyo hatyonai konitare haiyaharenae kasetata hoka haiyaharenae atyo koxaka waini. <sup>7</sup> Hatyo najikinita kaotyakehetehtitiya Tiago ana, hatyaoseta kaotyakehetehtitiya tyotya hairaene kakoarenai ana.

<sup>8</sup> Hatyaoseta kaotyakehetehtenerere enomanaha najikinita, miyanitiye kaotyaka nomani, etakehare hatya hawenane nahitita tyaona hoka komita wainitere akereeta notyaona exema. <sup>9</sup> Hiyaiya, natyo atyo iraitu kakoarenai katyahakohare, komitaene atyo maisa iraitu kakoare nokaexaretyaki naokare. Hiyaiya, Enore xema tyaoniterenai xahita atyo noxalijinihareta ene. <sup>10</sup> Xakore hoka Enore nawaiyexehare hiyeta atyo exakere notyaona, hoka hatyo waiyexehaliti atyo maisa maomaxetahare xini isa nomani. Xakore hoka nahakita atyo tyotya iraitu kakoarenai xahexe. Xakore hoka maisa atyo natyo xini hatyoharenai notyoma, hoka Enore nawaiyexehare atyo nikare ahakakisa natyo. <sup>11</sup> Hatyo hiyeta xoana natyo xamani, xoana hatyoaha xamani, xakaiha xihye hoka hatyohare atyo maisa xoanerenai xini. Xakore hoka aliterexe atyo hatyo tahi makere wiyakaihenere xihye, hoka hatyohare atyo xityakeko, hoka hatyo atyo waiye kaiserehare.

**Wikaseneheta Tahu**

(1 Coríntios 15.35-58; 2 Coríntios 4.14; 1 Tessalonicensens 4.13-18; Apocalipse 20.4)

<sup>12</sup> Hoka wiyakaitere iraitu xihye atyo Cristo kaseneheta tahi hoka xoanere hoka haiyanai xinekonitarenai kamatinaiya atyo maisa kasehitita aokahitaha? <sup>13</sup> Hoka maisaiya atyo kamatinai kasehetere hoka nikare atyoala hoka Cristo maisa kasehitita. <sup>14</sup> Hoka maisaiya atyo Cristo kasehitita hoka maisaiya atyo xoarehare wiyakaita, exahe xiso hoka maisaiya atyo xoarehare xityakekota. <sup>15</sup> Exe tehtitiya: nikareya hoka wamaoseraitaiya atyo Enore tahi. Hiyaiya, hatyo atyo ekasekiheta Cristo waoka. Hoka aliterexeya atyo maisa

kamatinai kasehitita hoka Enore atyo maisa ekasekiheta Cristo. <sup>16</sup> Hiyaiya, maisa atyo kamatinai kasehetere hoka Cristo tehtitiya atyo maisa kasehitita. <sup>17</sup> Hoka maisaiya atyo Cristo kasehitita hoka xityakekoniya maisa xoarehare tyomare, hoka hekotaiya atyo xiyaneta ximawenekoaretyakaho iniyalahare xománenai kakoa. <sup>18</sup> Hoka nikare atyoala hoka Cristo tyakeko hoka wainihenerenai atyoala mitita. <sup>19</sup> Kalini niyahare taitaiya wisaona Cristo koamaniya hoka wiso atyo tyotya halitinai koniyata maihalahareharenai kaiserehare.

<sup>20</sup> Hoka aliterexe atyo Cristo kaseheta hoka hatyo akereeta tehtitiyaite kamatinai kaseheta. <sup>21</sup> Hiyaiya, haterore haliti hiyeta atyo kaotyaka kamati hoka nikareta tehtitiya hatya haliti hiyeta kaotyaka kasetyatiheta. <sup>22</sup> Hiyaiya, tyotyaha atyo wainiha tyaonahitere Adão xema hiyeta. Nikareta tehtitiyaite tyotyaha kasehenahitaha tyaonahitere Cristo xema hiyeta. <sup>23</sup> Hatya xakini ite kamatinai kaseheta. Cristo atyo koxaka kaseheta. Hoka Cristo tyohetehtenerere xowakaite exema maniya tyaoniterenae kasehetehtena. <sup>24</sup> Hatyaosetaite kaotyakehena miyanitiye ferakene. Cristo ite mawenekoaretya tyotya tihanarenai xekohaseti tyaoniterenai, kalorexenai, iyateliti kakoarenai xoaha, hoka waikohe ite iseheta Hanexe Enore ana. <sup>25</sup> Hiyaiya, Cristo atyoite kalorexere tyaona, Enore jiyahaotya enahalakoaharenai tyotya hoka ikiji katyahe mohenerere kijiya. <sup>26</sup> Miyanitiye ahalakoahaliti atyoite kajiyahaotyaka atyo hatyo kamati.

<sup>27</sup> Hiyaiya, exakere atyo Iraitu Waiyexe nexa: "Enore atyo tyotya xalini harenai ikiji katyahe moka", nexa.

Hoka hatyo iraitinai "tyotya xalini harenai", nehenere atyo maisa Enore xaokaka xini iraeta. Hiyaiya, hatyo atyo Cristo kalorexere moka hoka ekatyahe tyotya mokita. <sup>28</sup> Hoka tyotyaita Cristo kaxaikone taitehena hoka hatyo Iytanaitaite Enore kalorexene katyahe mokoawihena. Hiyaiya, hatyo atyo Cristo kalorexere moka hoka ekatyahe tyotya moka. Hatyaosetaite Enore tyotya xalini harenai kaxaikohena.

<sup>29</sup> Hoka kalikini atyoite etakehare halitinai batixatyoterenai kamatinai ana naxehena: maisaiya kamatinai kasehetere hoka xoanere hoka hatyo halitinai batixatyotyoawitaha enomanaha? <sup>30</sup> Exahe wiso, xoanere ala hoka ferakiti nihatyaka kahenehare wisaonita, maisaiya kamatinai kasehitita hoka? <sup>31</sup> Nohinaeharenai, ferakiti nihatyaka komita nokaxemereharetyakita. Exakere atyo niraeta nihilaharetere xikakoa, Wiyekohase Jesus Cristo koamaniya wisaonitere hiyeta. <sup>32</sup> Naiyateretyoa ali Éfeso nali nahalakoiharenae xahita, kirakahare xahita kaxaiyateretyoakitere akereta. Hatyoharenai atyo notyoma halitinai wiyakahare taita, hoka xoarehare ala hatyohare kakoa notyoma? Aliterexeya atyo kamatinai maisa kasehetere hoka maika iraitu nehenere akereta wisaona: "Nika wikanakaira, wisera. Hiyaiya, makani atyoite wiwainihena", nitere akereta.

<sup>33</sup> Awa atyo ximaotikone. "Iniyalahare wenati atyo aiyalaharetita waiyexe wenati". <sup>34</sup> Xisaohetehtena xawenane waiyexe, ehkorexe xema, hoka xahalakihena

iniyalahare xománe. Exakere niraeta, nehahalikisa xiso maheta: hiyaiya, haiyaharenai xinekonitarenai atyo maisa Enore koamaniya tyaonareha.

### Tyakekohatiyenae Kaseneheta

(1 Coríntios 15.12-23; 2 Coríntios 4.14; 1 Tessalonicenses 4.13-18; Apocalipse 20.4)

<sup>35</sup> Xala xamaniya axehena: "Aliyakerexe kamatinae kasehitita? Aliyakerexe ite eháreha kaotyakehete-hena?" nehenahaiya.

<sup>36</sup> Maotikonitina! Xafehena atyo hanakatise waikohekoa hoka wainiya atyo hoka hiko. <sup>37</sup> Hatyo kaxafityakehenere atyo ese taita, xoana trigose xamani, xoana hatetere hanakatise xamani, hoka maisa atyoite ekate koxaka memere tyaonitere xini kaxafityakehena. <sup>38</sup> Enore atyo hatyo hananetise aliyakerexese xamani tyomene aokowita hoka tyomitene. Hiyeta hoka hikoahena hoka hawareharexe makere tyaonita ekatenai.

<sup>39</sup> Exahe iyawinisoarenai hoka maisa hakakoa netexeha xini: halitina atyo hawareharexe nete, kirakaharenai atyo hawareharexe nete, kotehalanai atyo hawareharexe nete, exahe kohasenai hoka hawareharexe nete.

<sup>40</sup> Enokoarenai atyo kahá-rexeha tehitiya, exahe waikohekoarenai hoka kahárexeha. Hahekorexe nawaiyehare atyo enokoarenai háre, hoka haheko-harexe nawaiyehare atyo waikohekoarenai háre.

<sup>41</sup> Hiyaiya, kamae atyo haxaokanala terota aokanatita, exahe kaimare hoka hahekorexe aokanatita, exahe xoresenae hoka hahekorexe aokanatitaha. Hoka hatyo xoresenaita hawareharexe makere aokanaitaha.

<sup>42</sup> Hiyaiya, nikareta atyoite kamatinae kaseheta. Eháreha atyo kaxafityakehena hoka ekamane atyo. Xakore hoka kasehetehena atyoite hoka maisaiya atyo wainihitita. <sup>43</sup> Kaxafityakehenere xowaka atyo ewaxirahare, maisa kinaterexe. Xakore hoka kasehetehenere xowaka atyoite waiyehareheta, kinaterite. <sup>44</sup> Kaxafityakehenere xowaka atyo eháre nitini kaxafityakita. Xakore hoka kasehetehenere xowaka atyoite eháre nitini ako tyaohetehena inisekohare. Hiyaiya, eháre nitini akaiya hoka eháre nisekohare nitini aka tehitiya atyo.

<sup>45</sup> Hiyaiya, Iraití Waiyexe atyo nexa:

Hetatiyehare haliti Adão atyo wenati kakoare terota. Xakore hoka miyanitiyehare Adão atyo Isekohaliti hoka ijita atyo wenati halitina ana. <sup>46</sup> Maisa atyo isekohaliti nitini hotohare xini tyoita, xakore hoka haréti nitini hotohare atyo. Enajikinita atyo tyoita isekohaliti nitini. <sup>47</sup> Hetatiyehare Adão atyo kaomaka waikohekoatare waikohese hiyeta. Hoka ihiyetare atyo enokoata tyoa.

<sup>48</sup> Waikohekoa anerenai atyo motya etake waikohe hiyeta kaomakehenere akereta tyaonahitaha. Hoka enokoa anerenai atyo motya etake enokoata tyohenere akereta tyaonahitaha. <sup>49</sup> Hiyaiya, nikareta tyare atyo waikohekoata kaomakehenere haliti harero akereta wisaonita kalikini hoka nikareta tehitiyaite Haliti enokoatare harero akereta wisaona.

<sup>50</sup> Nohinaeharenae, kasani exakere terota niraehitiya xihye naokowita: maisaiya aliyakere eteti, timalati xoha nomakere xane tyaonita enokoa, maisaiya aliyakere wiháre wainiterehare aliyakere makamanehare tyaonita.

<sup>51</sup> Waiye xasemehena exe metaharexe tahi: maisaite wityotyta xini wiwaini, xakore hoka ehárekena rotitaite wityotyta hawareharexe wikaxomokaka. <sup>52</sup> Haxerore wamaojihakoitere akeretaite nikare wisaona. Exowakaite koneta kaimaharehena. Kaimaharehenaite hoka kamatinaite kasehetehena, makamaneharenai akereta hoka wityotytaite hawareharexe wikaxomokaka. <sup>53</sup> Hiyaiya, haréti wainiterehare atyoite kakaimatyakehena makamanehare kakoa hoka etakehare wainihenerehare atyoite kaxaisoakisakehena etakehare makamanehare kakoa. <sup>54</sup> Nikare ite hatyo haréti wainiterehare kakaimatyaka makamanehare kakoa, etakehare wainihenerehare ite kaxaisoakisaka makamanehare ako hoka kaotyakehenaite Iraití Waiyexe nitere akereta:

Kamati atyo kamawenekoaretyaka, kajiyahaotyaka kaiserehare! nitere akereta.

<sup>55</sup> "Kamati, aliyo hijiyahaotyakala? Aliyo hiyaiyaterekisakala?"

<sup>56</sup> Iniyalahare hiyeta kamati kinatere tyaonita hoka aijita. Hatyo iniyalahare atyo haiyaterere kaokita Xaotyakiyaho hiyeta. <sup>57</sup> Xakore hoka wihalahare Enore kakoa, hatyo atyo isa womana jiyahaotyati, Wiyekohase Jesus Cristo hiyeta.

<sup>58</sup> Hatyo hiyeta, nohinaeharenai, maika xikinatere xisaona xawenane Xekohaseti koamaniya kakoa. Maika heko xahata mene Xekohaseti hatene. Hiyaiya, tyotyta xisomitereharenai Xekohaseti hatene atyoite maisa metita xini.

### Olo Xahohisakoatyaka Tyakekohatiyenae Maoloxaharenae Ana

**16** Hoka olo kakoa xakahinaetya xaokowitere Enore anere hotyalinae Judéia nali tyaoniterenai tahi atyo: maika xisomehena niraehenere tyakekohatiyenai Galácia nali tyaoniterenai hiye akereta. <sup>2</sup> Maika domingo nihatyaka haware xatyakaisa inira olo, xikaoloxitere hakakoaneta. Nikarite hoka maisa xoare maheta olo xahohisakoatita nali nokaokihenere xowaka. <sup>3</sup> Ite nokaokihena xomana hoka xalanae xamani olo kolatyase xaoka hoka baberane notyoma enomanaha hoka olo kolatyaha Jerusalém yerena ana. <sup>4</sup> Noxaniya atyo exemaha xaoka hoka noxani hoka tyoaha noximi.

### Paulo Xahekola

<sup>5</sup> Nokaokaite xomana, Macedônia nali nojiyehenere najikinita. Hiyaiya, hatyoaho atyoite notyoa. <sup>6</sup> Xoana xamanite hoka ininai notyaona xihaliya, tihakiti tyotehetehenere kijiya. Nikarite hoka xakahinaetya natyo noxani naokowitere nali noxanini kakoa. <sup>7</sup> Hiyaiya, maisa atyo nojiyani kakoa taita xini nowaiya xiso

naokowita. Xekohaseti xaokalitaiya atyo hoka wahaiya atyo notyaona xihaliya.

<sup>8</sup>Xakore hoka ali Éfeso nalita notyaona naokowi Pentecostes ferakene kijija. <sup>9</sup>Hiyaiya, nokaoki kalore, waiyexe nohateni ali. Kahare xakore atyo haiyaharenai kahalakoahareta nokakoi hoka.

<sup>10</sup>Maika Timóteo kaokehena nali hoka waiye xamokene. Hiyaiya, Timóteo atyo hakita Xekohaseti hatene nahakitere akereta. <sup>11</sup>Awa atyo ximaxaiminirehenene. Xakore hoka maika xakahinaetene ehaikoahaneheta kakoa hoka ali xeta mehaxaikohare aiheta. Hiyaiya, ali natyahita ekaokeneheta xahita haiyaharenae wihinaeharenae kakoa.

<sup>12</sup>Koxaka wihinaehare Apolo hiye kahareki niraeta, tyoa waiya maheta xiso haiyaharenai wihinaeharenae kakoa. Xakore hoka maisa kalikini tyoa aokowita. Haxowakaite tyoa aokowihena hoka tyoa.

#### **Maika Heko Xityakokone Xema Xisaona**

(1 Coríntios 15.58; Gálatas 6.9-10; Efésios 6.10-18)

<sup>13</sup>Maika xirihare xawenane kakoa, xikinaterere xisaona xityakokone kakoa. Maika ximamairanehare, xikinaterere xisaona. <sup>14</sup>Maika tyoty xihatene xisomehena xiyawaiyera kakoa.

<sup>15</sup>Kala xiyaita Estéfanos, exanityo, ityaninai harenai. Hatyonae hotohare atyo tyakekohatiyenai tyaonaha

Grécia koa nali. Hoka Enore anere hotyalinai kahi-naetyahitaha. <sup>16</sup>Hatyó hiyeta, nohinaeharenai, maika xasemehena Estéfanos niraene, ihinaeharenae hakiterenae ekakoa xoaha niraene.

<sup>17</sup>Estéfanos, Fortunato, Acáico xoaha kaoka nomani hoka aihalahalinikisaha natyo. Hiyaiya, tyomaha atyo ximakane xománe niyahare maheta ximaomanehenerehare. <sup>18</sup>Kalore aihalahalinikisaha natyo, hoka kala aihalahalinikisaha tehitiya xiso naoka. Nikare tyaoniterenai atyo waiye xaixakeretyaka.

<sup>19</sup>Kahare tyakekohatiyenae Ásia koa tyaoniterenae noxakaihetahene xihiyé aokaha. Áquila, Priscila xoaha, exahe ehanako haiyaharenae tyakekohatiyenae ho-hisakoiterenai noxakaihetahene xihiyé aokaha. <sup>20</sup>Tyoty wihinaeharenae ali tyaoniterenae noxakaihetahene xihiyé aokaha.

Maika xikatyawaxakakoahena hoka xasohitanakolisakakoa.

<sup>21</sup>Natyó Paulo naxairatya nokahe kakoa: kasani waiye xisaona naokita.

<sup>22</sup>Maika xala xamani maisa awaiyetyare Xekohaseti hoka hatyo atyoite maisa waiye kaxomokakita.

"Maranata": "Hisohena, Xekohaseti!"

<sup>23</sup>Maika Wiyekohase Jesus Cristo nawaiyexehare tyaona xikakoa. <sup>24</sup>Kasani noxawaiyiri akereta xisaona naokita, Jesus Cristo koamaniya wisaonitere hiyeta.



## 2 Coríntios

**1** Natyo atyo Paulo, Jesus Cristo niraene kakoare Enore xaokalita, naxairatya exe babera haxawalita wihinaehare Timóteo kakoa, wenakalati Corinto nali tyaoniterenae tyakekohatienae ana, exahe tyotya Enore koamaniya tyaoniterenae Grécia naliyerenae xoaha ana. <sup>2</sup> Kasani Wexe Enore, Wiyekohase Jesus Cristo xoaha nawaiyexehare, mehexasikoharene xoaha akereta xisaona naokita.

### Paulo Ithalahare Enore Kakoa

<sup>3</sup> Maika kaihalaharetyaka Wiyekohase Jesus Cristo Nexe kakoa. Hatyo atyo waiyexehare, hatyo Enore atyo tyotya halitinai kahinaetita.

<sup>4</sup> Hatyo atyo kahinaetita wiso tyotya howitiharetereharenai womana hiye, wakahinaetya maheta howitihareterehare hiye maheta. Hoka wakahinaetita atyo haiyaharenai, Enore kahinaehenere wiso akereta.

<sup>5</sup> Hiyaiya, Cristo kaxemakawatikisakehenere akereta atyo wikaxomokaka hoka nikareta tehitiyaite ihiyeta kalore wikakahinaetiyaka. <sup>6</sup> Kirakoane atyo wisaonita, wakahinaetya, waiye maniya wamoheta xiso maheta. Wikakahinaetiyakita atyo hoka xiso tehitiya atyo xikakahinaetiyakita, exahe iyateliti kaxekakita xomana heko xisaona maheta howitihare xikaxomokakitereharenai kakoa wiso akereta.

<sup>7</sup> Hatyo hiyeta wityakekota atyo xiso xawenane kakoa. Hiyaiya, iniyalahare atyo xikaxomokakita wikaxomokakitere akereta, exahe xikakahinaetiyakita Enore kahinaetitere wiso akereta.

<sup>8</sup> Nohinaeharenai, kasani xasema howitihare wawenane tyaohenere Ásia koa naliye waokita. Kalore atyo iniyalahare wikaxomokaka, exahe howitihare. Maisa atyo watyahaharetyoare wikikisoaneheta wikasene kakoa xahita nalita. <sup>9</sup> Kaxaisakehenereharenai akereta wikehexoawi. Nikare atyo wikaxomokaka maisa wisota wityakekoawi maheta xini, xakore hoka Enore wityakeko maheta. Hatyo atyo ekasekihita kaminai.

<sup>10</sup> Hatyo atyo iyeheta wiso, exahe iyehetaite wiso kaheneharenai wikamane nonitata. Hatyo hiyeta exahita atyo watyahita, kasani heko iyeheta mene wiso maheta.

<sup>11</sup> Hoka xiso atyoite xakahinaetya wiso xiraexala kakoa. Nikareya kahare haliti iraexatya womana hoka xiraexala hiyetaiya Enore kahinaetya wiso hoka hatyo hiyetaiya kahare halitinae ithalahare Enore kakoa.

### Paulo Hahekore Haxahékola Moka

<sup>12</sup> Exehare hiyeta atyo wihalahareta: Wiyahékola atyo xakaita wihiye hoka wawenane xikakoa atyo Enore isehenere waiyexe, aliterexe xoaha akereta tyaonita, enawaiyexehare niyaterere akereta, hoka maisa atyo halitinai nawaiyore akereta xini.

<sup>13</sup> Hiyaiya, waxairatya atyo xomana etakehare xakaixaretya hoka waiyekehalakiterehare xomana taita. Hoka kasani tyotya waiyekehalaka xomana naokita.

<sup>14</sup> Koxaka holini waiyekehalaka xomana. Kasani tyotya waiyekehalaka xomana hoka Wiyekohase Jesus haikoahetehenere xowaka xihalahare wikakoa, exahe wiso wihalaharetere xikakoa akereta.

<sup>15</sup> Ehekoreta ene nika hetatita notyooa nowaiyeheta xiso hoka exahexe xikakahinaetiyaka naokita. <sup>16</sup> Hoka noxahekoli hiye ene atyo hoka nojiyehena Macedônia xeta hoka nowaiya naokowita xiso, exahe nohaikohaniheta xoaha kakoa, hoka xakahinaetya natyo noxanini Judéia koa nali xeta maheta ene.

<sup>17</sup> Nikare ala nahekotya hoka xoana namaoseratyare ala notyaona? Xoana nohateni tahi ala nahekotya etakehare maxihatiye haxowakita, “Há”, nitere, exahe “Maiha”, nitere akereta? <sup>18</sup> Enore mamaoseralahare nexare kakoa niraeta, maisa namaoseraita. Niraehenere xihiyé maisa, “Há”, nomita, exahe “Maiha”, nomita haxowakita. <sup>19</sup> Hiyaiya, natyo, Silas, Timóteo xoaha wiyakaita xihiyé Enore Ityani Jesus Cristo tahi, hoka maisa atyo haxowakita, “há”, nere, exahe “maiha”, nere xini. Xakore hoka hatyo atyo Enore “há”, niterehare.

<sup>20</sup> Hiyaiya, hatyo “há”, nitere atyo Enore tyotya xoalini harenai isa aokowihenere. Hatyo hiyeta, “nikare waokita”, wita, Jesus Cristo hiyeta kaihalaharetyaka maheta Enore kakoa. <sup>21</sup> Hiyaiya, Enore atyo awaiyekehalakaita womana wawenane, exahe xawenane xoaha Cristo koamaniya. Hiyaiya, Enoreta atyo haware moka wiso haomanita maheta. <sup>22</sup> Wiyekohase tyare hoka moka wihiye haferoxa, hoka moka Isekohaliti Waiyexe wimahiyase hiye hotikisa maheta womana tyotya xoalinihare haxekane aokitere.

<sup>23</sup> Kasani atyo maisa xamaikohareta maheta maisa wenakalati Corinto nali noxanita. Maisa namaoseraita xini. Nakawijita atyo Enore xakai maheta notahi. Hiyaiya, waiyoreta atyo noxahekoli kakoa. <sup>24</sup> Maisa atyo waiyateretyoita xini xityakeko maheta. Hiyaiya, koxaka atyo xikinaterere xisaonita xityakekone kakoa.

Xakore hoka wakahinaetita atyo xiso xihalahare xisaona maheta.

**2** Nahekotya hoka maisa notyoa nowaiyeheta xiso hoka nexamaikohalinikisa xiso naokowihitita.

<sup>2</sup> Hiyaiya, nexamaikohalinikijita taitaiya xiso hoka xalaiya aihalahalinihena natyo? Xiso nexamaikohalinikijiterenai taitaiya atyo xihalahalinihena natyo.

<sup>3</sup> Hatyo hiyeta naxairatya etake babera, kasani maisa notyoa hoka nokaxexamaikohalinikisaki naokare etakehare halitinai noxihalahalinihena mahetarenai hiyeta. Hiyaiya, aliterexe ala naokita. Nihalaharehena ala hoka xiso tehitiya xihalahareta naoka.

<sup>4</sup> Hatyo babera naxairatya kalore nomawaiyehalini, noxamaikohalini kakoa, nosehihare xoaha kakoa.

Hiyaiya, maisa nexamaikohalinikisa maheta xini xiso naxairatya xomana. Xityoty nawaiyetita, kasani hatyohare kakoa xawaiyore naokita hoka.

### Kamaotyanyakeheta Iniyalahare Hoka Kakehexaharetyoakeheta Maheta

<sup>5</sup> Hoka hatyaiya examaikohalinikisa hatya haliti hoka maisa atyo natyo xini nikare mokita, xakore hoka xiso atyo, exahe maisa xityoty xini hoka haiyanai ana. Exakere atyo naxairatya hoka maisa atyo nawatoharitata xini xiso. <sup>6</sup> Xakore hoka maika xityakekohena koxaka tyotyaha iniyalahare mohenaherene. <sup>7</sup> Hoka maika kalikini xawaiyehetehene hoka xihalahalinihete-hene hoka maisa kalore amaikohare hoka ahekokoaita maheta. <sup>8</sup> Hoka hatyo hiyeta niraeta xikakoa hoka maika waiye xamokene hoka xahotikisa enomana xiyawaiyere.

<sup>9</sup> Hatyo hiyeta tehitiya etake babera naxairatya. Nahasakaharetya xiso maheta hoka nawaiyore maheta, xoana ximemere xamani ala xisaonita niraini xasemaxematya maheta.

<sup>10</sup> Hatya nómane iniyalahare atyo ximaotyanehetehena hoka natyo tehitiya atyo nomaotyanihititene. Aliterexeya iniyalahare tyomita hoka nomaotyaniheteneya. Hoka xihiyeta atyo nikare notyaonita hoka hatyoharenai atyo notyomita Cristo haotita. <sup>11</sup> Nomaotyanihititene atyo, maisa Ahalakoahaliti jiyahaotyato wiso naokare hoka. Hiyaiya, exahekola atyo waiyehalalita womana.

### Paulo Mawaiyeharene Trôade Nali

<sup>12</sup> Nokaokihenere wenakalati Trôade nali xowaka noxakai Waiyexe Iraitu Cristo tahi hoka nowaiya Xeko-haseti memere hateniti mohenere nomani hatyo wenakalati nali. <sup>13</sup> Xakore hoka kalore nomawaiyehareta, maisa wihinaehare Tito nowaiyita nali hoka. Hatyo hiyeta nojinahenahitene hoka noxani Macedônia koa nali.

### Jiyahaotyati Cristo Hiyeta

<sup>14</sup> Xakore hoka nihalahareta atyo Enore kakoa. Hiyaiya, hahotyalita wisaonitere Enore Kalorexe Aohenere kakoa hiyeta atyo Enore nolokita wiso exo-

latyaharenae akereta, Enore Kalorexe Aohenere jiyahao akahenere xanetere xema. Airaxero nexexaoretere hakakoare akereta atyo Enore mokita wiso, hoka Enore Kalorexe Aohenere tahi tyoty halitinai sema maheta. <sup>15</sup> Hiyaiya, wiso atyo etakehare incenso nexexaoretere Enore Kalorexe Aohenere ijitere Enore ana akerexe, hoka xaoretere waiyexe maniya tyaohtitereharenai koni, exahe iniyalahare maniya tyaohtiterenai koni xoaha akereta. <sup>16</sup> Hoka iniyalahare maniya tyaohtiterenai ana atyo exeti katawanexe wikaexeta, hoka waiyexe maniya tyaohtiterenai ana atyo airaxero waiyexe nexexe wenati ijiterehate wikaexeta. Hatyo hiyeta xalaiya waiyorexe hoka exehare hateniti tyomehena? <sup>17</sup> Hiyaiya, wiso atyo maisa haiyaharenai Enore niraene xakaihenaha hoka motya etakehare xiyehaliti betetiterehate akereta xini wisaonita. Xakore hoka Enore atyo axikatya wiso hoka hatyo hiyeta aliterexe wiraeta enahalakoita, Enore Kalorexe Aohenere ana wahakitere hiyeta.

### Waitare Wenati Aho

**3** Exakere ala wiraehena hoka xoana wisotala waexakeretyoita? Xoana, haiyaharenai tyaohtitere akereta ala babera witahi kakoare waokita hoka wahotikisa xomana waokowita, exahe xoana xiyairala kakoare xamani ala waokita? <sup>2</sup> Xisonai terota atyo wibaberanexa xairatyoare tyaohtitere wimahiyase akonai, tyotyaha waiyahene exahe kaexaretyahene maheta. <sup>3</sup> Enore Kalorexe Aohenere terota atyo exe babera xairatya hoka axikatene wiyema. Maisa atyo kaneta kakoa xairatyakere xini, maisa sehali taose hiye hekoti xairatyakere xini. Xakore hoka xairatene atyo halitinae mahiyase hiye Enore Nisekohare kakoa.

<sup>4</sup> Exakere atyo wiraeta. Enore Kalorexe Aohenere hiyeta wityakekoto Enore hoka. <sup>5</sup> Maisa atyo xoarehare kahinaetyare wiso hoka maisaiya aliyakere wawaiyorene tahi wiraehena hoka wisoia atyo hoka exe hateniti wisoma waokowita. Hiyaiya, wawaiyorene atyo Enore nalita tyoita. <sup>6</sup> Hatyo atyo waiyolinitu ijita womana hoka wahakita waitare wenatyaho kakoa. Maisa atyo xaotyakiyaho exairatyakahare akereta xini, xakore hoka Enore Nisekohare atyo. Xaotyakiyaho exairatyakahare atyo axaisakijita haliti, xakore hoka Enore Nisekohare atyo ijita wenati waiyexe matyotenehare.

<sup>7</sup> Moisés Xaotyakiraho atyo kaxairatyaka xairatise kakoa sehali taose hiye. Hatyaoseta Israel yerenai ana kaxekakehena hoka Enore xaokanala kaotyaka hoka Moisés tiho weroka. Hoka Moisés tiho werokene xakore maiyarehetehena hoka hekota kalore werokita hoka maisa aliyakere Israel hotyalinai wahakotyare enomana. Hiyaiya, Xaotyakiyaho axaisakijitere tyare atyo kaotyakehenere xowaka kalore aokanatyaha hoka <sup>8</sup> xahekohenaore, Enore Nisekohare hatene hiyeta exaehare xaokanatyakalati kaotyakehenerehare naheta maniya. <sup>9</sup> Hateniti halitinai axaisakihenere atyo kalore aokanatyaha. Hoka exaehare atyoite aokanahena hateniti halitinai iniyalahare maomanehare aohititere-

hare. <sup>10</sup> Hiyaiya, hetati kalore aokanaitere atyo maisa hakakoa aokanahetere kalikini xaokanatyakalati exahere aokanaitere kakoa. <sup>11</sup> Hiyaiya, kaloreya aokanatyaita inita tyaona hoka tyotehenere hoka exahere atyoite aokanahena matyotenehare maheta tyaoniterehare.

<sup>12</sup> Hatyohare watyahitere hiyeta atyo kalore wimamairanehare wisaonita. <sup>13</sup> Maisa atyo Moisés tyaonitere akereta xini wisaonita. Hiyaiya, talatihotyao atyo imiti taose walawalere kakoa, kasani Israel hotyalinai maisa waiyaha maheta itiho werokene tyoteneheta. <sup>14</sup> Aliterexe atyo Israel hotyalinae maisa waiyore ahekotyareha. Hoka kalikini kijiyehena kaexarehenaha Iraitu Toahiyere nanenai hoka exahekolanaiha motya hekota talatyoare tyaonita hatyo inimitira taose walawalereye kakoita. Hoka hatyo imiti taose walawalereya atyo kaiyakeheta, haliti Enore Kalorexe Aohenere koamaniya tyaona hoka. <sup>15</sup> Hoka kalikini kijiyehena kaexarehenaha Moisés Xaotyakiraho hoka imiti taose walawalere talatita exahekolaha. <sup>16</sup> Xakore hoka kaiyakehetaiya atyo Iraitu Waiyexe nenere akereta:

“Moisés talatihotyookala taose atyo kaiyakeheta, Xekohaseti xema tyaoheta hoka”, nitere akereta.

<sup>17</sup> Iraitu “Xekohaseti” nitere atyo Enore Nisekohare xaokaka nikare iraeta. Hoka aliye xamani atyo Enore Nisekohare tyaonita hoka nali atyo mehaxikohaliti tyaonita. <sup>18</sup> Hatyo hiyeta wityotyta witiho matalatyakahare tyaoheta hoka tihoti waiyakakala xaokanala akereta Xekohaseti xaokanala werokita wihyie. Hatyo witiho awerokaitere atyo Xekohaseti nalitare, hatyo Xekohaseti atyo Isekohaliti Waiyexe. Hatyo atyo Xekohaseti akerehare mokita wiso hoka hatyo hiyeta wiberokene exaheharehena aerorityoita.

#### Xiyehaliti Waiyexe Kakoare Atyo Wiso

<sup>4</sup> Nikare wisaonita hoka maisa wamaikoharexe. Enore atyo airakoanaharetya wiso hoka isa womana exe hateniti. <sup>2</sup> Maisa atyo wawaiyetyare etakehare metereta kaomakiterehare, exahe etakehare kahaharetyakere xoaha. Maisa atyo wamaoseratita xini haliti, maisa Enore niraene wehawareharetyare. Xakore hoka aliterexe aokitere akereta atyo wisaonita, hoka ihiyeta halitinae tyakekoahitaha wiso Enore nahalakoi-ta.

<sup>3</sup> Hoka Iraitu Waiyexe wiyakaitereya atyo metahareta hoka metahareta atyo iniyalahare maniya tyaoniterenai ana taita. <sup>4</sup> Hatyonae atyo maisa tyakekoreha. Enore metalahare ali waikohekoa tyaonitere atyo exahekolanaiha moka makaliroti koni hoka. Maisa atyo halakisahene hoka waiyareha xaokanatyakalati ehaha werokitere, xaokanatyakalati tyoiterehare Iraitu Waiyexe hiyeta, Enore Kalorexe Aohenere werokene tahi. Hatyo atyo aliterexe Enore hárero akerehare.

<sup>5</sup> Hiyaiya, maisa atyo witahi xini wiyakaita. Wiyakaita atyo Jesus Cristo Xekohaseti tahi. Hoka wiso atyo xiwakanehare akereta wisaonita Jesus hiyeta. <sup>6</sup> Hoka Enore atyo nexa: “Makaliroti konitaita aokanaty

xaokanatyakalati”, nexa, hoka hatyota atyo xaokanatyakalati axaokanatyakisa wimahiyase ako. Nikare atyo moka wiso hoka wawaiyore maheta xaokanatyakalati werokitere Enore hiyexe kakoa maheta. Hatyo atyo werokita Enore Kalorexe Aohenere tiho hiye.

<sup>7</sup> Hiyaiya, xalini hare waiyexe kakoare atyo wiso. Xakore hoka wiso atyo waikohe kamalohero nomaka tinihaliti akereta wisaonita, wahotikisa maheta Enore niyaterere kalorexe. Hatyohare atyo maisa wiyaterere xini.

#### Enawenaneha Howitihare Tyaonita (Atos 21.27-36; 22.22; 23.12-15; 2 Coríntios 11.22-33)

<sup>8</sup> Kahaliki howitihare tyaonita wawenane, xakore hoka maisa atyo wikajiyahaotyakere. Haiya xowaka maisa waiyekehalakere womana, xakore hoka maisa atyo masakare wimawaiyeharexe. <sup>9</sup> Kahare atyo wahalakoaharenai, xakore hoka maisa atyo wimahinaeharehare wisaonare. Haiya xowaka kawewikaxomokakita, xakore hoka maisa atyo mawenekoaretyareha wiso.

<sup>10</sup> Wakolata minita atyo wiháre wainiterehare hiye Jesus kamane, hoka kawaiyaka tehitiya maheta enawenane wiháre hiyeta maheta. <sup>11</sup> Wikasetatere xowaka kaheneharexe wiyaisaka kakoa wisaonita Jesus xema wisaonitere hiyeta, hoka kawaiyaka maheta enawenane wiháre wainiterehare hiye. <sup>12</sup> Hoka hatyohare wiyakaitere hiyeta atyo wiyaisaka konita wisaonita, xakore hoka hatyohare atyo wenati matyotenehare maniya axomokanikiheta xiso.

<sup>13</sup> Exakere atyo Iraitu Waiyexe nexa: “Notyakeko atyo, hoka hatyo hiyeta noxakaitene”, nexa.

Hiyaiya, nikareta tehitiya wiso, hatyo tyakekohenahere akereta wityakeko hoka wiraeta wityakekone hiyeta. <sup>14</sup> Hiyaiya, Enore atyo ekasekiheta Xekohaseti Jesus. Hatyohare atyo waiyekehalakita womana. Hoka nikareta tehitiyaite ekasekiheta wiso ekakoa, hoka xikakoaite hahotyalya kolatya wiso enahalakoa. <sup>15</sup> Tyotyta atyo hatyoharenai kaotyaka waiyexisaona maheta. Nikarexe hiyeta Enore nawaiyexehare xema kaharehena halitinai tyaonita, hoka hatyonaite hamaxaloneha hiyeta iraexatyaha enomana, Enore kakoa kaihalaharetyaka maheta.

#### Wityakekone Xemaite Wisaohena

<sup>16</sup> Hatyo hiyeta, maisa wamaikoharexe. Exahe xakore atyoite wiháre tyotehena hoka wisekohare atyoite tyotyaki ferakene ewaitaretyoahitita. <sup>17</sup> Exe inirere exahe jiyiterehare wiyamaikoharene wikihixiterehare atyoite ekaokakisa womana kalorexe, waiyexe wenati, howitihare wikaxomokakitere xahehare. <sup>18</sup> Hiyaiya, maisa atyo wahokotyare xalini hare kawaiyakiterehare tahi, xakore hoka wahekoita atyo mawaiyakaharenae tahi. Hiyaiya, kawaiyakiterehare atyo maisa waha tyaonare, xakore hoka mawaiyakahare atyo tyoota minita.

<sup>5</sup> Hiyaiya, exe hati taose ako wisaonitere ite kahatakaka. (Wimili xaokaka nikareta “Hati taose”, nita.) Hatyohare atyo waiyekehalakita womana, haty-

ohare atyo exe wiháre ali waikohekoa tyaoniterehare, hoka Enore ite isa womana hati enokoa nali wisaona maheta. Hatyota atyo tyoma hatyo hati, hoka hatyo atyo matyotenehare. <sup>2</sup> Kasani wiyane wawenakala enokoa wisaona waokowitere tahi atyo kalore wahokoita hoka haiya xowaka wiwaolitita. Hiyaiya, hatyo atyoite wiháre enokoare, <sup>3</sup> hoka wisoahenaite enako hoka maisaiya atyo wimaimahiro wikawaiyakihitita. <sup>4</sup> Exe hati taose ako wisaonitere xowaka atyo wiwaolitita wamaikohareta. (Wiháre xaokaka "hati taose", nita). Maisa atyo wimaxaokalita xini waikohekoare wiháre jinakala. Kasani atyo wikaxaisoakisaka waokita wiháre enokoare kakoa, hoka wenati emaiyareheta maheta kawainisakiterehare. <sup>5</sup> Hoka Enore atyo memere moka wiso hatyo wiyehawareharyaka niyahare, hoka isa womana Haisekohare, wityakeko maheta tyotyxa xalinihare isehenerehare womana.

<sup>6</sup> Hatyo hiyeta kalore wihalahareta. Hiyaiya, ali exe wimilako wisaonitere xowaka atyo seko wisaonita wawenakala Xekohaseti naliye nonitata. Hatyohare atyo waiyekehalakita womana. <sup>7</sup> Hiyaiya, wityakekone hiyeta atyo wisaonita. Hoka maisa atyo wiyaiterehare xema xini. <sup>8</sup> Kalore atyo wihalahareta. Kasani wahalakisa exe wiháre hoka wiyane Xekohaseti nali wisaona waokowita. <sup>9</sup> Xakore hoka kasani atyo exahe xoana ali waikohekoa xamani wisaonita, exahe xoana enokoa xamani wisaonita hoka Xekohaseti atyo wihalahalalikisa waokowita. <sup>10</sup> Hiyaiya, haxowakaite Cristo ana wityotyxa wahotikisoa, sema maheta waikohekoa wisaonitere xowakiyere wawenane tahi. Hoka xoana waiyexe xamani, exahe xoana iniyalahare xamanite wisomita hoka hatyo wisomehenere akeretaite mohena wiso.

### Kakahinaeharetyaka Enore Kakoa Enore Kalorexe Aohenere Hiyeta

<sup>11</sup> Xekohaseti mairaka akiti waiyekehalakita womana. Hatyo hiyeta iraiti aliterexe wiyakaita halitinai hiye. Enore atyo waiyoreta tyotyxa wiyahékola kakoa, hoka kasani xiso tehitiya xawaiyore wawenane akiti kakoa naokita. <sup>12</sup> Maisa atyo witahi xini haki wiyakaihitiya waokowita xihiyeye. Xakore hoka kasani atyo xasema hoka xihalahare wikakoa waokita, exahe xekoaxatya maheta etakehare maisa háomane kakoa xini ihalahareta hoka haxomokaharetyoane kakoa ihalahareterehare ana.

<sup>13</sup> Hiyaiya, wihatyaharetaiya atyo hoka Enore atyo wakahinaetita. Exahe waiyeya atyo wahekoita hoka wakahinaetita atyo xiso. <sup>14</sup> Hiyaiya, Cristo xawaiyera wiso xema atyo wisaonita. Hiyaiya, waiyekehalaka atyo womana haterore haliti wainihenere tyotyxa halitinai ana. Hatyo hiyeta wainihenere tyotyxa halitinai ana akereeta atyo tyotyaha wainiha. <sup>15</sup> Hatyo atyo waini tyotyxa halitinai ana hoka kasetaterenai maisa haomanitaha tyaoehenahitaha maheta, xakore hoka etake wainihenere, exahe kasehetehenere enomanaha hoka waiye maniya mohenahitehenerene xema tyaonaha maheta.

<sup>16</sup> Hatyo hiyeta maisaiya atyo exaoseta xalahare nawenane tahi wiraehitita. Exahe hetatitaiya Enore Kalorexe Aohenere tahi nikare wiraeta hoka maisaiya atyo kalikini nikare wisaohitita. <sup>17</sup> Hatya haliti atyo Enore Kalorexe Aohenere koamaniya tyaohetehena hoka waitare haliti atyo. Enawenane toahiyere atyo tyotyxa, hoka waitare atyo tyaoheheta enawenane. <sup>18</sup> Tyotyxa hatyoharenae atyo Enore nómane. Enahalakoa-harenae ene wisaonita hoka Enore Kalorexe Aohenere hiyeta hahinaeharenai aoheta wiso. Exahe isa womana wihatene hoka kasani haiyanai tehitiya Enore Kalorexe Aohenere hiyeta Enore hinaeharenai wamoheta aokita. <sup>19</sup> Wiraetere iraiti atyo exe: Enore atyo maisa otya aokowita halitinai nómanenai iniyalahare, hoka Enore Kalorexe Aohenere hiyeta atyo tyotyxa halitinai hahinaeharenai aohitita. Hoka Enore atyo axikatya wiso wiyakai maheta iraiti halitinai hahinaeharenai aohititere tahi.

### Waiyexe Maniya Nawenatyakeheta

(Atos 4.11-12; Romanos 4.6-8; 1 Coríntios 15.2-4; Efésios 1.7)

<sup>20</sup> Hatyo hiyeta ali wisaonita hoka wiraeta Enore Kalorexe Aohenere nexare kakoa, hoka motya akere Enoreta ene wikoamaniyata iraeta: Enore Kalorexe Aohenere nexare kakoa wiraehena. Xaohena hoka Enore hahalakoaharenaita moheta xiso hahinaeharenai maheta, nita ene. <sup>21</sup> Enore Kalorexe Aohenere atyo maisa iniyalahare kakoare ene xini. Xakore hoka Enore atyo moka iniyalahare wománenai eheno, hoka wisao-henere exema hiyeta, Enore aokitere akereta, wenati waiyexe kakoare wisaona maheta.

**6** Hatyo hiyeta wiso wakahinaetiterenai Enore ehatene hiye exakere wiraeta xikakoa: Awa atyo xahalakihena waiyexe Enore koxaka isehenere xomana.

<sup>2</sup> Xasemehena Enore nehenerere:

Xikahinaetyaka xaohenere xowaka nasema xikawira hoka niyeheta xiso iniyalahare nonitata. Xasemehena: kalini atyo Enore kahinaera xiso xowaka, kalini atyo waiyexe maniya xiyomokakeheta ferakene.

<sup>3</sup> Kasani haiyaharenai maisa waiyaha mawaiyexe wihatene hiye waokare, hatyo hiyeta maisa xalahare nawenane wahowitiharetya waokowiye. <sup>4</sup> Xakore hoka tyotyxa wisomitereharenai hiye atyo wahotikisoawita hoka wiso atyo Enore wakaneharenai, hoka wimehexaikohare wisaonita wiyamaikoharene kakoa, wimaxiyehareharene kakoa, exahe howitihareterehare wawenane kakoa. <sup>5</sup> Koxaka wikamokonasetyaka, wikaberexotyakita, exahe maisa waiye xini wikaxomokakita halitinai xahohisakoatyane heko. Kalore wahakita, haiya xowaka maisa wisemakare, exahe maisa wikanakairare hekoti. <sup>6</sup> Waiye wisaonitere, wawaiyorene, wimehexaikoharene, exahe wahakitere xoaha hiyeta atyo wahotikisoawita hoka wiso atyo Enore wakaneharenai. Hatyoharenai atyo wahotikisa halitinai ana Isekohaliti Waiyexe hiyeta, wiyawaiyera aliterexe hiyeta, <sup>7</sup> iraiti aliterexe hiyeta, exahe Enore niyatere xoaha hiyeta. Enore nawaiyexehare kakoare atyo wiso.

Hatyo atyo wokolanase akereta, aisakatya maheta, exahe kahawaonitaretya xoaha wiso maheta.

<sup>8</sup> Haiya xowaka wikaxaiminisakita, exahe wimaxaiminisakita xoaha. Wikairaeharetyakita, xakore hoka haiya xowaka wikaxaexakeretyakita atyo. Maoser- atyalienai atyo aokahitaha wiso xakore hoka aliterexe atyo wiraeta. <sup>9</sup> Hamawaiyanenehareha atyo aokahitaha wiso, xakore hoka ewaiyanehareha atyo wiso. Ekamane akere ene wisaonita, xakore hoka kalikini atyo xiyaita wiso, wikaseta atyo. Haiya xowaka iniyalahare wikaxomokakita, xakore hoka maisa atyo wikaxaisakere. <sup>10</sup> Haiya xowaka wikaxexamaikohalinikisakita, xakore hoka hekota atyo wihalahareta. Motya akere wimaxiyeharehare wisaonita, xakore hoka kahare halitinai wakaxiyeharetita. Motya akere maisa xoarehare aka ene winali, xakore hoka aliterexe atyo tyoty xoalini harenae kakoare wiso.

<sup>11</sup> Nohinaeharenai Corinto nali tyaoniterenae, wiyakai atyo xihiyeye tyoty wahekoitereharenai, exahe wahekotita atyo xitahi. <sup>12</sup> Maisa atyo wimaxahekolere xitahi. Hoka xiso atyo maisa xahekotyare witahi. <sup>13</sup> Nityaninai kakoa niraetere akereta atyo niraehena xikakoa. Xahotikihena xiyahékola womana, wiso wahekoitere xitahi akereta hoka xahekotyare witahi.

#### Paulo Xaotyakira Tyakekohatiyena, Matyakekohatiyena Tah

<sup>14</sup> Awa atyo xahohisakoatyakakoa matyakekoneharenae kakoa xahaka maheta haxawalita. Aliyakereya ehokorexe, exahe ehaikoarexe xoaha haxawalita tyoahena? Aliyakereya xaokanatyakalati, exahe makaliroti xoaha haxawalita tyoahena? <sup>15</sup> Aliyakereya Cristo, exahe Tihanare xoaha hakakoa ahekohenaha? Hoka aliyakereya tyakekohatiye hakakoa ahekotyare matyakekonehare kakoa? <sup>16</sup> Hoka aliyakereya Enore hana akerehare tyoahena enore metalahare hana? Hiyaiya, wiso atyo Enore makamanehare hana. Hoka Enoreta atyo koxaka nexa:

“Noxanite notyaona tyakekohatiyena koni. Enorenexahaite notyaona, hoka hatyoahaite nomaniye hotyalinae tyoahena”, nexa.

<sup>17</sup> Exahe Xekohaseti nehitiya:

“Maika xahalakihenahene exahe xakikisoahena enonitaha. Awa atyo xisaonehena iniyalahare xema, hoka naoka xiso nomani.

<sup>18</sup> Xexe atyo ite notyaona, exahe xisonai atyoite nityaninae xisaona”, nexa Xekohaseti tyoty iyateliti kakoare.

**7** Nohinaehare noxiyakawaliharenai, tyoty exe iraitinai atyo womanere. Hatyo hiyeta nika watiharetyoaheta tyoty iniyalahare maniya axomokanikijiterhare wihare exahe wisekohare xoaha nonitata, hoka wiyoma haliya wisaoheta, exahe wimairehena Enore.

#### Paulo Nihalaharene

<sup>2</sup> Xahekohena witahi. Hiyaiya, maisa atyo xalahare wakomaniyaita, maisa atyo xalahare nawenane waiyalaharetita, exahe maisa atyo xalahare noloxa wametakisare. <sup>3</sup> Exakere niraeta hoka maisa atyo ximahakaiserene xini naokita. Hiyaiya, enahitita atyo nira xihiyeye, wawaiyetita atyo xiso hoka haxawalita atyo wisaota minita, wikasetatere xowaka niyahare, exahe wikamane xoaha niyahare. <sup>4</sup> Notyakekota atyo xiso, naokowiharetyoita atyo xikakoa. Haiya xowaka xakore howitihare wawenane tyaonita hoka hekota nomaxaloni, nihalahalini xoaha kakoa notyaonita.

<sup>5</sup> Wiyane wikaokehenerere Macedônia koa nali hekota maisa wikawiniye hekoti. Tyotyakitina wiyanehenerere nali howitihare womana, xalijinikakoati, exahe wimairane harenai kaotyaka womana. <sup>6</sup> Xakore hoka Enore, aihalahalinijitere amaikoharetereharenai atyo aihalahaliniheta wiso Tito kaokene kakoa. <sup>7</sup> Exahe maisa ekaokene xoaha kakoa taita xini wihalahare, xakore hoka xaihalahalinihenerene tahi kakoa tehitia wihalahare. Xakai xakakawaitere natyo tahi, hoka xamaikohareta aoka, exahe ximemere xisaonita xikahawaonitarera natyo kakoa aoka. Hatyo hiyeta kalikini atyo exahehare nihalahareta.

<sup>8</sup> Maisa atyo nokehexaharetyoahitita hatyo babera naxikahenerere hiyeta, examaikohalinikisa xakore atyo xiso hoka. Nasema hatyo babera ininai examaikohalinikihenerere xiso hoka nokehexaharetyoahetehena ene atyo. <sup>9</sup> Xakore hoka kalikini atyo nihalahareta. Maisa atyo nobaberanixi hiyeta xamaikoharehenerere hiyeta xini, xakore hoka hatyo xiyamaikoharene hiyeta xikehexaharetyoahetehenerere hiyeta atyo. Hatyo xiyamaikoharene atyo Enore nalitare. Hiyeta hoka maisa xala hare hekoti wamolaita. <sup>10</sup> Hiyaiya, xamaikohaliti Enore nalitare atyo ekaotyakatita kehexaharetyoahiteta hoka waiyexe maniya axomokanikihitita wiso, hoka hatyohare hiyetai ya maisa xoare maheta wamaikohareta. Xakore hoka ali waikohekoare xamaikohaliti atyo ekaotyakatita kamati.

<sup>11</sup> Xiyaiyehenaore xiyamaikoharene hiyeta Enore mohetehenerere xiso: haliti waiyexenai atyo moheta xiso, hoka kasani xahasaka rotita xawaiye nawenane xaokowi. Kalore atyo xehare! Kalore atyo ximaira. Xakakawatya natyo, exahe waiye xikaxaikoawi, kasani haxerore xemaisatya xaokowi iniyalahare. Tyoty hatyoharenai hiyeta xahotikisa xawaiye nawenanene.

<sup>12</sup> Hatyo hiyeta, etake babera xakore atyo naxairatya hoka maisa atyo hatya iniyalahare tyomehenerere hiyeta xini, exahe maisa hatya iniyalahare kaxomokakitere hiyeta xini. Xakore hoka nikare atyo naxairatya, Enore waiye awaiyekehalakatya maheta xomana kalore waiye xamokiterehare wiso tahi. <sup>13</sup> Hatyo hiyeta atyo wihalahare wisaonita.

Exe wihalaharene xahexe atyo wihalahare Tito nihalaharene kakoa. Hiyaiya, xityoty atyo xakahinaetene. <sup>14</sup> Waiye atyo nira xitahi ihiyeye hoka xiso atyo maisa xehaihalikijita natyo. Hiyaiya, aliterexe taita atyo

wiyakaita xihiyi. Nikareta tehitiya aliterexe waexakeritya xiso Tito hiye. <sup>15</sup> Hoka exawaiyera atyo kekoaretata otyaxemahetehena xityakekone, exahe waiye xamohenerene xiyaiminirene, xawaiyexeharene xoaha kakoa hoka.

<sup>16</sup> Hatyo hiyeta kalore atyo nihalahareta. Notyakekota kaiserehare atyo xiso hoka.

### Xisá Xihalaharene Kakoa

**8** Nohinaeharenai, kasani xasema Enore nawaiyexehare hiyeta tyakekohatiyenai Macedônia koaiyerenai tyomehenere tahi waokita. <sup>2</sup> Wihinaeharenai nali tyaoniterenai kahasakaharetyakaha howitiharexe kakoa. Xakore hoka kalore atyo ihalaharetaha, hoka maoloxahareha xakore hoka isaha olo haxahohisakoalaha niyahare kalore haihalahareneha kakoa. <sup>3</sup> Aliterexe naokita xihiyi, háomanaha xahexe tyomaha, exahe kajijanexe. Exahe haxaokalitaha <sup>4</sup> axaha wiso hoka kasani wahalakisahene hoka kahinaetyaha aokowiha Judéia koa nali Enore koamaniya tyaoniterenai, hoka tihityoaha wihiyi. <sup>5</sup> Hoka wahekoitere xahexe atyo tyomaha. Hetati Xekohaseti koamaniya hawenane mokaha, hatyo najikinita Enore xaokalita wiyaoityakira xema tehitiya tyaonaha.

<sup>6</sup> Hatyo hiyeta wirae Tito kakoa, hatyo tyare atyo tyoma hatyo hateniti hetati hoka kasani tyomehitiya, exahe kahinaehitiya xiso hoka hatyo hateniti waiyexe xiyawaiyera kakoita xisomitere xamematya waokita. <sup>7</sup> Tyotyaloalinihare hiye atyo haiyanai xahexe xahotikijita xawenane: xityakekone hiye, xiraene hiye, xawaiyorene hiye, xiyaookalita haiyanai xakahinaetya xaokowitere hiye, exahe xawaiyetitere wiso xoaha hiye. Kasani kalikini memere xamohena olo waokita haiyaharenai mokitere olo xahexe kaxaxikatya maoloxaharenai ana maheta.

<sup>8</sup> Maisa atyo nawakatya xini xiso naokowita. Kasani atyo haiyaharenai nihalaharene taita waiyekehalaka xomana naokita, hoka waiyaha maheta, xoana aliterexe xamani xiyawaiyera aliterexe hoka.

<sup>9</sup> Hiyaiya, koxaka atyo xasema Wiyekohase Jesus Cristo kalore awaiyetitere wiso: Kaoloxere, kaxiyeharexe ene atyo, xakore hoka maxiyeharehare akereta tyaoheta xihiyeta, hoka xikaxiyeharexe xisaona maheta kalore emaxiyehareharene hiyeta.

<sup>10</sup> Exe atyo hatyo tahi noxahekoli: Kafaka maniya terehokoane xisomehenere kasani xisoma xamematya naowita. Hetati xowaka xiso hotohare xakahinaetya maoloxaharenae. Maisa hatyo taita xini, xiso hotohare xakahinaetyahene xaokowi. <sup>11</sup> Hatyo hiyeta hekota xisomehena, xamemahena hatyohare hateniti. Xisomehenaira hatyoharenai hetati xihalaharetere akereta. Maika xisa xikaoloxitere hakakoaneta. <sup>12</sup> Hiyaiya, xala xamaniya atyo isa aokowita hoka Enoreya aoka exekane kaoloxitere hakakoaneta. Enore atyo maisa axare hatya emaoloxene nali. <sup>13</sup> Maisa atyo haiyanai nawenane waiye tyaona xikahinaerahene hiyeta hoka howitihare xini xawenane namoka naokowita. <sup>14</sup> Hoka kalikini tyare atyo kalore xikaoloxita hoka ehokoretaiya

atyo xakahinaetya maoloxaharenai. Hoka haxowaka ximaoloxaharehena hoka hatyoaha kaoloxerehenaha kalore hoka hatyaosetaite kahinaehenahita xiso. Nikare ite hoka hakakoa xakahinaetyakakoa.

<sup>15</sup> Hiyaiya, Iraiti Waiyexe atyo nexa:

“Hatya kalore imexehenere ana atyo maisa xoare kamawaneta. Hoka hatya inira imexehenere atyo maisa nakita”, nexa.

### Tito Exahe Ihinaeharenai

<sup>16</sup> Kalore nihalahareta Enore kakoa Tito axahokotyankisa hoka kahinaetya aokowitere xiso hiyeta, wiso wakahinaetya waokowitere xiso akereta. <sup>17</sup> Wirae ekakoa hoka aoka. Hoka exahexe kasani kahinaetya aokowita xiso hoka haihalaharene kakoa tyoheta xinali.

<sup>18</sup> Hoka exema waxikahena hatya wihinaehare. Hakakoare tyakekohatiyenai waiye aiminisahitene Waiyexe Iraiti xakaitere hiyeta. <sup>19</sup> Exahe exe wihinaehare atyo tyakekohatiyenai xaokalita, xaxikala ximita tyoita wiyema. Exaokalalitaha atyo tyoa kahinaetya maheta wiso hateniti wiyawaiyera kakoita wisomitere hiye, kihalaharetyaka maheta Xekohaseti kakoa, exahe wahotikisa maheta aliterexe wakahinaetya waokowitereharenai. <sup>20</sup> Exakere wisaonita, kasani maisa haiyaharenai iraharetyaha wiso waokare exe kalore olo wamokitere hiyeta hoka. <sup>21</sup> Wiyahékola hiye atyo hoka kasani ehokorexe taita wisoma waokowita, maisa Xekohaseti nahalakoa taita xini hoka halitinai nahalakoa tehitiya.

<sup>22</sup> Exemaha waxikahena hatya wihinaehare. Kahaliki wahasakaharetene hoka wiyaiya memere enawenane ekahinaera niyahare. Hoka kalikini tyare atyo kalore tyakekota xiso hoka exahehare tyoa kahinaetya aokowita xiso haxaokala ximita.

<sup>23</sup> Hoka Tito tahi atyo niraehena hoka nohinaehare terota atyo, exahe hakita nokakoi kahinaetya maheta xiso. Hoka exe wihinaeharenai tyohenerenai exema atyo tyakekohatiyenai xaxikala, exahe waiye aiminisahitaha Cristo. <sup>24</sup> Hatyo hiyeta haiyakoanai tyakekohatiyenai semane maheta xahotikihena exe wihinaeharenai ana xiyawaiyerahene, exahe, “Aliterexe Paulo iraitere akereta Corinto yerenai tyaonita”, nexaha maheta.

### Olo Xahohisakoatyaka Judéia Koa Yerenai Tyakekohatiyenai Ana

**9** Etake olo xaxikahenere Judéia koa yerenai ana tahiya atyo maisa xoare naxairahitita xomana. <sup>2</sup> Waiyekehalakita atyo nomani xakahinaetyahene xaokowitere tahi akiti, hoka hatyo hiyeta naexakeretya xiso wihinaehare Macedônia yerenai hiye. Noxakai xiso wihinaeharenai Grécia nali tyaoniterenai memere xisaonitere xikahinaerahene kakoa hetatiye jiyehenere terehokoane tahi. Hoka tyotyaha ihalahareha xiyaookalita xakahinaetya maoloxaharenai xaokowitere tahi kakoa.

<sup>3</sup> Hoka kalikini naxikahena exe wihinaeharenai hoka naexakerehenere xiso hatyo tahi akiti kakoa maisa xoare makaotyakeneta maheta. Hoka maika niraetere akereta ximemere xisaona xikahinaerahene kakoa.

<sup>4</sup> Hiyaiya, Macedônia yerenaiya tyoaha noximi hoka maisa ximemere xisaonare hoka wihaihareya, exahe tehitiyaiya hoka xihaihare. Maisa xihaiharene tahi wiraeta maheta, wityakekotere xiso hiyeta nahekoty.

<sup>5</sup> Hatyo hiyeta waiye xaxikatyakala wihinaeharenai nahiti maniya hoka memere mokaha maheta olo xisa xaokowiterehare. Hoka nali nokaokihena hoka koxaka memere tyaonita maheta, hoka tyotyaha semaha maheta xiyaokalita xisa xaokowihenerere xiyekane, hoka maisa xiwakatyaka xema xini xisehenerehare tahi.

<sup>6</sup> Xotyaxematyaira exeharenai: Xala xamaniya atyo inira fitya hoka iniraiya atyo imexaheta. Hoka xala xamaniya atyo kalore fitya hoka kaloreya atyo imexaheta. <sup>7</sup> Hoka maika hatya xakini, aliyakere xamani ahekoty hoka nikarexe isa. Maisa haxamaikoharene, hawakatyaka xema hekoti xini. Hiyaiya, xala xamani atyo haihalaharene kakoa ijita hoka Enore atyo awaiyetitene. <sup>8</sup> Hoka Enoreya atyo isa xomana xaokitereharenai xahexe hoka xaokitereharenai kakoare xisaota mene maheta, exahe xaokiterehare xahexe isa xomana hoka waiyexe xisomehitiya maheta.

<sup>9</sup> Hiyaiya, exakere atyo Iraitai Waiyexe nexa: “Kahare atyo xalinihare ijita maoloxaharenai ana. Enawaiyexehare atyo maisa tyotere xini”, nexa.

<sup>10</sup> Enore atyo hanakatise ijita kaxafityaka maheta, exahe nakairati hoka ijita kakanakairatyaka maheta. Hoka isa tehitiyaite xomana tyotyaha hanakatise xaokitereharenai. Hoka akekoaretya ite hatyo hanakatise hoka kalore ite ximexehetene maoloxaharenai xikahinaera hiyeta. <sup>11</sup> Xikaoloxahare ite moka mene xakahinaetya maheta halitinae. Nikare ite hoka kahareha ite ihalahareha Enore kakoa olo xaxikaitere wiyema hiyeta.

<sup>12</sup> Hiyaiya, exakere atyo xisomita hoka maisa atyo xakahinaetita taita xini Enore koamaniya tyaonitere-nae maxiyehareharenai, xakore hoka xisomitereharenai hiyeta atyo kalore ihalaharahitaha Enore kakoa.

<sup>13</sup> Ihalaharehenaite Enore kakoa. Hiyaiya, exe xikahinaera atyo hotikijita xityakekone, exahe xawenane Cristo nalitare Iraitai Waiyexe xema. Hoka olo xaxikaitere enomanaha, exahe haiyaharenae ana xoha hiyeta ite ihalahareha tehitiya Enore kakoa.

<sup>14</sup> Iraexatyaha ite xomana haxawaiyeraha xiso hiyeta, exahe Enore kalore awaiyetitere xiso xoha hiyeta.

<sup>15</sup> Nikahena hoka wihalahare Enore kakoa, hatyo kalore awaiyetitere wiso maxaimenekotyakahare kakoa hiyeta.

### Paulo Aiyateretyoa Hairaene Kakoa Tyakekohatienae Xahita

**10** Natyo Paulo terota koxaka nirae xikakoa. Haxawalita notyaohena xikakoa hoka nawaiyexehare notyaonita xiyahita. Seko akiya notyaohena xonita hoka noxalijinihareta xiyahita. Kalikini Cristo

nawaiyexehare hiyeta nirae xihye hoka waiye xasema. <sup>2</sup> Nali notyohena hoka awa atyo xexalijinihalikisa natyo. Hiyaiya, xoana xamaniya hoka noxalijinihalini kakoaiya nekoaxatya naokita etakehare haliti xahekola xema akereta wisaoniterehare aokitereharenai xahita.

<sup>3</sup> Aliterexe atyo haliti wiso. Xakore hoka maisa atyo waiyateretyoita xini halitinai nawenane akereta. <sup>4</sup> Iyateliti kakoa waiyateretyoitere atyo maisa waikohekoatare xini. Enore nalitare iyateliti kakoa atyo waiyateretyoita wamawenekoaretya maheta kinatere aokowitereharenae. Exahe iraiti metalaharenai wamawenekoaretita. <sup>5</sup> Exahe halitinae xahenera mahalakirahitene hoka maisa Enore koamaniya nawenatyaka mawaiyehahalakatitere enomanaha harenai wamawenekoaretita. Wijiyaotita atyo tyotyaha halitinae xahekola hoka Cristo koamaniya wamohenahititene.

<sup>6</sup> Hoka kalore xityakekohenerere najikinitaite wimemere wisaohena iniyalahare kakoa waotyakisa maheta hatyaterere matyakekonehare.

<sup>7</sup> Xiso atyo xalinihare henekoa maniya taita xiyaiyita. Hoka hatyaiya aliterexe Cristo anere aokowita hoka maika ahekohitiya hatyo tahi. Hiyaiya, wiso tehitiya atyo Cristo anerenai, hatyo hatya haliti akereta.

<sup>8</sup> Maisa atyo nohaihareta xini, kalore xakore nahinitya Xekohaseti iyateliti isehenere womana kakoa hoka. Exe iyateliti atyo akekoarekisa xiso maheta xawenane kakoa, hoka maisa atyo mawenekoaretya maheta xini xiso. <sup>9</sup> Kasani atyo maisa naxahekotyankisa xiso hoka namairakisa taita maheta xiso exe babera naxikaita xomana xaoka naokare.

<sup>10</sup> Hatya ite nehena: “Paulo axikaitere baberanenai womana nanekoa atyo kaheneharexe, exahe kinatere hairaene axikaita womana. Xakore hoka kaokehena atyo womana hoka kaxonasiri atyo tyaonita, exahe iniraene hoka maisa xoare tyomare”, nehenaite.

<sup>11</sup> Xakore hoka maika hatyo haliti ana waiyehahalakehena: hiyaiya, maisa atyo xoarehare hawareharexe aka waxairaiterehare baberanenaikoa seko wisaonitere xowaka, exahe wisomiterehare nali xinekonihena wiso xoaha xowaka.

<sup>12</sup> Maisaiya aliyakere wehakakoatita exahe waimenekotita wawenane etakehare masakare waiyore aokowitereharenae nawenane kakoa. Hatyotaha atyo aimenekotyowitaha háomaneha xaimenekotyakalati kakoita. Maisa atyo waiyorexeha. <sup>13</sup> Hoka wiso wiyakowiharetyoane atyoite maisa wiyahenera jiyare tyaonita. Enore isehenere womana aosexeta atyoite tyaona, exahe xinekoni wihatene hoka. <sup>14</sup> Hatyo isehenere womana aosexeta atyo xisaonita hoka maisa atyo exahexe xini wisoma, nali wikaoka hoka Waiyexe Iraitai wiyakaihenerere Cristo tahi xowaka. <sup>15</sup> Hatyo hiyeta maisa waokowiharetyoita haiyanai hahatene tyomenenere Enore isehenere womana xahexe kakoa. Xakore hoka kasani atyo xityakekone kekoare waokita. Hoka exahere hateniti wisoma xinekoni waokowita Enore isehenere womana aosexeta akereta.

<sup>16</sup> Hatyaosetaite wiyakaihena Iraitai Waiyexe haiyakoanai wenakalatikoanai xisaonitere xaihako

tyaoniterenai hiye. Nikare ite hoka maisa waokowiharetyoita hatya haliti koxaka hahatene tyomehenere kakoa.

<sup>17</sup> Hiyaiya, exakere atyo Iraitu Waiyexe nexa:

“Maika xala xamani aokowiharetyoa aokowita hoka maika aokowiharetyoahena etakehare Xekohaseti tyomiterehare kakoa”, nexa.

<sup>18</sup> Hiyaiya, hatya atyo katyakeketyakita, Xekohaseti tyakekohenene hoka. Maisa atyo hatyota tyakekoawihena xini hoka.

### Paulo Exahe Iraitu Xakaisaseharenae Metalahare

**11** Kasani exahe niraehena hatyahaliti akereta hoka heko xasemaxematya niraeni naokita. Hatyo hiyeta xasemaira niraeni. <sup>2</sup> Enore waiye kaxaikotere xiso akereta tehitiya atyo natyo nokaxaikota xiso. Hiyaiya, xiso atyo hatya mawatyalisakahalotatare kaiserehare hoka nakaiyanenetya naokowitere hatya haliti kakoa akereta xisaonita. Hatyo haliti atyo Cristo. <sup>3</sup> Nomawaiyehareta xikakoa, xoana xamani hoka owi kinohare maoserahenere Eva akereta xikamaoseratya-ka hoka maisa waiye xahekotyare hoka xahalakisaiya xawenane waiyexe Cristo koamaniya. <sup>4</sup> Hiyaiya, xasemita atyo xihalaharene kakoa hatyaterere kaokohena hoka xakaihena Jesus hawareharexe tahi xihiyehoka. Hatyo atyo maisa Jesus aliterexe wiyakaitere xihiyehoka tahi xini. Exahe xaokita atyo xomana isekohaliti, exahe iraitu waiye hawareharexe, wiso wiyakaihenerere Enore nalitare Isekohaliti exahe Iraitu Waiyexe nonitata.

<sup>5</sup> Noxahekoli hiye hoka maisa atyoala exe “iraitu kakoarenai” katyahakohare xini natyo naoka. <sup>6</sup> Exahe atyoala maisa nawaiyore niraexe naoka, xakore hoka kalore atyo waiyehalakitani nomani. Hatyoharenai atyo tyotyaki nihatyaka wahotikisa xomana.

<sup>7</sup> Noxakaihenerere xihiyehoka Iraitu Waiyexe Enore nalitare xowaka maisa nobakatyaki naokita xihiyehoka. Nikare nahakita hoka wakahare akereta notyaonita hoka kalorexe xisaona maheta. Xoana hatyo xowaka ala maisa ehokore xini nikare notyaonita xomana? <sup>8</sup> Nahahenerere xinekoni xowaka haiyaharenae tyakekohatiyena hakoa wenakalatitarenae bakatyahitaha natyo. Kala xoana xamani hoka nokaiwahitene naoka nakahinaetya xiso maheta. <sup>9</sup> Notyaohenere xinekoni xowaka haiya xowaka olo hare naokita, xakore hoka maisa xalahare nahowitikijita. Wihinaeharenae Macedônia nalita tyohenerenai atyo kolatyaha nomani xoalinihare naokitereharenae. Nikare notyaona kafaka maniya hoka nikareta tehitiya ite notyaonehitiya nahiti maniya. Maisaiya hatyoharenae hiyeta nahowitikijita xiso.

<sup>10</sup> Cristo niraene aliterexe tyaonitere nohiyehiyeta niraehena, hoka tyoty Grécia koa tyaoniterenai konitareya maisa xalahare emaisahitita exe nihalahalini kakoa maxaimanehareta noxakaitere Iraitu Waiyexe.

<sup>11</sup> Xoanere ala hoka exakere niraeta? Xoana maisa ala nawaiyetyare xiso hoka? Enore atyo waiyoreta noxawaiyiri xiso kakoa.

### Maika Xirihare Xaotyakisatiyena Metalahare Kakoa

(1 Timóteo 1.6-7; 1 Timóteo 4.1-3; 2 Pedro 2.1-19)

<sup>12</sup> Kalikini nahakitere akereta ite nahahitiya hoka etakehare “iraitu kakoarenai” xahenera namiyatya, exahe wihatene akereta hakahitaha aokowiyahitere xoha. <sup>13</sup> Hatyo halitinai atyo iraitu kakoarenai metalaharenai, maisa atyo ekaisereharenai xini. Hahateneha tahi atyo maoseratyahitaha hoka Cristo niraene kakoarenai kaiserehare atyo aokowiyahitaha. <sup>14</sup> Xakore hoka maisaiya atyo xahakaharetyoita. Xiyaiya, Ahalakoahaliti kakoitaiya atyo aikawatyoa hoka motyaiya anjo waiyexe ene kaotyaka. <sup>15</sup> Nikare ite hoka exema maniya tyaoniterenaitu nikareta tyaonaha hoka motya ite haliti waiyexe nomasehareha ene tyaonaha. Xakore hoka imiyani xowakehenaite hoka tyomahitere akereta kaxomokakehenahitaha.

### Paulo Iraitu Xakaisasehare Makawatini

<sup>16</sup> Haki ite niraehitiya: awa atyo nohatyahalini xaoka. Nohatyahareta atyo xaowita hoka maika hatyahaliti xomokaka akereta xamohena natyo hoka hatyohare hiyeta naokowiharetyoa. <sup>17</sup> Aliterexe exe niraetere atyo maisa Xekohaseti xaotyakira xini. Exe noxaokowiharetyoani tahi niraetere atyo aliterexe motya hatyahaliti akereta niraeta.

<sup>18</sup> Haiyaharenae atyo hawenaneha waikohekoare kakoa aokowiharetyoahitaha, hoka natyo tehitiya ite naokowiharetyoahena nawenani kakoa. <sup>19</sup> Xiso atyo xirihare, xakore hoka waiye xasemaxemaita hatyaharexenai niraene. <sup>20</sup> Haiyanae atyo wakahare akere mokita xiso, xixiyehare miyatyahitaha xonita, maoseratyahitaha xiso, hairawaneha kakoa kaxaikoahitaha xiso, exahe mokotyahitaha harenai xiso xitihokoa. Nikare xakore atyo mokahitaha xiso hoka waiye xasemaxemaita iniraeneha.

<sup>21</sup> Komitaene ene nohaiharetu exakere niraeni xikakoa: maisa wiyalijiniharexe hoka hatyonai akereta wamokare xiso. Hiyaiya, maisa xakore wikinaterexe hoka exakere wiraeta xikakoa.

Xakore hoka haiyanaiya atyo aokowiharetyoaha xoalini hare kakoa hoka natyo tehitiyaite naokowiharetyoa. Hiyaiya, aliterexe atyo hatyahaliti akereta niraeta. <sup>22</sup> Xoana Hebreu hotyaliharenai? Natyo tehitiya atyo. Xoana Israel hotyaliharenai? Natyo tehitiya atyo. Xoana Abraão jikolaharenai? Natyo tehitiya atyo.

### Paulo Nawenane Howithare Tyaonita

(Atos 14.19-22; 21.27-36; 23.12-15; 2 Coríntios 4.8-12)

<sup>23</sup> Xoana Cristo wakaneharenai? Natyo tehitiya atyo Cristo wakanehare, hatyo xahehareha atyo natyo. Alaty atyo hatyahaliti akereta niraeta hoka. Hiyaiya, exaherehareha atyo nahaka, exahereharehaki atyo berexoako nokaxomokaki. Exahereharehaki atyo nokamokonasetyaki, exahe kahaliki komitaene nowaini. <sup>24</sup> Judeunae 5-ki mokonasetya natyo hoka 39-xa mokotyahitaha natyo hatyo 5-kinai mokohenahere



natyo xowaka. <sup>25</sup> Hanamaki atyakase kakoa Roma yer-enai mokonasetya natyo. Haki sehali kakoa mokotyaha natyo. Hanamaki kanowa kalorexe tabobokoa nokakoi. Haxatini, haferakene xoaha notyaona one kaloxere xaiya. <sup>26</sup> Kahaliki notonani xowaka kahenehare nawenani tyaonita one morene, exahe kaiwarexenai xoaha koni. Exahe kahenehare notyaonita nohinaeharenai Judeunai, exahe majudeuneharenai xoaha koni. Kahenehare notyaonita wenakalatikoanai, maharexakiti, one kaloxere xaiya, exahe kahenehare nokaxomokakita nohinaeharenai metalaharenai hiyeta. <sup>27</sup> Kahare hateniti tyaonita nomani, nokirahareta. Haiya xowaka maisa aliyakere notemakare hekoti. Haiya xowaka nonakita, nomaimihare, exahe maisa tihere niyahare nokaimiye hoka tihita nohiye. <sup>28</sup> Maiha hatyoharenai taita xini. Ferakiti nihatyaka nomawaiyehareta tyotya tyakekohatiyena kakoa. <sup>29</sup> Haiyaharenae maotikone tyaonita hoka nomaotikoni tehitiya notyaonita. Haiyaharenai iniyalahare tyomehena hoka kalore namaikohareta.

<sup>30</sup> Naokowiharetyoaiya atyo naokowita hoka naokowiharetyoahena atyoite etakehare nomaotikonini hotikijiterehare kakoa. <sup>31</sup> Enore, Xekohaseti Jesus Nexe, etake kaihalaharetyaketa menehenere ana atyo waiyekehalakita hoka maisa atyo namaoseraita xini.

<sup>32</sup> Notyaohenere wenakalati Damasco xowaka kalorexe kaxaikoakaitere xekohaseti Aretas wenekoare moka sorarenai wenakalati kaokatyakala nali tokaha natyo maheta. <sup>33</sup> Xakore hoka nohinaeharenae moka ha natyo koho kalorexe ako hoka exoakihenahitaha natyo talarehoko motokoare ahota hoka maisa sorarenae xoana mokita natyo.

#### Paulo Kaxawaiyanikisakehenere Tah

**12** Naokowiharetyoahena atyoite, exahe maiha xakore xoarehare hatyohare tyomare nomani hoka. Xakore hoka kalikini atyoite noxakaihena xihiyenowaiyehenerehare tahi, exahe Xekohaseti hotikihenerehare nomani xoaha tahi. <sup>2</sup> Nowaiya hatya tyakekohenerere hoka toahiya 14-terehokoane najikini xowakiya eharehena rota kakolatyaka enokoa xeta, xoana tyotya eháre kakoita xamani ala kakolatyaka, xoana inisekohare taita xamani ala kakolatyaka. Maisa atyo waiyekehalakita nomani, Enore taita ana atyo waiyekehalakita. <sup>3</sup> Niraehitiya ite: aliterexe atyo hatyo haliti eharehena rotita kakolatyaka Wenakalati Waiyexe nali. Xoana aliterexe xamani ala eháre kakoita kakolatyaka, xoana inisekohare taita xamani ala kakolatyaka. Maisa atyo waiyekehalakita nomani, Enore taita ana atyo waiyekehalakita. <sup>4</sup> Kakolatyaka enokoa nali hoka iraiti sema xakore hoka maisaiya xala hare ali waikohekoa awaiyekehalakaitene. <sup>5</sup> Hatyo hiyeta hatyo haliti kakoa ite naokowiharetyoahena. Xakore hoka maisaiya atyo nokakoita naokowiharetyoita, hoka etakehare nomaiyatelihalini hotikijitereharenai kakoa atyo ite naokowiharetyoahena. <sup>6</sup> Naokowiharetyoaiya naokowita hoka maisaiya atyo nohatyahareta xini, xakore hoka aliterexeya atyo niraeta. Xakore hoka mai-

saiya atyo naokowiharetyoita, kasani maisa xalahare ahekotya notahi naokare waiyehenere natyo exahe semehenere niraeni xahexe naokare.

<sup>7</sup> Kahare waiyexe kahotikisaka nomani hoka hatyo hiyeta kahehaliti kawéro kaxekaka nomani maisa masakare naokowiharetyoita maheta. Ahalakoahaliti niraene kakoare akereta kaoka nomani hoka maiyateretya natyo maheta, hoka maisa naokowiharetyoita maheta. <sup>8</sup> Hanamaki niraexatya Xekohaseti hiye hoka naxene, kasani emaisaheta maheta noniti hatyo kahehaliti.

<sup>9</sup> Xakore hoka Xekohaseti nexa nohiye: “Mahaiya naiyatelikihitita hiso. Nakahinaetya taitaite hiso hoka waiye hisaona. Hiyaiya, niyatere atyo exaehare kalore tyaonita, himaiyaterehare hisaonitere xowaka”, nexa nohiye. Hatyo hiyeta exaehare atyo nihalahareta naokowiharetyoitere nomaiyatelini kakoa hiyeta. Kasani Cristo niyatere tyaoneta mene nohiye naokita hoka. <sup>10</sup> Nihalahareta atyo exe nomaiyatelini, nirawaiyaki, nomaxiyeharehalini, niraeharetyaki, exahe Cristo hiyeta hoka howitihare nawenani tyaonitere xoaha hiyeta. Hiyaiya, nomaiyaterehenere xowaka nokinatere notyaonita Xekohaseti hiyeta.

#### Paulo Mawaiyeharene Corinto Yerenae Kakoa

<sup>11</sup> Hatyahaliti akereta atyo notyaonita, xakore hoka xiso atyo exakere xaxomokanikisa natyo. Xiso ene atyo waiyexe xiraehena notahi. Hiyaiya, maisa xakore atyo noxoare waikaterehare xini hoka maisa atyo exe “iraiti kakoarenai” xawaiyetiterenai katyahakohare xini natyo. <sup>12</sup> Xoaliniharenai hotikihenere hoka aliterexe iraiti kakoa aohenere natyo atyo kaomaka maholawakereta xinekoni. Hatyoharenai atyo xoalinihare waiyexe, exahe xoalinihare maomakahare nomaka harenai. Hatyoharenai kaomaka halitinai tyakekoha maheta niraeni. <sup>13</sup> Xoare hiye iniyalahare xixaxomokaka haiyaharenai tyakekohatiye xahexe? Hatita hiye taitala maisa nemaxahalikijita xiso: maisa nokahinaetyaki naohenere xihiyehiye. Maika hatyohare ximaotyaneheta.

<sup>14</sup> Kalikini ehanamakini hiye koxaka nomimiye notyaonita notyooa nowaiyeheta xiso maheta. Hoka maisaiya xoareharenai naokita xihiyehiye. Maisa atyo xoloxa naokare nomani, hoka xiso taita atyo naokita nomani. Hiyaiya, mahaiya atyo aliyakere xoimanai hanexe ana olo mokita, enexeha atyoite mohena olo haisaninai ana. <sup>15</sup> Nihalahalini kakoitaite nakahinaehena xiso tyotya noxiyehare kakoita, exahe niyatere xoaha kakoa tehitiyaite nakahinaehena xiso. Masakare atyo nawaiyetita xiso hoka xoana hatyo hiyetaite inira taita xawaiyehena natyo?

<sup>16</sup> Maiha atyo xoare hare hiye nahowitihalikijita xiso. Hatyoharenae waiyekehalakita xomana, xakore hoka haiyanaite namaoseraita xiso aohenaha. <sup>17</sup> Xoana naxikahenerenai xomana hiye ala xikolaharetyaka naoka? <sup>18</sup> Aliterexe atyo Tito naxikatya xomana, hoka hatya wihinaehare tehitiya naxikatya exema. Xoana

Tito kore kolaharetya xiso? Xoana maisa kore wiso hinamanai hakakoa wisaonita, wahekotita?

<sup>19</sup> Xoana motya ala wakahawaonitaretyoita xahalakoa xaokita? Maisa nikare xini wisaonita. Wiraeta atyo motya Cristo wakatya wiso hoka wirae Enore nahalakoa aokitere akereta. Hoka tyotya wisomitereharenai atyo wakahinaetya maheta xiso, nohinaeharenai, noxiyakawaliharenai.

### Enore Maxawaiyerene

(Romanos 1.26-32; 1 Coríntios 3.3; 10.6-10; 1 Timóteo 1.9-10; Tiago 3.10-16)

<sup>20</sup> Kalikini atyo nomawaiyehareta xikakoa. Naliya nokaokihena hoka mahaiya naokitere akereta xini nowaiya xiso, exahe natyo hoka maisaiya xiyahakola akereta xini xiyaiya natyo. Motya akere tehitiya ite nowaiya mokohetyakakoati, okoati, xaiminiharetyoati, maxiti, irawaniti, werahaliti, xahenityati, wenati mahokorenehare xoaha naokita. <sup>21</sup> Hoka nomawaiyehareta tehitiya etakehare notyooa nowaiyehenere xiso xowaka Enore xexamaikoharera natyo xihaotita kakoa. Hoka noseki kakoa, kahare haiyaharenai toahiya xowaka iniyalahare tyomaha hoka maisa kehexaharetyoahenahititere iniyalahare ohiro hiye hawenanaha, exahe xoalinihare maiyasehenahere xoaha hiyeta.

### Xaotyakisati Miyane

**13** Exe kakoaita hanamakihena notyooa nowaiyita xiso. Hiyaiya, exakere atyo Iraitu Waiyexe nexa: “Hinama, hanamaiya atyo irahena hawaiyaneha tahi hoka hatyoiya atyo katyakekotyaka”, nexa. <sup>2</sup> Nirae naokowita xiso iniyalahare tyomehenerenai nahitita hiye, exahe xiso haiyaharenai xoaha kakoa. Ihinamakini notyohenere xinali xowaka koxaka nirae xihye hoka kalikini seko notyaonita hoka niraehitiya xihye: “Etarekityaite nali notyohitiya hoka maisa xalahare nairakoanaharehitita”, nomi. <sup>3</sup> Hatyaoseta atyo ite xityakekohena Cristo iratere nohiyeti. Cristo atyo waiye mohena xiso xakore hoka maisa atyo maiyaterehare xini. Hotikijita atyo haiyaterere xomana. <sup>4</sup> Alitere atyo kaberekotyakehenere atyalihose xaimaholatyaka hiye xowaka maisa kinaterere ene, xakore hoka Enore niyaterere hiyeta atyo kaseheta. Hatyo akereta wiso tehitiya emaiyaretere akereta wisaonita. Xakore hoka

hahotyalita wisaonitere ekakoa hiyeta atyoite wiki-natere wisaohena Enore niyaterere hiyeta wakahinaetya maheta xiso.

<sup>5</sup> Xisota xahekoharetyoahena, xahasakaharetyoahena xawenane kakoa, xoana aliterere xamani ala xikinatere xisaonita xityakekone kakoa hoka. Hoka aliterere atyo waiyekehalakita xomana Jesus Cristo kaxaikota minitereharenai xiso, hoka ameteniya atyo maisa xityakekohitene hoka maisa waiyekehalakihiti-xomana. <sup>6</sup> Hoka kasani waiyekehalaka xomana naokita. Hiyaiya, wiso atyo maisa wamatyakekotyarene. <sup>7</sup> Enore hiye wiraexaita xomana, kasani maisa iniyalahare xisoma waokare. Maisa atyo hatyoharenahiyeta wihatene katyakekotyaka maheta xini. Exahe wiso akere atyo wamatyakekotene, hoka kasani atyo xoalinihare waiyexe taita xisoma waokita. <sup>8</sup> Hiyaiya, maisaiya atyo xoarehare aliterere nahalakoa wisomita, xakore hoka aliterere taita atyoite wisomehena. <sup>9</sup> Hatyo hiyeta atyo wihalahareta, wiso maisa wikinatere wisaonare xiso xikinatere xisaonitere hiyeta kakoa. Wiraexaita tehitiya xomana waiyexenai xisaona maheta.

<sup>10</sup> Notyooa nowaiyehenere xiso nahitita naxairaita exe babera xomana. Kasani nali notyohenere xowaka maisa kinatyaxa nirae xikakoa naokowiye Xekohaseti isehenere iyateliti nomani kakoa hoka. Xakore hoka exe iyateliti atyo kahinaetya maheta xiso xawenane kakoa, maisa atyo namawenekoaretya maheta xini xiso.

### Tyawaxati Miyane

<sup>11</sup> Xoaha taita nohinaeharenahae, waiyexe maniya taita xisaohena. Waiye xasema niraetereharenahae. Hakakoaira xisaohena, exahe ximehexaikohare xoaha xisaona. Nikare ite xisaona hoka Enore xawaiyetyati kakoare, wenati waiyexe kakoare xoaha heko kaxaiko xiso. <sup>12</sup> Xikatyawaxehena xihinaeharenahae hiye hoka xasohitanakolisahene.

Tyotya Enore anere hotyalinai haxakaisakehenahitaha aoka xihye.

<sup>13</sup> Kasani Xekohaseti Jesus Cristo kaxaiko xiso, exahe Enore awaiyitya xiso, exahe Isekohaliti Waiyexe aihalalinikisa xoaha xiso naoka, xoaha taita.

# Gálatas

## Tyawaxati

**1** Natyo Paulo naxairatya exe babera. Nokakawisa-ki iraiti kakoare notyaona maheta. Maiha atyo halitinai xaokalita xini, xakore hoka Jesus Cristo, Enexe Enore ekasekiheteheerene xoaha xaokala ximita atyo. <sup>2</sup> Tyoty ali wihinaeharenai tyaoniterenai nohaliye haxakaisakaha aokaha tyakekohatiyenai Galácia yerenai hiye. <sup>3</sup> Kasani waiye, mehexaikohare xisaona naokita Wexe Enore hiyeta, Wiyekohase Jesus Cristo xoaha hiyeta.

### Cristo Atyo Waini Womana

(1 Coríntios 15.2-4; Tito 2.11-14; 1 Pedro 2.21-25; Apocalipse 1.5)

<sup>4</sup> Wexe Enore xaokalita Xekohaseti Jesus waini womana hoka iniyalahare wománe emaisaheta wonita maheta hoka waiyexe maniya moheta wiso maheta.

<sup>5</sup> Hatyo hiyeta maika Enore kakoa kaihalaharetyaketa mene, xoaha.

### Haterore Iraitu Waiyexe

<sup>6</sup> Nahakaharetyoa xamokita haxerore xahalakijitere kawijitere xiso Cristo nawaiyexehare hiyeta hoka hatya “iraitu waiyexe” xema xisaonitere hiyeta. <sup>7</sup> Aliterexe atyo maisa hatehitiya “iraitu waiyexe” aka. Exakere atyo niraeta, haiyaharenai emaxahalikijitere xisonae atyo éhawareharetyaha Cristo nalitare Iraitu Waiyexe aokowitaha. <sup>8</sup> Xakore hoka hatyatereya, exahe wiso, exahe xoana anjo enokoatere xamaniya xakai xihye hatya “iraitu waiyexe”, hawareharexe etake wiyakaihenere nonitata hoka hatyoiya atyo waiye mawenekoaretyaka. <sup>9</sup> Koxaka atyo exakere wirae, xakore hoka wiraehitiyene: hatyaiya xakai hatya “iraitu waiyexe” hawareharexe etake wiyakaihenere nonitata hoka hatyoiya waiye mawenekoaretyaka.

<sup>10</sup> Xoana exakere ala niraeta hoka kasani halitinai tyakeko natyo naokita? Maiha nikarexe xini. Kasani atyo Enore tyakeko natyo naokita. Xoana kalikini ala halitinai nemaxalokisa naokowita? Nikarexeya atyo hoka maisaiya atyo Cristo wakanehare xini natyo.

### Paulo Iraitu Xakaisasehare Tyahenere Tahu

<sup>11</sup> Xasemehena, nohinaeharenae: Waiyexe Iraitu noxakaitere xihye atyo maisa halitinae xaomatikira xini.

<sup>12</sup> Maisa atyo hatya xini isene nomani, exahe maisa xala hare aotyakijita natyo, xakore hoka Jesus Cristo terota atyo hotikisene nomani.

<sup>13</sup> Kala koxaka xasema nawenani toahiya judeunae xaotyakira xema maniya notyaonitaterere xowakiyere. Hatyo xowakiya Enore koamaniya tyaoniterenae xahita noxalijinihareta kalore. Naiyateretyoita exahitaha, kasani namehotyahene naokowita hoka. <sup>14</sup> Hatyo xowakiya judeunai xaotyakisakaho xema notyaonita. Naiyateretyoita nohinaeharenae xahexe, kasani wahetekomaniyerenae xaotyakira xema terota notyaona naokowita hoka.

<sup>15</sup> Xakore hoka Enore hawaiyexehare hiyeta, no-mawenaniharetatere xowakiya haomanere aoka natyo nahaka enomana maheta. <sup>16</sup> Hatyaoseta Haisani hotikisa nomani hoka majudeuneharenai hiye Waiyexe Iraitu Ityani tahi noxakai aohenere xowaka, maisa xala hare natawita aotyakisa natyo maheta. <sup>17</sup> Exahe tehitiya hoka maisa noxani Jerusalém xeta, nahitita iraitu kakoarenae tyahenerenae nowaiya maheta xini. Xakore hoka Arábia koa noxani. Hatyaoseta nahaikoaheta Damasco xeta. <sup>18</sup> Hatyohekota hanama terehokoane najikinita noxani Jerusalém xeta, Pedro nowaiya maheta, hoka hinama semanane notyaona ehaliya. <sup>19</sup> Maisa atyo hatyanae hekoti iraitu kakoarenae nowaiyita. Xekohaseti ximarene Tiago taita atyo nowaiya.

<sup>20</sup> Hiyaiya, Enore haotita atyo niraeta hoka naxairaitere atyo aliterexe.

<sup>21</sup> Hatyaoseta noxani Síria koa, Cilícia koa xoaha xeta. <sup>22</sup> Hatyo xowaka tyakekohatiye hotyalinae Judéia koa nali tyaoniterenae maisa waiyareha natyo. <sup>23</sup> Haiyaharenae nexa iraitere notahi taita semahitaha: “Etake xalijiniharetere wiyahita hoka wiyakekone mawenekoaretya aokowitere atyo kalikini xakaihakaita halitinai hiye”, nexahitere. <sup>24</sup> Hoka ihalaharahitaha Enore kakoa nohiyeti.

### Paulo, Haiyaharenae Iraitu Kakoare

**2** Hatyaoseta 14-terehokoane najikinita nahaikoaheta Jerusalém xeta Barnabé kakoa, exahe Tito tehitiya nanoloka. <sup>2</sup> Enore hotikisa nomani, nali noxanini aoka hoka noxani. Nali wahohisakoatyakakoa wihinaeharenae tyakekohatiyena nityohalitiranai kakoa hoka nawaiyekehalakatya Iraitu Waiyexe noxakaitere majudeuneharenae hiye akiti enomanaha. Kasani maisa nohateni notyomehenererehare, exahe notyomitererehare xoaha meta naokare hoka niraekakoa.

<sup>3</sup> Nohinae Tito atyo grego, xakore hoka maisa atyo kaxaikotyaka enomanere milihe kaxaokakita. <sup>4</sup> Xakore hoka haiyaharenae enomanere milihe xaikotyaka

aokahitaha. Hatyo halitinai tyakekohatiyenae aokowita hoka isoaha tyakekohatiyenai kaiserehare koni. Hatyo halitinai atyo isoaha tyakekohatiyenai koni wahakotiterenai akereta, waiyaha maheta waiye wisaonitere Jesus Cristo koamaniya hiyeta. Kasani atyo wakahare akereta mohenahitaha wiso aokowitaha hoka. <sup>5</sup> Xakore hoka maisa ini hekoti wasema iniraineha waokowita, kasani kalikini Iraitu Waiyexe aliterexe kakoare xisaona maheta.

<sup>6</sup> Xakore hoka haiyaharenae motya kaxaikotyatiyenai. Hoka exakere atyo niraeta: Hiyaiya, exahe atyo xoarehareha ene xamani hoka Enore atyo maisa halitinai hokoaneharene hiyeta xini aokitene haomana. Haki ite niraehitiya, hatyo kaxaikotyatiyenai maisa xoare hare waitare haxahekolaha tahi irateta nohiye.

<sup>7</sup> Xakore hoka waiyekehalaka enomanaha, Enore isehenere Iraitu Waiyexe noxakaini niyahare majudeuneharenae ana maheta, Pedro ana isehenere ehatene hoka xane xakaihenere iraitu judeunae hiye akereta akiti. <sup>8</sup> Enore niyaterere hiyeta atyo iraitu kakoare notyaona majudeuneharenae ana, Pedro iraitu kakoare kaxomokakehenere judeunae anere akereta.

<sup>9</sup> Hatyo hiyeta Tiago, Pedro, João xoaha kaxaikotyatiyenae aokahiterenai ana waiyekehalaka Enore isehenere nomani nohateni hoka hahinaehare aokaha natyo, Barnabé xoaha. Wihinaehare tyare atyo waokakaoa hoka wiso atyo majudeuneharenae koni wahaka waokowi hoka hatyoha atyo judeunae koni hakaha aokowiha. <sup>10</sup> Kasani haiyaharenae tyakekohatiyenae maxiyehareharenae tyaoniterenae judeunai koniyerenai taita kahinaetyaka aokaha. Hatyohare akiti terota nahekoita hoka hatyohare notyoma naokowi.

### Paulo Watyali Pedro

<sup>11</sup> Hatyo najikinita, Pedro tyohenere Antioquia nali xowaka, nowatyalini tyoty naliyerenae haotita, maisa ehokore tyaonare hoka. <sup>12</sup> Tiago axikahenerenae haiyaharenae makaokeneharene nahitita, Pedro kanakairita ene wihinaeharenai majudeuneharenae kakoa. Hatyaoseta kaokaha hoka maisa kanakaira aokowihitita majudeuneharenae kakoa, mairita majudeuneharenae nomanere milihi xaikotyaka aokahitere kakoa hiyeta hoka. <sup>13</sup> Haiyaharenae wihinaeharenae judeunae tehitiya mairaha hoka Pedro tyaonitere akereta tyaonaha, exahe Barnabé kakoita hoka nikare tyaona.

<sup>14</sup> Hatyaoseta nowaiyehena atyo, maisa ehokore tyaonareha, maiha Iraitu Waiyexe aliterexe aokitere akereta xini tyaonitaha hoka nomi Pedro hiye tyoty ehaotyahitaha: "Hiso atyo judeu, xakore hoka maisa atyo judeu akereta xini hisaonita, majudeunehare akereta atyo hisaonita. Xoanere hoka haiyateretyoita majudeuneharenae xahita, hoka kasani judeunai tyaonitere akereta tyaonaha haokita?" nomi ihiye.

### Judeunae, Majudeuneharenae Waiyexe Maniya Kaxomokake henahitaha Ityakekoneha Hiyeta

<sup>15</sup> Wiso atyo judeunae konitare nawenaneharenae hoka maisa atyo iniyalahare nomaseharenai xini wiso majudeuneharenae akereta. <sup>16</sup> Xakore hoka waiyekehalakita atyo womana, tyoty tyakekohenerenai Jesus Cristo hiyeta Enore haliti waiyexenai aohititereharehene, hoka maisa atyo judeunai Xaotyakiraho hiyeta xini. Nikareta tehitiya wiso judeunae wityakeko Jesus Cristo hoka Enore haliti waiyexenai aoheta wiso maheta, Cristo wityakekohenerere hiyeta, hoka maisa atyo judeunai Xaotyakiraho hiyeta xini. Hiyaiya, maisa atyo xala hare Enore haliti waiyexe aokare, judeunai Xaotyakiraho aokitere akereta tyaonitere hiyeta.

<sup>17</sup> Kasani Jesus Cristo hiyeta Enore haliti waiyexenai aoheta wiso waohena hoka wahotikisoawita atyo hoka aliterexe iniyalahare nomaseharenai wiso, majudeuneharenae akereta. Xoana nikare ala hoka Cristo kahinaetita iniyalahare? Maisa nikarexe xini!

<sup>18</sup> Hoka notyomehetehtiyaiya koxaka nahatahenerehare hoka hatyohare atyo hotikijita nomawenanehalini judeunai Xaotyakiraho xema. <sup>19</sup> Hatyo hiyeta, hatyo Xaotyakiyaho hiyeta, nowaini. Nokaxaisaki hatyo Xaotyakiyaho hiye, nawenani tyaoheta Enore anere maheta. Nokaxaisaki atyo Cristo kakoa atyalihose xaimaholatyaka hiye. <sup>20</sup> Nikare hoka maisa atyo natyoheta xini notyaonita, xakore hoka Cristo atyo tyaonita nohiye. Exahe exe kalikini nawenani tyaonitere atyo notyakekotere Enore Ityani xema tyaonita. Hatyo atyo awaiyetya natyo hoka hatyota isoawihare nomani.

<sup>21</sup> Maisa atyo Enore xawaiyera natyo namahokoanetyare. Hoka hatyo judeunae Xaotyakiraho hiyetaiyo atyo Enore haliti waiyexe aohitita hoka nikare atyoala hoka Cristo kamane maisa xoarehare tyomare.

### Wityakekone Hiyeta Atyo Enore Haliti Waiyexe Aokita Wiso

(Romanos 1.16; 3.21-26; 4.5; 5.1; 8.1)

**3** Kaxiyani, xiso Galácia yerenae, ximaotikone! Xala maoseratya xiso? Hiyaiya, xiyosehaotita kaxawaiyekehalakatyaka kaiserehare Cristo kamane atyalihose xaimaholatyaka hiyexe tahi. <sup>2</sup> Exe taita xekoaxahena: Xoana Enore Nisekohare kaxekakehenere xomanala Xaotyakiyaho aokitere akereta xisaonitere hiyeta, xoana xasema, exahe xityakekohenerere Iraitu Waiyexe hiyeta korála? <sup>3</sup> Xoana hoka ximaotikone xisaonita? Hetati ene Enore Nisekohare niyaterere xema xisaonita hoka kalikini atyo xiyaterere xema taitehena xisaona xaokowita? <sup>4</sup> Xoalinihare howitihare tyaohenerere xomana maisa xoarehare aotyakijita xiso? Maisa atyo aliyakere xaka. <sup>5</sup> Xoana Enore ala haisekohare isehena xomana, exahe maomakahare harenae tyomehena xinekoni hoka Xaotyakiyaho aokitere akereta xisaonitere hiyetala? Maiha kore atyoala xasemehenerere, xityakekohenerere Iraitu Waiyexe hiyeta xini?

<sup>6</sup> Exakere atyo Iraitu Waiyexe nexa Abraão tahi:

“Abraão atyo tyakeko Enore niraene hoka ityakekone hiyeta atyo Enore haliti waiyexe aokene”, nexa.

<sup>7</sup> Hatyo hiyeta waiyehahalakehenaite xomana. Hiyaiya, Abraão jikolaharenai kaiserehare atyo etakehare tyakekotereharenai. <sup>8</sup> Iraitu Waiyexe nanekoa koxaka xairatyoare tyaonita majudeuneharenae tyakekone hiyeta, Enore haliti waiyexe aohenaherene tahi. Hatyo hiyeta, hatyo nahitita Abraão hiye Iraitu Waiyexe kairaetyaka hoka nexa:

“Maika hihiyeta tyotyala haliti hotyalinae waikohekoa tyaoniterenai Enore waiye moka”, nexa.

<sup>9</sup> Abraão atyo tyakeko Enore niraene hoka ityakekone hiyeta waiye mokene. Nikare tyotyala tyakekohenerenaeha tehitiya waiye kaxomokakita hatyo akereta. <sup>10</sup> Judeunae Xaotyakiraho xema tyaoniterenaeha atyo Enore xeharene katyahe tyaonahitaha. Hiyaiya, exakere atyo Iraitu Waiyexe nexa:

“Tyotyala etakehare matyakekone miniterehare, tyotyala xairatyoare tyaoniterehare Xaotyakiyaho Baberanaxakoa atyo Enore xeharene katyahe tyaonita”, nexa.

<sup>11</sup> Maisa atyo xalahare Enore haliti waiyexe aokare enawenane Xaotyakiyaho xema hiyeta. Hiyaiya, exakere atyo Iraitu Waiyexe nexa:

“Enore ityakekone hiyeta haliti waiyexe aohetehenerene atyoite tyaota mene hatyakekone hiyeta”, nexa.

<sup>12</sup> Hoka Xaotyakiyaho atyo maisa tyakekotu hiyeta xini kaotyaka. Xakore hoka exakere atyo Iraitu Waiyexe nexa:

“Xala xamaniya atyo tyotyala Xaotyakiyaho aokitere akere tyaonita hoka tyaota meniya atyo Xaotyakiyaho hiyeta”, nexa.

<sup>13</sup> Xakore hoka Cristo atyo iniyalahare kaxomokaka wiwenekoare hoka iyeheta wiso Xaotyakiyaho iniyalahare mokitere wiso nonitata. Hiyaiya, exakere atyo Iraitu Waiyexe nexa:

Xala xamani atyo kaxerahokaka atya hiye hoka hatyo atyo maisa waiyexe xini, nexa.

<sup>14</sup> Nikare tyaona Enore waiyexe wenati aohenere Abraão hiye kaxekaka majudeuneharenaeha ana maheta Jesus Cristo hiyeta, exahe Isekohaliti Enore axikatya aokowihenerene hoka kaotyaka wityotyala womana maheta wityakekone hiyeta.

### Xaotyakiyaho Xekati Xoaha Xaokaka

<sup>15</sup> Nohinaeharenaeha, tyotyaki nihatyaka kaomakiterehare hiye ite naimenekotyala: Hinamahareya xolalihare tahi irakakoaha hoka hakakoaiya ahokotyaha tyomahitere tahi hoka haexareha kakoare mokahene hoka mahaiya xalahare jiyahaotitene, exahe aexahitita hatyo hinamanaeha xahekola. <sup>16</sup> Nikare Abraão ana Enore wenati waiyexe isa aokowi, exahe ijikolahare ana xoaha. Maisa atyo Iraitu Waiyexe nita xini: “Exahe ijikolaharenai ana xoaha”, motya etakehare kahare haliti xaokaka ene xini irieta. Xakore hoka nexa atyo: “Exahe ijikolahare ana xoaha”, hatyo atyo haterore xaokaka. Hatyo atyo Cristo.

<sup>17</sup> Exakere atyo niraeha naokowita: Enore atyo irae Abraão kakoa hoka ireretere akere tyaoma aokowi.

Hoka Xaotyakiyaho 430-terehokoane najikinita kaotyakehenerenaeha atyo maisa aliyakere jiyahaotita Enore ahokohenerene, exahe emaisahitita isa aokowihenerenaeha. <sup>18</sup> Hiyaiya, étakehare Enore ijiterehare-naiya atyo Xaotyakiyaho hiyeta hoka nikare atyoala hoka ijitereharenai atyoala maisa isa aokowiterehare-nai hiyeta xini ijita. Xakore hoka Enore isehenerenaeha Abraão ana atyo isa aokowihenerene hiyeta isa.

<sup>19</sup> Nikare hoka xoare niyahare Xaotyakiyaho kaotyaka? Kaotyaka atyo hotikisa maheta Enore xahekola kakoa kahalakoahareterehare. Hoka Xaotyakiyaho ene atyo kinatere tyaohena tyohenerene Abraão jikolahare kijiya taita. Hatyo ana atyo Enore xolalihare waiyexe isa aokowi. Hoka anjonai atyo isene hatya haliti ana, hoka hatyo atyo ekaxaikotyase tyaona. <sup>20</sup> Xakore hoka haterore tahi atyo kairaetyakehena hoka maisa atyo ekaxaikotyase aka. Hoka Enore atyo haterore.

### Xaotyakiyaho Akiti

<sup>21</sup> Xoana nikare ala hoka xaotyakiyaho mahokoanetita Enore isa aokowitere harenaeha? Maisa nikarexe xini. Hiyaiya, hatya xaotyakiyahoiya atyo kaxekakere haliti waiyexe maniya moheta maheta hoka xaotyakiyaho hiyetaiya atyo Enore haliti waiyexe aohitita. <sup>22</sup> Xakore hoka Iraitu Waiyexe atyo xakaita hoka tyotyala halitinaeha atyo iniyalahare niyatere konita tyaonahitaha aoka. Nikarexe kawenatyakita, kasani Jesus Cristo katyakekotyakitere hiyeta tyotyaha ana kaxekaka maheta Enore isa aokowitereharenai tyakekotereharenai ana.

<sup>23</sup> Xakore hoka tyakekotu kaotyakehenerene nahitita atyo xaotyakiyaho kaxaikota wiso hoka berexo ako tyaonitere akere tyaoma moka wiso, tyakekotu kaotyakene kahotikisakehenerene kijiya. <sup>24</sup> Wikaxaikotyase akere tyaoma xaotyakiyaho kaxaiko wiso Cristo tyoanene kijiya, hoka wityakekone hiyeta Enore haliti waiyexe aoka wiso maheta. <sup>25</sup> Hoka kalikini atyo tyakekotyati ferakene kaotyaka hoka maisaiya atyo xoare maheta wikaxaikotyase wisaohitita hoka kaxaikohitita wiso.

<sup>26</sup> Hiyaiya, xityakekohenerene hiyeta atyo Enore ityaninaeha xisaona, Jesus Cristo kakoa hahotyalyita xisaonitere hiyeta. <sup>27</sup> Hiyaiya, hahotyalyita xisaonitere Cristo kakoa hiyeta atyo xikabatixatyaka. Nikare hoka Cristo hárero akere tyaoma tyaoma xisaona. <sup>28</sup> Hatyo hiyeta maisa atyo hawareharexe xini: judeunae exahe majudeuneharenaeha, wakaharenaeha exahe mawakahareharenaeha, enanaeha exahe ohironaeha xoaha hoka. Xityotyala atyo xihaterore, Jesus Cristo kakoa hahotyalyita xisaonitere hiyeta. <sup>29</sup> Koxaka atyo Cristo anerenae xisaona hoka hatyo hiyeta Abraão jikolaharenai atyo xisaona hoka kaxekakaite xomana Enore isa aokowihenerenaeha xomana.

**4** Exakere niraehitiya naokowita: Kalorexe ityani xoimitatere xowaka atyo wakahare akere tyaonita, tyotyala hanexe xiyehare xekohasehare tehitiya xakore hoka. <sup>2</sup> Xoimitatere xowaka haiyaharenaeha aotyakijitene, exahe ixiyehare harenaeha kaxaikota

enexe xaimenekolaose kijiya. Hoka hatyo enexe xaimenekolaose hikoahena hoka kalorexe tyaonita.

<sup>3</sup> Nikareta tehitiya wiyoimitatere wawenane kakoa xowaka isekohaliti ali waikohekoa kaxaikotyasehare aokitere akereta ene wisaonita. <sup>4</sup> Hatyaoseta xane enaose hioa hoka Enore axikatya Haisani. Haloti tyakota tyaona hoka judeunae xaotyakisakaho xema tyaona, <sup>5</sup> iyeheta maheta judeunae xaotyakisakaho xema tyaoniterenai hoka Enore ityaninae wisaona maheta.

<sup>6</sup> Hotikisa maheta womana haisaninai aohenere wiso, Enore axikatya Haisani Nisekohare womana hoka hatyo Isekohaliti kawijita: “Abá, abá”, nita. <sup>7</sup> Nikare hoka maisa atyo wakaharenaeheta xini xiso. Ityaninae atyo xiso. Koxaka atyo ityaninae xisaona hoka haisaninae ana isa aokowitereharenae atyo ite isa xomana.

### Paulo Mawaiyehare Gálatas Yerenai Kakoa

<sup>8</sup> Toahiya Enore maniya ximawenaneharetatere xowaka ene enore metalaharenae wakaneharenae xisaonita. Maisa atyo aliterexe enoreha xini. <sup>9</sup> Xakore hoka kalikini atyo Enore maniya xisaonita, exahe Enore aoka xiso haomanere maheta. Nikare hoka xoana hoka xahaikoaheta xaokowita hatyo isekohaliti maiy-aterehare tyaoniterenae ana, exahe xoalini hare maomanehare ana xaokowita? Xoana hoka ewakaneharenae xisaona xaokowihitiya? <sup>10</sup> Xoana hoka haiyaki ferakene, mijini, kamaikene, enonene, terehokoane masakare waiyeta xomana?

<sup>11</sup> Nomawaiyehareta kalore xikakoa. Xoana naotyakenere xiso ala maisa xoarehare tyomita xomana?

<sup>12</sup> Nohinaeharenae, kasani natyo akereta xisaona naokita. Hiyaiya, xiso akerexeta natyo. Exahe maisa xoare iniyalahare xisomita nokakoi. <sup>13</sup> Xoana xotita hetati Iraitai Waiyexe noxakaihenere xihiyeta? Hatyo xowaka nohokakita hoka notyoo xinali hoka noxakai xihiyeta Iraitai Waiyexe. <sup>14</sup> Nohokakita hare hoka kahare nahakakisa xiso xakore hoka maisa xahalakijita, maisa xikirawaneta natyo. Waiye xamoka natyo, anjo Enore nalitare akereta, Jesus Cristo akereta xamoka natyo.

<sup>15</sup> Exowaka ene xihalahare xisaonita. Exakere ite nomi: kaxaitoakisakereya xiyosenai hoka xaitoakiseniya hoka xiseniya nomani! Hoka hatyo najikinita xoana xisaona? <sup>16</sup> Xoana kalikini ala xahalakoahare notyaona aliterexe niraihenere hiyeta?

<sup>17</sup> Exe halitinae waiyexehare tyaonahitaha xiyahita, xakore hoka maisa atyo waiye maniya xini exahekola-ha tyaonita. Kasani atyo kikihenahitaha xiso nonitita aokowitaha hoka exemaha xisaona maheta noximi maniya xisaonitere akereta. <sup>18</sup> Waiyeya mokahitaha xiso, waiyeya ahekotyaha xikakoa nohaotita, exahe nomakanihena hoka ehokoreya.

<sup>19</sup> Nohinaehare, noxiyakawalinae: hatya ohiro kaisaniro hiye ityani kawetere akereta noxamaikohalini nokihixita xihiyeta. Heko ite namaikoharehena Cristo koamaniya xikinaterere xisaohenere kijiya. <sup>20</sup> Kalikiniya nali xihaliya notyaonita hoka hahekoreya nira xikakoa. Kalore nomawaiyehareta xikakoa.

### Agar, Sara Xoaha Xaimenekola

<sup>21</sup> Xiso xaotyakiyaho xema xisaona xaokowiterenae: xiraihena hoka nasema. Xoana maisala xasemita xaotyakiyaho irahenerehare? <sup>22</sup> Exakerexe xakai: Abraão hinama mokose kaisani aoka. Hatya atyo wakahalo Agar ityani, hatya atyo exanityo kaiserehare Sara ityani xoaha. <sup>23</sup> Wakahalo ityani atyo ekaisanisakahare kaiserehare hoka exanityo ityani atyo Enore isa enomana aokowihenere.

<sup>24</sup> Hatyoharenai atyo aimenekoita: Hinamahalo atyo aimenekoita hinama wenati tahi akiti. Tyairi Sinai atyo Agar hotikijita. Hatyo aimenekoitere hiyeta nawenane-nae atyo wakaharenae. <sup>25</sup> Agar atyo aimenekoita tyairi Sinai, Arábia koa nali, exahe Agar aimenekoita tehitiya wenakalati kalikiniye Jerusalém. Hatyokoare hotyalinai atyo tyotyaha wakahare tyaonahitaha.

<sup>26</sup> Hoka Sara atyo aimenekoita wenakalati Jerusalém enokoa tyaonitere. Hatyo atyo maisa wakahalo xini hoka wityo atyo. <sup>27</sup> Hiyaiya, exakere atyo Iraitai Waiyexe nexa:

Hiso ohiro, maisa kahare kaisanihenolo: Maika hihalalohena! Hiso maisa xoana xowaka xoima kahe kakoa hiwaolitihenolo: Maika hakawiyahena hihalalohene kakoa. Hiyaiya, ohiro ehalakisakahalo atyo ite kahare kaisanihena exanene kakoa tyaonitolo nonitaita.

<sup>28</sup> Hoka xiso nohinaeharenae atyo Isaque akereta, Enore ityaninai, irahenere Abraão kakoa hiyeta.

<sup>29</sup> Hatyo xowakiya ekaisanisakahare tyaohenere kirawaneta xoima Enore Nisekohare hiyeta tyaohenere. Nikare atyo kalikini kawenatyakita.

<sup>30</sup> Xakore hoka aliyakerexe Iraitai Waiyexe nexa? Exakerexe atyo nexa:

Haxikahetehena wakahalo, ityani kakoita. Hiyaiya, wakahalo ityani atyo ite maisa hanexe wenekoare tyaonita. Mawakahalohalo ityani atyo ite hanexe wenekoare tyaona.

<sup>31</sup> Hatyo hiyeta, nohinaeharenai, maisa atyo wakahalohalo ityani xini wiso, xakore hoka ohiro mawakahalohalo ityaninae atyo wiso.

### Xaotyakiyaho Xamani Mehaxikohaliti Xamani

**5** Cristo atyo iyeheta wiso wiwakaharene nonitata hoka mawakaharehare moheta wiso. Hiyeta hoka heko mawakaharehare xisaona, awa atyo wakahare maniya xisaohitiya.

<sup>2</sup> Xasemehena, natyo Paulo niraeta xihiyeta: Xomanere milihe xaikotyaka xemaia xisaona xaokowita hoka Cristo atyoala maisa xoarehare tyomare xomana. <sup>3</sup> Niraihitiya xikakoa: Hatyaterere nomanere milihiya kaxaikotyaka hoka xaotyakiyaho aokitere akereta atyoite tyaohena. <sup>4</sup> Haiyaharenai xaotyakiyaho xema hawenaneha hiyeta Enore haliti waiyexe aokahene aokitere-nai atyo haware tyaonita Cristo nonitata, exahe Enore xawaiyera xoaha nonitata. <sup>5</sup> Hoka wiso atyo watyaha-haretyoita Enore haliti waiyexe aohenere wiso xahita.

Hatyohare xahita atyo watyahita, Enore Nisekohare tyaonitere wikakoa hoka wityakekoterene hiyeta. <sup>6</sup> Hiyaiya, hahotyalyita atyo wisaohena Jesus Cristo kakoa hoka maisa atyo ehawareharetyare wiso, xoana exaiko nomanere milihisahare xamani wiso, maisa xamani hoka. Hoka wityakekone hiyeta xawaiyetyati tyaonitere wihiye atyo masakare waiye.

<sup>7</sup> Waiye ene xisaonita. Xala nikare moka xiso hoka maisa xityakekohitita aliterexe? <sup>8</sup> Aliyakere hoka nikare moka xiso? Enore atyo aoka xiso haomana hoka maisa atyo hatyo xini nikare moka xiso.

<sup>9</sup> Hiyaiya, exakere Iraitu Waiyexe nexa:

Inira trigohe kaoretyakala, xakore hoka hakakoare etalokoehetita trigohe.

<sup>10</sup> Xakore hoka notyakekotata atyo xiso. Hahotyalyita wisaonitere Xekohaseti kakoa hiyeta atyo waiyekehakita nomani hoka waiyexe maniya ite xahekeheta naoka. Hoka xala xamani ite hatyo haliti nikare axomokanikisa xiso hoka Enore ite iniyalahare mokene.

<sup>11</sup> Nohinaeharenae, hekoiya niraeta xaikonomanere milihisati atyo masakare waiye nomitaiya hoka xonere hoka kirawanahitaha natyo? Hatyoharenaiya aliterexe noxakaita hoka maisaiya xala hare ana enawenane howitihare tyaonare Jesus Cristo atyalihose xaimaholatyaka hiye wainihenere tahi noxakaitere hiyeta. <sup>12</sup> Hatyo haliti ahowitihalikijitere xisoiya tyotya matakolasetyoawi haxowakita hoka ehokoreya!

<sup>13</sup> Nohinaeharenae, Enore atyo aoka xiso haomana hoka mawakaharenehare xisaona maheta. Mawakaharenehare xakore atyo xiso hoka xirihare, awatyo iniyalahare xawaiyetiterekere jiyahaotya xiso. Maika xawaiyetya kakoa, xakahinaetya kakoa harenae taita. <sup>14</sup> Hiyaiya, tyotya xaotyakiyaho atyo kaxakiranetyakeheta hoka haterore tyaona:

Hawaiyetya haiyanare hawaiyetyoawitere akere. Nikareya wisaona hoka xaotyakisatyaho aokitere akere wisaona.

<sup>15</sup> Hoka haiyanai kakoaiya kawo xamokakakoa, xakomaniyatyakakoa harenai taita, kirakahare akere hoka maika xirihare hoka maisa xisota xaisakakoita.

#### Enore Nisekohare Exahe Halitinai Xahekola

<sup>16</sup> Exakere atyo nomita: maika Enore Nisekohare xema xisaona, awa atyo xiyahakola halitinae awaiyiterekere harenae xema xisaona. <sup>17</sup> Hiyaiya, wawaiyetiterekere harenai atyo Isekohaliti aokiterekere harenai mahokoanetita, exahe Isekohaliti aokiterekere harenai atyo wawaiyetiterekere harenai mahokoanetita. Hatyo hinamanai atyo kahalakoahare kakoahitaha. Hatyo hiyeta maisaiya xisomitata xaokiterekere harenai. <sup>18</sup> Hoka Isekohalitiya atyo kaxaikota xiso hoka maisa atyo xaotyakiyaho xema xini xisaonita.

#### Iniyalahare Nomaseharenae Atyoite Maisa Xaneta Enore Nawenakala

(1 Corintios 6.9-10; Efésios 5.1-7; Colossenses 3.5-6)

<sup>19</sup> Wawaiyetiterekere harenae atyo mametaharenehare tyaonita: ohiro watyalisaka, iniyalahare xahekore, kehaisaka kawenatyakitere, <sup>20</sup> enore metalahare kaxawaiyetyakiterekere hare, ihoxare kakoare, ahalakoahare kakoiti, xalijini kakoiti, xehaliti, okoawahaliti, kalorexe xaokowisaka, haware xakini xahekotyaka, <sup>21</sup> okoawahare kakoati, hekitererekere hare, kehalahaliti tyomiterekere hare, exahe xoalini harenae nikaretereharenae hoka. Nirahitiya ite koxaka nirahenere: Nikare tyaoniterekere harenai atyo ite maisa Enore nawenakala nali xane tyaonita.

<sup>22</sup> Hoka Isekohaliti hiyeta atyo kaotyakita xawaiyetyati, ihalahaliti, mehaxaikohaliti, maholawakiti, maxalijiniti, waiyexehaliti, tyakekoti, <sup>23</sup> maxahenerahaliniti, kaxaikotyoti harenae. Maisa atyo xoare xaotyakiraho exeharenae mahokoanetyare.

<sup>24</sup> Cristo koamaniya tyaoniterena atyo atyalihose xaimaholatyaka hiye eberekotyakahare akere haxahokolaha iniyalahare, ewaxirahare harenae mokaha. <sup>25</sup> Maika Isekohaliti wenati isehenere womana, kaxaiko tehitiya wawenane. <sup>26</sup> Maisaiya waokowiharetyoita, hatya waihalikijita, wokoawahare kakoita harenae.

#### Maika Xakahinaetyakakoa

**6** Nohinaeharenae, hatya iniyalahare tyomehena hoka xiso Enore Nisekohare maniya xisaoniterena xiwatyalini, exahe xakahinaetene xoaha. Maika hatyoharenae xisomehena hoka ximaxaokowiharetyoane kakoa xisoma. Maika xirihare, waiye aliya hoka xikahasakaharetyaka tehitiya. <sup>2</sup> Maika xakahinaetyakakoa. Nikareya atyo xisaona hoka Cristo xaotyakiraho xemaiya atyo xisaonita. <sup>3</sup> Xala xamaniya kalorexe aokowita, maisa xakoreya kalorexe xini hoka hatyota atyo maoseratyoawita. <sup>4</sup> Maika hatya xakini hahatene hiye waiya. Ehateneya atyo waiye hoka hatyo háomane kakoa taitaiya atyo ihalahare, maisaiya xoare maheta hatya hatene kakoa aimenekoita hahatene. <sup>5</sup> Hiyaiya, hatya xakini atyo ite kolahena hakolala terotere.

<sup>6</sup> Maika Jesus Cristo niraene kalikinihena semitererekere haxaotyakisase kakoa irakakoahena xoalini hare waiyexe. <sup>7</sup> Awa atyo xamaoseratyoawi, awa atyo Enore kakoa xikoexahaxatya. Hiyaiya, hatya haliti ite fehenereta imexeheta tehitiya. <sup>8</sup> Hafityaiya iniyalahare hahekotere hoka hatyo iniyalahare hafehenere hiyeta ite hiyaisakaho aimexanikiheta hiso. Xakore hoka hafityaiya atyo Enore Nisekohare aokiterekere hoka hatyo Isekohaliti hiyeta ite wenati matyotenekere harenai aimexanikiheta hiso.

**Maika Heko Xityakekone Xema Xisaona**

(1 Coríntios 15.58; Efésios 6.10-18; Filipenses 4.1; 2 Timóteo 2.1-3)

<sup>9</sup> Maisaiya waiye wománe kakoa wikirahareta. Hiyaiya, maisaiya wamaikohareta hoka enaoseya xane hikoahena hoka kalore ite kaxekaka womana. <sup>10</sup> Hatyo hiyeta maika tyotya haiyaharenae waiye wamoka, exahe Enore koamaniya tyaoniterenae masakare waiye wamoka.

**Tyawaxatinae, Xaotyakisatinae Miyane**

<sup>11</sup> Xiyaiyehena, kalose naxairaitere nokahe kakoa.

<sup>12</sup> Haiyaharenae atyo hotikisoawiha hoka kaihalaharetyaka ekakoaha aokahitaha hoka aiyateretyoahitaha xiyahita, kasani xomanere milihi kaxaikotyaka aokahitaha hoka maisa kairawaiyakitaha Cristo atyalihose xaimaholatyaka hiye wainihenerere hiyeta aokahitaha. <sup>13</sup> Xakore hoka hatyo exaiko nomanere milihisakaharenae maisa xaotyakiyaho aokitere akereta tyaonareha. Kasani kaxaikotyaka xomanere milihe ho-

ka ahinityaha hatyo nikare xiháre hiye xakaferoxahenerere kakoa aokahitaha.

<sup>14</sup> Hoka natyo atyo ite naokowiharetyoahena Wiyekohase Jesus Cristo wainihenerere atyalihose xaimaholatyaka kakoa taita. Hiyaiya, atyalihose xaimaholatyaka hiyeta tyotya xoalini hare iniyalahare waini nomani, exahe hoka iniyalahare ana nowaini.

<sup>15</sup> Maisa atyo ininae hekoti hahekorexe xini xala xamani exaikonomanere milihisakahare, exahe xoana maisa xamani hoka. Xakore hoka wawenane atyo waitarehare tyaoheha hoka hatyo atyo masakare waiye kaiserehare. <sup>16</sup> Tyotya exehare xema tyaonitereharenae ana maika mehaxaikohaliti, xairakoaneharetyati harenae tyaoheha, exahe tyotya Enore koamaniya tyaonitereharenae ana xoaha. <sup>17</sup> Hiyeta hoka kasani maisa xala hare ahowitiharetya nawenani naokare. Hiyaiya, nokakaxoseharetyakitere noháre hiyexe atyo hotikijita Jesus wakanehare notyaonitere.

<sup>18</sup> Nohinaeharenae, maika Wiyekohase Jesus Cristo waiye moka xiso xityotya naoka, eko xoaha.



# Efésios

**1** Natyo Paulo, Jesus Cristo niraene kakoare notyaonita Enore xaokalita. Hoka naxikatya exe babera Enore koamaniya tyaoniterenae wenakalati Éfeso nali tyaoniterenae ana, exahe tyotya Jesus Cristo koamaniya tyaoniterenae ana xoaha. <sup>2</sup> Kasani waiye ximehexaiko xisaona wexe Enore hiyeta, Xekohaseti Jesus Cristo xoaha hiyeta naokita.

## Enore Waiye Xomokareheta Wiso Cristo Hiyeta

<sup>3</sup> Maika wihalahare Enore Wiyekohase Jesus Cristo Nexe kakoa. Hiyaiya, Cristo koamaniya wisaonitere hiyeta atyo waiye mokita wiso hoka ijita womana tyotya xoalinihare waiyexe enokoa nalitare. <sup>4</sup> Toahiya waikohe maomakaharetatere xowaka, Enore koxaka terota aoka wiso haomana, enomanerenai wisaona maheta, Cristo xema maniya wisaohenere hiyeta, hoka waiyexe maniya taita wisaona maheta ehaotita. Haxawaiyera wiso hiyeta <sup>5</sup> Enore koxaka terota haisaninae aowita wiso, Jesus Cristo xema maniya wawenane hiyeta. Haxaokala ximita nikare mokita wiso. <sup>6</sup> Hatyo hiyeta maika wihalahare Enore kakoa exawaiyera waiyexe hiyeta, exahe maxaimanehareta isehenere womana Haisani haxiyakawalahare xoaha hiyeta.

## Waiyexe Maniya Nawenatyakeheta

(1 Coríntios 15.2-4; Efésios 2.8-9; Hebreus 7.25-27; 10.10-14)

<sup>7</sup> Hiyaiya, Cristo wainihenere atyalihose xaimaholatyaka hiyeta atyo wikaiyakhitita, hoka iniyalahare wománenai atyo kamaotyanyakihitita. Kaxiyani, waiye kaiserehare Enore xawaiyera, <sup>8</sup> kalore isehenere womana! Enore tyotya kalore hawaiyore exahe haxahekola kakoa, <sup>9</sup> tyoma aokowitere tyoma, hoka hotikisa womana hameteneta tyoma aokowiterehare Jesus Cristo hiyeta. <sup>10</sup> Hatyo tyoma aokowitere atyo ite haxowaka xane hikoahena enaose ferakene hoka aho-hisakoahetehena tyotya enokoa, waikohekoa harenai tyaoniterenai hoka Cristo taita Exekohaseha tyaohena.

<sup>11</sup> Hiyaiya, tyotya atyo kaomaka Enore xahekola exahe tyoma aokowitere akereta. Aoka wiso haomana enomanere hotyali wisaona maheta, Cristo xema wisaonitere hiyeta. Exahekola akereta, exahe hetati tyoma aokowihenere akereta. <sup>12</sup> Hatyo hiyeta wiso hotohare tyare atyo Cristo xahita watyahita hoka maika wihalahare Enore nerore kakoa.

<sup>13</sup> Nikare tehitiya xisaona. Waiyexe iraiti xasemenere isekohaliti niyasehare tahi iraterere xowaka xityakeko Cristo. Hoka Enore aokitere akereta kaferoxatya xiso haxiyehare akereta, Isekohaliti Waiyexe ise-

henere xomana xowaka. <sup>14</sup> Isekohaliti Waiyexe hiyeta ite Enore haomanerenae ana isa aokowihenereharenai kaxekaka womana. Haomanere hotyalinae ana atyo ite wenati waiyexe isa. Hatyo hiyeta maika wihalahare Enore nerore kakoa.

## Paulo Niraexala Éfeso Yerenae Ana

<sup>15</sup> Hatyo hiyeta nasemehenereta Jesus Cristo xityakekone, exahe xawaititere tyotya wihinaeharenae tyakekohatienae <sup>16</sup> hekota maisa niraexali Enore hiye nahalakisare. Notyaxematya minita xiso niraexali kakoa. <sup>17</sup> Exahe naxita Enore, Wiyekohase Jesus Cristo Nexe waiyexe: kasani Haisekohare isa xomana hoka airihalinikisa, awaiyolonikisa xiso, hotikisa xomana Enore hoka xawaiyore ekakoa maheta. <sup>18</sup> Naxitene, kasani axahekotyanyakisa xiso hoka xiyaiya maheta xaokanatyakalati, exahe waiyekehalaka tehitiya xomana kaxatyahakitere ana kawihenere xiso. Exahe waiyekehalaka maheta tehitiya xomana xoalinihare waiyexe isa aokowiterehare haomanere hotyalinae ana. <sup>19</sup> Kaxiyani! Kalore atyo iniyatere tyaonita wiso tyakekoterenai kakoa. Kasani hatyohare waiyekehalaka xomana naokita.

<sup>20</sup> Hatyo iyateliti atyo etake Enore hotikihenere haiyaterere mawaiyakahare hoka ekasekihetehehene Cristo hoka hafihini maniya mohenerene enokoa nali terota.

<sup>21</sup> Cristo atyo kaxaikota tyotya kalorexenai enokoa tyaoniterenai, xekohasetinai exahe iyatelitinai kakoarenai harenai. Exe waikohekoa tyotya xekohasetinai tyaoniterenai, exahe waitare waikohekoa tyohenere xoaha xahehare atyo. <sup>22</sup> Enore atyo moka tyotya xoalinihare Cristo kiji katyahe, exahe Cristo hoka kaxekaka tyakekohenerenae ana, Exekohaseha tyaona maheta. <sup>23</sup> Cristo atyo kaiyihiti akereta enomanaha hoka tyakekohenerenae atyo Cristo háre akereta tyaonita hoka etalokoatitene tyotya akiti.

## Iniyalahare Wenati Maniyata Waiyexe Wenati

**2** Toahiya ene ekamane akereta xisaonita, Enore ximatyakekonene hiyeta, exahe iniyalahare xománe xoaha hiyeta. <sup>2</sup> Hatyo xowaka ene iniyalaharaho xisaonita, exahe xityakekota ene etake isekohalitinae kaxaikotyasehare kaholahekoare tyaonitere. Hatyo atyo kalikini matyakekoneharenae kaxaikota. <sup>3</sup> Wiso tehitiya hatyoha akereta ene wisaonita hoka wiyahekola ewaxirahare xema ene wisaonita, exahe xoalinihare waekoiterehare, wawaiyetiterehare xoaha xema ene wisaonita. Nikareta hatyo haiyaharenae akereta

ene Enore iniyalahare xomokala mahetare ene wiso. <sup>4</sup>Xakore hoka kalore atyo xairakoaneharetyati kakoare exahe xawaiyetyati xoaha kakoare atyo. <sup>5</sup>Ekamane akereeta ene wisaonita wimatyakekonene hiyeta, hoka ekasekiheta wiso Cristo wityakekohenerere hiyeta. Hiyaiya, Enore nawaiyexehare hiyeta atyo xikaiyakeheta. <sup>6</sup>Enore atyo ekasekiheta wiso Jesus Cristo wityakekohenerere hiyeta, exahe hahotyalita moheta wiso enokoa nali xekohasetinae wisaona maheta haxawalita Cristo kakoa.

<sup>7</sup>Nikare Enore tyoma hotikisa maheta haiyanai wajikinita tyaohenerenai kahare xolinhare waiyexe xema ana, haxawaiyera hiyeta atyo hotikisa hatyoharenai Jesus Cristo hiyeta. <sup>8</sup>Hiyaiya, Enore xawaiyera hiyeta atyo xikaiyakeheta xityakekone hiyeta. Hatyoharenai atyo maisa xinalitare xini tyoita, xakore hoka Enore xekane maxaimanehare atyo. <sup>9</sup>Xikaiyakehete-henerere atyo maisa xaiyateretyoa xahahenerere xaimane xini, hoka hatyo hiyeta maisaiya xala hare aokowiharetyoita. <sup>10</sup>Hiyaiya, Enore atyo tyoma wiso, hoka Jesus Cristo kakoa hahotyalita wisaoehenerere hiyeta aenaetya wiso waiyexe wisoma maheta. Hatyo waiyexe atyo koxaka memere terota mohenerere womana.

### Cristo Kakoa Haxawalita Nawenatyaka

<sup>11</sup>Xotyaira toahiyere xawenane: maisa atyo judeunae xini xiso. Hatyo hiyeta atyo maxaikonomanere milihesakaharenae aokahita xiso judeunae. Hoka judeunae atyo haxaokakahita, "Kaxaikonomanere milihisakerenae", nita. Nikare atyo iraeta judeunae halitinae nómane xaokaka. <sup>12</sup>Hatyo xowaka ene haware xisaonita Cristo nonitata, mawaiyakahare hotyalinae ene xiso. Exahe maisa ene Enore haomanere hotyalinae aokiterenai koniye ene xiso, mawaiyakahare hotyalinae ene xiso. Exahe iraiti Enore haomanerenae ana aohenerere ene atyo maisa xomanere ene xini. Maisa ene xoare xatyahare, exahe ximaenorexahare ene xisaonita.

<sup>13</sup>Xakore hoka kalikini atyo Cristo kakoa hahotyalita xisaonita hoka xiso seko Enore nonita tyaoniterenae atyo xikakolatya ehaliya xeta, Cristo atyalihose xaimaholatyaka hiye wainihenerere hiyeta. <sup>14</sup>Hiyaiya, Cristo terota atyo mehaxaikohaliti isa womana hoka judeunae, majudeuneharenae harenai hahotyaliharerota moheta. Wainihenerere hiyeta emaisaheta wirawaiyakakoane talare akerehare haware xakini mokitere wiso. <sup>15</sup>Hoka judeunae xaotyakiraho, ewakanahoha xoaha miyatya, hoka hinama hotyali tyaoniterenae atyo hahotyaliharerota moheta, waitare hotyali exahe exema maniya nawenatyaseharenai. Nikare mehaxaikohare mohenahitene. <sup>16</sup>Wainihenerere atyalihose xaimaholatyaka hiyeta Cristo emaisatya irawanekakoati. Hoka atyalihose xaimaholatyaka hiyeta ahohisakoaheta hinama hotyali halitinae hoka hahotyaliharerota mohenahitene hoka ekaokakihenhahitiyene Enore haliya.

<sup>17</sup>Nikare Cristo tyoa hoka xakaihakatya tyotya ihiyeha Iraiti Waiyexe amehaxaikohalikisare. Xiso majudeuneharenai, seko xisaoniterenai Enore nonitata ana,

exahe judeunai, koxaka ehaliya tyaoniterenai xoaha ana. <sup>18</sup>Wityotyia judeunai, majudeuneharenai kakoita Cristo hiyeta wiyane wikaokehena Wexe Enore nahalakoa Isekohaliti isehenere womana hiyeta. <sup>19</sup>Hatyo hiyeta xiso majudeuneharenae atyo maisa hahotyalihareheta, exahe mawaiyakaharenaheta xini. Xiso atyo kalikini Enore anere hotyalinae terota xisaonita. Ehotyalihare atyo xisaona.

<sup>20</sup>Xiso atyo hati waharexe akereeta. Jesus niraene kakoarenae, exahe toahiyere iraiti xakaisaseharenai atyo ehokolikase akereeta. Hoka Jesus Cristo atyo ekotaxanekase akereeta. <sup>21</sup>Hatyo ekotaxanekase atyo aiyatelikijita hati hoka hatyaoseta kinatere tyaonita. Ekakoitaite memere tyaonita hoka Xekohaseti hana waiyexe terota tyaona. <sup>22</sup>Nikareta tehitiya xiso. Hahotyalita Cristo kakoa xisaonitere hiyeta xikaomakita, hahotyalita haiyanai kakoa hali hati xisaona maheta, hoka hatyo hati ako atyo Enore tyaonita Haisekohare maniyata.

### Paulo Hatene Majudeuneharenae Koni

**3** Hiyeta hoka niraexaita Enore ana. Hiyaiya, natyo Paulo Jesus Cristo tahi akiti noxakaitere xiso majudeuneharenae hiyeta kalikini berexo notyaonita. <sup>2</sup>Kala koxaka waiyekehalaka xomana, Enore haxawaiyera hiyeta, exe hateniti isehenere nomani waiyexe xawenane niyahare tahi akiti naoka.

<sup>3</sup>Enore atyo hotikisa nomani haxahekola meta-harexe. Awaiyekehalakatene nomani hoka ininae naxairatene. <sup>4</sup>Xakaexaretyaiya naxairahenerere hoka waiyekehalaka xomana Cristo xahekola metaharexe waiyekehalakitere nomani.

<sup>5</sup>Toahiya xowaka exe metaharetere maisa xala hare ana waiyekehalakere hoka kalikini atyo Enore hotikisa exe metaharexe Haisekohare hiyeta, waiyexe haxaotyakiraharenae exahe iraiti xakaisaseharenae xoahanae ana. <sup>6</sup>Exakerexe atyo exe iraiti metaharexe: Iraiti Waiyexe hiyeta atyo majudeuneharenae anere tehitiya tyaona judeunai anere waiyexe tyaonitere enokoare. Haterore háre hiyeta atyo tyaonahitaha hoka Enore isa aokowihenerereharenae enomanaha, Jesus Cristo hiyeta atyo enomanereha terota.

<sup>7</sup>Exomokakahare atyo natyo Iraiti Waiyexe noxakai maheta Enore xaokalita. Waiyoliniti, iyateliti harenae Enore isa nomani, kalore haiyaterere hiyeta. <sup>8</sup>Natyo atyo tyotyia Enore anerenae katyahakoreta, xakore hoka iraiti waiyexe xakaisasehare atyo aoka natyo. Cristo tahi wenati masakare waiyexe noxakai maheta majudeuneharenae hiye. <sup>9</sup>Nawaiyekehalakatya tehitiya tyotyia halitinae ana exahekola metaharexe maheta. Hatyo atyo tyotyia xolani hare tyoma, xakore hoka hatyo metaharexe wahakiya maisa hotikisare hekoti. <sup>10</sup>Exakere moka hoka kalikinita kalorexenaenae enokoa tyaonitereharenae exahe anjonaenae xoaha ana waiyekehalaka maheta Enore nawaiyore, tyakekohatiyenae nawenane hiyeta. <sup>11</sup>Nikare Enore ahekotya, haxahekola matyotenehare hiyeta hoka hatyo haxahekola ak-

ereta tyoma memateni Wiyekohase Jesus Cristo hiyeta.

<sup>12</sup> Hoka Cristo xema maniya wisaonitere, wityakeko-henerene xoaha hiyeta atyoite wimamairanehareneta wiyane wikaoka Enore nahalakoa. <sup>13</sup> Hatyo hiyeta awatyto xamaikohare iniyalahare nokaxomokakitere xihiyeta hiyeta kakoa. Hiyaiya, exakerexe atyo nokaxomokakita waiye xikaxomokaka maheta.

### Cristo Nawaiyexehare

<sup>14</sup> Hatyo hiyeta nokaolise kakoa notyoka wexe Enore nahalakoa hoka niraexaita. <sup>15</sup> Ihiyeta atyo kahotyaliyeharenai enokoa, waikohekoa xoaha tyaoniterenai kakaexaretyakita. <sup>16</sup> Hoka Enore naxita hoka kasani kalore waiyexe kakoa tyaonitere hiyeta, isa iyateliti xomana naokita Haisekohare maniyata hoka xikinateri xisaona maheta. <sup>17</sup> Naxitene tehitiya, kasani xityakekone hiyeta, Cristo tyaona xikakoa naokita. Exahe niraexaita xomana, kasani atya akereta xikatya-harexe xisaona, exahe hati hokoli kase akereta xikinateri xisaona xiyawaiyetyakakoane kakoa hoka <sup>18</sup> waiyekehalaka xomana naokita tyotyta Enore kaxaikoneharenai kakoa Cristo xawaiyera: enerokoa, enowahahare, ewahaharene, ehatekone harenai naokita. <sup>19</sup> Nikare hoka waiyekehalaka xomana maheta exawaiyera, exahe xakore atyoite maisa masakare waiyekehalakita xomana hoka. Hoka hatyo hiyetaite Enore tyaona xikakoa kaiserehare.

<sup>20</sup> Kasani Enore kakoa kaihalaharetyaka kaiserehare naokita. Hoka iniyatere tyaonitere winekoni hiyeta, waxitere, wahekoitere xahexe tyoma womana. <sup>21</sup> Maika Enore kakoa kaihalaharetyaka tyakekohatiyenae hiyeta, Jesus Cristo hiyeta xoaha tyotyaki ferakene, exahe matyotenehare.

### Cristo Háre Tahí

**4** Hatyo hiyeta natyo tyare berexo notyaonita nahakitere Xekohaseti Jesus Cristo ana hiyeta hoka niraeta xihiye. Maika hetati Enore aohenere xiso xowaka waiye xisaona aohenere akereta xisaona. <sup>2</sup> Maika ximaxahenerahare, xasemaxematyare, ximehexaikhare xisaona. Awa atyo kinatyaxa xirae haiyaharenai kakoa. Xahotikisa enomanaha xiyawaiyerahene. <sup>3</sup> Maika xaiyateretyoahena hoka mehexasikohaliti hiyeta hahotyalita Isekohaliti mokitere xiso xema xisaona.

<sup>4</sup> Cristo hare atyo haterore, Isekohaliti Waiyexe hoka haterore. Enore aoka xiso haomana hoka haterore atyo xiyatyahane. <sup>5</sup> Haterore atyo Xekohaseti, haterore atyo tyakekoti, haterore atyo batixatyati. <sup>6</sup> Haterore atyo Enore, tyotyta Nexe atyo, exahe tyotyta Xekohase atyo. Hakita atyo tyotyta ihiyetaha, exahe tyaonita atyo tyotyta ekakoaha.

<sup>7</sup> Wityotyta, hatya ana xakini xoalini hare waiyexe kaxekaka, Cristo isehenere womana hakakoaneta.

<sup>8</sup> Hiyaiya, exakere atyo Iraití Waiyexe nexa:

Enokoa xanehenere xowaka kahare kolatya berexoako tyaoniterenae hoka isa xoalini hare waiyexe halitinae ana.

### Waiyoliniti, Iyateliti Waiyexe Enore Isa Halitini Ana

(Romanos 12.6-8; 1 Corintios 12.4-11)

<sup>9</sup> Xoare nere “enokoa xane”, nita? Exakerexe atyo: hetati exoa ako katyahe hotohare. Hatyo najikinita enoxeta xane. <sup>10</sup> Exoa ako katyahe hoka hatyo najikinita enokoa xaneheta hoka enokoa xaihako xane hoka tyotyta waikohekoa, enokoa xoaha ekaisetya hawenane kakoa maheta.

<sup>11</sup> Hatyo atyo isa xoalini hare waiyexe halitinae ana. Hoka haiyanai hairaene kakoare moka, haiyanai iraiti xakaisasehare moka, haiyanai xakaihakatya maheta iraiti moka, exahe haiyaharenai hoka tyakekohatiyenai kaxaikotyase, xaotyakisase maheta moka. <sup>12</sup> Nikare mokahene, Enore kaxaikoneharenai awaiyolinikisaha hoka waiyore hakaha maheta Cristo hatene hoka Cristo háre waiye kekoare maheta.

<sup>13</sup> Nikare ite haxawalita wityakeko hoka waiyekehalka ite womana Enore Ityani tahi akiti. Nikarite hoka wawenane waiyexe hiyetaite wikekoareta akereta wisaona hoka Cristo aokitere akereta wisaona.

<sup>14</sup> Nikare ite wisaona hoka maisa xoima akereta wisao-hitita. Hiyaiya, xoima atyo hoholati one ainakiyahena hoka nolokehekoaitene, exahe kinatyawiniti hoka herawasekoaitene. Hatyo akereta atyo haliti maoseratyaliyenai tyaonita hoka hahinaeharenai nawenane aiyalaharetyahitaha. Waiyore maoseratyahitene hoka xaotyakisati ehaikoare xema maniya mokahitene.

<sup>15</sup> Iraití waiyexe tahi taitaiya wirae, exahe wawaiyexeharene kakoa hoka wikekoareya wawenane Cristo koamaniya kakoa. Hiyaiya, hatyo atyo wiseri. <sup>16</sup> Eháre atyo iniyatere hiyeta waiye kinateri haxawalita tyaonita, kahinae tyakakoahitaha, hoka waiye tyaonahitaha. Hiyaiya, hakititere atyo waiye tyaonehena eháre hiyexe hoka tyotyta eháre atyo waiye kekoareta xawaiyetyakakoati hiyeta.

### Wenati Waitare Cristo Hiyeta

<sup>17</sup> Hatyo hiyeta Xekohaseti nexare kakoa niraetene, naiyateretyoahena: Awa atyo Enore maniya mawenaneharenai akereta xisaona. Hiyaiya, exahekolaha atyo maisa xoare tyomare. <sup>18</sup> Exahekolaha atyo makaliroti akerehare tyaonita. Maisa atyo Enore waiyexe aokitere xema maniya tyaonareha, maisa waiyorexeha, exahe semaxematyareha. <sup>19</sup> Tyotyta ehaiharenaha enonitaha, exahe isoawiha haxawaiyeraha ewaxirahare ana, tyotyta kahaiharetyakiterehare xoaha ana.

<sup>20</sup> Maisa atyo hatyohare tahi kakoa xini xawaiyore Cristo koamaniya xisaona maheta. <sup>21</sup> Aliterexe ala xasema etahi, exahe xisaonitere exema hiyetalá xawaiyore aliterexe Jesus hiye tyaonitere kakoa.

<sup>22</sup> Xahalakihena toahiyere xawenane toahiya ewaxirahare xisomitere, xahekoitere. Hiyaiya, hatyoharenai

atyo iniyalahare xiyahekola mawenekoaretita. <sup>23</sup> Maika xiyahekolanai tyoty xewaitareheta. <sup>24</sup> Xisaohena waitare wenati xema, hatyoharenai atyo kaomaka Enore aokitere akereta, hatyoharenai atyo kawaiyakita wenati aliterexe hiye, hatyohare atyo tota, waiye xoaha.

### Wenati Waiyexe

(Gálatas 5.22-24; Efésios 4.1-3; Filipenses 4.8; Colossenses 3.12-17)

<sup>25</sup> Hatyo hiyeta nikareta xamaoseratya. Xirahena xihinaehare kakoa hoka aliterexe taita xirae ekakoaha. Hiyaiya, wityoty atyo Cristo háre hiyetare. <sup>26</sup> Xeharehena hoka maika xirihare xisaona hoka maisa iniyalahare xisomita. Awa atyo xeharekoata mene. <sup>27</sup> Awa atyo ini hekoti xahalakihena xawenane Tihanare ana. <sup>28</sup> Xala xamani ene kaiwita hoka nikareta kaiwa hoka hahena kaisere hoka waiye tyaona, exahe kahinaetya maxiyehareharenai. <sup>29</sup> Awa atyo ewaxirahare kehaisakere xirae. Maika waiyexe iraiti taita xirae hoka haiyaharenae kekoare Cristo koamaniya hawenaneha kakoa, exahe aokahitere harenai akereta tyaonaha, hoka xiraetereharenae semehenerenae ana waiye.

<sup>30</sup> Awa atyo xexamaikohalinikihena Enore Nisekohare Waiyexe. Hiyaiya, Isekohaliti atyo Enore feroxa akereta tyaonita xihiyeye. Heko ite tyaona xikakoa Enore iyehetehenere xiso kijiya. <sup>31</sup> Xahalakihena irawaniti, xehaliti, xahenexatyati, xiholakakoati, iraharetyati harenae. Awa atyo xiyalijinihare. <sup>32</sup> Awa atyo hatyoharenae xema xisaona. Xawaiyexehare xisaohena, waiye xamokakoa haiyaharenae kakoa. Ximaotyanekekohetehena iniyalahare xománe kakoanae, iniyalahare xománe Enore maotyanehetehenere Cristo hiyeta akereeta.

### Maika Waiye Xisaona, Awa Atyo Iniyalahare Xisoma

(1 Coríntios 6.9-10; Gálatas 5.19-21; Colossenses 3.5-6; Apocalipse 21.8, 27)

<sup>5</sup> Xisonae atyo Enore ityaninae, ixiyakawalahanenae. Hiyeta hoka Enore tyaonitere akereta xisaohena. <sup>2</sup> Maika xawenane xawaiyetyati xema tyaona, Cristo awaiyehenere wiso akereta, hoka wainihenere wihiyeta akereta, hoka airaxero airaxexe, exahe Enore awaiyetitere jihatyati xoaha akereta xisaona. <sup>3</sup> Enore anere hotyalinai tyare atyo xiso hoka maisa atyo ehokoreta xini xiraekakoita ohiro watyalisaka, mase-maxematyati, maiyasetyati xoaha tahi. <sup>4</sup> Awatyo xirae-ta iraiti kehaisakere, maomaxetahare, ewaxirahare. Hiyaiya, hatyoharenai atyo maisa xomanere xini. Xakore hoka maika xihalaharehena Enore kakoa.

<sup>5</sup> Waiye xasema exeharenai: maisaiya hatya ohiro hiye tyaoniterehare, mahaiharenehare, mahakaiserexe, maiyasehatiye harenai xane tyaonita Cristo, Enore xoaha nawenakala nali. Hiyaiya, maiyaseti atyo enore metalahare xema nawenatyaka akerehare. <sup>6</sup> Hoka maika maisa xalahare hairaene maomaxetahare kakoa maoseraita xiso. Hiyaiya, hatyoharenai hiyeta atyoite Enore iniyalahare mohena hamatyakekotyasenai. <sup>7</sup> Hatyo hiyeta awa atyo nikare tyaoniterenae xema xisaona.

<sup>8</sup> Hiyaiya, toahiya ene xisonai makaliroti koni xisaonita, xakore hoka Enore anerenai hotyalinai xisaohenere aoseta atyo xaokanatyakalati koni xisaonita. Hatyo hiyeta maika xaokanatyakalati koni nawenatyaseharenai akereta xisaohena. <sup>9</sup> Hiyaiya, xaokanatyakalati atyo kalore ekaotyakatita waiyexehaliti, waiyexe wenati, exahe aliterexe xoaha. <sup>10</sup> Xaiyateretyoa hoka xawaiyore Xekohaseti aokitereharenae kakoa.

### Maika Awa Iniyalahare Xema Xisaona

(Colossenses 3.7-9; Hebreus 3.7-13; 1 João 2.15-17)

<sup>11</sup> Awa atyo haiyaharenae iniyalahare tyomiterenai akereta xisaona, hatyohare atyo makaliroti koniye. Xakore hoka maika xahotikihena tyoty hatyoharenai xaokanatyakalati ana. <sup>12</sup> Hoka aliterexe atyo kahaiharetyakere kairaetyakita hatyohare hameteneta tyomahiterehareha tahi. <sup>13</sup> Hoka tyoty kahotikisakehenere xaokanatyakalati ana xowaka atyoite kawaiyakehena hatyohare enómanenai. <sup>14</sup> Hiyaiya, waiye kawaiyakehetehenere atyoite xaokanatyakalati tyaona. Hatyo hiyeta exakere nexa:

“Hiso, nemakitere, hikaosehena! Hatityoahetehena hikamanaoseta, hoka Cristo ite aokanaty homana”.

<sup>15</sup> Hatyo hiyeta waiyira xiyaiyehena xawenane. Awa atyo mawaiyoreharenai akereta xisaona, xakore hoka maika waiyorexenai akereta xisaona. <sup>16</sup> Awatyo haferakene hekoti xametaisa. Hiyaiya, kalikini wisaoniterenai ferakenenai atyo maisa waiyexe. <sup>17</sup> Awa atyo xihatyahare. Xaiyateretyoa Xekohaseti aokitereharenae waiyekahalaka xomana hoka aokitere akereta xisaona maheta.

<sup>18</sup> Awa atyo vinhoxa xiserahena hoka xaheka.

Hiyaiya, hatyoharenai atyoite ximawaiye nawenanekisase maheta. Xakore hoka maika Enore Nisekohare kakoa kaisere xisaona. <sup>19</sup> Xiyakaihakatyakakoahena haiyanai kakoa salmos nanekoare tahi, exahe xeratinai waiyexenai tahi. Xiyerehena xeratinai Xekohaseti anere xiyawaiyerene kakoa. <sup>20</sup> Maika xihalahare menehena Wexe Enore kakoa, tyoty xoalini hare hiyeta, Wiyekohase Jesus Cristo koamaniya xawenane hiyeta. <sup>21</sup> Xaiminijitere Cristo akeretaira xaiminisakakoahena.

### Kaiyanityorenae Exahe Kaiyaneneronae

(Colossenses 3.18-19; 1 Pedro 3.1-7)

<sup>22</sup> Ohironae, xexanenenaire xaiminisa, Xekohaseti xaiminijitere akereta. <sup>23</sup> Hiyaiya, ena atyo haiyanityo xaehare, Cristo tyakekohatiyenae xaehare tyaonitere akereta. Cristo terota atyo waiyexe maniya mohenahitahene hoka hatyo terota eháreha. <sup>24</sup> Hatyo hiyeta xasemaxematya xexanenena niraene, tyakekohatiyenae semaxemaitere Cristo niraene akereta.

<sup>25</sup> Xasemehena, xiso exanenena: xawaiyetyaira xexanityonae, Cristo awaiyetya haomanerenae hoka wainihenere enomanaha akereta. <sup>26</sup> Nikare tyoma haware mokahene Enore ana maheta. Tihehetahene one kakoa, hoka iyoma mohenahitene hairaene kakoa. <sup>27</sup> Nikare moka tyakekohatiyenai exema maniya tyaoniterenai, kasani hotikisaha hawaiyexehare,

hawaiyene, makawe xomokoanehare, exahe maiyala-harehare enomana aoka hoka. <sup>28</sup> Maika enanae awaiyehena haiyanityonaeha, haháreha awaiyetyahitere akereta. Ena awaiyetiterekare haiyanityo atyo awaiyetyoawita. <sup>29</sup> Hiyaiya, maisa xala hare kirawanexe haháre, hoka tyaijitene, kaxaikotene harenai. Nikareta Cristo waiye kaxaikota hakaxaikoneharenae. <sup>30</sup> Hiyaiya, Cristo hare hiyetare atyo wiso. <sup>31</sup> Exakere Iraití Waiyexe nexa:

Hatyó hiyeta hatya enaite halakisa hanexe, hanityo xoaha tyaona maheta haiyanityo kakoa hoka hatyo hinamanai atyoite haterore tyaoheha.

<sup>32</sup> Kalore atyo exe metaharexe xakore hoka nomani atyo Cristo, exahe tyakekohatiyena harenae tahi irae-ta naoka. <sup>33</sup> Xomanere tehitiya: Maika xiso exanenena hoka xawaiyehena xexanityona xawaiyetyoawitere akereta, exahe xiso exanityona hoka xaiminihena xexanenena.

### Xoimanae Exahe Nexekati, Nityokati

(Colossenses 3.20-21)

**6** Xasemehena xiso xoimanae: Cristo koamaniya atyo xisaonita hoka xityakekohena atyoite xexe, xityo xoaha niraene. Hatyoharenae atyo waiye. <sup>2</sup> Exakere atyo xaotyakiyaho nexa: “Xaiminihena xexe, xityo xoaha”, nexa. Hatyo iraiti hotohare koalini hare waiyexe xekaka tahi kakoare aoka Enore. <sup>3</sup> “Xaiminihena xexe, xityo xoaha hoka waiye xisaona, exahe wahakiya xoaha xisaona waikohekoa”, nita xoaha.

<sup>4</sup> Xasemehena xiso inityo, enexe xoaha: awa atyo xityaninae maxemehareta xoana xamani xamoka hoka xaihalikisahene. Xainaetyahene kaisere Xekohaseti xaotyakiraho waiyexe kakoa.

### Wakaharenae, Exekohasena

(Colossenses 3.22-4.1; 1 Timóteo 6.1-2; Tito 2.9)

<sup>5</sup> Xasemehena, xiso wakaharenae: xasemaxematya xiyekohasena niraene ximairane, xiyaiminira kakoa. Maika nikare xisaona, motyaira aliterexe Cristo ana ene xahakita. <sup>6</sup> Awa atyo ehaotiha taita waiye xahaka ihalahare xikakoa maheta. Hiyaiya, Cristo wakaneharenae atyo xiso hoka Enore aokitere akereta xahaka enomanaha. <sup>7</sup> Xihalaharene kakoa xahahena enomanaha, Xekohaseti ana kahakatyakitere akereta, maisa halitinae ana kahakakitere akere xini. <sup>8</sup> Xasemehena, xotyaxematyaira exeharena: Hatya ana xakini atyoite, wakahare exahe mawakaharenehare xoaha ana, Xekohaseti isehena tyomehenahere akereta.

<sup>9</sup> Xiso xekohasetinae tehitiya hoka waiye xamoka xiwakaneharenae, waiyehena xikirawanahene. Hiyaiya, xiso exahe xiwakaneharenae harenai atyo Xekohaseti enokoare anere makere hoka hatyo atyo hakakoa mokita halitinae.

### Maika Heko Xityakekone Xema Xisaona

(1 Coríntios 16.13-14; Gálatas 6.9-10; Filipenses 4.1; 2 Timóteo 2.1-3)

<sup>10</sup> Hoka maika kalikini xikinaterere xisaona Xekohaseti koamaniya xisaonitere hiyeta, exahe kalorexe iniyatere

xoaha hiyeta. <sup>11</sup> Xamokaharetyoahena xaisakakoati anere Enore ijitere xomana kakoa hoka xikinaterere xisaona, hoka xahalakoahare Tihanare maisa xoana mokita xiso maheta. <sup>12</sup> Hiyaiya, maisa atyo halitinae xahita xini waiyateretyoita, xakore hoka isekohalitinae iniyalaharenai enokoa tyaoniterenai niyatere xahita atyo. Hatyonai atyo: kalorexenai, xekohasetinae, to-takorako iyatelitinae tyaoniterenai harenai, kalikini makaliroti hetehena xowakiyerenai. <sup>13</sup> Hatyo hiyeta xamokaharetyoahena xaisakakoati anere Enore ijitere xomana kakoa. Nikare ite hoka iniyalahare ferakene kaokehena hoka xikinaterere xisaona xahalakoahare xahita, hoka xiyalijinihare kakoahenere najikinitaite hekota xikinaterere xisaona, ximaekoaneharena.

<sup>14</sup> Hatyo hiyeta maika ximemere xisaona. Iraití aliterexe xema xisaona hoka hatyo atyo ite xiyolakitakohi akereta tyaoheha xomana. Waiyexe maniya xisaona hoka hatyo atyo ite xitikolali talatyakala akere-ta tyaoheha xomana. <sup>15</sup> Xihalaharene kakoa xiyakaihakahena Iraití Waiyexe amehaxaikotyakisare hoka hatyo atyoite xikijitini akereta tyaoheha xomana. <sup>16</sup> Hoka maika heko xityakekone xema xisaona hoka hatyo atyo ite xitalatyokala xaiyakoti akereta hoka xewakatya maheta tyoty Tihanare nokolanai takoitere-nai. <sup>17</sup> Xisekohare niyasehare xema maniya xisaona hoka hatyo atyo ite xiseri talatyakala akereta tyaoheha xomana. Exahe Enore niraene xema maniya xisaona hoka hatyo atyo ite kesekase akereta tyaoheha xomana. Hiyaiya, hatyohare atyo Isekohaliti Waiyexe ijita xomana.

<sup>18</sup> Tyoty hatyoharenae xisomehena xiraexala kakoa, xaxehena Enore hoka kahinaetya xiso. Xiraexata menehena Isekohaliti Waiyexe hotikijitere xiso akere-ta. Xirihare xisaona. Awa atyo xamaikoharehena, xiraexata menehena tyoty Enore koamaniya tyaoniterena ana. <sup>19</sup> Xiraexatya tehitiya notahi hoka waiyehalaka iraiti noxakai halitinae hiye, exahe hoka nomamairanihare noxakaihakatya Iraití Waiyexe metahare tyaonitere, exahe waiyehalaka noxakaini maheta. <sup>20</sup> Natyo atyo Iraití Waiyexe kakoare xakore hoka kalini atyo berexo notyaonita. Hiyeta hoka xiraexatya nomani hoka nomamairanihare noxakaihakatya iraiti halitinae hiye, noxakaini kaxaokakehenere akereta.

### Tyawaxakakoati Miyane

<sup>21</sup> Tíquico ite xakai xihye nawenani tahi hoka waiyehalaka xomana. Tíquico atyo waiye kahinaetya wiso Xekohaseti hatene hiye. <sup>22</sup> Hatyo niyahare terota naxikatene xomana hoka xakaihakatya wawenane tahi akiti xihye hoka xasema witahi hoka xihalahare maheta.

<sup>23</sup> Maika Wexe Enore, Wiyekohase Jesus Cristo hoka mehaxaikohaliti, xawaiyetyakakoati, tyakekoti harenae isa xomana. <sup>24</sup> Kasani Enore waiye moka tyoty Wiyekohase Jesus Cristo awaiyeterena haxawaiyera matyotenehare kakoa naokita, eko xoaha.

# Filipenses

<sup>1</sup> Natyo Paulo, Timóteo, Jesus Cristo wakaneharenae, waxikatya exe baberane Enore koamaniya tyaoniterena, exahe Jesus Cristo koamaniya tyaoniterena wenakalati Filipos yerena ana. Exahe ekaxaikotyaseharenae, ekahinaetyaseharenae xoha anere tehitiya exe baberane. <sup>2</sup> Maika Wexe Enore, Wiyekohase Jesus Cristo xoha kaxaiko xiso, mehaxaikohaliti xoha isa xomana.

## Paulo Niraexala

<sup>3</sup> Nihalahareta Enore kakoa notyaxemahenere xiso nihatyaka. <sup>4</sup> Tyotyaki niraexahena xitahi hoka niraexaita nihalahalini kakoa. <sup>5</sup> Hetati noxakaihakahenere Iraitu Waiyexe xowakata xakahinaetya natyo kalikini kijiya. Hatyo hiyeta nihalahareta xikakoa. <sup>6</sup> Enore atyo koxaka hakita xinekoni hoka nikare ite heko haka xinekoni Jesus Cristo tyoaneneheta kijiya. Hatyoharenae waiyekehalakita nomani.

<sup>7</sup> Heko atyo notyaxemata minita xiso, ehokoreta atyo notyaxemaita xiso. Hiyaiya, xakahinaetita atyo natyo exe hateniti Enore isehenere nomani hiye. Nikare atyo kalikini berexoako notyaonita hoka xakahinaetita natyo, exahe nomaberexotyakiharetatere xowaka xakahinaetya natyo, nakahawaonitaretya exahe niyaterere kakoa noxakai maheta Iraitu Waiyexe. <sup>8</sup> Enore atyo waiyoreta nawaiyetitere kalore xiso kakoa. Jesus Cristo atyo nikare axomokanikijita natyo.

<sup>9</sup> Niraexaita xomana, xiyawaiyetyakakoane exahere tyaona maheta. Exahe masakare waiyekehalaka iraitu xomana maheta, exahe xawaiyore maheta <sup>10</sup> hoka waiyexe taita xacka xomana maheta, hoka xifirahaliya xisaona, exahe ximahaiharehare xisaona maheta Cristo tyohetehenere ferakene. <sup>11</sup> Exahe kahareya xotalini hare waiyexe xisoma maheta. Jesus Cristo taitaiya atyo nikare moka xiso. Enore kakoa kaihalaharetyaka, kamaxalotyaka maheta.

## Nomani Atyo Wenati Cristo

<sup>12</sup> Nohinaeharenae, kasani nawenani waiyekehalaka xomana naokita. Tyotyaxotalini hare kaotyakiterena nomani hiyeta kahare haliti Iraitu Waiyexe sema.

<sup>13</sup> Hatyo hiyeta atyo sorarenai, kalorexe hana kaxaikotyasena ana, exahe haiyana ana hoka waiyekehalaka Jesus Cristo wakanehare notyaonitere hiyeta berexoako notyaonitere tahi. <sup>14</sup> Exahe kahare wihinaeharenae waiya nawenani berexoako hoka tyakekoha kaisere Xekohaseti hoka haihalahareneha, hamamairanehareneha kakoa Iraitu Waiyexe xakaitaha.

<sup>15</sup> Aliterexe atyo haiyaharenae xakaihakatyahitaha Cristo tahi akiti, xakore hoka okoawaharahitaha, kirawanahitaha atyo natyo. Hoka haiyaharenae atyo waiye ahokotyahitaha notahi hoka haihalaharene kakoa xakaihakatyahitaha. <sup>16</sup> Hatyonai atyo awaiyetyahitaha natyo hoka nikare tyaonahitaha. Waiyekehalakita atyo enomanaha Enore isehenere hateniti nomani, nakahawaonitaretya maheta Iraitu Waiyexe. <sup>17</sup> Hoka haiyaharenae atyo Cristo tahi xakaihakatyahitaha xakore hoka maisa atyo waiye ahokotyareha. Motyaiyala exahekolaha hiye hoka exakaihakalaha hiyeta exahere iniyalahare nokaxomokaki berexoako nali aokahitaha.

<sup>18</sup> Nikare xakore atyo irateta hoka eneharenae atyo. Cristo tahi atyo kaxakaihakatyakita waiyexe xahokore, exahe iniyalahare xahokore xoha hiyeta hoka hatyohare atyo ehokoreta kaiserehare. Hatyo hiyeta nihalahareta hoka exakere ite heko nihalahare notyaona. <sup>19</sup> Xiraexala, exahe Jesus Cristo Nisekohare kahinaera natyo hiyeta ite nahikoaheta berexoakota. Hatyohare atyo waiyekehalakita nomani.

<sup>20</sup> Exakere atyo notyoma naokowita: kasani maisa xoare hare mametyakahareta nahalakisa nohateni naokowiye. Nikare ite heko nihalahare kalikini, nomamairanihare ite notyaona. Nikare ite Cristo naeroretya nawenani kakoa exahe nokamani xoha kakoa. <sup>21</sup> Hoka xoare hare ala wenati? Nomani atyo Cristo xema nawenatyaka, hoka kawainisakiterehare atyo waiyexe ana kakaokatyakiterehare. <sup>22</sup> Hekotaiya nokaseta hoka hateniti waiyexeya notyomehitiya. Maisa waiyekehalakere nomani xoare kaisere xamani ite naohena nomani. <sup>23</sup> Hinama maniya nokatalatyakita. Kasani nahalakisa aliye wenati hoka Cristo nali noxani hoka waiye kaiserehare notyaona naokowita. <sup>24</sup> Xakore hoka masakare atyo xiwaiyakahare heko nokaseta notyaona naokowita.

<sup>25</sup> Nawaiyore hatyohare kakoa hoka hekota ite notyaonehitiya xikakoa. Heko ite notyaona xikakoa, nakahinaetya xiso hoka xikekoare exahe xihalahare xoha. <sup>26</sup> Nikare ite nokaokihitiya xomana hoka nowaiyehitiya xiso hoka xihalahare ite nokakoi, Jesus Cristo kakoa hahotyaita xisaonitere hiyeta.

<sup>27</sup> Cristo aokitere akereta xisaona hoka hatyo atyo waiye kaiserehare. Nikareya xisaonita hoka notyoxamani, maisa xamani nowaiyehitita xiso hoka waiyekehalaka nomani heko xikinaterere xisaonitere Iraitu Waiyexe sema. Waiyekehalaka tehitiya ite nomani haxawalita xaiyateretyoitere xityakekone kakoa Iraitu Waiyexe aokitere akereta. <sup>28</sup> Awaira atyo ximarehena

xahalakoaharenae. Maika xikinatere xisaona. Nikareya xisaona hoka xaimenekoita atyo enomanaha ijiya-haotyakaha exahe xijiyahaolahene. Hiyaiya, Enore atyo kahinaetita xiso xijiyahaotyia maheta. <sup>29</sup> Enore atyo aeroretita xiso Cristo wakanehare xisaona maheta. Exahe maisa xityakekotene taita maheta xini, iniyalahare tehitiya xikaxomokaka ihiyeta maheta. <sup>30</sup> Kalikini ite noximi xisaona nawenani akereta hoka waiyateretyoa. Nikare kafaka maniya noxaiyateretyoani xiyaiya, exahe kalikini hoka hekota naiyateretyoita. Exe harenae waiyekehalakita xomana.

### Cristo Maxaokowiharetyoanene Exahe Exairoretyaka

**2** Cristo xema wisaonita hoka wikinatere wisaonita, exahe exawaiyera wiso hiyeta wihalahareta. Enore Nisekohare atyo kahinaetita wiso hoka hatyo hiyeta wairakoaneharetya kakoita, wawaiyetyakakoita harenae. <sup>2</sup> Hiyeta hoka maika hatyo xema xisaona hoka nihalahare xamoka. Maika xawaiyetyakakoa, hakakoa xiyahakola xamoka, haxahakolita xahekotyia. <sup>3</sup> Awa atyo xiyahakolita xisomakoatehena, xahekore maotikonexe kakoa kaihalaharetyaka xikakoa maheta. Maika ximaxaokowiharetyoanehare xisaona hoka xiyahere xihinaeharenae xaoka. <sup>4</sup> Maika hatya xakini haiyanai aokitere akereta tyaonaha, hoka awatyo haxahakolaha xema taita tyaonaha.

<sup>5</sup> Maika Jesus Cristo nawenane akereta xisaona. <sup>6</sup> Xiyaiya, Cristo atyo Enore akereta terota xakore hoka maisa Enore akerehare tyaona aokowita. <sup>7</sup> Hoka haxaokala ximita halakisa tyotyia hawenane waiyexe hoka wakahare tyaona. Hoka haliti akereta tyaona, hoka haliti akereta kaotyaka. <sup>8</sup> Hoka wakahare akere mokoawi hoka semaxematyare tyaona hakamane kijiya, wainihenere atyalihose xaimaholatyaka hiye kijiya. <sup>9</sup> Hatyo hiyeta Enore aeroretene hoka kalorexe tyaona. Maisa xala harenae nikarehare ehakakoanehare aka. <sup>10</sup> Aeroretene hoka tyotyia enokoa, waikohekoa tyaoniterenae, ako katyahe tyaonitereharenae harenaite exoaha hakaolise kakoa, semehenaha Jesus nexare hoka, <sup>11</sup> "Jesus Cristo atyo Xekohaseti", nexahaite kahare halitinai haotita Enexe Enore kakoa kaihalaharetyaka maheta.

### Tyakekohatienae Atyo Xaokanatyakalati

<sup>12</sup> Xasemehena, noxiyakawaliharenae, nohinaeharenae, nali notyaonitere xowaka xityakekota niraini. Kalikini atyo maisa nali aka natyo hoka maika exahexe xityakeko niraini. Maika heko xahahena ximairane, xiyaiminira xoaha kakoa hoka ximemere xisaona xisekohare niyakeheta naheta maniya. <sup>13</sup> Hiyaiya, Enore atyo hata minita xikakoa, xisaona maheta aokitere akereta, hoka xiyahakola, xihatene xoaha hoka aokitere akereta tyaona maheta.

<sup>14</sup> Tyotyia xoalini hare xisomehena hoka ximawerahareneta exahe ximaxiholakakoanehareta xisoma. <sup>15</sup> Nikareya hoka iniyalahare maomaneharenai, exahe firahaliyerenaiya xisaona, Enore ityaninae waiyexenai

terotaiya xisaona, iniyalahare, ewaxirahare nomaseharenae konita. Maika xiyakaihena Iraitia Waiyexe tahi ihiyeha hoka xorese werokitere enokoa akeretaira xisaona enekonyaha. <sup>16</sup> Nikareya xisaona hoka Cristo tyohetehenere ferakiniya kalore nihalahare xamoka. Nikare ite xisaona hoka noxaiyateretyoani exahe nohateni xikakoa atyo maisa mitita xini.

<sup>17</sup> Xoana xamaniya hoka notimalaxi kaxiratyaka. Nikareya nokaxaisaki hoka motyaiya Enore ana nokafetatyakita ene xityakekone hiyeta. Nikareya nokaxomokaki hoka ehokoreya, exahe nihalahareya xikakoa. <sup>18</sup> Maika xiso tehitiya xihalaharehena, ximaxalohena nokakoi.

### Timóteo, Epafrodito Xoaha

<sup>19</sup> Xekohaseti Jesus kahinaetya natyo hoka naxikaheta rotaiya Timóteo hoka haikoaheta hoka xakaihena xitahi hoka nihalahare naokowita xikakoa. <sup>20</sup> Maisa atyo xala hare ali nohaliye Timóteo akereta ahekotyare xitahi, exahe kaxaiko aokowiye xiso. <sup>21</sup> Tyotyia haiyaharenae atyo mawaiyeharahitaha haxiyehareha kakoa taita hoka maisa atyo Cristo anere kakoa mawaiyeharexeha. <sup>22</sup> Timóteo atyo waiye, exahe waiyekahalakita xomana enawenane. Natyo, hatyo xoaha hanexe kakoarenae hakitere akereta wahakita hoka Iraitia Waiyexe wiyakaita. <sup>23</sup> Hiyeta hoka nawenani ite waiyekehalakehena hoka naxikatya Timóteo xomana. <sup>24</sup> Notyakekota atyo Xekohaseti hoka xoana xamanite hoka haxeroreta ite natyota xamani xinali notyia.

<sup>25</sup> Xoana xamani ite hoka wihinaehare Epafrodito naxikatya xomana. Hatyo atyo nokahinaetyahare, exahe haxawalita atyo waiyateretyoa wahakita. Xiso terota atyo xaxikatene kahinaetya maheta natyo. <sup>26</sup> Kasani waiyeheta aokowita xiso. Kalore mawaiyehareta xasemehenere ehokakene tahi hiyeta. <sup>27</sup> Aliterexe hokaka, komita waini. Xakore hoka Enore atyo airakoaneharetene. Maisa hatyo taita xini airakoaneharetya. Natyo tehitiya airakoaneharetya, maisa exahere namaikohare aokare hoka. <sup>28</sup> Hatyo hiyeta kasani Epafrodito naxikaheta xomana hoka xiyaiyehetene hoka xihalaharehetehitiya maheta. Nikare ite hoka noxamaikohalini tyoteheta. <sup>29</sup> Maika kaoketehena Epafrodito xomana hoka xihalahare ekakoa, Xekohaseti koamaniya tyaonitere hiyeta. Exakerehare halitinai xaiminihena. <sup>30</sup> Komita waini Cristo hatene hiyeta, maisa atyo mawaiyeharexe hawenane kakoa. Nikare tyaona kahinaetya natyo maheta, exowaka maisa aliyakere xakahinaetita natyo hoka.

### Waiyexe Wenati Tahi

**3** Exe taitehena, nohinaeharenae. Maika Xekohaseti kalore aihalahalnikisa xiso. Maisa atyo nomaxaharexe noxairali koxaka naxairahenerehareta. Hiyaiya, hatyohare atyo kahinaetita xiso. <sup>2</sup> Xiriharíra iniyalahare tyomiterenai kakoa, hatyo kajolonai aiateretyoahitere halitinae háre hiyexe haxaikolaha kakoa. <sup>3</sup> Wiso taita atyo wirikotyia iniyalahare wománe,

maisa atyo hatyoaha xini. Hiyaiya, wihalahareta Enore kakoa Inisekohare hiyeta. Haxawalita wawenane Jesus Cristo kakoa tyaonita hoka hatyo hiyeta wihalahareta. Maisa atyo wityakekore haliti nomanere milihe kaxaikotyakitere hoka iniyalahare wawenane wirikohenere atyo wityakekota.

<sup>4</sup> Notyakekoia hatyoharenae naokowi hoka notyakekoia. Xala xamaniya haliti nomanere milihi xaikotyaka tyakeko hoka natyoiya notyakeko naokowi hoka notyakekoia. <sup>5</sup> Nokaxaiko nomanere milihisaki 8-kihena notyaonita notyaohenereta hoka. Natyo atyo Israel hotyali konita nawenanehare, Benjamim hotyali konitare terota atyo natyo. Hebreu hotyali atyo natyo. Judeunae xaotyakiraho xema notyaonitere xowaka fariseunae hotyali konitare terota ene natyo, <sup>6</sup> hoka noxalijinihareta Cristo koamaniya tyaoniterenae xahita. Hatyo xowakiya judeunae xaotyakisakaho notyaonita hoka xalini hare kaomaka aokitere akereita notyomita, maisa xoare nomaomaniye.

<sup>7</sup> Hatyo xowakiya tyotya hatyoharenae notyakekota, kalore waiyeta nomani. Hoka kalikini atyo Cristo xema notyaona hoka maisa atyo xoare hare tyomare nomani hatyoharenai. <sup>8</sup> Maiha hatyoharenae taita xini. Nomani atyo xiyehaliti, exahe tyotya xalini harenae maisa xoare tyomare. Noxekohase Jesus Cristo xema nawenatyaka atyo waiye kaisere, hatyo taita atyo xalini hare tyomita. Hatyo hiyeta tyotya nahalakisa xalini hare. Nomani atyo tyotya hatyoharenae exawatyakahare tyaona. Kasani Jesus xema masakare notyaona naokowita hoka. <sup>9</sup> Cristo xema terota notyaona naokowita. Maisaiya xoare maheta judeunae xaotyakisakaho xema notyaonihitita haliti waiyexe notyaona maheta. Kalikini atyo notyakekota Cristo hoka hatyo notyakekoni hiyeta atyo Enore haliti waiyexe aokita natyo. <sup>10</sup> Tyotya Cristo tahi waiyekehalaka nomani naokita, exahe ekaseneheta niyaterere harenai. Kasani tehitiya makawatihenerere akereta nomakawati naokowita, exahe wainihenerere akereta nowaini naokowita, <sup>11</sup> exahe hatyaoseta nokaxekasekisakeheta naokita hoka nawenani matyotenehare tyaona maheta.

### Temati Imiyane Niyahare

<sup>12</sup> Maisa atyo koxaka nojiyahao akatya, exahe koxaka waiyexe notyaoheta nomita xini, xakore hoka hekota atyo natemita nahikoa maheta kaxekakehenerere nomani ana. Hiyaiya, Cristo atyo koxaka aoka natyo hao mana. <sup>13</sup> Xiyaiya, nohinaeharenae, maisa koxaka xini nahikoa wenati waiyexe ana, xakore hoka exakere ite notyaona: Nomaotyani ite xalini hare najikini maniya tyaoniterenae hoka noxani ite nahiti maniya tyaoniterenae ana. <sup>14</sup> Natemita atyo imiyanaose xeta, nahikoa maheta kaxekakehenerere nomani ana. Hatyo atyo Enore kawira natyo, Jesus Cristo hiyeta, wenati matyotenehare isa nomani maheta.

<sup>15</sup> Maika wiso wityotya waiyexe wawenane kakoa inityohaliti akereta wisaoniterenai, nahekoitere akereta wityotya wahekotya. Hoka haiyaharenaeya atyo ha-

hekorexe ahekoita hoka Enore atyo ite awaiyekehalakatene xomana. <sup>16</sup> Nikahena hoka waheta maniya wiyane, kalikini wisaonitere akereta. <sup>17</sup> Nohinaeharenae, notyaonitere akereta xisaonehena. Xiyaiya tehi-tiyaira haiyaharenae wawenane waotyakihenerere xiso akereta tyaoniterenai.

<sup>18</sup> Kahare haiyaharenae Cristo atyalihose xaimaholatyaka hiye wainihenerere kakoa kahalakoaharahitaha. Koxaka éxeharenae nirae xihiyee, xakore hoka kalikini niraihitiya nosehi kakoa. <sup>19</sup> Irikati mawakenehare koni ite xaneha hoka kamawenekoaretyakaha. Enenorexaha atyo iniyalahare awaiyetiterehare. Aokowiharetyoahita atyo etakehare kahaiharetyakere niyahare kakoa, exahe ali waikohekoa anere tahi taita atyo ahekotyahitaha.

<sup>20</sup> Xakore hoka wisonae atyo enokoa xetarenae. Watyahita atyo wisekohare Niyasehare, Xekohaseti Jesus Cristo, tyoaneneheta nalita xahita. <sup>21</sup> Hawarehare ite moheta wihare maiyatereterehare, wainitatererehare, hoka hahare akereta ite makamanehare moka-hene. Hiyaiya, haiyaterere kakoa ite tyotya xalini hare hakatyahakohare moka.

### Xaotyakisati

**4** Nohinaehare, noxiyakawalinae, kalore nakakawatita xiso. Xihalahalinijikijita natyo, naokowiharetyoita xikakoa. Maika heko xikinaterere xisaona xawenane Xekohaseti koamaniya kakoa, noxiyakawalinae.

<sup>2</sup> Xasemehena, nohinaehalonae Evódia, Síntique xoha: maika Xekohaseti wakanehalonae makere xisaonitere hiyeta waiye xamokakakoa. <sup>3</sup> Hasemehena, hiso nohinae waiyexe: maika hakahinaetya hatyo hinamahalo ohironai. Hatyonae, hahotyalyita Clemente, tyotya haiyaharenae nohinaeharenae xoaha kakoa kalore hakaha, exaoretyaha maheta Iraitu Waiyexe tahi. Enexareha atyo xairatyoare tyaonita Enore baber-anexa waiyexe nanekoa, hoka makamaneharenae tyaonaha maheta.

<sup>4</sup> Xihalahareta menehenaira xawenane kakoa, Xekohaseti koamaniya xisaonitere hiyeta. Niraehitiya: Xihalahareta menehenaira! <sup>5</sup> Maika xawaiyexehare xisaona tyotya haiyaharenae kakoa. Xekohaseti ite tyoheta rotita. <sup>6</sup> Awa atyo xalini hare kakoa ximawaiyehare. Xiraexahena hoka Enore xaxa, xoare xamani xaokita hoka xihalaharene kakoa xiraexatya. <sup>7</sup> Nikareya xisaona hoka Enore mehaxaikoharene tyaona xikakoa, Jesus Cristo koamaniya xisaonitere hiyeta, hoka ximahiyase, xiyahakola waiye tyaona. Hatyohare maisa waiyekehalakere halitinae ana.

### Wenati Waiyexe

(Efésios 4.1-3; 4.25-5.2; Colossenses 3.12-17; 1 Tessalonicenses 5.14-18)

<sup>8</sup> Hiyeta hoka maika waiye maniya xahekohena, nohinaeharenae. Xalini hare aliterexe, waiyexe, ehekorexe, kaxaimisakitere, maiyalaharehare, xawaiyetyati, mamaoseralahareti harenae taita xahekohena. <sup>9</sup> Koxa-



ka niraini, noxaotyakiri harenae xasema, exahe nawenani hoka xiyaiya. Maika nikareta xisaona hoka Enore mehexasikohaliti ijitere tyaona xihaliya.

#### Paulo Nihalaharene

<sup>10</sup> Kalore nihalahareta Xekohaseti koamaniya notyaonitere hiyeta. Wahakiya najikinita xakahinaehitiya natyo. Maisaiya, "Kaxiyani, maisa kahinaetyareha natyo", nomita. Seko atyo xisaonita hoka maisa aliyakere xakahinaetita natyo. <sup>11</sup> Exakere atyo niraeta maisa nowawiharenai nokehexoawitere hiyeta xini. Hiyaiya, nawaiyore atyo nihalahareta koxaka xoalinihare tyaoniterehare nomani kakoa. <sup>12</sup> Waiyekehalakita atyo nomani xoalini hare naokiterehare akiti kakoa, exahe waiyekehalakita tehitiya atyo nomani kahare naokiterehare akiti kakoa. Koxaka exe metaharexe waiyekehalaka nomani: exahe hakititere, xoana xamani notyaonita hoka nihalahareta. Exahe nofakatehareta, xoana nonakita xamani hoka nihalahareta. <sup>13</sup> Tyotya xoalini hareya, exahe howitihare mokita nawenani hoka nojiyahaoteniya, Cristo iyateliti ijitere nomani kakoa.

<sup>14</sup> Howitihare nawenani tyaonita hoka xakahinaetita natyo, hoka waiyexe atyo xisoma. <sup>15</sup> Exe akiti waiyekehalakita xiso Filipos nali tyaoniterenae ana: Macedônia nahalakihenere, hetati Iraitu Waiyexe noxakaihenere xowaka, xiwawita xakahinaetya natyo. Haiya xowaka waiye notyaonita, haiya xowaka maisa waiye

notyaonare harenae hoka xakahinaetita natyo. <sup>16</sup> Tesalônica nali nokakahinaetyaki naokita hoka xaxikatya nomani. Maisa hakiore taita xini, komita kahareki xaxikatya nomani.

<sup>17</sup> Maisa xisa taita maheta xini nomani naokita. Xakore hoka kasani kahare xiyekane katyahe kaotyaka xomana naowita. <sup>18</sup> Tyotya xoalini hare xaxikaitere kaoka nomani, naokitere xahexe kaoka nomani. Epafrodito atyo kolatya nomani xaxikahenerenae hoka kalikini atyo maisa xoare naokare. Hatyoharenae atyo motya xijita ene Enore ana. Hatyohare awaiyetita, waiyeta enomana kirakahare kaxaisakitere enomana akereta. <sup>19</sup> Nenorexi atyo ite isehena xomana tyotya xoalini hare xaokiterenae. Kahare atyo kaxiyeharexe tyaonita, hatyoharenai atyo Jesus Cristo hiyeta tyaonita. <sup>20</sup> Maika Wexe Enore kakoa kaihalaharetyaketa mene, eko xoaha.

#### Tyawaxati Miyane

<sup>21</sup> Maika xiyakaiheta natyo Enore kaxaikoneharenae Jesus Cristo anerenae hiye. Wihinaeharenae ali tyaoniterenae haxakaisakehenahitaha aokaha xihiyeye.

<sup>22</sup> Tyotya aliyerenae Enore koamaniya tyaoniterenae haxakaisakehetaha aokaha xihiyeye. Kalorexe César wakaneharenae, sorarenae hare masakare haxakaisakehenahitaha aokaha xihiyeye. <sup>23</sup> Maika Xekohaseti Jesus Cristo nawaiyexehare tyaona xikakoa. Eko xoaha.

# Colossenses

**1** Natyo Paulo, Jesus Cristo niraene kakoare notyaonita Enore xaokalita hoka naxairatya exe babera nohinaehare Timóteo kakoa hoka waxikatene <sup>2</sup> wihinaeharenae Cristo koamaniya tyaoniterenae ana, wenakalati Colossos naliyerenae ana. Kasani waiye, ximehexaiko xisaona Wexe Enore hiyeta, wiyekohase Jesus Cristo xoaha hiyeta waokita.

## Iraexatyati Ihalahaliniti Kakoa

<sup>3</sup> Wiraexahena xitahi hoka wihalahareta Jesus Cristo Nexe Enore kakoa xihiyeta. <sup>4</sup> Wasema xityakekone Jesus Cristo, exahe xawaiyetitere tyotya Enore kaxaikoneharenae hoka. <sup>5</sup> Hetati xasema Iraiti Aliterexe, Waiyexe xoaha, wenati waiyexe xaheta maniya tyaonitere enokoa naliye tahi hoka xityakeko. Nikare xityakekone, xiyawaiyetyakakoane hare xatyahitere hiyeta kaotyaka. Hiyaiya, kaxomoka atyo xaheta maniya enokoa nali. <sup>6</sup> Hatyo Iraiti Waiyexe xasemehenereta xaorekoita tyotya halitinae koni hoka waiyexe maniya mohitita enawenaneha. Nikare tehitia tyaona xinekoni hetati xasemehenerere Enore iniyalahare nomaseharenae nawenane waiyexe maniya mohititere tahi. Hatyo xowaka hatyohare akiti waiyekahalakita xomana.

<sup>7</sup> Epafras hotohare aotyakisa xiso. Hatyo atyo wixiyakawalahare, wikahinaetyasehare waiyexe Cristo hatene hiye. <sup>8</sup> Xakai wihiye xawaiyetyati Enore Nisekohare isehenere xomana tahi.

<sup>9</sup> Wasemehenerere xitahi najikinita maisa wimairaexalita xini xomana. Exakere wiraexaita xitahi: kasani xawaiyore Enore xahekola kakoa hoka aokitere akere-ta xisaona, exahe Enore Nisekohare awaiyolinikisa, airihalinikisa xiso hoka aokitereharenae taita xisoma maheta, <sup>10</sup> exahe waiye aokitere akere-ta xisaona, xisoma maheta, hoka Enore ihalahare maheta xikakoa. Nikareya xisaona hoka xoalini hare waiyexe xisoma kahare, exahe ekakoitaite Enore tahi hoka kalore waiyekehalaka xomana. <sup>11</sup> Maika xikinaterere xisaona iyateliti waiyexe Enore nalita tyoitere hiyeta hoka xoare xamani kaotyakehena xomana hoka maisa xikaholawakita ekakoa.

<sup>12</sup> Maika xihalahare Wexe Enore kakoa. Hiyaiya, hatyo atyo aoka xiso haomana hoka isa xomana haomanere hotyalinai ana mokitere hawenakala werokakoare nalitare hiyeta. <sup>13</sup> Iyeheta atyo wiso makaliroti niyaterere konita hoka Haisani haxiyakawala haliya waiye moheta wiso. <sup>14</sup> Hatyo atyo iyehitita wiso hoka ihiyeta atyo iniyalahare wománenae kamaotyanyetikihitita.

## Haliti Waiyexe Cristo Tah

<sup>15</sup> Cristo atyo kawaiyakere. Hatyo atyo Enore mawaiyakahare akerehare. Enore Ityani hetatiye atyo, xoalini hare kaomakehenerere xahehare atyo. <sup>16</sup> Ihiyeta atyo Enore tyoma tyotya xoalini hare. Enokoa, waikohekoa xoaha, kawaiyakitereharenai exahe mawaiyakitereharenae, xekohasetinae, kalorexena, iyateliti kakoarenai harenae. Ihiyeta exahe enomana xoaha tyotya kaomaka. <sup>17</sup> Cristo atyo koxaka terota tyaona tyotya xoalinihare nahitita, hoka ihiyeta atyo tyotya xoalinihare waiye kaxomokakita, kaxamehexaikoharetyakita. <sup>18</sup> Hatyo atyo tyakekohatiyenae seri hoka tyakekohatiyenai atyo eháre. Cristo hiyeta eháre tyaona. Hatyo hotohare kaxekasekisakeheta hoka tyotya xoalini hare nonitata hetatiye tyaona maheta.

<sup>19</sup> Enexe Enore xaokalita atyo Cristo Hanexe hakakoanehare terota tyaonita. <sup>20</sup> Haisani hiyeta Enore tyotya xoalini hare hakoamaniya makere moka aokowita. Haisani kamane atyalihose xaimaholatyaka hiyeta mehaxaikohaliti tyoma hoka tyotya xoalini hare waikohekoa, enokoa harenae hakoamaniya makere moheta.

<sup>21</sup> Hetati ene seko xisaonita Enore nonitata, enahalakoahare ene xisaonita iniyalahare xisomitere, xahekotitere hiyeta. <sup>22</sup> Hoka kalikini atyo Haisani kamane hiyeta Enore hahinaehare aoheta xiso, hoka hahaliya moheta xiso hoka waiyexenai, firahaliyerenai, exahe iniyalahare maomaneharenai xisaoheta maheta. <sup>23</sup> Hoka aliterexe atyoite heko xikinaterere xisaohena Cristo xema xawenane kakoa, hoka maisaiya xakikijoita kaxekaka xomana kaxaokakehenerere xasemehenerere Iraiti Waiyexe xowaka nonitata. Hiyaiya, hatyohare Iraiti Waiyexe hiyeta atyo natyo Paulo wakahare notyaona, hoka hatyoharenai noxakaita tyotya halitinai hiye.

## Paulo Hatene Tyakekohatiyenae Hiyeta

<sup>24</sup> Hoka kalikini atyo nihalahareta iniyalahare nokaxomokakitere xihiyeta hiyeta. Hiyaiya, iniyalahare nokaxomokakitere hiyeta atyo nakahinaetita, namematya maheta Cristo iniyalahare kaxomokakehenerere mawane. Tyakekohatiyenai wanahiya atyo nahakita. Hiyaiya, hatyonai atyo eháre. <sup>25</sup> Enore atyo tyakekohatiyenai wakanehare moka natyo. Hatyo atyo exe hateniti isa nomani, waiye xisaona maheta. Aliterexe exe nohateni atyo noxakaihakali, waiyexe noxakai maheta iniraene. <sup>26</sup> Exe iniraene metaharexe atyo aterokihenerere tyotya halitinai nonitata kahare

terehokoane najikini maniya hoka kalikini atyo hotikisene hakaxaikoneharenae ana. <sup>27</sup> Enore xahekola atyo exakerexe: Kasani ehotaliharenai ana waiyekehalaka exahekola metaharexe aokita, hatyo exahekola atyo waiye kaiserehare tyotya haliti hotyaliharenai anere. Hoka exahekola metaharexe atyo exakerexe: Cristo atyo tyaonita xikakoa hoka hatyo hiyetaite Enore nali wenati waiyexe tyaonitere ana ite xiyane xahikoa.

<sup>28</sup> Nikare wiyakaita Cristo tahi tyotya halitinae hiye. Waotyakijita, wawaiyekehalakaita hatya xakini ana wawaiyorene kakoa. Enore ana tyotya wahotikisahene maheta, Cristo xema waiye tyaonehenahere hiyeta. <sup>29</sup> Notyomehena maheta nohateni hoka naiyateretyoita, Cristo iyateliti isehenere nomani kakoa. Hatyo iyateliti atyo tyaonita nohiye.

**2** Kahare nahaka xihiyeta, Laodicéia koa tyaonitere-nae hiyeta, exahe haiyaharenae nomawaiyaniniharenae xoaha hiyeta. Kasani hatyo hare waiyekehalaka xomana naokita. <sup>2</sup> Nahakita, kasani mamairanehare tyaonaha maheta. Nahakita tehitiya haxawalita tyaonaha maheta xawaiyetyati hiyeta. Exahe tyotya Enore akiti masakare waiyekehalaka enomanaha hoka waiye tyaonaha maheta. Nikare hatyo metaharexe akiti waiyekehalaka enomanaha maheta. Hatyo metaharexe atyo Cristo. <sup>3</sup> Hatyo atyo tyotya xalini hare waiyexe metahare tyaonitere majiholatyakala. Irihaliti, waiyoliniti xoaha, Enore nalita tyoiterehare majiholatyakala.

<sup>4</sup> Hatyo hiyeta nomita xihiye: Awa atyo haiyanae maoseratya xiso hairaeneha kakoa, exahe motya aliterexe haliti waiyexeharexenai eneha hoka.

<sup>5</sup> Hiyaiya, seko xakore notyaonita hoka nisekohare atyo tyaonita xikakoa. Hoka nihalahareta xikakoa, hahotyalita exahe xikinaterere xityakekone Cristo kakoa hiyeta.

### Cristo Kakoa Haxawalita Nawenatyaka

<sup>6</sup> Koxaka atyo Jesus Cristo koamaniya xisaona. Xiyekohase xaokene hoka maika ekoamaniya taita xisaona. <sup>7</sup> Xikatyaharexera xisaohena ihiye, xawenanira xamohena ekoamaniya, exahe exaheharira xikinaterere xisaohena xityakekone kakoa, xikaxaotyakisakehenere akereta. Exahe xihalaharehena tehitiya ekakoa.

<sup>8</sup> Maika xirihare xisaona hoka maisa xala hare maoseraita xiso haliti nawaiyoretere kakoa. Hatyoharenae maisa xoare tyomareha. Hatyoharenae atyo halitinae, exahe isekohaliti ewaxirahare tyotya xalini hare kaxaikotere xaotyakira. Maisa Cristo xaotyakira xini. <sup>9</sup> Hiyaiya, Enore terota atyo tyaonita Cristo milako. <sup>10</sup> Ekoamaniya xisaonitere hiyeta waiyexe maniya xawenane tyaonita. Hiyaiya, Cristo atyo tyotya xekohasetinae, isekohaliti ewaxiraharenae harenae xahehare niyaterexe.

<sup>11</sup> Ekoamaniya xisaonitere hiyeta atyo xikaxaiko nomanere milihisaka. Maisa atyo halitinae hiyeta xini

xikaxaiko nomanere milihisaka. Cristo hiyeta atyo wikaxaiko nomanere milihisaka hoka iniyalahare nonitata waiyexe maniya wikaxomokakeheta. <sup>12</sup> Hiyaiya, xikabatixatyakehenere xowaka atyo xikaxafityaka Cristo kakoa. Xikabatixatyakehenere hiyeta tehitiya xikaxekasekisakeheta ekakoa xityakekohenere Enore niyaterere hiyeta. Hiyaiya, hatyo Enore terota atyo ekasekiheta Cristo. <sup>13</sup> Toahiya ene ekamane akereta xisaonita xawenane kakoa, iniyalahare xománe hiyeta, exahe maisa exaiko nomanere milihisakahare xini xiso hoka. Xakore hoka kalikini atyo Enore ekasekiheta xiso hahotyalita Cristo kakoa. Hoka emaisaheta atyo tyotya iniyalahare wománenai, <sup>14</sup> exahe emaisaheta wikotenenai, tyaonitereharenai exahe aokitereharenai. Mawenekoaretya atyo hatyo wikotanenai, berekotyehene atyalihose xaimaholatyaka hiye hoka. <sup>15</sup> Haka-mané atyalihose xaimaholatyaka hiyeta Cristo emaisatya kalorexena, isekohaliti ewaxiraharenae xoaha niyaterere. Hatyo iyatelitinai kakoa olatyoare haotikatita jiyahao akahenere xowaka.

<sup>16</sup> Nikare ite hoka maisa xala hare xikanakairiterehare, xiseriterehare, mahateniti ferakene, hisehaliti ferakene, kaimare tyahetehena, sábadó ferakene harenae hiyeta iraehekoahitita xitahi. <sup>17</sup> Tyotya hatyoharenae atyo tyohenere maxakatyahene. Hoka ekaiserehare atyo Cristo.

<sup>18</sup> Awatyo hatya kaxawaiyanikisaka aohena, exahe hamaoserala kakoa waiyexehare aokowihena, exahe anjonae kakoa kaihalaharetya aohena, exahe xiyahare aokowihena hoka awatyo xityakekone. Hatyohare haliti atyo maisa xoare tyomare, ahinityare tyaonita halitinae xahekola akereta ahekoitere hiyeta. <sup>19</sup> Hatyohare haliti atyo maisa Cristo, tyakekohatiyena hotyali seri koamaniya tyahetere. Hiyaiya, Cristo atyo eseriha. Iniyaterere hiyeta atyo haréti exekaokakikoatyakahare tyaonita, hahotyalita tyaonita, ekaokakakoane hiyeta exahe ihietare tyoitere hiyeta, hoka kekoareta Enore ekekoarene aokitere akereta.

### Wainisati Atyo Cristo Kakoa Kasetyakeheta

<sup>20</sup> Koxaka atyo xiwaini Cristo kakoa hoka maisa atyo isekohalitinae iniyalahare waikohekoa kaxaikotyaseharenae anereheta xini xiso. Hatyo hiyeta xoanere hoka motya exe waikohekoa anerenai akereta xisaonita? Xoanere hoka xityakekota exakerehare iraitinae:

<sup>21</sup> "Awaira atyo xotohena exehare", "Awaira atyo hatyohare xahasahena", "Awaira atyo hatyoharenae xi-watyalihena", niterehare?

<sup>22</sup> Tyotya hatyohare mahokoanetiterehare atyo etakehare xalini hare kakoa kahakaka hoka enajikini maniya xololoterehare xaokaka. Hatyohare xaotyakiye atyo halitinae xahekola hiyeta kaotyakene. <sup>23</sup> Aliterexe atyo motya waiyoreha ene, aiyateretyoa tyaonahitaha anjonae haxawaiyeraha kakoa, motya waiyexeharexena ene tyaonahitaha, haháreha waiye kaxaikoahitaha harenae. Xakore hoka tyotya hatyoharenae atyo maisa xoare tyomare. Maisa atyo wiháre awaiyetitereharenae emaisatya.

**3** Koxaka xikaseheta Cristo kakoa xikamane nonitaita, xawenane matyotenehare tyaona maheta. Hatyo hiyeta xoalini hare enokoa tyaonitere taita xao-hena. Hiyaiya, hatyo nali atyo Cristo tyokita haokahakalakoa Enore fihini maniya. <sup>2</sup> Xahekohena enokoatare tahi taita hoka awa atyo xahekotyali waikohekoa tyaoniterehare tahi. <sup>3</sup> Koxaka atyo xiwaini hoka xawenane atyo exateroakisakahare tyaonita Cristo kakoa Enore nali. <sup>4</sup> Cristo kakoa atyo wawenane tyaonita hoka haikoahetehena ite kalorexe tyaona maheta hoka nali tehitiya ite xisaonita hoka hatyo akereta waiye xisaona.

### Iniyalahare Nomaseharenae Atyoite Maisa Xaneta Enore Nawenakala

(Gálatas 5.19-21; Efésios 5.1-7; Apocalipse 21.8, 27)

<sup>5</sup> Hatyo hiyeta xahalakihena ali waikohekoa xawaiyetiterehare tyaonitere xihiyehere: ohiro watyalisaka, kehaisakiterehare, mahaihaliniti, maiyaseti harenai. Hiyaiya, maiyaseti atyo enore metalahare xema nawenatyaka akerehare. <sup>6</sup> Hatyoharenai hiyeta atyoite masemaxemalaharenai Enore iniyalahare moka.

### Maika Awa Iniyalahare Xema Xisaona

(Efésios 5.11-12; Hebreus 3.7-13; 1 João 2.15-17)

<sup>7</sup> Toahiya ene xisaonita hatyo xawaiyetiterehare aokitere akereta, xawenane ekoamaniya tyaonitere xowaka. <sup>8</sup> Xakore hoka kalikini xahalakihena exeharenai: xehaliti, ohiro maiyasetyaka, irawaniti kaxahekotyakiterehare harenai. Hoka maika maiha ini hekoti iraiti examaikohalinikisare, mahekorenehare hikoita xikanasakota. <sup>9</sup> Waiyehena atyo xamaoseratya kakoa. Koxaka atyo xahalakisa xawenane toahiyere xawenane waiyexe hiyeta, <sup>10</sup> hoka kalikini atyo xawenane waitare xema xisaonita. Hatyo xawenane atyo haliti waitare. Xomasehare Enore ewaitareharetita xiso hatyo akereta xisaona maheta, exahe xawaiyoreheta ekakoa maheta. <sup>11</sup> Hatyo hiyeta maisa majudeuneharenae, judeunae aka. Maisa exaikonomanere milihisakaharenae, maxaikonomanere milihisakaharenae aka. Maisa wakaharenae, xekohasetinae aka. Maisa mamasotyakahare, exahe háxako iraetereharenae aka. Cristo atyo wityotyalya Wiyekohase. Hatyo atyo tyaonita wityotyalya wikakoa.

### Wenati Waiyexe

(Atos 10.35; Filipenses 4.8; 1 Tessalonicenses 5.14-18; Tito 3.1-2)

<sup>12</sup> Xiso atyo Enore hotyaliharenae. Hatyo atyo awaiyitya xiso hoka aoka xiso haomana. Hiyeta hoka xairakoaneharetya kakoa, haiyaharenae waiye xamoka, ximaxaokowiharetyoanehare, ximehexaikohare xisaona. <sup>13</sup> Maika hatya eharehena xihiyehere hoka awa xeharehena ihiye. Exahe hatya iniyalahare mohena xiso hoka maika xawaiyehetene. Maika hatya xihinaehare hatya kakoa kirawane kakoita hoka maika maotyanehetene, Xekohaseti maotyanehetehenere iniyalahare xomane akereta. <sup>14</sup> Maika xawaiyitya kakoa kaisere.

Hiyaiya, xawaiyetyati atyo tyotyalya xoalinihare hahotyalyita axomokanikijita.

<sup>15</sup> Maika Cristo mehhexaikohaliti ijitere hiyeta ximehexaikohare xisaona. Hatyo mehhexaikohaliti ana atyo Enore kawisa xiso, haterore háre hiye hahotyalyita xisaonitere hiyeta. Maika xihalahare Enore kakoa. <sup>16</sup> Hoka maika Jesus niraene waiyexe kaiserehare tyaona ximahiyase hiye. Maika xaotyakisa, exahe xawaiyolinikisa kakoahena haiyanai kakoa tyotyalya xawaiyorene kakoa. Xiyera salmo, xerati waiyexe, xerati keharere Enore anere. Xiyera Enore ana xihalaharene kakoa. Maika xihalaharehena ekakoa. <sup>17</sup> Hatyo hiyeta maika tyotyalya xoalini hare xisomehenehare, xiraehenehare Xekohaseti Jesus nexare kakoa xisoma, exahe hoka ihiyeta xihalahare Xexe Enore kakoa.

### Kaiyanityorenae, Kaiyaneneronae

(Efésios 5.22-33; 6.1-4; 1 Pedro 3.7)

<sup>18</sup> Xiso ohironae, xasemaxematya xexanenenaeniraine. Cristo koamaniya atyo xisaonita hoka maika nikare xisaona.

<sup>19</sup> Xiso exanenenaenae, xawaiyetya xexanityonae, awa atyo xiyalijinihare exahitaha.

<sup>20</sup> Exahe xiso ityaninae hoka xasemaxematya xexe, xityo niraine, waiye xaiminihenahene. Hatyoharenae atyo Enore ana waiyeta.

<sup>21</sup> Xiso inityonai, enexenae hoka awa atyo xityaninae xaihalikisa, waiye aliya hoka hatyo hiyeta amaikohareha hawenaneha kakoa.

### Xekohasetinae, Hatenityenae

(Efésios 6.5-9; 1 Timóteo 6.1-2; Tito 2.9)

<sup>22</sup> Xiso wakaharenae, xityakeko xiyekohasenaenae. Xoalini hare nomaka aohena xihiyehere hoka xisoma. Awa atyo ehaotiha taita xisoma ihalahareha maheta xikakoa. Exahe ehaotyaha, emakanaha hoka waiye xahaka enomanaha. Maika aliterexe xiyaiminira kakoa xaiminisa-hene, Xekohaseti xaiminijitere hiyeta.

<sup>23</sup> Xoalini hare xisomehena hoka maika xihalaharene kakoa xisomene. Exahe halitinae ana xakore xahakita hoka maika motya Enore ana ene xahakita akereta xisoma hatyoharenai. <sup>24</sup> Xotyaxematyaira: Xekohaseti atyo ite bakatya xiso. Hoka kaxekaka ite xomana xoare xamani hakaxaikonehare hotyalinai ana mokita hoka. Hiyaiya, hatyo Xekohaseti ana xahakitere kaiserehare atyo Cristo. <sup>25</sup> Hoka xala xamani atyo ite iniyalahare tyoma hoka bakatyaite hatyo iniyalahare tyomehenere. Hiyaiya, Enore atyo hakakoa mokita tyotyalya halitinae, maisa atyo xalahare hawareharexe aka enomana.

**4** Xekohasetinae, maika waiye xamoka xiwakaneharenae, awa atyo xiyalijinihare ihiyehere. Xotyaxematya: xiso tehitiya xikaxekohasexe enokoa nali.

### Xaotyakisati

<sup>2</sup> Maika xaiyateretyoalya xiraexala kakoa. Xiraexahena hoka xirihare xisaona, xihalahare Enore kakoa. <sup>3</sup> Hatyo xowakita tehitiya xiraexahena witahi hoka Enore kahi-

naetya wiso hoka waiye wiyakaihakatya Cristo meta-harene. Hatyohare hiyeta atyo berexo ako notyaonita. <sup>4</sup> Hiyeta hoka xiraexatya nomani hoka waiyekehalaka noxakaihakatya emetaharene akiti kahare halitinae hiye, nohateni kaxaokakehenere akereka.

<sup>5</sup> Maika xirihare xisaona matyakekoneharenae kakoa. Exahe xiyakai harenae iraiti ihiyeha xiyaiyehenahene hoka. <sup>6</sup> Xakore hoka maika waiyexe taita xirae, haiyanae ana iraiti waiyeterere harenae taita xirae. Maika waiye xekoaxatyahene.

#### Tyawaxati Miyane

<sup>7</sup> Wihinaehare wixiyakawalahare Tíquico ite notahi xakai xihiyeha. Hatyo atyo hakare, exahe kahinaetita natyo Xekohaseti hatene hiye. <sup>8</sup> Naxikahenene xomana aihalahalnikisa xiso maheta, exahe hoka xakai ali wisaonitere tahi xihiyeha maheta. <sup>9</sup> Onésimo ite tyoa exema hoka xakaihaha xihiyeha aliye wisaonitere tahi. Onésimo atyo wihinaehare waiyexe, wixiyakawala, exahe xinekonitare atyo.

<sup>10</sup> Aristarco berexo ako tyaonitere nokakoi haxakaisakeheta aoka xihiyeha. Barnabé ximarene Marcos hoka haxakaisakeheta tehitiya aoka xihiyeha. Koxaka Marcos tahi xikaxaotyakisaka, nali tyohetehena hoka waiye xamokene maheta.

<sup>11</sup> Josué, haliti waiyexe kaxaokakitere, tehitiya haxakaisakeheta aoka xihiyeha. Exe hanamanae atyo judeu-nae. Jesus koamaniya hawenaneha mokaha hoka

hakahitaha nokakoi Enore ana. Kahare kahinaetyahitaha natyo.

<sup>12</sup> Epafra tehitiya haxakaisakeheta aoka xihiyeha. Xinekonitare atyo, Jesus Cristo wakanehare atyo. Masakare iraexatya minita xomana, kasani Enore kahinaetya xiso hoka xikinaterere xisaona ekoamaniya, exahe xawenane kakoa hoka xikekoare maheta, ximemere xisaona Enore aokiterehare xisoma maheta. <sup>13</sup> Noxakaiya hahatene howitiharexe tyomehenere xihiyeha, Laodicéia nali tyaoniterenaehiyeta, Hierápolis nali tyaoniterenaehiyeta xoha hiyeta tahi. Hatyo harenaehiyeta.

<sup>14</sup> Lucas, Demas xoha haxakaisakehenahitaha aokaha xihiyeha. Lucas atyo wiwairatyasehare.

<sup>15</sup> Maika xiyakaiheta wiso wihinaeharenaehiyeta Laodicéia nali tyaoniterenaehiyeha. Xiyakaiheta wiso Ninfa hiye, exahe tyakekohatienae ahohisakoatyakakoiterenaehiyeha nali hiye hoka xiyakai wiso.

<sup>16</sup> Xakaixarehenere exe babera najikinita, maika xaxikatene tehitiya Laodicéia naliyerenaehiyeha tyakekohatienae ana hoka kakaixaretyaka. Xakaixaretya tehitiya babera kaokehenere xomana Laodicéia nalitahere.

<sup>17</sup> Maika xirae Arquipo hiye: — Haiyateretyoa hoka waiye hihatene hisoma Xekohaseti isehenere homana.

<sup>18</sup> Nokahe kakoa terota naxairatya exe: “Paulo katyawaxita xihiyeha”. Awaira atyo ximaotyanehena berexoako nawenani.

Kasani Enore waiye kaxaiko xiso naokita, eko xoha.

# 1 Tessalonicenses

**1** Natyo Paulo, Silas, Timóteo xoaha kakoa nax-airatya exe babera Xekohaseti koamaniya tyaoniterenai ana wenakalati Tessalônica tyaoniterenae ana. Wexe Enore koamaniya, Xekohaseti Jesus Cristo koamaniya xoaha xisaonita. Kasani waiye, ximehexaiko xisaona naokita.

## Tessalônica Yerenae Tyakekone, Nawenane

**2** Wihalahareta minita Enore kakoa xihiyeta, exahe wotyaxemaita xiso wiraexala kakoa. **3** Wotyaxemaita xiso Wexe Enore haotita: aokitere akereta xisomita xityakekone hiyeta. Xiyawaietyakakoane hiyeta kalore xahakita enomana, exahe heko xatyahita Wiyekohase Jesus Cristo xahita.

**4** Nohinaeharenae, exe akiti waiyekehalakita womana: Enore awaitita xiso, exahe aoka terota xiso haomana. **5** Hiyaiya, Iraitu Waiyexe wiyakaita xihiyehoka maisa wiraene kakoa taita xini. Enore niyaterexahe Isekohaliti Waiyexe kahinaetya wiso hoka xityakeko kaiserehare iraitu. Wisaohenere xinekoni xowaka wawenane waiyekehalaka xomana hoka hatyo hiyeta tehitiya xityakeko hoka **6** wisaonitere akereta, exahe Xekohaseti nawenane akereta hoka xisaona. Xityakeko iraitu hoka Isekohaliti Waiyexe aihalahalinikisa xiso, iniyalahare xakore matyakekoneharenae mokahitaha xiso hoka. **7** Nikare xisaona hoka tyakekohatienai Macedônia koa, Grécia koa nali tyaoniterenae xisaonitere akereta tyaona aokowiha. **8** Xihiyeta Macedônia, Grécia xoaha tyaoniterenae sema Xekohaseti tahi, exahe xityakekone Enore tahi exaorekoatyaha tyoty wenakalatinaekoa. Hiyeta hoka maisaiya xoare maheta wiraehitita. **9** Hoka tyoty hatyo wenakalatikoa tyaoniterenae irateta wiso wiyaiyehenere xiso tahi, exahe xakaihakatyahitaha waiye xamohenere wiso akiti, exahe xahalakihenere xawenane enore metalahare koamaniya hoka Enore aliterexe koamaniya xisaohenere tahi akiti. **10** Exahe xakaihakatyahitaha tehitiya Jesus, Enore ityani haikoa haneheta xiyatyahane enokoata tahi. Hatyo atyo waini hoka Enore ekasekiketene. Hatyo atyo waiyexe aniya moheta wiso iniyalahare tyohetehenere nonitata.

## Paulo Hatene Tessalônica Nali

**2** Nohinaeharenai, waiyekehalakita atyo xomana nali wisoa wiyaiyehenere xiso xowakiyere. Hatyo xowaka Iraitu wiyakaienere atyo katyakekotyaka. **2** Wimakaokenehareta xomana Tessalônica nali, maisa waiye xini wikaxomokaka, exahe wikamokonasetyaka

wenakalati Filipos nali. Aiyateretyoahitaha xakore wiyahita hoka Enore atyo iyateliti isa womana hoka Iraitu Waiyexe tyoitere enalitare wiyakaita. **3** Tyoty wiyakaiterenae atyo aliterexe taita wiyakaita xihiyehoka maisa wamaoseraita xini xiso. Maisa wametakisa maheta xini, maisa waiyalaharetya xawenane maheta xini. **4** Tyoty wiraeterenae Enore aokitere akereta taita wiraeta. Exaokala ximita nikare wisaonita hoka wiyakaita iniraine. Exahe wiso hoka kasani Enore ihalahare wikakoa waokita, maisa halitinai ihalahare wikakoa waokare. Hiyaiya, Enore atyo tyoty wiyahokela kakoa waiyoreta.

**5** Hiyaiya, waiyekahalaka xomana wiraehenere: maisa wiraihekoata xini wemaxaloty maheta xiso hoka xityakeko wiraene, exahe maisa wamaoseratya xiso hoka olo kaxekaka womana maheta xini. Enore ana tehitiya hatyoharenae waiyekahalakita. **6** Maisa xoana xowaka haiyanae aexakeritya wiso waokare, maisa xiso, exahe haiyaharenae hekoti hoka. **7** Wiso atyo Cristo niraene kakoarenae hoka kinatyaxaiya wirae xikakoa waokowita hoka kinatyaiyaiya wirae. Xakore hoka xinali wisaonitere xowaka waiye wamokita xiso, hatya ohiro haisani waiye mokitere akereta. **8** Kalore wawaiyetita xiso. Kasani maisa iraitu Enore nalitare taita xini wiyakai xihiyehoka waokowita. Exahiya wikaxaisaka xihiyeta hoka ehokoreya, wiyawaiyera xiso hiyeta.

**9** Nohinaeharenai, xotehena! Wisaonitere xinekoni xowaka wahakita kalore, waiyateretyoita. Ferakoa, makiya hoka wahakita winakaira niyahare, maisa wiyakaienere Iraitu Waiyexe xihiyehoka xowaka haiyanae waxa waokowiye hoka. **10** Xiso atyo wawenane xiyaiya, Enore tehitiya hatyoharenae waiya. Waiyexe, totere, ekaiserehare harenae wisaona xiso tyakekoterenai koni. **11** Wisaonitere xinekoni xowaka waiye wamokita xiso, hatya haliti waiye mokitere haisani akereta. Hatyo harenae akiti waiyekehalakita xomana. **12** Waihalahalinikisa, wemaxalokisa, waotyakisa harenae xiso hoka Enore aokitere akereta xisaona hoka ihalahare xikakoa maheta. Hatyo atyo aoka xiso haomana hoka kawisa xiso xiyaone xisaona ewaikoherakoa hoka waiyeha kaiserehare xisaona ehaliya maheta.

**13** Hiyeta hoka wihalahareta minita Enore kakoa xihiyeta. Nali xinekoni wisaonita hoka Enore niraene wiyakai xihiyehoka xasemene hoka xaokene xomana. Maisa halitinai niraene xaokitene hoka Enore niraene terota xaokene. Hoka aliterexe atyo Enore niraene. Hiyaiya, Enore atyo xiso tyakekoterenae koni hakita. **14** Nohinaeharenae, Judéia koa nali tyaoniterenae Jesus Cristo kaxaikoneharenae Enore koamaniya tyaonitere-

nae kaxomokakitere akereta xikaxomokakita. Judeunai matyakekoneharenae iniyalahare mokahiterene akere-ta xawenakala tyaoniterena matyakekoneharenae iniyalahare mokahitaha xiso. <sup>15</sup> Hiyaiya, judeunae atyo aisa Xekohaseti Jesus, exahe iraiti xakaisaseharenae hoka aisaha, hoka iniyalahare mokaha wiso. Hatyohare maisa waiyeta Enore ana. Exahe nikare tyaonaha hoka tyotya haliti nahalakoahare tyaonaha. <sup>16</sup> Kasani maisa Iraitu Waiyexe isekohaliti niyasehareheta tahi wiyakai aokareha majudeuneharenae hiye hoka hatyo hiyeta aeroretyaha minita iniyalahare tyomahitere. Hoka kalikini atyo Enore ehareta ihiyeha hoka kalorite iniyalahare mokahene.

### Paulo Haki Waiyehitiya Aokowi Tessalônica Yerenae

<sup>17</sup> Nohinaeharenae, wiyane xonita hakiti hoka kalore wakakawaita xiso, hoka kalore wahekoita xitahi. Exahe waiyateretyoa wiyaiyehitiya xiso maheta. <sup>18</sup> Kasani wiyaiyehitiya xiso waokowita. Natyo, Paulo hekoti kasani nowaiyeheta xiso naokowita. Xakore hoka Ahalakoahaliti talaita wiso. <sup>19</sup> Xiso terota wihalahare xamokita. Wiyekohase Jesus Cristo haikoahetehenere xowaka ite masakare wihalahare xihiyeta heko xikinaterere xisaohenerere ekoamaniya hiyeta. <sup>20</sup> Aliterexe atyo xiso wiyakowiharetyoane, wihalaharene xoa.

**3** Wahehena wimawaiyaneta xiso hoka mahaiya aliyakere watyahahitita hoka wiwawa Atenas nali wisaona hoka <sup>2</sup> wihinaehare Timóteo waxikatya xomana. Hakita tehitiya wikakoa Enore hatene hoka xakaihakaita Iraitu Waiyexe Cristo tahi hoka waxikatene xomana aihalahalinalikisa xiso hoka masakare xityakeko maheta, <sup>3</sup> exahe maisa xala hare halakijita hatyakekone iniyalahare xikaxomokakitere hiyeta. Enore xaokalita haiya xowaka nikare wikaxomokakita, hatyoharenae waiyekehalakita xomana. <sup>4</sup> Xinekoni wisaoniterere xowaka wiyakai xihiyeheta: "Iniyalahare ite wikaxomokaka", wexa xihiyeheta hoka nikare wikaxomokaka.

<sup>5</sup> Hatyo hiyeta Timóteo naxikatya xomana, maisaiya aliyakere natyahahitita xitahi akiti hoka naxikatene xomana xityakekone tahi nasema naokowi hoka. Xoana xamani hoka Tihanare hasakaharetita xiso emaisatya maheta wihatene xinekoni aokowita hoka.

<sup>6</sup> Hatyaoseta Timóteo haikoaheta wenakalati Tessalônica nalita hoka xakai wihiyeheta xityakekone, xiyawaiyetyakakoane tahi xakai wihiyeheta. Xawaiyeheta wiso, kasani xiyaiyeheta wiso xaokowitere, wiso wiyaiyeheta tehitiya xiso waokowitere akereta xakai wihiyeheta. <sup>7</sup> Hiyeta hoka wihalahare xamoka, wasema xitahi hoka. Howitihare tyaonita wawenane, iniyalahare harenae wikaxomokakita xakore hoka xityakekone wasemita hoka wihalahare xamoka, xityakekone aihalahalinalikijita wiso. <sup>8</sup> Xisoiya atyo Wiyekohase koamaniya xikinaterere xisaonita hoka wihalahare kaiserehare wisaona.

<sup>9</sup> Nikare hoka wihalahareta Enore kakoa xihiyeheta. Wihalahare Enore haotita xihalahalinalikijitere wiso hiyeta. <sup>10</sup> Wiraexaita ferakoa, makiya harenae waxita

Enore, kasani halakisa wiso hoka wisoa wiyaiyeheta xiso hoka xoalini hare wimaxaotyakiraharene xiso kakoa waotyakisa xiso hoka xityakekone exahexe tyaona maheta.

<sup>11</sup> Maika Wexe Enore, Wiyekohase Jesus Cristo hoka memere moka waheta maniya hoka wisoa wiyaiyeheta xiso. <sup>12</sup> Maika Xekohaseti kahinaetya xiso hoka masakare xawaiyetya kakoita, exahe tehitiya tyotya halitinae xawaiyetya, kalore wawaiyeheta xiso akere-ta. <sup>13</sup> Nikare ite aiyatelikisa xiso hoka waiye, iyoma, iniyalahare ximaomanehare wexe Enore nahalakoaxisaona Wiyekohase Jesus Cristo tyohetehenere tyotya haomanerena kakoa xowaka.

### Wenati Enore Aokitere Akereta

**4** Nohinaeharenae, kalikini atyo wihiyeheta waiyekehalaka xomana wenati waiyexe Enore awaiyeheta. Aliterere nikare xisaonita. Hiyeta hoka wirae xihiyeheta waotyakisa harenae xiso, Xekohaseti Jesus niraene kakoare wiso hoka. Maika masakare heko nikare xisaona. <sup>2</sup> Xekohaseti Jesus xaokalita waotyakihenerere xiso atyo waiyekehalakita xomana.

### Awa Atyo Iniyalahare Xisoma Ohiro Kakoa

(1 Coríntios 5.1-5; 6.15-20; Hebreus 13.4)

<sup>3</sup> Exakere xisaona aokita Enore: kasani waiye xawenane xamoka ekoamaniya hoka maisa iniyalahare xisoma ohiro kakoa aokare. <sup>4</sup> Maika waiye xamoka xexanityonae, xaiminisahene hare Enore aokitere akereta. <sup>5</sup> Awa atyo Enore koamaniya mawenaneharenae iniyalahare ahekoitere akereta xisaona. <sup>6</sup> Nikare hoka maisa xala hare komaniyaita hahinaehare, exahe maxaiminirita hahinaehare. Koxaka wiyakai xihiyeheta akiti xakore hoka kalikini wiyakaihitiyeheta xihiyeheta: Enore ite iniyalahare moka hatyohare iniyalahare tyomitereharenae. <sup>7</sup> Hiyaiya, Enore haomanere aoka wiso, maisa iniyalahare wisoma maheta xini. Waiyexe taita wisoma maheta. <sup>8</sup> Xala xamaniya exe xaotyakisati maisa awaiyeheta hoka maisaiya haliti xini maxawaiyeheta. Isekohaliti Waiyexe Enore ijitere xomanaiya atyo maxawaiyeheta.

<sup>9</sup> Xawaiyeheta xihinaehare tyakekohatiyeheta. Enore aotyakisa xiso hoka maisaiya xoare maheta hatyo akiti waxairahitita xomana. <sup>10</sup> Xisonae koxaka xawaiyeheta tyotya xihinaeharenae Macedônia koa tyaoniterena. Hoka maika exahexe xawaiyeheta kakoa. <sup>11</sup> Maika xaiyateretyoa ximehexaikohare xisaona maheta. Maika xawenane takita xikaxaiko hoka waiye xisaona. Xihatene maniya taita xisaona hoka hatyo xihatene hiyeta xisaona. Koxaka hatyo tahi wirae xihiyeheta.

<sup>12</sup> Nikareya xisaona hoka matyakekoneharenae aiminisa xiso, exahe maisaiya xala hare hiye xikahinaetyaka xaokita.

**Xekohaseti Tyoaneneheta**

(Atos 1.10-11; 1 Tessalonicenses 5.1-4; 2 Tessalonicenses 1.7-10; Hebreus 10.37; Apocalipse 1.7)

<sup>13</sup> Nohinaeharenae, kasani waiyekehalaka xomana koxaka wainihenerenaeha tahi waokita, maisa xamaikohareta matyakekoneharenae akereta maheta. Matyakekoneharenae atyo kalore amaikoharetaha, motyalaite maisa waiyehenahitahene aowitaha hoka. <sup>14</sup> Waiyekehalakita atyo womana Jesus kamane hoka kaxekasekisakehetehenerene. Hoka Jesus haikoahetehenerene xowaka ite tyoty tyakekoterenaeha wainihenerenaeha ekasekiheta Enore hoka ehaikoahitahene ekakoa. <sup>15</sup> Xekohaseti aotyakihenerene akereta wirae: Xekohaseti haikoahetehenerene xowaka ite hekotata wiso haiyaharenaeha wikasetata hoka maisaiya atyo wiyanaeta kamatinaeha nahitita. <sup>16</sup> Xekohaseti haikoahetehenerene enokoata xowaka ite hoka kinatyaxa kawisa, exahe anjo xekohase kawisa kinatyaxa. Enore konetane ite kaemaharehena hoka hatyaoseta ite Xekohaseti exoaheta enokoata hoka ekasekiheta hotohare Cristo tyakeko hoka wainihenerenaeha. <sup>17</sup> Hatyaoseta ite wiso kasetaterenaeha kasehetehenerenaeha kakoa wahalakoatyakakoaheta kaiminiti tyoanitere nali wahalakoatya maheta Xekohaseti enoakiya nali. Nikare ite wisaota mene ekakoa.

<sup>18</sup> Hiyeta hoka xaihalahalinikisa kakoa exe iraiti kakoa.

**Memere Tyaonahitaha Xekohaseti Haikoahaneheta Niyahare**

(1 Tessalonicenses 4.13-18; 2 Tessalonicenses 1.7-10; Hebreus 10.37; Apocalipse 1.7)

**5** Nohinaeharenaeha, maisaiya atyo naxairaita, exahe naimenekoita hatyoharenaeha kaotyakene xomana. <sup>2</sup> Koxaka xasema Xekohaseti haikoahaneheta tahi. Hatyoharenaeha waiyekehalakita xomana. Haikoaheta maxaimenekotyakahareta, kaiwarexe makiya maxatyahakaharetere ijoitere hatyako akereta. <sup>3</sup> Halitinaeha ite hatyo xowakehena hoka nehena: — Waiye wimehexaiko wisaonita — nehenahaite hoka hatyaoseta ite eharehena rotita kamawenekoaretyakaha hoka maisaiya aliyakere tekoahitaha. Hatyo xowakehena ite hoka motya ohiro ityani kaweta hoka maisa aliyakere tekoare akereta ite maisa aliyakere tekoahitaha.

<sup>4</sup> Xakore hoka maisa atyo makaliroti koni xini xisaonita, nohinaeharenaeha. Hoka Xekohaseti ite haikoahetehena hoka maisaiya atyo eharehena rotita kaotyakihitita xomana kaiwarexe akereta. <sup>5</sup> Xityoty atyo xaokanatyakalati, ferakoiti anerenae. Maisa atyo makiyere, makaliroti anerenae xini wiso.

<sup>6</sup> Hiyeta hoka maisaiya wisemakitere akereta wisaonita wawenane kakoa haiyaharenaeha akereta. Maika heko wikaosetere akereta wisaonita hoka waiye wikaxaikoawita. <sup>7</sup> Hiyaiya, makiya tyoty nemakahitaha, makiya tehitiya hekahitaha. <sup>8</sup> Hoka wiso atyo ferakoare hoka hatyo hiyeta maika wikaxaikoawi. Hoka

tyakekoti, xawaiyetyati xoaha kakoa ite wimemere wisaohena tikolaliti talala akereta watalatya maheta witikolali. Exahe hoka wiyatyahane waiyexe maniya mohetehenerene wiso ite seriti talala akereta talatya wiso. <sup>9</sup> Hiyaiya, Enore atyo haomanere aoka wiso maisa iniyalahare moka maheta xini wiso omati iniyalahare nahalakoa. Wikaiyakeheta maheta atyo Wiyekohase Jesus Cristo hiyeta. <sup>10</sup> Hiyaiya, Cristo atyo waini womana hoka wisaona ehaliya maheta, tyohetehenerene xowaka ite wikasetata xamani, xoana koxaka xamani wiwaini. <sup>11</sup> Hatyo hiyeta xaihalahalinikisa kakoa, xakahinaetya kakoa kalikini xisaonitere akereta.

**Xaotyakisati, Tyawaxati Miyane**

<sup>12</sup> Nohinaeharenaeha, Xekohaseti axikatya haiyaharenaeha xinekoni kahinaetyaha, aotyakisaha maheta xiso. Maika xaiminisa hatyo hakiterenaeha xinekoni. <sup>13</sup> Waiye xamoka hatyo hakiterenaeha xinekoni. Xaiminisaehene, exahe xawaiyetyahene hatyo ehateneha hiyeta. Maika ximehexaikohare xisaona haiyanaeha kakoa.

**Wenati Waiyexe**

(Colossenses 3.12-17; Tito 3.1-2; Tiago 1.19-22; 3.17-18)

<sup>14</sup> Xasemehena: Xaotyakisa maxahalitikarenaeha xiyatere kakoa. Xaihalahalinikisa amaikohareterenaeha. Xakahinaetya inira tyakekoterenaeha. Maika ximamaxaharehenaeha xisaona tyoty halitinaeha kakoa. <sup>15</sup> Maika xirihare hoka maisa xala hare emaisahitita iniyalahare, iniyalahare kakoa. Waiye xamoka kakoa, exahe hoka tyoty halitinaeha hoka waiye xamoka.

<sup>16</sup> Maika xihalahareta mene, <sup>17</sup> exahe xiraexata mene. <sup>18</sup> Maika exahe xoana xamani xisaonita hoka xihalahareta mene Enore kakoa. Haxawalita atyo xawenane tyoanita Jesus Cristo kakoa hoka nikare xisaona aokita Enore. <sup>19</sup> Awa atyo xahowitihalikisa Isekohaliti Waiyexe hatene. <sup>20</sup> Awa atyo Enore niraene xakaisase xakaihena xihiyeha hoka xikoexahalisenene. <sup>21</sup> Maika tyoty xoalini hare akiti waiye xahekoty hoka waiyexe xema taita xisaona. <sup>22</sup> Hoka tyoty xoalini hare maisa waiyexe hoka awa xaokene.

<sup>23</sup> Maika Enore mehaxaikohaliti ijitere womana xawenane waiyexe maniya taita moka. Maika xisekohare, xiyawahare, xihare harenaeha waiye kaxaiko iniyalahare nonitata Wiyekohase Jesus Cristo haikoahaneheta kijiya. <sup>24</sup> Kawihenerene xiso ite nikare tyoma, maisaiya maotyanaeta xiso.

<sup>25</sup> Nohinaeharenaeha, maika xiraexaita tehitiya womana.

<sup>26</sup> Xikatyawaxehena wihinaeharenaeha Cristo koamaniya tyoaniterenaeha hiye hoka xasohitanakolisaehene.

<sup>27</sup> Enore xaokalita nomita xihiyeha: Maika exe babera kakaexaretyaka tyoty tyakekohenerenaeha ana.

<sup>28</sup> Maika Wiyekohase Jesus Cristo waiye kaxaikota xiso, eko xoaha.



## 2 Tessalonicenses

<sup>1</sup> Natyo Paulo, Silas, Timóteo xoaha kakoa nax-airatya exe babera Xekohaseti koamaniya tyaoniterenai ana wenakalati Tessalônica tyaoniterena ana. Wexe Enore koamaniya, Xekohaseti Jesus Cristo koamaniya xoaha xisaonita. <sup>2</sup> Kasani waiye ximehexaikohare xisaona Wexe Enore hiyeta, Xekohaseti Jesus Cristo hiyeta waokita.

### Xaxalisati Cristo Haikoahaneheta Xowaka

<sup>3</sup> Nohinaeharenae, wihalahareta menita Enore kakoa xihiyeta, xityakekone kekoaretere, exahe xiyawaiyetyakakoane tehitiya hoka kekoaretere hiyeta. <sup>4</sup> Hiyeta hoka waokowiharetyoita xikakoa Enore tyakekoterena hotyalinae koni. Waokowiharetyoita xikakoa, ximamaxaharenehareta xisaonitere, exahe xityakekone hiyeta. Matyakekoneharenae iniyalahare xakore mokahitaha xiso, exahe kirakoane xakore xikaxomokakita hoka.

<sup>5</sup> Nikare xikaxomokakita hoka ehekore Enore iniyalahare moka aokowita iniyalahare nomaseharenai. Iniyalahare xikaxomokakita xawenane ekoamaniya hiyeta hoka ewaikoherakoa xetarenae terota atyo xiso. <sup>6</sup> Enore ite waiyexe taita tyoma hoka iniyalahare mokiterena xiso ite iniyalahare moka. <sup>7</sup> Xekohaseti Jesus haikoahetehenere enokoata anjonai kinaterexena kakoa xowaka. Hatyo xowaka tehitiyaite xikawinihena, exahe wiso iniyalahare wikaxomokakiterena tehitiya hoka.

<sup>8</sup> Irikati kakoa ite haikoaheta hoka iniyalahare mohana Enore koamaniya mawenaneharenae, matyakekoneharenae, masemaxemalaharenae Iraitai Waiyexe Wiyekohase Jesus tahi. <sup>9</sup> Kalore ite iniyalahare kaxomokakaha matyotenehare, kamawenekoaretyakaha maheta. Exahe haware ite Xekohaseti nonitata, exahe iniyatere waiyexe nonitata hoka kaxomokakaha. <sup>10</sup> Hatyo xowaka ite nikare tyaona tyohetehenere xowaka. Hoka ekoamaniya tyaoniterena ite ihalahareha ekakoa, exahe aiminisahenite tyotya tyakekohenerenai. Hatyo xowaka ite xiso tehitiya enekoniha xisaonita iraiti wiyakaihenerere xihiyehoka xityakekohenerere hiyeta.

<sup>11</sup> Hatyo hiyeta heko wiraxaita xomana. Wenorexa atyo aoka xiso haomana waitare wenati maniya xisaona maheta hoka waxita hoka kahinaetya xiso aokitere akereita xisaona maheta. Hatyo hiyeta waxita tehitiya kasani kahinaetya xiso hoka tyotya xalini hare waiyexe xisoma xaokowitere xisoma xamematya xityakekone kakoa waokita. <sup>12</sup> Nikare ite hoka Wiyeko-

hase Jesus kaxaiminisaka xihiyeta. Xiso tehitiya ite hoka xikaxaiminisaka ihiyeta, Wiyekohase Jesus Cristo nawaiyexehare, wEnorexa nawaiyexehare hiyeta.

### Haliti Matyakekonehare

<sup>2</sup> Nohinaeharenae, Wiyekohase Jesus Cristo tyoaneneheta, exahe wiyahohisakakoatyane ekakoa akiti wirae xikakoa: <sup>2</sup> Awa atyo xiyahakola xexawareharetya haxerore, exahe hoka awa atyo ximawaiyehare haiyaharenae: "Koxaka Xekohaseti haikoaheta", nehena hoka. Xoana iraiti semasehare xamani, xoana Iraitai Waiyexe xakaisasehare xamani irahena, xoana wiyairala xamani aohena hoka awa atyo xityakeko. <sup>3</sup> Awa atyo nikare maoserahena xiso hoka xityakekohena. Hiyaiya, Xekohaseti kaokeneheta nahititaite halitinae kahalakoahare Enore kakoa hoka Iniyalahare Nomasehare aokahitere kaotyaka. Hatyo haliti atyo irikati mawakenehare koni xetare terota.

<sup>4</sup> Tyotya Enore kaxaokakiterehare nahalakoahare ite tyaona, exahe xalini hare Enore anere kaxaokakiterehare nahalakoahare ite tyaona. Tyotya xalini hare xahere ite tyaona aokowi hoka xane isoa Enore hanako hoka Enore aokowihena. <sup>5</sup> Xoana maisa xot-yare? Tyotya hatyoharenae noxakai xihiyeha notyaonitaterere xihaliya xowaka.

<sup>6</sup> Xakore hoka xalini hare talaitene hoka maisa kalini aliyakere kaotyakere hoka hatyohare waiyehalakita xomana. Hoka ekaotyakene xowakaite hatyo Iniyalahare Nomasehare kaotyakehena. <sup>7</sup> Hoka Metaharexe Iniyalahare aokahitere koxaka kaotyakehena. Xakore hoka kaotyaka aokowitere ite kaotyaka, kakikisaka hotohare ite haware hatyo talaiterene hoka. <sup>8</sup> Hatyaoseta ite Iniyalahare Nomasehare kaotyakehena hoka Xekohaseti Jesus haiyaterere kakoa haikoahetehenere xowaka ite haxaohomane kakoa ite aisene, exahe mawenekoaretene ite haxaokanala kakoa. <sup>9</sup> Iniyalahare Nomasehare ite kaotyaka Ahalakoahaliti niyaterere kakoa hoka tyotya xalini hare mawaiyakahare tyomehena katyakekotyaka maheta. Maoseratya ite halitinae tyaonaha ekoamaniya maheta. <sup>10</sup> Tyotya xalini hare iniyalahare kakoa ite maoserahena halitinae irikati mawakenehare xetarenai. Hoka wainiha ite, maisa atyo tyakekoahitaha, exahe awaiyetyahitaha Iraitai Waiyexe iniyalahare nonitata niyasehareheta hoka.

<sup>11</sup> Hatyo hiyeta Enore halakisahene, maoserare aeroretya ihiyeha hoka maoserare tyakekoha maheta.

<sup>12</sup> Hatyo harenae hiyeta ite tyotya Iraitai Waiyexe

matyakekoneharenae, exahe maoseratyati xema taita tyaonitereharenae mawenekoaretyaka aoka Enore.

### Maika Xikinatere Xisaona

<sup>13</sup> Nohinaeharenae, wihalahareta menita Enore kakoa xihiyeta, Xekohaseti awaiyetita xiso hoka. Hiyaiya, xiso hotohare Enore aoka haomana Isekohaliti Waiyexe niyaterere hiyeta, exahe hoka Iraitu Waiyexe xityakekone hiyeta. Nikare tyoma ekaxaikone hotyalihare xisaona maheta. <sup>14</sup> Enore aoka xiso haomana nikare xisaona maheta, wiyakaihenere Iraitu Waiyexe xihiyeta hoka xiyane xikaoka Wiyekohase Jesus Cristo waikohera waiyexe nali maheta. <sup>15</sup> Hiyeta hoka nohinaeharenae, maika xikinatere xisaona Xekohaseti koamaniya, exahe heko iraitu wiyakaihenere waxairahenere xomana xotyaxematya.

<sup>16</sup> Wiyekohase Jesus Cristo awaiyetita wiso, Wexe Enore hoka awaiyetita wiso. Hoka hawaiyexehare hiyeta mamairanehaliti matyotenehare isa womana, exahe hoka heko wikinatere watyaha exahita maheta. <sup>17</sup> Kasani Xekohaseti Jesus, Wexe Enore aihalanalinikisa xiso waowita, exahe kahinaetya xiso hoka waiyexe taita xirae, xisoma taita.

### Maika Xiraexatya Womana

**3** Imiyanehena nohinaeharenae, maika xiraexaita womana, hoka haxeroreta Iraitu Waiyexe xaorekoa hoka aokahene haomana xiso xaohenerene xomana akereta. <sup>2</sup> Maika xiraexatya tehitiya hoka Enore kaxaiko wiso mawaiyexeharexena, xalijiniharexena nonitata. Hiyaiya, maisa tyoty halitinae tyakekore Iraitu.

<sup>3</sup> Xakore hoka Xekohaseti atyoite maisa maotyana wiso. Aiyatelikisa ite xiso, exahe Tihanare nonitata ite kaxaiko xiso. <sup>4</sup> Enore hiyeta wityakekota xiso. Kala waokitere akereta xisaonita, exahe hoka nikare ite heko xisoma. <sup>5</sup> Maika Xekohaseti kahinaetya xiso hoka xawaiyetya Enore, exahe hoka ximamaxahareharetatya wenati waiyexe Cristo kakoa xahita.

### Tyakekohatiye Metalaharenae

(1 Timóteo 4.1-3; 2 Timóteo 3.1-9; 3 João 9-11)

<sup>6</sup> Nohinaeharenae, Xekohaseti nexare kakoa waxikatya: haiyaharenai wihinaeharenae maxahali-

tikarenae akereta, exahe maisa semaxematya aokowiyeha wiyaotyakira wahalakihenere xomana. Maika xakikisoaheta enonitaha. <sup>7</sup> Xawaiyoreta xawenane kakoa. Maika wawenane akereta xisaona. Hiyaiya, maisa maxahalitikare akereta xini wisaonitere xinekoni xowaka. <sup>8</sup> Maisa xoare maxaimaneharetu wikaoxekarere. Wahakita wihatene hiye winakaira niyahare, maisa wimaxahareta. Haiya xowaka wikirahareta wihatene hiyeta. Wahakita wihatene makiya, ferakoa xoaha, waiye aliya hoka xiso wihinaeharenae nakaira wamiyatya waokita hoka. <sup>9</sup> Aliterexe atyo wawaiye kahinaetyaka. Xakore atyo hoka maisa atyo xoare waxare, kasani wisaonitere akereta xisaona waokita hoka. <sup>10</sup> Nali wisaonitaterere xihaliya xowaka exakere waotyakisa xiso: "Xala xamani atyo maisa haka aokowiye hoka maisaiya atyo kanakairita".

<sup>11</sup> Wasema haiyaharenae maxahalitikare akereta tyaonitere xinekoni hoka hatyo hiyeta nikareta wiso. Maisa xakore xoare tyomare hoka xane hahinaeharenae nawenane watyalitata. <sup>12</sup> Xekohaseti Jesus Cristo xaokalita wirae, heko waiyateretyoa hatyo halitinae kakoa, kasani waiye tyaonaha, exahe hakaha hoka kanakairaha hahateneha hiyeta waokita. <sup>13</sup> Xakore hoka, nohinaeharenai, awa atyo waiyexe xomane kakoa ximaxaharehena.

<sup>14</sup> Exahe xala xamani maisa tyakeko aokowita exe iraitu waxikaitere xomana hoka hatyo hiyeta waiye xiyaiyahena. Waiye xiyaiyene hoka xakikisoa enonita haihare maheta. <sup>15</sup> Xakore hoka awa atyo xahalakohare akereta xamokene. Maika xaotyakisene xihinaehare akereta.

### Iraitinae Miyane

<sup>16</sup> Maika Xekohaseti mehaxaikohaliti kakoa tyaonitere mehaxaikohaliti isa xomana tyotyaki ferakene, exahe aliyakere xamani xisaonita hoka. Kasani Xekohaseti tyaona xityoty xikakoa naokita.

<sup>17</sup> Nokahe kakoa naxairatya exe: Paulo jina kala. Exakere naxairatita tyoty noxairalinae baberanekoa, exakere naxairaita. <sup>18</sup> Maika Wiyekohase Jesus Cristo kaxaiko xiso, eko xoaha.

# 1 Timóteo

**1** Natyo Paulo, Jesus Cristo niraene kakoare wiyase-hareheta Enore xaokala xema, watyahitere Wiyekohase Jesus Cristo xaokala xema hoka <sup>2</sup> nax-airatya exe babera homana, Timóteo. Nityani hisaona Jesus Cristo koamaniya hisaohenere hiyeta. Maika Wexe Enore, Wiyekohase Jesus Cristo waiye moka hiso, airakoaneharetya hiso, exahe hoka himehexaikohare moka.

## Xairihalikisatinae Xaotyakisati Metalahare Xema Mawenatyakene Maheta

<sup>3</sup> Noxanihenere Macedônia koa nali xowaka naxa hiso hoka Éfeso nali hisaona naokita. Nali haiyaharenae iraiti hawarehare kakoa aotyakijita. Maika hirae ekakoaha hoka halakisaha haxaotyakiraha hatyohare kakoa. <sup>4</sup> Maika hirae ihiyeha hoka hatyo xakaihak-eretera tahi, toahiyeharenae nexare xoaha tahi kaexaretyahitereha halakisaha. Hatyoharenae hiyeta halitinae iraihekoatyahitataha. Nikare tyaonahitaha hoka maisa atyo Enore xahekola tyakekoti hiyeta waiyekehalakitere akereta xini. <sup>5</sup> Exe xaotyakisati atyo aeroretya maheta xawaiyityati waiyexe mahiyaseti akota tyoitere, tyakoiyahaliti waiyexeta tyoitere, tyakekoti aliterexeta tyoitere.

## Maika Xirihare Xaotyakisatiyena Metalahare Kakoa

(Romanos 16.17-18; 1 Timóteo 4.1-3; 2 Pedro 2.1-19)

<sup>6</sup> Haiyaharenae halakisa exeharenae hoka maisa xoare tyomare, iraehekoatyahitataha. <sup>7</sup> Kasani Enore Xaotyakiraho kakoa xakore aotyakisa aokowitaha hoka maisa waiyorexeha, maisa waiyekehalakere enomanaha, exahe iraeteraha hatyakekoneha kakoa hoka maisa waiyekehalakere enomanaha. <sup>8</sup> Xaotyakiyaho atyo waiye, aokitere akeretaiya atyo kaomaka hoka ehokore. Hatyohare waiyekehalakita womana. <sup>9</sup> Xaotyakiyaho atyo maisa haliti waiyexena anere xini. Xalijiniharexenai, iniyalahare nomaseharenae, mase-maxemalaharenae, Enore maniya mawenaneharenae, maxaiminiraharenae, matyakekoneharenae anere atyo. Aijitere hanexe, hanityo, haliti faharenae anere tehitiya. <sup>10</sup> Exahe hoka ohiroarexena, enatyalolona, haenane hatya kakoa ohiro akere tyaoniterena anere. Maoseratyaliyena, irasetatere harenae anere. Kirakahare betetyaka akere kolatyaha haliti hoka betetitere harenae anere. Emetalahare xakaitere, xoaliniharetere iniyalahare tyomahitere hoka Enore niraene mahokoanetitereharenae anere tehitiya atyo kaomaka. <sup>11</sup> Exe xaotyakisati atyo Iraitu Waiyexe isa no-

mani Enore hoka noxakai aohenere. Enore kinaterexe waiyexe nalitare.

## Ihalahaliti Enore Xairakoaneharera Hiyeta

<sup>12</sup> Nihalahare Wiyekohase Jesus Cristo kakoa. Iyateliti isa nomani hoka notyomehenere nohateni hiyeta, exahe hoka tyakeko natyo hoka aoka natyo hoka nohateni notyomehenere hiyeta.

<sup>13</sup> Nikare tyoma, toahiya xakore iniyalahare niraeta etahi, iniyalahare namokitene xoaha hoka. Nokirawanetene harenae xakore hoka Enore airakoaneharetya natyo. Maisa notyakekorene hoka hatyo hiyeta maisa waiyekehalakere nomani notyomitereharenae. <sup>14</sup> Xakore hoka Wiyekohase kalore hawaiyexehare hiyeta, tyakekoti, xawaiyetyati isa nomani Jesus Cristo koamaniya nawenatyaka hiyeta.

<sup>15</sup> Exe xaotyakiye atyo aliterexe, hoka maika katyakekotyaka, kaxaokaka waiyexe xahekore kakoa: Jesus Cristo tyoa halitinae koni hoka iniyalahare nomaseharenae waiyexe maniya moheta maheta. Natyo ene atyo masakare iniyalahare nomasehare, <sup>16</sup> xakore hoka hatyo hiyeta Enore airakoaneharetya natyo, Jesus Cristo hamaholawakene nokakoi hotikisa maheta. Exehare atyo ite jikiniti tyakekohenerena waiyehena hoka ihiyeta tyakekohena hoka wenati matyotenehare ite enawenaneha tyaona.

<sup>17</sup> Maika Xekohaseti matyotenehare, makamanehare, mawaiyakahare, haterore Enore kaxaiminisaka, exahe hoka kihalalaharetyaketa mene ekakoa naoka xoaha.

<sup>18</sup> Naokitere akereta hisaona naoka, haré Timóteo. Koxaka atyo toahiyita nikare kairaetyaka hitahi. Maika exe iraitu kakoa haiyateretyoa Xekohaseti koamaniya. <sup>19</sup> Maika heko hityakeko, waiye maniya taita hahokoty. Haiyaharenae atyo maisa haxahekola waiyexe xema tyaonare hoka hatyo hiyeta ityakekoneha mawenekoareta. <sup>20</sup> Enekonihia Himeneu, Alexandre xoaha. Ahalakoahaliti niyaterere ana nahalakisahene, kaxaotyakisaka hoka maisa Enore tahi iniyalahare irae-henahititaha maheta.

## Xaotyakisati Iraexatyati Tahi

**2** Exakere hotohare: Maika iraexatyati, xaxati harenae kaomaka ihalahaliti Enore kakoa, tyotyaha halitinae tahi. <sup>2</sup> Maika kalorexena xekohasetinae tahi xiraexatya hoka waiyoreha maheta hoka waiye, wimehexaiko wisaona. Hoka tyotyaha xoalini hare Enore aokitere akere waiyexe taita wisoma. <sup>3</sup> Hatyo harenae

atyo waiye. Enore waiyexe maniya mohetehenere wiso ana atyo hatyo harenae waiyeta.

<sup>4</sup> Kasani tyotyaha iniyalahare nonitata kaiyakehetaha hoka waiyexe maniya kaxomokahetaha hoka waiyexe, aliterexe waiyekehalaka enomanaha aokita. <sup>5</sup> Hiyaiya, haterore atyo Enore. Haterore haliti hoka Enore koa-maniya mokita halitinae. Hatyo haliti atyo Cristo Jesus. <sup>6</sup> Hatyota isoawi waini maheta hoka tyotyaha halitinae waiyexe maniya moheta maheta. Enore xaimenekola aoseta kaxekaka, hotikisa maheta Enore xahekola. Kasani tyotyaha waiyexe maniya tyaohetaha aokita hoka.

<sup>7</sup> Nokaxaxikatyaki iraiti kakoare hoka majudeuneharenae naotyakisa, hoka Iraiti Waiyexe, tyakekoti aliterexe hoka noxakai maheta. Maisa namaoseraita xini, aliterexe niraeta.

<sup>8</sup> Hiyeta hoka exakere kaomaka naoka: Maika wena-kalati nihatyaka tyaoniterenae iraexahenaha Enore hiye hoka hakanonaeha ainakisaha iniyalahare hamaomaneharetaha, exahe hoka hamaxalijini-harenetaha. <sup>9</sup> Maika ohironae tehitiya irihalo tyaona hoka waiye hamaxaokowihalotyokane kakoa kaimatyoha hoka waiye ahekotyaha hawenaneha kakoa. Exahe hoka maisa masakare waiye tilikoaha harenae, maisa xoare maheta mokahitaha netati, pérola, ouro, exahe hoka imiti masakare karore ako hoka isoahitaha. <sup>10</sup> Waiyexe taitaiya tyomaha hoka katyakekotyakaha, aliterexe waiyexe xema tyaonahitaha nerekatu maheta.

<sup>11</sup> Maika ohironae mema tyaonaha haxaiminiraha kakoa. <sup>12</sup> Kasani ohironae maisa enanae aotyakisa, wakatya hare naokare. Maika mema tyaonaha. <sup>13</sup> Hiyaiya, Adão hotohare kaomaka, hatyo najikinita Eva kaomaka. <sup>14</sup> Maisa Adão xini kamaoseratyaka. Hoka ohiro atyo kamaoseratyaka hoka maisa Enore aokitere akereta tyaonita. <sup>15</sup> Xakore hoka ohiro ite xoima kaisanihena hoka iniyalahare nonita kaiyakeheta, hekoiya tyakeko, waiyexe maniya taita tyaonita, irihalo tyaonita, awaiyetita haiyanae hare hoka.

### Tyakekohatiyenae Kaxaikotyasenae

(Tito 1.5-9)

**3** Exe xaotyakiye aliterexe: Xala xamani tyakekohatiyenae kaxaikotyase tyaona aokowita hoka haka aokowi waiyexe hateniti. <sup>2</sup> Maika exakerexe tyakekohatiyenae kaxaikotyase: haliti iniyalahare maomanehare waiyexe, hatita yanityore, maxaokowiharetyoanehare, waiye kaxaikoawitere, waiyore aotyakijitere, maxeharenehare, haliti kaokehena hoka waiye mokiterehare. <sup>3</sup> Kawexere maeranehare, maxalijini-harenehare, waiye iraeterehare, mehaxaiko tyaonitere, xiyehaliti kalore haomana maxaokalahare, olo kalore maxaokalahare. <sup>4</sup> Waiye haisani, haiyanityo xoaha kakoa tyaonitere, exahe hoka ityaninae tyakekotene haxaiminiraha kakoa. <sup>5</sup> Hiyaiya, xala xamaniya maisa haiyanityo, haisani hekoti waiyore kaxaikore, hoka aliyakereya tyakekohatiyenae kaxaikohena? <sup>6</sup> Waitare Cristo koamaniya tyaohenerereya maisa

aliyakere tyakekohatiyenae kaxaikotyase tyaonita. Waiya aokowiharetyoa hoka Tihanare akereta kamatyakekotyaka. <sup>7</sup> Exahe hoka matyakekoneharenae aiminisene, waiya aliya hoka kamatyakekotyaka hoka kairaeharetyaka hoka Tihanare maoserala xema tyaona.

### Tyakekohatiyenae Kahinaetyasenae

<sup>8</sup> Nikare tehitiya tyakekohatiyenae kahinaetyaseharenae hoka waiye, mamaoseralahareha. Maisa kaloxa vinhoxa terahitaha, exahe hoka xiyehaliti, olo hare maisa kahare aokahitaha haomanaha. <sup>9</sup> Hekoiya waiye ahekotyaha, exahe hatyakekoneha xema taita tyaonaha. <sup>10</sup> Maika kahasakaharetyakaha hotohare. Hatyo kakoaiya jiyaha hoka tyakekohatiyenae kahinaetyase tyaonaha.

### Ohironai Nawenane Waiyexe

(Tito 2.3-5; 1 Pedro 3.1-6)

<sup>11</sup> Tyakekohatiyenae kahinaetyase exanityo tehitiyaiya waiyexehalo, maisa iraesexe. Maxaokowihalotyonehalo, waiyexehaloia tyotyaha xoalini hare hiye.

<sup>12</sup> Tyakekohatiyenae kahinaetyasehareya atyo hatita yanityore, waiye kaxaiko haisaninae, haiyanityo hare. <sup>13</sup> Hatyohare hahatene waiye tyomahitereharenae atyo katyakekotyakita hoka waiyore mamairanehare irae ahitaha Jesus Cristo hatyakekoneha tahi.

### Kalore Metaharexe

<sup>14</sup> Exeharenae naxairaita homana, hoka kasani haxeroreta notyoha nowaiyeheta hiso naokowita. <sup>15</sup> Nohow-ithareya hoka exe babera hiyeta waiyekehalaka homana Enore hanako wawenane tahi. (Tyakekohatiyenae xaokaka Enore hana nita.) Hatyo atyo Enore makamanehare hana. Tyakekohatiyenae atyo aiyate-likijita Iraitu Waiyexe.

<sup>16</sup> Alitere atyo Enore xaotyakiraho maisa mahowitihare xini:

Kaotyaka haliti akereta, Enore Nisekohare atyo haliti waiyexe aokene. Anjonae hoka waiyene. Kaxakaisaka etahi haliti hotyalinae koni hoka kahare tyakekoahene. Exahe hoka kakolatyaka enokoa xeta.

### Xaotyakisatiye Metalaharenae

(1 Timóteo 1.6-7; 2 Pedro 2.1-19; Judas 4-19)

**4** Enore Nisekohare waiyekehalaka irae: Miyanitiye xowakehena ite hoka haiyaharenae halakisa hatyakekone. Hoka isekohaliti maoseratyaliyenae ite tyakekohenaha, exahe ite Tihanare xaotyakira hoka tyakekohenaha. <sup>2</sup> Exe xaotyakiye atyo matyakekoneharenae, maoseratyaliyenae ta tyoita. Exahekolaha atyo ekamane akereta. Motya kamatiherahi watyahi keralihenahene hoka maisa kehexene akereta atyo. <sup>3</sup> Exe halitinae atyo aotyakisahitaha hoka mahokoanetyahitaha wenakakoati, exahe haiyaharenae nakairati manakairatyakene aokahitaha. Xakore hoka Enore atyo exe kakanakairatyakere tyoma

kakanakairatyaka maheta tyakekoterenanae, iraiti waiyexe xema tyaoniterenae hiyeta. Maika xikanakairehenere nahitita xiraexatya xihalaharene kakoa. <sup>4</sup> Hiyaiya, tyoty Enore tyomehenerenae atyo waiyexe taita. Hiyeta hoka maisaiya aliyakere maxawaiyetyakita. Maika iraexatyati ihalahaliniti kakoa kaxaokaka tyoty hatyoharenae. <sup>5</sup> Hiyaiya, Enore ni-raene, iraexatyati xoaha hiyeta tyoty hatyoharenae waiye kaokita Enore ana.

### Waiyexe Jesus Cristo Wakanehare

<sup>6</sup> Exe kakoaiya haotyakisa wihinaeharenae tyakekohatiyenae hoka Jesus Cristo wakanehare waiyexe hisaona, haotyakisahene iraiti waiyexe, tyakekoti xema hisaonitere kakoa hoka. <sup>7</sup> Awa atyo haiyaharenae xakaihakatyahitaterere ewaxirahare, hatyaharetere xema hisaona. Cristo koamaniya hawenane kakoa haiyateretyoa hoka kekoare. Heko hahasakoawi Cristo koamaniya hawenane kakoa. <sup>8</sup> Haiyanae hasakoawiti atyo alitere waiye xakore hoka Enore koamaniya hasakoawisaka atyo masakere waiye. Hatyo hiyeta atyo wenati waiyexe kaotyakita, kalikini exahe haxowaka hoka. <sup>9</sup> Exe xaotyakiye atyo aliterexe, maika katyakekotyaka, exahe kaxaokaka ihalahaliniti kakoa. <sup>10</sup> Hiyeta hoka waiyateretyoa, wahakita kahare. Enore xahita watyahita. Hatyo atyo makamanehare, tyoty halitinae niyasehareheta, tyakekohenerenae masakere waiyexe maniya xomokasehareheta xoaha.

### Xoimahalitinae Nawenane Waiyexe

(1 Timóteo 6.11-12; 2 Timóteo 2.22-26; Tito 2.6-8)

<sup>11</sup> Exeharenae kakoa haotyakisa, hiyakai xoaha. "Exe hare xema xisaona", hexa ihiyeha. <sup>12</sup> Awa atyo haiyanae matyakekohena hiso, hiyoimahalitini hiyeta. Xakore hoka maika hawenane waiyexe hahotikisa tyakekohatiyenae ana: iraiti, xawaiyetyati, tyakekoti, waiyexe wenati hiyeta. <sup>13</sup> Maika nokaokini kijiya hakaexaretya halitinae haotita Iraiti Waiyexe nanekoa kaxairatyakehenere hoka hiyakaihakatya Cristo koamaniya nawenatyaka akiti, exahe Cristo xaotyakira kakoa haotyakisa. <sup>14</sup> Awa himaotyane toahiya xowaka tyakekohatiyenae kaxaikotyasenae mokaha hakaheha hiseri heno hoka iraexatyaha hitahi hoka iyateliti Enore isa homana hoka Xekohaseti ana hahaka maheta. <sup>15</sup> Maika hahekotya exeharenae hiye hoka hatyo xema maniya taita hisaohena hoka hawénane waiyexe kekoarene tyoty halitinae waiya. <sup>16</sup> Hirihare hawénane kakoa exahe hiyaotyakira kakoa hoka. Heko nikare hisoma, nikareya hoka waiyexe maniya hamokoawi, exahe semiterenae hoka waiyexe maniya hamoka.

### Tyakekoterenae Xaiminisaka

<sup>5</sup> Awa atyo inityohaliti hiwatyalihena hoka kinatyaxa hiraehena ekakoa. Hiraehena ekakoa hoka hexe kakoa hiraetere akereta hiraekakoa. Nikare hiwatyalihena xoimahalitinae hoka haxenane, hixi-

marene kakoa hiraetere akereta hiraekakoa. <sup>2</sup> Inityohalotinae kakoa hiraehena hoka hityo kakoa hiraetere akereta hiraekakoa. Xoimahalotinae kakoa hiraehena hoka hahalalonae kakoa hiraetere akereta hiraekakoa. Awa atyo iniyalahare hahekotya ekakoa.

<sup>3</sup> Wainiyaneneronae mahinaehalohalonae hoka hakahinaetyahene. <sup>4</sup> Xakore hoka wainiyaneneronaiya atyo kaisaniye, kajiyetexe hoka hatyonaiya atyo kahinaetene. Irihareya kahinaetyahitaha hanityo, hasero xoaha hoka ehokoreya. Nikareya hoka bakahenahitaha hanexenaeha, hanityonaeha, hatyokoenaeha aenahenaherene katyahe. Enore atyo awaiyetita hatyoharenae. <sup>5</sup> Wainiyaneneroiya hawawahalo kaiserehare tyaonitere atyo, maisa xala hare kahinaetyare hoka Enore kahinaerene atyahita, hoka iraexaita ferakoa, makiya xoaha Enore kahinaetene maheta. <sup>6</sup> Xakore hoka wainiyaneneroiya hakéhalahalone maniya taita tyaona hoka ekamane atyo tyaonita, kasetaxakore hoka.

<sup>7</sup> Timóteo, maika noxaotyakiri akereta hiraekakoa hoka waiyexe maniya taita tyaonaha hoka maisa xoare kaxawatyakita ehenoaha. <sup>8</sup> Hoka xala xamaniya maisa hahinaehare kahinaetita, exahe hanityo, hanexa hoka hatyo atyo matyakekoneta. Hatya matyakekonehare nawenane xahexe atyo tyaonita.

<sup>9</sup> Maika wainiyaneneronae nexalo kaxomokakiterekoa 60 wanonexehaxenae nexalo, exahe hakirore kaiyanenehenolo nexalo taita kaxomokaka. <sup>10</sup> Xoalini hare waiyexe ohironómane kawaiyakitere, haisaninae waiye aenahenere, Enore koamaniya tyaoniterenae kiji tihitere, hatya kaokahena hoka hahanako waiye mokitere, haiyanae ana xoalini hare howitiharetere hiye kahinaetitere, exahe tyoty xoalini hare waiyexe taita tyomitalohalo nexalo taita atyoite kaxomokaka baberane koa.

<sup>11</sup> Hoka awa atyo wainiyaneneronae xoimahalotitaterenae nexalo hamoka. Hiyaiya, haxahékola hiyetaiya kaiyanene aokowihena hoka halakisa Cristo koamaniya nawenatyaka. <sup>12</sup> Nikareya hoka maisa hetati iratereha akereta tyomahitaha hoka maisaiya ehokoreta. <sup>13</sup> Exe tehitiya: Tyaonakoatyahitaha, tonakoatyahitaha hatinae nihiatyaka, maisa xoare hekoti tyomareha. Iraesahitaha, haiyanae nawenane watyalyahitaha. Mairaetyakahare mahetare ene irai ahitaha.

<sup>14</sup> Hiyeta hoka kasani xoimahaloti wainiyaneneronae kaiyaneneheta, kaisaniheta hoka kaxaiko haisaninae, exahe hahanaha hare naowita. Nikareya hoka wahalakoaharenae maisa iniyalahare iratetaha wita.

<sup>15</sup> Hiyaiya, koxaka haiyahalonae wainiyaneneronae halakisaha hatyakekoneha Cristo hoka Ahalakoahaliti koamaniya tyaonaha.

<sup>16</sup> Maika hatya tyakekohatiye hinaehalo wainiyanenero hoka kahinaetene. Awa atyo tyoty tyakekohatiyenae kahinaetyahene aoka, waiya aliya hoka howitihare enomanaha. Hawawahalonae tyaoniterenae atyo ite tyakekohatiyenae kahinaehena.

<sup>17</sup> Tyakekohatiyenaē kaxaikotyase waiye hakiterenaē atyo waiye kabakatyakita. Iraitī Waiyexe xakaiterenaē, aotyakijiterenaē terota atyo waiye kabakatyakita.

<sup>18</sup> Hiyaiya, exakerexe atyo nexa Iraitī Waiyexe:

“Awa atyo bowi kanase xolatya, tyahakita trigo kase hoka”.

Nihitiya:

Hatenitiye hakita hoka waiye bakatyaka.

<sup>19</sup> Awa atyo kairaeharetyakehena tyakekohatiyenaē kaxaikotyase hoka kasemaxematyaka. Hoka hinama, hanamaiya atyo irae hoka katyakekotyaka. <sup>20</sup> Iniyalahare tyomehenerenaē haotikatita hiwatyali hoka haiyanaē tehitiya mairaha hoka maisa nikare tyomahita.

<sup>21</sup> Enore, Jesus Cristo, anjonaē waiyexenaē haotita heko niraeta: maika tyotyā xalini hare hisomehena hoka exe xaotyakisatinaē hityakeko. Tyotyā halitinaē, exahe tyakekohatiyenaē kaxaikotyase, exahe hihinaē-haretere hoka hakakoa hamokahene. <sup>22</sup> Awa atyo hika-holawaka hikahe hiyomokala kakoa hatya seri heno Enore hatene haka maheta. Awa atyo haiyaharenaē tyomehena iniyalahare hoka hakahinaetene. Waiye hikaxaikoawi.

<sup>23</sup> Awa atyo one taita hisera, vinhoxa tehitiya ininaē hisera hoka hityako kawetere makaheheta. Hiyaiya, kahalikihena hihokakita.

<sup>24</sup> Haiyanaē iniyalahare tyomehena hoka kawaiyakita rota, iniyalahare exomokakaha nahitita. Hoka haiyanaē nómāne iniyalahare atyo maisa haxerore kawaiyakere. <sup>25</sup> Nikare tehitiya xalini hare waiyexe kaomakehena hoka kawaiyakita rota. Exahe hoka haiyanaē atyo komita maisa waiye kasemakita xakore hoka maisaiya aliyakere kaxateroakisakita.

#### Xekohasetinaē, Hatēnitiyenaē

(Efésios 6.5-9; Colossenses 3.22-4.1; Tito 2.9)

**6** Wakaharenaeya waiye aiminisa haxekohasenaē-ha hoka maisa xala hare iniyalahare irāeta Enore tahi, exahe wiyāotyakira xoaha xaokaka hoka. <sup>2</sup> Maika wakaharenaē xekohase tyakekohatiyenaē tehitiya hoka aiminisa haxekohase. Hiyaiya, exekohasenaē atyo Cristo koamaniya tyaoniterenaē hoka waiye hakitere resebitita hoka ixiyakawala ihinaeharenaēha atyo.

#### Haotyakisati Metalahare, Aliterexe Xiyehaliti Xoaha

Maika exeharenaē kakoa haotyakisahene: <sup>3</sup> Hoka hatyaiya hawarehare haotyakiye kakoa aotyakijita, hoka maisa atyo Wiyekohase Jesus Cristo niraene waiyexe tyakekore, exahe hoka maisa wiyāotyakira waiyexe akere xini aotyakijita hoka <sup>4</sup> hatyo haliti atyo ahinityare tyaonita, maisa xoare hare waiyorexe. Kinatyaxa irai aokowita halitinaē kakoa xalini hare tahi. Hatyohare hiyeta okoawahare kakoati, xalijini kakoati, maoseratya kakoati, matyakekone kakoati kaotyakita, <sup>5</sup> exahe irāesekakoati kahare. Nikare tyaoniterenaē maisa waiye maniya ahekotyareha, maisa aliterexe xema tyaonareha. Exahekolaha hiye motya Iraitī Waiyexe

hiyeta kalore kakaxiyeharetyakita, kakaoloxatyakita aokahitaha.

<sup>6</sup> Alitere atyo Enore koamaniya nawenatyaka hiyeta masakare waiye maniya kaxomokakita, xoare xamāniya wixiyehare hoka wihalahare ekakoa hoka.

<sup>7</sup> Hetati wisāohenere xowaka xoare wakolatya? Maisa xoare! Wijikohenaite aliye wawenane hoka xoare wakolatya? Maisa xoare! <sup>8</sup> Hiyeta hoka wikanakairere, wikaimere hoka maika hatyo kakoa wihalahare.

<sup>9</sup> Haiyaharenaē kaoloxa, kaxiyehare tyaona aokowita hoka hatyo hiyeta kahasakaharetyakahitaha, kamaoseratyakahitaha. Exahe maisa waiye ahekotyahitaha hoka hatyoharenaē hiyeta xamaikohaliti, mawenekoaretyati kaotyakita enomanaha. <sup>10</sup> Hiyaiya, olo kaxawaiyetyakitere hiyeta atyo tyotyā xalini hare iniyalahare kaotyakita. Haiyanaē xiyehaliti harenaē aokitere haomana hiyeta hatyakekone halakisaha hoka xamaikohaliti kalore kaoka enomanaha.

#### Xairihalinikisati

(1 Timóteo 4.11-16; 2 Timóteo 2.22-26; Tito 2.6-8)

<sup>11</sup> Hoka hiso Enore koamaniya hisaonitere, maika hisekoahena hatyoharenaē nonitata. Waiyexe maniya, mamaoseralahare maniya taita hisaona. Enore maniya taita hisaona. Exahe tyakekoti, xawaiyityati, maxahenerahareti xema taita hisaona. Heko hisaona mene Xekohaseti koamaniya. <sup>12</sup> Maika waiye haiyateretyoa hityakekone kakoa hoka wenati matyotenehare ana hahikoa. Hatyohare ana atyo Enore aoka hiso kahare halitinaē haoti hityakekone hahotikihenerē xowaka.

<sup>13</sup> Kalikini Enore haotita, exahe Jesus Cristo haotita nawakatya hiso. Hiyaiya, Enore atyo wenati ijita tyotyā halitinaē ana. Jesus Cristo hoka waiye irāeta Pōncio Pilatos haotita. Exakere nawakatya hiso:

<sup>14</sup> Maika iraiti kaxekakehenere homana xema taita hisaona, Wiyekohase Jesus Cristo haikoahaneheta kijiya. <sup>15</sup> Enaose ferakenehena ite hoka kaotyakehena Enore xaokalita. Hatyo atyo kalorexenaē Xekohase, xekohasetinaē Xekohase. Hatyo atyo haterore kalorexe waiyexe. <sup>16</sup> Hatyo taita atyo makamanehare. Xaokanatyakalati tyaonitere nali atyo tyaonita, maisaiya xala hare xane kaokita ehaliya. Maisa xala hare waiyarene, maisaiya xala hare waiyitene. Maika kaxaiminisaka, kihalalaharetyaka mene ekakoa! Xoaha.

<sup>17</sup> Maika kaoloxerenaē hiye hiraē hoka awa aokowiharetyoahenaha haoloxaha ali waikohekoa tyaonitere kakoa. Exahe hoka hatyo xema hawenane mokaha. Hiyaiya, hatyoharenaē atyo maisa wikanatere mokare. Maika Enore xahita kaisere atyahaha. Hiyaiya, hatyo atyo tyotyā xalini hare waiyexe ijita womana wihalaharene niyahare. <sup>18</sup> Hiraē ekakoaha waiyexe tyomaha maheta hoka ihiyeta kahare xalini hare kakoare waiyexe tyaonaha waiyexe tyomahitere hiyeta. Maika waiyexe haliti tyaonaha hoka haxiyehareha hiyeta maxiyehareharenaē ana isaha. <sup>19</sup> Nikareya tyaonaha hoka enahetaha maniya atyo kahare xalini hare waiyexe kaxomokakita. Nikareya tyaonaha hoka waiyexe wenati ana xane hikoaha.

<sup>20</sup> Timóteo, maika waiye hikaxaiko kaxekakehenere homana. Awa atyo hiraeseokoatya, hatyoharenae atyo maisa waiyexe Enore ana. Exahe awa atyo haiyanae kakoa hiraeseokoatya waiyoliniti aokahitere tahi. Haty-

oharenae atyo ehaikoare. <sup>21</sup> Haiyanae waiyoliniti aokahitere kakoare aokowiyahitaha, hoka ihiyeta hatyakekoneha halakisa.

Maika Enore waiye kaxaiko xiso xityotya, eko xoaha.

## 2 Timóteo

<sup>1</sup> Natyo Paulo, Jesus Cristo niraene kakoare Enore xaokalita. Exaxikatyakahare natyo wenati matyotenehare isa aokowihenere Cristo Jesus tyakekotyaka hiyeta tahi noxakai maheta. <sup>2</sup> Naxairatya homana Timóteo. Hityakekone hiyeta noxiyakawali nityani hisaohenere.

Maika Wexe Enore, Wiyekohase Jesus Cristo xoaha airakoaneharetya, amehexaikohalinikisa, kaxaiko harenae hiso.

### Ihalahaliti, Xairihalinikisati Xoaha

<sup>3</sup> Nihalahare Enore kakoa. Noxahekoli waiyexe kakoa nahakita enomana nahetakomaniyerenae tyomehenere akereta. Ferakoa, makiya hare niraexaita, nihalahareta minita Enore kakoa, notehena hiso hoka.

<sup>4</sup> Notehitita hitiyaharehenere, hoka kasani nowaiyeheta hiso naokowita, hoka nihalahare maheta. <sup>5</sup> Notehitita hityakekone kaiserehare. Hasero Lóide, hityo Eunice tyakekohenereta hityakekone. Waiyekehalakita nomani heko hityakekotere. <sup>6</sup> Hiyeta hoka maika heko Enore waiyoliniti isehenere homana kakoa hahaka nokahe namohenere hiseri heno xowaka hoka hahaka maheta Xekohaseti hatene.

<sup>7</sup> Hiyaiya, Enore Isekohaliti isehenere womana atyo wimamairanehare mokita. Inisekohare atyo aiyatelikijita, axawaiyetyakakoanekijita hoka waiye wikaxaikoawita. <sup>8</sup> Hiyeta hoka awa atyo hihaihare hiyakaini kakoa Wiyekohase tahi, exahe awa atyo hihaihare nokakoi berexoako notyaonita ewakanehare notyaonitere hiyeta. Enore iyateliti isehenere homana kakoa kaisere haiyateretyoa, hoka iniyalahare nokaxomokakitere akereta hisaona hoka iraiti waiyexe hiyakai, Enore iyateliti isehenere kakoa.

<sup>9</sup> Iyeheta wiso iniyalahare nonitata hoka hakaxaikone hotyali aoka wiso. Maisa xoalini hare wománe hiyeta xini. Hawaiiexehare hiyeta waiyexe maniya moheta wiso. Cristo Jesus hiyeta atyo exe maxaimanehare hawaiyexehare isa womana. Toahiya tyotya xoalini hare maomakahare xowakita. <sup>10</sup> Kalikini atyo Jesus Cristo wiyasehareheta kaotyakehenere waiyexe hiyeta waiyekahalaka womana. Hiyaiya, hatyo atyo kawainisakitere niyaterere miyatya hoka Iraiti Waiyexe hiyeta wenati matyotenehare hotikisa.

<sup>11</sup> Iraiti Waiyexe xakaisasehare notyaona noxakai maheta Iraiti Waiyexe, exahe naotyakisa maheta tyakekohatiyena Enore aoka natyo. <sup>12</sup> Hoka hatyo hiyeta iniyalahare nokaxomokakita, xakore hoka heko notyakekota. Notyakekotere atyo kinatere, heko ite

kaxaiko natyo imiyaneki kijiya. Hatyohare kakoa nawaiyoreta.

<sup>13</sup> Maika heko hisaona iraiti naotyakihenere hiso xema. Hatyo niyahare naotyakisa hiso. Maika heko hisaona wityakekotere xema, xawaiyetyati maniya, Jesus Cristo kakoa haxawalita wisaonitere hiyeta.

<sup>14</sup> Isekohaliti Waiyexe tyaonitere wihiye hiyeta waiye hamoka, xoalini hare waiyexe kaxekakehenere homana.

<sup>15</sup> Waiyekehalakita homana: Tyotya wihinaeharenae Ásia koa yerena, Fígelo, Hermógenes harenae halakisaha natyo. <sup>16</sup> Maika Onesíforo hotyali Enore airakoaneharetya. Kahaliki aihalahalalinikisa natyo, maisa haihareta berexo notyaonitere kakoa. <sup>17</sup> Kaokehene Roma nali xowaka tawa noxahiti hoka kaoka natyo. <sup>18</sup> Maika miyanitiye ferakenehena hoka Enore waiye maniya Onesíforo moka. Éfeso nali hoka kalore kahinaetya natyo. Koxaka exeharenae waiyekehalakita homana.

### Jesus Cristo Sorarexa

(Filipenses 4.1; Hebreus 4.11; 10.32-37)

<sup>2</sup> Haré Timóteo, maika hikinatere hisaona waiyexe hiyeta, Jesus Cristo kakoa haxawalita wisaonitere hiyeta. <sup>2</sup> Noxaotyakiri hasemehene kahare haliti haoti hiyakaihena halitinae waiyexena hiye hoka hatyosaha aotyakisaha hahinaeharenaia.

<sup>3</sup> Maika Jesus Cristo sorarexa tyakekohatiye waiyexe hisaona hoka notyaonitere akereta hisaona, exahe iniyalahare hikaxomokaka hoka. <sup>4</sup> Hiyaiya, sorare atyo sorare hatene hiye tyaonita hoka maisa hawarehare hateniti watyaliye. Haxekohase maniya taita atyo tyaonita, exekohase tyakekotene maheta.

<sup>5</sup> Nikare temati hiye hasakakoa haiyanae kakoa hoka maisaiya ehokore temita hoka maisaiya xoare kaxekakita enomana.

<sup>6</sup> Nikareta masenekoa hakatyasehare tehitiya. Nakairati ihatihena hoka hatyo ana hotohare kaxekakita.

<sup>7</sup> Waiye hahekotya niraetere tahi kakoa. Xekohaseti ite awaiyekehalakatya homana tyotya xoalini hare.

<sup>8</sup> Hotyaxematya Jesus Cristo, Davi jikolahare, kaxekasekisakehetehene. Etahi noxakaihakaita halitinai hiye, Iraiti Waiyexe noxakaitere akereta. <sup>9</sup> Hoka hatyo hiyeta iniyalahare nokaxomokakita, exahe berexo ako notyaonita xalijiniharexe akere. Xakore hoka maisa atyo Enore niraene kabereotyakere. <sup>10</sup> Hiyeta hoka Enore haomanere hotyali aohenere waiyakahare howitihare nawenani tyaonita. Xakore hoka naiyateretyoi-



ta. Exe harenae notyomita, waiyexe maniya kax-omokakehetaha hoka Jesus Cristo nali wenati waiyexe matyotenehare ana hikoaha maheta.

<sup>11</sup> Exe xaotyakiye aliterexe:

“Koxakaiya wiwaini Cristo kakoa hoka, wikasehetaiya ekakoa.

<sup>12</sup> Hekoia waiyateretyoa iniyalahare wikaxomokitere kakoa hoka xekohaseti tehitiyaiya wisaona Cristo kakoa. Maisaiya waoka hoka maisa aoka wihiye.

<sup>13</sup> Maisaiya wikipatere wisaonita ekoamaniya hoka, Cristo atyoite hekota kinatere tyaonita hawenane kakoa. Maisa atyo hatyota maoseratyoawiye”.

### Hatenetyatiye Waiyexe Kaxaokakere

<sup>14</sup> Maika exeharenae hikaxaikoterena hiye hiyakai. Kinatere hiraekakoa Enore haotita, hoka maisa iraiti hiyeta xalijini kakoahitaha. Hatyoharenae maisa waiyexe, semiterena ahowitihalikijita taita.

<sup>15</sup> Haiyateretyoa hawenane kakoa, hoka Enore ihalahare hikakoa. Waiye hakitere atyo maisa haiharexe hatene kakoa. Nikare waiyekahalaka iraiti kakoa haotyakisa hoka Enore ihalahare hihatene kakoa.

<sup>16</sup> Awa atyo iraisekoatyatitere xema hisaona, maisa atyo hatyohare waiyexe Enore ana. Hatyoharenae hiyeta halitinae Enore matyakekonehitita. <sup>17</sup> Hatyo xaotyakiye atyo honoti ekakoita kalaosehena hoka kaheneharehena tyaonitere akereta. Hatyo xaotyakisatiyena konitare atyo Himeneu, Fileto xoaha. <sup>18</sup> Koxaka halakisaha waiyexe wenati hoka ahowitihalikijita haiyaharenae tyakekone. Aiyateretyoahitaha haxaotyakira kakoa, wikaseneheta koxaka kaotyaka aokahitaha.

<sup>19</sup> Xakore hoka Enore niraene kinatere tyaona, maisa atyo ite kaxalikakita. Hati sehali kalorexe heno kaomakitere akerexe kinatere tyaonita. Exakerexe xairatyoare tyaonita:

“Waiyekehalakita Xekohaseti ana enomanerena”.

Nehitiya:  
“Maika Xekohaseti koamaniya tyaona aokowiterena halakihenaha iniyalahare háomaneha”.

<sup>20</sup> Kalorexe hatyako tinalitinae kahare tyaonita, hoka maisa ouro, prata xoaha nomakere taita xini. Barohe, atya xoaha nomakere tehitiya haiyanae. Haiyanae atyo kaomaxetere niyahare hoka haiyanae atyo ferakiti nihatyaka kawatyalisaka maheta. <sup>21</sup> Nikareya xala xamani iniyalahare háomanena nonitata waiyexe maniya taita tyaona hoka waiyexe xoalini hare niyahare taitaiya tyaona, exahe Xekohaseti hatene waiyexe niyahareya tyaona.

### Xoimahalitinae Nawenane Waiyexe

(1 Timóteo 4.11-16; 6.11-12; Tito 2.6-8)

<sup>22</sup> Awa atyo iniyalahare xoimahalitinae tyomitere xema hisaona. Maika waiyexe, tyakekoti, xawaiyetyati, mehaxaikalohaliti harenae xema hisaona, haxawalita waiyexe haxahekola kakoa Enore xema tyaoniterena kakoa.

<sup>23</sup> Awa atyo maxemerehare, irasekoatyati xema hisaona. Hatyoharenae hiyeta xalijini kakoati kaotyakita. Hatyohare atyo waiyekehalakita homana. <sup>24</sup> Xekohaseti wakanehariya atyo maisa xalijinihareta.

Waiyexe taita atyo iraeta halitinae kakoa. Xaotyakisatiye waiyexe, mehaxaikaloharexe atyo, <sup>25</sup> hoka hawaiyexehare kakoa watyali hairawaiyasaena. Xoana xamani hoka Enore kahinaetyahene hoka halakisaha iniyalahare háomaneha hoka Iraiti Waiyexe xema tyaonaha. <sup>26</sup> Nikareya hoka waiye exahekola tyaheta, hoka iyoawihenahitahiya Tihanare xiyokala nonitata, koxaka ene exahekola xema tyaonaha.

### Miyanitiye Ferakenena

**3** Exe harenae hotyaxematya: Miyanitiye xowakenena ite hoka wenati howitihare tyahena. <sup>2</sup> Halitinae ite haxaokakoawi taita ahkehena, kahare ite xiyehaliti aohenaha, aokowiharetyoahenaha, ahinitaliye, iholitaterere, maisa xoare kakoa ihalaharetere hare. Hanexena, hanityona maxaiminiriterena, maisa ite aiminisahitaha Enore koamaniya nawenatyaka. <sup>3</sup> Maisa ite haiyanae awaiyetyahitaha, xalijinihareha ite. Iraeharetyaite haiyaharena, maisaite waiyore kaxaikoawitaha hoka xalijinihareha. Xoalini hare waiyexenai nahalakoahare ite tyaonaha. <sup>4</sup> Mátawatyaha ite haliti. Mawatyalisakahare ite tyaonaha. Aokowiharetyoaha ite, awaiyetyaha ite kehalahaliti hoka maisa Enore awaiyetyahitaha. <sup>5</sup> Motya ite Enore koamaniya ene tyaonahitaha, xakore hoka maisa Enore niyaterere aokareha haomanaha. Hatyohare halitinae nonita hakikisoa.

<sup>6</sup> Haiyanae hatyoharekonitare hatyakona isoa hoka ohiro maotikone tyaoniterena jiyahaotyahitaha. Maisa irihaloloaha, iniyalahare nomasehaloha hoka tyoty xoalini hare awaiyiterenai xema tyaonahitaha.

<sup>7</sup> Waiyolotaha xakore aokowitaha hoka maisaiya xoana hekota waiyolo ahitaha iraiti waiyexe kakoa.

<sup>8</sup> Toahiya Janes, Jambres xoaha Moisés kakoa kahalakoahareha. Hatyona akereta exe halitinae Iraiti Waiyexe nahalakoahare tyaonahitaha. Maisa iriharexe, maisa Iraiti Waiyexe tyakekoreha. <sup>9</sup> Xakore hoka maisa ite wahita hoka tyoty halitinae waiyaha emawaiyoreharenaeha, Janes, Jambres xoaha kawaiyakehenere akereta.

### Jesus Tyakekohenerena Kakoa Atyoite Kahalakoaharetyoaka

(Filipenses 1.28-30; Apocalipse 6.9-11)

<sup>10</sup> Xakore hoka hiso atyo noxaotyakiri, noxahekoli, notyakekoni, nomehexaikalohalini, noxawaiyiri, noxaiyateretyoani xema hisaonita. <sup>11</sup> Iniyalahare nokaxomokakitere, kirakoane notyaonitere harenae hase-ma. Tyoty waiyekehalakita homana wenakalati Antioquia, Icônio, Listra nali kalore iniyalahare nokaxomokakihenerere! Howitihare kaiserehare. Xakore hoka Xekohaseti iyeheta natyo hatyoharenae nonitata.

<sup>12</sup> Tyoty waiyexe maniya tyaona aokowiterenae, haxawalita Jesus Cristo kakoa tyaona aokowiterenae ite iniyalahare kaxomokaha.

<sup>13</sup> Hoka xalijiniharexena, maoseratyaliyena harenae ite ekakoita masakare iniyalahare tyomehenaha. Maoseratyahaite, exahe kamaoseratyakaha xoaha ite.

#### Exe Baberane Atyo Enore Niraene

(1 Pedro 1.24-25; 2 Pedro 1.18-21)

<sup>14</sup> Hiso hoka heko hisaona iraiti waiyexe hasemehenere, hityakekohenerere xema. Waiyehelakita homana Iraiti Waiyexe kakoa aotyakihenerenae hiso.

<sup>15</sup> Hiyoimene xowakita Iraiti Waiyexe nanekoare hiyaita, hoka hawayoleta ekakoa. Hatyoharenae atyo arihalinikijita, waiyexe maniya awenatyakihitita, tyakekoti Jesus Cristo hiyeta. <sup>16</sup> Hiyaiya, tyoty Iraiti Waiyexe nanekoare atyo Enore nalitare. Ihiyeta xaotyakisati aliterexe kaotyakita, xaotyakisati ehaikoare kaxakaisakita, iniyalahare kaomakitere kaxaototatyakihitita, exahe wenati waiyexe maniya kaxaotyakisakita.

<sup>17</sup> Exe harenae hiyeta atyo Enore wakanehare memere tyoata mene hoka tyoty xoalini hare waiyexe taita tyoma maheta.

#### Maika Heko Hityakekone Xema Hisaona

(2 Timóteo 2.1-3; Hebreus 4.11; 10.32-37)

**4** Kinatere nira hikakoa Enore, exahe Jesus Cristo haotita. Tyohenere xowaka ite Kalorexe tyaona maheta hoka tyoty halitinae, kasexenae, ekamane-nae hare hoka axalihena, hoka tyomahitere nahalakoa tyomahitere akereta mokahene maheta. <sup>2</sup> Hasemehena niraini: hiyakai Enore nira halitinae hiye, haiyateretyoa hiyakaini kakoa. Hiyakaihakala ferakene xamani, maisa xamani hoka hiyakaihakatya ihiyeha. Haiyateretyoa exahitaha, hiwatyalahene, haihalahalinikisahene. Himaholawakeneta haotyakisahene. <sup>3</sup> Hiyaiya, haxowakehena ite hoka halitinae maisa Xaotyakisati Waiyexe semaha aokowihenahitaha hoka xoalini hare awaiyetyahitere xema taita ite tyohenaha. Haomanahitaha ite haxaotyakisaka aohenaha. Axehenahene ite xoare xamani semaha aokowiyahitaha hoka. <sup>4</sup> Maisa ite semaha aokowi ahitaha xaotyakiye waiyexe hoka xakaihakere taita ite semaha aokowihenaha.

<sup>5</sup> Xakore hoka hiso atyo maika hirihare, hikaxaikoawi. Heko haiyateretyoa iniyalahare hikaxomokakitere kakoa. Hateniti waiyexe hisoma hoka Iraiti Waiyexe hiyakai. Tyoty hihatene hisoma Enore wakanehare hisaohenere hiyeta.

<sup>6</sup> Natyo hoka okoi nokamani aosehena. Nokaxaisakihena hoka nahalakhena exe wenati. <sup>7</sup> Naiyateretyoa

waha aka hateniti waiyexe kakoa hoka namematya nohateni Enore aohenere. Heko notyakeko Xekohaseti Jesus. <sup>8</sup> Kalikini waiyexe nomaniye maheta memere atyahita natyo, tyoty nojiyahao akatya hoka. Xekohaseti atyo ehokorexe taita ahekoita halitinae kakoa hoka seriti hoko waiyexe ite isehena nomani hatyo xowakehena hoka. Maisa ite nomani taita xini, tyoty etyoaneneheta hawayexehare kakoa atyahiterenae ana tehitiya ite isa.

#### Hinaehaliti Kakoa Niraetyaka

<sup>9</sup> Haiyateretyoa hoka haxerore hisoa hoka hiyaiyeheta natyo. <sup>10</sup> Demas awaiyetya hawenane halitinae koni hoka halakisa natyo hoka Tessalônica xeta xane. Crescente atyo xane Galácia koa xeta, hoka Tito atyo xane Dalmácia koa xeta. <sup>11</sup> Lucas taita ali nohaliyi tyaonita. Maika Marcos hatawa hoka hanolokene hoka kahinaetya natyo Enore hatene hiye. <sup>12</sup> Naxikatya Tíquico Éfeso xeta. <sup>13</sup> Maika hisohena hoka hakolaheta nomani nimirase nahalakhenerere Trôade nali, Carpos hanakota. Maika hakolaheta nomani baberanae. Maika babera militi nomakerenae kaisere hakolaheta.

<sup>14</sup> Alexandre, kamatihera kakoa hakitere kalore iniyalahare moka natyo. Xekohaseti ite iniyalahare mokene iniyalahare mohenerere natyo nahalakoa. <sup>15</sup> Maika hirihare tehitiya ekakoa. Wiyakaitere xahita kahalakoa-hareta kaisere, xalijinihare tyaona.

<sup>16</sup> Hetati nokaxaxalisakehenere xowaka maisa xala hare hekotita nokakoi. Tyotyaha halakisaha natyo. Kasani maisa Enore xoana mokahene hatyo nahalakoa naokita! <sup>17</sup> Xakore hoka Xekohaseti hekota kaxaiko natyo, exahe hoka iyateliti isa nomani hoka tyoty Iraiti noxakai maheta majudeuneharenae hiye. Exahe iyeheta natyo leão kanasakota. <sup>18</sup> Xekohaseti ite iyeheta natyo tyoty iniyalahare nonitata hoka kolatya natyo hawenakala enokoa xeta. Maika kaihalaharetyaketa mene ekakoa matyotenehare naoka, xoaha.

#### Miyanitiye Xakaisatiheta

<sup>19</sup> Maika hiyakaiheta natyo Priscila, Áquila hiye, exahe Onesiforo hotyalinae hiye hoka. <sup>20</sup> Erasto hekota wenakalati Corinto nali. Trófimo atyo hokakita hoka nahalakisene wenakalati Mileto nali. <sup>21</sup> Haiyateretyoa hoka wehakiti nahitita hisoa. Wihinaeharenae Eubulo, Prudente, Lino, Cláudia, tyoty haiyaharenae hoka haxakaisakehenahitaha aokaha hihiye.

<sup>22</sup> Timóteo, maika Xekohaseti hisekohare kaxaiko. Maika Enore xityoty waiye moka. Eko xoaha.

# Tito

<sup>1</sup> Natyo Paulo, Enore wakanehare, Jesus Cristo niraene kakoare naxairatya exe babera. Enore aoka natyo haomana hoka axikatya natyo nakahinaetya hoka naiyatelikisa maheta Enore anere hotyalinai tyakekone. Naotyakisahene Iraitu Waiyexe kakoa hoka waiyexe maniya taita tyaonaha maheta. <sup>2</sup> Iraitu Waiyexe hiyeta watyahita wenati matyotenehare xahita. Enore mamaoseralahare atyo, waikohe maomakahareneta wenati matyotenehare isa womana aokowi. <sup>3</sup> Haxaimenekolaoseta hotikisa womana wenati matyotenehare iraitu hiyeta. Exe Iraitu Waiyexe atyo kaxekakita nomani hoka noxakaitene Wiyasehareheta Enore xaokalita.

<sup>4</sup> Naxairatya homana, Tito. Hiso atyo nityani hityakekone hiyeta. Exe tyakekoti atyo hityakekone, notyakekoni xoaha. Kasani waiye himehexaikohare hisaona Wexe Enore hiyeta, exahe Wiyasehareheta Jesus Cristo hiyeta naokita.

## Inityohaliti Waiyexenae Nawenane

(1 Timóteo 3.1-13)

<sup>5</sup> Nahalakihenere hiso Creta nali xowaka xoalini hare hatyo nali maomakahare tyaonitere haxakaisa maheta. Exahe hoka wenakalatinæ nihatyaka tyakekoterenæ nityohalitira hamoka maheta.

Hotita niraehenerenæ. <sup>6</sup> Tyakekohatiyenæ kahinaetyaseya: haliti mairaharetyakahare, hatita yanityore, ityaninæ tyakekohatiye hoka iniyalahare maomanehare, enómaneha tahi masemakahare, semaxematyatiyeha hare.

<sup>7</sup> Xala xamani atyo Enore hatene hakita hoka tyakekohatiyenæ nityohalitira tyaonita hoka maisaiya xoare hiyeta kairaharetyakita. Maisaiya ahinityaliye, maisaiya xalijiniharetata hare. Maisaiya hekatikare, eharehatiye. Maisaiya olo kalore harenæ aokitatere haomana hare tyaonita. <sup>8</sup> Haliti kaokhehena hoka waiye mokitere hare hahanako, waiye maniya ahokotitere, aiminisahatiye, iriharexe, waiye kaxaikoawitere hare. <sup>9</sup> Kinatere tyaonitere iraitu waiyexe xema kaxaotyakisakehenereya hiye tyakekohatiyenæ nityohalitira tyaona hoka aihalahalinihisa haiyanæ waiyexe xaotyakiye kakoa. Exahe hoka waiyoreya hotikisa xaotyakiye ehaikoare hahinaeharenæ ana airihalikisahene maheta.

<sup>10</sup> Hiyaiya, kahare haiyanæ tyakekota xakore aokowita hoka masemaxemalahare tyaonahitaha, kahalakoharahita iraitu waiyexe kakoa. Maoseratyahitaha haliti. Judeu xaotyakira xema tyaoniterenæ kaisere masakare nikare tyaonita. <sup>11</sup> Maika hiwatyalihenene

mema tyaonaha maheta. Hiyaiya, haiya xowaka maoseratyahitaha kaiyanityore, exanityo ityaninæ tyotyaka kakaita. Xaotyakiye ehaikoare aotyakijita, kasani kaoloxahare tyaonaha ihiyeta aokowiyahitaha hoka.

<sup>12</sup> Hatya enekonitareha iraitu xakaisasehare Creta nalitare nexa: "Creta nali tyaoniterenæ maoseratya minitaita. Maisa waiyexe, xalijinihareha. Maxaharehatiha, kirakahare akereta hajihæ ekaisetyahitaha".

<sup>13</sup> Hatyo iræhenere aliterexe. Hiyeta hoka maika hiræ kinatere ekakoaha hoka iraitu waiyexe tyakekoha.

<sup>14</sup> Hiræ ekakoaha maisa judeunæ xakaihakalateræ, haliti xakaihakalateræ xema tyaonahita maheta. Hatyonæ atyo maisa awaiyityare iraitu waiyexe hoka nikare iraitu ahitaha.

<sup>15</sup> Tyotyaka atyo waiyexe taita, waiyexe taita ahokotiterenæ ana. Hoka maisa atyo xoare hare waiyexe iniyalahare taita ahokotiterenæ, matyakekoneharenæ ana. Hiyaiya, eseriha, ityakoayahareha atyo ewaxirahare taita. <sup>16</sup> Enore koamaniya xakore tyaonahitaha aokowiyahitaha hoka xoalini hare enómanenæha atyo maiha waiyexe. Kalore irawaniti kakoareha, maisa semaxematyareha, maisaiya aliyakere xoalini hare waiyexe tyomahitaha.

## Xaotyakisati Waiyexe

<sup>2</sup> Maika xaotyakisati waiyexe aokitere akere kakoa taita haotyakisa. <sup>2</sup> Maika inityohalitinae hiye hiræ hoka waiye maniya kaxaikoawi, iriharexe, waiyexe taita ahokotyaha, awaiyetyahita haliti, tyakekohatiye kaiserehare, mamaxaharehareneta tyaonaha wenati waiyexe kakoa.

## Ohironai Nawenane Waiyexe

(1 Timóteo 3.11; 1 Pedro 3.1-6)

<sup>3</sup> Maika inityohalotinae hiye tehitiya hiræ hoka waiyexe maniya taita tyaonaha. Hoka maisa iraeseri ahitaha, maisa kalore vinhoxa terahitaha. Maika waiyexe kakoa taita aotyakisaha. <sup>4</sup> Nikare ite hoka xoimahalotitaterenæ masakare awaiyetyaha haiyanenæha, haisaninæ, <sup>5</sup> exahe hoka irihaloha, waiyexe maniya taita tyaonaha, waiye kaxaiko hahananaeha, exahe haiyanenæha niraenæha hoka semaxematyaha harenæ hoka maisa Enore niraene kairaharetyakita maheta.

**Xoimahalitinae Nawenane Waiyexe**

(1 Timóteo 4.11-16; 6.11-12; 2 Timóteo 2.22-26)

<sup>6</sup> Maika xoimahalitinae tehitiya haotyakisa waiye maniya kaxaikoawi maheta. <sup>7</sup> Maika hiso tehitiya xoalini hare waiyexe taita hisoma hoka hawenane akereta tyaonaha. Maika haotyakihena hoka kaimini haotyakisa. <sup>8</sup> Waiyexe iraiti taita hirae hoka maisa xala hare iraharetita hiso hoka wahalakoaharenae haihare hoka maisa xoare iniyalahare irateta wiyaoakaka.

**Xekohasetinae, Hatenitiyena Xoa**

(Efésios 6.5-9; Colossenses 3.22-4.1; 1 Timóteo 6.1-2)

<sup>9</sup> Maika wakaharenae semaxematyaha haxekohasenaiha niraene ihalahareha maheta ekakoaha, hoka maisa ekoaxatyali ahitaha, <sup>10</sup> maisa kaiwaharetyahitaha haxekohasenaiha. Maika haxekohasena aokitere akereta taita tyomaha hoka exekohasena tyakekohene. Nikare taitaiya tyaonaha hoka Enore wiyasehareheta xaotyakira tahi waiye kasemaka.

**Cristo Atyo Waini Womana**

(1 Coríntios 15.2-4; Gálatas 1.4; 1 Pedro 2.21-25; Apocalipse 1.5)

<sup>11</sup> Hiyaiya, Enore hawaiyexehare hotikisa hoka tyotyahalitinae waiyexe maniya moheta maheta. <sup>12</sup> Aotyakisa wiso hoka wahalakisa maheta wimatyakekonetere, iniyalahare wawaiyitirehare harenae hoka waiye maniya taita wisaona, waiye wikaxaikoawi iniyalahare nonitata hoka Enore ana taita wisaona maheta halitinae koni. <sup>13</sup> Aotyakisa tehitiya wiso hoka watyahita Wenorexa, wiyasehareheta Jesus Cristo xahita. Haxowakehenaite hawerokene kakoa kaoketehena hoka waiye maniya kaisere mohena wiso hoka hatyo xahita watyahita. <sup>14</sup> Hatyo atyo isoawi waini maheta womana hoka tyotyahare nonitata waiyexe maniya taita moheta wiso hakaxaikone hotyali maheta. Enomanere taita wisaona hoka waiyexe taita wisoma kaiserehare maheta.

<sup>15</sup> Exeharenae kakoa haotyakisa. Haiyateretyoa hiraene semiterena xahita, haihalahalinikisahene hare. Hirihare hoka maisa hatya hekoti maxaiminirita hiso.

**Tyakekoterena Nawenane**

(1 Tessalonicenses 5.14-18; Tiago 1.19-22; 3.17-18; 1 Pedro 4.7-11)

<sup>3</sup> Maika hirae tyakekohatiyena kakoa hoka xekohasetinae wenakalati waikateharenae niraene semaxematyaha hoka memere tyaonaha xoalini hare waiyexe tyomaha maheta. <sup>2</sup> Maika haotyakisahene hoka maisa iraharetyahitaha haliti, hoka maxalijiniharehare, waiyexeharexe tyaonaha. Maika waiyexe iraiti taita iraha tyotyahalitinae kakoa.

<sup>3</sup> Hiyaiya, toahiya xowaka ene maisa wiriharexe hoka wasemaxematyare, wiyalijinihare ene. Xoalini hare

hawarehare iniyalahare taita ene wahekoita hoka hatyo xema wisaonita. Hatyo xowaka xoalini hare iniyalahare wisomita, xoalini hare kehalita wihiye hoka hatyohare maniya wisaonita. Wokoawahareta. Haiyanae hoka kirawanahitaha wiso hoka wikirawanahitahene tehitiya. <sup>4</sup> Xakore hoka Enore wiyasehare atyo haxairakoanaharera hotikisa haxawaiyera tyotyahaliti ana <sup>5</sup> hoka waiyexe maniya moheta wiso iniyalahare nonitata. Maisa xoalini hare waiyexe wisomitere hiyeta xini. Haxairakoanaharera wiso hiyeta. Isekohaliti Waiyexe hiyeta wawenane waiyexe maniya moheta, hoka waitare awenakiheta wiso hoka isa waitare wenati womana. <sup>6</sup> Enore waiyexehare hoka Haisekohare Waiyexe isa womana wiyasehareheta Jesus Cristo hiyeta. <sup>7</sup> Nikare tyoma hawaiyexehare hiyeta iniyalahare maomaneharene moka wiso maheta, hoka wenati matyotenehare watyahitere kaxekaka womana maheta. <sup>8</sup> Exe xaotyakiye atyo aliterexe kaiserehare.

Maika heko hirae exe harenae tahi hoka tyakekohenerena Enore aiyateretyoa háomane waiyexe kakoa. Exeharenae atyo waiye tyotyahalitinae ana hoka enawenaneha waiye tyaona maheta.

<sup>9</sup> Hoka awa atyo irasekoatyati maxemerehare, wahahare tahi toahiyeharenae nexare, xalijini kakoati, irasekoatyati judeuna xaotyakisakaho tahi kairasekoatyaka. Exe harenae atyo maisa xoare tyomare, maxemerehare atyo. <sup>10</sup> Maika xala xamani xaotyakisati metalahare kakoa aotyakisa hoka axalijinihaliki akatya xinekoni hoka hiwatyalini hinamaki. Hatyaoseta maisa semita hiraene hoka maisa hiwatyalihitene. <sup>11</sup> Hiyaiya, waiyekahalakita atyo homana: maisa xoana hamokitene, iniyalahare nomasehare terota hoka. Iniyalahare tyomitere atyo emawaiye nawenanene hotikijita.

**Miyanitiye Xakaisatinae**

<sup>12</sup> Naxikahena ite homana Ártemas xamani, Tíquico xamani hoka kaoketehena homana hoka hatyaoseta maika haiyateretyoa hoka hisoa hahalakoatya natyo Nicópolis nali. Wehe akiti xowakaite nali notyaona naokowi. <sup>13</sup> Maika hakahinaetya Zenas, wenatyaho kakoa waiyoretere. Exahe Apolo tehitiya hoka xoare kakoa xamani hakahinaetyahene haokowi enetonaneha hiye hoka hisa enomana hoka waiye xaneha.

<sup>14</sup> Nikare ite hoka wihinaeharenae waiyore waiyexe háomane kakoa, exahe haiyanae hoka kahinaetyaha xoare xamani aokahitaha haomanaha hoka. Nikare ite hoka enawenaneha waiye tyaona.

<sup>15</sup> Tyotyahohaliye tyaoniterena haxakaisakehenahitaha aokaha hihiye. Maika wihinaeharenae tyakekohatiyena hiye hiyakiheta wiso.

Maika Enore waiye kaxaiko xiso xityotyaha. Xoa.

# Filemom

<sup>1</sup> Natyo Paulo, berexo ako notyanita Jesus Cristo hiyeta, hoka wihinaehare Timóteo kakoa naxairatya homana, Filemom. Hiso atyo wihinaehare, wikahinaetyase hateniti hiye. <sup>2</sup> Exahe wihinaehare tyakekoterenaeh hohisakoiterenaeh hihanako anere, wihinaehalo Áfia anere, Arquipo wikahinaetyasehare hateniti hiye anere tehitiya hoka.

<sup>3</sup> Kasani waiye ximehexaikohare xisaona Wexe Enore hiyeta, Xekohaseti Jesus Cristo hiyeta waokita.

## Filemom Tyakekone Nawaiyexehare Xoaha

<sup>4</sup> Nohinaehare Filemom, niraexahena hoka notyaxematya minita hiso, nihalahareta Nenorexi kakoa hihiyeta. <sup>5</sup> Nasema hawaiyetitere tyotyia Enore koamaniya tyahenerenaeh, hityakekone Xekohaseti Jesus Cristo harenaeh hoka hatyo hiyeta nihalahareta.

<sup>6</sup> Enore hiye niraexatita, kasani tyakekoti haxawalita mokitere wiso awaiyolinikisa wiso hoka tyotyia xoalini hare waiyexe kaxekakitere womana Jesus Cristo wityakekotere hiyeta, masakare waiyekehalaka womana naokita.

<sup>7</sup> Nohinaehare, hiyawaiyera aihalahalinikijita, aiyatelikijita xoaha natyo. Hiyaiya, tyotyia Enore kaxaikoneharenaeh hoka haihalahalinikijita.

## Paulo Waiye Onésimo Xomokaka Aoka

<sup>8</sup> Notyaonitere hihinaehare Cristo koamaniya hiyeta niraehihiye hoka naokitereharenaeh hisoma. <sup>9</sup> Jesus Cristo niraene kakoare natyo Paulo. Nóhiyehena, iniraene hiyeta kalini berexo notyaonita. Xakore hoka nawaiyetitere hiso hiyeta niraehihiye hoka naxita taita hiso, maisa nawakaita xini hiso, naokitere hisoma maheta.

<sup>10</sup> Naxa hiso hoka waiye hamoka maheta Onésimo. Cristo ityakekone hiyeta atyo nityani. Berexo ako notyaonita hoka Cristo koamaniya namokene hoka nityani akereta tyaona. <sup>11</sup> Toahiya ene atyo maisa xoare tyomare homana hoka kalikini atyo ehokore tyaona nomani, exahe homana tehitiya hoka.

<sup>12</sup> Naxikahetehenene homana hoka kalore ite notyaxe-

matene. <sup>13</sup> Kasani alita nohaliye tyaona hoka berexo ako notyaonitere nase Iraiti Waiyexe hiye kahinaetya natyo hiwenekoare naowita. <sup>14</sup> Xakore hoka maisaiya naiyateretyoita hiyahita hakahinaetya natyo maheta. Maika hahekotya, haokaiya atyo hoka ali kahinaetya natyo.

<sup>15</sup> Alitere atyo Onésimo waha terehokoane haware tyaona honita hoka hatyo najikinita kalikini atyo haikoahitita homana tyaona mene maheta hihaliya.

<sup>16</sup> Haikoahetehena homana xakore hoka maisa atyo wakahareheta xini. Hiyaiya, wakahare xahehare atyo, wihinaehare atyo Cristo koamaniya tyahenerene hiyeta. Noxiyakawali atyo. Exahe tehitiya hoka hixiyakawala. Maisa atyo halititere xini, wihinaehare kaiserehare atyo Xekohaseti hiyeta.

<sup>17</sup> Hihinaehare kaiserehare atyo haokita natyo hoka hamokitere natyo akereta hamoka Onésimo, kaoketehena homana hoka. <sup>18</sup> Exahe kakotaneta hiso hoka maika nokotani hamokene. <sup>19</sup> Kalikini nokahe kakoi-ta naxairatya exe: natyo, Paulo ite nabakatya hiso. Xakore hoka hiso tehitiya hikakotaneta natyo, iraiti waiyexe noxakai hihiye hoka waiyexe maniya hisahenerene hiyeta.

<sup>20</sup> Nohinaehare, haihalahalinikisa natyo Xekohaseti hiyeta, hoka maika naokitere akereta hisoma nomani Cristo hiyeta. <sup>21</sup> Naxairaita homana. Naokitereharite hisoma, xoana xamani ite hoka naowitere xahexe hisoma. Hatyohare waiyekehalakita nomani.

<sup>22</sup> Maika memere hatyako hamoka nahiti. Xoana xamani hoka xiraexala Enore ekoaxatya hoka halakisa natyo hoka haki notyooa nowaiyihitiya xiso nali.

## Miyanitiye Xakaisatinaeh

<sup>23</sup> Epafraes haxawalita tyaonitere nokakoi berexo ako Jesus Cristo hiyeta haxakaisakeheta aoka xihiyehiye. <sup>24</sup> Nohinaeharenaeh Marcos, Aristarco, Demas, Lucas harenaeh tehitiya haxakaisakehenahitaha aokaha xihiyehiye.

<sup>25</sup> Maika Xekohaseti Jesus Cristo waiye moka xiso. Eko xoaha.

# Hebreus

## Enore Ityani

<sup>1</sup> Toahiya xowaka Enore irae wahetakomaniyere-harenae hiye iraiti xakaisaseharenae kanasakota kahaliki, exahe kahare maniyata. <sup>2</sup> Kalikini wisaonitere miyanitiye xowakehena atyo hoka Enore irae wikakoa Haisani kanasakota. Ihiyeta atyo Enore tyotya xalini harenae tyoma. Enore xaokalita atyo tyotya xalini hare enomanere makere tyaona.

<sup>3</sup> Ityani Hanexe niyaterere kakoa kinatere aokanaita Hanexe akereta, exahe hoka waiye hakakoa Hanexe kakoa. Hairaene kinaterexe kakoa tyotya xalini hare aiyatelikijita. Hoka halitinae nómáne iniyalahare emaisahetehenere najikinita enokoa nali tyoka, Enore kinaterexe fihini maniya.

## Enore Ityani, Anjonae Xoaha

<sup>4</sup> Enore Ityani atyo anjonae xahehare tyaona. Hiyeta hoka Enore anjonae xahehare aokene.

<sup>5</sup> Hiyaiya, maisa atyo Enore hatyanae anjo hiye xoana xowaka nita:

Nityani atyo hiso, kalikini atyo Hexe notyaona.

Exahe maisa tehitiya atyo hatyanae anjo hiye nita: Hexe ite notyaona, hiso atyo ite Nityani.

<sup>6</sup> Nexa tehitiya irae axikahenere Haisani hetatiye halitinae koni xowaka:

Maika ite Enore wakanehare anjonae tyotya awaiyetya Nityani, haxahehare aokahene.

<sup>7</sup> Exakere Enore irae anjonae tahi:

Enore hoholati akereta moka anjonae, hawakaneharenae irikati biyaloitere akereta moka.

<sup>8</sup> Hoka exakere atyo Haisani tahi irae: Xekohaseti ite hisaota mene, Enore. Waiye taita ite hamoka hikaxaikone hotyali.

<sup>9</sup> Xalini hare waiyexe taita hawaiyetita hoka iniyalahare atyo maisa hawaiyetyare. Hiyeta hoka hEnorexa haomana aoka hiso hoka hikaxaihalahalinikisaka, hikaxaiminisaka xoaha hihinaeharenae xahe.

<sup>10</sup> Nexa tehitiya Haisani hiye:

Hetati xowakiya maisa xoare aka hoka hiso atyo hisoma waikohe, enokoa harenae, Xekohaseti, hoka hikahe kakoa hisoma.

<sup>11</sup> Maiyarehetaha ite, imiti exolohare akereta kiraharehetaha ite. Hoka Hiso atyo ite hisaoneta mene.

<sup>12</sup> Hityahahenahitene ite imiti kaxityahatyakihititere akere hoka ewenekoareha atyo ite waitare tyaohitiya. Hoka heko atyo ite hisaona, maisaiya atyo hohiyeta.

<sup>13</sup> Enore maisa xoana xowaka nexare hatyanae anjo hiye:

Hisokehena nofihini maniya hahalákoaharenae hikiji katyahe namohenere kijiya.

<sup>14</sup> Hoka xoare hare atyo anjonae? Isekohalitinae atyo, Enore ana hakahitaha. Enore atyo axikatyahene halitinae iniyalahare nonitata kaiyakehetehenerena kahi-naetya maheta.

## Waiyexe Maniya Nawenatyakeheta

<sup>2</sup> Hatyo hiyeta maika waiye wasemaxematya Iraiti Waiyexe wasemiterena, waiya aliya hoka ekakoi-ta wahalakisene. <sup>2</sup> Hiyaiya, anjonae Iraiti Waiyexe xakaitere nika aliterexe. Hoka matyakekohenerena maxaiminirehenerena iniyalahare kaxomokaka ematyakekoneha nahalako. <sup>3</sup> Nikareya maisa wityakekota waiyexe maniya halitinae xomomokakeheta tahi hoka aliyakereya iniyalahare wimaxomokakehena? Hetati Xekohaseti Jesus ta waiyexe maniya halitinae xomomokakeheta tahi xakai. Hatyo najikinita iniraene semaseharenae xakaihityene wihiye. <sup>4</sup> Hatyo xowakita tehitiya Enore kahinaetyahene hoka iyateliti hotikisa waiyexe. Maomakahare waiyexe hoka kahare tyoma iniraeneha katyakekotyaka maheta. Enore isa tehitiya enomanaha Isekohaliti Waiyexe niyaterere haxaokala ximita.

## Jesus Cristo, Isekohaliti Niyasehareheta

<sup>5</sup> Hiyaiya Enore ite tyomehitiya waikohe hoka maisaiya atyo anjonae xekohaseti tyaonita. Hatyo waikohe waitare kaomakehenere tahi akiti exe wiraeta.

<sup>6</sup> Hiyaiya, exakere Iraiti Waiyexe nanekoa hatya irae: Xoare atyo haliti, Enore, hoka hahekotita etahi? Xoanere hoka maisa xakore xoare waiyakahare xini hoka himawaiyehareta ekakoa?

<sup>7</sup> Anjonae kátyahakohareta hamokene xakore hoka maisa waha xini nikare tyaona maheta. Haeroretene xekohaseti tyaona, exahe hoka waiye kaxaiminisaka maheta.

<sup>8</sup> Haiyatelikisene hoka tyotya xalini hare kaxaiko maheta.

Nikare tyotya xalini hare ekatyahakohare Enore moka hoka haliti kinatere tyaona tyotya xalini hare xekohaseha maheta. Xakore hoka waiyekehalakita womana: kalikini atyo maisa tyotya xalini hare xekohasehare haliti tyaonare. <sup>9</sup> Hoka wiyaiya atyo Jesus, wase-ma atyo etahi. Halitinae koni tyaona Enore nawaiyexehare hiyeta waini tyotya halitinae ana maheta. Hatyo

xowaka anjonae katyahakohareta tyaona, xakore hoka maisa atyo waha xini nikare tyaonare. Waini, hatyaose-ta kaseheta hoka wiyaiyene, wasemene xoaha: Kax-aeroretyaka, waiye kaxaiminisaka wainihenerere hiyeta. <sup>10</sup> Enore hiyeta tyotya xolani hare kaotyaka, eno-manere tyaonaha maheta. Kasani tyotya ityani tyao-henerenae waiye tyaonaha maheta ehaliya. Hiyeta hoka Enore awaiyolinikisa Jesus, iniyalahare kax-omokakehenerere hiyeta. Hiyaiya, Jesus atyo waiye maniya axomokanikihenahitene.

<sup>11</sup> Jesus tiheheta halitinae iniyalahare enómaneha nonitata. Hoka Jesus, hatyo tihehetehenerenae xoaha atyo Enore ityaninae makere. Hatyo hiyeta Jesus ihalahare ekakoaha, maisa haiharexe haximarenenae aokahiterene hiyeta. <sup>12</sup> Hoka exakere nexa:

Enore, noxakai ite hitahi noximalininae hiye. Hikoamaniya tyaonitereharenae ite haxawalita tyaohehena hoka noxera xerati ehaotyahitaha nihalahalini hikakoa hiyeta.

<sup>13</sup> Nexa tehitiya:

Notyakekone ite.

Nehitiya:

Alihena natyo xoimanae Enore isehenerere nómaninae kakoa.

<sup>14</sup> Xoimanae aowitere atyo halitinae makere hoka hatyo hiyeta Jesus tehitiya haliti tyaona, halitinae ak-ereta. Nikare tyaona, waini hoka hakamane hiyeta halitinae fahare Tihanare mawenekoaretya maheta. <sup>15</sup> Exahe tehitiya hoka emaisatya maheta emairaneha halitinae nonitata. Hiyaiya, hakamane kakoa mairahitaha ferakiti nihatyaka.

<sup>16</sup> Maisa atyo anjonae kahinaetya maheta xini tyoa. Abraão jikolaharenae atyo kahinaetya maheta.

<sup>17</sup> Hiyeta hoka Jesus haximarenenae akereta terota tyoona hoka sacerdote kalorexex tyaona maheta. Exahe waiyexehare hoka Enore hatene waiyexe tyoma maheta. Nikare tyoma halitinae nómane iniyalahare kaxemaiyaretyakeheta maheta.

<sup>18</sup> Tyaonitere halitinae koni xowaka kahasakaharetyaka hoka howitihare wenati tyaona enomana. Hiyeta atyo kalikini kahasakaharetyakiterenae kinatere kahi-naetita.

### Jesus, Moisés Xoaha

**3** Nohinaehare, Jesus koamaniya tyaohehenerenae, Enore haomana aohenerenae: Maika Jesus tahi waiye xahekotya. Enore axikahetene kalorexex sacerdote tyaona maheta hoka wiso tyakekohenerenae kahinaetyase tyaona maheta. <sup>2</sup> Hiyaiya, Enore aokitereharenae taita tyoma, nikare ehatene aoka hoka, Moisés tyotya tyomehenerere Enore hanako akereta.

<sup>3</sup> Xala xamani atyo tyoma hati hoka háomane xahe-hare atyo kaxaiminisaka. Nikare tehitiya Jesus masakare waiye xaiminisaka Moisés xahe. <sup>4</sup> Tyotya hatinae atyo kaomasexe taita hoka Enore atyo tyotya xolani hare nomasehare. <sup>5</sup> Moisés tyotya Enore aokiterehare taita tyoma ehanako. Wakahare waiyexe hoka xolani hare irae Enore jikiniti irae aokowitere-

harenae tahi. <sup>6</sup> Hoka Cristo atyo Enore Ityani hoka waiye kaxaikota Hanexe hana. Wisaonaiya ekoamaniya, wityakekone, wikipatere harenaeya ekoamaniya wisaona hoka ehanaiya wisaona.

### Enore Kaxaikone Hotyali Kawinini

<sup>7</sup> Hiyeta hoka Isekohaliti Waiyexe exakere irae:

Kalikiniya xasema Enore niraene hoka

<sup>8</sup> awa atyo ximasemaxemalahare xisaona xahetakomaniyereharenae akereta. Ehareha ihiye hoka maharexakahare nali hasakaharehenerene xowaka akere.

<sup>9</sup> Hoka Enore nexa: "Xahetakomaniyereharenae hasakaharetya natyo. 40-terehokoane xolani hare no-tyomehenerere xakore tyotya waiyaha hoka.

<sup>10</sup> Hiyeta nehare ihiyeha hoka nomi: 'Exe halitinae atyo maisa waiyexe, maisa nawenanyaho kakoa waiy-oretaha'.

<sup>11</sup> Nehare hoka nomi: 'Maisaiya xoana xowaka ewaikoharaha naohenerere nali kaokahitaha hoka kawinahitaha nokakoi' ".

<sup>12</sup> Nohinaeharenae, xiriharira xawenane kakoa, waiya aliya hoka iniyalahare xahekotya hoka ximatyakekone hiyeta maisa Enore makamanehare koamaniya xisaohitita. <sup>13</sup> Maika xaihalahalinikisa kakoa, "kalikini" wisaonitatere xowaka, Iraitu Waiyexe nanekoa iratere akereta. Nikare xisaona hoka maisa xalahare xinekonitare kamaoseratyakita iniyalahare hiyeta, exahe hoka maisa ximasemaxemalahare xisaona. <sup>14</sup> Hiyaiya, hetati wityakekohenerere Cristo aosetaiya heko wikipatere wityakekone hoka imiyanaose kijiyaia xane hikoahena hoka ihinaehare kaiserehareya wisaona.

<sup>15</sup> Exakere atyo Iraitu Waiyexe nanekoa nexa:

Kalikiniya xasema Enore niraene hoka awa atyo ximasemaxemalahare xisaona xahetakomaniyereharenae, eharehenerere ihiye xowaka akere.

<sup>16</sup> Xala Enore niraene sema hoka ehare ihiye? Moisés tyotya nolohetehenerenae Egito nalita. <sup>17</sup> Xalanae hiye Enore ehare 40-terehokoane? Iniyalahare tyoma hoka wainihenerenae maharexakahare hiye.

<sup>18</sup> Xala tahi Enore exakere irae, hairaene akereta tyoma aokowihenerere xowaka: "Maisa ite xoana xowaka ewaikoharaha naohenerere nali kaokahitaha hoka kawinahitaha nokakoi". Masemaxemarehenerenae tahi exakere irateta.

<sup>19</sup> Waiyekahalaka atyo womana: Hamatyakekoneneha hiyetaiya maisa aliyakere Enore ewaikoharaha aohenerere nali kaokahitaha.

**4** Enore halakisa hairaene womana hoka wikaokaite enali hoka wikawinisa ekakoa maheta. Maika wirihare wisaona, waiya aliya hoka haiyaharenae xinekonitarenae maisa aliyakere aokitere akereta enali hikoita. <sup>2</sup> Hiyaiya, Iraitu Waiyexe semenehenerere akereta tehitiya Iraitu Waiyexe wasema. Semahene xakore hoka maisa tyakekoahitaha hoka maisa xoare tyomita enomanaha ematyakekoneneha hiyeta. <sup>3</sup> Wiso atyo wasemene hoka wityakekone hoka kalikini waiye

wimehexaikohare wisaonita aokitere akereta enali, irahenere akereta:

Nehare hoka nomi: "Maisa ite ewaikoheraha naohenerere nali kaokahitaha hoka kawinahitaha nokakoi".

Exakere irae, koxaka xakore toahiya waikohe tyomehenere xowakita hahatene tyoma miyatya hoka.

<sup>4</sup> Hiyaiya, exakere Iraitu Waiyexe nanekoa xairatyoare haiyakiti tyaonita e7-kini ferakene tahi:

6-ki ferakene Enore haka hoka waikohe, enokoa tyotyotyaxoalini hare tyoma mematy. Hatyaoseta e7-kini ferakene hiye kawini.

<sup>5</sup> Hatyo tahita kairaetyakehitiya:

Maisa ite ewaikoheraha naohenerere nali kaokahitaha hoka kawinahitaha nokakoi.

<sup>6</sup> Hatyo hetati semehenaherenae Waiyexe Iraitu maisa tyakekoahitaha hoka maisa kaokahitaha ewaikoheraha kaxaokakehenere nali hoka kawinahitaha ekakoa aokitere akereta. Xakore hoka haiyanae tyakekohenerenae atyo ite xane kaokaha Enore aohenerere nali kawinahitaha ekakoa.

<sup>7</sup> Hatyo hiyeta Enore aimenekohitiya haferakene niyahare. "Kalikini", nita. Hatyo harenae tahi irae waha terehokoane najikinita Davi kanasakota. Koxaka kairaetyaka Iraitu Waiyexe nanekoa:

Kalikiniya xasema Enore niraene hoka awa atyo ximasemaxemalahare xisaona.

<sup>8</sup> Ikiya Josué kolatyare hatyo halitinae waiyexe wenaakalati nali kawiniha maheta Enore aokitere akereta hoka maisaiya haferakene Enore aimenekohitita kawiniha maheta. <sup>9</sup> Nikare hekota Enore kaxaikoneharenae kawinini tyaona, e7-kini ferakene kawinihenere akereta.

<sup>10</sup> Xala xamani ite xane hikoa kawini maheta hoka tyotyotyahahatene nonitata kawini, Enore kawinihenere hahatene nonitata akere. <sup>11</sup> Hatyo hiyeta maika waiyateretyoa hoka wiyane wahikoa hoka wikawini maheta Enore nali, waiya aliya hoka hatya matyakekoneta hoka hatyo hiyeta maisa xaneta enali.

<sup>12</sup> Hiyaiya, Enore niraene atyo masakare kinatere, hatyaterere kesekase hinama maniya tihore waiye kawetyakere xahehare. Ajikoa, xane hikoita iyawahaliti, isekohaliti xoaha tyaonitere nali. Exahe hihiraoseti, ahiti kaokakakoane xoaha hiye hoka xane hikoita. Xoare xamani kaxahekotyakita hoka hatyoharenae waiyekehalakita enomana. <sup>13</sup> Maisa xoare hare meta-harexe Enore ana, tyotyotyaxoalini hare waiyekehalakita enomana. Hatyo hiyeta ite maisa xoare hare wimaxakainita ihiye.

### Jesus Atyo Kalorexe Sacerdote

<sup>14</sup> Hiyeta hoka nika hoka waiyateretyoa wityakekone, wawenane ekoamaniya kakoa. Hiyaiya, kalorexe sacerdotekoare atyo wiso. Enore Ityani Jesus atyo koxaka xane enokoa hikoa Enore nali kahinaetya wiso maheta. <sup>15</sup> Maisa xakore atyo wikinaterexe hoka hatyo kalorexe sacerdotekoare atyo kahinaetita wiso haxairakoanaharera wiso hiyeta. Hiyaiya, hatyo tehitiya kahahasakaharetyaka wikahasakaharetyakitere akereta,

xakore hoka maisa atyo iniyalahare tyomita. <sup>16</sup> Hiyeta hoka maika wimamairanehare wisaona hoka wiraexala hiyeta Enore nokahakala haliya wikaoka. Hatyo nali ite xairakoanaharetyati ana wahikoa, exahe wikahinaetyaka waokitere ana hoka wahikoa hoka wikakahinaetyaka.

<sup>5</sup> Exakere sacerdotekoare kalorexe: Hatya haliti kaxomoka halitinae konita sacerdotekoare kalorexe tyaona maheta, hoka haka Enore ana hoka halitinae kahinaetya maheta. Halitinae aisehena bowi, kalanero harenae hoka fetatita iniyalahare nomaka hiyeta. <sup>2</sup> Hatyo tehitiya maisa kinaterexe. Hiyeta hoka maisaiya ehareta mawaiyoreharenae, iniyalahare tyomiterenae hiye. <sup>3</sup> Hamaiyaterene hiyeta fetatita bowi, kalanero harenae. Halitinae nomane iniyalahare hiyeta, exahe iniyalahare hoomane hiyeta hoka.

<sup>4</sup> Maisa xala hare haxaokala ximita kalorexe sacerdotekoare tyaonare. Enore xaokala xema taita atyo hatya haliti sacerdotekoare kaxomokakita, Arão kaxomokakehenere akereta. <sup>5</sup> Nikare tehitiya Cristo sacerdotekoare kalorexe tyaona Enore xaokalita, maisa haxaokala xini. Hiyaiya, Enore exakere irae:

"Hiso atyo Nityani, kalikini Hexe notyaona".

<sup>6</sup> Nexa tehitiya Enore haiyakiti Iraitu Waiyexe nanekoa:

Hiso atyo ite sacerdotekoare kalorexe hisaota mene matyotenehare, Melquisedeque tyaonitere akere ite hisaona.

<sup>7</sup> Jesus waikohekoa tyaonitaterere xowaka iraexatya Enore hiye kinatyaxa, haosexa kakoa. Enore kinatere hoka kasani Enore emaisatya ekamane aokita hoka. Waiyexehare, hoka hatyo hiyeta Enore sema iniraexala. <sup>8</sup> Enore Ityani xakore hoka hamakawatiharene hiyeta waiyore tyakekohati maheta. <sup>9</sup> Hatyaoseta tyotyotyaxoalini hare tyoma hoka hatyo najikinita tyakekohenerenenaenae niyasehareheta tyaona, matyotenehare enawenaneha tyaona maheta. <sup>10</sup> Hatyo hiyeta Enore sacerdotekoare kalorexe mokene, Melquisedeque tyaonitere akere.

### Tyakekoti Halakisaka Henehare

<sup>11</sup> Kasani wirae waokowita exe tahi akiti harenae xakore hoka howitihare xawaiyekehalakatyaka, exahe hoka howitihare waiyekehalakita xomana. <sup>12</sup> Wahehena Xekohaseti koamaniya xisaonita hoka kalikini ene xaotyakisatiyehena xisaonita. Xakore hoka hatya xaotyakisatiye xaokitata, aotyakisa maheta xiso, hetatiye Enore tahi akiti kakoa. Nakairati kinaterexe xinakaira mahetare ene hoka totonexati xaokitata xomana. (Enawenaneha xaokaka nikare iraeta).

<sup>13</sup> Hiyaiya, xala xamani atyo totonexati taita aokokita hoka hatyo atyo xoimitata. Maisa xoare waiyekehalakere enomana, xoare xamani waiyexe, xoare xamani maisa waiyexe hoka. <sup>14</sup> Hoka inityohalitinae atyo kanakairita tyotyotyaxoalini hare. Exahe hoka waiyekehalakita enomanaha xoare xamani waiyexe, xoare xamani maiha waiyexe hoka. Hatyo hare akiti atyo tyotyotyaxoalini hare.



waiyekehalakita enomanaha kaxaotyahalikisakehenahere hiyeta.

**6** Hatyo hiyeta naotyakihitiya xiso haiya akiti ximasehahere kakoa hoka xahikoa inityohalitinahere xaothyakisaka ana. Maisaiya hetati xasemehenere kakoa naotyakihitiya xiso. Koxaka xikaxaotyakisaka: Iniyalahare halakisaka hoka Enore tyakekotyaka tahi, <sup>2</sup> batixatyati, kahiti xomokaka seriti heno, kamatinahere kaseneheta, matyakekoneharenahere iniyalahare maniyaxomokaka matyotenehahere, Enore haomanerenehahere waiyexehere maniyaxomoteneharenahere tahi. Hiyaiya, hatyohare kakoa koxaka xikaxaotyakisaka. <sup>3</sup> Wiya waheta maniyaxomokaka. Enore xaokalitaiya hoka nikare ite wisoma.

<sup>4</sup> Aliyakereya haiyaharenahere matyakekoneheta Enore hoka hatyo najikinita tyakekohitiya? Koxaka ene waiyehere koamaniyaxomokaka, koxaka ene Enore niyaterenehahere waiyekehalakita enomanaha, exahere hoka Isekoaliti Waiyexehere ene tyanonita ekakoaha. <sup>5</sup> Koxaka ene Enore niraene semaha hoka waiyehere enomanaha, exahere hoka Enore niyaterenehahere kehexaha. <sup>6</sup> Xakore hoka hatyakekonehahere halakisahahere hoka maisaiya aliyakere kaxatyakekonekisakehenaheritahahere. Nikare tyanonahitahahere hoka koexahaxatyahitahahere Enore Ityani kakoa halitinahere haotita, wainihenerenehahere atyalihohere xaimaholatyaka hiyehere xowaka akereta mokahitene haki.

<sup>7</sup> Waikohekoahere waiyexehere nali oneta menitere akiti atyohanakati waiyehere kinaterenehahere tyanonita, kalitahere harenahere haxekohase ana. Enore ana waiyehere hatyo waikohe. <sup>8</sup> Hoka waikohekoahere katoherenehahere, exahere hananehalitihere iniyalahare hikoiterehahere atyohere maisahere waiyexehere hoka Enore maisahere awaiyetitenehahere hoka kakeratyaka ite.

<sup>9</sup> Exeharenahere xakore wiraeta hoka maisahere atyohere waikohe ewaxirahere akereta xini xiso, nohinaehere, noxiyakawalinaehere. Enore atyohere iyeheta xiso iniyalahare nonitata hoka hatyo hiyehere waiyehere xisaonita. <sup>10</sup> Enore atyohere waiyexehere. Maisahere maotyanehahere hatenitihere xisomehenerenehahere, exahere xawaiyexehere hiyehere xakahinaehenerenehahere xihinaehere tyakekohatiyehere. Exahere kalikini hoka hekota xakahinaehere tyahiterenehahere. <sup>11</sup> Kasani hekoxaiyateretyohere xihalaharene kakoa imiyanaohere kijiya xahikoa hoka xolihere hahere waiyexehere xatyahiterenehahere kaxekakaxomana waokita. <sup>12</sup> Kasani maisahere ximaxaharehahere xisaonahere waokare. Xakore hoka maikahere tyakekohatiyehere hamamaxaharenehahere tyanoniterehahere akereta xisaonahere hoka Enore isahere aokowiterehahere kaxekakaxomana.

### Enore Hairaene Akereta Tyomita

<sup>13</sup> Enore irahenerenehahere Abraão kakoa xowaka, irahenerenehahere akereta tyomahere enomana aokowi. Maisahere xalahere hahere exaherehahere aka hoka Enore haexarehahere kaixaretyahere hatyoharenahere tyomahere maheta. <sup>14</sup> Exakere nexahere Abraão hiyehere: “Naokiterehahere akereta ite waiyehere namokahere hisohere. Hijikolaharenahere ite hisoakahere tyanonita”.

<sup>15</sup> Hatyaohere Abraão atyaha wahahere, maisahere maxaharehahere haxatyahane kakoa hoka Enore aohenerenehahere isahere enomana.

<sup>16</sup> Hatya atyohere irahenehahere hoka haxaherehahere nexarehahere atyohere kaexaretitahere hoka hatyohere iniraenehahere atyohere irahere aokowiterehahere kakoa kamiyaneta. <sup>17</sup> Enore kasani isahere aokowiterehahere waiyekehalakahere halitinahere ana aokitahere hoka maisahere hahere haxaherehahere moheta aokowihititahere. Hatyo hiyehere isahere aokowihenerenehahere xowakitahere aliterexehere irahere, exahere hahere haxaherehahere hoka kaexaretyahere katyakekotyakahere maheta.

<sup>18</sup> Hinamahere akitiyahere maisahere aliyakerehahere hahere haxomokakitahere. Hatyoharenahere tahiya maisahere Enore maoseraitahere. Hatyo hiyehere wimamairanehahere wisaonitahere hoka wikipaterenehahere watyahitahere wenatihere waiyexehere isahere aokowihenerenehahere xahitahere. <sup>19</sup> Hatyohere iraitihere xemahere wisaonitahere hoka waiyehere wimehexaikoherehahere wisaonitahere. Kanowahere olatyohere haxemamakisalahere hiyehere waiyehere mehhexaikoherehahere tyanoniterehahere akeretahere wisaonitahere. Hiyaiyahere, hatyohere watyahiterenehahere atyohere waiyehere kinaterenehahere, exahere isohere Enore hanakohere enokohere nalihere hoka imitihere taohere sololohere xaihahere kijiya hoka xaneta Waiyexehere aohere nali. <sup>20</sup> Hiyaiyahere, hatyohere nalihere atyohere Jesus xane isohere, wahititahere, waiyehere wisaonahere maheta. Hoka kalorexehere Sacerdote tyahere mene maheta Melquisedequehahere akeretahere.

### Melquisedeque Atyohere Sacerdote Exahere Xekohaseti

**7** Melquisedequehahere xekohasetihere ene tyanonitahere wenakalatihere Salém nali. Enore ana hakitahere, sacerdotehere tyanonitahere hoka. Hatyohere xowakahere Abraão xekohasetinahere kakoa haxaisakakoanehekotahere haikoahititahere hoka Melquisedequehahere ahalakoatenehahere hoka waiyexehere wenatihere aokohere enomana. <sup>2</sup> Hatyaohere Abraão isahere enomana hahalakoaharenahere xiyeherehahere hakolalahere hiyehere holini, dízimohere aokahiterenehahere. Melquisedequehahere nexarehahere atyohere “Xekohasetihere waiyexehere”, Salém nalihere xekohasetihere tyanonitahere hoka hatyohere hiyehere nikarehahere nexarehahere. Enexarehahere tehitiyahere, “Mehhexaikohaliti xekohasehahere”, nitalihere tehitiyahere. <sup>3</sup> Maisahere xohere kasehahere makitahere enexehere, inityohere, enahetahere komaniyehereharenahere tahi. Maisahere enawenanehahere, ekamanehahere tahi hekotihere kasemakitahere. Melquisedequehahere atyohere Enore Ityani akeretahere sacerdotehere tyanonitahere mene matyotenehahere.

<sup>4</sup> Waiyehere xasemahere: Melquisedequehahere atyohere kalorexehere kaiserehahere. Wikinoherehahere Abraão xaherehahere atyohere hoka Abraão isahere enomana holini, dízimohere aokahiterenehahere, hahalakoaharenahere xiyeherehahere kolahenerenehahere hiyehere.

<sup>5</sup> Moisés xaothyakirahere xemahere Levi hotyaliharenahere sacerdotenahere tyanonitahere hoka ihinaeharenahere isahere holini dízimohere aokahiterenehahere haxiyeherehahere hiyehere enomanahere aokahitahere. Ihinaeharenahere kaiserehahere xakorehahere hoka isahere aokahitahere, Abraão jikolaherehahere makerehahere xakorehahere hoka.

<sup>6</sup> Hoka Melquisedequehahere atyohere maisahere Levi hotyaliherehahere xini. Xakorehahere hoka Abraão isahere enomana holini xiyehaliti hahalakoaharenahere xiyeherehahere kolahenerenehahere hiyehere hoka Abraão ana wenatihere waiyexehere aokohere. Há, waiyexehere wenatihere aokohere enomana. Hatyohere nahititahere Abraão koxakahere Enore isahere enomana aokowihenerenehahere tahi semahere.

<sup>7</sup> Hiyaiyahere, hatyahere halitihere wenatihere waiyexehere aowitahere hatyahere ana hoka hatyohere atyohere exaherehahere. <sup>8</sup> Hoka kalikini dízimohere resebetiterenehahere atyohere ite wainihere tyotyahere. Hoka Abraão tyanoniterehahere xowakahere dízimohere resebetiterenehahere atyohere hekotahere kaseta.

<sup>9</sup> Exakereyala niraе hoka ehеkore: Abraão, Melquisedeque ana holini dízimo aokakahitere ise-henere xowaka Levi tehitiya isa Melquisedeque ana, Abraão jikolahare tyare atyo hoka. Hoka kalikini Levi jikolaharenae ana atyo dízimo aokahitere kaxekakita.

<sup>10</sup> Hatyo xowaka Levi maisa tyaohenere, hahetako-maniyere Abraão háre hiyetata, Melquisedeque ahalakoahenere xowaka.

<sup>11</sup> Xaotyakisatyaho kaotyakehenere Israel yerenaе ana xowaka Levi jikolaharenae sacerdote tyaonita, Arão jikolaharenaetare. Xakore hoka ehateneha maisa ehеkoreta kaisere. Ehatenehaiya waiye tyaonare hoka maisaiya xoare maheta hatya Melquisedeque akerehare sacerdote kaxomokakita. Maisa Levi jiyete Arão akerehare xini. <sup>12</sup> Hoka hahekorexe atyo sacerdote tyaohena hoka xaotyakiyaho tehitiya atyo hahekorexe tyaonita.

<sup>13</sup> Wiyekohase Jesus xaokaka nikare kairaetyakita, Judá hotyalihare atyo. Hoka maisa atyo xoana xowaka Judá hotyalihare hatya hekoti kirakahare keratyakaose nali hakita. <sup>14</sup> Aliterexe atyo Jesus Judá hotyalihare. Hoka Moisés aotyakijitere xowaka maisa Judá hotyalihare nawenane sacerdote tahi iraeta hekoti.

#### Hatya Sacerdote Melquisedeque Akerehare

<sup>15</sup> Tyotya hatyoharenae waiyekehalaka tyaona. Hatya sacerdote hawareharexe kaotyaka Melquisedeque akerehare. <sup>16</sup> Maisa atyo halitinae xahekola xema xini sacerdote tyaona. Tyaona wenati matyotenehare niy-aterе hiyeta atyo sacerdote tyaona.

<sup>17</sup> Hiyaiya, exakere Iraiti Waiyexe nanekoa nexa: Sacerdote ite hisaota mene matyotenehare Melquisedeque tyaonitere akereta.

<sup>18</sup> Hiyeta hoka toahiyere wenatyaho kahalakisaka. Maisa kinaterexe, komita maisa xoare tyomare hoka.

<sup>19</sup> Moisés xaotyakiraho atyo maisa xoare waiyexe maniya mokita. Hoka kalikini atyo Jesus kaotyaka hoka exema wisaona hoka wiyane wikaoka Enore nali.

<sup>20</sup> Exe tehitiya: Enore haexare kaexarehenere tahi. Haiyaharenae atyo sacerdote tyaotaha, maisa xakore atyo Enore nikare iraexe hoka.

<sup>21</sup> Hoka Jesus atyo sacerdote tyaona Enore exakere iraehenere xowaka:

Natyо atyo Enore niraeta, maisaiya nemaisaita niraini. Sacerdote ite hisaota mene matyotenehare.

<sup>22</sup> Hiyeta atyo hoka Jesus masakare waiye. Hatyo hiyeta atyo waitare wenatyaho waiye toahiyere nonitata.

<sup>23</sup> Exe tehitiya: toahiyere harenae atyo kahare sacerdote tyaonahitaha wainahitere hiyeta. <sup>24</sup> Hoka Jesus atyo menanehaliti hoka hatyo hiyeta sacerdote tyaoneta menite hoka maisaiya xalahare ewenekoare sacerdote tyaonita. <sup>25</sup> Hiyeta hoka hatyoiya atyo, exahe haxowaka hoka waiye maniya moheta Enore nali xaneterenaе ihiyeta. Hiyaiya, Jesus tyaota minita, irae maheta etahiha Enore hiye.

<sup>26</sup> Jesus atyo kalorexe sacerdote hoka hatyo hiyeta waokitene womana. Jesus atyo waiye, maisa xoare

hare iniyalahare tyomare, iniyalahare nomaseharenae nonitata haware kaxomokaka. Hatyaoseta kakolatyaka enokoa xaihako hoka kalorexe tyaona maheta.

<sup>27</sup> Maisa hatyo haiyarenae kalorexe sacerdotenaе akerehta xini, maisa atyo fetatyare kirakahare tyotyaki ferakene, hetati háomane iniyalahare hiyeta, jikiniti hoka haiyanae nómane iniyalahare hiyeta akereta xini. Hakirore atyo fetatya, tyotyа xoalini harenae hiyeta, fe-tyoawihenere xowaka. <sup>28</sup> Moisés xaotyakiraho xema atyo iniyalahare nomaseharenae Sacerdote kalorexe tyaona. Hoka Enore iraehenere, haexare kaexarehenere hare, Moisés xaotyakira kasemakehenere najikinita hiyeta atyo Ityani sacerdote kalorexe tyaona. Waiye matyotenehare tyaonita.

#### Jesus Atyo Kalorexe Sacerdote Tyaonita Womana

**8** Waiyexe tahi wiraetere atyo Wiyekohase sacerdote tyaonitere akiti. Kalorexe Sacerdote enokoa tyaonita, tyokita Enore kinaterexe nokahakala fihini maniya. <sup>2</sup> Hakita Enore hanako, imiti taose sololotere xaihako maniya. Enore nómane taita atyo hatyo hati, maisa atyo halitinae nómane xini.

<sup>3</sup> Kalorexe Sacerdotenaе hatene atyo exakere: kalanero harenae fetatita Enore ana. Hiyeta hoka Wiyekohase tehitiyaiya maisa xoalini hare mafetalita Enore ana. <sup>4</sup> Ali waikohekoaiya tyaonita hoka maisaiya sacerdote tyaonita. Hiyaiya, Levi hotyali atyo ali waikohekoa sacerdotenaе tyaonita hoka fetatita Enore ana. Judeunaе xaotyakiraho xema atyo tyaonahitaha hoka nikare tyaonahitaha. <sup>5</sup> Exe sacerdotenaе tyaonitere ali waikohekoa atyo enokoare hateniti aimenekoita taita. Hatyo tahi Enore irae Moisés hiye hatirise tyoma aokowihenere xowaka:

Maika hirihare nahotikihenere homana tyairiheno akerehta hisoma hatirise, nexa Enore Moisés hiye.

<sup>6</sup> Aliterexe atyo Jesus hatene masakare waiye kaiserehare haiyanae sacerdotenaе hatene nonitata. Masakare tehitiya atyo waiye wenati waitare halakihenere hakaxaikone hotyali ana. Hiyaiya, waitare iraiti atyo masakare waiye toahiyere nonitata. <sup>7</sup> Hetatiye wenatyahoiya waiyexe kaiserehare hoka maisaiya xoare maheta iraiti waitare kaotyakita. <sup>8</sup> Waiya xakore Enore hakaxaikone hotyali hoka iniyalahare tyomahita hoka hatyaoseta nexa:

“Enaose ferakenehena ite hoka niraihitiya waitare wenatyaho tahi Israel jikolaharenae hiye, Judá jikolaharenae hiye hoka”, nexa Xekohaseti.

<sup>9</sup> “Maisaiya atyo enahetakomaniyerenaha kakoa wenati tahi niraetere akerehitita. Exowaka ekaheha hiye notokahene hoka Egito nalita niyehetehenahene. Hatyo xowaka maisa niraini xema tyaonahitaha hoka maisa waiyetaha nomani”, nexa Xekohaseti.

<sup>10</sup> “Niraehitiyere waitare wenati tahi Israel hotyali anere ite exakerexe: Noxaotyakiri ite ekaiyehaha ako namoka. Exairatyakahare akere ite emahiyaseha hiye namokene hoka enEnorexaha ite notyaona. Hatyoha ite hoka nokaxaikoni hotyali tyaona”, nexa Xekohaseti.

<sup>11</sup> “Hatyo xowaka ite maisa xoare maheta hahinaehare aotyakihitita. Maisaiya, ‘Xekohaseti koamaniya hisaohena’, nita hekoti hahinaehare hiye. Hatyo xowaka atyo ite tyotyaha tyaohenaha nokoamaniye, wakahare, xekohasetinae xoaha.

<sup>12</sup> Iniyalahare enómaneha ite nomaotyaniheta, maisaiya notehitita iniyalahare enómaneha”.

<sup>13</sup> Waitare wenati tahi Enore irahena hoka toahiyere wenatyaho atyo kirahareheta. Kahalakisaka hoka tyotyaha. Kirahare, maisa atyo xoare niyahareheta hoka kahalakisaka hoka haxeroreta ite mawenekoare.

### Enore Xawaiyetyaka Aliterexe

**9** Hetatiye iraiti atyo awaiyekehalakatya Enore koamaniya nawenatyaka, exahe Iraexatyakalati Hana halitinae nómane harenae tahi. <sup>2</sup> Hatyo hati hinama talalyako. Hatikanase kakoare ako xaokanatyakalati kase tyaonita. Nali nakairati Enore anere tyaonita mexakoa. Hatyolyako atyo “waiyexe aose” aokahitere.

<sup>3</sup> Hoka imiti taose kakoa talatyakere maniyako atyo Enore anere kaiserehare. <sup>4</sup> Hatyo hamaniyako atyo incenso keratyakaose. Nali tehitiya kajali ouro kakoa komatyakere tyaonita. Hatyo kajalyako tehitiya tinihaliti nakairati maná kakoare tyaonita. Arão natyakasera tehitiya tyaonita enako, kahanahihetehenere. Hatyo kajalyako tehitiya hinama sehali taose iraiti exairatyakahare kakoare tyaonita. <sup>5</sup> Hatyo kajali heno hinama anjonae xaimenekotyaka tyaonita. Enokoare waiyexe aimenekotyahitaha. Ekanoha omerekoare tyaonita iniyalahare kaxemaisatyakehitere nali. Xakore hoka maisaiya kalikini hatyohare tahi tyotyaha niraehitita.

<sup>6</sup> Nikare tyomaha hoka hatyaoseta xoalini hare Enore ana sacerdotenae tyoma aokowihenaha hoka isoahitaha tyotyaki ferakene hatyo hatyako mokaha nakairati mexakoa maheta, kaxaikoha xaokanatyakalati harenae maheta. Hatikanase maniya tyaonitere ako taita atyo isoahitaha. <sup>7</sup> Kalorexe Sacerdote taita atyo ijoita hatyo exaihako maniyere imititaose talarere ako. Terehokoakiti nihatyaka taita ijoita, hakirore, hawawa. Kolatya kirakahare timalaxa hoka fetatita Enore ana, iniyalahare háomane hiyeta, exahe haiyanae iniyalahare tyomitere hiyeta hoka fetatita kirakahare timalaxa Enore ana. <sup>8</sup> Hatyoharenae hiyeta Isekohaliti Waiyexe waiyekehalaka aotyakijita. Hekotata imiti taose sololoita hoka hinamalyako hati tyaonita hoka halitinaia maisa aliyakere ijoita, maisaiya isoahita Enore anere kaiserehare ako. <sup>9</sup> Nikare tyomaha hoka aimenekoitaha kalikiniye wenati. Hatyo xowaka erati, nakairati, kirakahare harenae fetatyahitaha Enore ana. Xakore hoka maisa atyo hatyohare waiye maniya kaiserehare mohetere halitinae xahekola. <sup>10</sup> Nakairati, erati, xoalini hare fetatyahitaha. Xakore hoka maisa xoare tyomare. Henekoa maniya taita tihehenahititaha halitinae waitare wenati kaotyakene kijija.

<sup>11</sup> Hatyaoseta Cristo tyoa tyotyaha xoalini hare waiyexe koxaka ali tyaonitere kaxaiko maheta hoka isoahita Enore hanako kaiserehare enokoa nali. Maisa atyo halitinae

nómane xini, maisa atyo ali waikohekoare xini.

<sup>12</sup> Hakirore atyo Enore anere kaiserehare ako isoahita. Xakore hoka maisa atyo kolaita kirakahare timalaxa. Hatimalaxa atyo kolatya hoka fetatya Enore ana. Hatyo hiyeta wenati waiyexe matyotenehare maniya moheta wiso.

<sup>13</sup> Kabala, bowi harenae timalaxa fetatyahitaha Enore ana, exahe ohiroli bowi aisaha hoka kerahaotyahene hoka enete keratyaka mehene kakoa herahera konisahita halitinae hoka henekoa maniya aiyomahitita. Nikare tyomahitaha hoka iniyalahare nomaseharenae henekoa maniya aiyomahenahitayaha. <sup>14</sup> Hoka Cristo timalaxa atyo iyateliti kakoare hoka exahehare tihihitita halitinae xahekola harenae. Isekohaliti makamanehare hiyeta fetatyaoawi Enore ana hoka fetatyahitere xahe nawaiye atyo. Itimalaxa waiyexe maniya wityakoiyahare moheta. Hatirise hakitere ako atyo masakare waiye. Wománe iniyalahare wahalakisa hoka Enore makamanehare koamaniya wisaona maheta. <sup>15</sup> Hiyeta hoka Cristo atyo wenati waitare kaxaikotyasehare tyaona. Hoka Enore haomana aohenerenae ana wenati waiyexe matyotenehare isa aokowitere isa maheta. Nikare atyoite kaomaka. Hiyaiya, wainihenere hiyeta atyo waiye maniya moheta halitinae, wenati hetatiye xema tyaonahitere xowaka iniyalahare tyomahitere nonitata.

<sup>16</sup> Alyako xamani atyo haliti hatya hairaene halakiyatyaha hakamane nahitita, haxiyehare harenae tahi hoka, ekamane najikinita aokitere akereta ixiyehare kaxomokakita. <sup>17</sup> Kasetatere xowakaiya atyo maisa kaxirakakita hatya haliti xiyehare. Waini hotohareya atyo hoka aokitere akereta kaxomokaka ixiyeharenae.

<sup>18</sup> Hiyeta atyo hoka hetatiye wenatyaho kirakahare timalaxa kakoa hotohare halitinae kaherakerakonisakita hoka kinatere wenati tyaonita. <sup>19</sup> Moisés hotohare aotyakisa halitinae iraiti kaxairatyakehenere akere. Hatyaoseta iya bowi, kabala mokosenae timalaxa harenae hoka kaketaxatene one kakoa hoka kalanero niyali xaxotyatyaka, exahe híssopo kano kakoa hoka heraherananetya babera iraiti kakoare, exahe halitinae hoka heraherakonisa. <sup>20</sup> Hoka nexa: “Exe timalati atyo aiyatelikijita wenati aho xityakeko aohenerere Enore”. <sup>21</sup> Nikare tehitiya heraheratyaha hatirise hiye, exahe xiyehaliti Enore anerenae hoka heraherakonisa. <sup>22</sup> Aliterexe atyo xaotyakiyaho xema tyaonahitaha hoka timalati kakoa taita kaxaiyomatyakihititaha xoalini hare. Awaiya timalati hoka maisaiya iniyalahare kaxemaisatyakehetere.

### Jesus Fetala Iniyalahare Emisaheta

<sup>23</sup> Exehare ali waikoa tyaonitereharenae atyo enokoa tyaonitereharenae aimenekoita taita, hoka kirakahare timalaxa kakoa waiyexe maniya kaxomokakihitita. Hoka enokoa tyaonitere harenae atyo masakare waiyexe aokita haomana, waiye maniya kaxomokakeheta maheta. <sup>24</sup> Hiyaiya, Cristo atyo maisa ijoita Enore hana, halitinae nómane ako. Hatyo atyo aemenekoita taita

ehana kaiserehare enokoare. Enokoa atyo xane isoa Enore ana hoka kalikini kahinaetita wiso.

<sup>25</sup> Ali waikohekoa atyo kalorexe sacerdotenae judeu terehokoakiti nihatyaka ijoita Enore hanako kirakahare timalaxa kakoa imiti taose talarere ako. Hoka Cristo atyo hakirore isoa hoka fetatyaoawi, maisa kahaliki xini.

<sup>26</sup> Nikarexeya hoka kahalikiya waini waikohe kaomakehenere xowakatita. Hoka kalikini atyo kaotyaka hakirore, imiyanaose ferakene hikoahena hoka waini. Fetatyaoawi iniyalahare emaisaheta maheta. <sup>27</sup> Hiyaiya, hakirore atyo haliti wainitaha. Hatyo najikinita atyo Enore axalijita haliti. <sup>28</sup> Nikare Cristo hakirore fetatyaoawi emaisatya tyotyta halitinae nómane iniyalahare maheta. Hatyo najikinita ite ehinamakini hiye tyohetehitiya hoka maisa atyo iniyalahare emaisaheta maheta xini. Atyahiterenenae atyo waiyexe maniya moheta maheta.

**10** Judeunae Xaotyakiraho atyo maisa enokoa xoalini hare waiyexe tyaonitere akereta kaisere xini. Hatyoharenae atyo waiyexe kaotyakene taita aimenekoita. Hiyaiya, terehokoakiti nihatyaka fetatyahiterehareta fetatyahita. Hoka aliyakereya xaotyakiyaho hatyohare fetatyahitere hiyeta Enore nali xane aokowiterenae waiye maniya mohetehena?

<sup>2</sup> Enore koamaniya tyaoniterenae nómane iniyalahareya hatyoharenae emaisahitita hoka maisaiya otyare háomaneha iniyalahare. Hatyo najikinita maisaiya xoare maheta aisaha kirakahare hoka fetahenahitaha. <sup>3</sup> Maisa iniyalahare enómaneha emaisahetere, exahe hoka heko otyahitaha iniyalahare háomaneha hoka hatyo hiyeta aisaha kirakahare hoka fetatyahitaha terehokoakiti nihatyaka. <sup>4</sup> Hiyaiya, bowi, kabala harenae timalaxaiya maisa xoana hekota xala hare nómane iniyalahare emaisahitita.

<sup>5</sup> Hiyeta hoka Cristo kaotyakehenere halitinae koni xowaka nexa Enore hiye:

Maisa atyo kirakahare timalaxa fetatyaka haokare hoka hisoma noháre nomani.

<sup>6</sup> Kirakahare xaisaka, fetatyaka, ekeratyakahare harenae hoka maisa hawayetyare iniyalahare kaxemaisatyakeheta maheta.

<sup>7</sup> Hiyeta hoka nomi: “Ali natyo, Xekohaseti. Notyoma notyoma haokitere akere maheta, notahi kaxairatyakehenere xaotyakisatyati nanekoa akereta maheta”.

<sup>8</sup> Hetati nexa: “Kirakahare xaisaka fetatyaka, keratyaka harenae maisa haokare iniyalahare kaxemaisatyakeheta maheta”. Nikare irae xaotyakisatyaho aokitere akereta xakore kafetatyakita xoalini hare hoka.

<sup>9</sup> Hatyaoseta nehitiya: “Ali natyo, Enore, notyoma notyoma haokitere akereta maheta”.

Nikare Enore miyatya toahiyere kirakaharenae fetatyaka hoka Cristo ewenekoareha moka kafetatyaka maheta. <sup>10</sup> Enore aokitere akereta Jesus Cristo tyoma hoka hatyo hiyeta waiyexe maniya wikaxomokakita iniyalahare nonitata. Hakirore wainihenere kafetyakehenere tyotyta halitinae ana hiyeta.

### Waiyexe Maniya Nawenatyakeheta

(Hebreus 7.25-27; 1 Pedro 1.18-21; 1 João 1.8-9; 2.1-2; 5.12)

<sup>11</sup> Tyotyta sacerdoti judeu hahatene tyomita Enore ana, fetaita kirakahare xaisaka ferakiti nihatyaka. Hatyohareta fetaita tyotyaki ferakene, xakore hoka maisa xala hare nómane iniyalahare emaisahetere. <sup>12</sup> Hoka Jesus Cristo atyo hakirore fetatyaoawi. Hatyo matyotenehare niyahare. Hoka hatyo najikinita xane tyoka Enore fihini maniya. <sup>13</sup> Nali atyahita hahalakoaharenae xomokaka hakiji katyahe. <sup>14</sup> Nikare hakirore fetatyaoawi hoka ekoamaniya tyaoniterenae waiye maniya taita tyaona maheta matyotenehare.

<sup>15</sup> Isekohaliti Waiyexe tehitiya hatyo hare tahi aotyakijita wiso. Exakere hotohare nexa:

<sup>16</sup> “Haxowaka ite niraihitiya ekakoaha tyaonaha maheta hatyo xema”, nexa Xekohaseti. “Noxaotyakiri ite namoka emahiyaseha hiye, exahe ekaiyehaha ako hoka exairatyakahare akereta namoka”, nexa.

<sup>17</sup> Hatyaoseta nehitiya:

“Hatyohekota ite maisa notehitita iniyalahare enómaneha, exahekolaha harenae”.

<sup>18</sup> Nikare atyo ite iniyalahare kaxemaisatyakehete-hena hoka maisaiya xoare maheta xoalini hare kafetatyakihitita.

### Enore Haliya Kaokatyaka

<sup>19</sup> Nohinaeharenae, Jesus wainihenere hiyeta ite wikaokkehena rotita Enore anere kaiserehare ako.

<sup>20</sup> Imiti taose sololoitere hiyeta atyo wikaoka Enore ana. Hatyo atyo aimenekoita Cristo háre. Hatyo atyo waitare wenati matyotenehare maniya moheta wiso.

<sup>21</sup> Kalorexe Sacerdoti kakoare atyo wiso, kaxaiko Enore hana maheta.

<sup>22</sup> Hatyo hiyeta maika wiyane wikaoka Enore haliya. Aliterexe heko wityakekone, exahe wiyahokolanae iyomere iniyalahare nonitata, exahe wiháre itihakahare one iyomaxere kakoa hoka. <sup>23</sup> Maika heko kaisere wityakeko hoka maisa wahalakijita wityakekone. Hiyaiya, Enore isa aokowitereharenae ite isa womana, maisa atyo maoseratyaliye xini.

<sup>24</sup> Nika wakahinaetyakakoa hoka

wiyawaiyetyakakoane kekoare, exahe xoalini hare waiyexe wománe hoka. <sup>25</sup> Awa atyo wahalakisa wiya-hohisakoatyokane haiyanae tyaonitere akereta. Maika wakahinaetyakakoa, waihalahalinisakakoa kaisere. Xiyaiya, kalikini okoi Xekohaseti haikoahenaosehete-hena.

<sup>26</sup> Hiyaiya, hekoiya iniyalahare wisoma waokowita Iraitu Waiyexe xema wisaoehenere najikinita hoka maisaiya xoare hare kafetatyaka hoka iniyalahare wománe emaisahitita. <sup>27</sup> Wimairehena taitaiya kaheneharexe kaotyakehenere. Hiyaiya, Enore nahalakoahare tyaoniterenae ite irikati watere konite kaxawatyaka hoka kamawenekoaretyakaha.

<sup>28</sup> Xala xamaniya maisa tyakekore Moisés xaotyakiraho hoka hinama, hanamaiya irae etahi hoka kaxaisaka. Maisaiya xalahare airakoaneharetitene. <sup>29</sup> Hoka xoana

ite tyaohena Enore Ityani maxaiminirehenerenae, exahe timalati kakoa tihehenahitene hoka wenati waitare Enore isehenere maxaiminirehenerenae? Xoare ite tyaohena Enore Nisekohare awaiyetene hoka maxaiminiriterenae ana? Iniyalahare ite kaxomokaka, maisa ite waiye xini. <sup>30</sup> Hiyaiya, koxaka Enore exakere irae-henere kakoa wawaiyoreta: “Nakatolikoaretyoaite. Tyomahitere akereitaite namokahene”, nexa Xekohaseti. Exahe hoka nehitiya: “Exahe ite nokaxaikoniarenae iniyalahare tyomehenaha hoka hatyo nahalakoa iniyalahare namokahene”, nexa Enore.

<sup>31</sup> Kaxiyani, Enore makamanehare eharehena hoka kahenehare kaiserehareya.

### Maika Xaiyateretyoa Xawenane Kakoa

(Gálatas 6.9-10; Hebreus 4.11)

<sup>32</sup> Xotyaxematya toahiya tyaohenere. Xasema waiyexe iraiti hoka Xekohaseti koamaniya waiye xisaona hoka xahalakoaharenae maisa waiye mokita xiso. Xakore hoka heko xikinaterere xisaona ekoamaniya. <sup>33</sup> Xikairawaiyaka, xikairaaharetyaka harenae halitinae haotita xakore hoka heko xikinaterere xisaona ekoamaniya. Haiyaharenae tehitiya iniyalahare mokahitaha, iniyalahare mokahitere xiso akereita hoka hatyo iniyalahare kaxomokakiterenae hinaehare atyo xisaonita. <sup>34</sup> Haiyaharenae berexo ako tyaoniterenae hoka xakahinaetita, xairakoaneharetyahitene hoka. Xahalakoaharenae iyaharetyahitaha xiso, xakore hoka maisa atyo xamaikoharexe. Enokoa nali kahare waiyexe xixiyehare matyotenehare tahi waiyekehalakita xomana hoka hatyo hiyeta maisa xamaikoharexe.

<sup>35</sup> Hiyeta hoka awa xityakekone xahalakisa. Hekoia xityakeko hoka kalore xalini hare waiyexe kaxekaka xomana. <sup>36</sup> Maika ximamaxaharenehare xisaona hoka Enore aokitere akereita xisoma hoka hatyo najikinitaite isa aokowiterehare isa xomana.

### Cristo Haikoahaneheta

(Atos 1.11; 1 Tessalonicenses 4.13-18; Apocalipse 1.7)

<sup>37</sup> Hiyaiya, exakere Iraiti Waiyexe nanekoa nexa: Okoihetehena, initehena kaiserehare hoka tyoheta aokowitere tyohetehena. Tyohetaite. Maisa ite wahita hoka haikoahetehena.

<sup>38</sup> Haliti waiyexe atyo ite tyaota mene hatyakekone hiyeta, hoka xala xamani atyo ite matyakekoneheta hoka maisa ite nihilahareta ekakoa.

<sup>39</sup> Hoka wiso atyo maisa hatyakekone halakijiterehare hotyalinae hoka iniyalahare kaxomokakiterehare hotyali xini. Wiso atyo tyakekohatiye hotyali. Hatyo hiyeta ite waiyexe maniya wisekohare kaxomokaka.

### Tyakekoti

**11** Wityakekone hiyeta wexa: “Watyahitereharenae ite kaxekaka womana”. Exahe tehitiya hoka wityakekone hiyeta waiyekehalakita womana xalini hare wimawaiyanehare tyaonitereharenae.

<sup>2</sup> Toahiyereharenae tyakekone hiyeta Enore tehitiya tyakekoahene. <sup>3</sup> Wityakekone hiyeta waiyekehalakita womana Enore niraene hiyeta enokoa, waikohe kaxomokahenere. Exahe tyotyta xalini harenae kawaiyakitereharenae atyo mawaiyakitere nómanenae.

<sup>4</sup> Tyakekoti hiyeta Abel aisa kirakahare hoka fetatya Enore ana hoka Caim fetahenere xahehare nawaiye. Ityakekone hiyeta Enore awaiyetene hoka waiyexe haliti aokene. Enore terota atyo awaiyitya efetala hoka. Tyakekoti hiyeta ekamane najikinita hekota iniraene kasemakita.

<sup>5</sup> Tyakekoti hiyeta tehitiya Enoque maisa wainita. Kaseta kakolatyaka enokoa xeta. Hatyo najikinita maisa kawaiyakihitita, Enore atyo kolatene hoka. Kakolatyakehenere nahitita Enore ihalahareta ekakoa, Iraiti Waiyexe nanekoa irae-henere akereita.

<sup>6</sup> Maisaiya hatya tyakekore hoka maisaiya atyo aliyakere Enore ihalahareta ekakoa. Hiyaiya, xala xamaniya atyo Enore nali xane aokowita hoka, “Aliterexe Enore tyaonita, exahe tyakekohenerenae kahinaetyasehare”, nita. Maisaiya hoka maisa aliyakere xaneta.

<sup>7</sup> Tyakekoti hiyeta Noé sema Enore niraene xalini hare kaotyakene nahitita. Exowaka hatyoharenae mawaiyakahare tyaonita. Noé tyakeko Enore hoka kanowa kalorexe tyoma hoka maisa wainahitaha hoka Enore haliti waiyexe aokene ityakekone hiyeta. Hoka matyakekoneharenae atyo waini hamatyakekoneneha hiyeta.

<sup>8</sup> Tyakekoti hiyeta Abraão Enore niraene tyakeko irae-henere ihiye xowaka hoka xane Enore ewaikohera aohenere nali xeta. Halakisa hawaikohera hoka xane. Hatyo xowaka maisa waiyorexe haxanene kakoa.

<sup>9</sup> Hatyakekone hiyeta xane kaoka Enore aokitere nali. Xane kaoka hoka bojirise nomaka katyahe tyaona haiyanae waikoherakoa Isaque, Jacó harenae kakoa. Hatyonae ana tehitiya Enore isa aokowi. <sup>10</sup> Kasani Abraão wenakalati kinaterexe Enore nómane nali kaoka aokowita. Hatyo wenakalati atyo kinaterere hoka maisaiya kamawenekoaretyakita.

<sup>11</sup> Tyakekoti hiyeta Abraão kaisaniheta, inityohalithena kaiserehare xakore hoka. Exahe exanityo Sara tehitiya xakore koxaka inityohaloti, maisanityakohalo xakore hoka Enore iyatoloti isa enomana hoka kaisaniheta, Enore niraene tyakekohenerere hiyeta. <sup>12</sup> Hiyeta hoka hatya okoi wainihenerere hiyeta kahare ijikolaharenae tyaona, xorese hisoakene, waikohese one kilihityaonitere hisoakene akere.

<sup>13</sup> Hatyonae tyotyta wainiha hatyakekoneha kakoita. Xakore hoka maisa atyo kaxekakita enomanaha enomanereha kaxaokakehenere. Sekota atyo hatyoharenae waiyaha hoka ihalahareha ekakoa hoka mawaiyakahare hotyali, tonehekoaitatereharenae atyo aokowiha exe waikoheko. <sup>14</sup> Nikare atyo haiyanae irae-hena hoka tawahitaha hawenakala tyaonaha maheta nali. <sup>15</sup> Maisa haikoahenehitaha hawaikohera halakihenerere nali xeta aokowitaha. Haikoahetaiya

aokowiha hoka haikoahenahitahaiya. <sup>16</sup> Kasani waiyexe waikohe enokoa nali kaokaha aokowitaha hoka nali tyaonaha maheta. Hatyo hiyeta Enore maisa haiharexahene enEnorexaha aokowitere kakoa. Haty-ota koxaka mematywa wenakalati enomanaha enawenakalaha maheta.

<sup>17</sup> Tyakekoti hiyeta Abraão, Enore hasakaharetene hoka haisani Isaque aisa hoka fetatya aokowi. Hatyo nahitita Enore ijikolaharenae hisoakene aoka xakore hoka memere tyaonita haisani haterore aisa hoka fetatya maheta. <sup>18</sup> Hiyaiya, Enore koxaka enahitita nexa: "Isaque hiyeta ite kahare hijikolahare tyaona". <sup>19</sup> Exahiya Abraão aisa Isaque hoka Enore xekasekirihetene waiyekehalakita enomana. Nerekatiya atyo: Abraão ana ityani Isaque kaseheta.

<sup>20</sup> Tyakekoti hiyeta Isaque wenati waiyexe aoka haisaninae Jacó, Esaú xoaha ana enahetaha maniya.

<sup>21</sup> Tyakekoti hiyeta Jacó hakamane nahitita waiyexe wenati aoka José ityaninae ana. Hatyakasera hiye tokoa hoka aiyateretyoa hoka Enore kakoa ihalahare.

<sup>22</sup> Tyakekoti hiyeta José okoi wainihena hoka Israel hotyalinae kikisoaneheta Egitota tahi irae, exahe hoka irae haháre tahi, ekamane najikinita kakolatyakeheta maheta ewaikohera xeta.

<sup>23</sup> Tyakekoti hiyeta Moisés nexa, nityo xoaha ateroakisa haisani hanamalihena kaimare enawenane najikinita. Waiye mokose waiyahene hoka hatyo hiyeta maisa mairahitaha kalorexe niraene hoka ateroakisahene.

<sup>24</sup> Tyakekoti hiyeta Moisés, inityohaliti hoka maisa Faraó ityani ityani kaxaokakita. <sup>25</sup> Kasani Enore kaxaikonehare hotyalinae kakoa haxawalita makawati aokowi hoka maisa hatyo iniyalahare kaxawaiy-ityakitere xema tyaona aokowita. Hatyoharenae haxerore tyotita. <sup>26</sup> Maisa Egito nali xiyehaliti kahare tyaonitere kakoa tyaona aokowita hoka Enore Kalorexe Aohenere xema tyaona, iniyalahare xakore kaxomokaka, hoka enajikini maniya waiyexe xoalini hare kaxekaka enomana maheta. <sup>27</sup> Tyakekoti hiyeta Moisés Egito nalita kikisoaheta, maisa mairita kalorexe Faraó xeharene. Hoka heko kinatere tyaona Enore koamaniya. Motya waiyita ene Enore mawaiyakitere.

<sup>28</sup> Hatyakekone hiyeta hetatiye Páscoa tyoma hoka Israel hotyalinae wakatywa hoka timalati kakoa hahana kanase xolotyaha hoka maisa anjo haliti xaisasehare ityaninaeha hetatiye aijita maheta.

<sup>29</sup> Hatyakekone hiyeta Israel hotyalinae imahotyowa one kaloxere Xotyaxere waikohe iyokoare akere. Hoka Egito yerenaeha tehitiya imahotyowa aokowihenaha xakore hoka one kaokakakoaheta hoka monaha hoka wainiha.

<sup>30</sup> Tyakekoti hiyeta Jericó talahokola exoa, Israel hotyalinae 7-ki ferakene tonahokohenaherene najikinita.

<sup>31</sup> Hatyakekone hiyeta enatyalolo Raabe maisa wainita Enore matyakekohenerenaeha kakoa, waiye mo-henere wenakalati waiyase Israel yerenaeha hiyeta.

<sup>32</sup> Xoare nomi hitiyaite? Noxakaiya Gideão, Baraque, Sansão, Jefté, Davi, Samuel, iraiti xakaisaseharenaeha

tahi hoka wahaiya. <sup>33</sup> Hatyakekone hiyeta aiyateretyowa kahare haliti hotyalinae xahita hoka jiyahaotyahene. Waiyexe taita tyomaha hoka Enore isa aokowihenere isa enomanaha. Leãonaeha kanase jihatya.

<sup>34</sup> Irikati kahenehare takoitere ewakatyaha. Kaxaisakehenaeha xakore kesekase kakoa hoka maisa kaxaisakahitaha. Maisa xakore kinaterehaha hoka kinatere tyaonaha. Xaisakakoati heko kinatere tyaonaha hoka hahotyaliharenaeha sorarexanaeha jiyahaotyaha.

<sup>35</sup> Tyakekoti hiyeta ohironaeha ana kamatinaeha kaseheta.

Haiyanaeha iniyalahare kaxomokakaha wainihenaeha kijiya. Aiyateretyowa hawenaneha koamaniya kakoa, maisaiya halakisahitaha hatyakekone. Kasani kasehetehehenaeha hoka wenati waiyexe kaokaha aokowitaha hoka. <sup>36</sup> Haiya harenaeha kakoexahalisaka, kamokonasetyaka hare. Haiyanaeha kaxolatyaka hoka berexo ako kaxomokakaha. <sup>37</sup> Haiyaharenaeha sehali kakoa kamokotyakahitaha hoka kaxaisakita. Haiya harenaeha hoka xirikotyakalati kakoa kaxirikotyakita.

Haiya harenaeha tehitiya hoka kesekase kakoa katonotyakahitaha. Haiya harenaeha iniyalahare kaxomokakaha. Maisa waiye mokahitene, mokohekoatyahitene hare hoka tekoaha. Maoloxahareha, maimahiro, nakahitaha hoka tyaonehekoatyahitaha. Inimaha kalanero mili, kabala mili xoaha. <sup>38</sup> Maharexakahare tonakoatyaha tyairi koni, sehali kakoakotyakako tyaonahitaha hare. Matyakekoneharenaeha atyo maisa ehakakoanehare xini.

<sup>39</sup> Ityakekoneha hiyeta tyotywa Enore awaiyetyahene. Xakore hoka Enore isa aokowihenereharenaeha maisa kaxekakita enomanaha. <sup>40</sup> Enore atyo exáhehare nawaiyexe ahekotywa witahi hoka kasani hatyoaha, wiso xoaha, hahotyalyita waiye maniya wisaheta aokita hoka.

### Enore Atyo Wexe

**12** Hiyaiya, kahare haliti hatyakekoneha hiyeta waiye maniya kaxomokakeheta hoka wahakotita womana wihokohaliya. Hatyo hiyeta nika hoka tyotywa xoalini hare ahowitihalikijitere wiso wahalakisa, exahe iniyalahare kinatere tyaonita wiyahita hoka wahalakisa hoka wimamairanehare watema hoka wahikoa waheta tyaonitere ana.

<sup>2</sup> Nika heko Jesus ana wawahakotywa taita. Ihiyeta atyo wityakekone tyaonita, hetatita imiyanaose kijiya. Hiyaiya, maisa atyo atyalihose xaimaholatyaka hiye kaberekotyakehenere nonitata tekoita. Ihalahaliti hao-manere tahi sema haheta maniya hoka hatyo hiyeta, kalore kahaiharetyakere kaxomokaka atyalihose xaimaholatyaka hiye xakore hoka, heko tyaona Enore koamaniya hakamane kijiya. Hoka kalikini Enore fihini maniya tyokita.

<sup>3</sup> Jesus makawatiharene tahi xahekohena. Iniyalahare nomaseharenaeha kaeharetyaka waiyene xakore hoka heko kinatere tyaonehenere tahi. Nikare awa atyo xamaikohare hoka xahalakisa ekoamaniya xawenane. <sup>4</sup> Alitere xakore atyo koxaka xaiyateretyowa

iniyalahare xahita hoka maisa atyo xikaxaisakita hatyohare hiyeta.

### Xekohaseti Aotyakijita Haisaninae

<sup>5</sup> Xoana, koxakala ximaotyaneheta Enore mairanehaliti tahi xiso haisaninae hiye irahenere? Hiyaiya, exakere nexa:

Waiye hasemehena, haré, Xekohaseti iniyalahare mohana aotyakisa maheta hiso. Awa atyo hamaikoharehena, watyalihena hiso hoka.

<sup>6</sup> Hiyaiya, Xekohaseti atyo aotyakijita, watyalita xala xamani awaiyetita, exahe xala xamani haisani aokita hoka iniyalahare mokita aotyakisene maheta.

<sup>7</sup> Maika xexe iniyalahare mohana xiso, aotyakisa maheta xiso hoka xaiyasetyoitere akereta xaiyasetyoahena iniyalahare xiyomokaka kakoa. Hiyaiya, hatyo iniyalahare xikaxomokakitere hiyeta atyo hotikijita xomana, Enore haisani akereta mokiterehare xiso. Xalala maxaotyakisakahare tyaona hanexe hiyeta? <sup>8</sup> Maisaiya watyalita xiso haiyanae haisani akere hoka maisa atyo ityani kaiserehare xini xiso. Hatya ityani atyo xiso.

<sup>9</sup> Hiyaiya, wexe halitinae wiyoimene xowaka watyalihena wiso hoka waiminisahitene. Exahehare atyo ite wexe Enore waiminihena hoka waiye wisaohena.

<sup>10</sup> Wexe halitinae watyalitaha wiso xakore hoka maisa waha xini, hatyoharenae motya ehokore aokahitaha hoka. Hoka Enore atyo watyalita wiso waiye wisaona maheta, exahe enawenane akereta iniyalahare maomaneharenae wisaona maheta. <sup>11</sup> Alitere wikawatyalisakehena hoka hatyo xowaka wamaikohareta, maisa wihalaharexe. Xakore hoka wahehena atyo hoka hatyo kawatyalisakiterena waiye, exahe mehaxaikohare tyaonita.

### Xairihalikisati Xaotyakisatinae Xoaha

<sup>12</sup> Hiyeta hoka xainakihena xikahe kirahareterena, xaiyatelikihena xikaolise maiyatereharenae. <sup>13</sup> Ahoti hakakoahore xatohena hoka kijiti kawo mokoare maisa tonoli, tonoli nihitita hoka waiyeheta kaisere.

<sup>14</sup> Ximaxiholakakoanehare xisaona haiyanae kakoa. Xaiyateretyoa waiyexe maniya xawenane kakoa Enore aokitere akereta. Maisaiya nikare kawenatyakita hoka maisaiya Xekohaseti ana xala hare hikoita. <sup>15</sup> Maika xirihare xisaona hoka Enore waiye mokitere xiso maisa xala hare halakijita. Xirihalira, waiya aliya hoka hanakati tihero kekoare hoka kahare haliti hahowene kakoa komita aijitere akere xisaona.

<sup>16</sup> Awa atyo hatya nohiroxa hekoti xiwatyalihena, exahe Enore anere xiyehaliti hoka ximaxaiminira, Esaú akereta. Hiyaiya, nakairati hiyeta hetatyesani nawenane betetya. <sup>17</sup> Hatyo najikinita hanexe hiye wenati waiyexe aoka haomana haosexa kakoa xakore hoka maisa aliyakere moka xaka tyomehenere hiyeta. Hatyoharenae waiyekehalakita xomana.

<sup>18</sup> Xiso atyo maisa xikaokita tyairi Sinai haliya Israel hotyalinae kaokitere akereta. Hatyonae atyo kaokaha hoka waiyahitaha tyairi kiritere, makaliroti, kinatyaw-

initi. <sup>19</sup> Exahe koneta nemahare, iraiti hare semahita. Iraiti semaha hoka kasani maisa irahitiya aokareha. <sup>20</sup> "Exaheya kirakahare kaokahaliyatya exe tyairi hoka sehali kakoaiya kamokotyaka hoka waini", nitere iraiti semaha hoka mairaha, mawaiyehareha kalore. <sup>21</sup> Waiyehenahere atyo kahenehare kaisere hoka Moisés nexa: "Nomairita, nomairani hiyeta natatakoita".

### Wenakalati Waiyexe Waheta Maniya Tyaonitere

(Hebreus 11.10; Apocalipse 7.15-17; 21.1-22.5)

<sup>22</sup> Hoka xiso atyo xikaoka Sião tyairiya, Enore makamanehare nawenakala Jerusalém enokoare nali, kahare anjona tyaonitere nali. <sup>23</sup> Xikaoka hetatiye Enore ityaninae, hohisakoaha hoka ihalaharahiterena nali. Enokoa nali exairatyakahare nexarexena ana. Xikaoka tehitiya Enore ana, aliyakere xamani halitinae tyaonita hoka tyomehenahere akereta mokitere ana. Exahe haliti waiyexena nisekoharena ana xikaoka. Hatyo halitinae atyo waiyexe maniya kaiserehare tyaohtehenerena. <sup>24</sup> Xikaoka Jesus ana, waitare wenati waikatehare tyaohtehere ana. Hiyaiya, itimalaxa hiyeta wenati waiyexe kaotyakita, Abel timalaxa xahehare nawaiye hatimalaxa exaorekoahenere ana.

<sup>25</sup> Hiyeta Enore irahena xikakoa hoka awa ximase-maxemala. Moisés irae toahiyereharenae kakoa hoka maisa semaxematyahitaha hoka hatyo hiyeta iniyalahare kaxomokakaha. Hoka kalikini atyo Enore enokoata iraeata wikakoa. Maisaiya wityakekota iniraene hoka exahehareya wikaxomokaka.

<sup>26</sup> Hatyo xowaka Enore irae ekakoaha hoka waikohe tatakoo. Hoka kalikini exakere irahitiya: "Etare ite niraehitiya hoka maisa waikohe taita xini tatakoo. Waikohe, enokoa xoaha ite tatakoo".

<sup>27</sup> "Haki ite niraehitiya", nitere atyo exakere hotikijita: Tyotya xoolini hare tyomehenere ite kaxatatakoakisakehena hoka haiyanae atyo ite maisa tatakooita. Tatakohenerena atyo ite kakikisaka hoka matatakoaneharenae atyo ite heko tyaona.

<sup>28</sup> Hiyeta hoka maika wihalahare Enore kakoa wenakalati kinaterexe kaxekakehenere womana hiyeta. Maika wihalahare Enore kakoa, exahe aowitereharenae wisoma wiyaiminirene kakoa. <sup>29</sup> Hiyaiya, aliterexe atyo wEnorexa irikati akere, mawenekoaretyare.

### Enore Kakoa Nihalaharetyaka

**13** Heko xawaiyetyakakoa, exahe hoka xihinaehare xaoka kakoa xawenane Cristo koamaniya hiyeta. <sup>2</sup> Haliti kaokehena xomana hoka waiye xamokene. Hiyaiya, toahiya emawaiyanenehareha kaoka enomanaha hoka waiye mokahene. Motya haliti aokahene xakore hoka anjona tye.

<sup>3</sup> Xotyaxemehena berexoako tyaoniterena, maika motya berexoako ene xisaonita ehaliyaha akereta xamokahene. Xotyaxemahena kirakoane tyaoniterena, motya kirakoane ene xisaonita ehaliyaha akereta xisaona.

### Xikaxaikoawi Iniyalahare Ohiro Kakoa Xománe Nonita

(1 Coríntios 5.1-5; 6.15-20; 1 Tessalonicenses 4.3-7)

<sup>4</sup> Maika wenakakoati xaiminisa xityotyta. Maika kaiyanityorenae, kaiyaneneronae aiminisakakoa. Enore ite iniyalahare moka ohiroarexe, enatyalolo xoa-ha hoka.

<sup>5</sup> Awa atyo olo, xiyehaliti hare tahi xahekotyta hoka xaoka xomana mene. Maika xoarenae xamani xixiyehare hoka hatyo kakoa xihalahare. Hiyaiya, Enore nexa:

Maisaiya xoana hekota nahalakijita xiso, maisaiya xoana hekota nomaotyanyita xiso.

<sup>6</sup> Maika hatyo hiyeta wimamairanehare wisaona hoka waxa:

“Xekohaseti atyo kahinaetita natyo hoka maisaiya nomairita. Xekohaseti kahinaetita natyo hoka xalaiya iniyalahare mohena natyo?”

<sup>7</sup> Xotyaxematya xinityohalitira hetatienae Enore niraene xakaihenere xihiyeye. Xotyaxematya enawenaneha, ekamaneha harenae hoka enawenaneha akereta xisaona. <sup>8</sup> Hiyaiya, Jesus Cristo kafaka tyaonita, kalikini tyaonita. Nikare ite tyaona matyotenehare. <sup>9</sup> Awa atyo haiyanae hahekore aotyakijitere xema xisaona hoka waiyexe ahoti xahalakisa. Waiye atyo Enore waiye ahekoitere wikakoa hiyeta wikaxaiyatelikisakita. Maisa atyo nakairati nakairatyakaho tyakekotyaka hiyeta xini. Hatyoharenae xema tyaoniterenaе maisa kakahi-naetyakita xini.

<sup>10</sup> Sacerdote hakiterenaе judeunaе niraexatyakala hanakoiya atyo maisa aliyakere kanakairahitaha wifetatyakalaose nali kafetatyakehenere. <sup>11</sup> Kalorexe sacerdotenaе judeu kolatya kirakahare timalaxa hoka imiti taose talarere ako isoaha hoka fetatyahita halitinae iniyalahare tyomitere hiyeta. Xakore hoka kirakaharenae háre atyo haware wenakalati nonitata kakera-haotyakita.

<sup>12</sup> Hiyeta hoka Jesus tehitiya waini sekose wenakalati nonitata emaisatya maheta hatimalaxa kakoa halitinae nómane iniyalahare. <sup>13</sup> Hatyo hiyeta wiyá Jesus haliya kaiserehare wisaona. Wenakalati nonitata haware hoka iniyalahare wikaxomokaka, iniyalahare kaxomokakehenere akereta.

<sup>14</sup> Ali exe waikohekoa wawenakala tyaonitere atyo maisa waha tyaonare. Hoka watyahita atyo wawenakala enokoare kaotyakene xahita. <sup>15</sup> Hiyeta hoka

maika wihalahareta mene Enore kakoa, Jesus Cristo hiyeta. Exe wihalaharetere atyo enomanere, exahe etahi hoka wiraeta. Xoalini hare kafetatyakitere akere-ta. <sup>16</sup> Awa atyo waiyexe xománe ximáomane, exahe hoka xakahinaetya kakoa. Hiyaiya, hatyoharenae kaomakehena hoka Enore ana waiyeta.

<sup>17</sup> Maika xinityohalitiranae niraene xema xisaona. Hiyaiya, aotyakisahitaha xiso xikinatere xisaona maheta Enore koamaniya. Maisaiya waiye kaxaikotaha xiso hoka maisaiya waiyeta Enore hiye. Xasemaxematyaya iniraeneha hoka ihalaharehaiya hahateneha kakoa. Hoka haxamaikoharene kakoaiya hakaha hoka aliyakere kahinaetyahitaha xiso?

<sup>18</sup> Maika heko xiraexatya witahi. Wiyahékola waiye maniya tyaonita, waiyexe taita wisoma waokowita hoka. Nikare wisaona waokowita. <sup>19</sup> Maika xiraexatya nomani hoka haxeroreta Enore ehaikoakiheta natyo xinali xeta.

### Iraexatyati

<sup>20</sup> Maika Enore kakoa kaihalaharetyaka mene! Hiyaiya, hatyo atyo ekasekiheta Wiyekohase Jesus. Ekamane hiyeta halitinae ekoamaniya tyaoniterenaе Kaxaikotyasehare Kaiserehare waiyexe tyaonita. Itimalaxa hiyeta waitare wenatyaho matyotenehare kinatere tyaonita. <sup>21</sup> Maika Enore mehaxaikohaliti waikatehare iyateliti isa xomana hoka aokitere akere taita xisoma. Exahe waiyexe taita tyoma winekoni waiyetereharenae enomana Jesus Cristo hiyeta. Maika Cristo kakoa kaihalaharetyaketa mene matyotenehare. Eko xoaha.

### Iraiti Miyanitiyenaе

<sup>22</sup> Nohinaeharenae, maika xihalahare maheta niraini ximamaxaharenehare xasemaxematya. Exe baberane naxairahenere maisa waha tahi xini.

<sup>23</sup> Xasemehena, wihinaehare Timóteo koxaka hikoaheta berexo akota. Haxeroretaiya tyoheta hoka nanolokene hoka wiyaiyeheta xiso.

<sup>24</sup> Maika xiyakaiheta natyo tyotyta xinityohalitira Enore ana hakiterenaе hiye, exahe tyotyta Enore kaxaikone harenae hiye hoka. Itália nali tyaonitere wihinaeharenae tehitiya haxakaisakeheta aokaha xihiyeye.

<sup>25</sup> Maika Enore waiye kaxaiko xiso xityotyta. Eko xoaha.



# Tiago

<sup>1</sup> Natyo Tiago Enore wakanehare, Xekohaseti Jesus Cristo wakanehare hoka naxikatya babera nokatyawaxi maheta tyotya Enore kaxaikone hotyalinae xaorekoitere waikohekoa hiye maheta.

## Tyakekoti Waiyoliniti Xoaha

<sup>2</sup> Nohinaeharenae, maika xihalahare xisaona tyotya xihacakaharetyaka kakoa xijiyehena hoka. <sup>3</sup> Hiyaiya, xityakekoneya jiyahaotya exehare hasakaharetyati hoka exahexeya xikinaterere xisaona. Exe harenae waiyekehalakita xomana.

<sup>4</sup> Maika exe hasakaharetyati hiyeta xikinaterere xisaoniterere hiyeta waiye, tota maniya xisaona, iniyalahare ximaomanehare xisaona.

<sup>5</sup> Maika hatya maisa waiyorexe hoka axa Enore hoka awaiyolinikisene. Isaiya, hiyaiya, waiyexehare atyo hoka hawaiyexehare kakoa tyotya halitinae ana ijita.

<sup>6</sup> Xakore hoka xaxehena hoka xityakekone kakoa xaxa. Awa atyo ximatyakekone kakoa xaxa. Hiyaiya, xala xamani atyo matyakekoita hoka, “Xoana isa xamani, maisa xamani”, nita hoka one kaloxere hoholati takoiyaxaitere hamaniyaxa, hamaniyaxa akereta atyo tyaonita. <sup>7</sup> Xala xamani atyo nikarexe hoka maisaiya xoare Enore ijita enomana. <sup>8</sup> Hinama maniya haxowakita ahekatya hoka maisaiya xoana xowaka waiyoreta hãomane kakoa.

## Maxiyehaliti, Xiyehaliti Xoaha

<sup>9</sup> Maika hatya tyakekohatiye maoloxahare kaxiyeharehena hoka ihalahare Enore kakoa, kaxiyeharetene hoka. <sup>10</sup> Maika nikareta tehitiya kaxiyeharexe maxiyeharehena hoka ihalahare Enore kakoa, maxiyeharetene xakore hoka. Hiyaiya, kaxiyeharexe ite maiyare iyiti masekoa tyaoniterere akereta. <sup>11</sup> Kamae watehena hoka enowatya keraita hananehaliti, hoka iniye exoita, enowaiyehare emaisatita. Nikare tehitiya ite kaxiyeharexe kamawenekoaretyaka haxiyeharenae nonitata.

## Kamaikoharetyati Hasakaharetyati Xoaha

<sup>12</sup> Waiye kaiserehare atyo xala xamani xakore kahasakaharetyaka hoka heko tyaoniterere. Hiyaiya, jiyahao akatya najikini atyo ite wenati waiyexe kaxekaka enomana, Enore haxawaiyeranae ana isa aokowihenere.

<sup>13</sup> Xala xamani kahasakaharetyakehena examaikoharene xowaka hoka awa atyo nexa: “Exe hasakaharetyati atyo Enore nalitare”. Hiyaiya, Enore atyo

maisa hasakaharetyare iniyalahare kaomaka maheta. Maisa atyo xala hare hasakaharetyare. <sup>14</sup> Exakere hatya kahasakaharetyakita: Kamaoseratyakita hoka exahekola iniyalahare kaxawaiyetyakitere hiyeta atyo kahasakaharetyakita. <sup>15</sup> Hoka hatyo xahekore ewaxirahare hiyeta atyo iniyalahare kaotyakita. Hoka iniyalahareya wahehena tyaonita hoka kamati kaotyakita.

<sup>16</sup> Awa atyo xamaoseratyaoawi, noxiyakawali nohinaeharenae. <sup>17</sup> Tyotya waiyexe kaxekakitere harenae womana atyo enokoatare. Tyotya hatyoharenae atyo Enore nalitare. Enokoare xaokanatyakalati nomasehare nalitare. Maisa ini hekoti haxahekola hawarehare mokare. <sup>18</sup> Exahekola xema atyo wikaotyaka, iraiti aliterexe hiyeta. Tyotya xalini hare tyomehenere konita wiso hotohare hetati wisaona maheta.

## Semati, Omati Xoaha

(Atos 10.35; Tito 3.1-2; Tiago 3.17-18; 1 Pedro 4.7-11)

<sup>19</sup> Exeharenae xotya, noxiyakawali, nohinaeharenae. Maika ximemere xisemaxemala kakoa xisaona. Waiye xahekoty hotohare hoka xirae, xehare harenae.

<sup>20</sup> Hiyaiya, haliti xeharene maisa Enore aokiterehare ekaotyakatyare. <sup>21</sup> Hiyeta hoka xahalakisa ewaxirahare xomane, xiyeharene harenae hoka xawaiyexeharene kakoa Enore niraene xaoka xomana hoka waiyexe maniya moheta xiso.

<sup>22</sup> Awa atyo xamaoseratyaoawi. Awa atyo exe iraiti xasema taita. Xasemene hoka aokitere akereta xisaona. <sup>23</sup> Hiyaiya, xala xamani atyo sema taita iraiti hoka maisa aokitere akereta tyaonita hoka hatyo atyo hatya haliti tiho waiyakakalati waiyoawi hoka aliyakere haliyere xamani akereta. <sup>24</sup> Waiyoawi hoka xaneheta hoka haxerore hahare maotyanihitita akere.

<sup>25</sup> Hiyaiya, Enore xaotyakira atyo waiye maniya moki-ta wenati. Xala xamani atyo heko Enore xaotyakira akereta tyaona, maisa semitene taita hoka, xoare xamani tyomehena hoka Enore ehatene awaiyetya.

<sup>26</sup> Hoka xala xamaniya atyo tyakekohatiye xakore aokowita hoka iniyalahare iraeta hoka maisa atyo tyakekotere xoare tyomare. Maoseratyaoawita atyo.

<sup>27</sup> Wexe Enore ana atyo wenati aliterexe exe: tyaijikihalo, tyaijikihare, maiyanenehalonae kahinaetyaka examaikohareneha hiyeta. Kaxaikoawiti hoka maisa matyakekoneharenae nawenane akereta nawenatyakere.

### Hakakoa Xomokakakoati

**2** Nohinaeharenae, xityakekohenerenae Wiyeko-hase kinaterexe Jesus Cristo: Awa atyo haiyanae xikirawane, haiyanae waiye xamoka xoaha, eharenae-ha waiyakene hiyeta. <sup>2</sup> Xiyaiyehenaira ite: ouro hoko kahitiniye, waiyexe imiti ako ijoitere xamaniyatya isoa xomana xihohisakoitere nali hoka hatya tehitiya maoloxahare isoa, imiti exololo nimere. <sup>3</sup> Hoka waiyexe imiti ako ijoitereya waiye xamoka hoka xexa ihiye: “Exaose atyo waiye, exaose hisoka”, hoka maoloxahare hiyeya xexa: “Hatityoa nali, maisa hoka hisoka waikoa nokiji haliya”. <sup>4</sup> Exakere atyo, hatya waiye xamokita, hatya maisa waiye xamokare xoaha hoka iniyalahare atyo xamokakakoita. Maisa waiye xahokotyare.

<sup>5</sup> Xasemehena, nohinaeharenae, noxiyakawalinae: Maxiyehareharenae atyo Enore aoka haomana ali waikohekoare hoka kaxiyeharexe tyaonaha maheta hatyakekoneha hiyeta enokoa nali. Enore haxawaiyeraharenae anere aohenere enomanereha tyaona maheta. <sup>6</sup> Xakore hoka maxiyehareharenae xikirawaneta. Maisa kore kaoloxerenae xini kolatya xiso xekohasetinae nahalako hoka iraharetya xiso hoka iniyalahare xikaxomokakere? <sup>7</sup> Xoana maisa hatyonae xini iniyalahare iraeta waiyexe Enore kaxakaisakitere xihiyexaokaka?

<sup>8</sup> Enore xaotyakirahoiya xityakeko hoka waiyexeya xisoma aokitere akereta. Hiyaiya, exakere Iraitu Waiyexe nanekoa kaxairatyaka: “Hawaiyetya haiyanae hawaiyetyoawitere akereta”. <sup>9</sup> Hoka halitinaiyi ehare waiyakeneha waiyakahare waiye xamokita hoka iniyalahare atyo xisomita. Xaotyakisatyaho hiyeta iniyalahare nomasehare xikaxaokaka.

<sup>10</sup> Hiyaiya, hatyaiya hátahi xaotyakiye aokitere akere-ta maisa tyaonita hoka tyotyxa xaotyakisatyaho aokiterena e atyo maisa aiminijita.

<sup>11</sup> Hiyaiya, hatyo xaotyakisatyahota exakere nexa: “Awa atyo hatya nohiroxa hiwatyaliti”.

Exahe nexatehitiya: “Awa atyo haisa”.

Exahiya maisa hatya nohiroxa hiwatyalita hoka haisaiya hoka iniyalahare atyo hisomita.

<sup>12</sup> Maika xaotyakisatyaho aokitere akereta xirai, xisoma xoaha hoka maisa xoana xikaxomokakita. Hatyohare atyo mehaxaikaliti ijita womana. <sup>13</sup> Enore axehenere haliti akahenere xowaka ite maisa airakoaneharetita haiyanae maxairakoanehareraharenae. Xakore hoka haiyanae airakoaneharenere atyo ite maisa iniyalahare kaxomokakita, xaxalisati ferakene.

### Tyakekoti, Omati Xoaha

<sup>14</sup> Nohinaeharenae, xoare mahetaiya hatya tyakekota xakore aokowita hoka maisa hatyakekone akereta tyaonare hoka? Xoana hatyo ityakekoneyaka waiyexe maniya mohetene?

<sup>15</sup> Hiyaiya, wihinaehalonae, wihinaeharenaeya maimahare, manakairahare hoka <sup>16</sup> maisaiya xoare xisare enomanaha hoka xoare mahetaiya, “Maika Enore waiye moka xiso, waiye xisoa ximako, xikanakaira harenae”, xexa? <sup>17</sup> Hiyeta hoka tyakekoti atyo exakere: Maisaiya xoare waiyexe kaomakere tyakekoti hiyeta hoka maisa tyakekore, ekamane akere atyo ityakekone tyaonita.

<sup>18</sup> Hatya ite nehena: “Hiso atyo hityakekota, hoka natyo atyo waiyexe notyomita. Hahotikisa nomani hityakekone xolani hare waiyexe himaomanehareta hoka natyo ite nahotikisa notyakekoni homana waiyexe nománi hiyeta”.

<sup>19</sup> Homana atyo Enore haterore. Ehekore! Tihanarenae tehitiya tyakeko hoka mairaha hoka tatakoaha hamairaneha. <sup>20</sup> Maotikoniti! Nahotikisa ite homana. Tyakekoti waiyexe maomakahare atyo maisa xoare tyomare.

<sup>21</sup> Xoaneretya hoka wahetakomaniyere Abraão Enore tyakeko? Enawenane hiyeta awaiyetene, haisani Isaque aisa hoka fetatya aokowihenere hiyeta.

<sup>22</sup> Ityakekone, enómane waiyexe harenae hiyeta atyo kawaiyaka. Ityakekone hatyo waiyexe tyomehenere hiyeta masakare waiye tyaona. <sup>23</sup> Exakere kaotyaka Iraitu Waiyexe nanekoa aokitere akereta: “Abraão Enore tyakeko, hoka ityakekone hiyeta waiyexe haliti aokene”. “Nohinae Abraão”, nexa Enore exaokaka.

<sup>24</sup> Enore atyo haliti tyakekota, waiyexe tyomehena hoka. Maisa ityakekone hiyeta taita xini. Exeharenae hiyeta ite waiyekehalakehena xomana.

<sup>25</sup> Xiyaiyehena Raabe enatyalolo nawenane. Israel hotyali kaoka enomana hoka waiye mokahene hoka hotikisa haho ahoti enomanaha hoka waiye xanehenahitaha. Hatyo enómane hiyeta Enore tyakekone.

<sup>26</sup> Hiyaiya, nikare tehitiya haréti maisekoharehare hoka ekamane tyaonita. Nikare tehitiya tyakekoti: waiyexe maomakahare hoka ekamane akere tyaonita.

### Niniseti

**3** Nohinaeharenae, haiyanae taita ite xinekonitare tyakekohatiyena xaotyakisase tyaona. Hiyaiya, wiso waotyakijiterena xiso ite masakare wikaxaxal-isakehena haiyanae xahexe. Hatyo harenae waiyekehalakita xomana.

<sup>2</sup> Wityotyxa maisa ehekore wisaonare kahareki. Hoka hatyaiya waiyexe taita iraeta hoka hatyo atyo waiye kaiserehare, waiye atyo haháre kaxaikota.

<sup>3</sup> Kawalonae kanasako examemakisakala wamoka hoka waokitere akereta tyaona maheta, aliye maniya xamani xane waokita hoka waokitere akereta waxanikisahitene.

<sup>4</sup> Xahokotyxa kanowa kalorexe tahi: Kalore xakore hoka hoholati kinaterexe hoholasekoaitene. Kirane xakore kanowa xaetonakisakala hoka alyako xamani exaetonakisase xane aohena hoka hatyo maniya xaneta.

<sup>5</sup> Nikare atyo niniseti tyaonita. Kirane xakore hoka kahareya kaxaokowiharetyoaka hoka maisaiya haiyanae hiye waiyeta.

Xiyaiya, nikaretaiya inirere irikati hiyetaiya kalore xakore koloho hoka kalore kera. <sup>6</sup> Niniseti atyo irikati akereta. Ewaxirahare kakoare atyo hoka haréti tyoty ahowetitita, komaniyatita wiso. Irikati toloko tare keritere akereta niniseti aiyalaharetita wawenane, wawenane atyo irikati maniya mokita.

<sup>7</sup> Halitiya waiyehena jiyahaotya kirakaharenae. Koxaka jiyahaotya kirakahare xalijiniharexenai, kotehalanai, kirakahare nolokehetyoitereharenai, kohase xoaha.

<sup>8</sup> Xakore hoka maisa atyo xala hare niniseti jiyahaotyare. Maisa waiyexe, howero katawanexe kakoare atyo, maisa atyo xalahare jiyahaotyarene.

#### Enore Maxawaiyere

(1 Coríntios 10.6-10; 1 Timóteo 1.9-10)

<sup>9</sup> Exahe wininise kakoa Wexe Enore kakoa wihalahareta. Halitinae hoka wikirawaneta. Enore haháre akere hare tyomehenere. <sup>10</sup> Hatyo kanase kakoita kihalaharetyakita Enore kakoa, haiyanae kairawaiyakita. Nohinaeharenae, maisa atyo nikare nawenatyaka waiyexe.

<sup>11</sup> Hatyoahota makereyaka one tihexere, wiyaxere xoaha hikoahena? <sup>12</sup> Nohinaeharenae, xoana halohalo kateyaka azeitonali kali? Xoana uva kate xamaniyaka halohalose kase? Nikare tehitiyaiya onehiyase kexaxere maisa aliyakere wiyaxere tyaonita.

#### Aliterexe Irihaliniti

<sup>13</sup> Xoana hatya otyahati, waiyorehati xinekoni? Maika maxahenerahareneta hotikihena hawaiyorene, hawenane waiyexe harenae.

<sup>14</sup> Xakore hoka xokoawaharehati, xeharehati, ximaxihatiya xisaonita hoka awa atyo xaokowiharetyoa xawaiyorene kakoa hoka xamaoseratya. <sup>15</sup> Exeharenae waiyoliniti atyo maisa enokoatare xini. Waikohekoatare atyo, kirakahare, tihanaretare atyo.

<sup>16</sup> Hiyaiya, alyako xamani atyo okoawahaliti, xaokowiharetyoati tyaonita hoka nali tehitiya atyo mawaiyehalakiti, xoalini hare iniyalahare kahare tyaonita.

#### Wenati Waiyexe

(Romanos 12.9-21; Tito 3.1-2; Tiago 1.19-22; 1 Pedro 4.7-11)

<sup>17</sup> Enokoatare waiyoliniti tyoitere atyo waiyexe taita ewaxiraharenae nonitata: mehaxikohaliti, waiyexehaliti, waiye haliti xomokaka harenae. Xairakoanehaliti kakoare hoka waiyexe tyoma kahare, maisa ahinityare, maoseratyare xini.

<sup>18</sup> Hiyaiya, waiyexe atyo kaotyakita waiyexe mehaxikohaliti tahi xakaiterenae xakaini hiyeta.

#### Matyakekoneharenae Kakoa Kahinaeharetyoaka

<sup>4</sup> Alyakota mokotyakakoati, xiholakakoati kaotyakita xinekoni? Iniyalahare waha aka xahekoitere hiyeta. <sup>2</sup> Kahare xakore xoalini hare xaokita xomana hoka maisaiya aliyakere tyoty xomanere tyaonita hoka kasani xaisa akatya hoka xiyahene xaokowita. Xaokita xakore xomana xoalini hare hoka maisa

xaokitere akereta tyoty xomanere tyaonare hoka hatyo hiyeta xaisa kakoa, xiyalijinita. Maisa xomanere tyaonareha, maisa Enore xaxare hoka. <sup>3</sup> Xaxa xakore Enore hoka maisa isare xomana, iniyalahare xiyahakola kakoa xaxita hoka. Xoalini hare xaokita xikehalaharene niyahare taita xaokitene hoka maisa Enore isare xomana.

<sup>4</sup> Maisa Enore aokitere akereta xisaonita! Iniyalahare nomaseharenae hinaeharenae kaiserehareya xisaona hoka xikalalakoahareya Enore kakoa. Xoana, maisa hatyohare waiyehalakitita xomana? Hiyaiya, xala xamani atyo iniyalahare nomaseharenae hinaehare aokowi hoka Enore nahalakoahare atyo tyaona.

<sup>5</sup> Awa atyo motya enenaharenae Iraitai Waiyexe nanekoa iraeta xaoka:

“Isekohaliti mohenerere wihiye kalore iniyalahare taita ahekotita”.

#### Maika Ximaxahenerahare Xisaona

(Filipenses 2.3-9; 1 Pedro 5.5-7)

<sup>6</sup> Xakore hoka Enore kahinaera atyo masakare kinatere. Hiyaiya, exakere Iraitai Waiyexe nanekoa nexa:

Enore atyo maisa awaiyetyare ahinityaliyena hoka maxaheneraharenae atyo kahinaetita.

<sup>7</sup> Hiyeta hoka Enore xityakeko. Xaiyateretyoa Tihanare xahita hoka tekoa xonita. <sup>8</sup> Xaiyateretyoa hoka Enore maniya taita xisaona hoka kaxaiko ite xiso. Xatiheheta xikahe, iniyalahare nomaseharenae. Iniyalahare xahekoitere xahalakisa, awa atyo hinama maniya haxowakita xahekotya.

<sup>9</sup> Xamaikoharehena, ximawaiyeharehena xawenane hiyeta. Xakawihena, xitiyahena harenae. Xikoexane nonitata xitiyahena, xihalaharene nonitata xamaikoharehena. <sup>10</sup> Maika ximaxahenerahare xisaona Xekohaseti haoti hoka kalorexe moka xiso.

#### Iraeharetyati

<sup>11</sup> Nohinaeharenae, awa atyo xiraeharetya kakoa. Xala xamani atyo hahinaehare xaokaka iniyalahare iraeta, iraharetita, hoka xaotyakisatyaho xaokaka atyo iniyalahare iraeta, kirawaneta. Xaotyakisatyaho xahehare aokowita. Xaotyakisatyaho xaokakaiya atyo iniyalahare hirae hoka xaotyakisatyaho xahehare atyo haokowita, maisa atyo xaotyakisatyaho xema xini hisaonita. <sup>12</sup> Enore taita xaotyakisatyahonae tyomita, hatyo taitaiya atyo xaotyakisatyaho xahehare. Waiyexe maniya xamani moka akatya, xoana mawenekoare akatya xamani. Hoka xala atyo haokowita hoka hihi-naehare Cristo koamaniya tyaonitere hiraeharetita?

#### Xahekore Makani Niyahare

<sup>13</sup> Xasemehena kalikini xiso xiterenae: “Kalini xamani, makani xamani ite hako wenakalati wiyanehena hoka nali ite haterehokoane wisaona hoka xoalini hare waha hoka kalore wikaoloxa”. <sup>14</sup> Xoana hoka nikare xiraeta? Hiyaiya, maisa atyo makaniye xawenane kakoa xawaiyorexe. Morexalo kaotyaka hoka maiyarehititere

akereta atyo xawenane. <sup>15</sup> Exakere xiraeta hoka eheko-re: “Enore xaokalitaiya hoka waokitere xoalini hare wisoma”.

<sup>16</sup> Xakore hoka xahinityali xaokowiharetyoali taita. Hatyo atyo maisa waiyexe. <sup>17</sup> Hiyeta hoka xala xamani atyo waiyore, waiyexe tyomita hoka maisa tyomare hoka iniyalahare atyo tyomita.

### Kaxiyeharexenaē Xakaisaka

(1 Timóteo 6.9-10)

**5** Xasemehena, xiso kaoloxerenaē! Xakawihena, xitiyahena xaheta maniya iniyalahare xiyomokaka kakoa. <sup>2</sup> Xixiyeharenaē mololota, ximanaē waiyexenaē kirakaharesenaē sesekasekoaita. <sup>3</sup> Xixiyehare ouro prata harenaē kaijikali tyaonita. Hatyo harenaē ite halitinaē waiya hoka xawaiyekahalakaharehena enomanaha. Hoka motya ite irikati keraita ene xiháre akereeta tyaona. Exahe kafaka maniyehena enoheno xamokita xoloxa xixiyeharenaē harenaē.

<sup>4</sup> Exahe maisa xabakaita halitinaē imexehenere ximasenekoata. Hoka xasemehena enosexehareha! Enosexahareha xane kaoka Enore maxaexahityakahare niyaterexe nali. <sup>5</sup> Ali atyo kalini kehala xisaonita, xoalini hare xisoma xaokowihena, exahe maisa xoare niyahare hoka xisomita. Xikolotyā, waiye xisaonita, motya bowi okoi xaisakalati nali kakolatyaka hoka kaxaisakitere akere xisaonita. <sup>6</sup> Iniyalahare maomaneharenaē xaisaka xaokita, xaijita. Hoka hatyoha atyo maisa xoare hare tyomare xikakoa.

### Heko Xatyahati, Iraexatyati Xoaha

<sup>7</sup> Hiyeta hoka maika ximaholawakahareneta xatyaha Xekohaseti haikoahaneheta kijiya, nohinaeharenaē. Hiyaiya, masene waikate fehena masene hoka hatyo najikinita atyahita waha, maisa kaholawakere ekakoa. Wahenhena hoka enakaira ihatita. Mokosetaterē xowaka oneta ihiye, inityokatehena hoka onehitita kaisereharetā ihiye hoka. <sup>8</sup> Hoka xiso tehitiya ite nikareta xatyahahena ximaholawakahareneta. Awa atyo xamākohare. Hiyaiya, Xekohaseti ite haxeroreta haikoa-heta.

<sup>9</sup> Nohinaeharenaē, awa atyo xiraeharetyakakoa, waiya aliya hoka hatyo nahalakoa iniyalahare xiyomokaka aoka Enore. Hiyaiya, haliti watyalisasehare atyo okoihetehena.

<sup>10</sup> Xotyaxematya toahiyereharenaē iraiti xakaisaseharenaē. Enore xaokalita iraeta hoka makawatiharahitaha waha aka hoka heko tyaonahitere. Enawenaneha akereeta xisaona. <sup>11</sup> Hiyaiya, nikare makawatiharetarenaē heko tyaoniterenaē xaokaka, “Kaxiyani, waiye kaiserehare”, wita.

Kala koxaka xasema Jó tahi. Heko aiyasetyoa hawenane Enore koamaniya kakoa hoka wahenhena hoka Enore waiyexe wenati aoka enomana. Hiyaiya, Enore atyo kalore xawaiyetyati, xairakoaneharetatyati kakoare.

<sup>12</sup> Hoka exe kaiserehare, nohinaeharenaē: xoalini hare xiraehena halitinaē hiye hoka, “Exakere ite notyoma”, xehena hoka awa atyo Xekohaseti nexare xakaixaretya, exahe waikohekoa xoalini hare xakaixaretya xiraine katyakekotyaka maheta. Xexa taita, “Há”, xexa aliterexehena hoka, “Maisaiya”, maisa aliterexehena hoka maisa Enore iniyalahare mokita xiso maheta.

<sup>13</sup> Xala xamani xinekoni tyaonitere kirakoane tyaonita hoka iraexatyā. Xala xamani ihalahareta hoka xera xerati haihalaharene kakoa.

<sup>14</sup> Xala xamani hokakita hoka xakawisa tyakekohatiyenaē nityohalitiranaē hoka kolotenitiya iseri heno mokaha hoka iraexatyaha Enore hiye. <sup>15</sup> Exe iraexatyati tyakekoti kakoa nomakere atyo aiyatelikiheta hokakiti. Enore ite isa enomana iyateliti hoka kinatereheta. Maotyaneheta ite iniyalahare tyomehenere.

<sup>16</sup> Hiyeta hoka xityakeko kakoa, iniyalahare xisomitere xiyakai kakoa hoka xihinaeharenaē xaokaka xiraexatyā kaxaiyatelikisakeheta maheta. Haliti waiyexe niraexala atyo masakare kinatere.

<sup>17</sup> Hiyaiya, iraiti xakaisasehare Elias wiso akereeta hoka masakare hatyakekone kakoa iraexatyā hoka hana- terehokoane mokotexe maisa waikohekoa oneta.

<sup>18</sup> Hatyaoseta iraexahitiya haki hoka one. Hoka enakaira tyaohitiya enomanaha.

<sup>19</sup> Nohinaeharenaē, hatyaiya xinekonitare matyakekoneheta hoka hatyaiya atyakekonikihitiyene hoka maika exeharenaē xotyaxematya: <sup>20</sup> Xala xamaniya atyo waiya iniyalahare nomasehare hoka iniyalahare enómane nonitata waiyexe maniya mohetene hoka ekamane nonitata iyehetene. Nikare ite hoka kahare iniyalahare kamaotyanyityakeheta.

# 1 Pedro

<sup>1</sup> Natyo Pedro, Jesus Cristo niraene kakoare kalikini naxairatya exe babera Enore anerenae ana, xaorekoiterenae hawenakalaha nonitata Ponto, Galácia, Capadócia, Ásia, Bitínia, harenaikoa nali. <sup>2</sup> Cristo Nexe Enore atyo toahiyita haomanerenae aoka xiso hoka enomanerenae xisaona maheta. Haisekohare hiyeta atyo haliti waiyexeharexe moheta xiso. Xityakeko Jesus Cristo hoka itimalaxa kakoa iniyalahare xománe emaisaheta maheta. Maika Enore kahi-naetya xiso hoka waiye ximehexaiko xisaona.

## Xatyahati Nawenane

<sup>3</sup> Nika waexakeritya Enore, Wiyekohase Jesus Cristo Nexe. Kalore haxairakoaneharera wiso hiyeta isa womana wenati waitare Jesus Cristo kasehetehenere hiyeta. Hiyeta watyahita wenati matyotenehare xahita. <sup>4</sup> Hatyo hiyeta watyahita Enore mokitereharenae haomanere hotyalinae ana. Hatyoharenae mokita xomana enokoa. Hatyo nali atyo maisa kiraharexeha, maisaiya kaiyalaharahitaha, maisaiya kamawenekoaretyakahitaha.

<sup>5</sup> Exehare waiyexenae atyo xomanere, xityakekohenerere hiyeta, hoka Enore niyaterere atyo tyakaisahitene, hoka memere tyaonahitaha kahotikisakaha maheta xikaiyakehenere miyanitiye ferakene niyahare. <sup>6</sup> Hatyohare hiyeta xihalaharehena, kalikini xakore xiyamaikoharene xowaka, kahare xikahasakaharetyaka hoka howitihare xawenane tyaonitere hiyeta hoka.

<sup>7</sup> Exe hasakaharetyatinae atyo hotikisa maheta aliterexe xityakekone. Hiyaiya, ouro kamawenekoaretyakere kakoita atyo irikati hiye kahasakakita. Nikare exe xityakekone, ouro xahexe nawaiye hoka kahasakaharetyakita, heko kinatere tyaona maheta. Nikare ite hoka xikatyakekotyaka hoka xikaxaiminisaka, xikaxaexakeretyaka Jesus Cristo kahotikisakehetehenere xowaka. <sup>8</sup> Xawaiyetitene, maisa xakore xiyaiyarene hoka. Xityakekotene, maisa xakore kalikini xiyaiyarene hoka. Nikare xihalahareta kalorexe ihalahaliti waiyexe kakoa. Maisaiya iraitinae awaiyekahalakatitene. <sup>9</sup> Exe ihalahaliti kakoare atyo xiso. Xityakekohenerere hiyeta atyo kaxekakita xomana. Xityakekone hiyeta waiyexe maniya xikaxomokakeheta xisekohare kakoita.

<sup>10</sup> Hatyo iyatiheta tahi atyo iraiti xakaisaseharenai axaha, waiye tawaha hakakahareneha kakoa. Hoka xakaiha iyatiheta Enore isehenerehare xomana tahi.

<sup>11</sup> Hatyo harenae ferakene kaotyakene tahi semaha

aokowiha, aliyakere xamaniya tyohetehena hoka. Cristo Nisekohare tyaonitere ekakoaha hotikisa enomanaha hatyo ferakene, Cristo kirakoane kaxomokahenerere hoka jikiniti kaxaeroretyakehenere tahi xakaihenahere xowaka.

<sup>12</sup> Kalikini xasemiterehare tahi iraiti xakaisaseharenai hiye Enore xakai. Enore hotikisene enomana hoka maisa enomanereha xini ehateneha. Waiye xisaona maheta atyo iraiti xakaisaseharenae xakai hatyo tahi. Enokoatere Isekohaliti Waiyexe niyaterere hiyeta xakaihaha Iraiti Waiyexe xihiyere. Exahe anjonai waiyekehalka sema aokowi ahitaha hatyoharenae.

## Enore Kawisa Wiso Wenati Makaolatyoanehare Ana

<sup>13</sup> Hiyeta hoka ximemere xisaohena xománe kakoa. Maika xirihare, xatyahahena taita wenati waiyexe xahita, Enore waiyexe isehenere xomana Jesus Cristo haikoahetehenere xowaka niyahare xahita. <sup>14</sup> Enore aokitere akereta xisaona, awa atyo hetati ximawaiyorene taterehare xowaka xawaiyititereharenae ewaxirahare xema xisaonitere akereta xisaona. <sup>15</sup> Maika waiye kaisere xisaona, tyotya xoalini hare xisomehena hoka. Enore haomanere aohenere xiso akereta.

<sup>16</sup> Xiyaiya, Iraiti Waiyexe nexa: “Maika haliti waiyexe xisaona. Hiyaiya, Natyo atyo nawaiye hoka hatyo hiyeta”.

<sup>17</sup> Xiraexahena Enore hiye hoka Xexe xaokene. Hatyo atyo hakakoa halitinae mokita, tyomehenahere akere-ta atyo mokahitene. Hatyo hiyeta maika waiye xaiminisene, ali waikohekoa xisaonitaterere xowaka.

## Waiyexe Maniya Nawenatyakeheta

(Hebreus 10.10-14; 1 Pedro 1.18-21; 1 João 1.8-9; 2.1-2; 5.12)

<sup>18</sup> Hiyaiya, waiyekehalakita xomana, bakatya hoka iyehetehenere xiso, xahetakomaniyereharenae nómane iniyalahare aho xisaonitere nonitata. Hatyo bakahenerere xaimane atyo maisa etakehare tyotitere hare xaimane, ouro, prata hare akereta xini.

<sup>19</sup> Xikaiyakeheta atyo Cristo timalaxa waiyexe kakoa. Hatyo atyo kalanero mokose iniyalahare maomanehare, makawe xomokoanehare.

<sup>20</sup> Enore atyo aokene haomana, waikohe maomakaharene nahitita. Hoka kalikini miyanitiye xowakehena atyo hoka kaotyaka, waiye xisaona maheta. <sup>21</sup> Ihiyeta atyo xityakekota Enore, ekasekihetehehenerene Xekohaseti mohenerene. Hatyo hiyeta xityakekone, xiyatyahane harenae Enore nali kinatere tyaonita.

<sup>22</sup> Kalikini tyare atyo Iraitu Aliterexe xityakekone hiyeta iyoma fira xisaonita, exahe xawaiyetita xihinaeharenae tyakekohatiyena hoka maika xawaiyetyakakoa kaiserehare.

<sup>23</sup> Xiyaiya, xiso atyo Enore niraene aliterexe matyotenehare hiyeta makamanehare ityaninae xisaohitiya hoka maisa atyo wainiterehare ityaninae xini xiso.

### Exe Iraitu Atyo Maisa Kamiyanexe

(2 Timóteo 3.14-17; 2 Pedro 1.18-21)

<sup>24</sup> Hiyaiya, Iraitu Waiyexe nehenere akereta: “Tyotya halitinae atyo ime masekoare akereta, enawenaneha atyo ime niye akereta. Ime wainihena hoka iniyenaiha ixoita”.

<sup>25</sup> Xakore hoka Enore niraene atyo heko tyaonita, maisa kamiyanexe. Exe iraitu atyo Iraitu Waiyexe hiyeta koxaka kaxakaisaka xihye.

### Sehali Matyotenehare, Haliti Hotyali Waiyexe.

**2** Hiyeta hoka xahalakihena tyotya iniyalahare, maoseratyati, teraharetyoati, okoawahaliti, haiyaharenae niraeharetyaka emakaneha. <sup>2</sup> Maika xoima waitare nawenanena akereta xaoka mene xomana totonexati waiyexe. (Enore xaotyakira xaokaka “Totonexati”, nita.) Hoka xiserene hoka xikekoare, waiyexe maniya xikaxomokakeheta.

<sup>3</sup> Hiyaiya, Xekohaseti nawaiyexeharene atyo waiyekehalakita atyo xomana, Iraitu Waiyexe iratere akereta.

<sup>4</sup> Maika Xekohaseti xema xisaona. Hatyo atyo sehali waiyexe halitinae maxawaiyerehenere nikaretere akere. Halitinae maisa awaiyetyarene xakore hoka Enore atyo masakare waiyexe aokene. <sup>5</sup> Xiso tehitiya sehali waiyexe akereta hoka kotare Enore moka xiso hahana hiye hoka ewakanehare sacerdotena xisaona. Hoka Jesus Cristo hiyeta xoalini hare waiyexe xisoma Enore aokitereharenae.

<sup>6</sup> Hiyaiya, Iraitu Waiyexe nanekoa nexa:

“Sehali kaloxaimanexe atyo naoka nomani hoka kalikini atyo ite namokene hati tonone hiye wenakalati Sião nali hati kalorexe niyahare. Xala xamani atyo ite tyakekone hoka maisa kaxexamaikohalinikisakita”. (“Sehali kaloxaimanexe”, nita Jesus Cristo xaokaka).

<sup>7</sup> Exe sehali atyo kaloxaimane xiso tyakekoterehena ana. Hoka matyakekoneharenae ana atyo:

“Hati nomaseharenae sehali maxawaiyerehenere atyo kaxomokaka hati tonone hiye”.

<sup>8</sup> Exakere tehitiya haiya akiti Iraitu Waiyexe nanekoa nexa:

“Hatyo sehali ite halitinae jiyakoatya hoka hisehityoaha. Sehali ite ahisehityoakisahene”.

Hisehityoaha Iraitu Waiyexe matyakekohenehare hiyeta. Exe ene atyo Enore xaokalita tyaona enomanaha.

<sup>9</sup> Hoka xiso atyo exaokowisakahare, sacerdotehatene xisoma maheta Xekohaseti ana. Waiyexehotyali atyo xiso, Enore kaxaikone hotyali terota atyo xiso. Xikaxaokaka Enore waiyexe tyomenehenere xiyakai

maheta, makaliroti konita kawisa xiso haxaokanala waiyexe ana. <sup>10</sup> Hetati ene maisa Enore anerenae xiso hoka kalikini atyo enomanerenae xisaona. Hetati ene maisa waiyekehalakere xomana exairakoaneharera, hoka kalikini atyo waiyekehalaka xomana exairakoaneharera, koxaka airakoaneharetya xiso hoka.

### Enore Wakaneharenae

<sup>11</sup> Noxiyakawali nohinaeharenae, nira xikakoa: Xiso atyo hahotyaliharenae hawaikoherata xane hoka hákoa tyaonitere akereta. Maika awa kaxawaiyetyakitereharenae iniyalahare xema xisaonehena. Hatyoharenae aiyalaharetita wisekohare. <sup>12</sup> Maika xiri-hare xawenane kakoa hoka waiye maniya xisaona matyakekoneharenae koni. Hoka exahe iniyalahare nomaseharenae xakore ite aokaha xiso hoka xománe-nae waiyexe ite waiyekehalakeheta enomanaha. Nikare ite hoka aexakerityaha Enore, Cristo tyohete-henere xowaka.

<sup>13</sup> Xekohaseti hiyeta maika xityakeko tyotya xekohaseti halitinae. Maika Xekohaseti kalorexe Roma nali tyaonitere masakare xaiminisa. <sup>14</sup> Xaiminisa tehitiya exomokala xekohasetinae. Hatyona atyo exaokala xema iniyalahare nomaseharenae iniyalahare mokita, hoka aexakerityahitaha waiye tyomiterena. <sup>15</sup> Hiyaiya, Enore atyo kasani waiyexe taita xisoma aokita hoka ahinitaliyena, maotikonexena niraesekoala xamiyatya maheta. <sup>16</sup> Maika mawakaharenehare tyaonitere akereta xisaona. Xakore hoka awa atyo mawakaharenehare xawenane hiyeta iniyalahare xateroakisa. Maika Enore wakaneharenae taita xisaona.

<sup>17</sup> Xaiminisa tyotya halitinae, xawaiyetya xihinaeharenae tyakekohatiyena, xaiminisa Enore. Exahe xaiminisa Xekohaseti Roma nali tyaonitere.

### Cristo Iniyalahare Xomokaka Hotikisaka

<sup>18</sup> Xiso wakaharenae, maika xityakeko, xaiminisa harenae xiyekohasena. Awa atyo waiyexeharexe taita xaiminisa. Maika exahe xalijiniharexe hoka nikareta tehitiya xaiminisa. <sup>19</sup> Xikinaterere heko maxemehare iniyalahare xikaxomokakiterehare kakoa hoka Enore waiye moka xiso. Exaokalita nikare xisaonita. <sup>20</sup> Hoka iniyalahareya xisomita hoka hatyo nahalako iniyalahare xikaxomokaka hoka aliyakereya Enore ihalaharehena xikakoa, ximehexaikohare xisaonita iniyalahare xikaxomokakitereharenae kakoa? Hoka iniyalahareya xikaxomokaka waiyexe xománe hiyeta, ximehexaikoharene kakoa hoka Enoreya waiye moka xiso.

<sup>21</sup> Hiyaiya, hatyo maheta atyo aoka xiso haomana.

### Cristo Atyo Waini Womana

(Gálatas 1.4; Tito 2.11-14; Apocalipse 1.5; 5.9-11; 7.14)

Xiyaiya, Cristo tehitiya iniyalahare kaxomokaka xihiyeta hoka kaxaisaka hoka kasani tyaonitere akereta xisaona maheta. <sup>22</sup> Maisa xoana xowaka hekoti iniyalahare tyomita, exahe hoka maisa xala hare haki hekoti emaoserala semita. <sup>23</sup> Kairawaiyaka hoka maisa

hairawane kakoa ekoaxaita. Kaxaisakehenere xowaka maisa xala hare xaisaka aokita. Enore xahita taita atyaha, ehokore taita tyomitere xahita.

<sup>24</sup> Cristo terota haháre hiye kolatya iniyalahare wománe atyalihose xaimaholatyaka hiye kaberekotyakehenere xowaka. Hoka wiwaini iniyalahare wománe ana maheta hoka wikaseheta wenati waiyexe ana maheta. Kawe kaxomokakehenere hiyeta atyo xikinatereheta.

<sup>25</sup> Kalaneronae hehanitere ahotyaho nonitata akereta ene xisaonita, xakore hoka kalikini atyo xikaiyakeheta hoka Xikaxaikotyasehare xema xisaoheta, exahe xisekohare Kaxaikotyasehare xema hoka.

#### Kaiyanityorenae, Kaiyanenehenolonae Nawenane (Efésios 5.22-33; Colossenses 3.18-19; 1 Timóteo 3.11-12)

**3** Nikare tehitiya xiso kaiyaneneronae, maika xaiminisa xexanenenae hoka, exahe maisa haiyaharenae Enore niraene xema tyaohehene hoka xawenane hiyeta tyakekoha. Maisaiya xoare hekoti xita ihiyeha. <sup>2</sup> Hiyaiya, xawenane waiyexe, aiminisoawitere hiyeta atyo ite waiyaha hoka tyakekohenaha. <sup>3</sup> Awa atyo xawaiyehalo xaokowihena hoka xamokahalotyao xiyehaliti waiyexe kakoa, exahe hoka xatilikoa mene, exahe imiti waiyexe, karore ako hoka xisoa. <sup>4</sup> Xakore hoka maika xawaiyehalone ximahiyase, xiyahékola xoaha hiye tyaona. Hiyaiya, hatyo atyo waiyehaloti waiyexe. Ximehexaikohalo, xawaiyexehalo hare hoka hatyo atyo waiye kaisere, maisa atyo kamiyanexe. Hatyo hare atyo Enore masakare awaiyetita.

<sup>5</sup> Hiyaiya, nikare atyo ohiro waiyexehalolo toahiyerehalonae mokahalotyaoaha hoka atyahahitaha Enore xahita. Exahe haiyanenenaiha hoka aiminisahitaha.

<sup>6</sup> Sara atyo nikare tyaona. Aiminisa Abraão, haxekohase aokitene. Hoka kalikini atyo ite ityaninae xisaona, waiyexe xema xisaona, exahe maisa xoare hare ximairita hoka.

<sup>7</sup> Xiso exanenenae tehitiya hoka nikareta waiye xamoka xexanityonae. Maika waiyekehalaka xomana emaxaniyatoloneha hoka hatyo hiyeta waiye xamokahene xiyaiminira kakoa. Hiyaiya, Enore wenati ijiterehareta xomana hareta atyoite kaxekaka enomanaha. Maika nikare xisaona hoka maisa xoare hare ahowitzijita xiraexala.

#### Waiyexe Nomaka Hiyeta Kirakoanexe Wenati

<sup>8</sup> Maika nikare xityoty xisaona, hakakoa harenae xahekoty. Xawaiyetyakakoa, xairakoaneharetya kakoa harenae. <sup>9</sup> Awa atyo iniyalahare kakoa iniyalahare xemaisatya, irawaniti kakoa irawaniti xemaisatya. Xakore hoka maika iniyalahare mohenaha xiso hoka wenati waiyexe xaoka enomanaha. Xiyaiya, Enore haomanere aohenere xiso xowaka atyo xalini hare waiyexe isa xomana aokowi.

<sup>10</sup> Hiyaiya, exakere nexa Iraití Waiyexe:

“Xala xamani atyo ihalahaliti, wenati waiyexe aokita haomana hoka awa atyo iniyalahare irae. Hamaoserala hoka halakisa.

<sup>11</sup> Hahalakisa iniyalahare hoka waiyexe taita hisoma. Exahe hatawa wenati waiyexe hoka hatyo xema taita hisaona.

<sup>12</sup> Hiyaiya, Xekohaseti atyo waiye waiyita haliti waiyexena. Iniraexala semeta minita, hoka kahalakoahareta atyo iniyalahare nomaseharenae kakoa”.

<sup>13</sup> Aliterexeya waiyexe xisoma xaokowita hoka xalैया iniyalahare mohena xiso? <sup>14</sup> Kaxiyani, waiye kaiserehareya iniyalahare xikaxomokaka waiyexe xisomitere hiyeta hoka. Awa atyo xala hare ximaira, awa atyo ximawaiyehare hekoti. <sup>15</sup> Maika ximahiyase hiye xiyaiminira Cristo tyaona hoka Xiyekohase xaokene. Ximemere xisaona xiyekoaxala niyahare, hatya axe-hena xiso xityakekone tahi xawaiyekahalakatya maheta hoka.

<sup>16</sup> Maika nikare xisaona waiyexe xityakoiyahare kakoa, xiyaiminira xoaha kakoa. Nikare ite hoka xikairawaiyakehena, iniyalahare nomaseharenae hare aohenaha xiso, waiyexe maniya xisaonitere Cristo koamaniya hiyeta hoka haihareha. <sup>17</sup> Hiyaiya, waiye kaiserehareya atyo waiyexe hiyeta iniyalahare xikaxomokaka, Enore xaokalitaiya hoka. Iniyalahare xisomitere hiyeta iniyalahare xikaxomokakitere xáhehare nawaiye atyo.

<sup>18</sup> Hiyaiya, Cristo terota atyo waini xomana. Hakirore atyo tyoty halitinae ana waini, iniyalahare enómaneha hiyeta. Hatya haliti waiyexe atyo waini iniyalahare nomaseharenae ana, Enore koamaniya moheta wiso maheta. Eháre atyo waini hoka kaxekasekisakeheta atyo inisekohare.

<sup>19</sup> Hoka hatyo inisekohare xane Iraití xakai isekohaliti eberexotyakaharenae hiye. <sup>20</sup> Hatyo isekohalitinae atyo Enore matyakekonehenerena nisekohare. Etake hamehexaikoharene kakoa atyahahenere, Noé tyomehenere kanowa kalorexexowaka. Haiyanae taita kanowa kalorexexako xane isoaha, ehohisakoaneha atyo 8-hareha hoka maisa waini ahitaha one morehenere xowaka.

<sup>21</sup> Hatyo one atyo batixatyati aimenekoita, kalikini waiye maniya mohititere xiso. Hatyo batixatyati atyo maisa haréti tiheheta maheta xini, hoka Enore anere wenati atyo tyakoiyahaliti waiyexeta tyoitere atyo. Exe waiyexe wenati atyo Jesus Cristo kasehetehenere hiyeta kaotyaka. <sup>22</sup> Enokoa atyo xane hoka kalikini Enore fihini maniya tyaonita hoka kaxaikota tyoty anjona, kalorexena enokoa nali tyaonitere kalorexena hoka.

#### Wenatinae Exawareharyakehetanae

**4** Hiyeta hoka Cristo kirakoane kaxomokakehenere akereta ximemere tehitiya xisaona hoka kirakoane xikaxomokaka kirakoane kaxomokakehenere akereta. Hiyaiya, hatyo kirakoane kaxomokakehenere halakisa iniyalahare. <sup>2</sup> Hatyo hiyeta exaotetaira kalikini ali waikohekoa waiye xisaohena, Enore aokitere akere-ta, hoka awa atyo halitinae xahekola iniyalahare kaxawaiyityakitere xema xisaona. <sup>3</sup> Hiyaiya, toahiya ene atyo matyakekoneharenae awaiyetiterehare xema

xisaonita hoka xisaonehekoaitata. Hatyo xowaka atyo iniyalahare kaxawaiyakitere xema xisaonita hoka xiháre aokitereharenai xisomita, xiserita kawexere, xahikita, kehalahaliti iniyalahare xema xisaonita, exahe enore metalahare xema xisaonita hoka kalore iniyalahare xisomita.

<sup>4</sup> Hoka kalikini atyo matyakekoneharenae hakaharetyoita xawenane kakoa hoka kirawanahitaha xiso, maisa enekoniha xisaohetere hatyo wenati ewaxirahare, exahe ehatyahalikisare xema hoka.

<sup>5</sup> Xakore hoka xanehaite Enore nali hoka axahene. Memere atyo tyaonita, axa maheta kasetaterena, kamatinae xoaha.

<sup>6</sup> Hatyo niyahare atyo Iraitai Waiyexe kaxakaisaka tehitia kamatinae hiye kaxaxalikisaka maheta, tyotya halitinae kaseterena akereta hoka haisekohare kakoa tyaonaha maheta Enore tyaonitere akereta. Ali waikohekoa tyotya halitinae kaxaxalisakitere akereta.

#### Maika Xikaxaikoawi, Xirihare Xisaona

(1 Tessalonicenses 5.14-18; Tito 3.1-2; Tiago 1.19-22; 3.17-18)

<sup>7</sup> Okoi tyotya xoalini hare miyanaose hikoahena. Hiyeta hoka maika xikaxaikoawi, xirihare xisaona waiye xiraexatya maheta. <sup>8</sup> Maika tyotya xoalini hare xahehare xawaiyetyakakoahena kaiserehare. Hiyaiya, xawaiyetyati atyo ateroakihitita kahare iniyalahare. <sup>9</sup> Maika xihanako waiye xamoka halitinae, ximairaehekoalahareta. <sup>10</sup> Maika waiye xikaxaiko hawarehare xakini xawaiyorene Enore isehenere xomana hoka ihiyeta xakahinaetyakakoa kaisere. Hoka maika xawaiyorene kakoa xakahinaetya haiyanae, waiye tyaonaha maheta. <sup>11</sup> Xala xamani xakaita hoka xakai Enore niraene. Xala xamani hakita haiyanai ana hoka haka Enore iyateliti ijitere enomana kakoa. Maika nikare xisaohena hoka tyotya xoalini hare hiye Enore kaxaexakerityaka Jesus Cristo hiyeta.

Maika Cristo kakoa kaihalaharetyaka, iyateliti harenae kakoare tyaona mene matyotenehare. Eko xoaha.

#### Kirakoanexe Tyakekohatiye Nawenane

<sup>12</sup> Noxiyakawali, nohinaeharenae, awa atyo ximawaiyehare xihacakaharetyaka howitiharexe xahalakoaitereharenae kakoa. Hiyaiya, hatyohare kaotyakitere xomana atyo maisa makaotyakeneterehare haiyaharenae ana xini. <sup>13</sup> Hoka maika xihalahare. Hiyaiya, Cristo iniyalahare kaxomokakitere akereta xikaxomokakita. Hoka tyohetehenere kalorexe tyaona maheta xowaka masakare xihalahare ekakoa. <sup>14</sup> Waiye kaisere xikairawaiyakehena Cristo koamaniya xisaonitere hiyeta. Hiyaiya, hatyohare atyo hotikijita xomana Enore Nisekohare waiyexe tyohenerexomana.

<sup>15</sup> Hoka awa atyo iniyalahare xisomehena. Xala xamani aisarexe, kaiwarexe, xalijiniharexe, hatya nawenane watyaliterehare harenae xinekoni hoka kotare iniyalahare kaxomokakita hatyo nahalakoa. <sup>16</sup> Hoka Cristo koamaniya xisaonitere hiyetaiwa nikare iniyalahare xikaxomokakita hoka awa atyo xihaihare. Hoka

maika xihalahare Enore kakoa, hiyaiya, Cristo nexare kakoare atyo xiso.

<sup>17</sup> Hiyaiya, xaxalisati ferakene aose xane hikoa hoka Enore anerenae hotyali hotohare ite kaxaxakehena. Hoka hatyo xaxati atyo ite wikakoa hotohare hoka xoana ite tyaoahena Enore niraene waiyexe matyakekonehenerena? <sup>18</sup> Hiyaiya, Iraitai Waiyexe nexa: "Waiyexeharexenaeya atyo ite howitihare kaiyakeheta hoka xoana ite tyaoahena matyakekoneharenae, iniyalahare nomaseharenae hoka?"

<sup>19</sup> Hatyo hiyeta iniyalahare kaxomokakiterena Enore xaokalita, maika hawenaneha waiyexe maniya moka, exahe hoka tyakekoha kaiserehare tyotya xoalini hare tyomehenere. Hatyo atyo maisa maotyanehe hakaxaikone hotyali.

#### Enore Anerenae

<sup>5</sup> Natyo tehitia atyo tyakekohatiyena kaxaikotyasehare hoka kalikini naotyakijita haiyaharenae tyakekohatiyena kaxaikotyaseharenae. Hiyaiya, Cristo atyo iniyalahare kaxomokakita nohaotita hoka haxowaka ite haikoahetehena Xekohaseti tyaoahena maheta hoka enali ite notyaona. <sup>2</sup> Naotyakijita, kasani waiye xamoka halitinae Enore isehenerena xomana naokita. Maika hatyoharenae xisoma xihalaharene kakoa, aokitere akereta. Awa atyo ximaihalaharenene kakoa hatyo harenae xisoma. Awa atyo olo waiyakahare taita xahaka. Maika xakahinaetya maheta terota xahaka. <sup>3</sup> Awa atyo kaxekakehenerena xomana xekohase xisaona xaokowi. Maika xahotikihena xawaiyexeharene enomanaha tyaonaha maheta xisaonitere akereta. <sup>4</sup> Nikareya hoka Kaxaikotyatiye kaiserehare tyohetehenere xowaka ite seriti hoko waiyexe isa xomana. Maisaiya atyo ewerokene tyotita.

#### Maika Ximaxahenerahare Xisaona

(Filipenses 2.3-9; Tiago 4.6-10)

<sup>5</sup> Exahe xiso, xoimahalitinae harenae, hoka maika xityakeko inityohalitinae niraene. Maika xityotya xakahinaetya kakoa ximaxahenerahareneta. Hiyaiya, Iraitai Waiyexe nanekoa atyo nexa: "Enore atyo maisa awaiyetyare ahinityarexena hoka kahinaetita atyo maxaheneraharenae".

<sup>6</sup> Hiyeta hoka ximaxahenerahare xisaona Enore kinaterexe haotita hoka aeroritya xiso, enaosehena hoka. <sup>7</sup> Ximawaiyeharene tyotya Enore ana xahalakisa. Hiyaiya, hatyo atyo kaxaikota xiso.

<sup>8</sup> Maika xirihare, maika xikaxaikoawi. Hiyaiya, Tihanare atyo tonahokoita xiso, leão omiritere akereta, tawita hatawane xahita, nisene maheta. <sup>9</sup> Hekoira xityakekone kakoa xisaona, xijiyahaotyaira Tihanare. Hiyaiya, waiyehahalakita atyo xomana hakakoare waikohekoa xiso akereta kirakoane tyaonitere xihinaeharenai tyakekohatiyenai tahi. <sup>10</sup> Xakore hoka iniyalahare xikaxomokakehenere inira najikinita ite Enore kalorexe xawaiyetyati kakoare kahinaetya, aiyatelikisa harenae xiso. Hatyo atyo aoka xiso haomana hoka wenati matyotenehare maniya moka xiso Cristo hiyeta.



<sup>11</sup> Maika enomanere iyateliti matyotenehare tyaona, eko xoaha.

**Tyawaxati Miyanitiyenae**

<sup>12</sup> Naxairaita exe kiranexe babera Silas kahinaera kakoa. Nomani atyo exe wihinaehare masakare tyakekohatiye. Naihalahalinikisa xiso naokowi nawe-

nani hiyeta xoaha. Exehare atyo Enore nawaiyexehare aliterexe. Maika xikinatere xisaona Enore koamaniya.

<sup>13</sup> Tyakekohatiyenae Babilônia nali tyaoniterenae, Enore haomana aohenerenae, haxakaisakeheta aoka. Nityani Marcos haxakaisaka aoka.

<sup>14</sup> Maika xikatyawaxa kakoa hoka xasohitanakolisa kakoa. Maika Cristo koamaniya nawenatyaseharenae waiye mehaxaikohare tyaonaha.

## 2 Pedro

**1** Natyo Simão Pedro atyo Jesus Cristo wakanehare, exahe iniraene kakoare hoka naxairatya exe baberane xiso waiye xityakekohenerenai wiso akereta Enore nawaiyexehare, Wiyasehareheta Jesus Cristo xoaha hiyeta.

<sup>2</sup> Maika xawenane waiyexe, ximehexaikoharene harenai aerorityoa mene Enore, Wiyekohase Jesus tahi waiyekehalakitere xomana hiyeta.

### Enore Kawisa Hoka Aokita Haomana

<sup>3</sup> Enore haiyaterere hiyeta tyotya waokitereharenae ijita womana, aokitere akereta wisaona maheta. Waiyekehalakitere womana Jesus Cristo kawihenere wiso hoka waiyexe maniya, enawaiyexehare xoaha akereeta wisaona aohenere hiyeta.

<sup>4</sup> Nikare isa womana kahare iyateliti harenae waiyexe isa aokowitereharenae waiye wisaona maheta. Nikare tyoma hoka hatyoharenae hiyeta maisa iniyalahare mawenekoaretyare kaxawaiyityakitere xema wisaona maheta. Hoka hatyo akereta wisaonita maheta.

<sup>5</sup> Hatyo hiyeta xaiyateretyoahena hoka xityakekone kakoa xahohisakoatya xawaiyetyati. Hoka xawaiyetyati hiyeta xahohisakoatya waiyoliniti. <sup>6</sup> Exahe waiyoliniti kakoa xawaiyehotyalikisa kaxaikoawiti. Kaxaikoawiti kakoa xawaiyehotyalikisa mamaxaharenehali. Mamaxaharenehali kakoa xawaiyehotyalikisa waiyexehali. <sup>7</sup> Exahe waiyexehali kakoa xawaiyehotyalikisa hinaehali tyakekohatiye, exahe hinaehali tyakekohatiye kakoa xawaiyehotyalikisa xawaiyetyati.

<sup>8</sup> Exeharenae atyo xaokita xomana. Tyotya exeharenaiya xema xisaona hoka ekakoita kahare waiyexeya xisoma xawenane Jesus Cristo koamaniya hiyeta. <sup>9</sup> Hoka xala xamaniya atyo maisa exeharenae kakoare xini hoka hatya maxosehare akere atyo, xoana hatya ini-nae waiyakaitere akere atyo, hoka maotyaneheta háomane iniyalahare kaxemaisatyakehetehenere.

<sup>10</sup> Hatyo hiyeta, nohinaeharenae, waiye maniya taita xisaona, Enore kawihenere, aohenere xiso koamaniya. Nikareya xisaona hoka maisaiya xoana hekota iniyalahare xisomehitita. <sup>11</sup> Nikare ite hoka maisa ximakao-keneta Wiyekohase, Wiyasehareheta Jesus Cristo nawenakala matyotenehare nali.

<sup>12</sup> Hiyeta hoka nirae menite xikakoa, xotya maheta exeharenai. Koxaka xakore xawaiyore hatyo akiti kakoa, xikinaterere xakore atyo xisaonita exema hoka.

<sup>13</sup> Exakere noxahekoli: hekota nokasetata hoka ehokoretaiya exeharenai kakoa naxotyankisa xiso. <sup>14</sup> Hiyaiya, waiyekehalakita atyo nomani nohalakiri exe noháre

wainiterehare, Wiyekohase Jesus Cristo irahenere nohiye akereta. <sup>15</sup> Hatyo hiyeta ite xoalini hare notyoma hoka nowainihenere najikinita xotyaxematya exeharenae maheta.

### Cristo Nawenane Kalorexe Waiyasehare Tahi

(Mateus 17.1-8; Marcos 9.2-13; Lucas 9.28-36)

<sup>16</sup> Maisa xahekore xini wiyakaihenere xihye Wiyekohase Jesus Cristo tyoaneneheta haiyaterere kakoa tahi xowaka. Wiyaiya atyo enerore wiyosenae kakoita.

<sup>17</sup> Enexe Enore aerorehenerene xowaka nali wisaonita. Iraitu enokoatere Enore nalitare nexa irahenere wase-ma: "Exe atyo Nityani noxiyakawali, kalore aihalahalinikijita natyo". <sup>18</sup> Wiso terota wasema exe Iraitu Waiyexe enokoatere, Xekohaseti Jesus kakoa tyairi waiyexe heno wisaonitere xowaka.

### Exe Baberane Atyo Enore Niraene

(2 Timóteo 3.14-17; 1 Pedro 1.24-25)

<sup>19</sup> Hatyo hiyeta wityakeko kaiserehare iraitu xakaisaseharenae xakaihenere. Waiye xasema exe iraitu. Hiyaiya, motya atyo xaokanatyakalati makaliro koni aokanaitere akereta hoka ekakoita ite ferakoahena hoka xorese ferakoa maniyehenere aokanaitere xomana akereta atyoite aokanaty ximahiyase hiye. <sup>20</sup> Maika tyotya xoalini hare nonitata exehare xotya: Maisaiya atyo xala hare Iraitu Waiyexe haomanita awaiyekehalakaita. <sup>21</sup> Hiyaiya, maisa atyo Iraitu Waiyexe halitinae xaokala xema xini kaotyaka. Xakore hoka halitinae xakaihakahenere Enore niraene xowaka atyo Isekohaliti Waiyexe kahinaetyahene hoka Enore nalitare iraitu tyoitere xakaihaha.

### Xaotyakisatiyena Metalaharenae Tyakekohatiyena Koni

(Colossenses 4.2-8; 1 Timóteo 1.7-10; 4.1-3; Judas 4-19)

**2** Toahiya iraitu xakaisaseharenae metalahare kaotyaka halitinae koni. Nikare tehitiya ite kaotyaka xinekoni xaotyakisatiye metalaharenae. Aotyakisaha ite xiso hawareharexe xaotyakiyaho, mawenekoaretyaraho, maoserare kakoa. Maisaite aokaha xaotyakisatiye haiyaseharenahitaha hiye, hoka hatyohare hiyeta ite haxerore kamawenekoaretyakaha. <sup>2</sup> Kahare haliti ite iniyalahare enómaneha xema tyaona. Hoka hatyo halitinae hiyeta ite wenatyaho waiyexe kairaeharetyaka kahare. <sup>3</sup> Hoka olo haxawaiyeraha hiyeta ite hatyo iraitu xakaisaseharenae metalaharenae maoserahenaha xiso

kaoloxere tyaonaha maheta xihenota. Xakaihaka-henaha xihye haxahekolitaha. Xakore hoka toahiyita atyo iniyalahare maniya exomokasehareha wahakoita enomanaha, emawenkoaretyaseha maisa nemakare.

<sup>4</sup> Hiyaiya, Enore atyo maisa halakijita anjona iniyalahare tyomehenerena. Xawatyahene toloko hatekoakore ako hoka kamatiherahi kakoa olatyoare halakisahene makaliroti koni Xaxalisati Ferakene kijiya niyahare.

<sup>5</sup> Enore maisa halakijita toahiyereharenae hoka one kaloxere axikatya iniyalahare nomaseharenae ana hoka waini tyotyaha. Noé taita atyo iyeheta, 7-hare ihinaeharenae kakoa. Noé atyo wenati waiyexe xakaihenerena.

<sup>6</sup> Nikare Enore irikati kakoa mawenkoaretya wena-kalatinæ Sodoma, Gomorra xoaha. Hoka hatyo atyo hotikijita iniyalahare nomaseharenae xomokaka naheta maniya. <sup>7</sup> Hoka iyeheta LÓ enalita, haliti waiyexe hoka kalore amaikohareta hatyo halitinae nawenane iniyalahare kakoa. <sup>8</sup> Hatyo haliti waiyexe tyaonitere enekoniha amaikohareta, waiyehena, semehena xoaha hatyo halitinae nómane iniyalahare ferakiti nihatyaka hoka.

<sup>9</sup> Nikare Enore waiyita haliti waiyexeharexena, hoka waiyoreta atyo waiye maniya haxomokarehenahitene kakoa ehasakaharetyakaha nonitata. Nikare tehitiya waiyore mokita iniyalahare nomaseharenae iniyalahare kaxomokaka maheta, Xaxalisati Ferakene niyahare maheta. <sup>10</sup> Enore ite masakare iniyalahare moka ewaxirahare kaxawaiyityakitere xema tyaonitereharenae, exahe hoka xekohasetinae nerore maxaiminiriterena.

Exe xaotyakisatiyena metalaharenae tyakekohatiyena koni tyaonitereharenae maisa semaxematyatiyeha, ahinityaliha, maisa ini hekoti aiminisareha anjona. Iniyalahare iraetaha exaokakaha. <sup>11</sup> Hiyaiya, anjona xakore exe xaotyakisatiye metalaharenae xahare niyaterena hoka maisa iraharetyarahene Xekohaseti nahalakoa. <sup>12</sup> Hoka exe halitinae atyo hamaxahekolahareneta tyomahitaha iniyalahare. Kirakaharenae tyaona hoka katawakaha hoka kaxaisakitere akereeta atyo. Irahekoatyahitataha atyo xalini hare mawaiyekehalakitere hare enomanaha tahi. Hatyo hiyeta ite kamawenkoaretyakaha kirakaharenae akereeta. <sup>13</sup> Iniyalahare ite kaxomokakaha, haiyanae emakawatihalikihenahere hiyeta. Hiyaiya, ferakoita atyo tyomahitaha iniyalahare ahekotyahiterehareha. Ahohisakoatyohenaha xikakoa kanakairaha maheta hoka ehahalikisareha, akomaniyatyakisareha, nikare atyo tyaonahitaha hamaoseralaha kakoa. <sup>14</sup> Ohiro waiyehenaha hoka maisa iniyalahare hamaxahekolahareneta hoka waiyareha. Maisa maxaharexeha iniyalahare háomanaha. Maoseratyahitaha ininae tyakekohenerena. Olo haomanaha aokahitere tahi kahare ahekotyahitaha. Hoka Enore ite iniyalahare mokahene. <sup>15</sup> Hehanahitaha halakihenahere wenati waiyexe hiyeta. Beor ityani Balaão tyaohenere akere tyaonahitaha. Balaão atyo iniyalahare tyoma hoka

ihiyeta kaoloxere tyaona aokowita. <sup>16</sup> Hoka kawatyalisaka iniyalahare enómane hiyeta. Burro irae ekakoa haliti xako hoka hatyo iraiti xakaisasehare hatyaharene miyatyaha.

<sup>17</sup> Hatyo halitinae atyo toloko sekaka maonexahare akereeta, kaiminiti kinatyawiniti hoholatitere akereeta tyaonahitaha. Enore atyo toloko hatekoakore makakore memere mokita enomanaha. <sup>18</sup> Kahare iraetaha, ahinityahitaha, aokowiharetyoahitaha. Hatyaharahitaha, haxahekolaha iniyalahare kaxawaiyityakitere kakoa maoseratyahitaha haiyanae komitehena iniyalahare halakijiterena. <sup>19</sup> Wenati waiyexe xakore hotikisa aokowiyahitaha hoka iniyalahare tyomahitere wakanehareha atyo. Hiyaiya, xoare xamani atyo jiyahaotyaha haliti hoka hatyo wakanehare atyo tyaonita. <sup>20</sup> Hatyo hiyeta haiyanae Xekohaseti, exahe isekohaliti Niyasehare Jesus Cristo xema tyaohenenerena hoka emawenkoaretyakahoha nonitata kaiyakehenahitaha. Xakore hoka hatyo najikinita iniyalahare ehaikoakihenahitene hoka hatyo ximita tyaohtiterenai atyoite hetatiye hawenaneha xahere howitiharene axomokanikihenaha imiyanaose xowakehena hoka.

<sup>21</sup> Hiyaiya, waiye kaiserehare eneya atyo maisa Iraiti Waiyexe semahitaha hoka semaha najikinita atyo haikoahenahitaha hajikiniha hoka waiyexe wenati nonitata halakisahitaha waiyexe xaotyakisati kaxekakehenere enomanaha. Hetatiye xahere nowaxirahare enawenaneha tyaona. <sup>22</sup> Hatyo nikare tyaohenahere hiyeta exe iraiti nika aliterexa: "Kajolo xaneheta hajiratene anita, boloko katihalisakehetehenerena xane tomololisoaheta olowihiti koni".

### Xekohaseti Tyaonene

**3** Nohinaeharenae, noxiyakawalinae, exe atyo ihinamenehena naxikaita babera xomana. Exe hinamanae koa atyo waiyexe kakoa naxahekotyankisa, nairihalinkisa xiso maheta. Exeharenae naxotyankisa xiso maheta. <sup>2</sup> Kasani xotyaxematya toahiya xowaka Waiyexe Iraiti Xakaisaseharenae irahenerena naokita. Wiyekohase, Wisekohare Niyasehare xaotyakiraho kakoa exaotyakiraharenae aotyakihenere xiso xotyaxematya naokita.

<sup>3</sup> Exehare hotohare waiyekehalaka xomana naokita: Miyanitiye xowakehenaite hoka kaotyakehena xomana halitinae haxahekola ewaxirahare ximita tyaoniterena hoka koexahalihenaha ite xiso. <sup>4</sup> Hoka nehenaha ite: "Tyohetaka aokowi, alitereka? Aliyo tyaonita? Wexenai koxaka waini hoka tyotyaha hekota tyaonita, hetati waikohe kaomakehenere akereeta". <sup>5</sup> Exe koexahaiterena ite maisa exeharenae otyaxematya aokowitaha: Toahiya xowakiya Enore irae hoka enokoa waikohe harenae kaotyaka, one xata waikohe kaotyaka, one nekesexata. <sup>6</sup> Exahe tehitiya hoka one morene hiyeta toahiyere waikohekoa kamawenkoaretyaka. <sup>7</sup> Hoka waikohe, enokoanae kalikini tyaoniterena hatyo niraeneta Enore niraene mokitahene kamawenkoaretyakaha maheta irikati kakoa. Tyaonahitaha atyo Miyanitiye Xaxalisati Ferakene niyahare, hal-

itinae iniyalahare nomaseharenae mawenekoaretyaka ferakene niyahare.

<sup>8</sup> Noxiyakawaliharenae nohinaeharenae, awa atyo xi-maotyanehena exe harenae: Enore ana atyo haki ferakene 1.000-wanone akereta, 1.000-wanone hoka haki ferakene akereta. <sup>9</sup> Hiyeta hoka Enore atyo maisa how-itiharexe tyoma aokowiterehare kakoa, maisa atyo haiyanae ehowitiharene tahi iraetere akereta xini. Maisa atyo kaholawakere xikakoa, kasani maisa xala hare kamawenekoaretyaka aokare hoka. Kasani atyo tyotyaha halakisa iniyalahare háomaneha aokita.

<sup>10</sup> Hoka Xekohaseti kaokeneheta Ferakene ite kai-warexe kaokitere akereta, maxatyahakahareta. Hatyo Ferakene ite enokoa maotyakaheta emahaliti kaheneharexe kakoa. Tyotyxa xalini hare enokoa, waikohekoa tyaoniterena ite kakeratyaka. Waikohe, tyotyxa enakoa tyaoniterena xoha ite kera hoka maotyakaheta.

<sup>11</sup> Tyotyxa exe harenae ite kamawenekoaretyakehena, waiyekehalakita xomana hoka xoare hare halitini ite xisaona xaokowihena? Maika xawenane Enore aokitere akereta kaisere xamoka, enomanerena xisaona. <sup>12</sup> Maika xatyahahena Enore tyoanene Ferakene xahita, waiye xisaohena hoka haxerore tyoheta. Hatyo Ferakene atyo ite enokoa kamawenekoaretyaka irikati kakoa, tyotyxa enokoa, waikohekoa tyaoniterena ite hoka kololo. <sup>13</sup> Koxaka atyo Enore enokoa waitare, waikohe waitare xoha kaotyakene aoka. Hatyo nali atyo waiyexe wenati taita tyaonita. Hatyo xahita watyahita.

### Maika Heko Xityakekone Xema Xisaona

(Filipenses 4.1; 2 Timóteo 2.1-3; 4.1-2; Hebreus 4.11; 10.32-37)

<sup>14</sup> Hiyeta hoka nohinaeharenae, noxiyakawalinae, hatyo xowaka niyahare xatyahita hoka maika xaiy-ateretyoa xawenane kakoa waiye ximehexaikohare xisaona, exahe hoka iniyalahare ximaomanehare hoka maisa xihaihareta iniminika hoka hatyo xowakehena ite hoka ihalahare xikakoa. <sup>15</sup> Xotyaxematya Wiyekohase haikoahaneheta: Ekoamaniya halitinae tyaona aokita hoka hatyo hiyeta maisa kaholawakere ha-haikoaneheta kakoa.

Hatyo tahi tehitiya wihinaehare, wixiyakawala Paulo xairatya xomana, Enore waiyoliniti isehenere enomana hiyeta. <sup>16</sup> Tyotyxa xairahenere baberanae koa hatyo tahi akiti xairatya. Haiyanae baberane xairahenerekoa howitihare xawaiyekehalakatyaka hoka haiyanae mawaiyoreharenae, inira tyakekoterena xoha ehaikoare awaiyekehalakatyahitaha. Nikare atyo tyaonahitaha haiyanae hoka hatyotaha atyo mawenekoaretyoawi ahitaha.

<sup>17</sup> Hoka exehare koxaka waiyekehalaka xomana, nohinaeharenae. Hiyeta hoka maika xirihare hoka maisa iniyalahare nomasehare tyaoniterena maoserahena xiso hoka exaotyakiraha ehaikoarexe koamaniya xisaonita hoka xikinaterere xisaonitere aoseta xakikijoi-ta. <sup>18</sup> Xakore hoka maika heko xisaona Wiyekohase, wisekohare Niyasehare Jesus Cristo nawaiyexehare, exahe waiyorene xema xikinaterere kaiserehare xisaona maheta. Maika kaihalaharetyaketa ekakoa kalikini, matyotenehare. Eko xoha.

# 1 João

## Iraiti Waiyexe

**1** Waxairatita xomana Iraiti Waiyexe, waikohe, enokoa maomakaharene xowakita tyaohenere tahi. Wasema tyoty iraeterehare, waiye wiyaiyene xoaha. Wiyaiyene exahe hoka wekaokakisa wikahe ihiye. <sup>2</sup> Hatyo wenati waikatehare kaotyaka hoka wiyaiyene hoka hatyo hiyeta wiraeta, wiyakaita hatyo wenati matyotenehare xihiyene. Enore nali ene tyaonita hoka hotikisene womana. <sup>3</sup> Wiyakai wiyaiyehenere, wasemehenere xihiyene, wihinaeharenae kaiserehare xisaona maheta. Wiso, Enore, Jesus Cristo hinaeharenae wisaonitere akereta maheta. <sup>4</sup> Waxairatya exe xomana wihalaharene kalore tyaona maheta.

## Enore Atyo Xaokanatyakalati

<sup>5</sup> Iraiti Cristo isa womana hoka wiyakaihenerene xihiyene atyo exe: Enore atyo xaokanatyakalati, maisa makaliroti aka ihiye. <sup>6</sup> Hiyeta hoka "Enore xema taita wisaonita", wexaiya hoka hatyo xowakita makaliroti koni wisaonita hoka wamaoseraita atyo wisomitere, wiraetere xoaha kakoa. <sup>7</sup> Hoka aliterexeya xaokanatyakalati xema wisaonita hoka Enore tyaonitere xaokanatyakalati xema akereta wisaonita hoka wawaiyetyakakoaiya hoka Jesus timalaxaiya tiheheta wiso tyoty iniyalahare wománe nonitata.

<sup>8</sup> "Maisa atyo iniyalahare wisomare", wexaiya hoka wamaoseratyoawita atyo, maisa atyo Iraiti Waiyexe xema xini wisaonita. <sup>9</sup> "Aliterexe iniyalahare notyomita", wexaiya wiraexatya Enore hiye hoka iraetere akereya moka wiso. Enore atyo tota maniya taita tyaonita hoka iraetere akereya tyoma hoka tihehetaiya wiso iniyalahare wománe nonitata hoka maotyanehetaiya iniyalahare wománe. <sup>10</sup> "Maisa iniyalahare wisomare", wexaiya hoka Enore atyo maoseratyare waokita. Maisa atyo iniraene xema xini wisaonita.

## Cristo Kahinaetita Wiso

(Hebreus 10.10-14; 1 Pedro 1.18-21; 1 João 1.8-9; 5.12)

**2** Haré xoimanae, exehare naxairatya xomana maisa iniyalahare xisomita maheta. Xakore hoka hatyaiya iniyalahare tyoma hoka Jesus Cristo atyo waiyexe. Wikahinaetyase Hanexe nali hairaene kakoa kahinaetita wiso. <sup>2</sup> Hiyaiya, Jesus Cristo hiyeta terota iniyalahare wománenae kaxemaisatyakeheta. Maisa wománenai taita xini, tyoty halitinae nómane tehiya.

<sup>3</sup> Enore xaotyakiraho xemaiya wisaona hoka aliterexeya atyo exema maniya wisaonita. <sup>4</sup> Hoka hatyaiya, "Enore xema maniya notyaonita" nexaiya hoka maisa xaotyakiraho tyaonare hoka maoseratita atyo, maisa atyo Iraiti Waiyexe xema tyaonare. <sup>5</sup> Hoka hatyaiya atyo iniraene xema tyaonita hoka hatyo atyo awaiyetitene kaiserehare. Nikareya atyo hoka aliterexe atyo Enore koamaniya wisaonita. <sup>6</sup> Xala xamani atyo Enore xema maniya tyaonita aokowi hoka Cristo tyaonitere akeretaiya atyo tyaona.

## Waitare Xaotyakisati

<sup>7</sup> Exe xaotyakiye tahi naxairaitere xomana atyo maisa waitare xini, nohinaehare, noxiyawakalinae. Hetati iraiti xasemehenere xowaka exe xaotyakiye xasema.

<sup>8</sup> Hoka naxairaitere xomana xaotyakiye atyo waitare. Cristo hiye kawaiyaka, exahe xihiyene tehiya hoka kawaiyaka. Hiyaiya, makaliroti tyotehena hoka xaokanatyakalati waiyexe koxaka aokanaita.

<sup>9</sup> Xala xamaniya waiyexe maniya taita tyaonita aokowi hoka kirawaneta hahinaehare hoka maoseraitaiya, makaliroti koni atyo tyaonitata. <sup>10</sup> Xala xamani atyo awaiyetita hahinaehare hoka xaokanatyakalati koni atyo tyaonita hoka maisaiya xoare hiyeta hatya iniyalahare aomanekijitene. <sup>11</sup> Xala xamani atyo kirawaneta hahinaehare hoka makaliroti koni atyo tyaonita. Makaliroti koni tonita, maisa waiyorexe haetonane kakoa, mawaiye waiyanetene atyo.

<sup>12</sup> Iniyalahare xománenae koxaka kaxemaiyaretyakeheta Cristo hiyeta, hoka hatyo hiyeta naxairatya xomana, haré xoimanae. <sup>13</sup> Nexekatinae, waikohekoa kaomakehenere xowakita tyaonitere atyo xiyaiyanehare hoka hatyo hiyeta naxairatya xomana. Xoimahalitinae, Tihanare xijiyahaohenere hiyeta naxairatya xomana. <sup>14</sup> Haré xoimanae, Enore xema atyo xisaonita hoka hatyo hiyeta naxairatya xomana. Nexekatinae, waikohekoa kaomakehenere xowakita tyaonitere atyo xiyaiyanehare hoka hatyo hiyeta naxairatya xomana. Xoimahalitinae, xikinatere atyo, exahe Enore niraene xema atyo xisaonita hoka koxaka Tihanare xijiyahaotya hoka hatyo hiyeta naxairatya xomana.

## Maika Awa Iniyalahare Xema Xisaona

(Efésios 5.11-12; Colossenses 3.5-9; Hebreus 3.7-13)

<sup>15</sup> Awa atyo xawaiyetya wenati waikohekoare, exahe waikohekoa tyaonitereharenae hoka. Waikohekoa tyaonitereharenaeya atyo xawaiyetya hoka maisa atyo Wexe Enore xawaiyetyare. <sup>16</sup> Tyoty xoalini hare ali

waikohekoa tyaonitere atyo maisa Enore nalitare xini. Ali haliti awaititereharenae, xosetinae awaititereharenae, xotalini hare kakoa kaxaokowiharetyoakitere atyo maisa Enore nalitare xini. Waikohekoatere terota atyo.<sup>17</sup> Ali waikohekoa tyaonitereharenae, exahe kaxawaiyetyakitereharenae atyo tyotere. Hoka xala xamaniya atyo Enore aokitere akereta tyaonita hoka hatyo atyo ite tyaota mene.

### Cristo Nahalakoahare

<sup>18</sup> Okoi imiyani ferakenehena, haré xoimanae. Koxaka xasema Cristo nahalakoahare kaotyakene tahi. Kalikini koxaka Cristo nahalakoaharenae kaotyakita kahare. Hoka hatyo hiyeta waiyekehalakita womana okoi imiyani ferakene hikoahenere.<sup>19</sup> Aliterexe halakisaha wiso, maisa atyo winekoniyeha xini hoka. Winekoniyehaiya hoka maisa halakisahitaha wiso. Xanehetaha wonita waiyekehalakahareha maheta, maisa hatyanae winekonitare xini hoka.

<sup>20</sup> Hoka Cristo atyo Isekohaliti Waiyexe axikaita xomana hoka hatyo hiyeta xawaiyoreta aliterexe kakoa.

<sup>21</sup> Hiyeta hoka naxairatya xomana. Maisa ximawaiyorene aliterexe kakoa hiyeta xini. Xawaiyoreta ekakoa hoka hatyo hiyeta naxairatya xomana. Maoseratyare atyo maisa aliterexe xema tyaoniterena konitare xini. Hatyohare waiyekehalakita tehitiya xomana.<sup>22</sup> Xala atyo maoseratyaliye? Étakehare Jesus maisa Enore Kalorexe Aohenere xini aokiterehare atyo maoseratyaliye. Hatyo atyo Cristo nahalakoahare. Maisa atyo tyakekore Enexe, exahe Ityani hoka.<sup>23</sup> Xala xamani atyo maisa tyakekota Ityani hoka maisa tehitiya atyo tyakekore Enexe. Hoka xala xamani atyo Ityani xema tyaonita hoka Enexe xema tehitiya atyo tyaonita.

<sup>24</sup> Hatyo hiyeta heko xotyaxematya hetati xowakiyita xasemehenerehare iraiti. Hekoiya hatyoharenae xotyaxematya hoka hekoiya hahotyalita xisaona Ityani, Enexe xoaha kakoa.<sup>25</sup> Exe terota Cristo isa womana aokowi: wenati matyotenehare.

<sup>26</sup> Haiyaharenae maoseratya aokowita xiso hoka nikare naxairaita etahi xawaiyore maheta ekakoaha.<sup>27</sup> Hoka Cristo atyo Haisekohare isa xomana. Hekoiya Inisekohare tyaonita xihye hoka maisaiya xoare maheta hatya aotyakijita xiso. Hiyaiya, Inisekohare atyo aotyakijita tyotyta tahi, exahe exaotyakiranae atyo maisa maoserare xini, aliterexe atyo. Hiyeta hoka maika xityakeko Inisekohare xaotyakira, exahe heko haxawalita xisaona Cristo kakoa.

<sup>28</sup> Maika heko haxawalita xisaona Cristo kakoa, haré xoimanae. Nikare ite hoka tyohetehenere xowaka maisa wimairita, wihaihareta, hoka maisa wateroita enonita.<sup>29</sup> Cristo atyo waiyexehare, koxaka hatyohare kakoa xawaiyoreta. Nikare tehitiya xala xamani waiyexe taita tyomita hoka hatyo tehitiya atyo Enore ityani.

### Enore Ityaninae

<sup>3</sup> Kaxiyani, Wexe Enore kalore awaiyetita wiso! Kalore atyo awaiyetita wiso hoka Enore ityaninae wikakaexaretyakita. Aliterexe ityaninae wiso. Hoka matyakekoneharenae ana atyo maisa wawaiyekehalakaharexe, maisa Enore tyakekoreha hoka.<sup>2</sup> Kalikini atyo Enore ityaninae wisaona, nohinaeharenae, noxiyakawalinae. Waheta maniya hoka xoana xamani wisaohena, kalini atyo maisa waiyekehalakere womana. Xakore hoka exe kakoa atyo wawaiyoreta: Cristo ite kaokehetehena hoka hatyo akereta ite wisaona, exahe hoka waiye ite wiyaiyene.<sup>3</sup> Xalanae xamani atyo exe xema tyaonita hoka atyahita Cristo xahita hoka hatyoahitaha iniyalahare maomanehenahititaha, Cristo iniyalahare maomanehare akereta.

<sup>4</sup> Xala xamaniya atyo iniyalahare tyoma hoka maisa Enore xaotyakiraho xema tyaonare hoka kaxawatyakaiya eheno. Hiyaiya, maisa atyo xaotyakiyaho aokitere akereta tyaonare hoka iniyalahare tyomita.

<sup>5</sup> Koxaka waiyekehalaka xomana: Cristo atyo tyoa hoka iniyalahare wománenae emaisaheta maheta. Hatyo atyo maisa iniyalahare nomasehare xini.<sup>6</sup> Maika xala xamani Cristo koamaniya tyaonita hoka maisa heko iniyalahare tyomihitita. Hoka xala xamani atyo iniyalahare tyomita hoka hatyo atyo maisa xoana xowaka waiyarene, exahe waiyorexe xoaha ekakoa.

<sup>7</sup> Xirihare, waiya aliya hoka xikamaoseratyaka, haré xoimanae. Waiyexe nomasehare taita atyo waiyexehare, Cristo nawaiyexehare akereta.<sup>8</sup> Xala xamani atyo iniyalahare heko tyomita hoka hatyo atyo Tihanare anere. Hatyo Tihanare atyo iniyalahare tyoma hetati waikohe kaomakehenere xowakiyita. Hatyo hiyeta Enore Ityani tyoa, emaisatya maheta Tihanare nómanenae iniyalahare.

<sup>9</sup> Xala xamani atyo Enore ityani hoka maisa heko iniyalahare tyomehitita, Enore Nisekohare tyaonita ekakoa hoka. Enore ityani atyo hoka hanexe Enore akereta maisa aliyakere iniyalahare tyomihitita.<sup>10</sup> Exakere waiyekehalaka womana Enore ityaninae, exahe Tihanare ityaninae akiti kakoa hoka: Xala xamani atyo maisa waiyexe tyomare, exahe maisa hahinaehare awaiyetyare hoka maisa atyo Enore ityani xini.

### Xawaiyehena Haiyanae

<sup>11</sup> Iraiti xasemehenere hetati xowakita atyo exe: Maika wawaiyetya kakoa.<sup>12</sup> Maisaiya atyo Caim akereta wisaona. Tihanare anere atyo hoka haximarene kaiserehare aisa. Xoanere hoka aisene? Caim atyo iniyalahare tyomita hoka iximarene atyo waiyexe taita tyomita.

<sup>13</sup> Nohinaeharenae, awa atyo matyakekoneharenae kirwanehena xiso hoka, "Xoana hoka nikare mokahitaha wiso?" xehena.<sup>14</sup> Kamati akere wisaonitere nonitata atyo waiyexe wenati maniya wikaxomokakeheta. Wawaiyetita wihinaeharenae hoka hatyo hiyeta hatyohare waiyekehalakahareta womana. Xala xamani

atyo maisa awaiyetyare hahinaehare hoka hekotata atyo ekamane akereta tyaonita. <sup>15</sup> Xala xamani atyo kalore kirawaneta hahinaehare hoka hatyo atyo haliti fahare. Haliti fahare atyo maisa tyaona menexe matyotenehare. Hatyohare waiyekehalakita xomana.

<sup>16</sup> Exakere atyo xawaiyetyati waiyekehalaka womana: Cristo awaiyetya wiso hoka waini womana. Hiyeta hoka maika wiso tehitiya wiwainihena wihinaeharenae ana wakahinaetyahene maheta. <sup>17</sup> Hatyaiya kaoloxere kawisekorexe xoaha hoka hahinaehare nakitere, maimahirotere maisa kahinaetya aokowita hoka aliyakereya awaiyetita Enore aokowihena? Maisa xakore awaiyetyare hahinaehare hoka. <sup>18</sup> Haré xoimanae, wiyawaiyera atyo maisa wiraetere, wiraesekoala taita xini. Wománe hiyeta atyo ite aliterexe wawaiyexeharene wahotikihena.

### Mamairanehaliti Enore Nahalakoa

<sup>19</sup> Nikare waiyekehalakita womana: Aliterexe Enore niraene xema wisaonitere. Hatyo hiyeta waiye wisaonita Enore haotita.

<sup>20</sup> "Wawenane atyo maisa ehokorexe", wexa waherotita hoka Enore xahekola atyo wiyahokola xaehare. Tyotyxa xalini hare kakoa atyo waiyoreta.

<sup>21</sup> Hiyeta, nohinaehare, noxiyakawalinae, maisaiya wamaikohareta wisomehenere kakoa hoka wimamairanehareya wisaona Enore nahalakoa. <sup>22</sup> Isa womana tyotyxa waxitereneharenae, wityakekota exaotyakiraho, exahe aokitere akereta wisaonita hoka. <sup>23</sup> Exakere wisaona aokita: Kasani wityakeko Ityani Jesus Cristo, exahe wawaiyetyakakoa Cristo aohenere akere. <sup>24</sup> Xala xamani atyo Enore xaotyakiraho tyakekota hoka Enore xema atyo tyaonita. Hoka Enore atyo tyaonita ekakoa. Isekohaliti isehenere womana hiyeta waiyekehalakita womana exeharenae.

### Isekohaliti Waiyexe, Emetalahare

**4** Nohinaehare, noxiyakawalinae, awa atyo xityakekohena tyotyxa Enore Nisekohare kakoare aokowiterena. Maika xahasakaharetyahene xawaiyore maheta ekakoaha, xoana hatyo isekohaliti tyaonahitere ekakoa Enore nalitare xamani, maisa xamani. Hiyaiya, kahare iraiti xakaisasehare metalahare xaorekoa waikohe hakakoare koa. <sup>2</sup> Exakere xawaiyore ekakoaha, xoana aliterexe xamani Isekohaliti Enore nalitare hoka: Xala xamani atyo ite "Enore Kalorexe Aohenere haliti terota", nexa hoka aliterexe atyo hatyo Isekohaliti Enore nalitare. <sup>3</sup> Xala xamani atyo maisa nikare iraeta hoka maisa atyo Enore Nisekohare kakoare xini hoka Cristo nahalakoahare nisekohare kakoare atyo. Koxaka exe isekohaliti tyaonene xasema hoka kalikini atyo koxaka halitinae koni tyaonita.

<sup>4</sup> Haré xoimanae, Enore anere atyo xiso hoka koxaka xijiyahaotya iraiti xakaisaseharenae metalahare. Hiyaiya, Isekohaliti tyaonitere xihye atyo matyakekoneharenae nisekohalitira xaehare niyater. <sup>5</sup> Maisa atyo Enore koamaniya xini tyaonahitaha

hoka ewaxirahare taita iraetaha. Matyakekoneharenae iniraeneha semaxemaita, matyakekonehareha hoka.

<sup>6</sup> Hoka wiso atyo Enore anerenae. Xala xamani atyo Enore maniya tyaonita hoka semaxematya wiraene. Hoka xala xamani atyo maisa Enore xema maniya tyaonare hoka maisa semaxemaita wiraene. Exakere hiyeta atyo ite waiyekehalaka womana, xoana aliterexe Isekohaliti Waiyexe xema xamani tyaonita, xoana isekohaliti metalahare xema xamani tyaonita.

### Enore Atyo Xawaiyetyati

<sup>7</sup> Noxiyakawali, nohinaeharenae, maika wawaiyetya kakoa. Hiyaiya, Enoretare atyo xawaiyetyati. Xala xamani atyo xawaiyetyati kakoare hoka Enore ityani atyo, Enore koamaniya atyo tyaonita. <sup>8</sup> Hatyaiya maisa awaiyetyare haliti hoka maisa atyo Enore xema xini tyaonita. Hiyaiya, Enore atyo xawaiyetyati. <sup>9</sup> Enore exakere hawaiyexehare hotikisa womana: haterore Haisani axikatya halitinae koni. Iyeheta wiso hoka waiyexe wenati xema wisaona maheta. <sup>10</sup> Exe atyo xawaiyetyati: maisa wiso xini wawaiyetya Enore. Hatyo atyo awaiyetya wiso hoka Haisani axikatya hoka ihiyeta iniyalahare wománenae kaxemaisatyakeheta maheta.

<sup>11</sup> Xasemehena, nohinaehare, noxiyakawalinae. Enore kalore awaiyetya wiso. Hiyeta hoka nikahena hoka wawaiyetyakakoa. <sup>12</sup> Maisa xala hare Enore waiyare. Hoka wawaiyetyakakoa hoka Enore atyo tyaonita wikakoa hoka ekakoita kalore awaititere akere wawaiyetya haliti.

<sup>13</sup> Enore Haisekohare ijita womana hoka hatyo hiyeta wawaiyore tyaonitere wikakoa kakoa, exahe wisaonitere ekakoa kakoa.

<sup>14</sup> Wiyaiyita hoka wiyakaita haiyanae hiye Enore Haisani halitinae koni axikatya hoka halitinae waiyexe maniya mohetehenere tahi. <sup>15</sup> Xala xamaniya atyo "Jesus Cristo atyo Enore Ityani", nexa hoka Enore atyo tyaonita ekakoa. Exahe hatyo hoka tyaonita Enore kakoa. <sup>16</sup> Enore awaiyetita wiso. Hatyohare waiyekehalaka womana hoka wityakekone.

Enore atyo xawaiyetyati. Hiyeta hoka xala xamani awaiyetyati tyaonita hoka Enore atyo tyaonita ekakoa, exahe hatyo hoka tyaonita Enore kakoa. <sup>17</sup> Xawaiyetyati kalore tyaonita wihiye hoka wimamairanehare wisaona maheta xaxalisati ferakene xowaka. Hiyaiya, wawenane ali atyo Cristo tyaonitere akereta wisaonita. <sup>18</sup> Xawaiyetyati hiye atyo maisa mairati aka. Waiyexe xawaiyetyati kikihitita atyo mairati. Hoka xala xamani mairati hoka maisa kalore awaiyetyare. Hiyaiya, mairati hiyeta atyo mawaiyehaliti kaotyakita.

<sup>19</sup> Enore hotohare awaiyetya wiso. Hatyo hiyeta wawaiyetene. <sup>20</sup> Xala xamaniya nexa: "Nawaiyetita Enore", nexa hoka kirawaneta hahinaehare hoka maoseraita atyo. Maisaiya awaiyetita hahinaehare waiyitere hoka aliyakereya awaiyehena Enore hamawaiyanenehare? <sup>21</sup> Exakere atyo Cristo xaotyakisati isa womana: Xala xamani atyo awaiyetita Enore hoka hahinaehare tehitiya awaiyetya.

### Matyakekoneharenae Jiyahaotyaka

**5** Xala xamaniya, “Jesus atyo Enore Kalorexex Aohenere”, nexa tyakeko hoka hatyo atyo Enore ityani. Xala xamaniya atyo awaiyetya hatya nexekati hoka ityaninae tehitiya awaiyetya. <sup>2</sup> Wawaiyehena atyo Enore hoka exaotyakiranae akereta wisaonita. Exahe hoka ityaninae wawaiyetya. Hatyo harenae waiyekehalakita womana. <sup>3</sup> Enore xawaiyetyaka atyo exaotyakiranae tyakekotyaka. Exaotyakiranae tyakekotyaka maisa howitiharexe. <sup>4</sup> Hiyaiya, Enore ityaninae atyo maisa majiyahaolita matyakekonehare. Nikare wityakekone kakoa wijiyahaoty matyakekoneharenae. <sup>5</sup> Xalaiya jiyahao akahena? Aliterexe Jesus Enore Ityani aokitere taitaiya jiyahao akatya.

### Jesus Cristo Tahy Xakaisaka

<sup>6</sup> Jesus Cristo tyoa hoka kabatixatyaka onexa; waini hoka itimalaxa iratyoa. Maisa one kakoa taita xini tyoa. One, timalati xoaha kakoa tyoa. Isekohaliti Waiyexe xakaini. Hatyo xakaini aliterexe taita. <sup>7</sup> Hanamanae waiyatiye enokoa nali: Enexe, Iraiti, Isekohaliti Waiyexe xoaha. Exe hanamanae atyo haterore. <sup>8</sup> Waikohekoa maniya hoka hanamanae waiyatiye: Isekohaliti, one, timalati xoaha. Exe hanamanae atyo hakakoa ahekoi-ta. <sup>9</sup> Halitinae xakainiya wityakeko hoka aliyakeriya Enore xakaini wimatyakekonehena? Enore xakaini atyo masakare waiye. Hatyo atyo Haisani tahi xakai. <sup>10</sup> Xala xamani tyakeko Enore Ityani hoka hatyo tehitiya atyo iraeta Enore Ityani tahi. Xala xamani atyo maisa tyakekota Enore hoka maoseratyare Enore moka. Hiyaiya, maisa atyo Enore Haisani tahi irahenere tyakekota. <sup>11</sup> Hiyaiya, exe atyo hotikijita: Enore atyo isa womana wenati matyotenehare hoka hatyo wenati atyo womanere Ityani hiyeta. <sup>12</sup> Xala xamaniya Ityani xema tyaonita hoka wenati waiyexe kakoare atyo. Xala xamaniya atyo maisa Enore Ityani xema tyaonare hoka maisa atyo wenati waiyexe kakoare xini.

### Wenati Matyotenehare

<sup>13</sup> Exe akiti naxairatya xiso Enore Ityani tyakekoneharenae ana. Hoka waiyekehalaka maheta xomana xawenane matyotenehare tahi akiti <sup>14</sup> hoka Enore haoti wisaonita hoka wimamairanehare wisaonita. Exakere hiyeta: waxeneya xoalini hare aokitere akereta hoka seminiya. <sup>15</sup> Hatyohare hiyeta atyo waiyekehalakita womana, xoalinihare wiyaxanene esemane. Hoka waiyekehalakita atyo exekane womana waxitereneharenae.

<sup>16</sup> Hatyaiya hahinaehare nómane iniyalahare waiya, maisa waini xakere xini hoka hahinaehare ana iraexatya Enore hiye. Hoka Enoreya waiyexe wenati isa ihinaehare ana. Iniyalahare haiya akiti maxaxaisakirahareya atyo hoka nikare hisoma. Hiyaiya, haiyanae akiti iniyalahare nomaka hiyeta kawainisakita. Maisa atyo exe iniyalaharenae tahi xiraexatya maheta xini niraeta. <sup>17</sup> Tyoty mawaiyexe atyo iniyalahare. Xakore hoka haiyanae iniyalahare nahalakoa atyo maisa kawainisakere.

<sup>18</sup> Enore ityaninae atyo maisa iniyalahare tyometa menexe. Hiyaiya, Enore Ityani atyo kaxaikoahitene hoka Tihanare maisa kaokahaliyatyarahene.

<sup>19</sup> Enore anerenae atyo wiso hoka matyakekoneharenae atyo Tihanare xema taita tyaonahitaha. Hatyohare waiyekehalaka womana. <sup>20</sup> Enore ityani tehitiya koxaka tyoa hoka isa womana waiyoliniti hoka Enore tahi akiti waiyekehalaka womana maheta. Aliterexe Enore xema wawenanenae tyaonita, exahe Ityani Jesus Cristo xema hoka. Hatyo atyo Enore kaiserehare, exe atyo wenati matyotenehare.

### Maika Awa Enore Metalahare Xema Xisaona

(1 Coríntios 8.1-13; 10.14-28)

<sup>21</sup> Xirihare ira Enore metalaharenae kakoa, haré xoimanae!



## 2 João

<sup>1</sup> Tyakekohatienae nityohalitira xaxikala babera hatya ohiro noxiyakawalihalo ana, ityaninae xoha ana. Nawaiyetita xiso. Maisa natyo taita xini nawaiyetita xiso, tyotyia iraiti aliterexe xema tyaoniterenaeha tehitiya awaiyetita xiso. <sup>2</sup> Wawaiyetita xiso iraiti aliterexe tyaonitere wihiye hiyeta. Hatyo atyo ite tyaoneta mene wihiye. <sup>3</sup> Maika Wexe Enore, Ityani Jesus Cristo kaxaikone, xairakoaneharera, mehexasikoharene tyaona wikakoa, aliterexe, exahe xawaiyetyati xoha kakoa.

### Aliterexe Exahe Xawaiyetyati

<sup>4</sup> Nasema haiyaharenaeha hityaninaeha iraiti aliterexe aokitere akereta tyaonitere hoka nihalahare. Wexe Enore aokitere akereta tyaonahitaha. <sup>5</sup> Kalikini niraeha hihiye, nohinaehalo, noxiyakawalihalo. Maika haiyanai kakoa wawaiyetya kakoa. Maisa atyo waitare xaotyakiye xini naxairaita. Hetati xowakiyata wikaxaotyakisakehenere hareta atyo. <sup>6</sup> Nikare xawaiyetyati atyo Enore xaotyakiraho tyakekotyaka. Hetatita xasemehenere akereta, exe atyo Enore xaotyakiraho: heko xawaiyetyakakoa.

<sup>7</sup> Kahare maoseratyalienae tyaonita halitinaeha koni. Hoka Jesus Cristo atyo maisa haliti kaiserehare xini

aokahitaha. Xala xamani atyo nikare tyaonita hoka maoseraita, Enore Kalorexe Aohenere nahalakoahare atyo. <sup>8</sup> Xirihare xisaona hoka maisa koxaka hateniti xisomehenere mitita hoka kalore kaxekaka xomana xihatene nahalakoahare.

<sup>9</sup> Xala xamani atyo maisa Enore Kalorexe Aohenere xaotyakira xema tyaonita hoka hatyo xahexe tyaonita, maisa atyo Enore kakoare xini. Hoka xala xamani atyo exe xaotyakiye xema tyaonita hoka Enore kakoare, Ityani kakoare atyo.

<sup>10</sup> Maika hatya kaokehena xomana hoka maisa Cristo xaotyakira kakoare xini hoka awa atyo xihanako xaisoakisene. Awa atyo xexa hekoti: "Maika himehexaikohare hisaona". <sup>11</sup> Hiyaiya, xala xamani atyo emehexasikoharene aoka hoka hatyo atyo ihinaehare, iniyalahare nomaseharene hatya.

### Iraitinaeha Miyane

<sup>12</sup> Kahare xwalini hare niraini xihiyeha niyahare, xakore hoka maisaiya atyo naxairaitene xomana baberanehako. Ite notyoha nowaiyehetehena xiso hoka xihare hiyeta niraeha. Nikare ite hoka masakare wihalahare.

<sup>13</sup> Hihinaehalo Enore haomanere aohenere ityaninaeha haxakaisakeheta aoka.

## 3 João

**1** Tyakekohatienae nityohalitira xaxikala Gaio anere. Hawaiiyeta kaiserehare nomani, Gaio.

<sup>2</sup> Nohinaehare, noxiyakawali, niraexaita Enore hiye hitahi, waiye hisaona, exahe hikinaterere hisaona maheta, Enore koamaniya waiye hisaoniterere akereta. <sup>3</sup> Wihinaehare haiyaharenae kaoka nomani hoka xakaiha hitahi nohiye. Heko iraiti aliterexe xema taita hisaonita aokaha. Nasemene hoka nihalahare hamoka. <sup>4</sup> Nase-ma nityaninae nawenane heko iraiti aliterexe aokitere akereta hoka masakare nihalahare.

### Gaio Xaixakerityaka

<sup>5</sup> Noxiyakawali, nohinaehare, heko waiye hamokita wihinaeharenae, exahe hahotyaliharenae hoka. Nikare hoka waiye kaiserehare. <sup>6</sup> Aliyere tyakekohatienae hiye xakaihahitaha waiye hamokahiterene tahi. Maika hakahinaetya nikare kaokiterena hoka waiye jiyehenahitiyaha hinalita Enore awaiyetitere akereta. <sup>7</sup> Hiyaiya, koxaka xane Cristo ana hakahitaha. Maisa matyakekoneharenae kahinaetyahene aokareha. <sup>8</sup> Hiyeta hoka wiso tyakekohatienae ya maisa wimakahinaerahitene. Nikare ite hoka wiso tehitiya ehateneha Iraiti Waiyexe xakaisaka hiye wakahi-naetyahene.

### Diótfefes, Demétrio Xoaha

<sup>9</sup> Naxairatya inira hatya baberane tyakekohatienae ana. Xakore hoka Diótfefes maisa naxairahenere semaxematya aokowita. Kasani kalorexe tyaona aokowi-

ta hoka. <sup>10</sup> Hiyeta hoka nali ite nokaokihena hoka nirae ekakoa tyoty tyomitere harenae tahi. Ewaxirahare iraeta wiyaokaka, maoseraita harenae. Exahe tehitiya hoka maisa hatyo harenae taita tyomare. Wihinaeharenae tehitiya kaokehena hoka maisa waiye mokarahene. Xala xamaniya waiye mokahene hanako aokowi hoka xahohisakoatyakalati hanakota aihikoahitita hatyo waiye moka akaiterenae.

<sup>11</sup> Nohinaehare, noxiyakawali, maika waiyexe taita hisoma, awa atyo xoare xamani maisa waiyexe hoka hatyo hisoma. Xala xamani atyo waiyexe tyomita hoka Enore anere atyo hoka xala xamani atyo maisa waiyexe tyomare hoka maisa atyo Enore xema tyaonare.

<sup>12</sup> Tyotyaha Demétrio tahi iraetaha. Hatyo atyo waiye aokaha. Aliterexe aokitere akereta tyaonita. Exahe womana hoka waiyeta tehitiya. Wiraeterena atyo aliterexe taita, hatyohare atyo waiyekehalakita homana.

### Tyawaxati Miyane

<sup>13</sup> Hekota kahare xoalini hare noxakaini niyahare hihiye, hoka maisaiya atyo naxairatitene homana. <sup>14</sup> Kala ite haxeroreta nowaiyeheta hiso hoka wihárena hiyeta wirae kakoa.

<sup>15</sup> Maika waiye himehexaikohare hisaona. Tyoty hihinaeharenae haxakaisakeheta aoka hihiye. Maika tyoty wihinaeharenae hiye hiyakaiheta natyo.

# Judas

<sup>1</sup> Natyo atyo Judas, Jesus Cristo wakanehare, Tiago ximarene. Naxairahena Enore haomanerenai aohenerenai ana, exahe Wexe Enore xawaiyera xema, exahe Jesus Cristo kaxaikoterenai ana hoka.

<sup>2</sup> Kasani masakare Enore xairakoaneharera, mehaxaikoharene, xawaiyera tyaona xikakoa naokita.

## Xaotyakisatiye Metalaharenae Tyakekohatiyena Koni

<sup>3</sup> Nohinaeharenai, noxiyakawali, nahekotita ene noxairali xomana wiyakeheta tahi kakoa. Hatyo wawenanaho tahi. Hatyo hiyeta nahekoty hoka kalikini naxairatya xomana, naihalahalinikisa xiso hoka xaiyateretyoa maheta xityakekone kakoa. Hakirore atyo Enore isa tyoty hakaxaikoneharenae ana.

## Maika Xirihare Xaotyakisatiyena Metalahare Kakoa

(1 Timóteo 1.6-7; 4.1-3; 2 Pedro 2.1-19)

<sup>4</sup> Hiyaiya, haiyaharenai halitinai matyakekoneharenai atyo mawaiyakahare ahitaha tyaonaha wihinaeharenai koni. Hoka ehawareharyahitaha wEnorexa waiyexe xomokala wiso tahi. Nikare tyaonahitaha, maisa enawenaneha iniyalahare kaxawatyakaha maheta ehenoaha. Exahe maisa tehitiya aokareha Jesus Cristo, hatyo taita xakore atyo Wiyaotyakisase, Wiyekohase hoka. Toahiya atyo Iraitu Waiyexenai xakaiha etahi. Kamawenekoaretyakaha terota maheta.

<sup>5</sup> Exeharenai atyo waiyekehalakita xomana, xakore hoka naxotyankisa atyo xiso naokowita. Hiyaiya, Xekohaseti iyehetehena Israel hotyalinai hoka kikihetene Egito nalita, xakore hoka hatyo najikinita mawenekoaretya matyakekoneharenahere.

<sup>6</sup> Xotehenaira anjonai mawenaneneheta kalorexe hoka halakihenahere hawenakalaha aose. Kalikini kati-likoare atyo tyaonahitaha kamatiherahi maxiriko-tyoanehare kakoa, ako katyahe makaliro koni. Nali atyo Enore mokahitene miyanitiye ferakene xowaka kamawenekoaretyakehenahere niyahare.

<sup>7</sup> Xotehenaira Sodoma, Gomorra xoaha nali tyaoniterenai, exahe ehaliyita haiyanai wena-  
nakalatikoasenai tyaoniterenai hoka. Hiyaiya, hatyonai atyo xalijinihareha anjonai xahita. Iniyalahare tyaonahitaha, exahe haenane hatyanai kakoa hoka iniyalahare tyomahitaha. Hatyo hiyeta kakerahaotyakeheta irikati mawakenehare kakoa. Hatyo nikare kaxomokakehenahere atyo aimenekoita, hotikijita tyoty halitinai ana.

<sup>8</sup> Hiyaiya, exe kalikiniye halitinai nikareta tehitiya tyaonahitaha. Hoka exahekolaha iniyalahare a-

manikisahitene. Hoka maisa aiminisareha Enore nerore, kirawanahitaha enokoa tyaonitere anjonai.

<sup>9</sup> Hiyaiya, anjonai xekohasehare xakore atyo Miguel hoka maisa atyo nikare tyaonita. Tihanare kakoa irakakoahenehare, Moisés háre kakoa hawenaneha tahi xowaka, Miguel maisa aiyalatita Tihanare ana. Xakore hoka nexa taita: "Maika Xekohaseti watyali hiso", nexa.

<sup>10</sup> Xakore hoka exe halitinai atyo kirawanahitaha xoalini hare mawaiye kehalakiterehare enomanaha. Exahe xoalini hare kaotyakitaterehare waiyahitere, kirakahare akereta waiyorahitere. Hoka hatyoharenai atyo mawenekoaretyahitene. <sup>11</sup> Kaxiyani! Maika kirakoane atyoite tyaonaha. Hiyaiya, Caim tyaohenere akereta atyo tyaonahitaha. Exahe olo haxawaiyera hiyeta Balaão iniyalahare tyomehenere akereta tyaonahitaha. Exahe Coré atyo kahalakoahare Moisés kakoa hoka kamawenekoaretyaka akereta, nikareta hatyonai tehitiya kahalakoahareha hoka kamawenekoaretyakaha.

<sup>12</sup> Haxawalita xiyawaityakakoane kakoa xikanakairehena ehaotiha hoka kahaiharetyaka hekahitaha, kanakaira, akomaniyatyakisareha. Hatahi taita atyo ahekotyahitaha. Kaiminitinai hoholati hoholatya hamaniya axanikisa hoka maonenetere akeretaha atyo. Atya katenai iri nexona xowakehetehena xakore hoka malitere akeretaha atyo. Atya katenai ityaharenae hiyeta kamalakakitere hoka wainahitere akeretaha atyo. <sup>13</sup> One kaloxere kahenehare ainakoiyatyoitere hoka xawaitere haikorone akereta atyo exe halitinai hotikijita kahaiharetyakere háomanenaiha. Xoresenai mahotirahare akeretaha atyo. Hatyonai ana atyo Enore memere moka hakiti masakare hatekoakore makakore, nali tyaonetaha mene maheta matyotenehare.

<sup>14</sup> Hiyaiya, Adão jikolahare Enoque atyo xakai etahiha: "Xasemehena! Xekohaseti ite tyoheta, kahare haomanerenai anjonai kakoa, <sup>15</sup> axalisa maheta tyoty halitinai. Tyoheta ite hoka iniyalahare mohena kahare iniyalahare tyomehenahere hiyeta, exahe kahare iniyalahare irahenehare Enore tahi hiyeta", nexa.

<sup>16</sup> Hatyo halitinai atyo kaweraharetaha, iraharetaha minita haiyaharenai. Haxahekolaha ximita atyo tyaonahitaha, ahinityareha. Exahe waiye irae ahitaha haiyanai hiye, xiyehaliti isaha enomanaha maheta.

### Xakaisati Exahe Xaotyakisati

<sup>17</sup> Hoka xiso nohinaeharenai, xotyaxemahenaira Wiyekohase Jesus Cristo niraene kakoarenae xakaihenere. <sup>18</sup> Exakere atyo nexaha: “Miyanitiye xowakehenaite hoka kaotyakehenaite halitinai hoka koexahalihenaha xiso. Matyakekoneharenae, haxahekola ewaxirahare ximita tyaonitereharenai”, nexaha atyo.

<sup>19</sup> Hatyonai atyo exaore akatita. Hiyaiya, exahekolaha atyo nikare axomokanikisahitene, maisa atyo Enore Nisekohare kakoareha xini hoka.

<sup>20</sup> Hoka xiso nohinaeharenai, maika heko xikekoarehena xityakekone kakoa. Hiyaiya, hatyo tyakekotyati atyo masakare waiyexe. Isekoaliti Waiyexe niyatere kakoaira xiraexahena. <sup>21</sup> Hoka hekotaira xisaohena Enore xawaiyera xema, exahe xatyahahenaira Wiyekohase Jesus Cristo hoka haxairakoaneharera hiyeta isa xomana wenati matyotenehare.

<sup>22</sup> Haiya harenai ana maisa waiyekehalakere hoka maika hatyoharenai xairakoaneharehena, <sup>23</sup> hoka xiye-hetehena hatyo halitinai irikati nonitata. Haiya harenai tehitiyaira xairakoaneharehena. Maika xairakoaneharehenahene xakore hoka ximairahenahene tehitiya. Awa atyo xawaiyehena enómaneha kaxawaiyityakitere iniyalahare. Hatyoharenae hiyeta exahe inimanaiha kaiyalahare tyaonita.

### Xaexakerityati Niraexatyaka

<sup>24</sup> Maika Enore kakoa kaihalaharetyaka! Maika kahi-naetya xiso hoka xikinaterere xisaohena hoka iniyalahare ximaomanehare hoka xihalaharene kakoa moka xiso hahalakoa waiyexe aose nali. <sup>25</sup> Maika haterore Enore wisekohare Niyasehare kakoa, Wiyekohase Jesus Cristo hiyeta, kaihalaharetyaka, kaxaexakeretyaka, kaxaiyatelikisaka, kaxaeroretyaka, kalikinita, exahe matyotenehare. Xoaha taita.

# Apocalipse

**1** Exe baberakoa kaxairatyaka xoolini hare Jesus Cristo hotikihenere. Enore atyo exeharenae hotikisa enomana, ewakaneharenae ana waiyekehalaka maheta, mawahaneta hoka xoolini hare kaotyakehenere. Jesus Cristo axikatya hanjoxa hawakanehare João ana exeharenae waiyekehalaka enomana maheta. <sup>2</sup>João xakai tyoty waiyehenere tahi. Owene baberakoa tyaonita xakaihenere Enore niraene tahi, exahe Jesus Cristo hotikihenere aliterexe enomana tahi. <sup>3</sup>Waiye kaiserehareya atyo xala xamani kaixaretya, exahe sema exe iraiti xoolini hare kaotyakehenere tahi iratere hoka tyaona exema. Hiyaiya, hatyoharenae kaotyakene maisa wahehetere.

## Sete Hotyali Tyakekohatienae Tyawaxatyaka

<sup>4</sup>Ásia koa nali 7 tyakekohatiye hotyalinae tyaonita hoka natyo João naxairatya enomanaha. Maika waiye, ximehexaikohare xisaona Enore hiyeta, exahe 7-hare isekohalitinae Enore nokahakala nahalakoa tyaoniterena hiyeta. Hiyaiya, Enore atyo toahiya tyaona, kalini tyaonita, makani exahe tyaoneta minita matyotenehare. <sup>5</sup>Maika nikare xisaona Jesus Cristo hiyeta tehitia.

## Cristo Atyo Waini Womana

(Tito 2.11-14; 1 Pedro 2.18-21; Apocalipse 5.9-11; 7.14)

Jesus atyo waiye xakai Enore niraene, exahe hatyo hotohare kaseheta kamatinae konita hoka waikohekoa xekohaseti tyaoniterena Xekohase tyaonita. Awaiyetita atyo wiso, wihiyeta waini atyalihose xaimaholatyaka hiye emaisaheta maheta wománe iniyalahare. <sup>6</sup>Sacerdotena moka wiso ewakaneharenae hoka wahaka maheta Enexe Enore hatene. Maika Jesus Cristo kalorexe, kinaterexe tyaona mene, kaihalaharetyaka mene ekakoa, eko xoaha.

## Cristo Haikoahaneheta

(Atos 1.11; 1 Tessalonicenses 4.13-18; 5.1-4; 2 Tessalonicenses 1.7-10)

<sup>7</sup>Xiyaiyehena, kaiminiti kakoa ite haikoaheta waikohekoa xeta. Tyoty halitinaite waiyahene, exahe ite exaisasenai ite hoka waiyahene. Tyoty waikohekoa tyaoniterenaite waiyahenene hoka tiyahaite hamawaiyehareneha hiyeta. Kotare nali, xoaha.

<sup>8</sup>— Natyo atyo Alfa, Ômega, exahe hetatiye, miyanitiye xoaha — nexa Xekohaseti maxaexahetyakahare niyaterexe. Hatyo atyo toahiya tyaonitere, kalini tyaonitere, makani, tyaoneta menehenere.

## João Awaiyakhenerere Cristo Tahi

<sup>9</sup>Natyo atyo xihinaehare João. Jesus koamaniya notyaonita hoka haiya xowaka iniyalahare nokaxomokakita xiso akereta. Jesus atyo Wiyekohase hoka xiso akereta wimamaxaharenehareta watyahita exahita.

Berexo notyaonita iyolirotika Patmos aokahitere nali, Enore niraene noxakaitere hiyeta, Jesus tyoty aliterexe hotikihenere noxakaitere hiyeta. <sup>10</sup>Xekohaseti ferakene domingo xowaka Enore Nisekohare awaiyanikisa natyo. Nasema iraiti kinatyaxa nohiniri maniya, koneta nemahare akerehare:

<sup>11</sup>Nexa nohiye: — Haxairahena hiyaiyehenerena hoka babera haxikatya 7-hotyalinae tyakekohatienae ana, wenakalati Éfeso, Esmirna, Pérgamo, Tiatira, Sardes, Filadélfia, Laodicéia xoaha nali tyaoniterena ana.

<sup>12</sup>Nexa hoka naterehokoa nowaiyene maheta hoka nowaiya 7-kase xaokanatyakalati kase, ouro nomakere makere. <sup>13</sup>Enekonihata hatya tyaonita, motya haliti. Imiti wahahare nase akore ikiji hiye. Xalatahiti ouro nomakere tyaonita ihiye. <sup>14</sup>Esekase hoka iyomakase, motya kalanero niyali, iyoma kaiserehare. Exose wero-ka, motya irikati. <sup>15</sup>Ikiji tehitia werokita, motya bronze owere irikati hiye xafiratyakere. Exako motya wamolo kalorexe akereta. <sup>16</sup>Hafihini maniya kahe kakoa 7-se xorese tokita. Ekanasakota hatya kesekase hinama maniya tiho kawetyakere hikoita. Itiho aokanaita, kamae totahikoa aokanaitere akere.

<sup>17</sup>Nowaiyene hoka nexoa ikiji haliya, nomaotyani akatya. Xakore hoka hakahe hafihini maniya ekaokakisa nohiye hoka nexa nohiye: — Awa atyo himaira. Natyo atyo hetatiye, miyanitiye xoaha. <sup>18</sup>Natyo atyo heko notyaonitere. Nowaini xakore hoka nokaseheta, hoka heko ite nomakamanihare notyaona. Nawaiyoreta atyo kamatinai tyaonitere nali akiti kakoa hoka nali tehitia Xekohaseti notyaonita.

<sup>19</sup>— Hiyeta hoka maika haxairahena hiyaiyehenere tahi, kalikini kaotyakiterehare, exahe jikiniti maniya kaotyakehenere harenae tahi. <sup>20</sup>7-se xorese hiyaiyehenere nokahikoi fihini maniya, exahe 7-kase ouro nomakere xaokanatyakalatinai hiyaiyehenerena meta-haretere atyo exe: 7-kase xaokanatyakalati hiyaiyehenere atyo aimenekoita 7-hare tyakekohatiye hotyalinai. 7-se hiyaiyehenere xorese atyo aimenekoita ekaxaikotyaseharenae — nexa nohiye.

### Iraiti Éfeso Nali Tyaoniterenae Ana

2 — Exakere haxairahena tyakekohatiyenai hotyali Éfeso nali tyaoniterenae kaxaikotyasehare ana: Exe iraiti atyo etake 7-se xorese tokitere hakahe fihini maniya hoka 7-kase ouro nomakere xaokanatyakalatinæ nenekesene tonitere niraene. <sup>2</sup> Waiyekehalakita nomani xisomiterenae. Kalore xahaka nomani, hoka maisa ximaxahareta xihatene kakoa. Maisa iniyalahare nomaseharenæ xawaiyetita. Xahasakaharetita Jesus niraine kakoare aokowiterekaharenæ, xakore hoka maoseratyaliyenai atyo. Nikare xamokahitene xawaiyore ekakoaha maheta. <sup>3</sup> Heko xisaona noximi ximaxamaikoharenehareta, iniyalahare xakore xikaxomokaka nohiyeti hoka. Maisa ximaxahareta hekoti. <sup>4</sup> Xakore hoka inira maisa xawaiyeta nomani. Maisa atyo xawaiyetyare natyo hetatiye akereta. <sup>5</sup> Xotyaxemahena xawenane hetatiye. Xahalakihena iniyalahare xawenane hoka hetati xisomiterehare xisomehitiya. Maisaiya hoka notyoha hoka xiyaokanatyakala kase enawenane aoseta niyeheta. <sup>6</sup> Hoka exe akiti waiye nohiye: maisa xawaiyetyare nicolaíta yerenai tyomitereharenae. Hatyoharenæ maisa waiyeta tehitiya nomani. <sup>7</sup> Hiyeta hoka xikatanakoakore atyo xasema maheta hoka xasemehena Enore Nisekohare iræhenere tyakekohatiye hotyalinai hiye. Jiyahao akahenerenæ ana ite nisa atyali menanehaliti natyaliya kekoaretere Enore hananehare konitare hiyeta hoka kanakaira.

### Iraiti Esmirna Nali Tyaoniterenae Ana

8 — Exakere haxairahena tyakekohatiyenai hotyali Esmirna nali tyaoniterenæ kaxaikotyasehare ana: Exe iraiti atyo etake Hetatiye, Miyanitiye tyaonitere niraene, waini hoka kasehetehenere niraene. <sup>9</sup> Ximakawatiharene waiyekahalakita nomani. Ximaoloxaharene, ximaxiyeharene waiyekahalakita nomani. Xakore atyo hoka Enore nali atyo xikaoloxere kalore. Waiyekahalakita nomani tehitiya judeu aokowiterenæ xakore hoka maisa atyo judeunai xini. Iniyalahare iræ ahitaha xiyaokaka. Ahalakoahaliti anere hotyalinæ atyo. <sup>10</sup> Awa atyo ximairehena ximakawatiharehenere kakoa. Xasemehena, Tihanare tyaite haiyaharenæ xinekonitare berexo ako mohena hasakaharetyaha maheta xiso. Maika 10-ki ferakene ximakawatihare. Maika heko xikinaterere xisaona nokoamaniye xikamane kijiya hoka nisa xomana menanehaliti seriti hoko. <sup>11</sup> Hiyeta hoka xikatanakoakore xasema maheta hoka xasemahena Enore Nisekohare iræhenere tyakekohatiye hotyalinai hiye. Jiyahao akahenerenæ ite maisa wainita hinamaki.

### Iraiti Pérgamo Nali Tyaoniterenae Ana

12 — Exakere haxairahena tyakekohatiyenai hotyali Pérgamo nali tyaoniterenæ kaxaikotyasehare ana: Exe iraiti atyo etake kesekase hinama maniya kawetyakere kakoare niraene. <sup>13</sup> Xisaonitere nali waiyekehalakita nomani. Hatyo nali Ahalakoahaliti nawenakala. Xakore

hoka xisaonita terota noximi maniya. Xityakekota natyo, maisa xahalakisare xawenane nokoamaniyi. Exahe nowakanihare waiyexe Antipas kaxaisaka Ahalakoahaliti nawenakala nali xakore hoka maisa xahalakisare natyo. <sup>14</sup> Xakore hoka inira maisa xawaiyexe nomani. Haiyaharenai xinekonitare Balaão xaotyakiraho tyaonita. Balaão aotyakisa Balaque Israel hotyalinæ iniyalahare maniya awenatikisa maheta. “Hirai-hena ekakoaha hoka tyoha kanakairaha enore metalahare nakaira, exahe hoka tyaonaha ohironæ hiye”, nexa ihiye. <sup>15</sup> Nikare tehitiya haiyaharenai xinekonitarenai nicolaítanæ xaotyakiraho xema tyaonahitaha. Hatyohare maisa waiyeta nomani. <sup>16</sup> Xahalakihena nikare xawenane! Maisaiya hoka haxeroriya notyoheta hoka noxalijinihareya hatyo iniyalahare nomaseharenai kakoa exe kesekase nokanasakota hikoi-tere kakoa. <sup>17</sup> Hiyeta hoka xikatanakoakore xasema maheta hoka xasemehena Enore Nisekohare iræhenere tyakekohatiye hotyalinai hiye. Jiyahao akahenerenæ ana ite nisa nakairati mawaiyahare maná aokahitere. Nisa tehitiyaite sehali iyomere exaliti waitare kakoare. Exaliti waikate taita atyoite waiyore haexare kakoa — nexa.

### Iraiti Tiatira Nali Tyaoniterenae Ana

18 — Exakere haxairahena tyakekohatiyenai hotyali Tiatira nali tyaoniterenæ kaxaikotyasehare ana: Exe iraiti atyo Enore Ityani niraene. Exose atyo werokita, irikati akereta. Ikiji tehitiya werokita, bronze owere irikati hiye xafiratyakere akereta. <sup>19</sup> Kalikini xisomitere waiyekehalakita nomani. Xawaiyexehare, xityakekone, xihatene, heko ximamaxaharenehareneta xisaonitere nokoamaniyi harenæ waiyekehalakita nomani. Hetati xisomitere xahexe kalikini xisomitere waiyekehalakita nomani. <sup>20</sup> Xakore hoka inira maisa xawaiyexe nomani. Maisa xaxikahalohitita Jezabel xinekonita. Enore niraene xakaisasero aokowi xakore hoka nowakaniharenæ iniyalahare maniya awenatikisa. Aotyakisahene hoka ohiro hiye tyaonahitaha, exahe enore metalahare ana nakairati efetatyakahare kanakairahitaha. <sup>21</sup> Waha natyaha iniyalahare háomanaha halakisaha maheta. Xakore hoka maisa enanæ hiye hawénane halakisa aokowita. <sup>22</sup> Hatyo hiyetaite nahokakatene hoka kamakoa ehokotyoha haenalanae kakoa hoka makawatiharehaite kalore. Hoka kalikini ite nikare notyoma, maisa halakisahitaha nikare hawenaneha iniyalahare hatyo ohiro kakoa hoka. <sup>23</sup> Naisaite ityaninai. Hatyaosetaite tyakekohatiye hotyalinæ ana ite waiyekehalakehena: Natyo atyo etake halitinai xahekola kakoa, exahe iyakawatyahitere kakoa waiyoretere. Nabakatya ite xiso hatya xakini xisomehenere akereta.

24 — Xakore hoka haiyaharenai nali Tiatira yerenai atyo maisa hatyo iniyalahare xaotyakiyaho xema tyaonahitaha. Hoka hatyonai atyo maisa waiyorahitaha Ahalakoahaliti xahekolanæ metaharexe aokahitere kakoa. Hatyo nikare tyaoniterenæ hiye niraehena: maisa xoare hatyo xahexe naohitita xihye. <sup>25</sup> Nikarira

xisaona heko nokaokiniheta kijija. <sup>26</sup> Jiyahao akahenerena, heko naokitere akereta tyomehenerena imiyane kijija ite kalorexe namoka, halitinae xekohase tyaonaha maheta. <sup>27</sup> Hoka kinatere ite tyaonaha exahitaha. Kamatihera kase wotoka hoka wamokoty wehokitere tinihaliti waikohe nomakere akereta ite kinatere tyaonaha halitinai xahita. Baba Enore kalorexe mohenerena natyo akereta ite kalorexe namokahene. <sup>28</sup> Nisa ite xorese ferakoahenerena kaotyakitere enomanaha. <sup>29</sup> Hiyeta hoka xikatanakoakore xasema maheta hoka xasemehena Enore Nisekohare irahenerena tyakekohatiye hotyalinai hiye — nexa.

### Iraiti Sardes Nali Tyaoniterena Ana

**3** — Exakere haxairahena tyakekohatiyenai hotyali Sardes nali tyaoniterena kaxaikotyasehare ana: Exe iraiti atyo etake Enore Nisekoharena 7-hare kakoare, 7-se xorese kakoare niraene. Xisomitere waiyekehalakita nomani. Xikaseta xakore atyo xaokowita hoka ekamane akereta atyo xisaonita. <sup>2</sup> Xaiyateretyoa inirere xawenane kakoa hoka maisa xiwainita kaiserehare. Hiyaiya, waiyekehalaka nomani xisomehenerena. Maisa Enore aokitere akereta kaiserehare xini xisaonita. <sup>3</sup> Hoka xotyaxemahenaira koxaka xawaiyorehenerena, xasemaxemahenerehare. Hatyo xema xisaona, xahalakihena iniyalahare xomane. Maisaiya hoka ximaxatyahanetere kaiwarexe akeretaiyo notyoheta xomana. Maisaiya xawaiyoreta notyoaniniheta ferakene kakoa. <sup>4</sup> Xakore hoka haiyaharenai xinekonitarena atyo Sardes nali heko maisa ekaiyaxatyareha haima. Hoka hatyonai atyoite tohena nokakoi imiti iyomere nimere. Waiye nikare kaxomokakitaha. <sup>5</sup> Jiyahao akahenerenaite imiti iyomere ako kaxaisoakisaka. Maisa ite nemaiyarehitita enexarenaha babera menanehalitinae nexare kakoare koata. Baba Enore, exahe anjonai nahalakoaita mametaharehare nira: “Exe halitinai atyo nomaniye”. <sup>6</sup> Hiyeta hoka xikatanakoakore atyo xasema maheta hoka xasemehena Enore Nisekohare irahenerena tyakekohatiye hotyalinai hiye — nexa.

### Iraiti Filadélfia Nali Tyaoniterena Ana

<sup>7</sup> — Exakere haxairahena tyakekohatiyenai hotyali Filadélfia nali tyaoniterena kaxaikotyasehare ana: Exe iraiti atyo Davi ene jafini kakoare niraene. Hatyo atyo waiyexe, aliterexe. Jafi kakoare hoka majiholatyiya hoka maisa xala jihohititene, jhotyiya hoka maisa xala majiholatitene. <sup>8</sup> Waiyekehalakita nomani xisomiterena. Maisa komita ene xikinaterexe xakore hoka niraini xema xisaonita, heko xityakekota natyo. Namajiholatya jihore xomana hoka maisa ite xala hare jhotitene. <sup>9</sup> Xasemehena, haiyaharenai Ahalakoahali xema tyaonahitaha. Judeunae aokowiyahitaha xakore hoka maisa judeunae xini, maoseratyahitaha atyo. Natyoanikisahene ite hoka hakaoliseha kakoa exoaha xahalakoa hoka hatyaosetaite tyotyaha waiyoreha noxawaiyiri xiso kakoa.

<sup>10</sup> — Niraini xityakeko ximehexaikhare maheta. Hatyo hiyetaite nokaxaiko xiso makawatiti hakakoare waikoheko tyohenerena waikohekoare halitinae kahasakaharetyakehenerena xowaka hoka maisa nikare xikaxomokakita. <sup>11</sup> Notyoheta rotitaite. Maika waiye xikaxaikoawi hoka maisa xala hare kaiwita xijiyahao akahenerena hiyeta kaxekakehenerena xomana. <sup>12</sup> Jiyahao akahenerena ite Nenorexi hanako tyaona hoka maisaiya hikoahitita anakota. Naxairatyaite Nenorexi nexare ihiye, exahe Enore nawenakala waitare nexare tehitiaite. Hatyo wenakalati waitare Jerusalém nexare atyoite Enore nalita exoahetehena. Naxairatya tehitiaite nexare waitare ihiye. <sup>13</sup> Hiyeta hoka xikatanakoakore xasema maheta hoka xasemehena Enore Nisekohare irahenerena tyakekohatiye hotyalinai hiye — nexa.

### Iraiti Laodicéia Nali Tyaoniterena Ana

<sup>14</sup> — Exakere haxairahena tyakekohatiyenai hotyali Laodicéia nali tyaoniterena kaxaikotyasehare ana: Exe iraiti atyo etake iraiti aliterexe taita irahenerena. Hetati xowakiya, Enore enokoa waikoheko kaomakehenerena xowakiya tyaonitere niraene: <sup>15</sup> Waiyekehalakita nomani tyoty xisomiterena: Xiso atyo malokaxere akereta xisaonita. Maisa wehexere, watyaxere akereta xini. Wehexere, watyaxere akere-taiya xiso hoka xawaiyetaiyo nomani. <sup>16</sup> Wahasahena malokaxere hoka wahesohititene rota, maisa wiserarene. Hatyo akereta xiso, maisa atyo watyaxere, wehexere akereta hekoti xini xiso hoka nojiraheta rota ite xiso! <sup>17</sup> Hiyaiya, exakere xiraeta: “Wiso atyo wikaoloxere, wikaxiyeharexe, tyoty waokiterehare winali”, xita. Motya waiye xisaonita xaokita xakore hoka maisa xawaiyorexe ximaxiyeharene, ximaxoore we-seharene kakoa. Ximaxiyeharehare, ximaimahiro, ximaxosehare atyo. <sup>18</sup> Hiyeta hoka nairihalikisa xiso hoka ouro kaiserehare, koxaka kaxafiratyakere irikati hiye, xiya noniti hoka aliterexe xikaoloxahare xisaona maheta. Xiyehena imiti iyomerenae noniti hoka xakaimatyoa hoka xatalatya ximaimahirone kahaharetyakere maheta. Xiyehena tehitia xoseti waira noniti hoka xiyose ako xamoka hoka xiyaiya akatya maheta.

<sup>19</sup> — Halitinai nawaiyetiterenai nowatyalita, exahe howitiharexe kakoa naotyakijita. Nawaiyetita xiso hoka nikare inira kinatyaxa niraeta xikakoa. Xisaohenaira niraini xema. Xaiyateretyoaira hoka iniyalahare xomane xahalakisa. <sup>20</sup> Xasemehena: Hatikanase notyaonita hoka namokotita. Xala xamaniya sema noxako hoka majiholatya hoka nisoaiya ehanako hoka nokanakairiya ekakoa hoka hatyo tehitiaiyo kanakaira nokakoi. <sup>21</sup> Xalanae xamani ite jiyahao akatya hoka naokanikisahene ite nokahakali haliya. Hiyaiya, nojiyahao akatya hoka kalikini Baba nokahakala haliya notyokitere akere-taite tyaonaha. <sup>22</sup> Hiyeta hoka xikatanakoakore xasema maheta hoka xasemehena Enore Nisekohare irahenerena tyakekohatiye hotyalinai hiye — nexa.

### Xerati Ihalahaliti Enokoa Nali

**4** Hatyo najikinita nokaxawaiyanikisakihitiya hoka nowaiya enokoa nali jihilati majiholatyoare. Hatyaoseta hetatiye iraihenere iraihitiya nokakoi. Iniraene motya koneta nemahare. — Hisohena ali enokoa hoka nahotikisa homana xoalini hare kaotyakehenere exe harenae najikinita — nexa.

<sup>2</sup> Nexa nohiye hoka Isekohaliti Waiyexe kolatya rota natyo enokoa xeta. Hatyo nali hatya tyokita kalorexe nokahakalako. <sup>3</sup> Itho weroka, aokanaita sehalise jaspe, exahe sardônio xoaha werokene akereta. Okahakalati hoko haliya kaxore werokita sehalise esmeralda werokene akereta, tihore. <sup>4</sup> Okahakalati hoko haliya 24-okahakalatinae hoka 24-hare inityohalitinai tyokahitaha enakoa. Imiti iyomere akoreha, exahe seriti hoko ouro nomakere seriyeha. <sup>5</sup> Hoka hatyo okahakalati hiyeta kahihiye, xakoti, talolore harenae hikoi-ta. Hatyo okahalakati naheta maniya 7-kase xaokanatyakalati takoare tyaonita, 7-hare Enore Nisekoharenae atyo. <sup>6</sup> Okahakalati naheta maniya tyaonita xoalinihare motya onexa, motya balaxokoxa hoka exaihako maniya kawaiyakitere akereta.

Okahakalati haliya 4-harenai tyaonita kirakaharenai, xakore hoka haliti akereta ahokotyahitaha. Kahare exosenaiha itikolali maniya, ihiniri maniya xoaha. <sup>7</sup> Hatya atyo motya leão. Hatya tehitiya motya bowi. Hatya tehitiya hoka itho motya haliti tiho. Hatya tehitiya motya aliwa ainakoiterehare.

<sup>8</sup> Exe 4-harenai atyo 6-kano tanexeha makere. Nikare tehitiya ekanoha hiye exosenaiha tyaonita, eheno, ekatyahe maniya hoka. Hatyo 4-harenai xerita, maisa amematyoareha haxeraneha kakoa, ferakoa, makiya xeretaha minita: — Waiyexe, waiyexe, waiyexe atyo Xekohaseti Enore maxaixahetyakahare niyaterexe. Toahiya tyaonitere, kalikini tyaonitere, exahe makani, kamaetali tyaoneta menehenere — nexa xerahitaha.

<sup>9</sup> Xerahitaha hoka xaiminisati, xaerorityati, ihalahaliti harenae aokahitaha hatyo Makamanehare okahakalati koa tyokitere ana. <sup>10</sup> Nikare xerahitaha hoka 24-hare inityohalitinai exoahitaha ehaliya hakaoliha kakoa, aitoakisaha haserihokonaeha hoka okahakalati haliya mokahene hoka nexahitaha: <sup>11</sup> — Wiyekohase Enore! Hiso atyo hawaiye xaexakerityaka, xaiminisaka, xaerorityaka. Hiyaiya, Hiso atyo hisoma tyotya xoalini hare hiyaokala ximita hoka kaotyaka, tyaonaha.

### Babera, Kalanero Mokose Xoaha

**5** Hatyaoseta nowaiyehena atyo, hatyo okahakalatikoa tyokitere kahekoa fihini maniya nowaiya baberane jihiririkisaka. Xairatyaoare tyaonita enakoako, henekoa maniya xoaha. Ihiyalatyakahare tyaonita 7-hiyalatyakalati kakoa, babera mawatyalisakahare tyaona maheta. <sup>2</sup> Nowaiya tehitiya anjo kinaterexe hoka kinatyaxa kawiyatya: — Xala waiyexeharexe kaiserehare hoka halalaka 7-hiyalatyakalatinai hoka omereka babera? nexa axa.

<sup>3</sup> Hoka maisa xala hare aokitere akereta aka hoka omerekare hatyo baberane hoka waiyare enanekoa. Maisa enokoarenae, waikohekoarenae, exahe maisa waikohe katyahexenai hekoti aka. <sup>4</sup> Hatyo hiyeta notiya kalore, maisa xala hare waiyexeharexe kaiserehare aka aokitere akereta omerekare babera hoka waiyare enakoa hoka.

<sup>5</sup> Hatyaoseta hatya 24-hare inityohalitinai konitare irae nokakoi: — Awa atyo hitiya. Hiyaiyehena! Judá hotyalihare leãoxa, xekohaseti Davi jikolahare jiyahao akatya hoka hatyoiya halalaka 7-hiyalatyakalati hoka omereka babera — nexa nohiye.

<sup>6</sup> Hatyaoseta nowaiyehena atyo, Kalanero Mokose tityoita okahakalati nenekese hoka hatyo 4-harenai, exahe 24-hare inityohalitinai xoaha tityoa-hokotyahitene. Motya akere koxaka kaxaisaka hoka kaseheta. Exotawanai hoka 7, exahe exosenai hoka 7-tehitiya. Hatyo exosenai atyo Enore Nisekohare 7-harenai. Enore atyo axikaita hatyo isekohalitinai waiyaha maheta hakakoare waikohekoa.

<sup>7</sup> Hatyaoseta Kalanero Mokose xane okahakalatikoa tyokitere haliya hoka iya babera ekahekoata.

<sup>8</sup> Hatyaoseta xane iyene hoka hatyo 4-harenai, 24-hare inityohalitinai exoa meholokoa Kalanero Mokose nahalako. Inihatyakaha harpa, tinihalitise ouro nomakere kakoareha makere. Hatyo tinihalitisenai kaisero tyaonita incenso kakoare. Hatyo incenso atyo Enore kaxaikone hotyali niraexala. <sup>9</sup> Exoaha hakaoliseha kakoa hoka waitare xerati xerahita: — Hiso atyo hawaiyexehare kaiserehare hoka ehokore babera hiya hoka 7-hiyalatyakalati hahalalaka hoka homereka babera. Hiyaiya, hiso atyo hiwaini atyalihose xaimaholatyaka hiye hoka hitimalaxa kakoa hiyeheta kahare haliti tyotya haliti hotyaliharenae konita, haxako xakini iraeterena konita, kiyere, iyomere harenae konita.

<sup>10</sup> Hiyeheta haliti hoka Enore wakanehare sacerdote hamokahene hoka hahenahaite Wiyekohase Enore ana hoka kalorexe ite tyaonaha hoka waikohekoa tyaoniterena xekohase tyaohenaha — nexa xeraha.

<sup>11</sup> Hatyaoseta nawahakohitiya hoka nowaiya kahare anjonai. Hisoaka, hisoaka kaiserehare. Tityoa-hokotyahitaha okahakalati, 4-harenae, 24-hare inityohalitinai hoko haliya.

<sup>12</sup> — Kalanero Mokose atyo kaxaisaka hoka ehokore atyo kalorexe, kinaterexe, kaxiyeharexe kahare, kaxaiminisakere, kaihalaharetyakere, kaxawaiyolinisakere tyaona — nexaha, kinatyaxa xeraha.

<sup>13</sup> Hatyaoseta nasemehena atyo, tyotya enokoa tyaoniterenai, waikohekoa tyaoniterenai, waikohe katyahe tyaoniterenai, exahe onexa tyaoniterenai xoaha tehitiya xerahitaha: — Maika okahakalatikoa tyokitere, exahe Kalanero Mokose kaxaixakerityaka, kaxaiminisaka, kaxaeroretyaka, kaxaiyatelikisaka mene matyotenehare — nexaha.

<sup>14</sup> Hatyaoseta hatyo 4-harenae ekoaxatyahitaha: — Nikare! Nikare tehitiya waokita — nexaha. Hatyaoseta 24-hare inityohalitinai exoaha hakaoliseha kakoa hoka awaiyetyahene.



### Hiyalatyakalatinae

**6** Hatyaoseta nowaiyehena atyo, Kalanero Mokose hiyalatyakalati hatya halalaka hoka 4-harenae konitare hatya iraehehena kintatyaxa, motya talolore: — Hisohena — nexa. <sup>2</sup> Hatyaoseta nowaiyehena atyo, kawalo iyomere nowaiya. Kawalo henore atyo kahitonexe. Hatyaoseta isaha enomana waiyexe seritihoko kalorexexa tyaona maheta. Hatyaoseta xane jiyahao akatya maheta xane hoka jiyahao akatya.

<sup>3</sup> Hatyaoseta Kalanero Mokose halalahitiya ihiyetare hiyalatyakalati hoka hatisa hatyo 4-harenae konitare iraehehitiya: — Hisohena — nexa. <sup>4</sup> Hatyaoseta nowaiyehena atyo, nowaiya kawalo xotere. Hatyo kawalo henore kaxaiyatelikisaka axaisakakoanikisa halitinae hoka aisakakoaha maheta. Kalorexexa kesekase kaxekaka enomana.

<sup>5</sup> Hatyaoseta Kalanero Mokose halalahitiya ehanamene hiyalatyakalati. Hoka nasema hatya 4-harenae konitarenae niraene: — Hisohena — nexa. Hatyaoseta nowaiyehena atyo, kawalo hotero nowaiya. Hatyo kawalo heno tyokitere atyo bexatyakalati kahekoare. <sup>6</sup> Nasemehitiya, motya atyo hatya iraehehena 4-harenae konitare: — Hatya haliti ite hahena haferakene hoka xisehena enomana halitrone trigohe xamani, hanama litrone cevadehe xamani ehatene katyahe. Awa atyo kolotenitiya xakaketatya, exahe vinhoxa hoka — nexa.

<sup>7</sup> Hatyaoseta Kalanero Mokose halalahitiya exalakakoane hiyalatyakalati. Nasemehena atyo, hatya tehitiya iraihitiya hatyo 4-harenae konitare: — Hisohena — nexa. <sup>8</sup> Nowaiyehena atyo, kawalo jikere nowaiya. Hatyo kawalo jikere henore nexare atyo Kamati. Hades aokahitere xane erota exema. (Kamatinae tyaonitere aose nali atyo Hades). Iyateliti kaxekaka enomanaha aisaha maheta kahare haliti xaisakakoati, nakiti, kahehaliti, nisarenae xaihako maniyata.

### Jesus Tyakekohenerenae Kakoa Atyoite Kahalakoa-haretyoaka

(João 15.18-21; 1 Coríntios 4.9-13; Filipenses 1.28-30; 2 Timóteo 3.10-13)

<sup>9</sup> Hatyaoseta Kalanero Mokose halalahitiya hiyalatyakalati, hatyo kakoita 5-hena. Nowaiyehena atyo, incenso keratyakaose katyahe atyo halitinai niyawaharenai tyaonita. Waikohekoa tyaonitateraha xowakiya Enore niraene xema tyaonahitaha, exahe xakaihakatya Enore niraine halitinai hiye hoka hatyo hiyeta kaxaisakaha. <sup>10</sup> Kawisahitaha kintatyaxa: — Xekohaseti maxaexahetyakahare niyaterexe, waiyexe, aliterexe: Xoana xowakaite hakatolikoarehena wiso? Exahe iniyalahare hamohena wiyaisasena waikohekoa tyaonitarenae? nexa kawiyatyaha.

<sup>11</sup> Nexa kawiyatyaha hoka inihatyakaha imiti iyomere kaxekaka enomanaha hoka ininae kawiniha aoka. Hoka ihinaeharenai kaxaisakahenahere akereta kaxaisaka hotohare hoka hatyo najikinita katolikoaretyahene aokowi.

<sup>12</sup> Hatyaoseta nowaiyehena atyo, Kalanero Mokose halalahitiya hiyalatyakalati, hatyo kakoita 6-hena. Hoka waikohe kalore tatakoo, kamai atyo kiyere tyaona, motya imiti hotero. Kaimare hoka xotya tyaona, motya timalati. <sup>13</sup> Xoresenai enokoata exoa waikohekoa, motya halohalo kate kintawyawiniti xalawatya hoka iri ehohase ixoita ene. <sup>14</sup> Enokoa maiyareheta baberane kajihiririkisakihititere akereta. Tyairinai, tyoty iyoliroti xoaha kakikisakaheta enawenaneha aoseta. <sup>15</sup> Kaheneharehena hoka hatyo hiyeta tyoty halitinai mairaha. Xekohasetinai, kalorexexenai, kaoloxerenai, sorare xekohasenai, kinaterexenai, wakaharenai, mawakahareneharenai xoaha tekoaha tyairi koni hoka xane teroaha tyairinae nakoako, exahe sehali katyahe kakoakore tyairi ako.

<sup>16</sup> Mairaha hoka kawiyatyaha tyairi, sehalinai xoaha ana: — Xexoahena wiheno hoka xateroakisa wiso tyokitere okahakalatikoa nonitata, exahe Kalanero Mokose eharetere wihiye nonitata. <sup>17</sup> Hiyaiya, kalikini atyo exeharene ferakene xane hikoa hoka xalaiyatya aiyasetyoahena? nexaha kawiyatyaha hamairaneha.

### 144.000-hare Israel Yerenai

**7** Hatyo najikinita nowaiya xalakakoa anjonai. Hatya tityoita kamai nihikoane maniya, hatya tityoita kamai xisoane maniya. Hatya tityoita tihalo kaokene maniya, hatya tityoita one kaokene maniya xoaha. Watyalyahita xalakakoa hoholati waikohekoarenae, maisa xoare hohola hoholaitene maheta, maisa one kaloxere hekoti, exahe atyanae hekoti hoholaita maheta.

<sup>2</sup> Hatyaoseta nowaiya hatya anjo. Ainakoita kamai nihikoane maniyata hoka tyoita. Enore tyoita minitere kaferoxyatyakala kahekoare hoka kintatyaxa kawiyatyaha 4-hare anjonai ana, hatyonai atyo koxaka kaxaiyatelikisaka, waikohekoa, onexa xoaha iniyalahare mokaha maheta. <sup>3</sup> Hoka anjo nexa: — Awaira atyo xaiyalaharetya waikohekoa, onexa, atyakatenai hekoti. Ite wakaferoxyatya hotohare Enore koamaniya tyaonitarenai ityaollikoa hoka — nexa kintatyaxa kawiyatyaha.

<sup>4</sup> Hatyaoseta Enore wakaneharenai kaferoxyatyaha ityaolinaeha hiye. Ihatyahitene hoka nasemene: 144.000-hare kaferoxyatyaha, Israel hotyaliharenae taita. <sup>5</sup> Judá hotyalihare atyo 12.000-hare, Rúbem hotyalihare hoka 12.000-hare. Gade hotyalihare hoka 12.000-hare. <sup>6</sup> Aser hotyalihare hoka 12.000-hare. Naf-tali hotyalihare hoka 12.000-hare. Manassés hotyalihare hoka 12.000-hare. <sup>7</sup> Simeão hotyalihare hoka 12.000-hare. Levi hotyalihare hoka 12.000-hare. Issacar hotyalihare hoka 12.000-hare. <sup>8</sup> Zebulom hotyalihare hoka 12.000-hare. José hotyalihare hoka 12.000-hare. Benjamim hotyalihare hoka 12.000-hare, eko xoaha. Ehoisakoaneha hoka 144.000-hare kaferoxyatyakaha.

### Haliti Hisoakere

<sup>9</sup> Hatyo najikinita nowaiyehena atyo, hisoakere haliti nowaiya. Hisoaka hoka maisaiya xala hare aliyakere ihatitene. Hatyo halitinai waikohekoa nihatyakatare, exahe tyotya haliti hotyalinai konitarenai, kiyere, iyomere, haxako xakini iraetere konitarenai. Tityoahitaha Enore nokahakala hoko haliya, Kalanero Mokose hoko haliya hoka. Imiti iyomere akoreha taita, xoloto hana akerehare kahekoareha. <sup>10</sup> — Wenorexa, okahakalati koa tyokitereta, Kalanero Mokose hoka iye-heta wiso iniyalahare nonitata — nexa kinatyaxa kawiyatyaha.

<sup>11</sup> Tyotya anjonai okahakalati hoko haliya tityoahitaha, exahe hatyo 4-harenai, 24-hare inityohalitinai xoaha hoka. Hatyaoseta anjonai hakaolise kakoa exoaha hoka meholokoaha, hatiho waikoa mokaha, awaiyityaha maheta Enore. <sup>12</sup> Nexahitaha: — Ehekore! Xaixerityati, iyateliti, waiyoliniti, ihalahaliti, xaiminisati xoaha atyo Wenorexa anere matyotenehare. Ehekore! nexaha toli.

<sup>13</sup> Hatyaoseta hatya inityohaliti 24-harenae konitare axa natyo: — Xalanae imiti iyomere akore tyaonita? Alyakota tyoaha? nexa nohiye. <sup>14</sup> Hoka nomi ihiye: — Maisa nawaiyorexe. Waiyekehalakita atyo homana, kalorexe — nomi nekoaxatya. Hoka nexa nohiye: — Exenai atyo waikohekoa tyaonahitere xowaka kalore iniyalahare kaxomokaka hoka tihehenahitaha haimanaeha Kalanero Mokose timalaxa kakoa hoka iyoma tyaonaha. <sup>15</sup> Hatyo hiyeta Enore nokahakalakoa haliya tyaonahitaha, exahe Enore hanako hoka hakahitaha enomana ferakoa, makiya xoaha. Hatyo okahakalati koa tyokitere ite tyaona enekonyaha hoka kaxaikoahene. <sup>16</sup> Exe hekota atyoite maisa nakehenahititaha, oinehenahititaha. Maisaiya kamae, hatya watere hekoti kerahenahititene. <sup>17</sup> Hiyaiya, Kalanero Mokose okahalakati nenekesene tyaonitere atyoite kaxaikohenahene. Kolatyahene ite one waiyexe maniya hoka erakisahenahenite one mananehalitiya kakoa. Enore ite tyotya enosexataliha tiriheta — nexa nohiye.

### Miyanityehena Hiyalatyakalati Halalakaka

**8** Hatyaoseta Kalanero Mokose halalahitiya hiyalatyakalati, hatyo kakoita 7-hena. Halalaka hoka hatyaoseta enokoa nali mema tyaonaha, xakore hoka maisa waha xini.

<sup>2</sup> Hatyaoseta nowaiya 7-hare anjonai, Enore haliya tityoita. Hatyaoseta 7-xaemahalikisakalati koneta kaxekaka enomanaha.

<sup>3</sup> Hatyaoseta hatya anjo tinihaliti ouro nomakere incenso nitini kakoare tyoa tityoa incenso keratyaka aose haliya. Kahare incenso kaxekaka enomana hoka ahohisakoatya maheta tyotya Enore kaxaikone hotyali niraexala kakoare. Hoka ouro nomakere keratyakalati aose keratene maheta okahakalati haliya. <sup>4</sup> Enore haliya anjo tyaonitere kahekoata incenso keratyaka

niye ainakoita manene Enore kaxaikone hotyali niraexala kakoare. <sup>5</sup> Hatyaoseta anjo iya tinihaliti incenso nitini hoka irikati iya incenso kakeratyakitere aoseta hoka irikati moka enako hoka waikohekoa xawatene. Hoka talolore, xakoti, kahihiye, exahe waikohekoa harenae hoka tatakoo.

### Koneta Xaemahalikisaka

<sup>6</sup> Hatyaoseta 7-hare anjonai memere tyaonaha koneta aemahalikisaha maheta. <sup>7</sup> Hatyaoseta hetatiye anjo aemahalikisa koneta hoka irikati one sehalise kakoare, timalati kakoare, kaolatyoanexe exoa waikohekoa hoka keratya waikohe holinikoa. Atyakatenai, ime harenae hoka holini kera.

<sup>8</sup> Hatyaoseta hatya anjo aemahalikisa koneta, hatyo kakoita hinamehena. Aemahalikisa hoka motya tyairi kiriterehare kaxawatyaka one kaloxere xaiya hoka holinixa one timalaxa tyaona. <sup>9</sup> Hoka holini waini onexa tyaoniterenae, exahe kanowa kalorexena hoka holini kamawenekoaretyakaha.

<sup>10</sup> Hatyaoseta hatya anjo aemahalikihitiya koneta, hatyo kakoita hanamehena. Aemahalikisa koneta hoka kalorexe xorese exoa enokoata, motya xaokanatyakalati kalorexe takoare. Exoa holini onexaiyanai, onesenai xoaha heno. <sup>11</sup> Hatyo xorese nexare atyo Tihero. Tihe hoka onexaiyanae, onesenae xoaha exoa hoka tihexa mokahene. Hiyeta hoka kahare haliti waini terehenaherene hiyeta.

<sup>12</sup> Hatyaoseta hatya anjo aemahalikihitiya koneta, hatyo kakoita 4-hena. Aemahalikisa koneta hoka kamai, kaimare, xoresenae kakawe xomokaka hoka ferakoa hoka kamai maisa waiye aokanahenahitita. Makiya hoka nikare kaimare, xoresenai hoka maisa waiye aokanahenahititaha.

<sup>13</sup> Hatyaoseta nawahakotya hoka nasema hatya aliwa eno ainakoita hoka kinatyaxa kawiyatyaha: — Maika waikohekoa tyaoniterenai kirakoane tyaonaha hana-maki hoka "Akai, akai, akai", nehenaha, semehenaha koneta nemahare, hanama anjonae aemahalikihena hoka — nexa.

### E5-ne Koneta Xaimahalikisaka

**9** Hatyaoseta hatya anjo aemahalikihitiya koneta, hatyo kakoita 5-hena. Aemahalikisa koneta hoka nowaiya hatya xorese xexoane enokoata. Exoa waikohekoa hoka kaxekaka enomana toloko kalorexe jihola majiholatyakala. <sup>2</sup> Majiholatya toloko kalorexe hoka jimere hikoa. Motya jihatyakalati kalorexe akota hikoane hoka talatya kamae. Kamae, enokoa xoaha makaliro tyaona jimere toloko akota hikoahenere hiyeta. <sup>3</sup> Hatyaoseta hatyo jimere konita iri toli hikoa hoka waikohekoa exoa. Hoka iyateliti kaxekaka enomanaha hoka xakolokoa akereta xakarexeha.

<sup>4</sup> Iraeha ihiyeha hoka atya, ime, xolani hare waikoa hikoitereharenai maisa aiyalaharetyahitaha maheta. Hoka Enore kaferoxatyakala kakoa makaferoxatyakaharenae ityaolinaeha hiye taita xakaka aokaha. <sup>5</sup> Hoka

maisa atyo halitinai xaisaka aokahitaha iri toli hiye, xakore hoka exewaolitikisakaha taita atyo aokaha 5-li kaimare niyahare. Ixatene kahe atyo motya xakolokoa xatene kahe. <sup>6</sup> Hatyo iri xahenaherene 5-li kaimare naita kasani halitinai waini xakorete aokowiha hoka maisa ite wainahitaha. Waini kaiserehare xakore ite aokowihitaha hoka maisaiya wainahitaha.

<sup>7</sup> Hatyo irinai atyo motya kawalo memere tyaonitererehare xaisakakoati ana akerehare. Eserinae hiye seritihoko motya ouro nomakere. Itihonaiha hoka motya haliti tiho. <sup>8</sup> Esekaseha hoka motya ohiro sekase, enaikoliha hoka motya leão naikoli. <sup>9</sup> Motya kamatihera taose tyaonita itikolali hiye itikolali talatyakala maheta. Kataneroha hoka etanenaeha kaimahareta, motya kahare kawalonai karosa kakoa temitererehare xaisakakoati ana akereta atyo kaemahareta. <sup>10</sup> Kaihoreha, hoka inihoha hiye enokolaha xakolokoa akere-ta. Hoka haihoha kakoa xakahitaha halitinae 5-li kaimare niyahare. <sup>11</sup> Kaxekohasexeha hoka wakatyahitene. Toloko hatekoakore kaxaikotyasehare anjo atyo exekohaseha. Hebraico xako atyo Abadom enexare hoka grego xako atyo Apolião enexare. Xoalini hare mawenekoaretyasehare hoka nikare enexare. <sup>12</sup> Nikare tyaonaha hoka hetatiye kaheneharexe koxaka jiya. Xakore hoka hekotata hinama kaheneharexe enahetaha maniya.

#### E6-ni Koneta Xaimahalikisaka

<sup>13</sup> Hatyaoseta hatya anjo aimahalikihitiya koneta, hatyo kakoita 6-hena. Hatyaoseta nasema xakoti tyoitere xalakakoa tononako maniata, ouro nomakere keratyakalati aose Enore nahalakoa tyaonitereta.

<sup>14</sup> Hoka nexa anjo koneta aimahalikihenerere hiye: — Hamaxolahetehena 4-hare anjonae olatyoare one kaloxere Eufrates haliya tyaoniterena — nexa.

<sup>15</sup> Nexa hoka maxolahenahitahene. Hatyo ferakene, hatyo kaimarene, hatyo terehokoane niyahare memere tyaonahitaha kahare halitinai aisaha maheta.

<sup>16</sup> Exowaka kawalonai, kawalohenorenai hisoaka tyaonaha, 200.000.000 harenai. Nasema ixihatyakaha tahi. <sup>17</sup> Nokaxawaiyanikisaki hoka nowaiya kawalonai, eheno tyokiterena hare. Itikolaliha talatyakala irikati akerehare xotere, sehali safira akerehare tihore, enxofre akerehare jikere xoaha. Kawalonae seri hoka motya leão seri. Ekanasakota hikoita irikati, jimere, enxofre xoaha. <sup>18</sup> Nikare hikoita irikati, jimere, enxofre xoaha ekanasakotaha hoka haliti aisaha kahare.

<sup>19</sup> Kawalonai niyaterere atyo ekanasakonaeha, inihonaeha xoaha hiye tyaonita. Inihoha motya owi haseri kakoare hoka tyalokehekoaita halitinai.

<sup>20</sup> Irikati, jimere, enxofre xoaha hiye kahare haliti waini, xakore hoka makamanehenerenai maisa halakisare iniyalahare háomaneha. Heko tyaonahitaha tihanare koamaniya. Maisa halakisareha hawenane enore metalaharenae koamaniya. Hatyoharenae xakore atyo ouro, prata, kamatihera bronze, sehali harenae nomakere, atya taose nomakere. Maisa waiyakatyareha, maisa semakatyareha, maisa tonareha xakore hoka

tyaonahitaha ekoamaniya. <sup>21</sup> Hatyo makamanehenerenai maisa halakisareha haxaisaneha halitinai, maisa halakisareha hahaholihahareneha, maisa halakisareha ohironai hawatyaliniha, maisa halakisareha hakaiwareneha.

#### Anjo, Baberanesse Xoaha

**10** Hatyaoseta nowaiya hatya anjo kinaterexe exoahena enokoata. Inima atyo kaiminiti, kaxore tyaonita eseri hiye. Itiho weroka kamai werokitere akereta. Ekasahenai hoka motya irikati takoiterehare. <sup>2</sup> Ekahekoa baberanesse omerekoare tyaonita. Exoa enokoata hoka hakiji fihini maniya moka onexa hoka hawatone maniya waikohekoa moka <sup>3</sup> hoka kawiyatya kinatyaxa. Exako motya leão tyorera. Kawihenerere najikinita 7-talolore ekoaxatene kalorexe emahaliti kakoa. <sup>4</sup> Iraiherenahere xowaka naxairatya naokowihena hoka nasema iraiti enokoata: — Awa atyo xoalini hare haxairatya, awa atyo hiyakaihena hatya hiye exe talolore irahenerere — nexa nohiye.

<sup>5</sup> Hatyaoseta anjo nowaiyehenerere onexa, waikohekoa tityoahenerere hakahe fihini maniya eno xeta kete-ka. <sup>6</sup> Hoka Enore heko makamanehare tyaoniterere, tyomehenerere enokoata, waikohe, one, tyoty tyaonitererehare enakoa nexare kaexaretya hoka nexa: — Maisa wahehetere. <sup>7</sup> Miyanitiye anjo koneta aemahalikihenerere xowaka ite Enore haxahekola metaharetere tyomehena, toahiya xakaitere hawakaneharenae iraiti xakaisaseharenae hiye akereta — nexa nohiye.

<sup>8</sup> Hatyaoseta enokoata irahenerere nokakoi iraihitia nokakoi: — Hiyane hiyehena anjo onexa, waikohekoa xoaha tityoitere kahekoata baberanesse omerekoare — nexa nohiye. <sup>9</sup> Noxani hoka naxa baberanesse anjo hoka nexa nohiye: — Ahá, hotohenene hoka hikanakairehenerene. Hajako ite tihe hoka hikanasako ite wiya, motya maha.

<sup>10</sup> Hatyaoseta niyene anjo kahekoata hoka nokanakairini. Nokanasako wiya, motya maha. Hoka nokanakairihenerere najikinita najako tihe.

<sup>11</sup> Hatyaoseta nexaha nohiye: — Enore niraene ite hiyakaihitiya haliti hotyalinae tahi, iyomere, kiyere harenae tahi, haxako, haxako xakini iraheterere tahi, exahere kalorexena tahi — nexa anjo irae nokakoi.

#### Hinama Iraityatienae

**11** Hatyo najikinita kaxekaka nomani xaimenekotyakalati atyakase akerehare hoka nexaha nohiye: — Nikahena hiyane haimenekohena Iraexatyakalati Hana, keratyakalati aose xoaha. Haiyaharenai tyaonita Iraexatyakalati Hanako, awaiyityahitaha Enore. Hihatehena hatyo halitinai. <sup>2</sup> Xakore hoka awa atyo haimenekohena wetekona, Iraexatyakalati Hana teneno maniya henekoa tyaoniterena. Enore maniya mawenaneharenai hotyalinae anere atyo kahalakisaka hoka 42-ri kaimare ite tohenaha wenakalati waiyexe nali — nexa nohiye. <sup>3</sup> — Naxikatyaite hinama haliti niraini kakoare. Imiti tataolate nimerehaite hoka

xakaihenaha ite Enore niraine haliti hotyalinai ana 1.260-ki ferakene — nexa nohiye.

<sup>4</sup> Exakere kaxawaiyekehalakatya hatyo hinama haliti: Hinama kate oliveira kate, hinama kase xaokanatyakalati xoaha. Tityoare tyaonita waikohekoa nihatyaka Xekohasehare nahalakoa. <sup>5</sup> Xala xamaniya kawe mokahene aokowi hoka ekanasakotahaiya hikoa irikati hoka mehotyaiya hahalakoaharenai. Nikareya xala xamani iniyalahare mokahene hoka kaxaisakaiya. <sup>6</sup> Hatyo hinama haliti atyo iyateliti kakoare enokoa jihatya hoka maonene maheta Enore niraene xakaihahitere nase. Iyateliti kakoareha one timalati aikawatyaha maheta, exahe ahokakatyaha maheta waikohekoa tyaoniterenae hawarehare kahehaliti kakoa haxaokalaha ximita.

<sup>7</sup> Miyatyaha ite haxakainiha iraiti hoka kirakahare toloko hatekoakoretare ite kahalakoaharehena ekakoaha hoka aisahene. <sup>8</sup> Aisahenite hoka eháreha ite hekota etolisoare tyaona kalorexe wenakalati náhota. Hatyo nali Exekohaseha kaberekotyaka atyalihose xaimaholatyaka hiye hoka kaxaisaka. Wenakalati nexare atyo Sodoma, Egito xoaha. (Hatyo exalitiniae aimenekoita iniyalahare aose.) <sup>9</sup> Waikohekoa nihatyaka tyaoniterenaite waiyaha ekamaneha. Kiyere, iyomere harenae, haxako xakini iraitere harenae waiyaha ekamaneha hanamaki ferakene mokotexe. Maisaite halakisahitene kaxafityakaha maheta. <sup>10</sup> Hoka waikohekoa tyaoniterenae ite ihalahareha exe hinamahare haliti kamane hiyeta. Kanakaira akatyahaite, terakatya-haite, axikatyakakoahenaha ite xalini hare maxaimaneharetata. Koxaka howitihare kaiserehare mokaha halitinai nawenane hoka hatyo hiyeta ihalahareha ekamaneha kakoa.

<sup>11</sup> Xakore hoka hatyo hanamaki ferakene mokotexe najikinita ite Enore nalita xaomomati xekasekisakalati tyoia isoa ihiyeha hoka tityoahenahitaha. Tityoahenahitaha ite hoka tyotya waiyehenerenenae ite mairaha kalore. <sup>12</sup> Hatyaoseta semehenaha atyo, kinatyaxa iraiti semaha enokoata: — Xisohena ali — nexa hatyo hinamahare hiye. Enahalakoaharenae wahakotitere nase hatyo hinama iraiti xakaisaseharenae enokoa xeta xaneha kaiminiti xema.

<sup>13</sup> Hatyo xowaka kalore waikohe tatakoo hoka kahare hati exoa hatyo wenakalatikoo nali, exahe 7.000-hare haliti waini. Makamanehenerenai mairaha kalore hoka aexakerityaha Enore enokoa nali tyaonitere niyaterere.

<sup>14</sup> Koxaka ihinamene kaheneharexe jiya. Hoka xasemehena, ehanamene haxeroreta kaotyakehena.

#### E7-ni Koneta Xaimahalikisaka

<sup>15</sup> Hatyaoseta hatya anjo aemahalikihitiya koneta, hatyo kakoita 7-hena. Aimahalikisa koneta hoka enokoata kinatyaxa iraitinai nehena: — Kalikini atyo iyateliti Wiyekohase ana tyaona, exahe Enore Kalorexe Aohenere ana tyaona waikohekoa nali, hoka Kalorexe ite tyaona menehena matyotenehare — nexaha.

<sup>16</sup> Hatyaoseta 24-hare inityo

halitinai tyokahitere Enore nokahakala nahalakoa exoaha hakaolise kakoo hoka meholokoaha waikoo hatihoha kakoo hoka awaiyetyaha Enore hoka nexaha: <sup>17</sup> — Xekohaseti Enore maxaixahityakahare niyaterere, toahiya hisaonita, exahe kalini hoka heko hisaonita. Hiso atyo hikinaterere hoka hiyaterere ximita kalini Xekohaseti hisaonita ali waikohekoa hoka hatyo hiyeta hawaiyeta womana. <sup>18</sup> Waikohekoa nihatyaka tyaoniterenai eharahitaha hihiye, hoka kalini atyo iniyalahare exomokakaha aose hikoo. Kalini kamatinai kaseneheta ferakene hikoahena hoka hasemehena enómaneha hoka enómaneha akereta hamohenahene. Hoka hiwakaneharenai iraiti xakaisaseharenai, exahe tyotya hikoamaniya tyaoniterenai hoka waiye ite hamohenahene. Aiminijitere Hiso, kalorexena, wakaharenare hare hoka waiyexe hiyomotene ferakene hikoo. Hoka wenati aiyalaharetiterenai mehotyakaose ferakene hikoo — nexa hatyo 24-hare inityohalitinai.

<sup>19</sup> Hatyaoseta Iraexatyakalati Hana, Enore anere enokoa tyaonitere majiholatyoa hoka hatyoako kawaiyaka kajalise Enore xairala xaotyakiraho kakoare. Kahihiyeha, iraiti, talolore, harenae tyaona. Waikohekoa maniyaha hoka xairirikoati, exahe one isemaha kakoare tyaona.

#### Ohiro, Owi Kalorexe Kakijiye Xoaha

**12** Hatyaoseta enokoa nali kaotyaka kalore metaharexe, amairakisare. Hatyo atyo hatya ohiro. Inima atyo kamai, ikijinai katyahe kaimare. Seritihoko tyaonita eseri hiye 12-se xorese kakoare. <sup>2</sup> Tifalo hoka xoima kaweta ihiyeha hoka kinatyaxa waolitita, okoi xoima tyoahena hoka.

<sup>3</sup> Hatyaoseta enokoa xalini hare metaharexe kaotyakehitiya. Nowaiya owi xotere kalorexe, kakijiye. 7-seriye, ekaiyehe nihatyaka seritihoko tyaonita, exahe hoka 10-xotawa eserina hiye. <sup>4</sup> Haiho kakoo hisakoatya holini xoresenae hoka waikoo xawatyahene. Hatyaoseta ohiro tifalo haliya xane amematyoa, kasani xoima tyoahena hoka nisene aokowita.

<sup>5</sup> Hatyaoseta ohiro awenakisa haisani enamokose. Hatyo xoima atyoite inityohaliti hena hoka tyotya haliti hotyaliharenae xekohase tyaona kamatihera kase kakoo. Xakore hoka xoima tyaona taita hoka kakolatya enokoa nali Enore haliya, enokahakala haliya. <sup>6</sup> Hatyaoseta ohiro tekoa maharexakaharekoa. Enore koxaka memere enaheta maniya moka. Nalite kakaxaikotyaka, exahe katyaisaka hare 1.260 ferakene.

<sup>7</sup> Hatyaoseta xaisakakoati tyaona enokoa. Miguel hanjoxanai kakoo, xalijinihare kakoo owi kalorexe hanjoxanae kakoo xalijiniharetere xahita. <sup>8</sup> Xakore hoka owi kajiyahaotyaka hoka maisaiya aliyakere hawakanehare anjonae kakoo enokoa tyoahenahitaha. <sup>9</sup> Hatyaoseta owi kalorexe kaxawatyakeheta enokoata waikohekoa xeta enanjoxanai kakoo. Hatyo atyo toahiyere owi kinohare. Tihanare, Ahalakoahaliti xoaha nexarexe. Tyotya haliti maoseraitere.

<sup>10</sup> Hatyaoseta nasema iraiti kintatyaxa enokoa nali. Ni-ta: — Kalini atyo Enore hotikisa haiyaterere hoka hakaxaikonehare hotyalinai waiyexe maniya exomokala ferakene atyo hikoa. Exahe Enore Kalorexe Aohenere tehitiya ite kalorexe tyaohena. Hiyaiya, wihinaeharenai niraeharetyase kaxawatyaka waikohekoa. Hatyo atyo iraeaharetita ene wihinaeharenai Enore hiye fera. Ferakoa, makiya hoka maisa halakisare hairaeharera. Hoka kalini atyo kaxawatyakeheta. <sup>11</sup> Hoka wihinaeharenai jiyahaotene Kalanero Mokose timalaxa hiyeta, exahe Iraitu Waiyexe xakaihenahere hiyeta. Memere ene tyaonahitaha haxaisakaha naheta, wainiha maheta. <sup>12</sup> Hiyeta xihalalaharehena enokoa, exahe xiso xisaoniterenae enokoa. Xakore hoka waikoa, onexa tyaoniterenai ite hoka kirakoane tyaonehena. Hiyaiya, Tihanare exoaheta xomana xisaonitere nali hoka ehareta kalore. Waiyoreta atyo maisa wahehetare hawenane kakoa hoka — nexa.

<sup>13</sup> Owi kalorexe kakijiye exoaheta waikohekoa hoka hatyo najikinita kehexaharetyoaheta hoka xalijiniharehena hatyo ohiro xoima enamokose awenakihenere hiye. <sup>14</sup> Xakore hoka ohiro ana kaxekaka aliwa tane ainakoa maheta hawenakala maharexakahare xeta. Nalite kakaxaikotyaka hanama terehokoane mokotexe maisa owi xoana mokitene maheta. <sup>15</sup> Ohiro tekoahena hoka owi hakanasakota kaloxa one aihikoatyata one kaloxere akere ohiro xema, one kolatyata maheta ohiro. <sup>16</sup> Xakore hoka waikohe kahinaetya ohiro. Toloko kaloakore kaotyaka hoka owi kalorexe hakanasakota one aihikoakehenere wiroloka hoka aisoakisa. <sup>17</sup> Hatyaoseta owi kakijiye masakare ehare ohiro hiye. Maisa xoare tyomita ohiro kakoa hoka xalijiniharehena ityaninai, ijikolaharenai xahita. Hatyonai atyo Enore niraene xema tyaoniterenae, exahe iraitu Jesus hotikihenere xema tyaoniterenae. <sup>18</sup> Hatyaoseta owi kakijiye xane amematyoya kaiholokoa one kaloxere kilihi.

### Hinama Kirakahare Kaheneharexe

**13** Hatyaoseta nowaiya hatya kirakahare kahenehare. Onexata atyo hikoita. 7-kaiyehe, exahe hoka 10 xotawa hoka exotawa nihatyaka seriti hoko tyaonita. Ekaiyehenai hiye xairatyoare iraehekoatyati iniyalahare. <sup>2</sup> Hatyo kirakahare nowaiyehenerere atyo motya jini kaxairere. Ikijinai atyo motya urso kiji, ekanase atyo motya leão kanase. Hoka owi kakijiye isa enomana haiyaterere, exahe okahakalati masakare kalorexe tyaona maheta.

<sup>3</sup> Nowaiyehena atyo, hatya ekaiyehe hiye kaxoseharexe kalore hoka maisaiya aliyakere makamaneta, xakore hoka tyameheta. Tyameheta hoka hatyo hiyeta waikohekoa tyaoniterenai hakaharetyoaha hoka tyaonaha kirakahare xema. <sup>4</sup> Tyotyaha awaiyetyaha owi kakijiye, ihalahareha ekakoa kirakahare ana xekohaseti haiyaterere isehenerere hiyeta. Awaiyetyahitaha tehitiya kirakahare hoka nexaha: — Xalaiya hatyo akerehare? Xalaiya aisakakoa ekakoa? nexaha.

<sup>5</sup> Hatyaoseta kirakahare kahalakisaka irae maheta xalini hare kaheneharexe, iniyalahare hare. Hatyaoseta iyateliti kaxekaka enomana kalorexe tyaona maheta 42-ri kaimare niyahare.

<sup>6</sup> Hatyaoseta Enore xaokaka iniyalahare iraehehena. Enexare, Enore tyaonitere nali, tyotyata enokoa tyaoniterenae xaokaka iniyalahare iraehehena.

<sup>7</sup> Hatyaoseta iyateliti kaxekaka enomana hoka Enore koamaniya tyaoniterenai xahita xalijinihare, exahe jiyahaotyahene maheta. Exahe tyotyata haliti hotyalinai haxako xakini iraiterenai, kiyere, iyomere harenae xekohase tyaona maheta. <sup>8</sup> Tyotyata halitinaite awaiyetyaha kirakahare. Hatyonae atyo toahiya Kalanero Mokose kaxaisakehenere nahitita, exahe waikohe maomakaharene xowakiya enxarenaeha maisa xairatyoare tyaonita Kalanero Mokose baber-anexakoa.

<sup>9</sup> Hiyeta hoka xasema xaokowita hoka waiye xasemaxematya: <sup>10</sup> Xala xamanite berexo xane maheta terota hoka berexo ite xane. Xala xamanite kesekase kakoa kaxaisaka maheta hoka kesekase kakoa terotaita kaxaisaka. Hiyeta hoka xityakekohenaira Enore. Maikaite heko xikinaterere ekoamaniya xisaona, exahe berexotyaha xiso, aisaha xiso xoaha hoka.

<sup>11</sup> Hatyaoseta nowaiyehena atyo, nowaiya hatisa kirakahare, waikoata kaotyaka. Hinama exotawa, motya kalanero mokose xotawa. Iræhena hoka exako atyo motya owi kakijiye xako, kahenehare. <sup>12</sup> Hatyo kirakahare waikoata kaotyakehenere atyo hetatiye kaotyakehenere niyaterere kakoare, ehaotita tyaonita hoka. Aiyateretyoa waikohekoa tyaoniterenai xahita, kasani halitinai awaiyetyaha kirakahare onexata hikoahenerere aokita. Hatyo kirakahare kaxosexe hoka tyamexosehetehenerere awaiyetyaha aokita. <sup>13</sup> Hatyo kirakahare waikoatare kahare xalini hare amairakisare tyoma. Irikati enokoata exoakisa waikohekoa tyotyata halitinai haotita. <sup>14</sup> Kirakahare onexatare haoti tyomehenere-nae hiyeta maoseratya tyotyata halitinai. Hatyaoseta irae tyotyata waikohekoa tyaoniterenae hiye hoka tyomaha kirakahare xaemenikotyaka exaiminisakahare niyahare aoka. Hatyo atyo kesekase kakoa xakore kakaxoseharetyaka hoka maisa wainita.

<sup>15</sup> Hatyaoseta kirakahare akerehare tyomaha exaimenekotyaka. Hoka iyateliti kaxekaka kirakahare waikoata kaotyakehenere ana hoka exaimenekotyaka kaomakehenere aohoma hoka iræxe tyaona, hoka maxawaiyerehenerenena aisa maheta. <sup>16</sup> Hatyaoseta kinaterere hoka tyotyata halitinai kakaferoxatyaka aoka ewaotyaliha ifihiniha hiye, ityaolikoa xoaha. Kaoloxerenai, maoloxahrenai, mawakahareneharenai, wakaharenai xoaha tyotyata halitinai kakaferoxatyaka aoka. <sup>17</sup> Makaferoxatyakaharenaiya maisa aliyakere betetita, iyahitaha xoaha. Maisa Kirakahare nexare kakoare, maisa eferoxa kakoare kakaferoxatyakita hoka.

<sup>18</sup> Exe akiti atyo waiyorexe niyahare. Xawaiyoriya xihatita hoka kirakahare feroxiya waiyekehalakita xomana, xaiyateretyoa hoka. Eferoxa atyo hatya haliti nexare, eferoxa atyo 666.

### Kaiyakehetehenerenae Tahi

**14** Hatyaoseta nowaiyehena atyo, nowaiya Kalanero Mokose. Tityoita tyairi Sião heno, 144.000-hare haliti tyaonita ehaliya. Enexare, Enexe Enore nexare xoaha xairatyoare tyaonita ityaolinaiha koa hiye. <sup>2</sup> Hatyaoseta nasema enokoata iraiti, motya kalorexex wamolo. Motya tehitiya one kalorexex talolola. Motya tehitiya halitinai aimahalikijita ene harpa. <sup>3</sup> Hatyo 144.000-hare haliti Enore nokahakala haliya tyaonita, exahe hatyo 4-harenai, 24-hare inityohalitinai xoaha haliya tyaonahitaha. Xerahitaha waitare xerati xaka. Hatyo 144.000-hare taita atyo waiyore hatyo xerati kakoa hoka maisaiya atyo aliyakere hatya waiyoreta ekakoa. Hatyonai atyo koxaka waiyex maniya kaxomokaka halitinai konita hoka. <sup>4</sup> Iniyalahare heko maomaneharenax, ohiro mawatyaliniharenai hoka. Xanahitaha Kalanero Mokose xema, aliyo xamani xanehena hoka. Hatyonax hotohare atyo kaiyakeheta halitinai konita Enore ana, Kalanero Mokose ana. <sup>5</sup> Maisa xoana xowaka maoseratyareha. Waiyexex kaiserehareha, maisa xoare hare iniyalahare tyomareha.

### Hanama Anjonai Xakaini

<sup>6</sup> Hatyaoseta nowaiya hatya anjo, eno akiya ainakoitax. Iraitix Waiyexex matyotenehare kakoare, xakax maheta haliti hotyalinax waikohekoax tyaoniterenax hiyex, hahotyalihare, haxakox xakini iratereharenaex, kiyerex, iyomere harenax hiyex xakax maheta. <sup>7</sup> Anjox xanex hokax nexax: — Ximairehena Enore, xaixakerehena enerore. Hiyaiyax, Enore halitinax tyomehenerex akeretax xomotene ferakene hikox. Xihalaharehena ekakox, xawaiyehena etake waikohekoax, enokox, one, onese-nax hare tyomehenerex — nexax kinatyaxax irax.

<sup>8</sup> Hatyaoseta hatya anjox tyox exemax hokax nehitiyax: — Wenakalati Babilônia kamawenekoaretyakeheta. Hatyox nali tyaoniterenax isa haolone vinhoxa tyotyax haliti hotyalinax anax hokax erakisahitene, ahekakakisahitene — nexax kinatyaxax irax. (Enawenanehax iniyalahare xaokakax “oloniti vinhoxa”, nita)

<sup>9</sup> Hatyaoseta hatya anjox jiyax hatyox hinamahare xemax hokax nexax: — Xalax xamاني atyox ite kirakahare, exaimenekotyaxax xoahax awaiyetyax, exahe kakaferoxyatyaxax ityaolikox xamاني, ewaotyali hiyex xamاني hokax <sup>10</sup> Enore nolone vinho ite terax, makaolatyakahare ehahenerex haxeharene nitinihare akox. Hokax kehexaiyax Enore xeharene — nexax. (Enore xeharene xaokakax “Enore nolone vinhoxa”, nita). — Hokax kaxawatyakaitex irikati enxofre kakoare keriterex aose nali anjonax waiyexex haotitax, exahe Kalanero Mokose haotitaite hokax makawatiharehaxite. <sup>11</sup> Irikati ekeralisakalaha jimene ite matyotenehare ainakoahenax. Nali atyox maisax kawinix aka ferakox, makiyax xoahax kirakahare, exaimenekotyaxax awaiyehenerenax ana. Exahe xalax xamاني enexare kakoare hakiti kakaferoxyatyakehenerex ana hokax — nexax anjox kinatyaxax kawiyatyax.

<sup>12</sup> Xasemehenax, xisox Enore wakaneharenax, xisox Enore aokitere akeretax tyaoniterenax, exahe xisox tyakekoterenax Jesus: Maikax xaiyateretyox heko xisaonax mahetax exemax maniya.

<sup>13</sup> Hatyaoseta nasemax iraitix enokoata hokax nexax nohiyex: — Exe haxairahenax — nexax. — Waiyex kaiserehare atyox xalanax xamاني kalikinitax Enore koamانيyax tyaoniterenax wainihenax hatyakekone kakox — nexax. — Há, aliterex aokitax — nexax Isekohaliti Waiyexex. — Wainihenerex najikinitax atyoxite kawinihenahax hahatenehax nonitax. Enómanenaxite maisax kamaotyanytyakita — nexax.

### Hananehaliti Xirikotyaxax Waikohekoata

<sup>14</sup> Hatyaoseta nowaiyehenax atyox, nowaiyax kaiminix iyomere hokax hatyax tyokitax eheno, motyax halitix. Eserix hiyex seritihokox ouro nomakere hokax ekahekoax kataikore ekawetyakahare tyeonitax.

<sup>15</sup> Hatyaoseta hatyax anjox hikox Iraexatyakalati Hanakotax hokax kinatyaxax kawisax kaiminix heno tyokitere ana: — Hahahenairax kataikore kakox hokax hirikohenax hananehalitix. Hiyaiyax, ixirikotyaxax ferakene hikox, waikohe memere tyeonitax kaximexakoatyaxax mahetax — nexax. <sup>16</sup> Nexax hokax kaiminix heno tyokitere kataikore kakox hahenax waikohekoax hokax hananehalitix irikotyax.

<sup>17</sup> Hatyaoseta nowaiyehitix atyox hatyax anjox hikoxahenax Iraexatyakalati énokox naliyex Hanakotax. Hatyox tehitiyax kakataikorere ekawetyakahare. <sup>18</sup> Hatyaoseta hatyax anjox irikati kaxaikotere hikox keratyakalati aose-tax. Hikox hokax irax anjox kataikore kahekoare hiyex: — Hiyane hahahenax kataikore kakox waikohekoax. Hiyaiyax, uvalinaityax koxakax xonax, hiyane hirikohenene — nexax ihiyex kinatyaxax kawiyatyax.

<sup>19</sup> Nexax hokax anjox xanex waikohekoax hakax mahetax kataikore kakox. Irikotyax uva xawanax ekate hiyeta hokax xawatyahenex kakatyakalati kalorexex akox. Enore xeharene xaokakax, “Kakatyakalati kalorexex”, nita. <sup>20</sup> Uvalinax kaxawatyakahax enakox hokax kakatyaxax wenakalati nonitax haware. Kakatyakalati akotax kaisex hokax timalatix hikox enakotax hokax kahekoaxax hokax hatekoxehenax, kawalox kanasakolihi akeretax ehatekoxene. Hatyaoseta jiyaxax xanex 300 kilometronex.

### Anjonax, Exahe Miyanitiyex Kahehalitinax

**15** Hatyaoseta nowaiyax xolnix hare metaharexex kalore enokox nali, kahenehare. — Xoare naheteralax — nomi mokax. Nowaiyax 7-hare anjonax, 7-kahehalitix kakoarenax, miyanitiyenax. Hatyoharenax kakox Enore xeharene tyoteheta.

<sup>2</sup> Hatyaoseta nowaiyax one, motyax balaxokox taosexax ekaolatyakahare irikati kakox. Nowaiyax tehitiyax kahare halitinax, tityoahitahax hatyox onexax motyax balaxokox taosexax haliyax hokax aemahalikisahitahax harpax Enore isehenerex enomanahax. Hatyonax atyox waikohekoax tyaonitatere xowakiyax kirakahare, exahe exaimenekotyaxax, eferoxax hotikijitex enexare xoahax

jiyahaohenerenai. <sup>3</sup>Xerahitaha Enore wakanehare Moisés xerane, exahe Kalanero Mokose xerane tehi-tiya. — Xekohaseti Enore, Hiso atyo maxaixahityakahare niyaterexe. Hománenae waiye kaiserehare, kalore atyo. Hiso atyo tyotyta haliti hotyalinae Xekohase. Waiye kaiserehare atyo hiyahekolanae exahe hisomitereharenae hoka. <sup>4</sup>Xalaiya maisa mairita hiso, Xekohaseti? Xalaiya maxakainihena waiyexe hitahi? Hiyaiya, Hiso taita atyo iniyalahare maomanehare hisaonita. Tyotyta haliti hotyaliharenae ite tyoa awaiyetyaha Hiso. Hiyaiya, tyotyta hisomehenerenae atyo waiye taita, hakakoa heko kawaiyakita — nexa xerahitaha harpa aimahalikijiterenai.

<sup>5</sup>Hatyaoseta nowaiyehena atyo, Iraexatyakalati Hana nowaiya enokoa nali. Majiholatyoare tyaonita hoka halyako iraitiya kakoare kawaiyakita. <sup>6</sup>Hatyaoseta 7-anjonai, 7-kahehaliti kolaiterenai hikoiraex-atyakalati Hanakota. Linho nimereha, iyoma, weroka xoaha. Ouro nomakere xalatahiyeha. <sup>7</sup>Hatyaoseta hatya 4-harenai Enore nokahakala haliya tyokiterenai konitare isa 7-tinihalitirise hatyo 7-hare anjonai ana. Tinihalitinai ako Enore tyaota minitere xeharene tyaonita. (Kahehaliti xaokaka “Enore xeharene”, nita.)

<sup>8</sup>Hatyaoseta Enore werokene niyaterere ajimakotyiraexatyakalati Hana. 7-kahehaliti 7-anjona kolaitere maxawatyakaharetataiya waikohekoa xeta maisa xala hare hatyoako ijoita.

#### Tinihalitirisenai Enore Xeharene Kakoare

**16** Hatyaoseta nasema iraiti kinatyaxa Iraexatyakalati Hanakota: — Xiyane xehaihena tinihalitirisenai akotare Enore xeharene kakoare waikohekoa — nexa. <sup>2</sup>Nexa hoka hatya anjo xane ehaika tinihalitirise akore waikoa xeta hoka honotihaliti kahenehare kawero kaotyaka kirakahare feroxa kakoa kakaferoxyakehenerenae hiye, exahe exaimenekotyaka xema tyoahenerenae hiye.

<sup>3</sup>Hatyaoseta hatya anjo xane ehaihitiya tinihalitirise akotare one kaloxerexaiya. Hoka one timalaxa tyaona, motya kamati timalaxa tyaona hoka onexaiya tyaoniterenai tyotyta waini.

<sup>4</sup>Hatyaoseta hatya anjo xane ehaihitiya tinihalitirise akotare, hatyo kakoita hanamehena. Ehaikene tyotyta onese, onexanae hoka timalaxa tyaonaha.

<sup>5</sup>Hatyaoseta nasemehena atyo, anjo onenai kaxaikotyasehare atyo nehena: — Ehekoreta hahekotita exe halitinai kakoa hoka exakere hamokahitene, Xekohaseti iniyalahare maomanehare. Hiso atyo toahiyere, kalikiniye xoaha. <sup>6</sup>Koxaka hikoamaniya tyaoniterenai, exahe hiraene xakaisaseharenai hoka aisaha. Timalati waiyeta enomanaha hoka hatyo hiyeta hisa timalati enomanaha terahene maheta. Nikare iniyalahare tyomaha kahare hoka ehokoreta nikare hamokahitene — nexa anjo onenai kaxaikotyasehare.

<sup>7</sup>Hatyaoseta nasema iraiti keratyakalati aoseta, nita: — Alitere aokita, Xekohaseti Enore maxaixahityakahare niyaterexe. Hahekohenerenae, hisomehenerenae xoaha atyo waiyexe, ehokorexe taita.

<sup>8</sup>Hatyaoseta hatya anjo ehaihitiya tinihalitirise akotare kamae heno. Hatyo kakoita 4-hena. Hatyaoseta kamae masakare watya tyaona hoka keralijita halitinai. <sup>9</sup>Kakeralisakaha irikati kakoa hoka iniyalahare iraeaha Enore, kahehaliti xekohasehare xaokaka. Maisa halakisahitaha iniyalahare háomaneha, exahe maisa aexakerityareha Enore.

<sup>10</sup>Hatyaoseta hatya anjo ehaihitiya tinihalitirise akotare kirakahare nokahakalaose heno, hatyo kakoita 5-hena. Exoa enawenakala nali hoka makaliro tyaona, kawenaliyerenai hiye hoka tyalokehekoatyaha haniniseha. <sup>11</sup>Honotihaliti tyaonitere ihiyeha, exahe kawetere ihiyeha xoaha hiyeta, kahare iniyalahare iraeaha Enore enokoa tyaonitere xaokaka. Xakore hoka maisa halakisareha iniyalahare háomaneha.

<sup>12</sup>Hatyaoseta hatya anjo ehaihitiya tinihalitirise akotare one Eufrates xaiya, hatyo kakoita 6-hena. Exoa exaiya hoka makala, xekohasetinai kamai nihikoane maniyata tyoiterenae waiye imahotyoha maheta.

<sup>13</sup>Hatyaoseta nowaiya hanama isekohaliti ewaxirahare, motya kali. Hali hikoia owi kakijiye kanasakota, hali hikoia kirakahare onexata hikoahenere kanasakota, hali hikoia iraiti xakaisasehare metalahare kanasakota. <sup>14</sup>Hatyonai atyo tihanare kaisereharenai, exahe xoalini hare maomakahare, mawaiyakahare hoka tyomahitaha halitinai tyakekoahene maheta. Xaneha ite waikohekoa nihatyaka tyaoniterenai xekohasenaiha ana, ahohisakoatyahene hoka Enore maxaixahityakahare niyaterexe haikoahaneheta ferakene hikoahena hoka xaisakakoati tyomaha maheta.

<sup>15</sup> — Xasemehena, kaiwarexe akereaita nomaxatyahakihareta notyoheta waikohekoa xeta. Xiriharira xawenane kakoa, iniyalahare ximaomanehare xisaona maheta. Waiye kaiserehare atyo xala xamani kexehaikohare tyaonita hoka haima waiye mokita hoka maisa maimahiro tonita maheta haliti hisoakere koni hoka haihareta maheta — nexa Xekohaseti Jesus.

<sup>16</sup>Hatyaoseta hatyo hanama tihanare ahohisakoatyaxekohasetinai Armagedom aokahitere nali. Hatyaose atyo hebraico kaixarera.

<sup>17</sup>Hatyaoseta hatya anjo ehaihitiya tinihalitirise akotare hoholati koni, hatyo kakoita 7-hena. Ehaikene hoka iraitihena Iraexatyakalati Hanakota, Enore nokahakala aoseta: — Wahikoa imiyanaose! nexa kinatyaxa kawiyatya.

<sup>18</sup>Nexa hoka kahihiyenae, iraitinae, talolorenae, kalore xairirikoati harenae tyaona. Tyotyta haiyanae xahere kahenehare. <sup>19</sup>Hatyaoseta kalokoare wenakalati ehokoa hoka hanamakoa tyaona. Tyotyta wenakalatinae, hakiti tyaoniterenae kamawenekoaretyakeheta. Hoka Enore otya wenakalati kalokoare Babilônia hoka isa enomana haolone vinhoxa haitinihare akotare, tera enolone maheta. Exeharene nolone.

<sup>20</sup>Hatyaoseta onexa tyaonitere iyolirotinai maiyareheta, exahe tyairinai hoka maisa kawaiyakehitita.

<sup>21</sup>Hatyaoseta one isemaxa kakoare halitinai hiye. Iyekolinai atyo kalore, halita iyeko atyo timena, 40-kilo-

ne atyo. Halitinae kahare iniyalahare iraeaha Enore tahi iyeko kakoare onehenere ihiyeha hiyeta, kahenehare kaiserehare hoka.

### Enatyalolo Kahenehalolo

**17** Hatyaoseta hatya anjo 7-hare, 7-rise tinihali-tirise kakoare konitare tyoa iraeheha nokakoi: — Hisohena hoka enatyalolo kahenehalolo mawenekoaretyakeheta nahotikisa homana, iniyalahare enómanenai nahalakoa. Hatyo wenakalati atyo tyaonita kahare onexanai haliya. <sup>2</sup> Haliti hotyalinai xekohasenai watyali hatyo ohiro kahaliki hoka iniyalahare tyomaha ekakoa kahare. Exahe waikohekoa tyaoniterenai teraha enolone vinhoxa hoka hekaha — nexa. (Enawenane iniyalahare xaokaka “Enolone vinhoxa”, nita.)

<sup>3</sup> Hatyaoseta Enore Nisekohare kahinaetya natyo hoka anjo xane nokakoi maharexakiti. Nali wahikoa hoka nowaiya hatya ohiro. Tyokita kirakahare xotere heno. Kahare iraehekoatyati xairatyoare tyaonita ihiye. Hatyo kirakahare atyo 7-kaiyehexe, 10-xotawere.

<sup>4</sup> Hatyo ohiro nima atyo xotere, tihorere xoaha, karore taita. Ouro, sehalise kaxaimanexe, pérola xoaha kakoa mokahalotyoi. Tokitere tinihali-tirise ouro nomakere ako atyo kaise tyaonita kahiharetyakere, exahe ewaxirahare taita enenatyalone hiyeta. <sup>5</sup> Ityaolikoa enexalo xairatyoare tyaonita, metahare, maisa komita waiyekehalakere. Exakerexe enexalo: “Kalorexe Babilônia, tyotyia enatyalolonai nityo, exahe iniyalahare nomaseharenai nityo”.

<sup>6</sup> Hatyaoseta nowaiyehena atyo, hatyo ohiro atyo hekita. Enore wakaneharenai timalaxa, exahe Jesus niraene xema tyoahenerenae hoka wainihenerenae timalaxa tera hoka hekita. Nowaiyene hoka, — Kaxiyanira — nomi moka, nomawaiyehare kalore.

<sup>7</sup> Hatyaoseta anjo axa natyo: — Xoana hoka hi-mawaiyehareta? Nawaiyekehalakatyaita exe ohiro tahi homana, exahe kirakahare 7-kaiyehexe 10-xotawere tahi tehitiya. <sup>8</sup> Exe kirakahare hiyaiyehenere atyo kafaka maniya tyaonita ene hoka kalikini atyo maisa tyoahetere. Toloko kalorexe akota ite hikoaheta hoka kamawenekoaretyakeheta. Halitinai nexare maxairatyakahare tyaonitere hetati xowakiyata, kalikini kijiya ite Enore baberanexakoa waiyaha kirakahare hoka hakaharetyoaha. Hatyo kirakahare tyaonita ene hoka waini. Xakore hoka haxowakaite kaotyakehetehitiya — nexa anjo nohiye.

<sup>9</sup> — Exe akiti atyo waiyoliniti, irihaliniti niyahare, maisa mahowitihare waiyoretyaka xini. Waiyira hase-mehena niraini. 7-kaiyehiti atyo 7-tyairinai aimenekoita. Enatyalolo nawenakala atyo 7-tyairi henose tyaonita. Exahe tehitiya hoka 7-hare xekohasetinae aimenekoita. <sup>10</sup> 5-hare atyo koxaka waini, hoka hatya atyo kalini xekohaseti tyaonita. Hatya atyo maisa kaotyakehenere. Kaotyakaite hoka maisa waha tyaonita. <sup>11</sup> Hatyo kirakahare kafaka maniya tyaonita ene hoka kalikini atyo maisa tyoahetere. Xakore atyoite hoka kasehetaite hoka 7-harenai hinaite tyaoa hoka

ehohisakoaneha ite 8-hareha. Hoka hatyo kirakahare atyoite kamawenekoaretyakeheta.

<sup>12</sup> — Etake 10-xotawati hiyaiyere atyo aimenekoita 10-xekohasetinai. Kalikini atyo maisa xekohaseti tyoahenere. Hoka kirakahare ite kalorexe tyaoa hoka iyateliti ite kaxekaka enomanaha hoka xekohaseti tyoahenaha kirakahare kakoa. Xakore hoka maisaite waha xini, “uma hora” taitaite tyaoaha. <sup>13</sup> Hatyo 10-hare xekohasetinai ite hakakoa ahokohenaha, haiyateraha kakoa kahinaetyaha taita kirakahare maheta.

<sup>14</sup> Aisakakoahenahaite Kalanero Mokose kakoa hoka Kalanero Mokose ite jiyahaotyahene. Hiyaiya, hatyo atyo xekohasetinai Xekohase, kalorexenai Kalorexatira xoaha atyo hoka hahinaeharenai kakoaite jiyahaotyahene. Ihinaeharenai atyo Enore aohenerenai hao-mana, exahe Enore aokitere akereta tyoahenerenai — nexa anjo nohiye.

<sup>15</sup> Hatyaoseta anjo nihitiya nohiye: — Onexanai hiyaiyehenere enatyalolo tyaonitere nali atyo aimenekoita waikohekoa nihatyaka tyaoniterenai, tyotyia haliti hotyalinai, kiyere, iyomere, haxako xakini iraeterenae xoaha. <sup>16</sup> Etake 10-xotawati hiyaiyere tehitiya atyo xekohasetinai hoka hatyonai, exahe kirakahare xoaha ite ehareha ohiro hiye hoka tyotyia ite ixiyehalo iyehenahitaha enonita hoka maimahiro halakisahene. Nisahaite enete, exahe irikati kakoa ite mawenekoaretyahene. <sup>17</sup> Enore atyo emahiyaseha hiye exahokolaha moka, xoare xamani aokita hoka haxahokolita ahokotyaha maheta. Exahe tehitiya hoka kirakahare ana haiyateraha isaha hoka kalorexe tyaoa maheta, Enore niraene aokitere akereta kaotyakene kijiya. <sup>18</sup> Ohiro hiyaiyere atyo aimenekoita wenakalati kalorexe. Tyotyia waikohekoa xekohaseti tyaoniterenae wakatitere.

### Babilônia Mawenekoaretyaka

**18** Hatyo najikinita nowaiyehena atyo, hatya anjo exoahena enokoata, kinaterexe. Aokanatyia, werokakoa moka waikohekoa hakakoare. <sup>2</sup> Exoa hoka kinatyaxa kawiyatya: — Wenakalati kalorexe Babilônia kamawenekoaretyakeheta. Kalikini atyo tihanare, isekohaliti ewaxirahare tyaonita enakoa, exahe xalini hare kotehala kaiyalaharexe taita tyaonita hatyo wenakalatyaose. <sup>3</sup> Hiyaiya, isa haolone vinhoxa waikohekoa nihatyaka tyaoniterenai ana, exahe aiyatolotyao exahitaha iniyalahare tyomaha maheta hatyo akereta. Xekohasetinai koxaka iniyalahare tyomaha hatyo ohiro kakoa. Exahe xiyehaliti betetyaseharenai kaoloxere, kaxiyeharexe tyaoaha enawenane ewaxirahare hiyeta — nexa.

<sup>4</sup> Hatyaoseta nasemehitiya hatya iraiti enokoata: — Xahikoahetehena hatyo wenakalatita, nokaxaikoni-harenai, waiya aliya hoka iniyalahare xisoma tyomitere akereta hoka iniyalahareya xikaxomokaka ekakoa.

<sup>5</sup> Hiyaiya, iniyalahare enómane atyo kahare, komita ene xane enokoa hikoa hoka Enore otyaxemaita iniyalahare enómanenaeha — nexa.



<sup>6</sup> — Iniyalahare tyoma kalore hoka maika hatyo nahalako iniyalahare kaxomokaka kalore hinamaki. Maika kakaisetyaka initinihare ako hinamaki enomana erati ijitere xomana akereta hoka tera hoka kehexene. <sup>7</sup> Ahinityalo aeroretyoawi aokowita ene, kehala tyaona aokowita xoaha. Maika hatyo nahalako makawatihalo tyaona, kalore amaikohalo. Hiyaiya, exakere iraeta: “Natyo atyo xekohasetinero, maisa atyo nowainyanenero xini, maisaiya xoana heko no-makawatita”, nita. <sup>8</sup> Hatyo hiyetaite haferakenetaite kahehaliti, xamaikohaloti, nakiti harenaite kaoka enomana. Hatyaosetaite kakerahaotyaka irikati koni. Hiyaiya, Xekohaseti Enore emawenekoaretyasehare atyo kinatere kaiserehare — nexa anjo.

### Waikohekoa Tyaoniterenae Tiyaha Ekawa

<sup>9</sup> Kakerahaotyakehenaite hoka jimere ite, ‘Boxó’, nexa hikoahena ihiyeta hoka xekohasetinaite waiyahene hoka amaikohareha, tiyehenahaite ekawa. Koxaka iniyalahare tyomaha ekakoa, exahe kehala tyaonaha enawenakalakoa nali hoka. <sup>10</sup> Ekerene ite waiyaha hoka sekotaite wahakotyaha enomana, mairahitaha hakeralisakaha kakoa hoka. — Akairaki, kirakoane hisaona wenakalati Babilônia. Kalorexe, kinaterexe xoaha xakore hiso hoka haxerore hikamawenekoaretyakeheta. Haxerore, motya “uma hora” kakoa taita ene hikamawenekoaretyakeheta hománe iniyalahare hiyeta — nexahaite.

<sup>11</sup> Xiyehaliti betetyasenai tehitiya ite amaikohare, tiyaha ekawa, maisa xala hare iyehetere ixiyehareha hoka. <sup>12</sup> Maisa xala hare iyehitita ouro, prata, sehalise kaxaimanexe, pérola harenai enonyahitaha. Maisa xala hare iyehitita linho waiyeharexe, imiti taose tihorere, seda harenai, exahe kalanero niyali nomakere xotere. Exahe atya taose waiyeharexe, aikoliti nomakere, atya taose karore hoka maisa xala harenai iyehitita enonyahitaha. Maisa xala hare iyehitita bronze, kamatihera, mármore harenai enonitaha. <sup>13</sup> Maisa xala hare iyehitita canela, airaxero, incenso, vinhoxa, koloteniti, trigohe, trigose, harenae enonyahitaha. Maisa xala hare iyehitita kalanero, bowi, kawalo karosa kakoita, wakaharenai, halitinai inisekohare kakoita enonyahitaha hoka hatyo hiyeta amaikohareha, tiyaha kalore.

<sup>14</sup> — Tyotya xalini hare hawaiyetitereharenai kamawenekoaretyaka honita. Exahe tyotya xalini hare hixiyeharenae waiyexe, karore harenai hoka, maisaite xoana xowakata hikaokihititene — nexa xiyehaliti betetyaseharenai irae wenakalati xaokaka.

<sup>15</sup> Kahare xiyehaliti betetyasenae kaoloxere tyoahenerenae hatyo wenakalati nali ite sekota tyoahena mairahitaha iniyalahare haxomokakaha ekakoa hiyeta. Kawisaha, tiyaha ite. <sup>16</sup> — Akairaki, kirakoane wenakalati kalorexe tyoaheta. Isoahitaha ene imiti waiyexe, linho waiyeharexe ako, imiti taose xotere, kalanero niyali nomakere xotere harenae ako. Moka-haretyoahitaha ene ouro, sehalise kaxaimanexe, pérola harenai kakoa. <sup>17</sup> Xakore hoka haxerore, motya “uma

hora” kakoa taita meta tyotya. Xiyehaliti enoheno tyaonitere meta tyotya — nexahaite haosexa kakoa.

Tyotya kanowa kalorexe xekohasena, tonatienae, kanowa hiye hakiterenae, onexa hakiterenae harenae wahakotyaha sekota. <sup>18</sup> Hatyaoseta waiyaha jimere wenakalati kiritere hoka kawiyatyaha: — Maisa xoana xowaka exakerehare wenakalati kawaiyakere — nexaha. <sup>19</sup> Xawatyaha waikohese haseraha heno haxamaikoharene hiyeta. — Akairaki, kirakoane kalorexe wenakalati tyaona. Kalore ene kaoloxere tyoahitaha hoka kanowa kalorexe kakoarenae tehitiya kaoloxere tyaonita ihiyetaha. Xakore hoka haxerore, motya “uma hora” kakoa taita kamawenekoaretyakeheta hoka tyotya meta ixiyehare — nexa tiyaha.

<sup>20</sup> Xihalaharehena, xiso enokoa tyaoniterenai, exahe Enore koamaniya tyaoniterenai, iraiti xakaisaseharenai, iraiti kakoarenae xoaha, wenakalati mawenekoaretyakeheta hiyeta. Hiyaiya, Enore atyo mawenekoaretene iniyalahare mohenero xiso hiyeta hoka katolikoaretya xiso.

<sup>21</sup> Hatyaoseta hatya anjo kinaterexe kolatya sehali kalorexe, nakairati miyohityakala akerehare hoka xawatene onexa hoka nexa: — Exakere ite wenakalati kalokoare Babilônia kaxawatyaka kinatyaxa hoka maisaiya kawaiyakehitita. <sup>22</sup> Maisaiya xala hare aemahalikihitita harpa, flauta, koneta, harenae hoka kasemakehitita hatyo nali. Maisaiya xiyehaliti nomaseharenae kawaiyakihitita, maisaiya nakairati mehetyakala nemahare kasemakehitita hatyo nali. <sup>23</sup> Maisaite exaoseta xaokanatyakalati takoere tyoahitita hatyo nali, maisaite wenakakoati tyoahitita hoka kaiyanityohenero, kaiyanenehenolo hoka ihalaharehenahititaha. Hinakoa xiyehaliti betetyasenae kinatere, waiyore xoaha hoka maoseratyaha haihoxalaha kakoa waikohekoa ni-hatyaka tyaoniterenae — nexa.

<sup>24</sup> Hatyo wenakalatikoa nali kawaiyaka iraiti xakaisaseharenai timalaxa, exahe Enore koamaniya tyaoniterenai timalaxa, exahe tyotya kaxaisakehenerenai waikohekoa timalaxa kawaiyaka Babilônia nali hoka hatyo hiyeta kamawenekoaretyakeheta.

**19** Hatyo najikinita nasema iraiti enokoa, motya hisoaka haliti ene iraeta: — Xaexakerehena Enore! Iyatiheta, xaexakeretyati, iyateliti xoaha atyo Wenorexa anere. <sup>2</sup> Aliterexe, waiyexe taita atyo ahekoi-ta hoka ehokore nikare mokita halitinai. Hiyaiya, hatyo atyo enatyalolo kahenehalore mawenekoaretya. Aiyalaharetita waikohekoarenae nawenane, exahe aijita Enore xema maniya tyaoniterenae hoka — nexaha.

<sup>3</sup> Hatyaoseta kinatyaxa kawiyahenahititaha: — Xaexakerehena Enore! Hiyaiya, kalorexe wenakalati kerehenero jimene atyo ite ainakoaiyeta mene.

<sup>4</sup> Hatyaoseta 24-hare inityohalitinae xekohasetinai, 4-harenae Enore nokahakala haliya tyaoniterenae xoaha exoaha hakaolise kakoa. Meholoakoaha hoka awaiyetyaha Enore, ihalahareha hatyo okahakalatikoa tyokitere kakoa. — Há, nikare tehitiya waokita. Maika Enore kakoa xihalaharehena — nexaha.

### Kalanero Mokose Kaiyanityohenere Hisehare Tahī

<sup>5</sup> Hatyaoseta iraitihena okahakalati nalita: — Xaexakerihena wEnorexa, xiso ewakaneharenai, kalorexe, wakaharenai harenai, tyotyā xiso mairiterenenai, hoka xihalaharehena ekakoa — nexa.

<sup>6</sup> Hatyaoseta nasema iraiti, motya kaharexe haliti niraene, wamolo kalorexe nemahare akereta, exahe onetalolo kinaterexe akereta: — Xaexakerehena Enore! Wenorexa atyo Xekohaseti maxaixahityakahare hoka kalini atyo kalorexe kaiserehare tyaonita, tyotyā haliti hotyalinai Xekohase. <sup>7</sup> Maika wihalaharehena ekakoa hoka waexakeretene, tyotyā xoolini hare enómane hiyeta. Hiyaiya, Kalanero Mokose exanityo aose hikoa hoka ityaonero memere tyaonita. <sup>8</sup> Kaxekaka enomana imiti miratere. Linho waiyexe werokita makaolatyoanehare isoa maheta enako. Enore kaxaikoneharenāe nómāne waiyexe xaokaka “Linho waiyexe”, nita.

<sup>9</sup> Hatyaoseta anjo nexa nohiye: — Exe haxairahena: Waiye kaiserehare atyo kakaxaekatyakehenerenai Kalanero Mokose kaiyanitohenere ana — nexa.

Anjo nehitiya: — Exenāe atyo aliterexe Enore niraene.

<sup>10</sup> Hatyaoseta nexoa nokaolise kakoa, nameholokoa enomana nawaiyetene maheta xakore hoka nexa nohiye: — Awa atyo nikare hisaona. Xoana Enoreyatya natyo hoka? Natyo atyo hihinai, exahe hihinaeharenāe hinai, Jesus hotikihenere xema tyaohenerenāe hinai atyo natyo. Maika Enore taita xawaiyetya — nexa.

Hiyaiya, Jesus hotikihenere xema iraiti xakaisaseharenāe tyaona.

### Kawalo Iyomere Henore

<sup>11</sup> Hatyaoseta nowaiyehena atyo, enokoa atyo totakore tyaona hoka kawalo iyomere kaotyaka hoka hatya tyokita eheno. Enexare atyo Tyakekohatiye, Aliterexe xoaha. Waiyexe taita ahekoita. Xalijiniharehena hoka kaxemerexe taita xalijinihareta. <sup>12</sup> Exosenai werokita, irikati werokene akereta. Eseri hiye hoka seritihoko kahare tyaonita. Exaliti xairatyoare tyaonita ihiye hoka hawawa atyo waiyoreta ekakoa hoka hatyaterere ana atyo maisa waiyekehalakere. <sup>13</sup> Inimanase hoka timalanase. Enexare atyo Enore Niraene.

<sup>14</sup> Enokoatāre sorarenai kahare xaneha exema, kawalo iyomere henorenai makere. Inimanaeha atyo linho waiyexe, iyomere taita. <sup>15</sup> Kawalo henore kanasakota kesekase ekawetyakahare hikoita, hatyo kakoa jiya-haotita tyotyā haliti hotyalinai. Kamatiherakase kakoa ite exekohaseha tyaona. Tyahakehekoatyaitē kakatya maheta uvalinae kakatyakala akore. “Uvalinae kakatyakala”, nita Enore maxaexahityakahare niyaterexe xeharene xaokaka. <sup>16</sup> Inimanase, ehose xoaha hiye xairatyoare tyaonita: “Exe atyo xekohasetinai Xekohase, exahe kalorexenai Kalorexatira.”

<sup>17</sup> Hatyaoseta nowaiya hatya anjo, eno akiya tityoita kamae tyaonitere maniya hoka kinatyaxa kawiyatya kotehalanai eno akiya ainakoitereharenai ana: — Xiso-

hena, xahohisakoatyohena hoka Enore tyaisa xiso hoka xifakatehare. <sup>18</sup> Xisohena hoka xanisa kalorexenai nete, sorare xekohasenai nete, esorarexanai nete xoaha xanisa, exahe kawalo, kawalo henorenae, tyotyā halitinae nete xoaha xanisa, wakaharenai, mawakahareharenai, kalorexe, kiranexe xoaha nete xanisa — nexa anjo kawiyatya.

<sup>19</sup> Hatyaoseta nowaiyehena atyo, kirakahare, exahe waikohekoa nihatyaka tyaoniterenai xekohasenai hasorarexanai kakoita xoaha hohisakoaha, aisakakoaha maheta kawalo heno tyokitere kakoa, esorarexanae kakoa. <sup>20</sup> Aisakakoaha hoka kirakahare kaxotokaka, exahe iraiti xakaisasehare metalahare xoaha. Hatyo atyo kirakahare xema tyaonita hoka tyoma maomakahare kahare ehaotita halitinai tyakekoahene maheta. Halitinai tyakekoha emaoserala hoka kirakahare feroxa kakoa kakaferoxyatyakaha, exahe awaiyetyahitaha kirakahare xaimenekotyaka. Kaxotokakaha hoka hatyaoseta kaseta kaxawatyakaha irikati enxofre kakoa kiritere koni. <sup>21</sup> Tyotyā esorarexanai kaxaisakaha, kesekase hikoitere kawalo iyomere henore kanasakotare kakoa. Kaxaisakaha hoka hatyaoseta kotehalanai, oloho harenāe kaokaha, nisakatyaha hoka fakatehareha.

### 1.000 Terehokoane

**20** Hatyaoseta nowaiya hatya anjo exoahena enokoata. Toloko kaloakorexe majiholatyakala kahekoare, exahe xolatyakalati kamatiherahi timenere kahekoare. <sup>2</sup> Exoa hoka toka owi kakijiyē, etake toahiyere owi kinohare, Tihanare, Ahalakoahaliti xoaha nexarexe. Otokene hoka olatene 1.000 terehokoane niyahare. <sup>3</sup> Otokene hoka xawatene toloko kaloakore hatekore ako hoka jihotene, jafixahiyatene, maisa aliyakere hikoaheta hoka maoserahitiya maheta xini waikohekoa tyaoniterenai. 1.000 terehokoane ite miyatyaha hoka kamaxolatyakeheta xakore hoka maisa atyoite waha xini tyaoheta maxolatyoare.

### Tyakekohatiyenāe Kaseneheta

(1 Coríntios 15.12-23, 35-58; 2 Coríntios 4.14; 1 Tessalonicenses 4.13-18)

<sup>4</sup> Hatyaoseta nowaiya okahakalatinae. Haiyaharenāe tyokita enakoaha hoka hatyo halitinai kalorexe tyaonaha wakatyaha maheta halitinae. Nowaiya tehitiya halitinae nisekohare. Jesus hotikihenere, exahe Enore niraene xakaihenahere hiyeta kaxaisakahenerenāe. Maisa atyo kirakahare koamaniya tyaonahitaha, exahe exaimenekotyaka xema hoka. Maisa tehitiya kakaferoxyatyakahitaha ityaolikoa, ewaotyaliha hiye, maisa awaiyetyahitene hoka. Hatyo halitinae nisekoharenāe kasehetaha, hamilako isoahenahitiyaha hoka kalorexe tyaonaha haxawalita Cristo kakoa 1.000 terehokoane. <sup>5</sup> Hatyo atyo hetatiye kamatinae kaseneheta. Hoka haiyaharenāe wainitereharenai atyo maisa kasehenahititaha, heko 1.000 terehokoane miyane kijiya niyahare. <sup>6</sup> Halitiya kaseheta hetati kasehetehenerenai kakoa hoka waiye kaiserehareya, maisaiya atyo hina-

maki wainihenahititaha, miyanitiye xowaka. Sacerdote-nae ite tyaonaha Enore ana, Cristo ana hoka kalorexex ite tyaohenaha ekakoa 1.000 terehokoane.

### Ahalakoahaliti Jiyahaotyaka

<sup>7</sup> Hatyaoseta ite miyatya 1.000 terehokoane hoka Ahalakoahaliti ite kamaloxatyakeheta exolatyakaoseta <sup>8</sup> hoka xane ite maoserahitiya halitinai waikohekoa ni-hatyaka tyaoniterenai, hatyonai atyo Gogue, Magogue xoaha nali. Ahohisakoatyahene xaisakakoati tyomaha maheta. Ahohisakoatya halitinai hoka hisoaka tyaona, kaiholohe hisoakere one kilihi tyaonitere akereta. <sup>9</sup> Hatyaoseta exaoretyoaha waikohekoa hoka xaneha Enore kaxaikoneharenai tyaonitere nali, wenakalati Enore awaiyetitere nali hoka exahiyahokotyahene. Aisahene maheta. Xakore hoka enokoata irikati exoa hoka mawenekoaretyahene. <sup>10</sup> Hatyaoseta maoserakahenere Tihanare kaxawatyaka irikati enxofre kakoare kiritere koni. Kirakahare, iraiti xakaisasehare metalahare koxaka kaxawatyakehenere nali. Hatyo nalite haxawalita waolititaha menehenaha, ferakoa, makiya xoaha.

### Xaxalisati Miyanitiye

(Atos 17.31-32)

<sup>11</sup> Hatyaoseta nowaiya okahakalati kalore, iyomere, hoka hatya tyokita eheno. Tyoka okahakalatikoa hoka waikohe, enokoa xoaha maiyareheta enahalakoata, maisa kawayakihitita. <sup>12</sup> Nowaiya tehitiya kaminai. Tyotyaha kasehenahitaha, kalorexexenai, kiranexenai xoaha hoka okahakalati haliya tityoahitaha. Hatyaoseta baberanai kaxomerekaka. Hatya tehitiya kaxomerekaka baberane waiyexe. Hatyaoseta halitinae nómanenai kakaixaretyaka baberakoata hoka tyomenahere akereta kaxomokakaha.

### Kamatinae Atyoite Kaseheta

(João 5.25-29; Atos 24.15; 26.8)

<sup>13</sup> Onexa wainihenerenai onexata kaseheta, exahe waikohekoa wainihenerenai waikohekoata kaseheta. Kamatinae nisekohare tyaonitere nali tyaoniterenae tehitiya kaseheta. Tyotyaha wainihenerenai kaseheta hoka xane okahakalati haliya tityoaha. Enómanenaiha kakaixaretyaka hatya, hatya xakini hoka tyomenahere akereta kaxomokakaha. <sup>14</sup> Hatyaoseta kaminai nisekohare tyaonitere akokatyahe kaxawatyaka irikati enxofre kakoare kiritere koni. Hatyo irikati kalorexex kiritere nali wainiterenai atyo wainiha miyanitiye. Hatyo kakoita hinamaki wainiha. <sup>15</sup> Hoka maexareharenai tyaoniterenai baberane waiyexekoa atyo kaxawatyaka irikati kalorexex kiritere koni.

### Waitare Enokoa, Waitare Waikohekoa

(Hebreus 11.10; 12.22-24; Apocalipse 7.15-17)

**21** Hatyaoseta nowaiya enokoa waitare, waikohekoa waitare xoaha. Hoka hetatiye enokoa, waikohekoa xoaha maiyareheta. One kaloxere hoka

maiyareheta. <sup>2</sup> Nowaiya tehitiya Wenakalati Waiyexe, Jerusalém Waitare, exoita enokoata. Enore nalita atyo tyoita, waiyehare, memere tyaonita. Kaiyanenehenolo mokahalotyotolo xane ahalakoaitere hatyaone akere-ta waiyehare. <sup>3</sup> Hatyaoseta nasema iraiti okahakalati nalita: — Kalini atyo Enore nawenatyakala halitinai koni tyaona. Enore ite tyaona enekoniha hoka ekaxaikoneharenai ite tyaonaha. Enore ite tyaohena ehaliya hoka enEnorexaha ite tyaona. <sup>4</sup> Hoka tixosetyahene ite enose xataliha nonitata. Maisaiya wainihenahititaha, amaikoharehenahititaha, tiyehenahititaha, kawehitita ihiyeha. Hatyohare toahiyeharenai atyo kamiyane — nexa kinatyaxa kawiyatya.

<sup>5</sup> Hatyaoseta okahakalatikoa tyokitere nexa: — Kalikini atyo tyotyaha xoalini hare waitare notyomehitiya — nexa. Hoka nexa tehitiya: — Haxairahena niraini. Hiyaiya, exe niraihenere atyo aliterexe, exahe waiye tyakekotyaka — nexa.

<sup>6</sup> Hatyaoseta nehitiya: — Tyotyaha atyo kaomaka. Natyo atyo Alfa, Ômega xoaha. Natyo atyo Hetatiye, Miyanitiye xoaha. Xala xamaniya oinita hoka nisaiya enomana one maxaimaneharetaha, tera maheta one menanehalitiya hikoitere hiyeta.

<sup>7</sup> Xala xamanite jiyahao akatya hoka exakere ite namokene: Enenorexa ite notyaona hoka hatyo atyoite nityani tyaona.

### Iniyalahare Nomaseharenae Atyoite Maisa Xaneta Enore Nawenakala

(1 Coríntios 6.9-10; Gálatas 5.19-21; Efésios 5.1-7; Colossenses 3.5-6)

<sup>8</sup> — Hoka kaxonaseriyenae, matawatyarenai, iniyalahare awaiyetiterekaharenae, haliti faharenae, ohiroarexena, enatyalolonae, haholitaharexena, enore metalahare maniya tyaoniterekaharenae, maoseratyahatiyena xoaha atyo ite kaxawatyaka irikati enxofre kakoare kiritere koni. Nikare ite hoka hatyo kakoita hinamaki wainiha.

### Waitare Jerusalém

<sup>9</sup> Hatyaoseta 7-hare anjonai konitare, hatya anjo 7-rise tinalitirise kahehaliti kakoare tyoa hoka irai nokakoi: — Hisohena hoka nahotikisa homana Kalanero Mokose tyaonero, exanityohenerene maheta — nexa nohiye.

<sup>10</sup> Hatyaoseta Enore Nisekohare kahinaetya natyo hoka anjo kolatya natyo tyairi enoakiyere henose. Hoka hotikisa nomani Jerusalém, Wenakalati Waiyexe enokoata exoahititere, Enore nalitare, <sup>11</sup> weroka Enore werokene hiyeta. Sehalise kaxaimanexe jaspe akereta weroka, motya balaxoko niyomene exaihako kawayakita. <sup>12</sup> Talarehoko wahahare, kalore, talahokoita wenakalati. Ixisoakalanai atyo 12 hoka 12-hare anjo kaxaikotene. Xisoakalatinai hiye 12-hare nexare xairatyoare tyaonita, 12-hare Israel hotyalinai nexare. <sup>13</sup> Hanama xisoakalati kamai nihikoane maniya, nikare hanama xisoakalati one kaokene maniya, hanama xisoakalati tehitiya kamai xisoane maniya, hanama xisoakalati tehitiya tihalo kaokene maniya. <sup>14</sup> Talare-

hoko katyahe 12-sehali hoka hatyoheno talarehoko kaomaka hoka hatyonai hiye Kalanero Mokose niraene kakoarenae nexare xairatyoare tyaonita.

<sup>15</sup> Anjo irahenere nokakoi atyo katyakaserere ouro nomakere, aimenekotya maheta wenakalati, talarehoko, xisoakalatinai xoaha maheta. <sup>16</sup> Wenakalati atyo 4-tonone, enowahahare atyo hakakoa itihoako kakoa. Hatyaoseta anjo aimenekotya wenakalati hoka 2.200-quilometro. Enowahahare, itihoako, enenoakiyene xoaha atyo hakakoa. <sup>17</sup> Hatyaoseta anjo aimenekotya talarehoko nisakone hoka 64-metrone. Halitinai aimenekotitere akereta aimenekotya.

<sup>18</sup> Talarehoko atyo sehali jaspe nomakere, hoka wenakalati atyo ouro taita, motya balaxoko niyomene exaihako kawaiyakita. <sup>19</sup> Wenakalati talahokola katyahe tyaoniterenae atyo sehali. Hawareharexe xakini kakoa xawaiyeharetyakere. Hetatiye atyo jaspe, ihiyetare safira, ihiyetare ágata, ihiyetare esmeralda, <sup>20</sup> ihiyetare sardônio, ihiyetare sárdio, ihiyetare crisólito, ihiyetare berilo, ihiyetare topázio, ihiyetare crisópraso, ihiyetare jacinto, ihiyetare ametista nomakere, eko xoaha.

<sup>21</sup> Wenakalati jiholanai atyo 12, pérola nomakere atyo. Hatya jihore hiye atyo hatita pérola nomakere. Wenakalati nahotira atyo ouro nomakere, motya balaxoko niyomene exaihako kawaiyakita.

<sup>22</sup> Hatyo nali maisa nowaiyita Iraexatyakalati Hana. Xekohaseti Enore maxaixahityakahare niyaterexe atyo nali tyaonita Kalanero Mokose kakoa Iraexatyakalati Hana. <sup>23</sup> Wenakalati naliya atyo maisa xoare maheta kamai, kaimare xoaha aokanaita. Enore werokene atyo aokanakoaitene. Kalanero Mokose atyo exaokanala. <sup>24</sup> Waikohekoa tyaoniterenaite tyaohena exaokanala xema, exekohasenaiha ite kolahena waiyexe hawisekorenai nali xeta. <sup>25</sup> Ferakoata mene ite hoka maisaiya wenakalati xisoakalanai jihotyahitaha. Hatyo nali atyoite maisa makehitita. <sup>26</sup> Waikohekoa tyaoniterenai ite kolatyaha haxiyahare, exahe xoalini hare waiyexe hatyo wenakalati xeta.

<sup>27</sup> Maisaiya xoalini hare iniyalahare ijoita hatyo wenakalatikoa, aiyalaharetene maheta. Maisaiya xoalini hare ewaxirahare kahaiharetyakere, exahe maoseratyahatiye ijoita. Kaxairatyakehenerenai nexare tyaonitere Kalanero Mokose baberanexa waiyexekoa taita ite isoa hatyo wenakalati.

### One Menanehalitiya

**22** Anjo tehitiya hotikisa nomani one iyomaxa jiyaxitere, menanehaliti nonexa. Hikoita Enore, Kalanero Mokose xoaha nokahakala nalita. <sup>2</sup> Wenakalati nahotira nekesaho atyo one jiyaxita. Ali maniya, halakoiya maniya xoaha menanehaliti natyaxa tyaonita hoka hamijini, hamijini xoaha kalita hoka xane hikoita haterehokoane. Ehananae atyo waikohekoa nihatyaka tyaoniterenai wairatyakala. <sup>3</sup> Maisa atyo xoare hare iniyalahare aka hatyo wenakalati nali, hoka maisaiya atyo Enore emawenekoaretyaka aokita. Enore, Kalanero Mokose xoaha nokahakalaite hatyo wenakalatikoa nali tyaona hoka enomanerenae ite

awaiyetyahene. <sup>4</sup> Waiyahaite itiho, enexare ite ityao-likoaha xairatyoare tyaona. <sup>5</sup> Nali atyoite maisa makehitita, hoka maisaiya xoare maheta xaokanatyakalati, kamai xoaha xaokanala hoka aokahitaha. Xekohaseti Enore atyoite exaokanatyakalaha tyaohena. Kalorexe ite tyaohenaha matyotenehare.

### Jesus Tyoaneneheta

<sup>6</sup> Hatyaoseta anjo iraihitiya nokakoi: — Exe iraitinae atyo aliterexe, hoka waiye tyakekotyaka. Xekohaseti Enore Haisekohare ijitere iraiti xakaisaseharenai ana, kalini axikatya anjo hawakaneharenai ana, hotikisa maheta enahetaha maniya kaotyakehenerere. Maisaite waha xini — nexa anjo nohiye.

<sup>7</sup> — Xasemehena! nexa Jesus: — Notyoheta rotaite. Waiye kaiserehare atyo exe iraiti baberanekoa tyaonitere semehenerenai hoka tyakekohenerenae — nexa.

<sup>8</sup> Natyo João nowaiya exahe nasema xoaha tyotya exe akiti. Nowaiyene, nasemene hoka hatyaoseta nexoa nokaolise kakoa, anjo hatyoharenai hotikihenerere nomani nahalakoa, nawaiyetene maheta.

<sup>9</sup> Xakore hoka nexa nohiye: — Awa atyo nikare hisaona. Hihinaehare atyo natyo, exahe hihinaeharenai hinaehare atyo natyo. Iraitu xakaisaseharenae, tyotya tyakekohenerenae iraitu exairatyakahare tyaonitere exe baberakoa hinaehare atyo natyo. Maika hawaiyetya Enore taita — nexa. <sup>10</sup> — Awaira atyo hateroakihena exe babera iraitu kakoare. Hiyaiya, exeharenae kaotyakene okoi enaosehena. <sup>11</sup> Xala xamani iniyalahare tyomita hoka kotare iniyalahare tyoma, xala xamani kaiyaxa hoka kotare kaiyaxa. Xala xamani waiyexe hoka kotare waiyexe tyoma, xala xamani Enore aokitere akereta tyaonita hoka kotare nikare tyaona — nexa anjo nohiye.

<sup>12</sup> — Xasemehena! nexa Jesus: — Notyoheta rotaite. Nakolatya ite noxekani maheta xomana hoka aliyakere xamanite xisomita hoka hatyo nahalakoaita xisomitere akereta nisa xomana — nexa. <sup>13</sup> — Natyo atyo Alfa, Ômega xoaha, Hetatiye, Miyanitiye xoaha. Tyotya xoalini hare nahitita atyo notyaonita, exahe imiyane xowakaite heko notyaonita — nexa Jesus.

<sup>14</sup> Waiye kaiserehare atyo haima tihehetehenerenae. Kanakairahaite atyali menanehaliti kate tare, exahe isoahaite xisoakalati ahota hoka xane Enore nawenakala nali kaokaha. <sup>15</sup> Xakore hoka iniyalahare nomaseharenai, haholitaharexenai, ohiroarexenai, enatyalolonai, haliti faharenai, enore metalahare xema tyaoniterenai, exahe tyotya maoseratyaliyenai atyoite haware kaxomokaka wenakalati nonitata.

<sup>16</sup> — Natyo Jesus atyo naxikatya anjo xiso tyakekohatiye hotyalinai ana xakai maheta exeharenae xihiyee. Natyo atyo xekohaseti Davi jikolahare, natyo atyo xorese kaloliro ferakoahena aokanaitere — nexa.

<sup>17</sup> Isekohaliti Waiyexe, exahe Kalanero Mokose tyaonero xoaha nexa: — Hisohena! nexaha. Semehenerene tehitiya maika nexa: — Hisohena!

Xala xamani oinita hoka maika tyoa hoka tera one menanehalitiya maxaimanehareta.

### Imiyane

<sup>18</sup> Natyo João atyo niraehena tyotyta exe baberakoa naxairahenere iraiti semehenerena hiye: Xala xamaniya exehare haiyanae akiti aexahexatya hoka Enore tehitiyaiya aexahexatya kahehaliti xairatyoare tyaonitere enomana. <sup>19</sup> Xala xamaniya iyeheta haiya akitinae iraiti baberakoata hoka Enoreya iyeheta

enatyaliya menanehaliti natyaliya hiyeta, exahe maxisoaneteneya Wenakalati Waiyexe nali. Exeharenae xairatyoare tyaonita exe baberanekea.

<sup>20</sup> Exeharenae tyotyta waiyehenere nexa: — Alitere ite haxeroreta notyoheta!

Nikare tehitiya naokita. Hisohetehena, Xekohaseti Jesus!

<sup>21</sup> Maika waiye Xekohaseti Jesus kaxaiko xityotyta, xoaha taita.